

बाइबल बीच का कुछ

The Open Chambeali Bible

This Bible is copyrighted by Free Bibles India and made available under a Creative Commons Attribution-ShareAlike 4.0 International License. Original work available at <http://www.free-biblesindia.com>. )

This Bible is provided at the cost of printing by the Digital Bible Society (dbs.org). This Bible, and many others, are available for free download in a variety of digital formats at [dbs.org/bibles](http://dbs.org/bibles).

|                        |     |
|------------------------|-----|
| मत्ती.....             | 4   |
| मरकुस .....            | 26  |
| लूका .....             | 40  |
| यूहन्ना .....          | 66  |
| प्रेरितों के काम ..... | 82  |
| रोमियों.....           | 102 |
| 1 कुरुन्थियों .....    | 111 |
| 2 कुरुन्थियों .....    | 119 |
| गलातियों.....          | 125 |
| ईफीसियों .....         | 129 |
| फिलीप्पियों.....       | 132 |
| कुलुस्सियों .....      | 135 |
| 1 थिस्सलुनीकियों ..... | 137 |
| 2 थिस्सलुनीकियों.....  | 139 |
| 1 तीमुथियुस.....       | 141 |
| 2 Timothy .....        | 144 |
| तीतुस .....            | 146 |
| फिलेमोन.....           | 148 |
| इब्रानियों .....       | 149 |
| याकूब.....             | 155 |
| 1 पतरस .....           | 158 |
| 2 पतरस .....           | 161 |
| 1 यूहन्ना.....         | 163 |
| 2 यूहन्ना.....         | 166 |
| 3 यूहन्ना.....         | 167 |
| यहूदा .....            | 168 |
| प्रकाशित वाक्य.....    | 169 |

# मत्ती

## यीशु जी रा खानदान

1 अब्राहम री ओलाद, दाऊद री औलाद, यीशु मसीह जी रा खानदान।  
 2 अब्राहम का इस्हाक पैदा होया, इस्हाक का याकूब पैदा होया, याकूब का यहूदा अते तिसेरे भ्याळ पैदा होए, 3 यहूदा ते तामार का फिरिस ते जोरह पैदा होए, फिरिस का हिस्त्रोन पैदा होया, ते हिस्त्रोन का एराम पैदा होया, 4 एराम का अम्मीनादाब पैदा होया, अम्मीनादाब का नहशोन, अते नहशोन का सलमोन पैदा होया, 5 सलमोन ते राहब का बोअज पैदा होया, बोअज ते रूत का ओबेद पैदा होया, अते ओबेद का यिशै पैदा होया, 6 ते यिशै का दाऊद राजा पैदा होया। ते दाऊद का सुलैमान तिस जनानी का पैदा होया जेहडी पैले उरिय्याह री लाडी थी, 7 सुलैमान का रहबाम पैदा होया, रहबाम का अबिय्याह पैदा होया, ते अबिय्याह का आसा पैदा होया, 8 आसा का यहोशाफात पैदा होया, यहोशाफात का योराम पैदा होया, योराम का उज़ियाह पैदा होया, 9 उज़ियाह का योताम पैदा होया, योताम का आहाज पैदा होया, अते आहाज का हिजकिय्याह पैदा होया, 10 हिजकिय्याह का मनशिशह पैदा होया, मनशिशह का आमोन पैदा होया, ते आमोन का योशिय्याह पैदा होया; 11 अते कैद होई करी बेबीलोन जाणे रे बेले योशिय्याह का यकुन्याह, ते तिसेरे भ्याळ पैदा होए। 12 कैद होई करी बेबीलोन पुजाए जाणे का बाद यकुन्याह का शालतिएल पैदा होया, 13 जरुब्बाबिल का अबीहूद पैदा होया, अबीहूद का इल्याकीम पैदा होया, ते इल्याकीम का अजोर पैदा होया, 14 अजोर का सदोक पैदा होया, सदोक का अखीम पैदा होया, ते अखीम का इलीहूद पैदा होया, 15 इलीहूद का इलियाजार पैदा होया, इलियाजार का मत्तान पैदा होया, अते मत्तान का याकूब पैदा होया, 16 याकूब का यूसुफ पैदा होया, जेहड़ा मरियम रा लाडा थिया, अते मरियम का यीशु जी जिन्हा जो कि मसीह बोलेया जांदा, पैदा होए। 17 इस तरिके कने अब्राहम का दाऊद ताई चौदाह पीढी होईयाँ, ते दाऊद का बेबीलोन जो कैद होई करी पुजाए जाणे ताई चोदाह पीढियाँ, अते कैद होई करी बेबीलोन जो पुजाए जाणे रे बेले का मसीह ताई चोदाह पीढी होईयाँ।

## यीशु जी रा पैदा होणा

18 यीशु मसीह जी रा जन्म इस तरिके कने होया, जाँ तिन्हेरी अम्मा मरियम री मंगोळी यूसुफ कने होई गई अत्ते तिन्हेरे इक-दुजे रे मिलाप का पैले ई पता चलेया कि मरियम पवित्र आत्मा री सक्ति कने दुपराणी है। 19 इधेरे ताई तिसेरे लाडे यूसुफ ने जे इक धर्मी महु थिया इस गल्ल जो जाहिर करी के महुआं बिच तिस जो बदनाम नी करणा चांदा थिया, इधेरे ताई तिन्हे सोची लेया कि चुप-चाप ई मंगणी तोडी देयाँ 20 जाँ से इन्हा गल्लां रे बारे अन्दर सोचेया ई करदा थिया ता प्रभु रा स्वर्गदूत तिस जो सुपने अन्दर आई करी बोलणा लगेया, “ओ यूसुफ! दाऊद री औलाद, तू मरियम जो अपनी लाडी बणाणे का मत डर, किजोकी जे बच्चा तिसेरे पेट अन्दर है, से पवित्र आत्मा री तरफ का है। 21 तिस ने इक निक्के जो जमणा ते तू तिसेरा नां यीशु रखेयाँ, किजो कि तिनि ए अपणे महुआँ रा तिन्हेरे पापाँ का उद्धार करणा।” 22 एह सब इधेरे ताई होया कि जे वचन प्रभू ने भविस्ववाणी करणे वाळ्येयाँ रे जरिए जे किच्छ बोलेया थिया, से पूरा होई जाओ: 23 “दिखवो, इक कुआँरी ने दुपराणी होणा ते तिस ने इक निक्के जो जमणा, ते तिसेरा नां इम्मानुएल

रखेया जाणा, “जिसेरा मतलब हुन्दा – परमेश्वर म्हारे कने हिन। 24 ता यूसुफ निन्दर का जागी करी प्रभु रे दूत रे हुकम रे हसाब कने अपनी लाडी जो ब्याई करी अपने घरे लेई आया; 25 ते जाँ ताई तिस ने निक्का नी जम्मेया ताँ ताई यूसुफ तिसेरे नेडे नी गेया: अते यूसुफ ने अपने बच्चे रा नां यीशु रखेया।

## जोषतियां रा आणा

2 राजा हेरोदेस जाँ राज करेया करदा थिय्या उन्हा ई रोजाँ अन्दर यहूदिया रे बैतलहम अन्दर यीशु जी पैदा होए, ता पूरव पास्से का मते सारे जोषती यरुशलम अन्दर आई करी पुछणा लगे, 2 “यहूदियाँ रा राजा जिसेरा जन्म होया है, कुते है?” किजोकी असाँ पूरव अन्दर तिसेरा तारा दिखेया अते तिसेरी जै-जै-कार करणा आए रे हिन।” 3 एह सुणी करी राजा हेरोदेस घबराई गेया अत्ते तिस कने यरुशलम रे होर महु बी फिकर बिच पेई गे। 4 ताँ तिनि ए यहूदी समाज रे सब परोहतां रे प्रधानां जो अते सास्त्रियाँ जो इकठा करी के तिन्हा जो पुछेया, “मसीहा जो कुते पैदा होणा चहिन्दा ?” 5 तिन्हा ने तिस जो बोलेया, “यहूदिया रे बैतलहम अन्दर, किजो की भविस्ववक्ता ने इय्याँ लिखे रा है कि : 6 “ओ बैतलहम, तू जे यहूदा री धरती अन्दर है, तू कुसी बी तरिके कने यहूदा रे अधिकारियाँ अन्दर सबका छोटा नी है; किजो कि तेरे बिच का इक अधिपति ने निकळणा, जिनि ए मेरे इस्त्राएल रे महुआँ री दिख-दिख करणी है।” 7 ताँ हेरोदेस ने जोतिषियां जो चुप-चाप सदवाई करी तिन्हा का पुछेया कि से तारा ठीक कुस बेले लिबेया थिया, 8 ते तिनि ए एह बोली करी तिन्हा जो बैतलहम भजेया, “जाओ, तिस निक्के रे बारे अन्दर ठीक-ठीक पता करो, ते जाँ से मिली जांगा ता मिन्जो खबर देई दे ताकि मैं बी आई करी तिस जो नमस्ते करां।” 9 से राजे री गल्ल सुणी करी चली गे, अते से तारा बी जे तिन्हा ने अम्बर बिच दिखेया थिय्या तिन्हेरे अगे-अगे थिय्या चलेया करदा। फिरी जाँ से जगह आई जिन्हे निक्का थिया, उस जगह रे उप्पर तारा रुकी गेया। 10 तिस तारे जो दिखी करी से बडे खुस्स होए। 11 से घरे रे अन्दर गे अत्ते तिन्हा ने तिसेरी अम्मा मरियम रे कने उस निक्के जो दिखेया, ते मुंए रे भारे पेई करी निक्के जो नमस्ते किन्ती, ते अपने-अपने थैलू खोली करी तिन्हा जो सोना, लोबान अत्ते गंधरस री भेंट चढाई। 12 अपण परमेश्वर ने इक सुपने अन्दर उन्हा जो सावधान करी दिन्तेया, कि से वापस हेरोदेस का ना जान, इधेरे ताई से इक दुजे रस्ते का अपने देस जो चली गे।

## मिस्र देश जो जाणा

13 जाँ से चली गे ता यूसुफ जो प्रभु रे इक स्वर्गदूत ने सुपने अन्दर आई करी बोलेया, “उठ, तिस निक्के जो ते तिसेरी अम्मा जो लेई करी मिस्र देस जो नहस्सी जा; ते जाँ ताई मैं तिन्हे नी बोलगा, ताँ ताई तिन्हे ई रेह्याँ; किजोकी हेरोदेस इस निक्के जो मरणे ताई तोपेया करदा है।” 14 ताँ से रात्ती ई उठी करी निक्के अते तिसेरी अम्मा जो लेई करी मिस्र जो चली गेया, 15 ते हेरोदेस रे मरणे ताई तिन्हे रेह्या। इधेरे ताई कि से वचन पूरा होई जाओ जे

प्रभु ने भविष्यवक्ता रे जरिए बोलेया थिया : “मैं अपने पुत्र जो मिस्र का सद्देया। 16 जाँ हेरोदेस ने एह दिखेया, कि जोतिषियां ने तिस कने धोखा कित्तेया है, ता से बड़ा लैहतेया, अते मल्लुआँ जो भेज्नी करी हूकम दित्तेया कि जोतषियाँ रे दस्से रे बेले रे हसाब कने बैतलहम अते तिसरे नेडे-भेडे रे सबनी इलाकेयाँ बिच जे दो साले रे या इसका छोटे सबनां जो मारी दित्तेया जाये। 17 ता से वचन जे यिर्मयाह भविष्यवक्ता रे जरिए बोलेया गेरा थिया, से पूरा होया : 18 “रामाह अन्दर इक करुण-नाद सुणितेया, रोणा अते बड़ा मात्तम, राहेल अपने निकेयाँ ताँई रोया करदी थी, अते चुप होणा नी चाँदी थी, किजो कि से अवे मरी गेरे थिये।”

### मिस्र देश का वापस हटना

19 हेरोदेस रे मरणे का बाद, प्रभु रे दूत ने मिस्र अन्दर यूसुफ जो सुपने अन्दर आई करी बोलेया, 20 “उठ, निके अते तिसेरी अम्मा जो लेई करी इस्राएल रे देस अन्दर चली जा, किजोकी जे निके री जान लैणा चाँदे थिये, से मरी गेरे हिन।” 21 से उठेया, अते निके ते तिसेरी अम्मा जो कन्ने लेई करी इस्राएल देस जो आई गेया। 22 अपण जा यूसुफ ने एह सुणेया कि यहूदिया बिच अपने प्यो हेरोदेस री जगह पर अरखिलाउस राज करेया करदा है ता से तित्ते जाणे का डरेया। फिरी सुपने बिच परमेश्वर का चेतावनी पाई करी गलील प्रदेश बिच चली गेया, 23 अत्ते तित्ते नासरत नां रे सैह अन्दर जाई बसेया, ताकि से वचन पूरा होई जाओ, जे भविष्यवक्ता रे जरिए बोलेया गेया थिया : “तिस जो नासरी बोलेया जाणा।”

### यूहन्ना पतिस्मा दैणे वाळा

3 तिन्हा रोञ्जे यूहन्ना बपतिस्मा दैणे वाळा यहूदिया री उजाड़ जगह अन्दर आई करी ऐ प्रचार करणा लगेया: 2 “अपणे पापा का तौबा करी लेयो, किजोकी स्वर्ग रा राज्य नेडे आई गेरा है।” 3 ऐ सेई एह जिसेरे बारे अन्दर यशायाह भविष्यवाणी करणे वाळे ने बोलेया थिया: “उजाड़ जगह अन्दर इक हक्का लाणे वाळे री अवाज सुणिया करदी है, ‘प्रभु रा रस्ता त्यार करो, तिन्हेरी सड़कां सिधी करो।’” 4 यूहन्ना ऊँट रे बाळां रे कपड़े पाँदा थिया, अते तिसेरी कमर बिच चमड़े रा पट्टा बन्नेरा हून्दा थिया। उसेरा खाण टिड़डे अते जंगली मखीर थिया। 5 ताँ तिसेरे का यरुशलेम, यहूदिया, यरदन अत्ते आस्से-पास्से रे सबनी इलाकेयाँ रे मल्लु तिस का चली आये। 6 तिन्हा ने अपने-अपणे पापा जो मन्नी करी यरदन द्रया अन्दर तिस का बपतिस्मा लेया। 7 जाँ तिनिए मते सारे फरीसियाँ अते सदूकियाँ जो बपतिस्मा लैणे ताँई अपु का आँदे दिखेया, ता तिन्हा जो बोलणा लगेया, “ओ सप्प रे बच्चेयाँ, तुसां जो कुनिए दस्सेया कि तुसा परमेश्वर रे न्याय रे प्रकोप का बची जाणा ? 8 इधेरे ताँई अपने कम्मां रा इदेह्या फळ लियाओ कि जिस कने लग्गो कि तुसां ने अपने पापा का तौबा करी लेरी ए। 9 अते अपने-अपणे मनां अन्दर ऐ मत सोचो कि म्हारा प्यो अब्राहम ए, किजोकी मैं तुसां जो बोलदा कि परमेश्वर इन्हा बटेयाँ का अब्राहम ताँई औलाद पैदा करी सकदा। 10 अवे झॉटू बुटेयाँ री जड़ा पर रखिखतेरा है, इधेरे ताँई जे जे बुट्टा खरा करी नी फळदा, से बड़्डी करी अग्गी अन्दर पाई दैणा। 11 “मैं ता पाणी कने तुसां जो पापा का तौबा करणे रा बपतिस्मा दिँदा, अपण जेहड़ा मेरे का बाद ईणे वाळा है, से मेरे का जादा सक्तिसाली ए; मैं तिन्हेरी चप्पल चुकणे जोग्गा बी नी ए। तिन्हा ने तुसां जो खुद पवित्र आत्मा ते अग कने बपतिस्मा दैणा ए। 12 तिन्हेरा अनाज फटकणे वाळा छज़्ज तिन्हेरे हत्थां बिच है, अते तिन्हा ने अपने खलाडे जो खरा करी साफ करणा, अते कणक जो खत्ते अन्दर इकट्टा करणा, ते भू जो तिस अग अन्दर फुक्की दैणा, जे कदी बी नी बुझणी।”

### यूहन्ना यीशु जी जो बपतिस्मा दिदां

13 उस बेले यीशु जी गलील का चली करी यरदन रे कनारे यूहन्ना का बपतिस्मा लैणे ताँई आये। 14 अपण यूहन्ना ऐ बोली करी तिन्हा जो रोकणा लगेया कि, “मिन्जो ता तुम्हारे का बपतिस्मा लैणे री जरूरत है, अते तुसी मेरे का आये हिन ?” 15 अपण यीशु जी ने तिस जो ऐ जवाब दित्तेया, “इस बेले इय्याँ ई होणा दे, किजोकी असां ताँई सही ए कि ईय्याँ ई सारी धार्मिकता जो

पूरा करन।” ताँ यूहन्ना ने तिन्हेरी गल्ल मन्नी लेई। 16 ते यीशु जी बपतिस्मा लेई करी तिस्सी बेले पाणी का बाहर आई गे, ते दिखेयो, तिन्हा ताँई स्वर्ग खुली गेया, अते तिन्हा ने परमेश्वर री आत्मा जो इक कबूतर साहई उतरदे अते अपने उपराले आँदे दिखेया। 17 अते दिखेयो, ऐ अवाज आई: “ऐ मेरा प्यारा पुत्र है, जिस का मैं बड़ा-भरी जादा खूस है।”

### यीशु जी रा परखेया जाणा

4 फिरी पवित्र आत्मा यीशु जी जो उजाड़ जगह अन्दर लेई गेया ताकि सैतान रे दूत इब्लिस का तिन्हेरी परख होई सको। 2 जाँ यीशु जी चाळी रोज अते चाळी रातां रा ब्रत रख्खी बैठे ता तिन्हा जो भूख लगी। 3 ताँ सैतान यीशु जी का आया अत्ते बोलणे लगेया, “जे तू परमेश्वर रा पुत्र ए ता इन्हा बटेयाँ जो बोल कि ऐ रोटी बणी जान।” 4 यीशु जी ने जवाब दित्तेया, “सास्त्र बिच लिखेरा ऐ, ‘मल्लु सिरफ रोटी कने ई नी जिँदा, अपण से हर इक वचन कने जिँदा जे परमेश्वर रे मुँह का निकळदा।’” 5 ताँ इब्लिस तिन्हा जो पवित्र सैहर यरुशलेम बिच लेई गेया अते मन्दिर री चोटि पर खड़ा करी के, 6 उसने यीशु जी जो बोलेया, “जे तू परमेश्वर रा पुत्र ऐ ता तू इत्ते का छाळ मार किजोकी सास्त्र बिच लिखेरा ऐ: तिस ने तेरी रक्षा ताँई अपने स्वर्गदुतां जो हूकम दैणा अत्ते तिन्हा तिजो हत्थों हत्थ चुक्की लैणा, ताकि तेरे पैरां कने कोई पत्थर तक ना लगो।” 7 यीशु जी ने तिस जो बोलेया, “ऐ बी लिखेरा है: ‘तू प्रभु अपने परमेश्वर जो मत परख।’” 8 फिरी इब्लिस तिन्हा जो इक बड़े ऊँचे पाहड़ पर लेई गेया अते दुनिया रे सारे राज्य अते तिन्हेरी शान दिखाई करी, 9 तिन्हा जो बोलेया, “जे तू मेरे अग्गे झुकगा अत्ते मेरी जै-जै कार करगा, ता मैं एह सारा किच्छ तिजो देई दैणा।” 10 ताँ यीशु जी ने तिस जो बोलेया, “ओ सैतान, दूर होई जा। किजोकी सास्त्र बिच लिखेरा है, ‘तू प्रभु अपने परमेश्वर री ई जै-जै कार कर अते सिरफ उन्हेरी ई सेवा कर।’” 11 ताँ सैतान तिन्हा जो छड्डी करी चली गेया, अते दिखेयो, स्वर्गदूत आई करी यीशु जी री सेवा-टहल करणा लगे।

### यीशु जी रा सेवा रा कम्म शुरू करणा

12 अते जाँ यीशु जी ने ऐ सुणेया कि यूहन्ना कैद करी लिच्छेया गेरा है, ता से गलील जो चली गे। 13 अते से नासरत जो छड्डी करी कफरनहूम अन्दर, जे जबूलून अते नमाली रे इलाके बिच गलील री झील रे नेडे थिय्या, रैह्ले लगे। 14 ताकि जे यशायाह भविष्यवाणी करणे वाळे ने बोलेया थिया, से पूरा होई जाओ : 15 “जबूलून ते नमाली रे देस, समुन्द्र रे रस्ते पर, यरदन झील रे पार, होर जाति रे देस गलील बिच, 16 जे मल्लु निह्यारे बिच जिया करदे थिय्ये उन्हा ने इक महान ज्योति दिख्खी अते जे मल्लु मौत री छौँट बिच रैहन्दे थिय्ये उन्हा पर से ज्योति चमकी।” 17 तिस बेले का यीशु जी ने शुभ-बसेख रा प्रचार करणा सुरू करी दित्तेया, “पापां का तौबा करी लेयो किजोकी स्वर्ग रा राज्य नेडे आई गेरा ए।”

### पैले चेल्लेयां रा सद्देया जाणा

18 जां यीशु जी गलील री झील का जाया करदे थिय्ये ता तिन्हा ने दो भ्याळ, शमौन जिस जो पतरस बी बोलदे, अते तिसेरा भ्याळ अन्द्रियास जो झील अन्दर जाल पाँदे दिखेया। से मछुआरे थिय्ये। 19 यीशु जी ने तिन्हा जो बोलेया, “मेरे पिच्छे चलो। मैं तुसा जो मल्लुआँ जो पकड़णे वाळा मछुआरा बणांगा।” 20 तिन्हा तिस्सी बेले जाल छड्डे अते तिन्हेरे पिच्छे चली पे। 21 तित्ते का अग्गे चली करी, यीशु जी ने जब्दी रे पुत्र याकूब अते यूहन्ना जो दिखेया। से अपने प्यो कने किस्ती पर जाल जो ठीक करेया करदे थिये। यीशु जी ने तिन्हा जो बी सद्देया। 22 से तिस्सी बेले किस्ती अते अपने प्यो जो छड्डी करी तिन्हेरे पिच्छे चली पे।

### यीशु जी बमारा जो ठीक करदे

23 यीशु जी सारे गलील इलाके बिच यहूदी धर्म सभा अन्दर स्वर्ग रे राज्य रे सुभ-बसेख री सिक्सा दिँदे अते हर तरह री बमारियां का खरा अते मल्लुआँ री कमजोरी जो दूर करदे घूमणे लगे। 24 अते सारे सीरिया देस अन्दर

तिन्हेरा बसेख फैली गया; ते महु इदेय सब महुआं जो, जे नेक-बनेकी बमारियाँ अते दुखां अन्दर जकड़ितेरे थिये, जिन्हा अन्दर बुरी आत्मां थियाँ, जिन्हा जो मिरगी आंदी थी अत्ते जे अधरगं रे मारे थिये यीशु जी का लियाणा लगे। यीशु जी ने तिन्हा जो खरा कित्तेया। <sup>25</sup> इधेरे ताँई गलील, दिकापुलिस, यरुशल्लेम, यहूदिया ते यरदन दरिया रे पार का महुआं री भीड़ री भीड़ यीशु जी रे पिच्छे चली पेई।

### यीशु जी रा पहाड़ी उपदेश

**5** यीशु जी ने जां भीड़ दिख्खी ता से पाहड़ पर चली गे। से तित्ते बेहई गे ते तिन्हेरे चेले तिन्हेरे का आये गे। <sup>2</sup> तां यीशु जी तिन्हा जो सिक्सा दैणा लगे :

#### धन वचन

<sup>3</sup> “धन्न हिन् से, जेहडे मने रे दीन हिन्, किजोकी स्वर्ग रा राज्य तिन्हेरा ई है। <sup>4</sup> “धन्न हिन् से, जे मात्तम करदे हिन्, किजोकी तिन्हा जो सांती मिलणी। <sup>5</sup> “धन्न हिन् से, जेहडे निम्ते हिन्, किजोकी तिन्हा ने धरती रे उत्तराधिकारी होणा। <sup>6</sup> “धन्न हिन् से, जेहडे धार्मिकता रे भुख्खे अते प्यासे हिन्, किजोकी तिन्हा जो रजाया जाणा। <sup>7</sup> “धन्न हिन् से, जे दरदयाळू हिन्, किजोकी तिन्हा पर दया कित्ती जाणी। <sup>8</sup> “धन्न हिन् से, जिन्हेरे मन सुच्च हिन्, किजोकी तिन्हा ने परमेश्वर जो दिखणा। <sup>9</sup> “धन्न हिन् से, जे मेल करादे हिन्, किजोकी तिन्हा जो परमेश्वर रे पुत्र बोलया जाणा। <sup>10</sup> “धन्न हिन् से, जिन्हा जो धार्मिकता री वजह कने तंग कित्तेया जांदा, किजोकी स्वर्ग रा राज्य तिन्हेरा ई है। <sup>11</sup> “धन्न हिन् तुसी, किजोकि जाँ महुआं ने मेरी वजह कने तुम्हारी बेजती करनी, अते तंग करणा ते झूठ बोली करी तुम्हारे खलाफ हर तरह री गल्लां बोलणी। <sup>12</sup> ताँ खूस ते मगन होई जायो, किजोकी तुसां ताँई इधेरे बदले स्वर्ग अन्दर ईनाम ए। तिन्हा ने उन्हा भविष्यवक्तां जो जे तुम्हारे का पैले थिये इय्याँ ई तंग कित्तेया थिया।

#### लूण ते रौसनी

<sup>13</sup> “तुसी धरती रे लूण हिन्; अपण जे लूण रा स्वाद बिगड़ी जाओ, ता से फिरी तिस्स जो लूणका नी कित्तेया जाई सकदा जाणा? फिरी से कुसी बी कम्म जोगा नी रेहन्दा। सिरफ इधेरे कि तिस जो बाहर सुडी दित्तेया जाओ ते महुआँ रे पैरां हेठ आई जाओ। <sup>14</sup> तुसी दुनिया री लौ हिन्। इक इदेया सैहर जे पाहड़ पर बस्से रा है, जे लूकाये नी लूकी सकदा। <sup>15</sup> महु दीय्या बाळी करी टोकरी रे हेठ नी रखदा अपण दीवट पर रखदा तां से पूरे घरे रे लोकां जो लौ दिंदा। <sup>16</sup> इय्याँ ई तुम्हारी लौ महुआँ रे साहणजे चमकणा चहिंदी कि से तुम्हारे भले कम्मां जो दिख्खी करी तुम्हारे प्यो री, जे स्वर्ग अन्दर हिन्, बड़ाई करन।

#### व्यवस्था री सीख

<sup>17</sup> “इयां मत समझदे, कि मैं नियम या भविष्यवाणी करणे वाळेर्याँ री कताबां जो खत्म करणे ताँई आये रा है। मैं उन्हा जो खत्म करणे ताँई नी, अपण पूरा करणे ताँई आये रा ए। <sup>18</sup> किजोकी मैं तुसां जो सच्च बोलदा कि जाँ ताँई अम्बर ते धरती टळी नी जांदे, तां ताँई नियम री इक सियारी या इक बिंदी बी, जां ताँई सब किच्छ पूरा नी होई जांदा, तां ताँई नी मिहटी नी सकदी। <sup>19</sup> इधेरे ताँई जे इन्हा छोटे का छोटे हुक्मां बिच का कुस्की इक जो नी मनगा, ते तिय्याँ ई होरनी महुआँ जो सिखांगा, तिनि ए स्वर्ग रे राज अन्दर सब का छोटा होणा; अपण जे कोई इन्हा हुक्मां पर चलगा ते इन्हा जो सिखांगा, तिस्स जो ई स्वर्ग राज्य अन्दर महान मन्नेया जाणा। <sup>20</sup> किजोकि मैं तुसां जो बोलदा, जां ताँई तुसी धार्मिकता बिच सास्त्रियां अते फरीसियाँ री धार्मिकता का अग्गे नी निकळी जांदे, तुसी स्वर्ग रे राज्य अन्दर नी जाई सकदे।

### गुस्सा ते खून करणा

<sup>21</sup> “तुसी सुणी बैठेरे हिन् कि पूरखां कने बोलया गया थिया, ‘कुस्की री जान नी लैणी’ ते जे कोई कुस्की री जान लिंगा ता से कचैहरी अन्दर सजा रा हकदार है।’ <sup>22</sup> अपण मैं तुसां जो बोलदा कि जे कोई अपणे भाई पर गुस्सा करणा से कचैहरी अन्दर सजा भुगतणे रा हकदार है। अते जे अपणे भ्याळ री बेजती करणा से बड़ी कचैहरी अन्दर सजा भुगतणे रा हकदार ए। अते जे कोई अपणे भ्याळ जो, ‘ओ बेवकूपफ’ बोलगा से नरक री अग री सजा भुगतणे रा हकदार ए। <sup>23</sup> इधेरे ताँई जे तू वेदी पर अपणी भेंट चढाया करदा हो अते तिजो चेत्ता आओ कि तेरे भ्याळ रे दिल बिच तेरे खिलाफ किच्छ है, <sup>24</sup> ता अपणी भेंट तित्ते ई छड्डी दे ते पैले जाई करी अपणे भ्याळ कने सुलह कर। अते फिरी आई करी अपणी भेंट चढा। <sup>25</sup> तेरा दुश्मन तिजो कचैहरी लेई चले रा हो अते जां तुसी रस्ते बिच हो, ता तिस जो उस्सी बेले अपणा दोस्त बणाई लै कुदखी इय्यां ना हो कि से तिजो न्यायधीश का देई देयो ते फिरी न्यायधीश सपाई जो। ते तिजो जेल होई जाओ। <sup>26</sup> मैं तिजो सच्च बोलदा तू जेल का तां ताँई नी छूटणा जाँ ताँई तू इक-इक पैसा चुकाई नी दिंगा।

#### व्यभिचार

<sup>27</sup> “तुसी सुणी बैठे रे हिन् कि बोलेया गेरा थिया, ‘व्याभिचार नी करणा।’ <sup>28</sup> अपण मैं तुसां जो ऐ बोलदा, कि जे कोई कुस्की जनानी जो गंदी नजर कने दिखदा ता से अपणे मनां अन्दर पैले ई तिस कने व्याभिचार करी बैठा रा है। <sup>29</sup> जे तेरी सज्जी हाख्ख पाप करणे री वजह बणदी, ता तिस जो कड़ी करी सुटी दे; किजोकी तेरे ताँई एहई खरा है कि तेरे सरीर रे अंगा बिच का इक अंग नास होई जाओ अते तेरा सारा सरीर नरक अन्दर नी सुट्टेया जाओ। <sup>30</sup> जे तेरा सज्जा हत्थ पाप करणे री वजह बणदा, ता तिस जो कड़ी करी सुटी दे; किजोकी तेरे ताँई एहई खरा है कि तेरे अंगा बिच का इक नास होई जाओ ते तेरा सारा नरक अन्दर नी सुट्टेया जाओ।

#### तलाक

<sup>31</sup> “एह बी बोलेया गेरा थिया, ‘जे कोई अपणी लाड़ी जो तलाक दैणा चाओ, ता से तिस जो त्यागपत्र देयो।’ <sup>32</sup> अपण मैं तुसां जो ऐ बोलदा कि जे कोई अपणी लाड़ी जो व्याभिचार जो छड्डी करी कुस्की होरसी वजह कने तलाक दिंगा, ता से तिस का व्याभिचार करवांदा; अते जे कोई तिस छड्डी री जनानी कने ब्याह करणा, से तिस कने व्याभिचार करदा।

#### कसम खाणा

<sup>33</sup> “फिरि तुसी सुणी बैठेरे हिन् कि पूरखां कने बोलेया गया थिया, ‘तू कसम मत तोड़ बल्कि प्रभु कने कित्ते री कसमां जो पूरा कर।’ <sup>34</sup> अपण मैं तुसां जो ऐ बोलदा कि कदी कसम मत खांदे; नां ता स्वर्ग री, किजोकी से परमेश्वर रा सिंहासन है; <sup>35</sup> नां धरती री, किजोकी से तिन्हेरे पैरां री चौकी है; ना यरुशल्लेम री, किजोकी से महाराज्जे रा सैहर है। <sup>36</sup> अपणे सरे री बी कसम मत खांदे किजोकि तू इक बाळ जो बी नां चिट्टा अते नां ई काळा करी सकदा। <sup>37</sup> अपण जे तू ‘हाँ’ चाहन्दा ता ‘हाँ’ बोल अत्ते ‘नां’ चाहन्दा ता सिरफ ‘नां’ बोल। किजोकी जे किच्छ बी इस का जादा हुन्दा से बुराई री तरफ का हुन्दा।

#### बदला लैणा

<sup>38</sup> “तुसी सुणी बैठेरे हिन् कि बोलेया गेरा थिया, ‘हाख्खी रे बदले हाख्खी, अते दंद रे बदले दंद।’ <sup>39</sup> अपण मैं तुसां जो बोलदा कि बुरेयां रा साहणा मत करदे; अपण जे कोई तेरे सज्जी खाड़ी पर चांड मारो, तिसरे पास्से दूई खाड़ी बी करी दे। <sup>40</sup> अते जे कोई तेरे पर मुकद्दमा चलाई करी तेरा कुरता बी उतारणा चाओ, ता तिस जो अपणी फडद तक देई दे। <sup>41</sup> जे कोई तिजो बेगार बिच इक किलोमीटर लेई जाये ता तिसरे कने दो किलोमीटर दूर चली

जा। 42 जे कोई तेरे का मंगो तिस जो दे; अते जे कोई तेरे का उधार लैणा चाओ, तिस जो पीठु मत दिख्खा।

### दुस्मणा कने प्यार करणा

43 “तुसी सुणी बैठेरे हिन कि बोलेया गेरा थिया, ‘अपणे गुआन्डियां कने प्यार करो, अते अपणे बैरियां कने नफरत।’ 44 अपण मैं तुसां जो बोलदा, अपणे दुस्मणां कने प्यार करो अते जे तुम्हारे जो तंग करदे तिन्हा ताँई प्रार्थना करो, 45 ताकि तुसां अपणे स्वर्गीय प्यो रे बच्चे बणी सको किजोकी से खरे अते बुरे दोन्नां पर अपणा सूरज चमकान्दा, अते धर्मी अते अधर्मी दोन्नां पर बरखा करदे। 46 किजोकि जे तू उन्हा कने ई प्यार करणा जे तेरे कने प्यार करदे हिन, ता तुसां जो कै ईनाम मिलणा ? कै इय्यां ई चुंगी लैणे वाळे नी करदे ? 47 “जे तुसी सिरफ अपणे भ्याळां जो ई नमस्ते करदे, ता कुण जह्ना बड़ड़ा कम्म करदे? कै होर जाति रे महुू बी इय्यां ई नी करदे? 48 इधेरे ताँई जरूरी ऐ है कि तुसी इकदम सही बणो, जदेया तुम्हारा स्वर्ग बिच रैह्के वाळा प्यो इकदम सही है।

### दान

6 “सावधान रेहो! तुसी महुूआं जो दसणे ताँई भलाई रे कम्म मत करो, नी ता तिजो अपणे स्वर्ग अन्दर रैह्के वाळे पिता का कोई ईनाम नी मिलणा। 2 इधेरे ताँई जिस बेले तुसी दान करो ता तिसेरा डिडोरा मत पिठो, जिह्नां कि यहूदी सभाघर ते गळियां बिच कपटी महुू होर लोकां का तारिफ सुनणे ताँई करदे। ताकि लोक तिन्हेरी इज्जत करन। मैं तुसां कने सच्च बोलदा कि तिन्हा जो अपणे हेस्से रा ईनाम पैले ई मिली गेरा है। 3 अपण जाँ तुसी दान करन् ता तुम्हारे खबे हत्थ जो पता नी लगणा चहिंदा कि तुम्हारा सज्जा हत्थ कै करेया करदा ए। 4 ताकि जे दान तू दिता से कुस जो पता ना लग्गे। तेरा से परम-पिता जे तू लुकी करी करदा, उस ने तिजो उधेरा ईनाम दैणा।

### प्रार्थना

5 जिस बेले तू प्रार्थना करो ता कपटियां सांई मत करेया कर। किजोकी से यहूदी धर्म-सभा अन्दर ते सड़कां रे मोड़ां पर खडे होई करी प्रार्थना करणा चाहन्दे हिन ताकि महुू तिन्हा जो दिख्खी सकन। मैं तुम्हारे कने सच्च बोलदा कि तिन्हा जो अपणे हेस्से रा ईनाम पैले ई मिली बैठे रा है। 6 अपण जाँ तू प्रार्थना करणा, ता अपणे अन्दरलै कमरे चली जा ते दुरवाज्जा बंद करी के गुप्त तरिके कने अपणे परम-पिता कने प्रार्थना कर। फिरी तेरे परम-पिता ने जे तेरे लूकी करी कित्ते रे कम्मां जो दिखदे हिन, तिजो उधेरा ईनाम दैणा। 7 ते जां तू प्रार्थना करणा ता होर जाति रे महुूआँ साई बे-मतलब री गल्लां जो मत घडी-घडी मत बोल, किजोकी से सोचदे कि तिन्हेरे जादा बोलणे कने तिन्हेरी सुणी लिती जाणी। 8 इधेरे ताँई तुसी तिन्हा साई मत बणो, किजोकी तुम्हारा पिता तुम्हारे मंगणे का पैले ई जाणदा कि तुम्हारी कै-कै जरूरतां हिन्। 9 इधेरे ताँई तुसी इस तरीके कने प्रार्थना करेया करो: ‘ओ म्हारे पिता, तुसी जेह्दे कि स्वर्ग अन्दर हिन; तुम्हारा नां पवित्र मन्नेया जाओ। 10 तुम्हारा राज्य आओ। जिह्नां तुम्हारी मरजी स्वर्ग अन्दर पूरी हुन्दी, तिह्नां ई धरती पर बी पूरी हो। 11 ‘म्हारी दिन भर री रोटी अज्ज असां जो देयो। 12 ते जिह्नां असां ने अपणे गुनेह्गारां जो माफ कित्तेया ए तिह्ण्यां ई तुसी बी म्हारे गुनांह जो माफ करी देयो, 13 ‘अते असां जो परखदे मत, अपण बुराई का बचाई लेयो; (किजोकी राज्य, पराक्रम ते महिमा हमेसा तुम्हारा ई ए।’ आमीन।) 14 इधेरे ताँई जे तुसी महुूआँ रे पापा जो माफ करगे, ता तुम्हारे स्वर्ग अन्दर रैह्के वाळे पिता ने बी तुसां जो माफ करी दैणा। 15 अते जे तुसी महुूआँ रे गुनांह माफ नी करगे, ता तुम्हारे पिता ने बी तुम्हारे गुनांह माफ नी करणे।

### बरत

16 “जां तुसी व्रत रख्खो, ता तुम्हारे मुंह कपटियां साहई उत्तरे रे नी होणे चहिंदे, किजोकी से अपणा मुंह उदास जह्ना बणाई रखदे ताकि सबनी महुूआँ जो पता लग्गे कि तिन्हा ने व्रत ए रख्खेरा। मैं तुसां जो सच्च सच्च बोलदा कि तिन्हा जो अपणे हेस्से रा ईनाम मिली गेरा ए। 17 जाँ तू व्रत रख्खो ता मुंह

धोई करी अपणे सरा पर तेल लाई ले, 18 ताकि महुूआँ जो नी अपण तेरे पिता जो जिन्हा जो तू दिख्खी नी सकदा, पता लग्गे कि तैं व्रत रख्खे रा है; तां तेरे परम-पिता ने जे तेरे लूकी करी कित्ते रे सब कम्मां जो दिखदे हिन, तिजो उन्हेरा ईनाम दैणा।

### स्वर्गीय धन

19 अपणे ताँई धरती पर धन-दौलत मत कठेरो, जित्ते कीड़ा लग्गी जान्दा ते जंग कने खराब होई जांदी अते जित्ते चोर संध लाई करी चोरी लिन्दे। 20 अपण अपु ताँई स्वर्ग अन्दर धन-दौलत कठेरो, जित्ते ना कीड़ा लगदा ते ना जंग कने से खराब हुन्दी ते ना चोर संध लाई करी चोरी करदे। 21 किजो की जित्ते तेरी धन-दौलत होणी तित्ते ई तेरा मन बी लगी रैह्ना।

### सरिरी री रौसनी

22 सरिरी रा दिव्या हाख्खी हुन्दी: ते तेरी जे तेरी नजर खरी है, ता तेरा सारा सरिरी बी रोशनी कने भरौ रैह्ना। 23 अपण जे तेरी हाख्खी बुरी हो, ता तेरा पूरा सरिरी न्ह्यारे बिच होणा। इधेरे ताँई से लौ जे तेरे अन्दर है जे सेहई न्ह्यारा हो ता सै न्ह्यारा कदेया घणा होणा।

### परमेश्वर ते धन

24 कोई महुू दो मालकां री सेवा नी करी सकदा, किजोकी तिनि ए इक कने नफरत अते दुज्जे कने प्यार रखणा, या तिनि ए इक जह्के कने वफादार रैह्ना अते दुज्जे जो नफरत करणी। तुसी परमेश्वर ते धन-दौलत, दोन्नां री सेवा नी करी सकदे। 25 इधेरे ताँई मैं तुसां कने बोलदा कि अपणी जिंदगी ताँई खाणे-पीणे री फिकर मत करो कै पीगे। अते अपणे सरिरी ताँई कपडेयां री फिकर छड्डी देयो। कै महुू री जिंदगी रोटी का या सरिरी कपडेयां का बद्धी करी नी ए ? 26 दिख्खो, अम्बरे रे चिडु-पखेरु ना ता बीह बान्दे, ना बड्ठे, ते ना ई खलाडे अन्दर कठेरे; फिरी बी तुम्हारा स्वर्ग अन्दर रैह्के वाळा पिता तिन्हा जो खुआन्दा। कै तुम्हारी कीमत तिन्हा का जादा नी ए ? 27 तुसा बिच का इदेह्ना कुण ए, जे फिकर करी के अपणी उमर अन्दर इक घड़ी बी बद्धाई सकदा हो ? 28 कपडेयां ताँई तुसी किजो फिकर करदे हिन ? जंगली फूलां जो दिख्खो कि से किह्ण्यां बद्धे; से ना ता मैह्मत करदे, ना कतारी करदे। 29 ताँ बी मैं तुसां जो बोलदा कि राजा सुलैमान री इत्तणी शान होणे रे बावजूद बी से उन्हा बिच का कुसकी इक साहई बी नी सजी सकेया। 30 इधेरे ताँई जाँ परमेश्वर द्रबड़ री घा जो, जेह्दी अज्ज है ते कल भड्डी बिच सुटी दिती जाणी, इस तरिके कने सजां दे हिन, ता ओ घट्ट विस्वास करणे वाळ्यो कै तिन्हा तुम्हारे ताँई इसका जादा नी करणा ? 31 इधेरे ताँई तुसी ऐ बोली करी फिकर मत करो, ‘असी कै खान्नों या असी कै पिन्ने या कै पान्नों ?’ 32 किजो की होर जाति रे महुू इन्हा सबनी चीजां रे पिच्छे दौड़दे रैहन्दे हिन, अपण तुम्हारे स्वर्ग अन्दर रैह्के वाळे पिता जो पता है कि तुसां जो इन्हा सबनी चीजां री जरूरत ए। 33 अपण पैले तुसी परमेश्वर रे राज्य ते तिन्हेरी धार्मिकता जो तोपो ता ऐ सब चीजा तुसां जो मिली जाणियाँ। 34 इधेरे ताँई कल री फिकर मत करो, किजोकी कल रा दिन अपणी फिकर अप्पु करी लिंगा; अज्ज ताँई अज्ज रा दुख ई बड़ा ए।

### दुज्जेया पर इल्जाम मत लादें

7 “दुज्जेयां पर इल्जाम मत लगाओ ताकि तुम्हारे पर बी इल्जाम नी लगाया जाये। 2 किजोकी जिह्ण्यां तुसी इल्जाम लगांदे, तिह्ण्यां ई तुसां पर बी इल्जाम लगाया जाणा; अते जिस नाप कने तुसी नापदे, तिस्सी नाप कने तुम्हारे ताँई बी नापेया जाणा। 3 तू किजो अपणे भ्याळ री हाख्खी रे कण जो दिखदा है? हालांकि तिजो अपणी हाख्खी रा कण तिजो सूझदा नी ए ? 4 जे तेरी अपणी हाख्खी अन्दर ई कण है ता तू अपणे भ्याळ जो किह्ण्यां बोली सकदा, कि तू मिंजो अपणी हाख्खी का कण कड्डणा दे। 5 ओ कपटी! पैले तू अपणी हाख्खी का कड्ड, फिरी तू साफ दिख्खी पाणा अत्ते अपणे भ्याळ री हाख्खी का कण कड्डी पांगा। 6 “कुत्तेयाँ जो पवित्र चीज मत

देयो। अते अपणे मोती सुअरां रे अग्रे मत सुट्टो। नी ता तिन्हा सुअरां ने अपणे पैरां हेठ घरैची रखणा। ते कुत्तेयां ने हटी करी तुसां जो फाडी रखणा।

### मार्गो ता मिलणा

7 परमेश्वर का मन्गो ता तुसा जो दित्तेया जाणा। तोपगे ता तुसा जो मिली जाणा ते खटखटांगे ता तुम्हारे ताँई दुआर खोल्लेया जाणा। 8 किजोकी हर इक जे मन्गदा, तिस जो मिली जान्दा। जे तोपदा से तिस जो पाई लिंदा अते जे खटखटांदा ई रैहन्दा तिसरे ताँई दुआर खोली दित्तेया जाणा। 9 तुसा बिच का इदेया कुण ए जे अपणे पुत्र जो जां से रोटी मन्गो ता पत्थर देयो ? 10 या मच्छी मन्गो, ता तिस जो सप्प देयो ? 11 इधरे ताँई जे चाये तुसी बुरे ई किजो नी हिन, अपणे बच्चेयाँ जो खरी चीजां देंगा जाणदे। ता तुम्हारा स्वर्ग अन्दर रैह्ने वाळा परम-पिता तुम्हारे मन्गणे पर खरी चीजां किजो नी दिंगा ? 12 इधरे ताँई जिय्यां तुसी चाहन्दे कि मल्लु तुसा कने करन, तुसी बी तिन्हा कने तिय्यां ई करो; किजो की नियम अते भविश्यवाणी करणे वाळेयां री एह ई सिक्सा ए।

### भीडा ते चौडा रस्ता

13 "तंग रस्ते का जाओ, किजोकि चौडा दरवज्जा अत्ते बड्डा रस्ता ता विनास रे पास्से लेई जांदा। मते जणे हिन् जे तिस रस्ते पर चलदे हिन। 14 अपण कितणा तंग ए से दुआर अत्ते कितणा मुस्किल है से रस्ता जे जिन्दगी रे पास्से जांदा। बडे घट्ट जणे हिन् जे तिस पर चलदे।

### जदेया बुडा तदेया फळ

15 "झूठे भविश्यवाणी करणे वाळेयाँ का बची रेहो, जे भैड्डां रे भेस अन्दर तुसा का आन्दे, अपण अन्दरा का से खूंखार भेड्डे हिन्। 16 तिन्हेरे फळां का तुसां ने तिन्हा जो पछियाणी लैणा। कै झिल्लां का अंगुर या कंडेया का अंजीर तोडी सकदे ? 17 इह्य्यां ई हर इक खरा बुडा खरे फळ दिंदा अते बुरा बुडा बुरे फळ दिंदा। 18 खरा बुडा बुरे फळ नी देई सकदा, अते ना ई बुरा बुडा खरा फळ देई सकदा। 19 हर इक बुडा जे खरा फळ नी दिंदा, से बड्डेया अते अग्गी अन्दर पाई दित्तेया जान्दा ए। 20 इस तरीके कने तुसा तिन्हेरे फळां कने तिन्हा जो पछियाणी लैणा। 21 प्रभु-प्रभु बोलणे वाळा हर मल्लु स्वर्ग रे राज्य अन्दर नी जाई पाणा बल्कि से जे मेरे स्वर्ग अन्दर रैह्ने वाळे परम-पिता री मरजी पर चलदा तिन्हेरे जाई पाणा। 22 तिस रोज मते जह्येयाँ ने मिन्जो पूछेयां 'प्रभू जी, ओ प्रभू जी! कै असां तुम्हारे नां कने भविश्यवाणी नी किन्ती? कै तुम्हारे नां कने बुरी आत्मां नी निकालियां अते कै असा तुम्हारे नां कने मते सारे अजूबे नी किन्ते?' 23 तां मैं तिन्हा कने साफ बोलणा मैं तुसा जो नी जाणदा, 'ओ पापियो, मेरे का दूर हटो!'

### घर बनाणे वाळे दो म्हणु : समजदार ते बेवकूफ

24 "इधरे ताँई जे कोई मेरे इन्हा वचना जो सुणी करी तिन्हा पर चलदा, से उस समजदार मल्लु साहई ए जिनि ए अपणा घर पक्के सप्पडा पर बणाया। 25 अते बरखा होई, हड आया, ते हनेरियाँ चलियाँ अते एह सब तिस घर कने बजियाँ अपण से नी ढैत्तेया। किजोकी तिसेरी निय्याँ पक्के सप्पडा पर बणेरी थियाँ। 26 अपण जेहडा कोई मेरे इन्हा वचनां जो सुणदा अपण उन्हा पर चलदा नी, से उस बेवकूफ मल्लु साहई हिन, जिनि ए अपणा घर लेतरी पर बणाया। 27 बरखा होई, हड आया, ते हनेरियाँ चलियाँ ते उस घर कने बजियाँ; जिस कने से पूरा घर ढेहई गया।" 28 इसेरे नतिजे ए होया कि जां यीशु जी एह गल्लां बोली बेट्टे ता मल्लुआं जो तिन्हेरी सिक्सा जो सुणी करी हरानगी होई, 29 किजो कि से तिन्हा जो तिन्हेरे सास्त्रियां साहई नी बल्कि इक अफशारा साहई सिक्सा थिये देया करदे।

### कोद रे बमारी वाळे जो ठीक करणा

8 जाँ यीशु जी पाहड का उतरे ता मल्लुआं री इक बडी बड्डी भीड तिन्हेरे पिच्छे चली पेई। 2 तिन्हेरे इक कोदी भी थिय्या। से यीशु जी का आया

अते तिन्हेरी जै-जै कार करी के बोलणा लग्येया, "ओ प्रभू जी, जे तुसी चाह ता मिन्जो सुच्चा करी सकदे।" 3 यीशु जी ने अपणा हत्थ अग्रे करी के तिस जो छुत्तेया, अत्ते बोलेया, "मैं चाहन्दा, तू सुच्चा होई जाओ।" ते से तिस्सी बेले कोदी सुच्चा होई गया। 4 यीशु जी ने तिस जो बोलेया, "दिख्ख, कुसी जो बी मत बोलदा, अपण जाई करी अपु जो परोहत जो दस्स अते जे चढाणे ताँई मूसा ने दस्से रा ए तिस जो चढा, ताकि उन्हा पर गवाई होई जाओ।"

### इक सुबेदार र विश्वास

5 जाँ यीशु जी कफरनहम सैहर अन्दर आए ता इक सुबेदार तिन्हा का आया ते तिन्हेरे छन्दे करी के बोलणा लग्येया, "ओ प्रभू जी, मेरा इक सेवक बमार घरे पेरा है। तिस जो अंधर्ग मारी गया। अते तिस जो बडी भरी तकलीफ ए हुन्दी। 7 यीशु जी ने तिस जो बोलेया, "मैं आई करी तिस जो ठीक करी दिंगा। 8 सुबेदार ने जवाब दित्तेया, "ओ प्रभू जी, मैं इस जोग्गा नी ए कि तुसी मेरी छत्त हेठ आन। इधरे ताँई सिर्फ तुसी हुकम देई देयो, बस मेरे सेवक ने खरे होई जाणा। 9 किजोकी मैं बी कुस्की रे हेठ कम्म करदा, ते मेरे हेठ बी सपाहई हिन्। जाँ मैं इक जो बोलदा, 'जा' ता से चली जान्दा; अते दुजे जो, 'आ' ता से आई जान्दा; अते जाँ अपणे नौकर जो बोलदा कि, 'इयां कर' ता से करदा।" 10 ए सुणी करी यीशु जी जो बडी हरानी होई अते जे तिन्हेरे पिच्छे आया करदे थिये तिन्हा जो बोलेया, "मैं तुसा जो सच्च बोलदा कि मैं इस्राएल अन्दर कुसकी बी इक मल्लु बिच इदेया विसवास नी दिख्खेया। 11 मैं तुसा जो बोलदा कि पूरब ते पश्चिम का मते जह्येयाँ ने आई करी अब्राहम, इस्हाक अते याकूब कने स्वर्ग रे राज्य बिच रोटी खाणा बैह्ना। 12 अपण राज्य रे बच्चेयां जो बाहर न्हारे अन्दर सुट्टी दित्तेया जाणा: तिन्हेरे रोणा अते दंद पिह्ना होणा।" 13 ताँ यीशु जी ने सुबेदार जो बोलेया, "जा, तियां ई तेरे कने हो जदेया तेरा विसवास ए।" अते तिस्सी बेले सुबेदार रा सेवक खरा होई गया।

### मते सारे बमारां जो ठीक करणा

14 जाँ यीशु जी पतरस रे घरे आये, ता तिन्हा ने तिसेरी सस्सू जो बुखार री वजह कने बिस्तर पर पेरा दिख्खेया। 15 तिन्हा ने तिसेरा हत्थ छुत्तेया अते तिसेरा बुखार उतरी गया, अते से उठी करी यीशु जी री सेवा-पाणी करणा लगी पेई। 16 जाँ सांझ होई, ता मल्लु उन्हा का इदेय बडे मल्लुआं जो लेई करी आये जिन्हा बिच बुरी आत्मा थी, अत्ते उसने अपणे इक ई शब्द कने बुरी आत्मा जो निकाली दित्तेया। इस तरिके कने उस ने सब बमारां जो खरा करी दित्तेया। 17 ताकि जे वचन यशायाह भविश्यवाणी करणे वाळे रे जरिये बोलेया गया थिया से पूरा हो: "तिस ने अपु ई म्हारी कमजोरियाँ जो लेई लिन्तेया अते म्हारी बमारियाँ जो चुक्की लिन्तेया।"

### यीशु जी रा चेला बनणे री किमत

18 यीशु जी ने जाँ अपणे चोन्नी पास्से इक बडी बड्डी भीड दिख्खी ता उन्हा ने अपणे चेल्लेयां जो हुकम दित्तेया कि झील रे दुजे कनारे चलन। 19 ते कुसकी सास्त्री ने आई करी तिन्हा जो बोलेया, "ओ गुरु जी, जिन्हेरे कुते तुसी जान्गे, मैं तुम्हारे पिच्छे चलणा।" 20 यीशु जी ने तिस जो बोलेया, "गिहडा री खोह अते अम्बरे रे चिडू-पखेरुआं रे घोंसले हुन्दे हिन; अपण मल्लु रे पुत्तर जो सर ढकणे ताँई कोई जगह नी ए।" 21 तिन्हेरे चेल्लेया बिच का कुसकी ने तिन्हा जो बोलेया, "प्रभू जी, पैह्ने मिन्जो जाई करी अपणे प्यो जो दबबणे रा हुकम देयो।" 22 अपण यीशु जी ने तिस जो बोलेया, "मुर्देयाँ जो अपणे मुर्दे दबणा दे अते तू मेरे पिच्छे चल।"

### तूफान जो शांत करणा

23 तां यीशु जी इक किस्ती पर जाई बैड्डे। तिन्हेरे चेल्ले बी तिन्हा कने थिये। 24 उस्सी बेले झील अन्दर इक इदेयी बडी बड्डी हनेरी आयी कि तिन्हेरी किस्ती पाणी री छलारां कने ढकिई गई, अपण यीशु जी सुत्ते रे थिये। 25 ताँ चेल्लेयां ने आई करी तिन्हा जो जगाया अते बोलेया, "ओ प्रभू जी, असा जो बचा, नी ता असा ने मरी जाणा।" 26 यीशु जी ने तिन्हा जो



बोलेया, “तुम्हारा विस्वास छोटा ए, तुसी इतना किजो डरेया करदे हिन् ?” ताँ यीशु जी ने उठी करी हनेरी अते झील जो झिड़ख दिती, अते सब किच्छ सान्त होई गया।<sup>27</sup> अते से हरान होई करी बोलणा लगे, “एह कदेया महु ए कि हनेरी अते झील बी इसेरा हुकम मन्दे हिन्?”<sup>28</sup> अते जाँ से दुजे पाससे गदरेनियाँ रे देस अन्दर पुजे, ता तिन्हा जो कब्र का बाहर आन्दे दो महु मिले जिन्हा बिच बुरी आत्मां थियां। से इतणे भयंकर थिये कि कोई तिस रस्ते का जाई तक नी सकदा थिया।<sup>29</sup> अते दिखखो, तिन्हा ने लैर देई करी बोलेया, “ओ परमेश्वर रे पुत्तर, म्हारा तुसा कने कै कम्म ए? कै तुसी असा जो बेला पूरा होणे का पैले ई दुख दैणे आये हिन्?”<sup>30</sup> थोड़ी ई दूर बडे सारे सुअरां रा इक झुण्ड चरेया करदा थिया।<sup>31</sup> ता उन्हा बुरी आत्मां ने तिन्हा कने एह बोली करी छन्दे करणा लगी, “जे तुसी असा जो कडणा लगे रे हिन् ता म्हारे जो इन्हा सुअरां रे झुण्ड अन्दर भेजी दे।<sup>32</sup> ता यीशु जी ने उन्हा जो बोलेया, “चली जाओ!” ते से उन्हा महुआं का निकळी करी सुअरां अन्दर चली गइयां। फिरी से सारा झुण्ड खडी ढलान का रूळकदे-रूळकदा दौड़दे पाणी अन्दर जाई पेया, ते डूबी करी मरी गया।<sup>33</sup> सुअरां रे रखवाले तित्ते का न्हसी करी सैहर जो आये अते सुअरां कने ते उन्हा कने जिन्हा बिच बुरी आत्मा थी जे होया थिया से सब किच्छ दस्सी दित्तेया।<sup>34</sup> फिरी ता सैहर रे सब महु यीशु जी का मिलणे ताँई आये। जाँ तिन्हा ने यीशु जी जो दिखखेया ता उन्हेरे छन्दे कित्ते कि से उन्हेरे उत्ते का कुदखी होरथी चली जाओ।

### इक म्हुणु री लकवे री बमारी जो ठीक करणा

9 फिरी यीशु जी किस्ती पर चढ़ी करी पार अपणे सैहरा जो आई गे।<sup>2</sup> अते दिखखो, किच्छ महु अधरंग रे इक मरीज जो बाणी वाळे मन्जे पर रखी करी यीशु जी का लेई आये। तिन्हा ने तिन्हेरा विस्वास दिखखी करी, तिस अधरंग रे मरीज जो बोलेया, “ओ पुत्र, हिम्मत रख; तेरे पाप माफ होई गे।”<sup>3</sup> अते सास्त्रियाँ बिच किच्छ अपु-मित्ते बोलणा लगे, “ए ता परमेश्वर री बेजती करेया करदा है।”<sup>4</sup> यीशु जी ने तिन्हेरे मन री गलां जो जाणी करी बोलेया, “तुसी अपणे-अपणे मन अन्दर बुरा किजो सोचेया करदे हिन्<sup>5</sup> असान कै है ? ए बोलणा, ‘तेरे पाप माफ होई गे, या ए बोलणा, ‘उठ अते हन्ड फिर्?’<sup>6</sup> ताकि तुसी एह जाणी जाओ कि महु रे पुत्र जो धरती पर पाप माफ करणे रा हक है।” तां तिन्हा ने अधरंग रे मरीज जो बोलेया, “उठ, अपणा मन्जा चुक, अते अपणे घरे चली जा।”<sup>7</sup> से उठी करी अपणे घरा जो चली गया।<sup>8</sup> महु ए दिखखी करी डरी गे अते परमेश्वर री महिमा करणा लगे जिन्हे महु जो इदेयी सक्ति दित्ती।

### मत्ती रा सदेया जाणा

9 जिय्यां ई यीशु जी तित्ते का अगे बद्धे उन्हा ने मत्ती नां रे इक महु जो चुंगी लैणे वाळी चोक पर बैठे रा दिखखेया, अते तिस जो बोलेया, “मेरे पिच्छे चली आ।” ते से उठी करी तिन्हेरे पिच्छे चली पेया।<sup>10</sup> फिरी इय्यां होया कि जाँ से मत्ती रे घरे रोटी खाणा बैठे रे थिये ता मते सारे चुंगी लैणे वाळे अते पापी महु आई करी यीशु जी अते तिन्हेरे चेलेयाँ कने रोटी खाणा बेहई गे।<sup>11</sup> ते जां फरीसियाँ ने ए दिखखेया ता तिन्हा ने यीशु जी रे चेलेयाँ जो बोलेया, “तुम्हारा गुरु चुंगी लैणे वाळेयां कने अते पापियां कने रोटी किजो खाया करदा ए ?”<sup>12</sup> ए सुणी करी यीशु जी ने तिन्हा जो बोलेया, “वैद री जरूरत भले-चंगेयाँ जो नी अपण मरीजां जो हुन्दी।<sup>13</sup> अपण तुसी जाओ अते इस गल रा मतलब समझो, ‘मैं बली नी अपण रैह्य चाहन्दा।’ किजो कि मैं भले अते नेक महुआं जो नी, अपण पापियां जो सदणे आये रा ए।”

### बरत पर सवाल

14 तां बपतिस्मा दैणे वाळे यूहन्ना रे चेले यीशु जी का आई करी बोलणा लगे, “असी अते फरीसी इतणे व्रत रखदे, अपण तुम्हारे चेले व्रत नी रखदे?”<sup>15</sup> यीशु जी ने तिन्हा जो बोलेया, “जां ताँई नौलाडा बरान्ती कने ए कै से दुखी होई सकदे ? अपण से रोज बी आणा जां नौलाडा तिन्हा का बखरा कित्तेया जाणा, अते तिस बेले तिन्हा व्रत रखणे।<sup>16</sup> पुराणे कपडे पर कोरे कपडे री टली कोई नी लगान्दा, किजोकी से टली तिस कपडे जो छिक्की

लिन्दी, अते से पैले का बी जादा फटी जान्दा।<sup>17</sup> ते ना ई पुराणे खलडू अन्दर बिच नौआ अंगूर रा रस्स भरदे, किजो की इय्यां करणे कने खलडू फटी जान्दे; अते अंगूर रा रस्स रुडी जांदा; ते खलडू बेकार होई जांन्दे; अपण नौये अंगूर रे रस्स जो नौये खलडू बिच भरदे अते दोनो ई बची रेहन्दे।”

### इक मरे री कुडी ते इक बमार जनानी

18 जां से तिन्हा कने ए गलां करेया ई करदे थिये ता दिखखो, यहूदी धर्म-सभा रा इक अधिकारी आया अते तिन्हेरी जै-जै कार करी के बोलणा लगेया “मेरी कुडी अब्बे-अब्बे ई मरी, अपण तुसी चली करी तिस पर अपणा हन्थ रखी दिहन्ने, ता तिस ने जिन्दे होई जाणा।”<sup>19</sup> यीशु जी ते तिन्हेरे चेले उठे अते तिसरे पिच्छे चली पेह।<sup>20</sup> अते दिखखो, इक जनानी ने जिस जो बारह सालां का खून चलणे री बमारी थी, से पिच्छे का आई अत्ते तिन्हे यीशु जी रे कपडे रे कुणे जो छुहई लित्तेया।<sup>21</sup> किजो कि से अपणे मन अन्दर सोचदी थी, “जे इन्हेरे कपडे जो ई में छुहई लेयां ता खरी होई जाणा।”<sup>22</sup> यीशु जी ने मुडी करी तिस जो दिखखेया अते बोलेया, “कुडिये हिम्मत रख; तेरे विस्वास ने तिजो खरा कित्तेया ए।” से जनानी तिस्सी बेले खरी होई गई।<sup>23</sup> जां यीशु जी तिस यहूदी धर्म सभा रे प्रधान रे घरे पुजे ता तिन्हा ने दिखखेया कि मात्तम वाळी धुन बजान्दे बाँसरी बजाणे वाळे अते तित्ते इकडा होये रे महु कुडी री मौत पर रोळा पाया करदे हिन्,<sup>24</sup> यीशु जी ने उन्हा जो बोलेया, “हटी जाओ, कुडी मरे री नी ए, अपण सुत्ते री ए।” इस गल पर से महु तिन्हेरा मजाक उड़ाणा लगे।<sup>25</sup> अपण जां महुआं जो बाहर भेजी दित्तेया, ता यीशु जी ने अन्दर जाई करी कुडी रा हन्थ पकडी करी उठाया, ते कुडी जिन्दी होई गी।<sup>26</sup> अते इस गल री चर्चा तिस इलाके बिच फैली गई।

### दो अन्ने म्हुणुआं जो ठीक करणा

27 जां यीशु जी तित्ते का अगे जाणा लगे ता दो अहन्ने तिन्हेरे पिच्छे लैरां अते ए बोलदे-बोलदे चली पे, “ओ दाऊद रे पुत्र, असा पर रैह्य करो!”<sup>28</sup> जां से घरा अन्दर पुजे ता से अहन्ने तिन्हेरे का आये। यीशु जी ने तिन्हा जो बोलेया, “कै तुसा जो विस्वास ए कि मैं ए करी सकदा ?” तिन्हा ने यीशु जी जो बोलेया, “हाँ, प्रभु जी!”<sup>29</sup> तां यीशु जी ने ए बोलदे तिन्हेरी हाखियाँ जो छुत्तेया, “तुम्हारे ताँई तियां ई हो जदेया तुम्हारा विस्वास है।”<sup>30</sup> अत्ते अहन्नेया जो लौ मिली गई। यीशु जी ने तिन्हा जो सावधान कित्तेया अते बोलेया, “दिखखो, ए कुस जो बी मत बोलदे।”<sup>31</sup> अपण तिन्हा ने तित्ते का जाई करी इस गल जो उस इलाके बिच चारो पाससे फैलाई दित्तेया।

### इक गुर्गे म्हुणु जो ठीक करणा

32 जिस बेले से बाहर जाया करदे थिये, ता किच्छ महु यीशु जी का इक जहले जो लेई करी आये। जहले बिच बुरी आत्मा थी अत्ते इधरे ताँई से किच्छ बोली नी पांदा थिय्या।<sup>33</sup> अते जाँ बुरी आत्मा कडडी दिती, ता से जहला बोलणा लगी पेया। इस गल पर महु हरान होई करी बोलणा लगे, “इस्त्राएल बिच इदेया कदी बी नी दिखखेया।”<sup>34</sup> अपण फरीसी बोलणा लगे, “ए ता बुरी आत्मां रे राजे री मदत कने बुरी आत्मां जो कडुदा।”

### मजदूर घट हिन्

35 यीशु जी यहूदी धर्म-सभा अन्दर सिक्सा दिन्दे, परमेश्वर रे राज्य रे शुभ-बसेख रा प्रचार करदे, महुआं री बमारी अत्ते हर तरह री कमजोरियां जो दूर करदे सारे इलाके बिच ग्रा-ग्रां अत्ते सैहर-सैहर घूमदे रेह।<sup>36</sup> अते महुआं री भीड़ जो दिखखी करी यीशु जी जो महुआं पर तरस आया, किजोकी से उन्हा भैड़जां साहई थके रे अते बिखरे रे थिय्ये जिन्हेरा कोई पुहाळ नी थिय्या।<sup>37</sup> तां तिन्हा ने अपणे चेलेयां जो बोलेया, “पके री फसल ता बडी है अपण मजदूर घट हिन्।<sup>38</sup> इधरे ताँई फसल रे मालक कने प्रार्थना करो कि से अपणी फसल जो बढ़णे ताँई मजदूर भेजना।”

### यीशु जी रे बरा चेले

10 तां यीशु जी ने अपणे बाहरां चेलेयां जो सद्दी करी तिन्हा जो भिड्डी आत्मा जो बाहर निकालणे, अत्ते हर तरह री बमारी ते कमजोरी जो दूर करणे रा हक दित्तेया। 2 इन्हा बारहा खास चेलेयां रे ना एह हिन, पैह्ला शमोन, जिस जो कि पतरस बी बोलदे अत्ते तिसेरा भाई अन्द्रियास, जबदी रा निक्का याकूब अत्ते तिसेरा भाई यहूना; 3 फिलिप्पुस; बरतुलमै, थोमा, चुंगी लैणे वाळा मत्ती हलफई रा पुत्तर याकूब, तद्दे; 4 शमोन कनानी अत्ते यहूदा इस्करियोती, जिन्ने यीशु जी जो पकड़वाई बी दित्तेया।

### बारा चेलेयां रा सेवा रा कम्म

5 इन्हा बारहा जो यीशु जी ने एह हुकम देईकरी भेजेया, "होर जाति रे लोकां का मत जांदे, अत्ते ना सामरी रे सैहरां बिच बड़दे। 6 अपण इस्त्राएल रे खानदान री गुअची री भेडां का जायो। 7 अत्ते जांदे-जांदे तुसी एह प्रचार करी के बोलेयो, 'स्वर्ग रा राज्य नेडे आई गेरा है।' 8 बमारां जो खरा करो, मरे रेयां जो जिंदा करो, कोढियां जो सुच्चा करो, बुरी आत्मां जो कड़ो। तुम्हारे जो मुफ्त बिच मिलेया है मुफ्त बिच ई देयो। 9 अपणी कमर रे थैले बिच ना ता सुन्ना, चाँदी अत्ते ना ता तांबा रखयो, 10 अत्ते ना सफर ताई झोळा, इत्ते ताई कि दो कुरते ना, जूत्ते अत्ते ना सोठी लैणी, किजोकि मजदूर अपणी रोटी रा हकदार है। 11 जिस बी सैहर या ग्राँ बिच तुसी बड़गे ता पता करो कि इत्ते कुण लायक है, अत्ते तिस जगह जो छडणे तक तित्ते ई रेयो। 12 जां तुसी तिस घरे बड़गे ता तित्ते सांति री असीस देयो। 13 जे से घर लायक होया ता तुम्हारी असीस तिन्हा पर बणी रहेली, अपण जे नी हुन्ना ता सांति री तुम्हारी असीस तुम्हारे का हटी आणी। 14 जे कोई तुम्हारे जो नी अपनांदा अत्ते तुम्हारी गल्लां नी सूनदा, ता तिस घर या तिस सैहर का जांदे बेले अपणे पैरां धूळ झम्मी आयो। 15 मै तुम्हारे जो सच्च बोलदा न्याय वाळे रोजे उस सैहर री हालत का सदोम अत्ते अमोरा रे देश री हालत केई जादा खरी होणी।

### आणे वाळी मुसीबत

16 दिख्खो, मै तुम्हारे जो भेडां साहई भेडिये रे बीच भेजदा। इधरे ताई सांप साहई चलाक अत्ते कबूतरां साहई भोळे बणो। 17 अपण महुआं का बची करी रेयो, किजोकि तिन्हा तुम्हारे जो पंचायता बिच देई दैणा, अत्ते तिन्हा तुम्हारे जो अपणी धर्म सभा बिच कोडे मारणे। 18 तुम्हारे जो मेरी वजह कने राज्यपालां अत्ते राज्जेयां रे सामणे लित्तेया जाणा, ताकि उन्हा पर अत्ते होर जाति रे लोकां ताई गवाह बणो। 19 जां से तुम्हारे जो पकड़न ता फिकर मत करदे, कि तुम्हारे जो के बोलणा ए अत्ते कियां बोलणा ए। किजोकि उस बेले तुम्हारे जो दस्सी दित्तेया जाणा कि तुम्हारे जो के बोलणा है। 20 किजोकि बोलणे वाळे तुसी नी हिन, अपण तुम्हारे परम-पिता री आत्मा ने तुम्हारे अन्दर का बोलणा। 21 भाई ने अपणे भाई जो पकड़वाई करी मरवाई दैणा, मां-प्यो ने अपणे बच्चे जो पकड़वाई दैणा अत्ते बच्चेयां ने अपणे मां-प्यो रे खलाफ होई जाणा ते तिन्हा जो मरवाई दैणा। 22 मेरी नां री वजह कने सब ने तुम्हारे कने नफरत करणी, अपण जे आखर ताई सबर रखगा तिसेरा ई उद्धार होणा। 23 जां बी से तुम्हारे जो इस सैहर बिच तंग करो, ता दुजे सैहर नहस्सी जायो; किजोकि मै तुम्हारे जो सच्च बोलदा इस का पैह्ले तुसी इस्त्राएल रे सब सैहरां बिच जाणा खत्म करो महु रे पुत्र ने आई जाणा। 24 ना चेला अपणे गुरू का अत्ते ना नौकर अपणे मालक का बड्डा हुन्दा। 25 चेले ताई एह काफी है कि से अपणे गुरू रे बराबर है, अत्ते नौकर ताई एह कि से अपणे मालक रे बराबर है। जे तिन्हा घरे रे मालक जो बालजबूल बोली दित्तेया ता घरे रे दूजेयां बंदेया जो के किच्छ नी बोलणा।

### कुस का डरणा चएदा ?

26 इधरे ताई उन्हा का डरदे मत, किजोकि जे किच्छ लूके रा है, सब सामणे आई जाणा। 27 जे मै तुम्हारे कने न्यहारे बिच बोलदा उस जो तुसी लो बिच बोली अत्ते जे मै तुम्हारे कना बिच बोलेया है, तिस जो घरे री छत्त पर चढ़ी करी प्रचार करो। 28 उन्हा का मत डरो जे सरीर जो मारदे हिन अपण

आत्मा जो नी मारी सकदे, बल्कि उसका डरो जे आत्मा अत्ते सरीर दोनां जो नरक बिच खत्म करी सकदा। 29 कै दो पैसे री दो गौरेयां चीड़ी नी बिकदी? फिरी बी तुम्हारे पिता री मर्जी रे बगेर इन्हा बिच का इक बी धरती पर नी पेई सकदी। 30 तुम्हारे सिर रे बाळ तक बी गिणे रे हिन। 31 इधरे ताई डरो मत तुम्हारी कीमत ता तदेयी मती सारी चिड़ियां का बी केई जादा है।

### यीशु जी जो अपनाणा या ना अपनाणा ।

32 जे कोई मिंजो महुआं रे सामणे अपनांगा, मै बी तिस जो अपणे स्वर्ग बिच रैह्ले वाळे परम-पिता रे सामणे अपनाई लैणा। 33 अपण जे महुआं रे सामणे मिंजो नी अपनांगा, मै बी तिस जो अपणे पिता रे सामणे जे स्वर्ग बिच हिन, नी अपनाणा।

### यीशु जी रे आणे रे अजांम

34 "एह मत सोचो कि मै धरती बिच मिलाणे ताई आये रा है। मै मिलाणे नी, अपण तलवार चलवाणे ताई आये रा है। 35 मै महु जो उसेरे प्यो रे खिलाफ, कुडी जो उसेरी मां रे खिलाफ, नूह जो तिसेरी सास्स रे खिलाफ करणे ताई आये रा है। 36 अत्ते महुआं रे दुश्मण तिसेरे घरे रे ई महु होणे। 37 जे अपणे मां-प्यो जो मेरे का जादा प्यार करदा, से मेरा होणे रे लायक नी है। जे अपणे बच्चेयां जो मेरे का जादा प्यार करदा, से मेरा होणे रे लायक नी है, 38 अत्ते जे अपणी सूळी चुक्की करी मेरे पिच्छे नी चलदा, से मेरे लायक नी है। 39 जे अपणी जिंदगी जो बचाणे री इच्छा रखदा तिस ने उस जो खोणा, अत्ते जे मेरी वजह कने अपणी जिंदगी जो खोंदा तिन्ने तिस जो पाणा।

### प्रतीफळ

40 "जे तुम्हारे जो अपनांदा से मिंजो अपनांदा, अत्ते जे मिंजो अपनांदा से मेरे भेजणे वाळे जो अपनांदा। 41 जे भविष्यवाणी करणे वाळे जो भविष्यद्वक्ता समझी करी अपनांदा, तिस जो सेहई ईनाम मिलणा जे भविष्यद्वक्ता जो मिलणा, अत्ते जे तुसी धर्मी महु जो धर्मी महु मन्त्री करी अपनांदा ता तुम्हारे जो सेहई ईनाम मिलणा जे धर्मी महु जो मिलणा चहिंदा। 42 जे कोई मेरे इन्हा भोळे-भाळे चेलेयां जो इक गलास ठण्डा पाणी पीणे जो दे कि से मेरा चेला है, ता मै तुम्हारे कने सच्ची बोलदा कि तिस जो इधेरा ईनाम मिलणा ई मिलणा।"

### यीशु जी ते यहूना बपतिस्मा दैणे वाळा

11 जां यीशु जी अपणे बारा चेलेयां जो हुकम देई दैणे का बाद से गलील प्रदेश रे सैहरां बिच सिक्सा अत्ते प्रचार करणे जो तित्ते का चली गे। 2 यहूना ने जेला बिच मसीह रे कम्मा री खबर सुणी करी अपणे चेलेयां जो तिन्हा का एह पूछणे भेजेया। 3 कि कै आणवाळे तुसी ई हिन कि असा दुजे री भाळ करन? 4 यीशु जी ने जवाब दित्तेया, कि जे किच्छ तुसा दिखदे सुणदे हिन, से सब किच्छ जाईकरी यहूना जो बोली देयो। 5 कि अह्त्ते दिखदे हिन, अत्ते अपाईज हंडदे फिरदे हिन, कोढी सुच्चे किन्ते जाया करदे हिन, अत्ते टोणे सुणदे हिन, मुर्दे जिंदा होया करदे हिन, अत्ते गरिबां जो शुभ-बसेख सुणाया जाया करदा है। 6 अत्ते धन्न हिन से, जिन्हा जो मेरी वजह कने ठोकर ना लग्गो। 7 जां से तित्ते का चली गे, ता यीशु जी यहूना रे बारे बिच महुआं जो बोलणा लगे, तुसा बणा बिच कै दिखणा गे थिये? कै ब्यार कने हिलदे नळू ? 8 फिरी तुसा कै दिखणे गे थिये? दिखो, जे मुलायम कपडे पान्दे, से राजमैह्लां बिच रेहन्दे हिन। 9 ता फिरी किजो गे थिये? कै कुसकी भविष्यद्वक्ता जो दिखणे गे थिये? हाँ, मै तुसा जो बोलदा, बल्कि भविष्यद्वक्ता का वी बड्डे जो। 10 से ऐई है, जिसेरे बारे बिच लिखेरा है कि दिख; मै अपणे दूत जो तेरे अग्गे भेजदा, जे तेरे अग्गे तेरा रस्ता त्यार करगा। 11 मै तुसा जो बोलदा, बपतिस्मा दैणे वाळे यहूना का बड्डा कोई महु पैदा नी होया, अपण स्वर्ग रे राज्य बिच छोटा का छोटा महु बी यहूना का बड्डा है। 12 यहूना बपतिस्मा देणे वाळे रे रोजे का अब्बे ताई स्वर्ग राज्य बिच जबरदस्ती आणा हुन्दा रेया है, अत्ते हिंसा रे जोर पर इस जो खोणे री कोसीस होया करदी है। 13 यहूना रे आणे तक सारे भविष्यद्वक्तां ने अत्ते मूसा रे नियमां ने भविष्यवाणी किर्ती थी, 14 ते जे तुसी नियमां अत्ते भविष्यद्वक्तां ने जे किच्छ बोलेया

थिय्या, तिस जो मनणे ताई त्यार हिन ता जिसेरे आणे री भविष्यवाणी किन्ती थी, एह यहुन्ना सेहई एलिय्याह है।<sup>15</sup> जे सुणी सकदा, सुनण! <sup>16</sup> मैं इस जुग रे मल्लुआँ री बराबरी कुस कने कराँ? से तिन्हा निकेयाँ साहई हिन, जे बजारा बिच बैठे रे इक दुजे जो हक्काँ लाई करी बोलदे: <sup>17</sup> 'असा ने तुसा ताँई बोंसरी बजाई, अपण तुसा नी नचे, असा ने अवशोश वाळे गाणे गाये, अपण तुसी नी रोये।' <sup>18</sup> यहुन्ना ना होरनियाँ साहई खान्दा अत्ते ना पीन्दा थिय्या, अते लोकाँ ने बोलेया थिय्या कि उस बिच बुरी आत्मा है।' <sup>19</sup> मल्लु रा पुत्र होरनियाँ साहई खान्दा-पीन्दा आया, अपण मल्लु बोलदे हिन, ' इस मल्लु जो दिख्खो, एह भूखान्नाहै, पियक्कड़ है। एह चुंगी लेणे वाळे अते पापियाँ रा मित्र है। अपण बुद्धिमत्ता री उत्तमता उसेरे कम्मा कने पूरी सही हुन्दी।'

### अविश्वास पर लाणत

<sup>20</sup> फिरी यीशु जी उन्हा सैहराम जो धिक्कारणा लगे, जिन्हा बिच तिन्हा ने बडे चम्तकारी कम्म कित्ते थिये, किजो कि तिन्हा ने अपणे पापां का तौबा नी किन्ती थी। <sup>21</sup> "हाय खुराजीन! हाय, बैतसैदा! जे चम्तकारी कम्म तुसा बिच कित्ते गे, जे से सूर अते सैदा बिच कित्ते जान्दे, ता टाट रे कपड़े लेईकरी अते अपणे जिस्म बिच राख मळी करी अवशोष करदे अपणे पापां का तौबा करी लिक्ते रा होणा थिय्या। <sup>22</sup> अपण मैं तुसा जो बोलदा कि न्याये वाळे रोजे सूर अते सैदा री हालत तुम्हारे का जादा सैह्ने जोगी होगी। <sup>23</sup> "ओ कफरनहूम, कै तू सोचदा कि तिजो स्वर्ग री महिमा ताँई ऊँचा उठाया जाणा? तू ता अधोलोक ताँई नीचे जाणा। जे चम्तकारी कम्म तेरे बिच कित्ते गे हिन, जे सदोम बिच कित्ते हुन्दे, ता से अज ताँई बणी रेहन्दा। <sup>24</sup> अपण मैं तुसा जो बोलदा कि न्याये वाळे रोजे सदोम री हालत तुम्हारे का केई जादा खरी होगी।

### बोज कने दबे रे लोकाँ ताँई अराम

<sup>25</sup> तिस्सी बेले यीशु जी ने बोलेया, "ओ पिता, स्वर्ग अते धरती रे प्रभु, मैं तेरा सुकर करदा कि तुसी ने इन्हा गल्लाँ जो बुद्धिमाना अते समझदारा का लुकाई रखेया, अते बचेयाँ पर जाहीर कित्तेया। <sup>26</sup> हाँ परम पिता एह इधेरे ताँई होया किजोकि तुम्हारे जो ऐई खरा लगेया। <sup>27</sup> "मेरे परम पिता ने मिन्जो सब किच्छ मेरे हवालें करी दित्तेया; अते कोई पुत्र जो नी जाणदा, सिरफ परम पिता जाणदा; अते कोई परम पिता जो नी जाणदा, सिरफ पुत्र जाणदा; अते हर से मल्लु परम पिता जो जाणदा जिसेरे ताँई पुत्र ने उस जो जाहिर करणा चाये। <sup>28</sup> "ओ सब मैहत्त करणे वाळ्योँ अते बोज कने दबितेरे मल्लुआँ, मेरे का आओ; मैं तुम्हारे जो अराम दिन्ना। <sup>29</sup> मेरा जुगळ अपणे ऊप्पर लेई लेयो, अते मेरे का सीखो; किजोकि मैं सांत अते मन का दीन है: अते तुसा अपणे दिला बिच अराम मिलणा। <sup>30</sup> किजोकि मेरा जुगळ असान अते मेरा बोज हल्का है।"

### सब्त रा दिन

**12** उस बेले यीशु जी सब्त वाळे रोजे खेत्राँ रस्ते का होई करी जाया करदे थिये, ते तिन्हेरे चेलेयाँ जो भूख्ख लगी ते से कणकाँ री फळियाँ जो तोड़ी-तोड़ी करी खाणे लगे। <sup>2</sup> ताँ फरीसियाँ ने एह दिख्खी करी बोलेया, कि "दिख्ख, तेरे चेले से करेया करदे हिन जिसेरा सब्त वाळे रोजे करणा मूसा रे नियमाँ रे साहब कने ठीक नी है?" <sup>3</sup> अपण यीशु जी ने तिन्हा का पूछेया, कि "कै तुसा ने पवित्र सास्त्र बिच एह नी पढ़ेया कि दाऊद अते तिन्हेरे मित्राँ ने, जाँ तिन्हा जो भुख्ख लगी थी, ता कै किन्ता थिया? <sup>4</sup> तिस ने परमेश्वर रे मन्दिर अन्दर जाई करी परमेश्वर जो चढ़ाये री रोटियाँ किह्य्याँ खाई थी? जिन्हा जो खाणा ना ता तिसेरे ताँई अते ना तिसेरे साथियाँ ताँई, अपण सिरफ परोहताँ ताँई ठीक थिया। <sup>5</sup> या मूसा रे नियम बिच तुसा एह नी पढ़ेया कि सब्त वाळे रोजे मन्दिर रे परोहत्त ई सब्त री विधि जो तोड़दे हिन। अत्ते फिरी बी तिन्हा जो कोई किच्छ नी बोलदा। <sup>6</sup> अपण मैं तुसा जो बोलदा, इत्ते कोई है जे मन्दिर का बी बद्धि करी है। <sup>7</sup> जे तुसी शास्त्र बिच जे लिख्खे रा हे, तिस जो जाणदे कि, 'मैं लोकाँ बिच दया चाँह्दा,

बलिदान नी' ता तुसी उन्हा जो कसुरवार नी बोलदे जे बेकसुर हिन। <sup>8</sup> किजोकि मल्लु रा पुत्र सब्त वाळे रोजे रा बी मालक है।

### सुक्के हाथ वाळे म्हणु जो ठीक करणा

<sup>9</sup> फिरी यीशु जी तित्ते का यहूदी धर्म सभा जो चली गे। <sup>10</sup> तित्ते इक मल्लु थिया, जिसेरा इक हथ सुक्कीह गेरा थिया। ता मल्लुआँ ने पुछेया, "मूसा री रीति रे साहब कने सब्त वाळे रोजे कुसकी जो खरा करणा, सही है?" तिन्हा ने उन्हा का एह इधेरे ताँई पुछेया ताकि से तिन्हा पर इल्जाम लगाई सकन। <sup>11</sup> अपण यीशु जी ने उन्हा जो जवाब दित्तेया, "मन्ना, तुम्हारे बिच का कुसकी का इक भेडु हो, ते से भेडु सब्त वाळे रोजे कुसकी गत्ता बिच जाई पेयो, ता कै तुसी तिस जो पकड़ी करी बाहर नी कडुणा? <sup>12</sup> फिरी इक मल्लु ता इक भेडु का बी जादा जरूरी है। इधेरे ताँई सब्त वाळे रोजे भलाई करणा सही है।" <sup>13</sup> ताँ यीशु जी ने तिस सुक्कितेरे हथ वाळे जो बोल्या, "अपणा हथ अगे कर" अते तिन्हेरे अपणा हथ अगे कित्तेया अते से खरा होई गया। ठीक तियाँ ई जियाँ तिसेरा दूजा हथ थिया। <sup>14</sup> फिरी फरीसी तित्ते का बाहर निकळी आये अते यीशु जी जो मारणे ताँई कोई तरकिब सोचणा लगे।

### परमेश्वर रा चुणे रा सेवक

<sup>15</sup> अपण यीशु जी एह जाणी गे अते तित्ते का चली गे। बडे भरी लोकी तिन्हेरे पिच्छे चली पेह अते यीशु जी ने तिन्हा सबनियाँ जो खरा कित्तेया, <sup>16</sup> अते तिन्हा जो समझाया कि से तिन्हेरे बारे बिच मल्लुआँ जो किच्छ ना दस्सन। <sup>17</sup> एह इधेरे ताँई होया कि भविष्यवाणी करणे वाळे यशायाह रे जरिये प्रभु जी ने जे बोल्या थिया, से पूरा हो: <sup>18</sup> "दिख्खो, एह मेरा सेवक है, जिस जो मैं चुणे रा है। एह मेरा लाडला है, मैं इस का खुस है। मैं तिसेरे ऊपर अपणी 'आत्मा' रखणी अते तिस ने होर जाति रे लोकाँ जो न्याय रा बसेख देंगा। <sup>19</sup> इन्हे ना ता लड़ाई-झगडा करणा अते ना ई लैराँ मारणियाँ, अते ना कुन्ने इसेरी अवाज गळियाँ बिच सुनणी। <sup>20</sup> इन्हे झुके रे नळू जो नी तोड़ना, इन्हे बुझदे दीये जो तक नी बुझाणा, जाँ ताँई से न्याय जो विजयी नी बणाई लिंदा। <sup>21</sup> अते तिसेरे ई ना बिच होर जाति रे लोकाँ ने उमेद रखणी।"

### यीशु जी ते बालजबूल

<sup>22</sup> फिरी मल्लु यीशु जी का इक अहन्ने जो लियाये जेह्दा कि जहल्ला बी थिया किजोकि तिस बिच बुरी आत्मा थी। यीशु जी ने तिस जो खरा करी दित्तेया, अते से अहन्ना जहल्ला बोल्णे अते दिखणे लगेया। <sup>23</sup> अते सबनी मल्लुआँ जो बड़ी हरानी होई अते से बोल्णा लगे, "कै एह मल्लु दाऊद रा पुत्र होई सकदा?" <sup>24</sup> जाँ फरीसियाँ ने एह सुणेया ता से बोल्णा लगे, "एह ता बुरी आत्मा जो, तिन्हेरे राजे बालजबूल री मदत कने कडदा।" <sup>25</sup> यीशु जी जो तिन्हेरे विचाराँ रा पता लगी गया अत्ते से तिन्हा जो बोल्णा लगे, "जिस राज्य बिच फूट पेई जांदी, से खत्म होई जांदा, अते जिस सैहर या टब्बर बिच फूट पेई जाओ से नी टिकदा। <sup>26</sup> अते जे सैतान ई सैतान जो बाहर कडुे ता से अपणे ई खलाफ होई गया; ता फिरी तिसेरा राज्य कियाँ टिकी सकदा? <sup>27</sup> भला, जे मैं सैतान री मदत कने बुरी आत्मा जो कडदा ता तुम्हारे चेले कुसेरी मदत कने तिन्हा जो बाहर कडदे हिन? इधेरे ताँई तुम्हारे चेलेयाँ ई ने तुम्हारा न्याय करणा। <sup>28</sup> अपण जे मैं बुरी आत्मा जो परमेश्वर री आत्मा रे जरिये कडदा। ता परमेश्वर रा राज्य तुसा का आई गेरा है। <sup>29</sup> या कियाँ कोई ताकतवर मल्लु रे घरे घुसडी करी तिसेरे चोरी करी सकदा, जाँ ताँई से पैहे ताकतवर मल्लु जो बहन्नी ना लेंन? ताँ ई से तिसेरा घर जो लूटी सकदा। <sup>30</sup> जे मेरे कने नी हिन, से मेरे खलाफ हिन। अते जे बिखरियाँ भेडाँ जो इकड्डा करणे बिच मेरी मदत नी करदा, से बिखरेया करदा है। <sup>31</sup> "इधेरे ताँई मैं तुसा जो बोल्दा, मल्लु रा हर इक पाप अते हर इक बेज्जती माफ किन्ती जाणी अपण पवित्र आत्मा री बेज्जती करणे वाळे जो माफ नी कित्तेया जाणा। <sup>32</sup> अते जे कोई मल्लु रे पुत्र रे खलाफ बिच बोलगा तिस जो माफ कित्तेया जाणा, अपण जे कोई पवित्र आत्म रे खलाफ बिच किच्छ बोलगा, तिसेरा एह गुनाह ना ता इस जुग बिच अते ना आणे वाळे जुग बिच माफ कित्तेया जाणा।

### बुद्धा ते तिसेरा फळ

33 "जे बूट्टे जो खरा बोलो, ता तिसेरे फळां जो बी खरा बोलो, या बूट्टे जो निक्कमा बोलो अते तिसेरे फळां जो बी, किजोकि बूट्टा अपणे फळ कने ई पछाणेया जांदा। 34 "ओ सप्प रे बच्चयो! जे तुसा बुरे ई हिन ता खरी गलां कियां करी सकदे हिन? किजोकि जे तिसेरे मन बिच है। सेहई मूह पर आंदा। 35 इक खरा महु जे खराई तिसेरे दिला बिच इकट्टी ऐ तिस्सी बिच का ई से खरी गलां कडदा। अते बुरा महु जे बुराई तिसेरे मन बिच है, उस्सी बिच का बुरा गलां कडदा। 36 अपण मैं तुसा जो बोलदा महु री हर इक फजूल गल्ल रा हिसाब तिस जो न्याय वाळे रोझे दैणा पैणा। 37 तू अपणी ई गलां रे साहब कने ई बेकसुर अते अपणी ई गलां रे साहब कने कसुरवार होणा।

### स्वर्गीय निसानी री माँग

38 ताँ किच्छ सास्त्रियाँ अते फरीसियां ने यीशु जी जो बोल्या, "गुरु जी, असा तुसा का इक निसानी दिख्खणा चांदे हिन।" 39 अपण यीशु जी ने जवाब दित्तेया, "एह बुरी अते व्यभिचारी पीढी निसानी दिखणे री इच्छा रखदी, फिरी बी योना भविष्यवाणी करणे वाळे जो छड्डी होर कोई नसाणी नी दित्ती जाणी, 40 किजोकि जियां योना त्रे रोझ अते त्रे रात बड्डी मच्छी रे पेढा बिच रेया थिया, तियां ई महु रे पुत्र ने बी त्रे रोज अते त्रे रात धरती रे पेढा बिच रैह्ला। 41 न्याय रे बेले नोनवे रे महुआं ने अज्ज री इस पीढी रे महुआं कने उठी करी उन्हा जो कसुरवार दस्सणा। किजोकि नीनवे रे लोकां ने योना री सिक्सा सुणी करी अपणे पापां का तौबा कित्ती थी। अते इत्ते ता कोई योना का बी बड्ठा है। 42 न्याय रे रोझे दक्षिण री राणी ने इस पीढी रे लोकां कने उठी करी तिन्हा जो कसुरवार दस्सणा, किजोकि से सुलैमान का सिक्सा री गलां सुनणे जो धरती रे इक कुणे का आई थी, अत्ते दिख्खो, इत्ते ता कोई सुलैमान का बी बड्ठा है। 43 "जां कोई मिट्टी आत्मा कुसकी महु बिच का निकळदी, ता से अराम री तोप बिच सुक्की जगह बिच भटकदी फिरदी रेहन्दी, अपण से तिस जो नी मिलदी। 44 तां से बोलदी, 'जिस घर का मैं आई थी, अपणे उस्सी घरे हटी जांदी,' अते जाँ से हटी करी आंदी ता तिस जो खाली, साफ-सुथरा अते सजा सजाये रा दिख्खदी। 45 ता से जाईकरी अपणे कने होर जादा बुरी, होर सत्त आत्मां जो लेई आंदी अते तिन्हे रैह्ला लगी पैंदी। ते तिस महु री हालत पैह्ले का बी जादा बुरी होई जांदी। अज्ज री इस बुरी पीढी रे महुआँ री हालत बी इय्यां ई होणी।"

### यीशु जी रे माँ ते भाई

46 जाँ से महुआँ री भीड़ कने गल्ल करेया करदे थिये कि यीशु जी मां अते भाई तिन्हे आई करी बाहर खड़े होई गे अते से यीशु जी कने गल्ल करणे ताँ भाळेया करदे थिये। 47 अते कुसकी ने यीशु जी जो बोल्या, "सुणो तुम्हारी मां अते भाई बाहर खडितेरे हिन ते तुसा कने गल्ल करणा चांदे हिन।" 48 एह सुणी करी यीशु जी ने उस बोलणे वाळे जो जवाब दित्तेया, "कुण है मेरी मां? कुण है मेरा भाई?" 49 अते अपणे चेल्लेयां पाससे हत्थ बद्धाई करी के बोल्या, "दिख्खो, मेरी मां अते मेरे भाई! 50 किजोकि जे कोई मेरे परम-पिता री जे स्वर्ग बिच हिन मर्जो पूरी करदा, सेहई मेरा भाई, भैण अते मेरी मां है।

### बी बाणे वाले रा उपनाण

13 तिस्सी रोज यीशु जी घरे का निकळी करी झीले रे कनारे जाईकरी बैई गे। 2 बडे भरी महु यीशु जी रे चाँ पाससे कट्टी गे। इधेरे ताँई से किस्ती पर चढ़ी गे। अत्ते लोकां री भीड़ कनारे खडिह् रेहई। 3 यीशु जी ने उन्हा कने उदारण देई करी मती सारी गलां किन्ती, उन्हा ने बोलेया कि, "इक किसान बीह बाणे निकळेया। 4 अते बी बाँदे-बाँदे किच्छ बीह सडका रे कनारे पर पेई गे अते से पैरां हेठ आई गे, ते चिडू-पखेरुआँ ने से बीह चुम्गी ले। 5 किच्छ पत्थरा वाळी मिट्टी पर पे, जित्ते तिन्हा जो जादा मिट्टी नी मिली अते डुगी मिट्टी नी मिलणे री वजह कने से झट उगी आये। 6 अपण जाँ सूरज निकळेया ता से फुक्कीह् गे, ते जड नी पकडने री वजह कने से सुक्की गे। 7 अते किच्छ झिल्ला बिच पे, अते से बद्धे ता बद्धे अपण झिल्ला ने तिन्हा जो

दब्बी दित्तेया। 8 अपण किच्छ खरी मिट्टी पर पे, अते फळ बी लियाये, किच्छ सौ गुणा, किच्छ साड्ड, अते किच्छ तीह गुणा। 9 जे सुणी सकदे, से सुणी लेंन।"

### उपनाण दसणे रा मकसद

10 अते चेल्लेयां ने यीशु जी का आई करी बोल्या, तुसी उन्हा कने उदारणां बिच गलां किजो करेया करदे हिन? 11 यीशु जी ने जवाब दित्तेया, "तुम्हारे जो स्वर्ग रे राज्य रे भेदां री समझ दित्ती गेरी है, अपण इन्हा जो नी। 12 किजोकि जिसका घट्ट है, तिस जो दित्तेया जाणा अते उसका बडा जादा होई जाणा। अपण जिसका किच्छ बी नी है, तिस का जे किच्छ है, से बी लेई लिन्तेया जाणा। 13 मैं तिन्हा कने उदारणां बिच गलां इधेरे ताँई करदा, किजोकि जे से दिख्खदे हिन अपण असलियत बिच तिन्हा जो किच्छ लिबदा नी, से जे सुणदे हिन असलियत बिच से ना सुणदे हिन, ना समझदे हिन। 14 अते तिन्हेरे बारे बिच यशयाह री एह भविस्वाणी पूरी हुन्दी, तुसी सुणदे ता रेह्ला, अपण तुम्हारी समझ बिच नी आणा, अते दिख्खदे ता रेह्ला, अपण तुसां जो किच्छ बी सूझणा नी: 15 किजोकि इन्हेरे मन मोट्टे होई गेरे हिन, अते एह कन्ना का ऊन्हा सुणदे हिन, ते इन्हा ने अपणी हाखिख्यां बंद करी रख्खे री हिन ताकि से दिख्खी ना पांन, ते कन्ना का किच्छ बी सुणी ना पांन, ते दिख्ख का समझन, अते मेरे पाससे आई जान, ते मैं तिन्हा जो खरा करां। 16 अपण धन्न हिन तुसी जे दिख्खदे सुणदे हिन सुणदे हिन। 17 किजोकि मैं तुम्हारे कने सच्च बोलदा कि बडे जह्ले भविस्ववाणी करणे वाळेयां ने अते भले ते नेक महुआँ ने एह चाया कि जे तुसी दिख्खेया करदे हिन तिस जो दिख्खन, अपण नी दिख्खी पाये, अते जे तुसी सुणेया करदे हिन, सुणण, अपण नी सुणी पाये।

### बी बाणे वाले उपनाण रा मतलब

18 "अवे तुसी बीह बाणे वाले रे उदारण रा मतलब समझो: 19 से बीह जे रस्ते पर पेया थिया, उसेरा मतलब है कि जां कोई राज्य रा वचन सुणान्दा अते तिस जो नी समझदा, ता से सैतान आईकरी, जे किच्छ तिन्हेरे दिह्ला बिच बाया गेरा थिया, तिस जो से खोई लिन्दा। 20 अते जे बीह पत्थरा वाळी मिट्टी पर पेया थिया, एह से हिन, जे वचन सुणी करी झट ई खुसी कने उस्सी बेले ई मन्नी लिन्दे। 21 अपण से अपणे बिच जड नी पकडी पाणे री वजह कने थोड़ी ई हाण ताँई हुन्दे, अते जां वचन री वजह कने दुख या कोई मुसिबत आंदी ता से झट ई डगमगाई जांदे। 22 जे बी झिल्लां बिच पेया थिया, एह से हिन, जे वचना जो सुणदे, अपण इस दुनियां री फिकरां अते पैसेयां रा लालच वचनां जो दबी रखदा, अते से कामयाब नी हुन्दे। 23 जे खरी मिट्टी पर बीह पे थिये, एह से हिन, जे वचनां जो सुणदे अते समझी करी फळ लियान्दे हिन, किच्छ सौ गुणा, ते किच्छ साड्ड, ते किच्छ तीह गुणा।"

### जंगली बी रा उपनाण

24 यीशु जी ने तिन्हा जो इक होर उदारण दित्तेया, कि स्वर्ग रा राज्य तिस महु साहई है जिन्हिये अपणे खेत्रा बिच खरा बीह बाया। 25 अपण जां से सुत्तेरा रा थियां तां तिसेरा दुस्मण आईकरी कणका रे बिच जंगली बी पाई करी चली गया। 26 जां कणक बड्डी होई करी बडणे ताँई त्यार होई गेई, ता तिस बिच जंगली घा बी लिब्बी। 27 एह दिख्खी करी घरे रे नौकर ने आईकरी अपणे मालक जो बोल्या, ओ मालका, कै तुसां अपणे खेत्रा खरा बीह नी बाया थिया? फिरी तिस बिच जंगली घा कुदखा आई? 28 तिस ने अपणे नौकरां जो बोल्या, एह कुसकी दुस्मण रा कम्म है। नौकरां ने तिस जो बोल्या कै तुसी चांदे कि असी जाईकरी तिन्हा जो इकट्टा करी लेंन? 29 अपण तिस ने बोल्या, 'ना, कुदखी इहय्यां ना होई जाये कि जंगली घा कट्टेरदे-कट्टेरदे तुसी तिसेरे कने कणक जो बी कट्टेरी लेंन। 30 दोनां जो बडणे रे बेले ताँई बद्धणा दो, अते बडणे बेले इन्हा जो बडणे वाळे जो बोल्गा, पैह्ले जंगली घा जो फुक्कणे ताँई कट्टेरी करी बैट् बिच बन्नी लें, अते कणका जो मेरे खत्ते बिच इकट्टा करी दे।"

### राई रे बी रा उपनाण

31 यीशु जी ने तिन्हा जो इक होर उदारण दित्तेया, कि स्वर्ग रा राज्य संरेंयां रे इक दाणे रे बराबर है, जिस जो कुसकी मल्लु ने अपणे खेत्रा बाई दित्तेया। 32 से सबनी बीआं का हल्का हुन्दा अपण जा बद्धदा ता सब साग पात का बड्डा हुन्दा, अते इह्देया बूढा बणी जांदा, कि चिडू-पखेरु आईकरी तिसेरी डालियां पर रैहन्दे हिन।”

### खमीर रा उपनाण

33 यीशु जी ने इक होर उदारण तिन्हा जो दित्तेया, कि स्वर्ग रा राज्य तराक साहई है जिस जो कुसकी जनानी ने कोई बारह किलो आठे बिच मिलाया अते हुन्दे-हुन्दे पूरा आठ्ठा तराक होई गया।”

### उपनाण रा इस्तेमाल

34 एह सब गल्लां यीशु जी ने उदारण बिच लोकां कने बोली, अते बिना उदारण रे यीशु जी तिन्हा कने किच्छ बी नी बोलदे थिये। 35 जे वचन भविस्वयाणी करणे वाळ्यां रे जरिये बोलया गया थिया, से पूरा हो कि मैं उदारण बोलणे तांई अपणा मूंह खोलणा, मैं उन्हा गल्लां जो बोलणा जे दुनियां री सुरुआत का गुप्त रेहई हिन।”

### जंगली बी रे उपनाण रा मतलब

36 फिरी यीशु जी लोकां री भीड़ जो छड्डी करी घरे चली गे। तां चेल्ले आई करी यीशु जी जो बोलणा लगे, खेत्र री जंगली घा रा उदारण असां जो समझाई देयो। 37 यीशु जी ने जवाब दित्तेया, कि खरे बीह बाणे वाळा मल्लु रा पुत्र है, 38 खेत्र दुनियां है, खरे बीह स्वर्ग राज्य रे बच्चे हिन, अते जंगली बीह सैतान रे बच्चे हिन। 39 अते जिस दुस्मण ने तिन्हा जो बाया थिया से सैतान है, अते कणक बडणे वाळे स्वर्गदूत हिन। 40 जियां जंगली घा कट्टेरी करी अग बिच फुक्की दिती, तियां ई दुनियां रे अंत बिच बी होणा। 41 मल्लु रे पुत्र ने अपणे स्वर्ग दूतां जो भेजणा, अते तिन्हा तिसेरे राज्य बिच सब पापियां जो अते उन्हा जो, जे पाप करणे री वजह बणदे थिये तिन्हा जो इकट्टा करणा। 42 अते तिन्हा जो अग रे भट्टे बिच पाई दैणा, तित्ते सबने रोणा अते अपणे दान्द पिहिणे। 43 तिस बेले भले अते नेक मल्लु अपणे परम-पिता रे राज्य बिच सुरज साहई चमकणे। जे सुणी सकदे हिन, सुणी लेंन।

### लुके रे खजाने रा उपनाण

44 स्वर्ग रा राज्य खेत्रा बिच छिपे रे धन रे बराबर है जिस जो कुसकी मल्लु जो मिल्लेया अते तिन्हे खेत्र बिच छुपाई दित्तेया, अते खुसी रे मारे तिन्हे अपणा सब किच्छ बेची करी से खेत्र खरीदी लेया।

### अनमोल मोती रा उपनाण

45 फिरी स्वर्ग रा राज्य इक कम्म-धंदा करणे वाळे साहई है, जे खरे मोतियां री तोप बिच थिया। 46 जां तिस जो इक किमती मोती मिल्लेया ता तिस ने जाई करी अपणा सब किच्छ बेची करी तिस जो खरीदी लेया।

### जाल रा उपनाण

47 फिरी स्वर्ग रा राज्य तिस बड्डे जाल साहई है, जिस जो समुंद्र बिच पाया अते हरेक किस्म री मच्छलियां जो बटोरी लेई आया। 48 अते जां भरी गया तां मछुआरे तिस जो खिचि करी कनारे लेई आये, अते बेईकरी खरी-खरी जो भानडेयां बिच इकट्टा करी लिच्छेया अते बेकार मच्छियां जो सुट्टी दिती। 49 दुनियां रे अंत बिच बी किच्छ इह्दियां ई होणा, स्वर्गदूत ने आईकरी बुरे जो भले अते नेक मल्लुआं का बखरा करी के अग रे भट्टे बिच पाई दैणा। 50 तित्ते रोणा अते लोकां ने अपणे दांद पिहणे।

### पुराणी ते नोई सीख रा महत्व

51 यीशु जी ने अपणे चेल्लेयां का पूछेया, के तुसी एह गल्लां समझे? तिन्हा ने यीशु जी जो बोलया, “हां!” 52 यीशु जी ने उन्हा जो बोलया, “दिखखो, इधेरे तांई हर इक सास्त्री जे कि स्वर्ग रे राज्य जो जाणदा, से उस घर रे मालक बराबर है जे अपणे भण्डार का नोई अते पुराणी चीजां जो बाहर कडदा।

### नासरत बिच यीशु जी री बेज्जती

53 जां यीशु जी एह उदारण बोली बैठे ता से तित्ते का चली गे। 54 अते अपणे सैहर आइकरी यहूदी धर्म सभा बिच तिन्हा जो सिक्सा दैणा लगे। इस कने हर कोई हरान होई गया ते बोलणा लगे, “इस जो इदेयी समझ अते चमत्कारी सक्ति कुते का मिल्ली? 55 के एह यूसूफ रा निक्का है? अते के इसेरी मां रा ना मरियम नी है अते इसेरे भ्याळां रे ना याकूब, यूसूफ, शमौन, यहूदा नी हिन? 56 अते के इसेरी सारी भैणा असां रे बिच नी रैहन्दी? ता फिरी इस जो एह सब किच्छ कुते का मिल्लेया? 57 अते उन्हा ने उस जो अपनाया नी, अपण यीशु जी ने बोलया “अपणे सैहर अते अपणे घरे बिच ई भविस्वयाणी करणे वाळे री इज्जत नी हुन्दी। 58 अते यीशु जी ने तिन्हे छोटे विस्वास री वजह कने तित्ते जादा सक्तिसाली कम्म नी कित्ते।

### यूहन्ना बपतिस्मा दैणे वाले रा खून होणा

14 उस बेले गलील रे राज्जे हेरोदेस ने जां यीशु जी रे कम्मां रे बारे अन्दर सुणेया। 2 तां तिस ने अपणे नौकरां जो बोलया, “एह यहून्ना बपतिस्मा दैणे वाळा है, जे मरी करी फिरी जिन्दा होई गेरा है, इधेरे तांई एह सक्तियां तिस बिच कम्म करेया करदी हिन।” 3 किजोकि एह ओई हेरोदेस थिय्या जिन्हे हेरोदेस जो बन्धी बणाई करी, संगळा कन्ने बन्नी करी जेलां बिच पाई दित्तेया थिय्या। एह उसने हेरोदियास रे बोलणे पर कित्तेया थिय्या, जे पैल्ले उसेरे भाई फिलिप्पुस री लाडी थी। 4 किजोकि यहून्ना ने उस जो बोलदा रेहन्दा थिया, कि “तिज्जो इस कने नी रैह्ना चहंदा। 5 इधेरे तांई हेरोदेस तिस जो मारी दैणा चांह्दा थिया, अपण से लोकां का डरदा थिया किजोकि मल्लु यहून्ना जो भविस्वयाणी करणे वाळा मनदे थिये। 6 अपण जां हेरोदेस रा जन्म दिन आया ता हिरोदियास री कुडी ने हेरोदेस अते तिसेरे परोणे रे अग नब्बी करी तिन्हा जो इतणा खुस करी दित्तेया 7 कि हेरोदेस ने कसम खाई करी वचन दित्तेया, “तू जे किच्छ बी मन्गागी, मै तिज्जो दिंगा। 8 अते अपणी मां रे उकसाणे पर तिन्हे बोलया, “मिजो थाळी बिच यहून्ना बपतिस्मा दैणे वाळे रा सिर देयो।” 9 इस गल्ल कने राज्जा बडा दुखी होया, अपण अपणी कसम री अते अपणे परोण्यां री वजह कने तिस ने तिसेरी जरूरत जो पूरा करणे रा हुकूम देई दित्तेया। 10 उस ने जेल बिच यहून्ना रा सिर बडणे तांई आदमी भेजे। 11 अते यहून्ना रा सिर इक थाळी बिच रख्खी करी लियाये अते कुडी जो देई दित्तेया ते से तिस जो अपणी मां का लेई गेई। 12 फिरी यहून्ना रे चेल्ले आई करी लाहस जो लेई गे अते तिन्हा ने उस दब्बी दित्तेया। अत्ते फिरी तिन्हा ने जाई करी यीशु जी जो दस्सेया।

### पाँज हजार म्हणुआं जो खुआणा

13 जां यीशु जी ने एह सुणेया, ता से तित्ते का किस्ती बिच कुसकी सांत जगह पर किल्ले चली गे। अपण जां लोकां जो पता चलेया तां से अपणे सैहरा का पैदल ई तिन्हेरे पिच्छे चली गे। 14 यीशु जी जां किस्ती का निकळी करी बन्ने आये तां तिन्हा लोकां री बडी बड्डी भीड़ दिख्खी। तिन्हा जो तिन्हा पर बडा तरस आया ते तिन्हा ने बमारा जो खरा कित्तेया। 15 जां सांझ होई ता तिन्हेरे चेल्लेयां ने यीशु जी का आई करी बोलया, “एह सुनसान जगह है ते बडी हाण बी होई गेरी है, इधेरे तांई मल्लुआं जो भेजी देयो, ताकि से मां बिच जाई करी अपणे तांई रोटी खरीदी लेंन।” 16 अपण यीशु जी ने तिन्हा जो बोलेया, “इन्हा जो कुते जाणे री जरूरत नी है: तुसा ई इन्हा जो खाणे जो देयो।” 17 तिन्हा ने यीशु जी जो बोलेया, “असा का सिरफ पंज रोटियां ते दो मच्छियां हिन।” 18 यीशु जी ने बोलया, “तिन्हा जो इत्ते मेरे का लेई आओ।” 19 यीशु जी ने लोकां री भीड़ जो बोलया कि तुसी घा बिच बैई जाओ। फिरी

यीशु जी ने पंज रोटियां ते दो मच्छियां जो लेया ते स्वर्ग पाससे दिख्खी करी परमेश्वर रा सुकर कित्तेया अते रोटियां रे टुकड़े तोड़ी-तोड़ी करी चेल्लेयां जो दित्ती अते चेल्लेयां ने मल्लुआं बिच बंडी दित्ती।<sup>20</sup> सब खाई करी करी रञ्जी गे। तां चेल्लेयां ने बचे रे टुकड़ेयां कने भरितेरे बाहरा टोकरे चुक्के।<sup>21</sup> जनानियां अते बचेयां जो छड्डी करी तित्ते खाणे वाळे कोई पंज हजार मड़द थिये।

### यीशु जी रा पाणी पर चलणा

<sup>22</sup> तां यीशु जी ने झट ई अपने चेल्लेयां जो किस्ती पर चढ़ाया ते जां तांई से भीड़ जो भेजदे, उन्हा जो गलील री झील रे पार अपने का पैह्ले ई जाणे जो बोलया।<sup>23</sup> मल्लुआं जो भेजणे का बाद यीशु जी कल्ले ई प्रार्थना करणे तांई पाहड पर चलीं गे। सांझ होणे तांई से कल्ले ई थिये।<sup>24</sup> अपण किस्ती बन्ने का किच्छ दूर छलारा रे थपेडेयां बिच डगमगाया करदी थी, किजोकि ब्यार सामणे का थी आया करदी।<sup>25</sup> भ्यागा रे कोई त्रै अते छै बजे रे बिच यीशु जी झील रे ऊपर चलदे तिन्हा का आये।<sup>26</sup> जां चेल्लेयां ने तिन्हा जो झील रे ऊपर चलदे दिख्खेया ता से घबराई गे ते अपु-मिते बोलणा लगे, "एह ता कोई भूत है!" अते डरे रे मारे चिन्डा मारणा लगे।<sup>27</sup> अपण यीशु जी ने उस्सी बेले तिन्हा कने गल्ल कित्ती ते बोलया, "हिम्मत रखखो! मैं है! डरा मत!"<sup>28</sup> तां पतरस ने यीशु जी जो बोलया, "प्रभु जी, जे तुसा हिन, ता मिन्जो पाणी पर चली करी अपु का आणे तांई हुकुम देयो।"<sup>29</sup> यीशु जी ने बोलया, "चली आ!" अते पतरस किस्ती का निकळी करी पाणी पर चलदे यीशु जी का चली पेया।<sup>30</sup> अपण तेज ब्यार जो दिख्खी करी से डरी गेया अते डूबणे लगेया ते लेरां मारदे बोलणे लगेया, "प्रभु जी, मिन्जो बचाओ।"<sup>31</sup> यीशु जी ने झट ई तिस जो हत्थ दित्तेया ते संभाळी लेया अते तिस जो बोलया, "तेरा विस्वास छोटा है, तू सक्र किजो कित्तेया थिय्या?"<sup>32</sup> अते जां से किस्ती पर चढ़ी आये ता ब्यार रुकी गई।<sup>33</sup> किस्ती पर जे मल्लु थिये तिन्हा यीशु जी री जै-जै कार कित्ती अते बोलया, "तुसा वाक्केई परमेश्वर रे पुत्र हिन।"

### गन्नेसरत मे बमारां जो ठीक करणा

<sup>34</sup> ता से झील रे पार गन्नेसरत पूजे, <sup>35</sup> अते तित्ते रे मल्लुआं ने जां यीशु जी जो पछ्याणेया ता तिन्हा ने अख्खी-बख्खी री सब जगह पर तिन्हेरे आणे रा बसेख भेजी दित्तेया, अते मल्लु बमारां जो तिन्हेरे का लेई आये।<sup>36</sup> ते से तिन्हा कने बिन्ती करणा लगे कि से तिन्हा जो अपने कपड़े जो ई छुणा देयो, अते जितणेया ने छुत्तेया, से पूरी तरह कने खरे होई गे।

### परम्परा जो मनणे पर सवाल

**15** ताँ यरुशलेम का किच्छ फरीसी अते शास्त्री यीशु जी का आई करी बोलणा लगे, <sup>2</sup> "तेरे चेल्ले पूरखाँ रे रिवाजां जो किजो नी मन्दे? से रीटी खाणे का पैह्ले हत्थ-पैर किजो नी धोन्दे?" <sup>3</sup> यीशु जी ने उन्हा जो जवाब दित्तेया, तुसी वी अपने रिवाजाँ री वजह कने किजो परमेश्वर रे हुकमा जो नी मन्दे? <sup>4</sup> किजोकि परमेश्वर ने बोलेया है, 'अपणे माँ-प्यो री इज्जत करो, अते, 'जे कोई माँ-प्यो जो बुरा बोले, तिस जो मारी दैणा चहिन्दा।'<sup>5</sup> अपण तुसी बोलदे कि जे कोई अपने माँ-प्यो जो बोले, 'किजोकि मैं अपना सब किच्छ परमेश्वर जो अर्पित करी बैठे रा है, इधेरे तांई तुम्हारी मदत नी करी सकदा।'<sup>6</sup> ता तिस जो अपने माँ-प्यो री इज्जत करणे री जरूरत नी है, इस्सी तरिके कने तुसी परमेश्वर रे हुकमां जो टाळदे हिन। <sup>7</sup> ओ ढोगियाँ!, यशायाह ने तुसाँ रे बारे बिच एह भविष्यवाणी ठीक ई कित्ती थी। <sup>8</sup> 'एह मल्लु सिरफ होंठा कने मेरी इज्जत करदे हिन, अपण इन्हेरे मन मेरे का दुर हिन। <sup>9</sup> एह बेकार मेरी भक्ति करदे हिन, अते मल्लुआँ री सिक्सा जो धर्म रे सिद्धान्त करी के सिखान्दे हिन।'

### भिठा करणे वाळी गल्लां

<sup>10</sup> ताँ यीशु जी ने मल्लुआँ जो अपने का सद्दी करी तिन्हा जो बोलेया, "सुणो अते समझो: <sup>11</sup> मल्लु रे मूँह अन्दर जे जान्दा, से मल्लु जो अपवित्र नी करदा, अपण उसेरे मूँह का निकळी गल्ल तिस जो अपवित्र करदी।"<sup>12</sup> ताँ चेल्लेयाँ ने आई करी तिन्हा जो बोलेया, "कै तुसी जाणदे हिन कि फरीसी तुम्हारी गल्ल रा

बड़ा बुरा मन्त्री गेरे हिन?" <sup>13</sup> अपण यीशु जी ने जवाब दित्तेया, "हर इक पनिरी जे मेरे स्वर्गीय पिता ने नी लगाई, बूट्टी दित्ती जाणी। <sup>14</sup> तिन्हा जो छड्डो; से ता खुद अहन्ने होई करी दूजे अहन्ने जो रस्ता दसणे वाळे हिन, इन्हा दोनां ने ई गन्ता बिच पेई जाणा।"<sup>15</sup> पतरस ने बोलेया, एह उदारण असा जो समझाई देयो।"<sup>16</sup> यीशु जी ने बोलेया, "कै तुसी हल्ले ताँई बी नी समझे? <sup>17</sup> कै तुसी नी जाणदे कि जे किच्छ बी मूँह बिच जान्दा से पेडा बिच जान्दा, अते सण्डास का निकळी जान्दा? <sup>18</sup> अपण जे किच्छ मूँह का निकलदा, से दिल का निकळदा, ते सेहई मल्लु जो अपवित्र करदा। <sup>19</sup> किजोकि बुरी गलाँ, खून करणा, बगेर ब्याहतिरी जनानी कने व्यभिचार, ब्याहतिरी कने व्यभिचार, चोरी, झूठी गुवाई, बेजती करणा जदेई बुराईयाँ दिल का ई निकळदी हिन। <sup>20</sup> एह ई गल्लाँ हिन जे मल्लु जो अपवित्र करदी हिन, बगेर हत्थ-पैर धोये रे रीटी खाणे कने कोई अपवित्र नी हन्दा।"

### कनानी जाती री इक्क जनानी रा विश्वास

<sup>21</sup> फिरी से तित्ते का निकळी करी, सूर अते सैदा प्रदेस रे पाससे चली गे। <sup>22</sup> अते दिख्खो, तिस प्रदेस का इक कनानी जनानी आई अते चिंदा मारी के बोलणा लगी, "ओ प्रभु, दाऊद री संतान, मेरे पर दया करो! मेरी कुडी जो बुरी आत्मा बड़ी तंग है करेया करदी।"<sup>23</sup> अपण तिन्हा ने तिस जो कोई जवाब नी दित्तेया। ताँ यीशु जी रे चेल्लेयाँ ने आई करी तिन्हेरे छन्दे कित्ते कि, "इस जो भेजी दें, किजोकि एह लैरां मारदी म्हारे पिच्छे है आया करदी।"<sup>24</sup> अपण यीशु जी ने उन्हा जो बोलेया, इस्त्राएल रे खानदान री गुम होयेरियां भेडां जो छड्डी मैं होर कुसकी का नी भेजेया गेरा है।"<sup>25</sup> अपण से आई अते यीशु जी री जै-जै कार करी के बोलणा लगी, "ओ प्रभु, मेरी मदत करो।"<sup>26</sup> यीशु जी ने उस जो बोलेया, "मुन्डेयाँ री रीटी लेइ करी कुतेयाँ रे मुहागर पाणा ठीक नी है।"<sup>27</sup> तिनिये बोलेया, "सच है प्रभु, अपण कुते वी से चुरा चारा खान्दे जे तिन्हेरे मालका रे मेज का पुन्दा।"<sup>28</sup> ताँ यीशु जी ने बोलेया, "ओ जनानी, तेरा विस्वास बड्डा है। जियाँ तू चान्दी, तियाँ ई तेरे ताँई हो।" तिसेरी कुडी तिस्सी बेले खरी होई गई।

### मते सारे बमारां जो ठीक करणा

<sup>29</sup> यीशु जी तित्ते का गलील री झील रे कनारे पूजे। से इक पाहड पर चढ़ी करी तित्ते बेई गे। <sup>30</sup> अते मल्लुआँ री बड़ी बड्डी भीड़ तिन्हा का आई अते से अपने कने लंगड़े, लूले, अहन्ने, जल्ले अते होर बी बड़े जणेया जो तिन्हेरे का लियाये अते तिन्हा जो यीशु जी रे पैरा का रखी दित्तेया। अते यीशु जी ने उन्हा जो खरा करी दित्तेया। <sup>31</sup> जाँ मल्लुआँ ने दिख्खेया कि जल्ले बोलदे हिन, लूले खरे होई गे, लंगड़े चलदे अते अहन्ने दिख्खे हिन ता से हैरान होई गे। अते से इस्त्राएल रे परमेश्वर री बड़ाई करणा लगे।

### चार हजार लोकां जो खुआणा

<sup>32</sup> यीशु जी ने अपने चेल्लेयाँ जो अपने का सट्टेया अते बोलेया, "मिन्जो इस भीड़ पर तरस आन्दा किजोकि एह मल्लु तिन्न रोज़ का मेरे कने हिन अते इन्हा का किच्छ बी खाणे जो नी है, मैं इन्हा जो भूखा भेजणा नी चान्दा, कुदखी ईयाँ नी हो कि रस्ते बिच ई अद्ध-मरे होई जाओ।"<sup>33</sup> चेल्लेयां ने उन्हा जो बोलेया, "असा जो इस बंजर जगह बिच कुदेका इन्नी रीटी मिलणी कि असा इन्नी बड्डी भीड़ जो रजाई सकन?"<sup>34</sup> यीशु जी ने तिन्हा जो पूछेया, "तुम्हारे का किन्नी रीटी हिन?" तिन्हा ने बोलेया, "सत्त रीटियां, अते थोड़ी करी हल्कियां मछियां बी हिन।"<sup>35</sup> ता तिन्हा ने मल्लुआँ जो भुईयाँ बैणे रा हुकम दित्तेया। <sup>36</sup> ते तिन्हा सत्त रीटियां अते मछियां जो लेया अते सुकर करी के तोड़ेया, ते अपने चेल्लेयाँ जो दिदें गे ते चेल्ले मल्लुआँ जो। <sup>37</sup> से सब खाई करी रजी गे अते चेल्लेयां ने बचे रे टुकड़ेयां कने भरितेरे सत्त टोकरे चुक्के। <sup>38</sup> खाणे वाळे जनानियां अते निक्केयां रे अलावा चार हजार मड़द थिये। <sup>39</sup> ताँ से भीड़ जो भेजी करी किश्ती पर चढ़ी गे, अते मगदन देस री सीमा बिच आये।

### स्वर्गीय निसानी री माँग

16 फरीसियां अते सदूकी यीशु जी का आये। से यीशु जी जो परखणे चाहन्दे थिये, इधरे ताई तिन्हा ने यीशु जी जो बोलेया, "असा जो स्वर्ग री कोई निशानी दिखाओ।" 2 अपण यीशु जी ने जवाब दित्तेया, "जां सांझ हून्दी ता तुसी बोलदे, अम्बर लाल है, मौसम ठीक रेह्ला।" 3 अते भ्यागा बोलदे, 'अज हनेरी चलणी, किजोकि अम्बर लाल अते डरोणा है।' तुसा अम्बर रे लक्षण दिखी करी तिसेरे भेद दस्सी सकदे, अपण इस जुग रे बेले री निशानियां रा भेद किजो नी दस्सी सकदे? 4 इस जुग रे बुरे अते व्यभिचारी पीढ़ी निशानी तोपदी, अपण योना री निशानी जो छड़ी तिन्हा होर कोई निशानी नी दित्ती जाणी।" अते तां यीशु जी तिन्हा जो छड़ी करी चली गे।

### फरीसी ते सदूकियां री सीख र खमीर

5 यीशु जी रे चेले झील रे पार पुजे, अपण से रोटी लेणा भूली गे। 6 यीशु जी ने तिन्हा जो बोलेया, "दिखखो, फरीसियां अते सदूकियां री तराक का सावधान रेहो।" 7 से अपु-मिते गल्ल-बात करी के बोलणा लगे, "से इधरे ताई बोलया करदे हिन किजोकि असा रोटी नी लियाये।" 8 अपण यीशु जी एह जाणी लेया अते बोलेया, "तुम्हारा विस्वास छोटा है, तुसी अपु-मिते किजो बैहस-बाजी करेया करदे हिन कि असा का रोटी नी है? 9 के तुसा हले ताई नी समझे? जां पंज हजार महुआं ताई पंज रोटियां थियां ता तुसी किन्ने टोकरे भरी के चुक्री थिये? 10 अते ना तिन्हा चार हजार ताई सत्त रोटियां थियां ते तुसी किन्ने टोकरे भरी के चुक्री थिये? 11 तुसी किजो नी समझे कि मैं तुम्हारे जो रोटियां रे बारे नी बोलेया थिया अपण एह कि तुसी फरीसियां अते सदूकियां री तराक का सावधान रेहो।" 12 तां तिन्हेरी समझ बिच आया कि तिन्हा रोटी री तराक का नी, अपण फरीसियां अते सदूकियां री सिक्सा का सावधान रेहो ताई बोलेया थिया।

### पतरस रा यीशु जी जो मसीह मनणा

13 जां यीशु जी कैसरिया फिलिप्पी रे प्रदेस जो आये, ता अपणे चेलेयां जो पूछणा लगे, "लोक महु रे पुत्र जो के बोलदे हिन?" 14 तिन्हा ने बोलेया, "किच्छ ता यहूना बपतिस्मा देणे वाळा बोलदे हिन, किच्छ एलियाह, अते होर यिर्मयाह या भविष्यदक्तां बिच का कोई इक बोलदे हिन।" 15 यीशु जी ने उन्हा जो बोलेया, "अपण तुसी मिन्जो के बोलदे?" 16 शमौन पतरस ने जवाब दित्तेया, "तुसी जिंदा परमेश्वर रे पुत्र मसीह हिन।" 17 यीशु जी उन्हा जो बोलेया, "ओ शमौन, योना रे पुत्र, तू धन्न है; किजोकि मांस अते खून ने नी, अपण मेरे पिता ने जे स्वर्ग बिच हिन, एह गल्ल तिन्हा पर जाहिर किती है। 18 ते मैं वी तिजो बोलदा कि तू पतरस है, ते मैं इस्सी पत्थर पर अपणी कलीसिया बनाणी ते अधोलोक रे दुआर तिस पर हावी नी होणे। 19 मैं तिजो स्वर्ग रे राज्य री चाबियां देणी, अते जे किच्छ तू धरती पर बनगा, से स्वर्ग बिच बनिह्ला, अते जे किच्छ तू धरती पर खोलगा, से स्वर्ग बिच खुलणा।" 20 फिरी यीशु जी ने चेलेयां जो सख्ती कने समझाई करी बोलया कि मेरे बारे बिच एह कुसकी कने मत बोलदे कि मैं मसीह है।

### अपणे मरणे रे बारे बिच यीशु जी री भविष्यवाणी

21 उस बेले यीशु जी अपणे चेलेयां जो दस्सणा लगे, "जरूरी है कि मैं यरुशलेम जो जां, ते पुरखां, परोतां रे प्रधान, अते शास्त्रियां रे हत्थे बड़े दुःख उठां, अते मारी दित्तेया जां, ते तिज्जे दिन जिंदा होई जां।" 22 तां पतरस तिन्हा जो अलग ले जाई करी बकणे लगेया, "ओ प्रभु, परमेश्वर न करन! तुम्हारे कने इदेया कदी बी हो।" 23 तां यीशु जी ने मुडी करी पतरस जो बोलेया, "ओ शैतान, मेरे सामणे का दूर होई जा; तू मेरे ताई इक अडचन है; किजोकि तू परमेश्वर री गलां पर नी, अपण महुआं री गलां पर मन लगादां।"

### यीशु जी रे पिच्छे चलणे रा मतलब

24 ताँ यीशु जी ने अपणे चेलेयां जो बोलेया, "जे कोई मेरे पिच्छे आणा चान्दा ता अपणे आपे का इन्कार करन, ते अपणी सूळी चुकी करी, मेरे पिच्छे चलन। 25 किजोकि जे कोई अपणी जिंदगी जो बचाणे री इच्छा रखदा, तिन्ने तिस जो खोई देणा, अपण जे कोई मेरे ताई अपणी जिंदगी जो खोगां, तिन्ने तिस जो पाई लैणा। 26 जे महु सारी दुनिया जो पाई लेंन, ते अपणे प्राण जो खोई दे, ता तिस जो कै फायदा होणा? या महु अपणे प्राण रे बाट्टे कै दिंगा? 27 किजोकि महु रा पुत्र अपणे स्वर्ग दूतां कने अपणे पिता री महिमा बिच आणे वाळा है। तां तिन्ने हर इक महु जो तिसेरे कम्मा रे साहब कने इनाम देणा। 28 मैं तुसा कने सच्च बोलदा कि इत्ते खडितेरेयां बिच का किच्छ, इदेय बी हिन कि जाँ ताई महु रे पुत्र जो तिसेरे राज्य बिच का आन्दे नी दिख्खी लिन्दे, तां ताई तिन्हा मौत रा सुआद नी चखणा।"

### यीशु जी रा रूप बदलणा

17 यीशु जी छे रोजाँ बाद पतरस, याकूब, अते तिसेरे भ्याळ यहूना जो अपणे कने कले बिच इक ऊँचे पाहड पर बिच लेई गे। 2 तिन्ने तिन्हेरे सामणे यीशु जी रा रूप बदली गया। उन्हेरा मूह सूरज साई चमकी पेया, अते तिन्हेरे कपडे इय्यां चमके जियाँ लौ हो। 3 फिरी अचानक मूसा ते एलियाह उन्हेरे सामणे आये अते यीशु जी कने गल्ल-बात करणा लगे। 4 पतरस ने यीशु जी जो बोलेया, "ओ प्रभु, असा ताई इत्ते रेह्ला ठीक है। जे तुम्हारी मर्जी हो ता मैं इत्ते त्रै डेरे बणां; इक तुम्हारे ताई, इक मूसा ताई, अते इक एलियाह ताई।" 5 से बोलेया ई करदा थिया कि दिखखो, इक चमकदे बदळ ने तिन्हा जो ढक्की लेया, अते तिस बदळ बिच का इक अवाज निकळी, "एह मेरा प्यारा पुत्र है, जिस का मैं बड़ा खुस है: इसेरी सुणो।" 6 जां चेलेयां ने एह सुणेया ता से इतणे डरी गे कि से उन्दे मूहा पेई गे। 7 यीशु जी ने आई करी तिन्हा जो छुत्तेया, अते बोलेया, "उठा, डरा मत।" 8 ताँ तिन्हा ने अपणी हाखिखाँ चुकियां अते तिन्हा यीशु जो छड़ी होर कुसकी जो नी दिख्खेया। 9 जाँ से पाहड का थले उतरदे थिये ता यीशु जी ने तिन्हा जो हुकम देईकरी बोलेया, "जाँ ताई महु रा पुत्र मरे रेयाँ बिच का जिन्दा नी होई जान्दा, ताँ ताई जे किच्छ तुसी ने दिखेया से कुसकी कने मत बोलदे।" 10 फिरी तिन्हेरे चेलेयां ने तिन्हा का पूछेया, "फिरी शास्त्री किजो बोलदे कि एलियाह रा पैह्ले आणा जरूरी है?" 11 तिन्हा ने जवाब दित्तेया, एलियाह ने जरूर आणा, अते तिस ने सब किच्छ सुधारणा। 12 अपण मैं तुम्हारे जो बोलदा कि एलियाह आई गया है, अपण महुआं ने तिस जो पछियाणेया नी, तिन्हा ने जियाँ चाया तियाँ ई तिसेरे कने कित्तेया। इय्यां ई महु रे पुत्र ने वी दुख उठाणे हिन।" 13 तां चेलेयां ने समझेया कि तिन्हा ने म्हारे जो यहूना बपतिस्मा देणेवाळे रे बारे बिच दस्सेया।

### बुरी आत्मा रे सताए मुडें जो ठीक करणा

14 जाँ यीशु जी भीड़ का वापस आये ता इक महु यीशु जी का आया अते जानू भारे बेईकरी बोलणे लगेया, 15 "ओ प्रभु, मेरे पुत्र पर दया करो! किजोकि इस जो मिर्गी आन्दी अते इस जो बड़ी तकलीफ हून्दी; अते घड़ी-घड़ी अग अते पाणी बिच पेई जान्दा। 16 मैं तिस जो तुम्हारे चेलेयाँ का लियाया थिया अपण से तिस जो खरा नी करी सके।" 17 यीशु जी ने जवाब दित्तेया, "विस्वास रे छोटे अते भटके रे महुआँ! मैं कधाड़ी ताई तुम्हारे कने रेह्ला? कधाड़ी ताई तुम्हारी सैणी? तिस जो मेरे का लियाओ।" 18 फिरी यीशु जी ने बुरी आत्मा जो झिड़केया अते से तिस बिच का निकळी गेई; अते मुन्डा उसी ई बेले खरा होई गया। 19 फिरी चेलेयाँ ने कले बिच यीशु जी का आई करी पूछेया "असा उस जो किजो नी निकळी सके?" 20 यीशु जी ने उन्हा जो बोलेया, अपणे विश्वास री कमी री वजह कने, किजो कि मैं तुम्हारे सच्च बोलदा, जे तुम्हारा विस्वास इक सरैयाँ रे दाणे रे बराबर वी हो, ता इस पाहड जो बोलगे, इत्ते का घिरी करी उत्ते जा, अते तिन्ने घिरी जाणा। तुम्हारे ताई किच्छ बी मुस्किल नी होणा। 21 [अपण एह जाति बगेर प्रार्थना अते ब्रत रे नी निकळदी।]"

### अपणे मरणे रे बारे बिच यीशु जी री दुई भविष्यवाणी

22 जाँ से गलील बिच थिये, यीशु जी ने तिन्हा जो बोलया, "मह्लु रा पुत्तर मह्लुआं रे हत्था पकड़वाया जाणे वाळा है; 23 अते तिन्हा तिस जो मारी रखणा, अपण तिस ने तिजे रोजे जिदे होई जाणा।" अते इस गल्ल पर यीशु जी रे चेले बड़े उदास होई गे।

#### मन्दर रा कर

24 जाँ से कफरनहूम पुजे, ताँ मन्दिर री चुंगी लेणे वाळ्यां ने पतरस का आईकरी पूछेया, "कै तुम्हारा गुरु मन्दिर री चुंगी नी दिन्दा?" 25 तिस ने बोलेया, "हाँ दिन्दे हिन।" जाँ से घरे आया, ता यीशु जी ने पैहे उसका पूछेया, "ओ शमौन, तू कै है सोचदा? धरती रे राजे कर या चुंगी कुस का लिन्दे हिन? अपणे बचेयां का या दूजेयां का।" 26 पतरस ने उन्हा जो बोलेया, "दूजेयां का।" यीशु जी ने तिस जो बोलेया, "ताँ ता बचे चुंगी दैणे का बची गे। 27 अपण असी उन्हा लोकां जो नराज ना करी देंन, इधेरे ताँ तू झील रे बने पर जाई करी कंडा पा, अते जे मच्छी पैहे निकळगी, तिस जो ले; अते तिसेरा मूँह खोलण तिजो इक सिक्का मिलणा, तिस जो लेई करी मेरे अते अपणे बदले तिन्हा जो देई देया।"

#### स्वर्ग बिच बड्डा कुण ?

18 तां यीशु जी रे चेले यीशु जी का आईकरी पुच्छणा लगे, कि स्वर्ग रे राज्य बिच बड्डा कुण है?" 2 अते यीशु जी ने इक निक्के जो सद्देया अते तिन्हेरे मझाटे खडा करी दित्तेया। 3 ते बोल्य, मैं तुसां कने सच्च बोल्दा, जां ताँ तुसी अपणे पापां का तौबा नी करी लिन्दे अते बचेयाँ साहूई नी बणी जान्दे, स्वर्ग रे राज्य बिच जाई नी सकणा। 4 जे कोई अपणे आप जो इस निक्के रे बराबर निम्मता करगा, तिनिये स्वर्ग राज्य बिच बड्डा होणा। 5 अते जे कोई मेरे नां कने इस निक्के जो अपनान्दा करदा, से मिंजो अपनान्दा।

#### पाप करणे री परिक्षा

6 अपण जे कोई मेरे पर विस्वास करणे वाले मेरे कुसकी निम्मते चेले रे रस्ते री रुकावट बणदा, खरा हून्गा कि तिसेरे गल्ले बिच इक चक्की रा पाट लटकाई करी तिस जो समुद्र बिच डुब्बाई दित्तेया जाये। 7 अडचना री वजहा कने दुनियां पर हाय। रुकावट ता आणी ई हिन, अपण हाय तिस मह्लु पर जिसेरी वजह कने आंदी। 8 जे तेरे हत्थ या तेरे पैर तेरे का पाप करणे री वजहा बणदे, ता तिन्हा जो कडी करी सुट्टी दे, किजोकि लगडा-लुला होईकरी जिन्दगी बिच आणा इस का केई जादा खरा है, कि दो हत्थ अते पैर हुन्दे-सुन्दे तिजो कदी नी बुझणे वाळी अग्न बिच पाई दित्तेया जाये। 9 अते जे तेरी हाखवी तेरे का पाप करान्दी, ता तिस जो कडी सुट्ट।

#### गुआचे री भेडां

10 किजोकि टीणा होईकरी जिंदगी बिच आणा इस का केई जादा खरा है, कि दो हाखियां हुन्दे सुन्दे तू नरक री अग्न बिच पाई दित्तेया जाये। 11 इधेरे ताँ दिखखो, तुसा इन्हा मेरे भोळे चेलेयां बिच का कुसकी जो बी छोटा मत समझदे, किजोकि मैं तुसां जो बोल्दा, कि स्वर्ग बिच उन्हेरे दूत मेरे स्वर्गिय पिता रा मुँह हमेसा दिखखदे हिन। 12 तुसां कै समझदे हिन? जे कुसकी मह्लु री सौ भेडां होन, ते तिन्हा बिच का इक गुअची जान, ता कै से नडिनुये जो छडी करी तिस गुअची री भेड जो नी तोपणा नी जांगा? 13 अते जे जां से तिस जो मिली जाणी, मैं तुसां जो सच्च बोल्दा, तिस जो तिन्हा नडिनुये भेडा ताँ इतनी खुसी नी होणी जितनी कि इस इक भेड ताँ होणी। 14 इह्य्यां ई तुसां रे स्वर्गिय पिता बी नी चाहन्दे कि इन्हा छोट्यां बिच का कोई नास हो।

#### मुल्जिमां कने कदेया बताव करणां चाएदा?

15 जे तेरा भ्याळ तेरे कने बुरा करन ता, जा ते कले बिच तिस कने गल्ल-बात करी के समझा, जे से तेरी सुणदा ता समझी ले कि तू तिस जो पाई

लेया। 16 अपणे जे से तेरी नी सुणदा ता अपणे कने इक-दो जणे होर लेई जा, ताकि हर गल्ल री दो-तीन गवाई होई जाओ। 17 जे से उन्हेरी बी ना सुणण ता कलीसिया जो बोल। जे से कलीसिया री बी नी सुणण ता तू तिस कने इदेया बरताव कर जिज्यां से तेरे ताँ अन्जजाति या चुंगी लैणे वाळा हो।

#### रोकणा ते मौक्का दैणा

18 मै तुम्हारे जो बोलदा, जे किच्छ तुसी धरती पर बनणा स्वर्ग बिच बनेया जाणा अते जे किच्छ तुसी धरती पर खोलणा से स्वर्ग अन्दर खोलेया जाणा। 19 मै तुसा कने फिरी बोलदा, जे तुम्हारे बिच का दो जणे कुसकी प्रार्थना ताँ इकमत हो, ता तिस जो मेरे स्वर्ग बिच रेहे वाले पिता ने पूरा करी दैणा। 20 किजोकि जिते दो या त्रै मेरे नां कने इकट्टा हून्गे, तिन्हेरे बीच मै होणा।"

#### बेरहम नौकर रा उपनाण

21 तां पतरस ने आई करी यीशु जी जो पुच्छेया, "प्रभु मेरा भयाळ कितणी बरी मेरे कने गलत करदा रेह कि मैं तिस जो माफ करां? कै सत्त बरी ताँई?" 22 यीशु जी ने तिस जो बोलेया, "मै तेरे कने एह नी बोलदा कि सत्त बरी ताँई ई, अपण सत्त बरी रे सत्तर गुणा ताँई माफ कर। 23 इधेरे ताँई स्वर्ग रे राज्य री बराबरी इदेय राजे कने करी सकदे जिन्ने अपणे नौकरां का हिसाब-कताब मंगेया। 24 जां से हिसाब-कताब लैणा लगेया ता इक मह्लु जो लियाया जिस पर दस हजार तोड़े रा उधार थिया। 25 अपण जां तिस का उधार चुकाणे ताँई किच्छ नी थिया ता उसेरे मालक ने हुकम दित्तेया कि, उस जो अते उसेरे लाडी-बचे, ते जे किच्छ तिस का है, सब बेची करी उधार पूरा कित्तेया जाये। 26 ताँ से नौकर पैरा पेई गेया अते बोलणे लग्गेया, 'मालक सबर रखो। मै सब किच्छ चुकाई दिंगा।' 27 ताँ उस नौकर रे मालक ने तरस खाईकरी तिस जो छडी दित्तेया अते तिसेरा उधार बी माफ करी दित्तेया। 28 अपण से नौकर बाहर निकलेया अते तिस जो तिसेरा इक साथी नौकर मिलेया जिस का तिस ने सौ दिनार लैणे थिये। उस ने तिस जो पकडेया अते तिसेरा गळा पकडी करी बोलेया, 'मेरा पैसे दे।' 29 तां से तिसेरा साथी नौकर पैरा पेई करी छन्दे करणा लगेया, 'सबर रखो, मै सब देई दिंगा। 30 से फिरी बी नी मनेया अते तिस जो तां ताँई जेला पाई रखेया जां ताँई उधार देई ना देंन। 31 एह दिखखी करी तिसेरे साथी नौकराँ जो बडा जादा बुरा लगेया अते तिन्हा ने जाई करी एह सारी गल्ल अपणे मालक जो सुणाई दित्ती। 32 ताँ तिसेरे मालक ने तिस जो सद्दी करी बोलेया, 'ओ बुरे नोकर, इधेरे ताँई कि तू मेरे छन्दे कित्ते थिये, मैं तेरा उधार माफ कित्तेया थिया। 33 मै जिज्याँ तेरे पर तरस खाया थिया, तिजे बी तियाँ ई अपणे साथी नौकर पर बी तरस खाणा चहिंदा थिया।' 34 अते मालक ने गुस्सा होई करी तिस जो सजा दैणे वाले रे हत्थे देई दित्तेया ताकि से उधार चुकाणे तक तिन्हेरे ई हत्थां रेह। 35 इह्य्याँ ई जे तुसा बिच सब अपणे भ्याळ जो माफ नी करणे ता मेरे स्वर्ग बिच रेहे वाले पिता ने बी तुसा कने तियाँ ई करणा।"

#### तलाक रे बारे बिच यीशु जी री सीख

19 जां यीशु जी एह गल्लं बोली बैठे ता से गलील का चली गे ते यरदन रे पार यहूदिया रे परदेस अन्दर आई गे। 2 इक बडी बड्डी भीड़ तिजे का तिन्हेरे पिछे चली पेई, ते यीशु जी ने तिन्हा जो खरा कित्तेया। 3 तां फरीसी परखणे ताँई यीशु जी का आई करी बोलणा लगे, "कै अपणी लाडी जो कुस्की बी वजह कने तलाक देई सकदे?" 4 उन्हा जो यीशु जी ने जवाब दित्तेया, "कै तुसा ने शास्त्र बिच नी पढ़े रा है कि दुनियाँ जो रचणे वाले ने शूर बिच, 'उन्हा जो इक जनानी ते इक मडद रे रूप बिच रचेया थिया?' 5 ते बोलेया थिया, 'इधेरे ताँई प्यो ते अम्मां जो छडी करी मडद अपणी लाडी कने दो हून्दे बी इक तन रैह्ला।' 6 इधेरे ताँई अवे से दोहई जहे बखरे-बखरे नी अपण से इक-तन हिन। इधेरे ताँई जे परमेश्वर ने जोडे रा है, तिस जो कोई बखरा ना करो।" 7 तां फरीसियाँ ने तिन्हा का पुछेया, "फिरी मूसा नबी ने एह कानून किजो दस्सेया कि लाडी जो तलाक-पत्तर देई करी तिस का तलाक लेई सकदे? 8 यीशु जी ने तिन्हा जो बोलेया, "मूसा ने तुम्हारे सख्त मना जो दिखखी करी इह्याँ कित्ता अपण पैहे इह्याँ नी हुन्दा थिया। 9 अते मैं



तुसा जो बोलदा, कि जे बी मल्लु अपनी लाडी जो व्याभिचार जो छडुडी करी कुस्की होरसी वजह कने तलाक दिंगा ते दुज्जी लाडी ब्याहई लिन्गा, से व्याभिचार करदा; ते जे तिस छडुडेरी जनानी कने ब्याह करगा, तिस ताँई से बी व्याभिचार ई होणा है।<sup>10</sup> चेल्लेयाँ ने यीशु जी जो बोलेया, “अगर लाडा-लाडी रे बिच इदेह्या रिस्ता हो ता ब्याह करणा ई नी चहिंदा।”<sup>11</sup> यीशु जी ने तिन्हा जो बोलेया, “इस सिक्सा पर हर कोई नी चली सकदा। सिरफ सेहई चली सकदे, जिन्हा जो ए दान मिल्ले रा हुन्दा।<sup>12</sup> किजोकी किच्छ हिजडे इदेह हिन्, जे मां रे पेडा का ई इदेह पैदा होए रे हिन्; ते किच्छ हिजडे इदेह हिन्, जिन्हा जो मल्लुआं ने हिजडा बणाए रा है; अते किच्छ हिजडे इदेह हिन्, जिन्हा ने स्वर्ग रे राज्य ताँई अपु जो हिजडा बणाए रा है। जे इस गल्ल जो मन्नी सकदा से मन्ना।”

### बचेयां जो आशीर्वाद

<sup>13</sup> फिरी मल्लु अपने निके-निकेयाँ जो यीशु जी का लेई आये कि से तिन्हेरे सरां पर अपना हथ्य रखी करी असीस देंन ते प्रार्थना करन, अपण चेल्लेयाँ ने तिन्हा मल्लुआं जो ठाकी दित्तेया।<sup>14</sup> यीशु जी ने बोलेया, “निके-निकेयाँ जो मेरे का आणा देयो, इन्हा जो मत रोको, किजोकी स्वर्ग रा राज्य इदेह्यां रा ई है।”<sup>15</sup> अते से तिन्हा पर अपना हथ्य रखी करी तित्ते का चली गे।

### अमीर आदमी ते हमेसा री जिदंगी

<sup>16</sup> इक मल्लु यीशु जी का आया ते तिन्हा जो बोलणा लगेया, “ओ गुरु जी, मैं कुण इदेह्या भला कम्म करां कि मिन्जो हमेसा ताँई जिन्दगी मिल्ली जाओ?”<sup>17</sup> तिन्हा ने तिस जो बोलेया, “तू मेरे का भलाई रे बारे अन्दर किजो पुछेया करदा है? भला ता इक ई है, अपण जे तू जिन्दगी हासल करणा चाहन्दा, ता हुक्मां जो मन्नेया कर।”<sup>18</sup> तिनिए यीशु जी का पुछेया, “कुण वाळे हुक्म?” यीशु जी ने बोलेया कि, “ए कि कुस्की री जान नी लेणी, व्याभिचार नी करणा, चोरी नी करणी, झूठी गवाई नी देंणी,<sup>19</sup> अपणे प्यो अते अपनी अम्मां री इज्जत करणी, ते अपणे गुवांडी कने अपु साहई प्यार रखणा।”<sup>20</sup> तिस जुआन मल्लु ने यीशु जी जो बोलेया, “इन्हा सब गल्लां जो ता मैं सच्चे मनां कने पूरा करदा ई है; अवे मेरे अन्दर कुस गल्ले रा घाटा है? <sup>21</sup> यीशु जी ने तिस जो बोलेया, “जे तू पूरा सही होणा चाहन्दा, ता जे किच्छ बी तेरे का है से बेची करी पैसे गरीबां जो बंडी दे, ताकि तिजो स्वर्ग अन्दर धन-दौलत मिल्ले; ते आई करी मेरे पिछे चली पे।”<sup>22</sup> अपण जाँ उस जुआन ने एह सुणेया ता दुखी होई करी चली गया किजो कि से बडा अमीर थिया।<sup>23</sup> तां यीशु जी ने अपणे चेल्लेयाँ जो बोलेया, “मैं तुसा जो सच्च बोलदा कि अमीर मल्लु रा स्वर्ग अन्दर जाणा बडा मुस्कल ए।<sup>24</sup> मैं तुसा जो फिरी बोली दिन्दा कि अमीर मल्लु रा परमेश्वर रे राज्य अन्दर जाणे का इक ऊँट रा सूई रे भोक्का का घुसडी जाणा जादा असान है।<sup>25</sup> ए सुणी करी चेल्लेयाँ ने बडी हरानी कने पुछेया, “फिरी कुसेरा उद्धार होई सकदा?”<sup>26</sup> यीशु जी ने तिन्हा पाससे दिख्खी करी बोलेया, “मल्लुआं ताँई एह नामुमकिन ए, अपण परमेश्वर ताँई सब किच्छ मुमकिन ए।”<sup>27</sup> इस गल्ल पर पतरस ने तिन्हा जो बोलेया, “दिख्खो, असी ता अपना सब किछ छडुडी करी तुम्हारे पिछे चली पेरे हिन्: ता असां जो कै मिलणा?”<sup>28</sup> यीशु जी ने तिन्हा जो बोलेया, “मैं तुसा जो सच्च बोलदा कि नौये जुग अन्दर जां मल्लु रे पुत्र ने अपणे प्रतापी सिंहासन पर बैह्ला ता तुसा बी, जे मेरे पिछे चले रे हिन्, बारा सिंहासनां पर बेहई करी इस्त्राएल रे बारा गोत्रां रा न्याय करणा है।<sup>29</sup> ते मेरे ताँई जिनिए बी अपना घर-बार, भैण-भ्याळ, मां-प्यो, निके-निके या अपणे खेतरां जो छडुडी दित्तेया है, तिस जो सौ गुणा जादा मिलणा अते तिनिए हमेसा री जिन्दगी रा बी हकदार बनणा।<sup>30</sup> अपण मते जह्ने जे अब्बे पैहे हिन्, आखरी होई जाणे अते जे आखरी हिन्, पैहे होई जाणे।”

### बारी रे मजदुरां रा उपनाण

<sup>20</sup> स्वर्ग रा राज कुसकी घरे रे माळक साइं है, जे भ्यागा निकळेया कि अपणे अंगूरा रे बगीचे बिच मजदुरां जो लाए।<sup>2</sup> उन्निये मजदुरां पर इक दिनार रोज रा ठहराया ते उन्हेरे जो अपणे बगीचे बिच भेजेया।<sup>3</sup> फिरी

इक पैह दिन चढ़णे रे बाद उन्निये निकळी करी होर लोकां जो बजार बिच बेकार खडिते रे दिख्खेया <sup>4</sup> ते उन्हा जो बोलेया, ‘तूसी बी अंगूर रे बगीचे बिच जाओ, ते जे किछ ठीक हूंगा, तुसां जो दिगां।’ अते से बी गेय।<sup>5</sup> फिर उन्निये दुए ते त्रिये पैह रे नेडे निकळी करी तिय्यां ही कित्तेया।<sup>6</sup> धिहाडी रा इक घटां रेया उन्निये फिरी निकळी करी लोकां जो खडिते रे दिख्खेया, ते उन्हेरे जो बोलेया, ‘तूसी किजो सारी धिहाडी इते बेकार खडी रेय?’ उन्हाने उसजो बोलेया, ‘इस ताइ किजोकी कुसकि ने असां जो मजदुरी पर नी लाया।’<sup>7</sup> उन्निये उन्हा जो बोलेया, ‘तूसी बी अंगूर रे बगीचे बिच जाओ।’<sup>8</sup> ‘सजां वेले अंगूर रे बगीचे रे माळक ने अपणे मून्सि जो बोलेया, ‘मजदुरां जो सदी करी पिछेयां का लेइ करी पैह्यां तिकर सारेयां जो धिहाडी देइ दे।’

### अपणे मरणे रे बारे बिच यीशु जी री तिज्जी भविष्यवाणी

<sup>9</sup> जां ओ आए जे घटां भर धिहाडी लाए गेय थिए, उन्हा जो इक-इक दिनार मिल्लेया।<sup>10</sup> जे पैहे आए उन्हा ने ए समजेया कि असां जो जादा मिळणा, अपण उन्हा जो बी इक-इक दिनार ही मिल्लेया।<sup>11</sup> जां मिल्लेया तां ओ घरे रे माळक पर बूडबूडाइइ करी बोळणा लग्गे,<sup>12</sup> इन्हा पिछेयां ने इक ही घटां काम्म कित्तेया, ते तूसी उन्हेरे जो हमारे बराबर करी दित्तेया, जिन्हा ने सारी ढिहाडी रा भार चुक्रेया ते धूप सैहइ? <sup>13</sup> उन्निये तिन्हेरे बिच का इक जो जवाब दित्तेया, ‘हे मित्तर, मैं तेरे कने किछ अन्नयाय नी हे करेया करदा। क्या तैं ही मेरे का इक दिनार नी ठहराया थिया? <sup>14</sup> जे तेरा है, चुकि ले ते चली जा; मेरी मर्जी ए है कि जिन्हा तेरे जो देयां उन्हा ही इस पिछले जो बी देयां। <sup>15</sup> जे तेरा है, चुकि ले ते चली जा; मेरी मर्जी ए है कि जिन्हा तेरे जो देयां उन्हा ही इस पिछले जो बी देयां। <sup>16</sup> इसी तरिके कने जे पिछले हिन्, पैहे कित्ते जाणे; ते जे पैहे हिन्, से पिछले होणे।’ <sup>17</sup> यीशु जी ने यरुशलेम जादें वेले बारां चेल्लेयां जो किल्ले बिच लेइ गेया ते रस्ते बिच उन्हा जो बोळणा लगेया,<sup>18</sup> “दिख्खो, असी यरुशलेम जो जाया करदे हिन्; ते मणू रा पुत्तर प्रधान याजकां ते शास्त्रियां रे हथ्यां पकड़वाया जाणा, ते उन्हा ने उन्हेरे जो मारणे जोगे ठहराणा। <sup>19</sup> ते उसजो गैर यहुदियां रे हथ्यां बिच सौपणा ताकी ओ उन्हेरा मजाक उड़ाण ते कौडे मारण, ते सूळी पर चढाण, ते ओ तीसरे दिन जिन्दा कित्तेया जाणा।’ <sup>20</sup> तां जब्दि रे पुत्तरां री माँ ने, अपणे पुत्तरां कने यीशु जी रे नेडे आइ करी उन्हा जो प्रणाम कित्तेया, ते उन्हा का किछ मंगणा लग्गी। <sup>21</sup> उन्हा ने उन्हेरे जो बोलेया, ‘तू क्या चाहिद?’ ओ उन्हा जो बोळणा लग्गी, ‘ए वचन दयो कि मेरे ए दो पुत्तर तेरे राज बिच इक तूसां रे दाइणे ते इक तूसां रे बाइ पाससे बैठे।’ <sup>22</sup> यीशु जी ने जवाब दित्तेया, ‘तूसी नी जाणदे कि क्या मगेया करदे हिन्। जे कटोरा मैं पीणे वाळा है, क्या तूसी पी सकदे?’ उन्हाने उन्हेरे जो बोलेया, ‘पी सकदे।’ <sup>23</sup> उन्हा ने उन्हेरे जो बोलेया, ‘तूसी मेरा कटोरा ता पिगें अपण अपणे दाइणे ते बाइ बेवणा मेरा काम्म नी है, अपण जिन्हेरे ताइं मेरे पीता रे पाससे का तैयार कित्ते रे गेया है उन्हेरे ताइं है।’ <sup>24</sup> ए सुणी करी सारे दसां इ चेल्ले उन्हा दोन्नां भाईयां पर गूस्सा होए। <sup>25</sup> यीशु जी ने उन्हा जो नेडे सदी करी बोलेया, ‘तूसी जाणदे कि गैर-यहुदियां रे हाकम उन्हा पर राज करदे; ते जे बड्डे हिन्, से उन्हा पर हक जतादे। <sup>26</sup> अपण तूसां बिच इय्यां नी होणा; अपण जे कोइ तूसां बिच बड्डा होणा चाहदा, ओ तूसां रा नौकर बणे; <sup>27</sup> ते जे तूसां बिच प्रधान बनणा चाहदा ओ तूसां रा नौकर बणे; <sup>28</sup> जिय्यां मणू रा पुत्तर; ओ इस ताइं नी आया कि उसदी सेवा-टैह कित्ति जाए, अपण इस ताइं आया कि अप्पु सेवा टैह करे ते मते जणेया रे छुटकारे ताइं अपनी जान दे।’

### दो अन्नेयां री हाक्खि ठीक करणा

<sup>29</sup> जां ओ यरिहो का निकळेया करदे थिये, तां इक बड्डि भीड उन्हेरे पिछे चळी पेइ। <sup>30</sup> ते दो अन्ने, जे सडक रे कनारे बैठे रे थिये, ए सुणी करी कि यीशु जी जाया करदे हिन्, हाक मारी करी बोळणा लग्गे, ‘हे प्रभू दाउद री औळाद, असां पर दया कर।’ <sup>31</sup> लोकां ने उन्हेरे जो झीड़केया कि चुप रहू; अपण ओ होर बी चिल्लाइ करी बोळणा लग्गे, ‘हे प्रभू दाउद री औळाद असां पर दया करो।’ <sup>32</sup> तां यीशु जी ने खडी करी, उन्हेरे जो सदेया ते बोलेया, ‘तूसी क्या चाहदें कि मैं तूसां ताइं करां?’ <sup>33</sup> तां यीशु जी ने खडी

करी,उन्हें जो सद्देया ते बोलेया,"तूसी क्या चाहदें कि मैं तूसां ताई करां?"  
34 यीशु जी ने तरस खाइ करी उन्हैरी हाखिख छुई,ते ओ तिस्सि वेले दिखणा  
लगी पेय;ते उन्हैरे पिछे चली पेय।

### यरुशलेम बिच विजय प्रवेश

21 जां से यरुशलेम रे नेडे पुजे तां जैतून पहाड़ पर बैथफगे रे नेडे  
आए,तां यीशु जी ने दो चेल्लेयां जो ए बोल्लि करी भेजेया, 2 सामणे  
वाळे ग्राँ बिच जाओ । उते जादें कने इ गधी बन्ने,ते तिसेरे कन्ने बचा बन्ने रा  
मिळणा। तिन्हैरे जो खोल्लि करी लेइ आओ। 3 जे कोइ तुसां जो किछ  
बोले,तां बोलि देयो कि प्रभू जो इन्एरि जरूरत है,तां तिनिये तिस्सि वेले  
तिसजो भेजि दैणा। 4 ए इस तां ई होया की जे गल्ल भविष्यद्वक्ता रे जरिए  
बोल्लि गेइ थी से पुरी हो: 5 "सिय्योन री कुडी जो बोल्तो,' दिखख तेरा राज्रा  
तेरे का आदां है,से नमर,ते गद्दे पर बैठे रा है: बल्कि लादू रे बच्चे पर।"  
6 चेल्लेयां ने जाई करी जिय्यां यीशु जी ने बोलेया थिया,तिय्यां ई कित्तेया।  
7 ते गद्दी ते तिसेरे बच्चे जो लाई करी तिन्हैरे पर अपणे कपडे पाई दित्ते ,ते  
से तिन्हैरे पर बेइ गे। 8 तां मते सारे लोकां ने अपणे कपडे रस्ते बिच  
बिछाए,ते होर लोकां ने बुट्टेयां का डाळ कटी करी रस्ते बिच बिछाए। 9 जे  
भीड़ आगे-आगे जाया करदी थी ते जे पिछे का आया करदी थी,हकां  
लाई-लाई करी बोलदी थी "दाऊद री सतान री जय हो है से जे प्रभू रे नां  
कने आदां आसमान बिच जय हो। 10 जां तिन्हा ने यरुशलेम बिच बडे,तां  
सारे नगर बिच हलचल मची गेइ कि ए कुण है? 11 लोकां ने बोलेया,"गलील रे  
नासरत रे भविष्यद्वक्ता यीशु जी हिन।

### देहरे का दुकानदारां जो कडणा

12 यीशु जी ने परमेश्वर रे देहरे बिच जाई करी तिन्हा सारेयां जो,जे देहरे  
बिच लेन देन करदे थिये,कडि दित्ता,ते सरफियां रे पीढे ते कबूतर बेचणे  
वाळेयां री चौकियां पलटी दित्ति। 13 ते तिन्हैरे जो बोलेया, "लिखे आ है की  
मेरा घर प्रार्थना रा घर होणा अपण तुसी तिसजो डाकुआं रा अड्डा बणादें।  
14 तां अन्ने ते लगडें तिन्हैरे का देहरे बिच आए,ते तिन्हा ने तिन्हैरे जो ठीक  
कित्ता। 15 अपण जां प्रधान याजकां ते शास्त्रियां ने इन्हा अनौखि गलां जो  
दिखखेया जे तिन्हा ने कित्ते थिये, ते मुडेंया जो देहरे बिच दाऊद री सतान री  
जय हो बोलदे सुणेया,तां से गुस्से होए, 16 ते तिन्हा जो बोलणा लागे," क्या  
तू सुणदा कि ए लोक क्या हिन बोलेया करदे?" यीशु जी ने तिन्हा जो  
बोलेया, हाँ; क्या तुसी ए कदी नी पढेया : मुडेंया ते दुध पिदें बच्चेयां का तू  
अपणी महीमा कराई?" 17 तां से तिन्हा जो छडि करी नगर का बार  
बैतनिय्याह गो जे ते तिचे रात बिताई।

### बगैर फल वाळे अर्जीर रे बुट्टे रा उपनाण

18 भ्यागा जां से नगर जो हटेया करदे थिये तां तिन्हा जो भुख लगी।  
19 सडक रे कनारे इक्क अर्जीर रा इक्क बुट्टा दिखिख करी तिसेरे नेडे गे ते  
पत्तेयां जो छडि करी तिस बिच होर किछ ना पाई करी तिसजो बोलेया,"अब्बे  
का का तेरे बिच फिरी कदी फळ ना लगे।"ते अर्जीर रा बुट्टा तिसी वेले सुकी  
गेया। 20 ए दिखिखकरी चेल्लेयां जो हैरानी होइ ते तिन्हा ने बोलेया,"ए अर्जीर  
रा बुट्टा इन्नि तौळे किय्यां सुकी गेया?" 21 यीशु जी ने तिन्हा जो जवाब  
दित्तेया,"मैं तुसां कने सच बोलदा,जे तुसी भरोसा रखो ते शक ना करो,ते ना  
सिर्फ ए करगे जे इस अर्जीर रे बुट्टे कने कित्ते रा है,अपण जे इस पहाड़ कने  
बी बोलगे,"उखडी जा,ते समुंदर बिच जाई पे,तां ए होइ जाणा।" 22 ते जे किछ  
तुसी प्रार्थना बि मेरे का मगगे से सारा किछ तुसां जो मिलणा।"

### यीशु जी रे हक्क पर सवाल

23 से देहरे बिच जाई करी भाषण देया करदे थिये,तां बडे याजकां ते लोकां  
ए पुरनियां ने तिसेरे का जाई तिन्हैरे का पुछेया,"तू ए कम्म कुस हक्क कने  
करदा? ते तेरे जो ए हक्क कुनिये दित्ते रा है?" 24 यीशु जी ने तिन्हैरे जो जवाब  
दित्तेया,"मैं बी तुसां का इक्क गल्ल पुछदा जे तुसी मेरे से दसगे तां मैं बी तुसां  
जो दसणा कि ए कम्म कुस हक्क कने करदा। 25 युहन्ना रा बपतिस्मा कुते का

थिया? स्वर्ग रे पास्से का या म्हणुआं रे पास्से का?" तां से अप्पु बिच बैहस  
करणा लगी पेय,"जे असी बोलण'स्वर्ग रे पास्से का,तां तिनिये असां कने  
बोलणा'फिरी तुसी तिसेरा भरोसा किजो नी कित्ता?" 26 ते जे बोलिये'म्हणुआं  
रे पास्से का,तां असजो भीड़ रा डर है,किजोकी से सारे युहन्ना जो भविष्यद्वक्ता  
मनदे।" 27 अते तिन्हा ने यीशु जी जो जवाब दित्ता,"असी नी जाणदे।"तिन्हा  
ने बी तिन्हैरे जो बोलेया,"तां मैं बी तुसां जो नी दसदा की ए कम्म कुस हक्क  
कने करदा।

### दो पुत्तरां रा उपनाण

28 "तुसी क्या सोचदे? कुसकी म्हणु रे दो पुत्तर थिये;तिसने पैहले का जाइ  
करी बोलेया,"हे पुत्तर आज अंगुर रे बगिचे बिच कम्म करा।" 29 तिसने जवाब  
दित्ता,"मैं नी जाणा,"अपण बाद बिच पछताई करी गेया। 30 फिरी प्यो ने जाई  
करी दुए जो इय्यां ई बोलेया,तिसने जवाब दित्तेया,"जी हाँ,जादां," अपण नी  
गेया। 31 इन्हा दोनां बिच का कुसने पचयो री मर्जी पुरी कित्ती?" तिन्हा ने  
बोलेया,"पैहले ने।" यीशु जी तिन्हा जो बोलेया,"मैं तुसां कने सच बोलदा की  
महसुल लैणे वाले ते वैश्या तुसां का पैहले स्वर्ग रे राज बिच हासिल हुदें।"  
32 किजोकी युहन्ना धर्म रा रस्ता दसदे-दसदे तुसां का आया,ते तुसां ने  
तिसेरा भरोसा नी कित्ता; अपण महसुल लैणे वाळेया ने ते वैश्या ने तिसेरा  
भरोसा कित्ता,ते तुसी ए दिखिख करी बाद बिच बी नी पछताए की तिसेरा  
भरोसा करी लिदें।

### बूरे किसानां रा उपनाण

33 इक्क होर उदारण सुणो: इक्क घर रा माळक थिया जिनिये अंगुर रा बगिचा  
लाया,तिसेरे चारो पास्से बाड़ा लाया,तिस बिच रस रा कुआं खोदेया ते  
गुम्मत बणाया,ते कसानों जो तिसेरा ठेका देइ करी परदेस चळी गेया। 34 जां  
फळ रा वेला नेडे आया तां तिसने अपणे नौकरां जो तिसेरा फळ लैणे ताई  
कसानां का भेजेया। 35 अपण किसानां ने तिसेरे नौकरां जो पकडी  
करी,कुसकी जो कुट्टेया,ते कुसकी जो मारी रखेया ते कुसकी पर बट्टे मारे।  
36 फिरी तिसने पैहले का जादा नौकरां जो भेजेया,ते तिन्हा ने तिन्हैरे का बी  
तिय्यां ई कित्तेया। 37 आखर बिच तिसने अपणे मुडें जो तिन्हैरे का ए सोच्चि  
करी भेजेया की से मेरे मुडें री इजत करगे। 38 अपण किसानां ने तिस मुडें जो  
दिखिख करी अप्पु बिच बोलेया,"ए ता वारिस है,आओ,इसजो मारी रखदे ते  
इसेरी मिरास लेइ लिदें।" 39 अते तिन्हा ने तिसजो पकडेया ते अंगुर रे बगिचे  
का बार कडि करी मारी रखेया। 40 इस ताई जां अंगुर रे बगिचे रा माळक  
आगां तां तिन्हा किसानां कने क्या करगा?" 41 तिन्हा ने तिस कने बोलेया,"  
तिनिये तिन्हा बुरे लोकां जो बुरे तरिके कने खत्म करी रखणा;ते अंगुर रे  
बगिचे रा ठेका दुए किसानां जो दैणा,जिन्हा ने ठीक वेले तिसजो फळ दैणा।  
42 यीशु जी ने तिन्हा जो बोलेया,"क्या तुसी कदी पवित्रशास्त्र बिच ए नी  
पढेया:"जिस बट्टे जो राजमिस्त्रियां ने निकम्मा दस्सेया थिया,सेइ कुणे रे सिरे  
रा बट्टा होइ गेया? ए परेश्वर रे पास्से का होया ते असां री नजर बिच अनौखा  
है।" 43 इसी ताई मैं तुसां जो बोलदा की परमेश्वर रा राज तुसां का लेइ  
लित्तेया जाणा ते इदेइ जाती जो जे तिसेरा फळ लाए दित्तेया जाणा। 44 जे  
इस बट्टे पर पैगां,से चकनाचूर होइ जाणा;ते जिस पर से पैणा,तिसजो पि  
रखणा।" 45 बट्टे याजक ते फरिसी तिसेरे उदारणा जो सुणी करी समजी गे की  
से तिन्हैरे बारे बिच बोलेया करदे थिये। 46 ते तिन्हा ने तिन्हैरे जो पकडणा  
चाएया अपण लोकां का डरी गे किजोकी से तिन्हैरे जो भविष्यद्वक्ता।

### ब्याह री धाम रा उपनाण

22 तां यीशु जी ने भीड़ जो ते अपणे चेल्लेयां जो बोलेयां, 2 "शास्त्रि ते  
फरिसी मूसा री गद्दि पराले बैठे रे हिन; 3 इस ताई से तुसां कने जे  
किछ छे बोले से करणा ते मणना,अपण तिन्हैरे जदेय कम्म मत  
करदे;किजोकी से बोलदे ता हुदें अपण करदे नी। 4 ओ इक्क इदेय भरी बोले  
जो जिसजो चुकणा मुस्किल है,बन्नि करी तिसजो म्हणुआं रे मुन्डे पराले  
रखदे; अपण अप्पु तिसजो अपणी उगळ कने बी खसकाणा नी चाहदें। 5 से  
अपणे सारे कम्म लोकां जो दसणे ताई करदे: से अपणे ताबीजां जो चैडा°

करदे ते अपणे कपड़ेयां रे कुणे बधादें। 6 धाम बिच खास-खास जगह,ते देहरे बिच खास-खास जगह, 7 तां राजे जो गुस्सा आय ते तिनिये अपणी सेना जो भेजि करी तिन्हा खुनियां जो खतम करवाई दित्तेया, ते तिन्हेरे शहर जो फुकि रखेया 8 अपण तुसी गुरु मत कहलवादे,किजोकी तुसां रा इक्क ई गुरु है,ते तुसी सारे भ्याळ हिन। 9 धरती पर कुसकी जो अपणे प्यो मत बोलदे,किजोकी तुसां रा इक्क ई प्यो है, जे स्वर्ग बिच है। 10 ते माळक बी मत कहलवादे,किजोकी तुसां रा इक्क ई माळक है,मतलब की मसीह। 11 जे तुसां बिच बड्डा हो,से तुसां रा नौकर बणे। 12 जे कोइ अप्पु जो बड्डा बणागां,ओ छोटा किता जाणा: ते जे कोई अप्पु जो छोटा बणागां,से बड्डा किता जाणा। 13 हे बेमान शास्त्रि ते फरिसीयां, तुसां पर ळाणत है। तुसी लोकां ताई स्वर्ग रे राज रा दरवाजा बंद करदे, ना ता अप्पु ई तिस बिच जादें ते ना ई तिस जाणे वाळ्यो जो तिस बिच जाणा दिदें। 14 (हे बेमान शास्त्रि ते फरिसीयां तुसां पर ळाणत है। तुसी विधवा जनानियां रे घरां जो खाई जादें,ते दिखणे ताई बड़ी देर तिकर प्रार्थना करदे रैन्हदे: इस ताई तुसां जो जादा सजा मिळणि।)

### कैसर जो कर दैणा

15 "हे बेमान शास्त्रि ते फरिसीयां तुसां पर ळाणत है! तुसी इक्क जणे जो अपणे पथ बिच मिळणे ताई सारे जमीन ते पाणी बिच फिरदे,ते जां से पथ बिच आई जादां तां तिसजो अपणे का दूणा नरक जोगा बणाई दिदें। 16 "हे अन्ने सिखाणे वाळ्यो,तुसां पर ळाणत है। जे बोलदे की जे कोई देहरे री कसम खाए तां कोई गल्ल नी,अपण जे कोई देहरे रे सोन्ने री कसम खाए तां तिस कने बन्निह जाणा। 17 हे बेवकुफो ते अन्नेयो,कुण बड्डा है"सोन्ना या फिरी से देहरा जिस कने से सोन्ना पवित्र हुदां? 18 फिर बोलदे कि जे अगर कोई वेदी री कसम खाए तां किछ नी,अपण जे चढावा तिस पराले है,जे अगर कोई तिसेरी कसम खाए तां तिस कने बन्निह जाणा। 19 हे अन्ने कुण बड्डा है;चढावा या वेदी जिस कने चढावा पवित्र हुदां? 20 इस ताई जे वेदी री कसम खादां,से उसेरी ते किछ तिस पर है,उसेरी बी कसम खादां। 21 जे देहरे री कसम खादां,से तिसेरी ते तिसेरे बिच रैहणे वाळे री बी कसम खादां। 22 जे स्वर्ग री कसम खादां,से परमात्मा रे सिहांसन री ते तिस पर बैहणे वाळे री बी कसम खादां।

### दोबारा जिदां होणे ते ब्याह रे बारे बिच

23 " हे बेमान शास्त्रि ते फरिसीयां तुसां पर ळाणत है! तुसी पुदिने,ते सौफं, ते जीरे रा दसवां हिस्सा ता दिदें, अपण तुसी व्वस्था री गहरी गल्लां जो मतलब की ईसाफ, ते दया, ते भरोसे जो छड्डि दित्ते रा है; चाहएदा थिय्या कि इन्हा जो बी करदे रैन्हदे ते तिन्हा जो बी नी छड्डे। 24 हे अन्ने सिखाणे वाळ्यो,तुसी मच्छर जो ता छाणी रखदे,अपण ऊँट जो निगळी जादें। 25 हे बेमान शास्त्रि ते फरिसीयां तुसां पर ळाणत है। तुसी कटोरे ते थाळी जो उप्पर-उप्पर का ता मंजदे अपण ओ अन्दर का न्याहरे ते बेसबरी कने भरे रे हिन। 26 हे अन्ने फरिसी,पैहए कटोरे ते थाळी जो अन्दर का मंज ताकी से बार का बी साफ होन। 27 हे बेमान शास्त्रि ते फरिसीयां तुसां पर ळाणत है। तुसी सफेदी फेरी री कब्रां साई हिन जे उप्पर का ता छैळ नजर दिसदी अपण अन्दर का मुदेंयां री हड्डियां ते सारे तरिके री गन्दगी कने भरे री हिन। 28 इसी तरिके कने तुसी बी उप्पर का लोकां जो धर्मी नजर आंदे अपण, अन्दर बेमानि ते बुराई कने भरित्ते रे हिन। 29 हे बेमान शास्त्रि ते फरिसीयां तुसां पर ळाणत है। तुसी भविष्यदक्तां री कब्रां सजादें ते धर्मियां री कब्रां बणादे, 30 ते बोलदे,जे अगर अपणे बाब्बे-दाद्रे रे जमाने बिच हुदें तां भविष्यदक्तां रे खून बिच तिन्हेरे साथी नी बणदे। 31 इस कने ता तुसी अप्पु ई गुआई दिदें कि तुसी भविष्यदक्ता रे खुन करणे वाळ्यो री ओलादां हिन। 32 अते तुसी अपणे बाब्बे-दाद्रे रे पाप्पां रा घडा पूरे तरिके कने भरी देयो। 33 हे साँपो,हे क्रेतां रे बच्चो,तुसी नरक रे सजा का किय्यां बचगे?

### सबका बड्डा हुकम

34 इस ताई दिखवो,मै तुसां का भविष्यदक्ता ते समजदारां ते शास्त्रियां जो भेजदा; ते तुसी तिन्हा बिच का किछ जो मारी रखणा ते कुस पर चढाणा,ते

किछ जो अपणे देहरे बिच कौड़े मारणे ते इक्क सैहर का दुए सैहर तिकर मारदे फिरणा। 35 जिस कने धर्मी हाबिल का लेई करी बिरिक्याह रे पुत्तर जकरयाह तिकर,जिस जो तुसी देहरे ते वेदी रे मझाटे मारी रखेया थिय्या,जिन्ने धर्मियां रा खून धरती पर बहाया गे रा है ओ सारा तुसां रे सर पर पैणा। 36 मै तुसा कने सच बोलदा,ए सारी गल्लां इस जमाने रे लोकां पर आई पैणी। 37 हे यरुशलेम,हे यरुशलेम! तु भविष्यदक्तां जो मारी रखदा, ते जे तेरे का भेजे गे, उन्हा जो बट्टे मारदा। किन्ने बारी मै चाहया कि जिय्यां मूर्गी अपणे बचेया जो अपणे पाँखा रे थल्ले कट्टेर दी,तिय्यां ई मै तेरे बचेयां कट्टेरी लेयां,अपण तुसी नी चाह्या। 38 दिखवो तुसां रा घर तुसां ताई उजाड़ छड्डेया जादां। 39 किजोकी मै तुसां जो बोलदा कि अब्बे का जां ताई तुसी नी बोलणा,'धन्य हिन से,जे परमात्मा रे नां कने आदां' तां तिकर तुसी मेरे जो दोबारा कदी नी दिखणा।" 40 ए इ दो हुकम सारी व्यवथा ते भविष्यदक्तां रा आधार है।"

### मसीह कुसेरा पुत्तर है?

41 जां फरिसी कठी रे थिये, तां यीशु जी ने तिन्हा का पुच्छेया, 42 "मसीह रे बारे बिच तुसी क्या सोचदे? से कुसेरा पुत्तर है?" तिन्हा ने जवाब दित्तेया, "दाऊद रा ।" 43 तिन्हा ने फरिसी म्हणुआं क पुच्छेया, "तां दाऊद आत्म बिच होई करी तिसजो प्रभु किजो बोलदा ? 44 'प्रभु ने' मेरे प्रभु जो बोल्लेया, जां तीकर मै तेरे दुस्मणा जो तेरे हेठ ना करी देयां तां तीकर मेरे सजे पास्से बै।" 45 भला, जां दाऊद अप्पु ई तिसजो प्रभु बोलदा, तां से तिसेरा पुत्तर कियां होया ?" 46 ईसेरे जवाब बिच कोई इक्क बी गल्ल नी बोलि पाया। तिस दिन का कुसकी जो बी तिन्हेरे का किछ बी पुछणे री हिम्मत नी हुई।

### शास्त्रियां ते फरीसियां का खबरदार

23 तां यीशु जी ने भीड़ जो ते अपणे चेल्लेयां जो बोलेया, 2 "शास्त्री ते फरीसी मूसा री गद्दी पराले बैठे रे हिन; 3 इधरे ताई जे किछ उस पर चलणा अत्ते उन्हा जो मनणा, अपण तिन्हेरे साहई कम्म मत करदे; किजोकी से बोलदे ता हुदें अपण करदे नी। 4 से महुआं रे मूडेया पर इतणा बोझ लद्दी दिदें कि से उन्हा जो चुकी करी चली ई ना पान अत्ते महुआं पर जोर पांदे कि से उस जो लेई करी चलन। अपण से खुद उन्हा पर कुसकी पर बी चलणे ताई पैर तक नी हिलान्दे। 5 से खरे कम्म इधरे ताई करदे कि महु उन्हा जो दिखन, से अपणे ताबिजा जो चौड़ा करदे अत्ते अपणे कपड़ेयां री झालरां जो बडा बड्डा करदे हिन। 6 धाम बिच खास जगह, ते सभा घर बिच खास आसन चाहन्दे, 7 बजारां बिच नमस्ते ते महुआं बिच तिन्हा जो गुरु बोलन किजोकि तिन्हा जो एह सब खरा लगदा। 8 "अपण तुसी महुआं बिच अपु जो रब्बी मत बुलवान्दे, किजोकी तुसां रा इक्क ई गुरु है, ते तुसी सारे सिरफ भैण भाई हिन। 9 धरती पर महुआं जो तुसी अपणे बिच का कुसकी जो बी अपणा 'प्यो' मत बोलदे, किजोकी तुसां रा इक्क ई प्यो है, जे स्वर्ग बिच हिन। 10 ते ना ई महुआं जो तुसी अपु जो मालक बोलणा दिदें, किजोकि तुम्हारा मालक ता बस इक ई है, अत्ते से मसीह ए। 11 तुम्हारे बिच का सबका खास महु सेहई होणा जे तुम्हारा नोकर बणगा। 12 जे कोई अप्पु जो बड्डा बणागां, ओ छोटा किता जाणा: ते जे कोई अप्पु जो छोटा बणागां, से बड्डा किता जाणा।"

### शास्त्रियां ते फरीसियां रे पाखंड री बेजती

13 "ओ कपटी धर्म शास्त्रियां ते फरिसीयां तुसां पर लाणत है। तुसी लोकां ताई स्वर्ग रे राज्य रा दुआर बंद करेया करदे हिन। ना ता अपु खुद उस बिच जादें अत्ते ना ई उन्हा जो जाणे दिदें जे जाणे ताई कोसिस करेया करदे हिन। 14 ("ओ कपटी धर्म शास्त्रियां ते फरिसीयां तुसां पर लाणत है। तुसी विधवा रे घर जो खाई जादें, अत्ते दिखणे ताई लम्बी-लम्बी प्रार्थना करदे हिन।इधरे ताई तुम्हारे जो कड़ी सजा मिलणी।" 15 "ओ कपटी धर्म शास्त्रियां ते फरिसीयां तुसां पर लाणत है। तुसी कुसकी जो अपणे रस्ते पर लियाणे ताई धरती अत्ते समुन्द्र लन्गी जादें। अत्ते जां से तुम्हारे रस्ते पर आई जादें ता तुसी उन्हा जो अपणे का बी दो गुणा नरक रा पात्र बणाई दिदें। 16 "ओ अहन्ने अगुवो, तुसां पर लाणत है। जे बोलदे हिन जे कोई मन्दिर री कसम खादां ता

उस जो उस कसम जो रखणा जरूरी है, अपण जे कोई मन्दिर रे सुन्ने री कसम खांदा ता उस जो कसम जो मनणा जरूरी है। 17 ओ अहन्ने बेवकूफों! बड्डा कुण है? मन्दिर रा सुन्ना या से मन्दिर जिन्ने उस सुन्ने जो पवित्र बणया। 18 तुसी एह बी बोलदे जे कोई वेदी री कसम खांदा ता किच्छ नी, अपण जे कोई वेदी पर रखे रे चढावे री कसम खांदा ता से अपणी कसम बिच बढितेरा है? 19 ओ अहन्नेयो! कुण बड्डा है? वेदी पर रखे रा चढावा या से वेदी जिस कने से चढावा पवित्र हून्दा? 20 इधरे ताई जे कोई मन्दिर री कसम खांदा, ता से वेदी कने वेदी पर जे रखे रा है, उसेरी बी कसम खांदा। 21 जे मन्दिर री कसम खांदा, से उसेरी अत्ते जे मन्दिर अन्दर है उसेरी बी कसम खांदा। 22 जे स्वर्ग री कसम खांदा, से परमेश्वर रे सिंहासन कने जे जे उस सिंहासन पर बैठे रा है उसेरी बी कसम खांदा। 23 "ओ कपटी यहूदी धर्मशास्त्रियों अत्ते फरीसियों! तुम्हारा जे किच्छ है, तुसी उसेरा दसमां हेस्सा, इत्ते तक कि अपणे पुदीने, सौंफ, अत्ते जीरे तक रा दसमां हेस्सा परमेश्वर जो दिंदे हिन। फिरी बी तुसी व्यवस्था री जरूरी गल्लां जो यानी न्याय, दया ते विस्वास जो छड्डी दित्तेया है, हून्दा एह कि इन्हा जो बी करदे रैहन्दे अत्ते उन्हा जो बी नी छडदे। 24 ओ अन्धे अगुवों! तुसी अपणे पाणी का मच्छर ता छानी लिंदे अपण ऊँट जो निगळी जांदे। 25 "ओ कपटी यहूदी धर्म शास्त्रियों! ते फरीसियों! तुसा पर लाणत है। तुसी अपणी कालियां अत्ते थाळियां बाहर का धोई करी साफ करदे हिन अपण से अन्दर का छल-कपट कने बड़ी जादा भरितेरी हिन। 26 ओ अहन्ने फरीसियों! पैल्ले अपणे डोन्नेया जो अन्दर का मांजो ताकि अन्दर कने से बाहर का साफ होई जाये। 27 "ओ कपटी यहूदी धर्मशास्त्रियों! अत्ते फरीसियों! तुसा पर लाणत है। तुसी चूने कने लिपि री कब्रों साहूई हिन जे बाहर का ता छैळ लिबदी अपण अन्दर का मरे रेयां रे हड्डियां अत्ते हर तरह री गन्दगी कने भरितेरे हिन। 28 इय्यां ई तुसी बाहर का ता धर्मी लिबदे हिन अपण अन्दर का छल-कपट अत्ते बुराई कने भरितेरे हिन।

### शास्त्रियां ते फरीसियां पर सजा री भविष्यवाणी

29 "ओ कपटी यहूदी धर्मशास्त्रियों! अत्ते फरीसियों! तुसा पर लाणत है। तुसी भविष्यद्वक्ता ताई कब्रों सजान्दे हिन अत्ते धर्मी री कब्रों जो बगान्दे हिन, 30 अत्ते बोलदे हिन कि, 'जे तुसी अपणे पूरखां रे बेले बिच हून्दे ता भविष्यद्वक्तां जो मारणे बिच उन्हेरा हत्थ बटान्दे।' 31 इस कने तुसी एह मन्दे कि तुसी उन्हेरे बच्चे हिन जे भविष्यद्वक्तां रे खूनी थिये। 32 इधरे ताई जे तुम्हारे पूरखां ने शुरू कित्तेया, उस जो पूरा करो 33 "ओ सांप अत्ते सांप रे बच्चेयो! तुसी किया सोचदे कि तुसी नरक भोगणे का बची जाणा। 34 इधरे ताई दिखखो, मैं तुम्हारे का भविष्यद्वक्तां, समझदारां ते गुरुओं जे भेजेया करदा है। तुसी उन्हा बिच का किन्नेया जो मारी देणा अत्ते किन्नेया जो सूळी पर चढाई देणा। किच्छ जो तुसी अपणी धर्म सभा बिच कोड़े लगाणे अत्ते इक सैहर का दूजे सैहर उन्हेरा पिच्छा करदे फिरणा। 35 जिस कने धर्मी हाबिल का लेई करी बिरिक्याह रे पुत्र जकरयाह ताई, जिस जो तुसी मन्दिर अत्ते वेदी रे मझाटे मारी रखेयेया थिय्या, जितणे धर्मियां रा खून धरती पर बहाया है उन्हा सब री सजा तुसा जो मिलणी। 36 मैं तुम्हारे कने सच्च बोलदा इस सब ताई किच्छ ताई इस पीढ़ी रे महुआं जो सजा भोगणा पैणी।"

### यरुशलेम ताई अफसोस

37 "ओ यरुशलेम, यरुशलेम! तू से हे जे भविष्यद्वक्तां जो मारी रखदा अत्ते परमेश्वर रे भेजे दूतां जो पत्थर मारदा। मैं कितणी बरी चाया कि जियां कोई मुर्गी अपणे चूजेयो जो अपणे परा हेठ इकट्ठा करी लिंदी तियां ई मैं तेरे बच्चेयां जो इकट्ठा करी लेयां। अपण तुसी महुआं ने नी चाया। 38 अवे तेरा मन्दिर पूरी तरह कने उजड़ी जाणा। 39 किजोकि मैं तुसां जो दसदा कि तुसी मिंजो ता ताई नी फिरी दिखखी सकणा जां ताई तुसी एह नी बोलणा: "धन्न ए से जे प्रभु रे नां कने आया करदा है!"

### देहरे रे बर्बाद होणे रे बारे बिच भविष्यवाणी

24 जां यीशु जी देहरे बिच का निकळी करी जाया करदे थिये, तां तिन्हेरे चेले तिन्हेरे जो देहरे रे बनाणे रे काम्म जो दिखाणे ताई तिन्हेरे का आए। 2 तिन्हा ने तिन्हेरे जो बोलेया, "तुसी ए सारा किछ दिखेयेया करदे हिन" मैं तुसां जो सच बोलदा, इत्ते इक्क बड़े पर बड्डा बी नी बचणा जे ढाया नी जाणा।"

### सकंट ते मुसीबत

3 जां से जैतून पहाड़ पर बैठे रे थिये, तां चेलेयां ने किल्ले बिच तिन्हेरे का आई करी बोलेया, "असां जो दस्सो ए गल्लां कधाडी होणी? तुसां रे आणे रा ते दुनिया रे खतम होणे री क्या निसानि होणी?" 4 यीशु जी ने तिन्हेरे जो जवाब दित्तेया, "चोक्ने रेयो ! कोई तुसां जो भडकाई ना सके, 5 किजोकी मते सारे इदेय होणे जिन्हा ने मेरे नां कने आई करी बोलणा, मैं मसीह है, ते मते जणेया जो भडकाणा। 6 तुसी लड़ाईयां ते लड़ाईया री गल्लां सुनणी, तां डरी मत जादें किजोकी इन्हेरा होणा पक्का है, अपण तिस वेले खातमा नी होणा। 7 किजोकी जाति पर जाति, ते राज्य पर राज्य ने हमला करणा, ते जगह-जगह अकाल पैणे, ते भुकम्प होणे। 8 ए सारी गल्लां दुख-मुसीबतां री सुरुआत होणी। 9 ता तिन्हा ने तुसां जो दुख दैणे ताई पकड़वाणा, ते तिन्हा ने तुसां जो मारी रखणा, ते मेरे नां री वजह कने सारी जातियां रे लोकां ने तुसां कने नफरत रखणी। 10 तां मते जणेया ने ठोकर खाणी ते इक्क-दुए जो पकड़वाणाते इक्क-दुए कने नफरत रखणी। 11 मते सारे झूठे भविष्यद्वक्ता उठी खणे होणे, ते मते जणेया जो भडकाणा 12 अधर्म रे बदणे री वजह कने मते जणेया रा प्यार ठडां पेइ जाणा, 13 अपण जे आखर तक सबर रखगा, तिसेरा ई छुटकारा होणा। 14 ते राज्य री ए खुसखबरी सारी दुनिया बिच बिच सुणाई जाणी, कि सारी जातियां पर ए गुआई हो, तां आखर आई जाणा।

### सबका बड्डि मसीब री सुरुआत

15 इधरे ताई जां तुसी तिस उजाड़ने वाळी तिस घटिया चीज जो दिखखो जिसेरी गल्ल दानिय्येल भविष्यद्वक्त्त रे जरिये सुणे री थी, पवित्र जगह पर खडिते रे दिखखो(जे पढे, से समजे), 16 तां जे यहूदियां बिच होणे से पहाड़ां पर न्हसि जाणा। 17 जे छत पर होणे, से अपणे घरे का समान लैणे ताई ना उतरे; 18 ते जे खेतरां बिच होणे से अपणे कपड़े लैणे ताई वापस ना मुड़े। 19 तिन्हा दिनां बिच जे दुप्राणी ते दुद पुआणी वाली होणी, तिन्हेरे ताई हाय, हाय। 20 प्रार्थना करेया करो की तुसां जो सर्दियां बिच या सब्त रे दिन पर न्हसणा ना पेयो। 21 किजोकी तिस वेले इदेया भारी दुख होणा, जदेया दुनिया री सुरुआत का अब्बे तिकर होया ते ना कदी होणा। 22 अगर से दिन घटाये ना गये रे हुदें तां म्हणु ई नी बचदा, अपण चुणे रे लोकां री वजह कने से दिन घटाए जाणे। 23 तिस वेले जे कोई तुसां जो बोले कि मसीह इत्ते है ! या उत्ते है ! तां भरोसा मत करदे। 24 किजोकी झूठे मसीह ते झूठे भविष्यद्वक्ता उठी खडे होणे, ते बड्डि-बड्डि चिजां ते हैरान करणे वाळी काम्म दिखाणे कि जे होइ सके ते चुणे रे लोकां जो बी भडकाई दे। 25 दिखखो मैं पैल्ले का ई तुसां जो सब किछ दस्सि रखे रे है। 26 इस ताई, जे से तुसां जो बोले, 'दिखखो से जंगल बिच है', तां बार मत निकळी जादें; या 'दिखखो से कोठरियां बिच है', तां भरोसा मत करदे। 27 किजोकी जियां बिजली पुरब का लेई करी पश्चिम तक चमकदी, तियां म्हणु रे पुत्तर रा आणा बी होणा। 28 जित्ते लाश हो, तित्ते ई मिध कठिणे।

### म्हणु रे पुत्तर रा वापस आणा

29 तिन्हा दिनां रे दुखां रे बिल्कुल बाद बिच ई आसमान न्याहरा होई जाणा, ते चाँद री रौसनी चली जाणी, ते तारें आसमान का डिगि पैणे ते आसमान री ताकतां हिलाई जाणी। 30 तां म्हणु रे पुत्तर री निसानी आसमान बिच दिसणी, ते तां धरती रे सारे कुल रे लोकां ने अपणी छाति कुटणी; ते म्हणु रे पुत्तर जो बड़ी ताकत ते शान कने बदळां पर आदें दिखणा। 31 तिन्हा ने तुहरी री बड़ी अवाज कने अपणे दुतां जो आगे भेजणा, ते तिन्हा आसमान

रे इस कुणे का लेई करी तिस कुणे तिकर, चारों पास्से का तिन्हरे चुणे रे लोकां जो कठेरणा।

### अर्जीर रे बुट्टे रा उपनाण

32 "अर्जीर रे बुट्टे रे उदारण कने ए गल्ल सिख्खो : जां तिसेरी डाळां नरम होइ जादीं ते पत्ते निकळणा लगदे, तां तुसी समजी जादें की गरमी रा मौसम नेडे है। 33 इसी तरिके कने जां तुसी इन्हा गल्लां जो हुदें दिख्खो, तां समजी जायो की से नेडे है, बल्कि दरवाजे पर ई है। 34 मैं तुसां जो सच बोलदा की जां तिकर ए सारी गल्लां पुरी ना होइ जाण, तां तिकर इस पिढी रा अन्त नी होणा। 35 आसमान ते धरती टळी जाणे अपण मेरी गल्लां बगैर पुरे होए नी टलणी।

### जागदे रेयो

36 तिस दिन ते तिस घडी रे बारे बिच कोइ नी जाणदा, ना स्वर्ग रे दूत ते ना पुत्तर, अपण सिर्फ प्यो। 37 जदेय नूह रे दिन थिये, तियां ई म्हणु रे पुत्तर रा बी आणा होणा। 38 किजोकी जियां जल-प्रलय रे पैल्ले रे दिनां रे दिनां बिच, जिस दिन तिकर नूह जहाज पर नी चढेया थिया, तिस दिन तिकर लोक खादें-पिदें, ते तिन्हा बिच ब्याह हुदे थिये। 39 ते जां तिकर तिन्हा जो रुडाई करी लेइ ना गया, तां तिकर तिन्हरे जो किछ बी पता नी चलेया; तियां ई म्हणु रे पुत्तर रा आणा बी होणा। 40 तिस दिन दो जणे खेतरां बिच होणे, इक्क लेइ लिता जाणा ते दुआ छड्डि दिता जाणा। 41 दो जनानियां चक्कि पिस्सेया करदी होणी, इक्क लेइ लिता जाणी ते दुई छड्डि दिती जाणी। 42 इधरे तांई जागदे रेयो ते किजोकी तुसी नी जाणदे तुसां रा प्रभू कधाडी आणे वाळा है। 43 अपण ए जाणी लेयो की जे माळक जाणदा की चोर ने कुस वेल्ल आणा तां से जागदा रेहन्दा, ते अपणे घर बिच तिसजो बडणा नी दिदां। 44 इधरे तांई तुसी बी तयार रेयो, किजोकी जिस घडी रे बारे बिच तुसी सोचदे बी नी होणे, तिसी घडी म्हणु रे पुत्तर ने आई जाणा।

### भरोसेमदं नौकर ते बुरा नौकर

45 "अते से भरोसेमदं ते समजदार दास कुण है, जिसजो माळक ने नौकरां-चाकरां पर सरदार ठेहराया की ठीक-ठीक समय पर तिन्हरे जो रोति देय? 46 धन है से दास, जिसजो तिसेरा माळक आई करी इयां ई करदे पाए। 47 मैं तुसां जो सच बोलदा, तिनिये तिसजो अपणी सारी दौलत पर अधिकारी ठेहराणा। 48 अपण जे से बुरा दास सोचणा लगे कि मेरे माळक रे आणे बिच देर है, 49 ते अपणे कन्ने वाळे नौकरां जो कुटणा लगी पेय, ते पियक्कडा कने खाए-पिए। 50 तां तिस दास रे माळक ने ऐसे दिन आणा, जा से तिसेरी भाळा ना बैठे रा हो, ते ऐसी घडी जिसजो से जाणदा ना हो, 51 तां तिनिये तिसजो भारी सजा देंगी ते तिसेरा हिस्सा बेइमानां कने ठेहराणा : उत्ते रोणा ते दादं पिह्ला होणा।

### दस कुवाँरियां र उपनाण

25 स्वर्ग रा राज्य उन्हा दस कुवाँरियां रे साहई है जे मसाल लेई करी नौये लाडे जो मिळणे तांई निकळी। 2 उन्हा बिच का पंज लापतवाह थी ते पंज समजदार थियां। 3 जे लापरवाह थी उन्हा अपणी मसांला लिती, अपण उन्हा कने तेल नी लितेया। 4 अपण समजदारां ने अपणी मसांला कने अपणी कुप्पियां बिच तेल बी भरी लेया। 5 जां नौये लाडे जो आणे बिच देर होई गई, ता सारी कुआँरिया उबणा लगी अत्ते सोई गई। 6 "अद्धी रात्ती रोळा पेया, "दिख्खो, नौआ लाडा आया करदा है! तिसरे कने मिलणे बाहर चलो!" 7 ते उस्सी बेले से सारी कुवाँरियां उठी अत्ते अपणी मसांला तयार किती। 8 ते लापरवाह कुआँरिया ने समजदार कुआँरिया जो बोलेया, "अपणे तेल बिच का किच्छ असां जो बी देयो, किजोकी असां री मसांला बुझी चले री हिन्न!" 9 अपण समजदारां ने उन्हा जो जवाब दितेया, "नी! असी नी देई सकदी। किजोकि फिरी ना एह म्हारे तांई पूरा होणा अत्ते ना ई तुम्हारे तांई। इधरे तांई तुसी तेल बेचणे वाळे का जाई करी अपणे तांई तेल खरीदी लेयो।" 10 "जां से तेल खरीदणे जाया करदी थी ता नौआ लाडा आई रेया। ते जे

कुँआरिया, जे पैल्ले का तयार थी, से तिस कने ब्याह वाळे घरे जो चली गईयाँ अत्ते दुआर बंद करी दितेया। 11 इसेरे बाद से बाकी कुवाँरियाँ बी आई अत्ते उन्हा ने बोलेया, 'मालक, ओ मालक, दुआर खोलो, असां जो बी अन्दर आणे देयो।' 12 अपण उस ने जवाब दितेया, 'मैं तुसां जो सच बोलदा, मैं तुम्हारे जो नी जाणदा।' 13 इधरे तांई चौकन्ने रेयो, किजोकी तुसी ना उस दिन जो जाणदे, ना उस उस वेले जो।

### तोडेयां रा उपनाण

14 स्वर्ग रा राज्य उस मल्लु साहई है जिन्ने सफर पर जान्दे अपणे नौकरां जो सदवाई करी अपणी धन-दौलत तिन्हा जो देई दिती। 15 तिन्ने इक्क जो पंज तोडे चाँदी, अत्ते दुए जो दो, ते त्रिये जो इक्क। से हर इक जो उसेरी काबलियत रे साहब कने देई करी परदेस जो चली गया। 16 तां, जिस जो पंज तोडे मिल्ले थिये, उसने झट ई उन्हा जो कम्म पर लाई दितेया अत्ते पंज तोडे होर कमाई ले। 17 तियां ई जिस जो दो तोडे मिल्ले थिये, तिन्नि ए बी दो होर कमाए। 18 अपण जिस जो इक्क तोडा मिल्लेया थिया तिसने जाई करी मिट्टी खोदी, ते अपणे मालक रे पैसेयां जो लुकाई दिते। 19 "बडे दिनां बाद तिन्हा नौकरां रा मालक आई रेह्या अत्ते तिन्हा का लेखा-जोखा मंगेया। 20 जिस जो पंज तोडे मिल्ले थिये, तिस ने पंज तोडे होर लेई जाई करी बोलेया, "मालक, तुसी मिजो जे पंज तोडे दिते थिये। पंज तोडे होर मैं कमाये हिन।" 21 तिसेरे मालक ने तिस जो बोलेया, 'शाबास, तू विस्वास रे लायक खरा नौकर है, तू थोडे बिच ई विस्वास रे लायक रेया, मैं तिजो बडी चीजां पर हक देंगा। 22 "अते जिस जो दो तोडे मिल्ले थिये तिस ने बी आई करी बोलेया, "मालक, तुसी मिजो जे दो तोडे दिते थिये, मैं दो तोडे होर कमाए हिन।" 23 तिसेरे मालक ने तिस जो बोलेया, 'शाबास, तू विस्वास रे लायक खरा नौकर है, तू थोडे बिच ई विस्वास रे लायक रेया। मैं तिजो बडी चीजां पर हक देंगा। अपणे मालक री खुसी बिच शामिल होई जा। 24 "तां जिस जो इक्क तोडा मिल्लेया थिया, "मालक, मैं तेरे जो जाणदा था की तू सख्त मल्लु है, तू से कटदा जे तू बाया नी, अत्ते जित्ते बीहू नी बाया तित्ते फसल बटोरदा। 25 इधरे तांई मैं डरी गया थिय्या इधरे तांई मैं जाई करी तेरे तोडे जो दब्बी दितेया। एह लेयो जे तुम्हारा है एह रेया, लेई लो। 26 तिसेरे मालक ने तिस जो जवाब दित्ता, "तू एक बुरा अत्ते आलसी नौकर है, तू जाणदा थिय्या कि मैं बगैर बाये रे कटदा अत्ते जे मैं बीहू नी बाया, तित्ते का फसल बटोरदा; 27 ता तिजो मेरे पैसेयां जो साहूकारां का जमा करी देंगा चाईदा थिया, तां मैं आई करी अपणे पैसे ब्याज समेत लेई लिदा। 28 इधरे तांई इस का तोडा लेई लो, जिस का दस तोडे हिन तिस जो देई देयो। 29 किजो की हर उस मल्लु का, जिस ने जे किच्छ उसका थिय्या उसेरा सही इस्तेमाल कितेया, तिस जो होर जादा दितेया जाणा। अपण उस का, जिसका जे किच्छ थिय्या उसेरा सही इस्तेमाल नी कितेया, सब किच्छ लेई लितेया जाणा। 30 इधरे तांई उस बेकार नौकर जो बाहर न्यहारे बिच सूट्टी देयो जित्ते मल्लुआं ने रोणा अत्ते अपणे दादं पिह्ले।"

### ईसाफं रा दिन

31 "जां म्हणु रे पुत्र ने अपणी महिमा बिच अपणे सब स्वर्गदूतां कने अपणी महिमा रे सिंहासन बैठे रा होणा। 32 ते सारी जातियां तिसेरे सामणे इकट्टी किती जाणी; अत्ते तिन्हा इक दूजे जो इयां बखरा करणा, जियां इक पुहाळ बकरियां का भेड़ां बखरी करदा। 33 तिनिये भेड़ां जो अपणे सीद्धे पास्से ते बकरियां जो पूठे पास्से खडेरण। 34 फिरी राजे ने अपणे सीद्धे पास्से वाळेयां जो बोलणा, 'ओ मेरे प्यो का असीस पाये रे लोकां, आओ ते जे राज्य तुम्हारे तांई दुनिया रचणे का पैल्ले तयार कितेया गया है उसेरे अधिकारी होई जाओ। 35 किजोकि मैं भूख्खा थिया ते तुसी मिजो खाणे तांई दितेया, मैं प्यासा थिया ते तुसी मिजो पाणी पीणे जो दितेया, मैं परदेसी थिया, तुसी मिजो अपणे घरे रुकाया; 36 मैं नगां थिया, ते तुसी मिजो कपडे पुआये; मैं बुमार थिया; ते तुसी मेरी सेवा किती; मैं जेल बिच थिया ते तुसी मिजो मिलणे तांई आए।' 37 तां धर्मी लोकां ने तिन्हरे जो जवाब देंगा 'ओ प्रभु, असी कधाडी तुसा जो भूख्खा दिख्खेया ते खुआया ते पाणी पियाया?

38 असी कथाड़ी तुसां जो परदेसी दिख्खेया ते अपणे घरे रुकाया ते बगैर कपड़े रे दिख्खी करी कपड़े पुआये? 39 असा ने कथाड़ी तुसां जो बुमार या जेल बिच दिख्खेया ते तुसां जो मिलणे जो आए? 40 फिरी राजे ने उन्हा जो जवाब देणा, 'मैं तुम्हारे कने सच बोलदा जां बी तुसा ने मेरे भोळे-भाळे भाइयां बिच का कुसकी इक ताई बी किच्छ किच्चेया ता से तुसी मेरे ताई किच्चेया।' 41 'तां तिनिये पूठे पाससे वालेयां कने बोलणा' 'ओ अभागेयो! मेरे का दूर चली जाओ, अत्ते जे अग्न सैतान अत्ते उसेरे दूतां ताई तयार किच्ची गई है, उस कदी ना बूझणे वाली अग्न बिच पेई जाओ। 42 किजोकी मैं भूख्खा थिया, ते तुसी मिंजो खाणे ताई नी दिच्चेया, मैं प्यासा थिया ते तुसी मेरे जो पाणी नी पियाया; 43 मैं अजनबी थिया, पर तुसी मेरे जो अपणे घरे नी रुकाया; मैं नगां थिया, ते तुसी मिंजो कपड़े नी पुआए; मैं बुमार ते जेल बिच थिया; अपण तुसी मेरा ध्यान रख्खेया।' 44 तां तिन्हा ने जवाब देणा, 'ओ प्रभु, असी तुसां जो भूख्खा, प्यासा, परदेसी, बिना कपड़े रे, बुमार, ते जेल बिच कथाड़ी दिख्खेया ते तेरी सेवा नी किच्ची?' 45 तां तिन्हा ने उन्हा जो जवाब देणा, 'मैं तुसां जो सच बोलदा कि तुसी जे किच्छ मेरे इन्हा भोळे-भाळे बिच का कुसकी इक कने बी नी करदा, से मेरे कने बी नी करदा। 46 ते इन्हा बुरे लोकां ने हमेसा री सजा भुगतणी अपण धर्मी ने हमेसा री जिन्दगी बिच चली जाणा।'

### पिलातुस रे सामणे यीशु जी

26 जां यीशु जी ए सारी गल्लां बोल्लि बैठे तां अपणे चेल्हेयां जो बोलणा लगे, 2 'तुसी जाणदे की दो दिनां बाद फसह रे त्योहार है ते म्हणु रा पुत्तर क्रुस पर चढाए जाणे ताई पकड़वाया जाणा।'

### यहुदा रा आत्म हत्या करणा

3 तां प्रधान याजक ते प्रजा रे पुनरिये काईफा नां रे महायाजक रे अगँणे कठि गे, 4 ते अपु बिच सलाह करण लगे की यीशु जी जो चलाकी कने पकड़ी करी मारी रखण। 5 अपण से बोलदे थे, 'पर्व से वेल्हे नी कुथकी इय्यां ना हो की लोकां रे मन बिच बलवा मची जाए।' 6 जां यीशु जी बैतनियाह बिच शमोन कौद्दी रे घरे थिया 7 तां इक जनानी संगमरमर रे बर्तन बिच किमती इत्तर लेइ करी तिसका आई, ते जां से रोटी खाणे तां बैठे रे थिये तां तिन्हेरे सिर पराल्ले उन्धेरी दिच्चेया। 8 ए दिख्खि करी तिन्हेरे चेल्हे गुस्से होए ते बोलणा लगे, 'इसेरी बर्बादी किजो किच्ची गी? 9 इसजो ता अच्छे दाम पर बेची करी गरिब्बां बिच बडेंया जाई सकदा था।' 10 ए जाणी करी यीशु जी ने तिन्हा जो बोल्हेया, 'जनानी जो किजो तगं करेया करदे हिन? तिसने मेरे कने अच्छाई किच्ची।'

### पिलातुस रे सवाल

11 गरीब तां तुसां कने हमेसा रैहन्दे, अपण मैं तुसां कने हमेसा नी रैहणा। 12 इनिये मेरे सरीर पर जे ए इत्तर उन्धेरे रा है, ए मेरे गाड़े जाणे ताई किच्चे रा है। 13 मैं तुसां कने सच बोलदा, की सारी दुनिया बिच जिच्चे कुथकी ए सुसमाचार दस्सेया जाणा, तिच्चे इसेरे इस कम्म रा जिक्कर बी इसेरी याद बिच किच्चेया जाणा। 14 तां यहुदा इस्करियोती ने, जे बारा चेल्हेयां बि का इक थिया प्रधान याजकां का जाई करी ए बोल्हेया,

### मौत री सजा देणा

15 'जे मैं तिसजो तुसां रे हत्थ पकड़वाई देयां तां मेरे जो दिगें?' तिन्हा ने तिसजो ति चाँदी रे सिक्के तौळी करी देई दिच्चे, 16 ते से तिसी वेल्हे का तिन्हेरे जो पकड़वाणे रा मोक्का तोपणा लगेया। 17 अखमिरी रोड्डि रे पर्व रे पैहले दिन, चेल्हे यीशु जी का आई करी पुछणा लगे, 'तुसी कुते चाहदें की असी तुसां ताई फसह खाणे री तयारी करण?' 18 तिन्हा ने बोल्हेया, 'नगर बिच अमुक म्हणु का जाई करी तिसजो बोल्लो की गुरु बोलदे की मेरे वेल्हा नेडे है, मैं अपणे चेल्हेयां कने तेरे इत्ते पर्व मनाणा।' 19 अते चेल्हेयां ने यीशु जी री गल्ल मन्नि ते फसह तयार किच्चा ते फसह तयार किच्चा। 20 जां साज होइ तां से बारा जणेया कने रोड्डि खाणे ताई बैठे। 21 जां से खाया करदे थिये तां तिन्हा

ने बोल्हेया, 'मैं तुसां कने सच बोलदा की तुसां बिच का इक ने मेरे जो पकड़वाणा।' 22 इस पर से बड़े उदास होए, ते हर इक तिन्हा का पुछणा लगेया, 'हे गुरु, क्या से मैं है।' 23 तिन्हा ने जवाब दिच्चेया, 'जिस ने मेरे कने थाळी बिच हत्थ पाए रा है तिनिये ई मेरे जो पकड़वाणा। 24 म्हणु रा पुत्तर ता जदेया तिसेरे बारे बिच लिख्खे रा है, जाया ई करदा है; अपण तिस म्हणु ताई अफसोस है जिसेरे वजह कने म्हणु रा पुत्तर पकड़वाया जादां: जे तिस म्हणु रा जन्म ई नी हुदां तां तिसेरे ताई भला हुदां।' 25 तां तिसेरे पकड़वाणे वाले यहुदा ने बोल्हेया, 'हे गुरु क्या से मैं है?' तिन्हा ने तिसजो बोल्हेया, 'तु बोल्लि बैठा।' 26 जां से खाया करदे थे तां यीशु जी ने रोड्डि ली, ते आशीष मर्गी करी तौड़ी, ते चेल्हेयां जो देइ करी बोल्हेया, 'लेयो, खाओ; ए मेरा सरीर है।'

### सिपाईयां रा यीशु जी री बेज्जती करणा

27 फिरी तिन्हा ने कटोरा लेई करी धनवाद किच्चा, ते तिन्हा जो देइ करी बोल्हेया, 'तुसी सारे इस बिच का पियो, 28 किजोकी ए मेरा वादे रे मुताबक से खुन है, जो मतेयां रे पाप्मां री माफी ताई बहाया जादां। 29 मैं तुसां कने सच बोलदा की अगुंर रा ए रस तिस दिन तिकर कदी नी पिमां जां तिकर तुसां कने अपणे पिता रे राज बिच नौया ना पियां। 30 फिरी से भजन गाई करी जैतुन पहाड़ पर गे, तां यीशु जी ने तिन्हा जो बोल्हेया, 'तुसी सारेयां ने आज्र ई रात्ती मेरे बारे बिच धोखा खाणा, किजोकी लिख्खे रा है: 'मैं पुहाळ जो मारणा, ते हड़ री भेडां ने तित्तर-बित्तर होइ जाणा।' 31

### यीशु जी रा क्रुस पर चढाया जाणा

32 अपण मैं जिन्दे होणे रे बाद तुसां का पैहले गलील जो जाणा। 33 इस पर पतरस ने तिन्हा जो बोल्हेया, 'जे सारे तुसां रे बारे बिच धोखा खाण ते खाण, अपण मैं कदी बी धोखा नी खाणा।' 34 यीशु जी ने तिसजो बोल्हेया, 'मैं तेरे कने सच बोलदा की आज्र ई रात्ति मुगें रे बागं मारणे का पैहले, तैं त्रै बारी मेरे का मुकरी जाणा।' 35 पतरस ने तिन्हा जो बोल्हेया, 'जे मेरे जो तुसां कने मरणा बी पे, तां बी मैं तुसां का कदी नी मुकरणा।' ते इदेया ई सारे चेल्हेयां ने बी बोल्हेया। 36 तां यीशु जी अपणे चेल्हेयां कने गत समनी नां रे इक जगह पर आये ते अपणे चेल्हेयां जो बोलणा लगे इत्ते ई बेइ रेहो जां तिकर मैं तिच्चे जाई करी प्रार्थना करां। 37 से पतरस ते जब्दि रे दोई मुडेंया जो कन्ने लेई गे, ते उदास ते व्याकुल होणा लगे। 38 तां तिन्हा ने तिन्हेरे जो बोल्हेया, 'मेरा दिल बड़ा उदास है इत्ते तिकर की मेरी जान निकळैया करदी है। तुसी इत्ते ई रुको ते मेरे कने जागदे रेयो।' 39 फिरी से थोडा होर आगे बधी करी मुँह रे भारे पेय, ते प्रार्थना किच्ची, 'हे मेरे पिता जे होइ सके ता ए कटोरा मेरे का टळी जाए तां बी जिच्च्यां मैं चाहदां तिच्च्यां नी अपण जिच्च्यां तुसी चाहदें तिच्च्यां ई हो।' 40 फिरी तिन्हा ने चेल्हेयां का आई करी तिन्हा जो सुत्ते रे पाया ते पतरस जो बोल्हेया 'क्या तुसी मेरे कने इक घड़ी बी नी जागि सके? 41 जागदे रेयो, ते प्रार्थना करदे रेयो की तुसी परिक्षा बिच ना पेयो: आत्मा ता तयार है, अपण सरीर कमजोर है।' 42 फिरी तिन्हा ने दुई बारी जाई करी प्रार्थना किच्ची 'हे मेरे पिता, जे ए मेरे पिए बगैर नी हटई सकदा तां तुसां री मर्जी पुरी हो।' 43 तां तिन्हा ने आई फिरी तिन्हा जो सुत्ते रे पाया किजोकी तिन्हेरी हाक्खियां निद्रां कने भरे री थी। 44 तिन्हेरे जो छडि करी से फिरी चली गे, ते तिन्हा ई शब्दां बिच फिरी तिज्जि बारी प्रार्थना किच्ची।

### यीशु जी रा मरणा

45 तां तिन्हा ने चेल्हेयां का आई करी तिन्हेरे जो बोल्हेया, 'अवे सोदें रेयो, ते अराम करो: दिख्खो, से वेल्हा आई पुजे रा है, ते म्हणु रा पुत्तर पापियां रे हत्थां पकड़वाया जादां। 46 उठो, चलिये; दिख्खो, मेरा पकड़वाणे वाळा नेडे आई पुजे रा है।' 47 से ए बोल्हेया ई करदे थिये की यहुदा जे बारां बिच का इक थिया, आया ते तिसेरे कने प्रधान याजकां ते लोकां रे पुनरियां रे पाससे का बड्डि भीड़, तलवारां ते लठ लेई करी आई। 48 तिन्हेरे पकड़वाणे वाळे ने तिन्हेरे जो ए निसानी दिच्ची री थी: 'जिसजो मैं चुमि लेयां सेई है; तिसजो पकड़ी लेयो।' 49 ते तिसी वेल्हे यीशु जी का आई करी बोल्हेया, 'हे गुरु, नमस्कार!' ते तिन्हेरे जो बड़ा चुम्मेया। 50 यीशु जी ने तिसजो

बोलेया, "हे दोस्त जिस कम्म ताई तु आए रा है तिसजो करी लेया।" तां तिन्हा ने नेड़े आई करी यीशु जी पर हत्थ पाए ते तिन्हा जो पकड़ी लेया। 51 यीशु जी रे साथियां बिच का इक्क ने हत्थ बधाई करी अपणी तलवार खिची ली ते महायाजक रे नौकर पर चलाई करी तिसेरा कान्न उड़ाई दिता। 52 तां यीशु जी ने तिस जो बोलेया, "अपणी म्यान बिच रखी ले, किजोकी जे तलवार चलावे से सारे तलवार कने खत् कित्ते जाणे। 53 क्या तु नी जाणदा की मै अपणे पिता का विनती करी सकदा, ते से स्वर्गदुतां री बारां पलटन का जादा अब्बे ई हाजिर करी सकदा। 54 अपण पवित्रशास्त्र री से गल्लां की इय्यां ई होणा जरुरी है, किय्यां पुरी होणी?" 55 तिस वेले यीशु जी ने भीड़ जो बोलेया, "क्या तुसी तलवारा ते लाठियां लेई करी मेरेजो डाकु साई पकड़णे ताई निकळे रे हिन? मै हर रोज देहरे बिच बेई करी उपदेस देया करदा था ते तुसी मेरेजो नी पकड़ेया, ते तुसि मेरेजो नी पकड़ेया। 56 अपण ए सारा किछ इस ताई होए रा है की भविष्यद्वक्ता रे वचन पुरे होण।" तां सारे वेले तिन्हेरे जो छडी करी न्हसी गे।

### यीशु जी रा दब्बेया जाणा

57 तां यीशु जी रे पकड़णे वाळे तिन्हेरे जो काईफा नां रे महायाजक का लेइ गे, जित्ते शास्त्रि ते पुनरिये कठे होए थे। 58 पतरस दुर ई दुर तिन्हेरे पिच्चे पिच्चे महायाजक रे अगुण तिकर गया, ते अन्दर जाई करी आखर दिखणे जो प्यादेयां कने बेइ गया। 59 प्रधान याजक ते सारी महासभा यीशु जी जो मारी रखणे ताई तिन्हेरे खलाफ झुटी गुआई री तलाश बिच थिये, 60 अपण मते सारे झुटे गुआह रे ईणे पर बी ना मिलि। आखर बिच दो जणे आए, 61 ते बोलेया, "इन्ने बोले रा है की मै परमेश्वर जो गिराई सकदा ते तिसजो त्रै दिनां बिच बणाई सकदा।"

### कबर पर पैहरा

62 तां महायाजक न खडी करी यीशु जी जो बोलेया, "क्या तू कोइ जवाब नी दिदा? ए लोक तेरे बारे बिच क्या गुआई देया करपे हिन?" 63 अपण यीशु जी चुप रेय, तां महायाजक ने तिन्हेरे जो बोलेया, "मै तेरे जो जिन्दे परमेश्वर री कसम दिदां की जे तू परमेश्वर रा पुत्र मसीह है तां असां कने बोले दे।" 64 यीशु जी ने तिसजो बोलेया, तू अपु ई बोले दिता; ते तुसां कने ए बी बोलदा क अब्बे का परमेश्वर रे पुत्र जो सर्वशक्तिमान रे सजे पास्से बैठे रे ते आसमान रे बदलां पर आदें दिखगे।" 65 इस पर महायाजक ने अपणे कपडे फाड़े ते बोलेया, "इस ने परमेश्वर ई बेजती कित्ति री है, अवे असजो गुआई री क्या जरुरत? दिखखे, तुसी अब्बे ए बेजती सुणे री है। 66 तुसी क्या सोचदे?" तिन्हा ने जवाब दिता "ए मारे जाणे रे जोगे है।" 67 तां तिन्हा ने तिन्हेरे मुँह पर थुक्केया ते तिन्हेरे जो मुक्के मारे, दुएयां ने तिन्हेरे जो थप्पड़ मारी करी बोलेया, 68 "हे मसीह असां कने भविष्याणी करि के बोल की कुसने तेरे जो मारेयां?" 69 पतरस बार अगुणे बिच बैठे रा थिया की इक्क नौकराणी तिसेरा का आई ते बोलेया: तु बी यीशु गलीली रे कन्ने थिया।" 70 तिस ने सारेयां रे सामणे ए बोलदे होए इन्कार कित्तेया, "मै नी जाणदा की तू क्या बोलेया करदी है।" 71 जां से बार डेवडी बिच गया, तां दुई नौकरानी ने तिसजो दिखि करी जे तित्ते थोये तोनहेरे जो बोलेया, "ए बी ता यीशु नासरी जी कने थिया।" 72 तिसने कसम खाई करी फिरी इन्कार कित्तेया: मै तिस म्हणु जो नी जाणदा।" 73 थोड़ी देर बाद लोकां ने तित्ते खडित्ते रे थिये, पतरस का आई करी तिसजो बोलेया, सचमुच तु बी तिन्हा बिच का इक्क है किजोकी तेरी बोलि तेरा राज खोलि दिदी।" 74 तां से धिक्कारणे ते कसमां खाणां लग्गेया: "मै तिस म्हणु जो नी जाणदा ते तिसी वेले मुर्गे नै बागं मारी।" 75 तां पतरस जो यीशु जि री बोले री गल्ल याद आई: "मुर्गे रे बागं दैणे का पैहले तू तिन बारी मेरा इन्कार करणा।" ते से बार करी फुटि-फुटि करी रोणा लग्गेया।

### पिलातुस रे सामणे यीशु जी

27 जा भ्याग होइ तां सारे प्रधान याजकां ते लोकां रे पुरनियां ने यीशु जी जो मारीरखणे री सलाह कित्ती। 2 तिन्हा ने तिन्हेरे जो बन्नेया ते लेई जाई करी पिलातुस हाकर रे हत्थां सौपिं दिता।

### यहूदा रा आत्म-हत्या करणा

3 तिन्हा ने तिन्हेरे जो बन्नेया ते लेई जाई करी पिलातुस हाकर रे हत्थां सौपिं दिता। 4 ते बोलेया, "मै बेगुनाह जो मरवाणे ताई पकड़वाई करी पाप कित्तेया।" तिन्हा ने बोलेया, "असां जो क्या? तु ई जाण।" 5 तां से तिन्हा सिक्केया जो देहरे बिच सुटि करी चली गया, ते जाई करी अपु जो फाह लाई लिता। 6 प्रधान याजकां ने तिन्हा सिक्केयां जो लेइ करी बोलेया, "इन्हा जो, भंडार बिच रखणा ठीक नी किजोकी ए खून री किमत है।" 7 अते तिन्हा ने सलाह करी के तिन्हा सिक्केयां कने परदेसियां रे गाढ़े जाणे ताई कुम्हार रे खेत्तर जो खरिदी लिता। 8 इस ताई से खेत्तर आज तिकर खून रा खेत्तर केहलादां। 9 तां जे वचन यीर्मयाह भविष्यद्वक्ता रे जरिए बोलेया गया थिया से पुरा होया: "तिन्हा ने से ति सिक्के मतलब तिस मन्त्रि री कीमत जो (जिसजो इस्त्राएल री औलादां बिच का किन्नेया ने ठेहराया थिया) लेइ लिता। 10 ते जियां परमात्मा ने मिजों हुक्म दित्तेया थिया तियां ई तिन्हा जो कुम्हार रे खेत्तर रे मोल बिच देइ दिता।

### पिलातुस रे सवाल

11 जां यीशु जी हाकम रे सामणे खडित्ते रे तां हाम ने तिन्हा जो पुच्छेया, "क्या तु यहुदियां रा राजा है?" यीशु जी ने तिन्हा जो बोलेया "तू अपु ई बोल्लेया करदा है। 12 जां प्रधान याजक ए पुरनिये तिस पर इल्जाम लाया करदे थिये, तां तिन्हा ने कोई जवाब नी दिता। 13 इस पर पिलातुस ने तिन्हा जो बोलेया, "क्या तू नी सुणदा कि ए तेरे खलाफ किन्नि गल्लां बोलेया करदे हिन। 14 अपण तिन्हा ने तिसजो इक्क बी गल्ल रा जवाब नी दित्तेया, इत्ते तिकर हाकम जो बड़ी हरानी होइ।

### मौत री सजा रा हुकम

15 हाकम री ए रीति थी कि ति त्योहार बिच लोकां ताई कुसकी इक्क कैदी जो जिसजो से चाहदें थे, छडि दिदां था। 16 तिस वेले तिन्हेरे इत्ते बरब्बा नां रा इक्क मन्ने रा कैदी था। 17 अते जां से कठिये, तां पिलातुस ने तिन्हेरे जो बोलेया "तुसी कुसजो चाहदें की मे तुसां ताई छडि देयां? बरअब्बा जो या यीशु जी जो जे मसीह केहलादें?" 18 किजोकी से जाणदा था की तिन्हा ने तिन्हेरे जो चलाकी कने पकड़वाया रा है। 19 जां से न्याय री गद्वि पर बैठे रा थिया तां तिसेरी लाडी ने तिसजो बोलि भेजेया, "तू तिस धर्मी रे मामले बिच हात्थ मत पादां, किजोकी मै आज सुपणे बिच तिसेरी वजह कने बडी तकलीफ झेलि री है। 20 प्रधान याजक ते पुरनियां ने लोकां जो उकसाया कि से बरअब्बा जो मर्गी लेण ते यीशु जी रा खातमा करवाण। 21 हाकम ने तिन्हेरे जो पुच्छेया, "इन्हा दोन्नां बिच का कुसजो चाहदें की मै तुसां ताई छडि देयां?" तिन्हा ने बोलेया, "बरअब्बा जो।" 22 पिलातुस ने तिन्हेरे जो पुच्छेया "फिर यीशु जी जो, जे मसीह केहलादां क्या करां?" सारेयां ने तिन्हा जो बोलेया "से क्रूस पर चढ़ाया जाए।" 23 हाकम ने बोलेया, "किजो, तिसने क्या बुराई कित्ते री है? अपण से होर बी चिलाई करी बोलणा लग्गे, "से क्रूस पर चढ़ाया जाए।" 24 जां पिलातुस ने दिखखेया कि किछ बी नी बणेया करदा है अपण तिसेरे उलट हगांआ बदेया जाया करदा है ता तिनिये पाणी लेई करी भीड़ रे सामणे अपणे हात्थ धोए ते बोलेया "मै इस धर्मी रे खून का बेगुनाह है; तुसी ई जाणो।" 25 सब लोकां ने जवाब दिता, "इसेरा खून असां पर ते असां रे औलादां पर हो।" 26 इस पर तिसने बरअब्बा जो तिन्हेरे ताई छडि दित्तेया, ते यीशु जी जो कोड़े लगवाई करी तिन्हेरे जो देइ दिता की क्रूस पर चढ़ाया जाए।

### सिपाईयां रा यीशु जी रा मजाक उड़ाणा

27 तां हाकम रे सिपाईयां ने यीशु जी जो किले बिच लेइ जाई करि सारी पलटन तिन्हेरे चारो पास्से कठेरी, 28 ते तिन्हेरे कपड़े उतरवाई करी तिन्हेरे जो लाल रंग रा बागा पुआया, 29 ते कडेंया रा मुकूट दबाई करी तिन्हेरे सिर पर रखेया ते तिन्हेरे सजे हात्थ बिच सरकडां दित्तेया ते तिन्हेरे आगे घुटने टेकी करी तिन्हेरा मजाक उड़ाणा लगे ते बोलेया, "हे यहुदियां रे राजे, नमस्कार। 30 ते तिन्हेरे पर थुक्केया; ते सेई सरकडां लेइ करी तिन्हेरे सिर

पर मारणा लगे। 31 जां से तिन्हेरा मजाक उड़ाई बैठे तां से बागा उतरवाई करी फिर तिन्हेरे ई कपडे तिन्हेरे जो पहनाए ते कूस पर चढ़ाणे ताई लेई चले।

### यीशु जी रा कूस पर चढ़ाणा

32 बार जादें वेले तिन्हेरे जो शमौन नां रा इक्क कुरैनी म्हणु तिन्हेरे जो मिलेया तिन्हा ने तिसजो बेगार बिच पकड़ेया की से तिन्हेरा कूस चुकि करी लेइ चले। 33 तिस जगह पर जे गुलगुला मतलब की खौपडी री जगह केहलादां पुज्जि करी 34 तिन्हा ने पिता मिले रा दाखरस तिन्हेरे जो पिणे ताई दित्तेया अपण तिन्हा ने चखी करी पिणा नी चाएया। 35 तां तिन्हा ने तिन्हा जो कूस पर चढ़ाया,ते चिट्ठिया पाई करी तिन्हेरे कपडे बडीं लिच्ते 36 ते तिच्ते बेई करी तिन्हेरा पेहरा देणा लगे, 37 ते तिन्हेरा दोष पत्र तिन्हेरे सिर का उप्पर लाया कि“ए यहुदियां रा राजा यीशु है”। 38 तां तिन्हेरे कने दो डाकु इक्क सज्जे पाससे ते दुआ खबे पाससे,कूस पर चढ़ाए गे, 39 आणे-जाणे वाळे सिर हिलाई-हिलाई करी तिन्हेरा मजाक उड़ाया करदे थे, 40 ते बोलदे थे,“हे देहरे रे तोड़णे वाळे ते त्रै दिनां बिच बनाणे वाळे अप्पु जो ता बचा! जे तू परमात्मा रा पुत्तर है तां कूस पर का उतरी आ”। 41 इसी तरिके कने प्रधान याजक भी शास्त्रियां ते पुरनिये समेत मजाक उड़ाई-उड़ाई करी बोलदे थे, 42 इनिये होरां जो बचाया,ते अप्पु जो नी बचाई सकदा।ए ता’इस्त्राएल रा राजा है।अवे कूस का थल्ले उतरी आए तां असी तिस पर भरोसा करण। 43 तिसने परमात्मा प भरोसा रखे रा है; जे से इसजो चाहदें ता अवे इसजो छुड़ाई लेय,किजोकी इसने बोलेया थिया’मै परमात्मा रा पुत्तर है”। 44 इसी तरिके कने डाकु बी जे तिन्हेरे कने कूस पर चढ़ाए गे रे थिये इसि तरिके कने तिन्हेरा मजाक उड़ाया करदे थे,

### यीशु जी रा मरणा

45 दोपहर का लेइ करी त्रिये पहर तिकर तिस सारे देस बिच न्याहरा छाया रेया। 46 त्रिये पहर रे नेड़े यीशु जी ने बडी जोर कने हाक्क लाई करी बोलेया“एली,एली लमा शबकनि?”मतलब हे मेरे परमात्मा,हे मेरे परमात्मा,तुसी मेरे जो किजो छड्डि दित्तेया?” 47 जे तिच्ते खडित्ते रे थिए तिन्हा बिच का किन्नेया ने ए सुणी करी बोलेया,“से ता एलिय्याह जो सद्देया करदा है, 48 तिन्हा बिच का इक्क तिसी वेले दोड़ेया,ते स्पजं लेई करी सिरके बिच डुबाया,ते सरकडें रखि करी तिन्हा जो चुसाया। 49 ते तिन्हा जो बोलेया,“रुकी जाओ,दिखदे एलिय्याह तिसजो बचाणे आदां या नी”। 50 तां यीशु जी ने फिरी बडी हाक्क लाई करी साह छड्डि दित्ते। 51 ते दिखखो,देहरे रा परदा उप्पर का लेई करी थल्ले तिकर फटी करी दो टोड़े होइ गया: ते धरती हिली गी ते चट्टानां त्रिडकी गेइ। 52 ते कबरां खूली गेइ,ते सुत्ते रे(मरे रे)पवित्तर लोक्कां री मते सारी लाशां फिरी जिन्दा होइ गेइ। 53 ते तिन्हेरे जिन्दा होणे रे बाद से कबरां बिच का निकळी करी पवित्तर नगर बिच गे ते मते लोक्कां जो दिस्से। 54 तां सुबेदार ते जे तिन्हेरे कने यीशु जी रा पेहरा देया करदें थिये,हिल्लण ते जे किछ होया थिया तिसजो दिखिकरी बडे भारी डरी गे ते बोलेया,“सचमुच ए परमात्मा रा पुत्तर थिया!” 55 तिच्ते मती सारी जनानियां जे गलील का यीशु जी री सेवा करदे होए तिन्हेरे कने आई री थी,दूर का ए सब किछ दिखेया करदी थी। 56 तिन्हा बिच मरीयम मगदलिनी,ते याकूब ते योसेस री माता मरीयम,ते जब्दी रे पुत्तरां री माँ थी।

### यीशु जी रा दब्बेया जाणा

57 जां शाम होइ तां युसूफ नां रे अरिमतिया रा इक्क अमीर आदमी,जे अप्पु बी यीशु जी रा चेला थिया आया। 58 तिसने पिलातुस का जाई करी यीशु जी री लास मर्गी इस पर पिलातुस ने देइ देणे रा हुक्म दित्ता। 59 युसूफ ने लास लिच्ती,तिसजो चमकदार चदर बिच लपेटेया, 60 ते तिसजो अपणी नोयी कबर बिच रखेया,जे तिसने चट्टान बिच खुदवाई थी ते कबर रे दरवाजे पर बड्डा बड्डा लुडकाई करी चली गया। 61 मरियम मगदलिनी ते दुई मरीयम तिच्ते कबर रे सामणे बैठे री थी।

### कबर पर पैहरा

62 दुए दिन जे तयारी रे बाद रा दिन थीया, प्रधान याजकां ते फरिसियां ने पिलातुस जो कठी करी बोलेया, 63 “हे महाराज,असां जो याद है की तिस भरमाणे वाळे ने जां से जिन्दा थिया,बोलेया था,‘मै त्रै दिनां रे बाद जिन्दा होइ जाणा।’ 64 अते हुक्म देयो की त्रिये दिन तिकर कबर री रखवालि किच्ती जाए,इयां ना हो की तिसेरे चेले आई करी तिसजो चोरी करी के लेइ जाण ते लोक्कां जो बोलणा लगे,से मरेयां बिच का जिन्दा होई गे रा है।‘तां पिछला धोखा पैहले का बी बुरा होणा।’ 65 पिलातुस ने तिन्हा जो बोलेया,“तुसां का पैहरेदार ता हिन। जाओ,अपणी समझ रे हसाब कने रखवालि करो। 66 अते से पेहरां जो कने लेई करी गे ते बट्टे पर मोहर लाई करी कबर री रखवालि किच्ती।

### यीशु जी रा दोबारा जिन्दा होणा

28 सब्त वाळे रोजे रे बाद रविवार जो भ्याग हून्दे ई मरियम मगदलिनी अत्ते दूसरी मरियम कबर जो दिखणे ताई आई। 2 अत्ते दिखखो, इक्क बड़ा बड्डा हिलण गया, किजोकि स्वर्ग का इक्क स्वर्गदूत तिच्ते उतरेया अत्ते तिच्ते आई करी उस ने पत्थर जो लुढाकाई दित्तेया अत्ते उस पर बैई गया। 3 उसेरा रुप अम्बर री बिजली साहई थिय्या अत्ते उसेरे कपडे बर्फ साहई साफ थिय्ये। 4 से सिपाई जे कबरां पर पैहा देया करदे थिय्ये, डरे रे मारे कमणे लगे अत्ते इदेय होई गे जियां मरी गे हो। 5 तां स्वर्गदूत ने उन्हा जनानियां जो बोलेया, “डरो मत, मैं जाणदा कि तुसी यीशु जी जो तोपेया करदे हिन जिस जो सूळी पर चढ़ाई दित्तेया थिय्या। 6 से इत्ते नी हिन। जियां कि उन्हा ने बोलेया थिय्या, तिन्हा मरणे बाद फिरी जिंदा होई जाणा। आओ, उस जगह जो दिखखो, जिच्ते से लेटे रे थिय्ये। 7 अत्ते फिरी झट जाओ अत्ते उसेरे चेलेयां जो बोलो, ‘से मरे रेयां बिच का फिरी जिंदा होई गया, अत्ते से तुम्हारे का पैहले गलील जो जाया करदे हिन, तुसा उस जो उत्ते ई दिखणा। दिखखो, मैं तुम्हारे बोली दित्तेया है।’ 8 से डर अत्ते बडी खुसी कने कबर का हटी करी उसेरे चेलेयां जो बसेख दैणे ताई दौड़ी गेईयां। 9 तां यीशु जी उन्हा जो मिले। अत्ते बोलेया, “सलाम”। उन्हा ने तिन्हा का जाई करी उन्हेरे पैर पकडी करी उन्हेरी जै-जैकार किच्ती। 10 तां यीशु जी ने उन्हा जो बोलेया, “डरो मत, मेरे भाईयां का जाओ, अत्ते उन्हा जो बोलो कि से गलील ताई से निकळे, तिच्ते ई तिन्हा मिजो दिखणा।”

### सिपाईयां रा खबर पुजाणा

11 हल्ले से जनानियां अपणे रस्ते बिच ई थी कि किच्छ सिपाई जे पैहरेदार थिय्ये, सैहर जो गे अत्ते जे किच्छ होया थिय्या, उस सब री जानकारी परोहतां रे प्रधाना जो दस्सी दिच्ती। 12 तां तिन्हा बुजुर्ग यहूदी नेतेयां कने मिली करी इक्क योजना बणाई। उन्हा ने सिपाईयां जो सारी चाँदी देईकरी बोलेया, 13 “ महुआं जो एह बोलेयो कि से यीशु रे चेले राती आये अत्ते जां असी सुत्ते रे थिय्ये उसेरी लास जो चोरी करी लेई गे। 14 अत्ते जे तुम्हारी गल्ल राज्यपाल तक पूजदी ता असी उस जो समझाई लिंगे अत्ते तुसा जो कोई आँच नी आणे दिगे। 15 पैहरेदारां ने चाँदी लेई करी तियां ई किच्तेया, जियां उन्हा जो दस्सेया गया थिय्या। अत्ते एह गल्ल यहूदियां बिच अज्र ताई इस्सी तरिके कने फैली री है।

### यीशु जी रा चेलेयां जो दिसणा ते आखरी हुक्म

16 फिरी ग्यारा चेले गलील बिच उस पहाड़ी बिच पूजे जिच्ते जाणे जो यीशु जी ने बोलेया थिय्या। 17 जां उन्हा ने यीशु जी जो दिखेया ता उसेरी जै-जैकार किच्ती। बल्कि किच्छ रे दिला बिच शक थिय्या। 18 फिरी यीशु जी ने उन्हेरे का जाई करी बोलेया, “स्वर्ग बिच अत्ते धरती बिच सब हक मिजो दित्ते गे हिन। 19 इधेरे ताई तुसी जाओ अत्ते सब देसां रे महुआं जो मेरा चेला बणाओ। तुम्हारे जो एह कम्म परम पिता रे नां बिच, पुत्र रे नां बिच अत्ते पवित्र आत्मा रे नां बिच उन्हा जो बपतिस्मा देई करी पूरा करणा है। 20 से सब



हुकम जे में तुम्हारे जो दित्ते हिन, उन्हा जो उन पर चलना सिखाओ: अत्ते दिखबो, मैं दुनियां रे अंत तक हमेसा तुम्हारे कने है।”

## मरकुस

### युहन्ना बपतिस्मा दैणे वाळे रा परचार करणा

1 परमेश्वर रे पुत्र यीशु मसीह रे शुभ-भसेख रे काम्म री सुरुआत।  
2 जिय्यां यसायाह भविस्द्रक्ता री किताब विच लिख्वा रे है, "दिख्ख मै अपणे दूत जो तेरे आगे भेजा करदा है, जिन्हे तेरे ताई रस्ता ठीक करणा।  
3 बण विच इक्क हाक मारणे वाळे री आवाज सुणुदी कि प्रभु रा रस्ता तयार करो, ते उसदी सडकां सिद्धी करो। 4 युहन्ना आया, जे बण विच बसिस्मा दिदां, ते पाप्मां रि माफी ताई मन फिरणे रे बसिस्मा रा प्रचार करदा थिया।  
5 सारे यहुदिया देस रे, ते यरुशलेम रे सारे रैह्नेवाळे निकळिकरी उसेरे नेडे गे, ते अपणे पाप्मां जो मन्नि करि यरदन नदी विच उस का बसिस्मा लिच्छेया।  
6 यहुन्ना ऊँट रे रोम रे कपडे पाइ करी ते कमर विच चमडे रा कमरबंद बन्नि रख्खदा थिया ते टिड्डियां कने जगळी शहद खादां थिया, 7 ते ए प्रचार करदा थिया, "मेरे बाद ओ आणे वाळा है जे मेरे का बि सक्तिसाळी है, मै इस जोगे बी नि कि निह्ने होई करी उसेरे जुत्ते री डोरी खोलां। 8 मै तां तुसां जो पाणी कने बसिस्मा दिच्छेया अपण उन्ने तुसां जो पवित्रात्मा कने बसिस्मा दैणा।"

### यीशु जी रा बपतिस्मा ते परखेया जाणा

9 उना दिना विच यीशु जी ने गलील रे नासरत का आई करी यरदन विच यहुन्ना का बसिस्मा लिच्छेया। 10 ते जां ओ पानी का निकळि करी उप्पर आया, तां उस्सि वेळे उन्नि ये आसमान जो खुळ्दे ते आत्मा जो कबुतर साईं अपणे उप्पर उतरदे दिख्खेया 11 ते ए आकाशवाणी होई, "तू मेरा प्रिय पुत्र है, तेरे का मै खुस है।" 12 तां आत्मा ने तिस्सि वेळे उसजो बणा जो भेजेया। 13 बणा विच चाळि दिनां तिकर सैतान ने उसजो परखेया, ते ओ बणा रे जानवरां कने रेया, ते स्वर्गदूत उसदी सेवा करदे रेय।

### यीशु जी री सेवकारी री सुरुआत

14 यहुन्ना रे पकडाए जाणे रे बाद यीशु जी ने गलील विच आई करी परमेश्वर रे राज रा शुभ-भसेख प्रचार किच्छेया, 15 ते बोलेया, "वक्त पुरा होई गेया, ते परमेश्वर रा राज नेडे आई गेरा है; मन बदळो ते शुभ-भसेख पर भरोसा करो।

### मछुआरेयां रा सद्देया जाणा

" 16 गलील री झील रे कन्डे-कन्डे जान्दे वेळे उन्इये समौन ते उसदे भाई अन्द्रियास जो झील विच जाल पादें दिख्खेया; किजोकी ओ मछ्वारे थिये। 17 यीशु जी ने उना जो बोलेया, "मेरे पिछे आओ; मै तुसां जो मणुआं रा मछ्वारा बनाणा।" 18 ओ तिस्सि वेळे जाळां जो छड्डि करी उसदे पिछे होई गे। 19 थोडा आगे बढी करी उना ने जबदी रे पुत्र याकूब, ते उसेरे भाई युहन्ना को, किस्ति पर जाळां जो ठीक करदे दिख्खेया 20 उना ने तिस्सि वेळे उनहेरे सद्देया; ते ओ अपणे प्यो जबदि जो मजदुरां कने किस्ति पर छड्डि करी, उसदे पिछे होई गे।

### बुरी आत्मा रे सताए म्हणु जो ठीक करणा

21 तां ओ कफरनहूम विच आए, ते ओ तिस्सि वेळे सब्बत रे दिन आराधना करणे वाळि जगह (आराधनाळ्य) जाई करि उपदेश(भाषण) दैणा लगेया। 22 ते लोक उसदे सिक्सा कने हैरान होई गे; किजोकी ओ उन्हा जो शास्त्रियाँ साईं नि, अपण अधिकारियां साईं उपदेश(भाषण) दिंदा था, 23 तिस्सि

वेळे, उन्हेरी धर्म सभा विच इक्क मणु थिया, जिस विच इक्क बुरी आत्मा थी। 24 उन्नि ये चिडं मारि करि बोलेया, "हे यीशु नासरी जी, असा जो तुम्हारे कने क्या काम्म? क्य तुसी हमार जो खत्म करणे ताई आए रे हिन? मै तुसां जो जाणदी कि तुसी कुण हिन? परमेश्वर रे पवित्र मणु! 25 यीशु जी ने उसजो बकी करी बोलेया, "चुप रे; ते उस विच का निकळि जा।" 26 तां बुरी आत्मा उसजो मरोडि करि, ते बडे जोर कने चिडं मारि करी उसविच का निकळि गई। 27 इस पर सारे लोक हैराण होई करी अपणे विच बैस करणा लगि पे, "ए क्या गल्ल? ए ता कोई नोआ उपदेश है! ओ हक्क(अधिकार) कने बुरि आत्मा जो बि हुक्म दिंदा, ते ओ उसदा हुक्म मणदी।" 28 ते उसदा नां झटपट ही गलील रे नेडे-तेडे रि सारि जगह फैलि गेया।

### मते बमार लोकां जो ठीक करणा

29 ओ झटपट आराधना करणे वाळि जगह(आराधनालय)का निकळि करि, याकूब ते यहुन्ना कने समौन ते अन्द्रियास रे घरे आया। 30 समौन री सास्स ताप कने तगं(दुखी) थी, ते उना ने तिस्सि वेळे उसदे बारे विच उना जो बोलेया। 31 तां उना ने नेडे जाई करी उसदा हाथ पकडी करी उसजो उठाया; ते उसदा ताप उतरी गेया, ते ओ उन्हेरि सेवा करणा लगि पेई। 32 शाम्मि जां सुरज डुबई गेया तां लोक सारे बिमारां जो ते उना जो, जिन्हेरे विच बुरी आत्मा थिया, उसेरे क लेई करि आए। 33 ते सारा नगर दरवाजे का इक्का होई गेया। 34 उना ने बडे जणेया जो जे मती बिमारियां कने दुखी थिये, खरा किच्छेया। मती सारी बुरी अत्माएं कड्डि, ते बुरी आत्मा जो बोळणा नि दिच्छेया किजोकी ओ उना जो पहचाणदि थियां।

### यीशु जी रा किल्ले प्रार्थना करणा

35 भ्यागा दिन सुरु होणे का बडे पैले, ओ उठी करी निकळे ते इक्क जगळी स्थान विच गेया ते उत्ते प्रार्थना करणा लगेया। 36 तां सिमौन ये उसदे साथी उना री तोप विच निकळे। 37 जां ओ मिल्ले, तां उना जो बोलेया "सारे लोक तुसां जो तोपदे हिन।" 38 उना ने उन्हेरे जो बोलेया, "आओ; अस्सि होर कुथकि नेडे-तेडे रि बस्ति विच जांदे कि मै उत्ते बी प्रचार करां, किजोकी मै इस ताई निकळे रा है।" 39 अते ओ सारे गलील विच उन्हेरे अराधना करणे वाळि जगह(आराधनालय)विच जाई-जाई करी प्रचार करदा ते बुरी-आत्मा कडदा रेया।

### कोढ रे मरीज जो ठीक करणा

40 इक्क कोढी उसदे नेडे आया, उसका मिन्नत किच्छे, ते उसदे सामणे घुटने टेकी करी उना जो बोलेया, "जे अगर तुसी चाह तां मेरे जो साफ करी सकदे।" 41 उना ने उस पर तेस खाई करी हाथ बधाई करी, ते उसजो छुई करी बोलेया, "मै चादां कि तु साफ होई जाए।" 42 ते या, ते तिस्सि वेळे उसेरा कोढ जादां रे ओ साफ होई गेया। 43 तां उना ने उसजो चेतावणी देई करी तिस्सि वेळे भेजि दिच्छेया, 44 ते उना ने उसजो बोलेया, "दिख्ख कुसकि कने किछ मत बोळ्दा अपण जाई री अपणे आप जो याजक जो दिखा, ते अपणे साफ होने रे बारे विच जे किछ मुसा ने ठेराए रा है उसजो भेंट चढा कि उना पर ग्वाई हो।" 45 अपण ओ बार जाई करि इस गल्ल रा बडा प्रचार करणे ते इत्ते तक फेळाणा लगेया कि यीशु जी फिरी नगर विच खुळी करि नि जाई सके, अपण बार जगळी इलाके विच रेया; ते चारो पास्से का लोक उसका आन्दे रेय।

### लकवे रे मरीज जो ठीक करणा

2 मते रोजां बाद ओ फिरी कफरनहूम बिच आया,ते सुणेया कि ओ घरे है। 2 फिरी इन्हे लोक कडिते कि दराजे का बी जगा नी थी;ते ओ उन्हा जो वचन सुणादा थिया। 3 ते लोक इक्क लकवे रे बमार जो चार मणुआं का उठवाई करी उसेरे नेडे लेइ करी आए। 4 अपण जां ओ भीड़ री वजह कने उसेरे नेडे नी पुज्जि सके,तां उन्हाने तिस छत जो जिसेरे थल्ले ओ थिया,खोल्लि दितेया;ते जां ओ उसजो उधेड़ी बैठे,तां उस मंजे जो जिसेरे पर ओ लकवे र बमार पैय रा थिया टर्गी दितेया। 5 यीशू जी ने उन्हेरा भरोसा दिख्खि करी तिस लकवे रे बमार जो बोलेया,"हे पुत्तर,तेरे पाप माफ होए। 6 तां बडे शास्त्रि जे उते बैठे रे थिये,अपणे-अपणे मना बिच ए सोचणा लगे, 7 ए मणु इय्यां किजो बोळदा?ए ता परमेश्वर रि बेज्जति है करया करदा।परमेश्वर जो छड्डि करी होर कुण पाप माफ करी सकदा? 8 यीशू जी ने तिस्सि वेले अपणी आत्मा बिच जाणी लिचेया कि ओ अपणे-अपणे मन बिच ईदेइ गल्ल हिन सोचदे,ते उन्हेरे जो बोलेया,"तुसी अपणे-अपणे मन बिच ऐ गल्ल किजो हिन सोचदे? 9 आसान क्या है? क्या लकवे रे बमार जो बोळणा कि तेरे पाप माफ होए,या ए कहणा कि उठ अपणा मंजा चुक्कि करी चळ फिर? 10 अपण जिस कने तुसी जाणी लेयो कि मणू रे पुत्तर जो धरती पर पाप माफ करणे रा बी हाक्क है।"उन्निये तिस लकवे रे बमार जो बोलेया, 11 मै तेरे जो बोळदा, उठ,अपणा मंजा चुक्कि करी अपणे घरे चळी जा।" 12 ओ उठेया ते तिस्सि अपणा मंजा चुक्कि करी सारेआं रे बिच का निकळि करी अपणे घरे चळी गया;इस पर सारेयां जो हैरानी होई,ते परमेश्वर री बडाई करी के बोळणा लगे,असां ने इदेया कदी नी दिख्खेया।

### लेवी रा सद्देया जाणा

13 ओ फिरी निकळि करी झील रे कनारे गया,ते सारी भीड़ उसका आई,ते ओ उन्हा जो उपदेश दैणे लगेया। 14 जादें वेले उन्निये हलफई रे पुत्तर लेवी जो चुर्गी री चौक पर बैठे रे दिख्खेया,ते उस जो बोलेया,"मेरे पिच्छे होई ले।"ते ओ उठि करी उन्हा रे पिच्छे चळी पेया। 15 जां ओ उन्हेरे घरे रोडि खाणे जो बैठेया,तां मते सारे चुर्गि लैणे वाळे ते पापी,यीशू जी ते उन्हा रे चेलेयां कने रोडि खाणे जो बैई गे; किजोकी ओ मते सारे थिये, ते उसदे पिच्छे चली आए रे थिये। 16 शास्त्रियां ते फरिसीयां ने ए दिख्खिकरी कि ओ पापीयां ते चुर्गी लैणे वाळेया कने रोडि खाया करदा है,उन्हा रे चेलेयां जो बोलेया,"ओ ता चुर्गी लैणे वाळे ते पापीयां कने खादां पीदां।" 17 यीशू जी ने ए सूणीकरी उन्हा जो बोलेया,"खरे भलेयां जो वैद री जरूरत नी हुदी,आपण बिमारां जो है: मै धर्मियां जो नी अपण पापीयां जो सदणे ताई आए रा है।

### बर्त पर सवाल

18 यूहन्ना रे चेले,ते फरिसी बरत रखदे थिये,अते उन्हा ने आइ करी उन्हा जो ए बोलेया,"यूहना रे चेले ते फरिसीयां रे चेले किजो बरत रखदे,अपण तेरे चेले बरत नी रखदे? 19 यीशू जी ने उन्हा जो बोलेया,"जां तीकर दुल्हा बरातियां कने रहदां,क्या से बरत रख्खि सकदे?अते जां ताई दुल्हा उन्हा कने है तां तीकर ओ बरत नी रख्खि सकदे। 20 अपण ओ दिन आणे जां दुल्हा उन्हा का बखरा कितेया जाणा ,तिस्स वेले उन्हा ने बरत करणा। 21 "नौये कपडे री टल्ली पूराणे कपडे पराळे कोइ नी लादां; नी ता तिस्स टल्ली ने तिस्स बिच का किछ छिक्की लैणा, मतलब नौये ने पूराणे का,ते ओ पैहे का जादा फटी जाणा। 22 नौये अंगूर रे रस जो कोइ पूराणी मसकां बिच कोइ नी रखदा,नी ता अंगूर रे रस ने मसकां जो फाड़ी दैणा,ते दाखरस कने मसकां दोन्नों बरबाद होइ जाणी:अपण नौया दाख रस नौइ मसकां बिच भरेया जादां।"

### सब्त रा प्रभु

23 इय्यां होया कि ओ सब्त रे दिन खेतरां बिच होइ करी जाया करदा थिया,ते उन्हा रे चेले चलदे-चलदे सिल्ले तोडणा लगे। 24 तां फरिसीयां ने उन्हा जो बोलेया,"दिख्खो;ए सब्त रे दिन ओ काम्म किजो करदे जे ठीक नी

है?" 25 उन्हा ने उन्हेरे जो बोलेया,"क्या तूसी ए कदी नी पढेया कि जां दाउद जो जरूरत पैइ,ते जां ओ ते उसेरे दोस्त भूख्खे थिये,तां उन्निये क्या कित्ता थिया? 26 उन्निये किय्यां अबियातार महाजाक रे वेले,परमेश्वर रे मन्दर बिच जाई करी चढावे री रोडियां खाइ,जिसेरा खाणा याजकां जो छड्डि करी होर कुसकी जो बी ठीक नी,ते अपणे दोस्तां जो बी दित्ति?" 27 तां उन्हा ने उन्हेरे जो बोलेया,"सब्त रा दिन मणुआं ताई बणाया गे रा है,ना कि मणू सब्त रे दिन ताई। 28 इस ताई मणू रा पुत्तर सब्त रे दिन रा बी माळक है।"

### सुके हात्थ वाळे म्हणु जो ठीक करणा

3 फिरी ओ आराधनालय बिच गे;उत्ते इक्क मणू थिया जिसेरा हत्थ सुकी जे रा थिया, 2 ते ओ उन्हा पर इल्जाम लागे ताई उन्हा री भाळ बिच बैठे रे थिये कि दिख्खण,ओ सब्त रे दिन उसजो ठीक करदा की नी। 3 उन्हा ने सुके हत्थ वाळे मणू जो बोलेया,"बिच मझाटे खडा हो। 4 ते उन्हा जो बोलेया,"क्या सब्त रे दिन भलाई करणा ठीक है या बुरा करणा,जान बचाणा या मारणा?"अपण ओ चुप रेया। 5 उन्हा ने उन्हेरे मन री सख्ति का उदास होई करी,उन्हा जो गुस्से कने चारो पास्से दिख्खेया,ते तिस मणू जो बोलेया,"अपणा हत्थ बध्हा।"उन्निये बध्हाया,ते उसेरा हत्थ खरा होइ गया। 6 तां फरीसी बाहर जाइ करी तिस्सि वेले हेरोदियां कने उसेरे खलाफ सलाह करणा लगे कि उन्ह जो किय्यां करिये।

### भीड़ रा यीशु जि रे पिच्चे- पिच्चे चलणा

7 यीशू जी अपणे चेलेयां कने झील पाससे चली गेय;ते गलील का इक्क बड्डि भीड़ उन्हा रे पिच्छे चली पेइ; 8 ते यहूदिया,ते यरुशलैम,ते इदूमिया,ते यरदन रे पार,ते सूर ते सैदा रे आस्से-पास्से का इक्क बड्डि भीड़ ए सूणी करी की ओ कदेय अनोखे काम्म करदा,उन्हेरे का आइ। 9 उन्हा ने अपणे चेलेयां जो बोलेया,"भीड़ री वजह कने इक्क छोटी किस्ती मेरे ताई तैयार रेह्य ताकी ओ मेरे जो दब्बि ना दैण।" 10 किजोकी उन्हा ने मते जणेया जो ठीक कितेया थीया,इस ताई जिन्ने लोक बमार थिये,उन्हा जो छुणे ताई उन्हा पराळे पैइ चले रे थिये। 11 बूरी आत्मा बी,जां उन्हा जो दिख्खदी थी,तं उन्हेरे सामणे पैइ जादी थी,ते चिंड मारी करी बोळ्दी थी कि तु परमेश्वर रा पुत्तर है; 12 अपण उन्हा ने उन्हेरे जो बडा बोलेया कि मेरे जो प्रकट मत करदे।

### बारा चेलेयां जो कम्म दितेया जाणा

13 फिरी ओ पहाड़ पर चडी गे,ते जिन्हेर जो ओ चाहदें थे उन्हेरे जो अपणे नेडे सद्देया;ते ओ उन्हेरे नेडे आए। 14 तां तिन्हा ने बारा मल्लुयां जो चुणेया कि से तिन्हेरे कने-कने रेह्,, ते से तिन्हा जो भेजे कि से परचार करण। 15 ते बूरी आत्मा कड्डणे रा हाक्क रख्खण। 16 ओ ऐ हिन: शमौन जिसेर ना उन्हा ने पतरस रखेया, 17 ते जब्दि रा पुत्तर याकूब ते याकूब रा भाई युहन्ना,जिन्हेरा नां उन्हा ने बूआनरगिस मतलब गर्जन या पुत्तर" रखा, 18 ते अत्रदियास,ते फिलिप्पुस, ते बरतुलमेय, ते मत्ती, ते थोमा, हलफई रा पुत्तर याकूब ते तदैय ते शमौन कनानी, 19 यहूदा इस्करयोती जिन्नि ए उन्हा जो पकड़वाई बी दितेया।

### यीशु जी ते बालजबूल

20 तां ओ घरे आए;ते इदेइ भीड़ कड्डी गेइ कि ओ रोडि बी नी खाई सके। 21 जां उन्हेरे रिस्तेदारां ने ए सुणेया,ते ओ उन्हा जो पकडने ताई निकळे;किजोकी ओ बोळदे थिये कि उन्हेरा दमाग ठिकाणे नी है। 22 शास्त्रि बी जेडे यरुशलैम का आए रे थिये ए बोळदे थे,"उसेरे बिच सैतान है,"ते "ओ बूरी आत्मा रे सरदार री मदद कने बूरी आत्मा जो कडदा। 23 इस ताई ओ उन्हेरे जो नेडे सद्दी करी उन्हेरे जो उदारणा बिच बोळणा लगेया,"सैतान किय्यां सैतान जो कड्डि सकदा? 24 जे अगर कुसकी राज बिच फूट पैइ जाओ,तां ओ राज किय्यां टिकी सकदा? 25 ते जे अगर कुसकी घर बिच फूट पैइ जाओ तां ओ घर किय्यां टिकी सकदा? 26 इस ताई अगर सैतान अपणा ही दुस्मण बणी करी अपणे बिच ही फूट पाए तां ओ किय्यां बणा रैइ सकदा?उसेरा ता खात्मा ही होइ जादां। 27 अपण कोइ मणू कुसी बलवान

मणू रे घरे घुसी करी उसेरा समान नि लुट्टि सकदा,जां तिकर ओ पैह्ले तिस बलवान जो बन्नि ना ले;तां तिसेरे घर जो लुट्टि लैणा। 28 "मै तुसां जो सच बोळ्दा कि मणू रे पुत्तर रे सारे पाप ते बुराई जे ओ करदे हिन,माफ कित्ति जाणी 29 अपण जे कोई पवित्र-आत्मा रे खलाफ बुराई करे,ओ कदी बी माफ नी कित्तेया जाणा:अपण ओ हमेशा रे पाप रा अपराधी होई जादां।" 30 किजोकी ओ ए कैहदे थे कि उस बिच बूरी-आत्मा है।

### यीशु जी री माँ ते भाई

31 तां उन्हा री माता ते भाई आए,ते बाह खड़ी करी उन्हा जो सद्दी लित्तेया। 32 भीड़ उन्हा रे नेडे-तेडे बैठी री थी,ते उन्हा ने उन्हेरे जो बोलेया,"दिख्खो तुसां री माता ते भाई बार तुसां जो तोपदे हिन।" 33 "उन्हा ने उन्हेरे ज जवाब दित्तेया,"मेरे माता ते मेरे भाई कुण हिन?" 34 ते उन्हा पर जे उन्हेरे नेडे-तेडे बैठे रे थिये,नजर फिरा करी बोलेया,"दिख्खो,मेरे माता ते मेरे भाई ए हिन। 35 "किजोकी जे कोइ परमेश्वर री इच्छा पर चलदे सैहई मेरा भाई,ते भैह्ल ते माता है।"

### बी बाणे वाळे इक्क म्हणु आ उदारण

4 ओ फिरी झील रे कनारे उपदेश दैणे लगेया ते ऐसी इक्क बड्डि भीड़ उन्हेरे नेडे इक्क होइ गेइ कि ओ झील बिच इक्क कस्ति पर चढी करी बेइ गेया,ते सारी भीड़ धरती पर झील रे कनारे खड़ी रेइ। 2 ते ओ उन्हा जो उदारणा बिच मती सारी गल्लां सिखाणा लगेया,ते अपणे उपदेश बिच उन्हा जो बोलेया, 3 सूणो! इक्क बोणे वाळा बी बोणे ताई निकळेया। 4 बोदें वेले थोडा रस्ते रे कनारे पेया ते पखेरुआं ने आई करी उन्हा जो चुग्गि लित्तेया। 5 थोडा पथरिली जमीन पर पैया जित्थे उसजो जादा मिट्टी नी मिली ते डुग्गि मिट्टि ना मिळणे री वजह कने तोळे उगी पैया, 6 ते जां सूज निकळेया तां फूकी गेया,तां जड ना पकडने री वजह कने सूकी गेया। 7 थोडा झाड़ीयां बिच पेया ते झाड़ीयां ने बढी करी उसजो दब्बि दित्तेया,ते ओ फळ नी लाया। 8 अपण थोडा खरी जमीन पर पेया,ते ओ उग्गेया ते बढी करी फळदायक होया;ते कोइ तीह गूणा,कोइ सादठ गूणा ते कोइ सौ गूणा फळ लाया।" 9 तां उन्हा ने,"जिसेरे का सूणने ताई कात्र हो ओ सूणी ले।"

### उदारण दसणे रा मकसद

10 जां ओ किल्ले रेइ गेय,तां उन्हेरे साथीयां ने उन्हा बारां समेत उन्हा का इन्हा उदारणा रे बारे बिच पुच्छेया। 11 उन्हा ने उन्हेरे जो बोलेया,"तुसां जो तां परमेश्वर रे राज रे रहस्य री समझ दित्ति गेइ री है,अपण बाह वाळ्यां ताई सारी गल्लां उदारणां बिच ही हूदीं। 12 इस ताई किजोकी ओ दिखदे होए दिख्खे अपण उन्हेरे जो पता ना लगे,ते सुणदे होए सुणे बी अपण ना समझे;इय्यां ना हो कि ओ बदली जाण ते माफ कित्ते जाण।"

### बी बाणे वाळे उदारण रा समजाया जाणा

13 फिरी उन्हा ने उन्हेरे जो बोलेया"क्या तूसी ए उदारण नी समजदे?तां फिरी होर उदारणां जो किय्यां समजगे? 14 बोणे वाळा वचन बोदां। 15 जे रस्ते रे कनारे रे हिन जित्थे वचन बोया जादां,ए ओ हिन कि जां उन्हा ने सुणेया,तां सैतान तिस्सि वेले आई करी वचन जो जे उन्हा बिच बोया गया थिया,चूकि लेई जादां। 16 तिय्यां इ जे पथरिली जमीन पर बोए जादें,ए ओ हिन जे वचन जो सुणी करी तिस्सि वेले खुसी कने अपणाई लिदें। 17 अपण अपणे अन्दर जड नी रखणे री वजह कने ओ थोडे ईइ रोजां ताई रैहदें;इसेरे बाद जां वचन री वजह कने उन्हा पर कळह या मुसीबत आन्दिं तां ओ झट इ ठोकर खादें। 18 जे झाड़ी बिच बोए गे ए ओ हिन जिन्हा ने वचन सुणेया, 19 ते ससांर री फिर,ते पैसे रा धोरखा,ते होर चिजां रा ळालच उन्हा बिच समाइ करी वचन जो दब्बि दिंदा ते ओ नाकामयाब रेइ जादां। 20 ते जे खरी जमीन बिच बोए गे,ए ओ हिन जे वचन सूणी करी अपणाई लिदें ते फळ लादें:कोइ तीह गूणा,कोइ सादठ गूणा ते कोइ सौ गूणा।

### दिये रा उदारण

" 21 उन्हा ने उन्हेरे जो बोलेया,"क्या दिये जो इस ताई लादें कि पैमाने(बर्तन)या मज्जें रे थल्ले रख्खेया जाए?क्या इस ताई नी कि दीवट पराळे रख्खेया जाए? 22 किजोकी कोइ चीज लूके री नी है,अपण इस ताई कि सामणे आइ जाए;ते ना किछ लूके रा है,अपण इस ताई है कि सामणे आइ जाए। 23 जे कुसकी रे सुणणे रे कात्र होन तां ओ सूणी ले।" 24 फिर उन्हा ने उन्हा जो बोलेया,"होसियार रेयो कि क्या सुणदे।जिस नाप कने तूसी नापदे उसी कने तुसां ताई बि नाप्पेया जाणा,ते तुसां जो जादा दित्तेया जाणा। 25 किजोकी जिसेरा का है उसजो दित्तेया जाणा;ते जिसका नी है,उसका ओ बी जे उसका है,लेइ लित्तेया जाणा।"

### उगणे वाळे बी रा उदारण

26 फिरी उन्हा ने बोलेया,"परमेश्वर रा राज इदेया है जियां कोइ मणू जमीन पर बीज सुट्टे, 27 ते रात्ति सोए ते भ्यागा उट्टि होए,ते ओ बीज इय्यां उगन ते इय्यां बधन कि उन्हा जो पता बी चळे। 28 धरती अपणे आप इ फळ उगादि,पैह्ले पोगंर,तां सिल्ले,ते सिल्ले बिच तेयार दाणा, 29 अपण जां दाणा पकी जादां,तां ओ तिस्सि वेले दराटी लादां,किजोकी बाड्डि आइ गइ।

### राई रे दाणे रा उदारण

" 30 फिरी उन्हा ने बोलेया,"असी परमेश्वर रे राज री मसाळ कुस कने देन,ते कूस उदारण कने उसदा बखाण करण? 31 ओ राई रे दाणे रे साई है:जां धरती बिच बोया जादां तां धरती रे सारेयां दाणेया का छोटा हूदां, 32 अपण जां बोया गेया,तां उग्गि करी सारे साग-पात का बडडा होइ जादां,ते उसदी इदेइ बड्डि डाळियां निकळीदी की आसमान रे पखेरु उसेरी छाँ बिच बसेरा करी सकदे।" 33 ओ उन्हा जो ईदेय मते उदारणा दस्सि-दस्सि करी उन्हेरी समझ रे हिसाब कने वचन सुणादां थिया, 34 ;ते बगेर उदारण बोले ओ उन्हा जो किछ बी नी बोळ्दा था;अपण किल्ले ओ अपणे खास चेलेयां जो सारी गल्लां रा मतलब दस्दा था।

### तुफान जो सातं करणा

35 तिस्सि दिन जां शाम होइ,तां उन्हा ने चेलेयां जो बोलेया,"आओ"असी पार चलदे।" 36 ते ओ भीड़ जो छड्डि करी जदेया ओ थिया,तियां इ उसजो कस्ति पर कन्ने लेइ चले;ते उसेरे कन्ने होर बी कस्तियां थी। 37 तां बड्डा तुफान आया,ते लैहरां कस्ति पर इत्ते तिकर लग्गि कि ओ पाणी कने भरी चले री थी। 38 अपण ओ अप्पु पिछळे हिस्से बिच गद्दी पराळे सुत्ते रा थिया।तां उन्हा ने उन्हेरे जो जगाइ करी उन्हा जो बोलेया,"हे गुरु,क्या तूसां जो फिर नी कि असी खत्म होणा लगे रे हिन?" 39 तां उन्हा ने उट्टि करी तुफान झिडकेया,ते पाणी जो बोलेया,"सातं रेह,रुकी जा!"ते आंधी रुकी गेइ ते बडा चैन होइ गेया; 40 ते उन्हा जो बोलेया,"तुसी किजो उरदे?क्या तूसां जो हल्ले तिकर भरोसा नी?" 41 ओ बडे जादा डरी गे ते आपस बिच बोळणा लगे,"ए कुण है कि आधीं ते पाणी बी इन्हा गल्ल मनदे?"

### बुरी आत्मा रे सताए म्हणु रा ठीक होणा

5 ओ झील रे पार गेरासेनियां रे देस बिच पुजे, 2 जां ओ कस्ति का उतरे तां तिस्सि वेले इक्क मणू जिसेरे बिच बूरी आत्मा थी,कबरां बिच का निकळि करी उन्हा जो मिलेया। 3 ओ कबरां बिच रेहदां था ते कोइ उसजो संगळ्ळां कने बी नी बन्नि सकदा थिया, 4 किजोकी ओ घडी-घडी बेडी ते संगळ्ळां कने बन्नेया गेया थिया,अपण उन्निये संगळ्ळां जो भन्नि दित्तेया ते बेडीयां रे टोटे-टोटे करी दित्ते थिये,ते कोइ उसजो बस अन्दर नी करी सकदा थिया। 5 ओ लगातार दिन-रात्ति कबरां ते पहाडियां बिच चिडां मारदा,ते अप्पु जो पथरां कनें जख्मि करदा थिया। 6 ओ यीशू जी जो दूर का ही का दिख्ख करी नहसेया,उन्हा जो प्रणाम कित्तेया, 7 ते जोर कने लेर मारी करी बोलेया,"हे यीशू जी,परमप्रधान परमेश्वर रे पुत्तर,मेरे जो तूसां कने क्या

काम्म?मैं तून्हां जो परमेश्वर री सौहू दिदां की मेरे जो दूखी मत करो।" 8 किजोकी उन्हां ने उसजो बोलेया थिया,"हे बूरी-आत्मा,इस मणू बिच का निकळी आ!" 9 उन्हां ने उसजो पुछ्छेया,"तेरा ना क्या है?"उन्निये उन्हां जो बोलेया,"मेरा ना सेना है;किजोकी असी मती सारी हिन।" 10 ते उन्निये उन्हां का बडी मिन्नत कित्ति,"असां जो इस देस का बाहू मत भेजदे।" 11 उत्ते पहाड पर सुअरां रा इक्क बड्डा धण चरेया करदा थिया। 12 उन्हां ने उन्हेरे का मिन्नत कित्ति,"असां जो उन्हां सुअरां बिच भेजी देयो कि असी उन्हेरे बिच जाण।" 13 अते उन्हां ने उन्हेरे जो हुक्म दित्तेया ते बूरी आत्मा निकळी करी सुअरां बिच बसी गेइ ते धण,जे कांइ दो हजार रा थिया,ढहढा का छाळ मारी झील बिच जाइ पेया। 14 उन्हेरे चराणे वाळे ने नहिस करी सैहर ते गरां बिच जाइ करी ए खबर सूणाई,ते जे होया थिया लोक उसजो दिख्खणा आए। 15 यीशू जी रे नेडे आइ करी ओ उसजो जिसेरे बिच बूरी-आत्मा थियां,मतलब जिसेरे बिच सेना बसी री थी,कपडे पाए रे ते सातीं कने बेड्डा रा दिख्ख करी डरी गेया। 16 दिख्खणे वाळेयां ने उसेरा,जिसेरे बिच बूरी-आत्मा थियां,ते सुअरां का पूरा हाल उन्हेरे जो बोलि दस्सेया। 17 तां से तिन्हेरे का छदें करी के बोळणा लगे कि हमारे जगह का चली जा। 18 जां से कस्ति पर चढणा लगे तां से जिसेरे बिच बूरी-आत्मा थियां तिन्हेरे छदें करणा लगेया,भेरेजो अपणे कने रैह्ला देयो।" 19 अपण तिन्हां ने तिसजो मना करी दित्ता,ते तिसजो बोलेया,'अपणे घरे जाई करी अपणे लोकां जो दस्स कि तेरे पर तरस खाई करी परमेश्वर ने तेरे ताई कदेय बड्डे कम्म कित्ते।' 20 से जाई करी दिकापुलिस बिच इस गल्ल दी चर्चा करणे लगेया कि यीशू जी ने मेरे ताई कदेय बड्डे कम्म कित्ते;ते सारे लोक हरान हुदें थिये।

### याईर री मरी री कुडी ते इक्क बमा र जनानी

21 जां यीशू जी फिरी कस्ति पर पार गे,तां इक्क बड्डि भीड तिन्हेरे का कड्डि गी। से झील रे नेडे ई थिये कि 22 याईर ना रे देहरे रे सरदारां बिच का इक्क आया,ते तिन्हेरे जो दिख्ख करी तिन्हेरे पैरां पर पेइ गेया, 23 ते ए बोलि करी तिन्हेरे बडे छदें कित्ते,"मेरी हलकी कुडी मरणे वाळी है: तुसी आई तिसरे पर हत्थ रख्खो की से खरी होई करी जिन्दि रे।" 24 तां से फिरी तिन्हां कने चले;ते बड्डि भीड तिन्हेरे पिच्छे चली पेइ,इत्ते तिकर की लोक तिन्हेरे पराले पैया करदे थिये। 25 इक्क जनानी थी,जिसजो बारां सालां का खुन चलने री बमारी थी। 26 तिनि ए बडे वैदां का ईलाज कराया,ते अपणी सारी जायदाद खर्च करणे पर बी तिसजो किछ बी फेदा नी होया थिया,अपण होर बी बमार होइ गेई थी। 27 से यीशू जी री मसहुरी सुणी करी भीड बिच तिन्हेरे पिच्छे का आई ते तिन्हेरे कपडेया जो छुई लेया, 28 किजोकी से बोलदी थी,'जे ए तिन्हेरे कपडे ई छुई लिहिंग तां ठीक होई जाणा।' 29 ते तिस्सि वेले तिसेरा खुन निकलणा बंद होई गेया,ते तिन्हां ने अपणी जिस्म बिच जाणी लेया कि मैं तिस बमारी का ठीक होई गी री है। 30 यीशू जी ने इक्क दम अपणे बिच ए जाणी लेया की मेरे बिच का ताकत निकळी,ते भीड बिच पिच्छे फिरी करी पुछ्छेया कि मेरे कपडे कुनिये छुए? 31 तिन्हेरे चेलेयां ने तिन्हां जो बोलेया,"तुसी दिखदे हिन की भीड तुसां पर पैया करदी है,ते तुसी बोलदे कि मेरे जो कुसने छुएया?; 32 तां तिन्हां ने तिसजो दिखणे ताई जिनि ए कम्म कित्ता थिया,चारां पास्से नजर फेरी। 33 तां से जनानी ए जाणी करी की मेरे कने कदेया खरा होया,डरदी ते कबंदी होई आई,ते तिन्हेरे पैरां पर पैई करी तिन्हां कने सारा हाल सच-सच बोलि दित्ता। 34 तिन्हां ने तिसजो बोलेया,"कुडिए तेरे भरोसे ने तेरे जो ठीक कित्ता:राजी खुसी जा,ते अपणी इस बमारी का बची रेह।" 35 से हल्ले ए बोलेया ई करदे थिये कि देहरे रे सरदार रे घरे रे लोकां ने आई करी बोलेया,"तेरी कुडी ता मरी गी, अवे गुरु जी जो किजो तमं करया करदा है?; 36 जे गल्ल से बोलेया करदे थिये तिसजो यीशू जि ने अणसुणा करी के,देहरे रे सरदार जो बोलेया,"मत डर; सिर्फ भरोसा रख।" 37 ते तिन्हां ने पतरस ते याकूब ते याकूब रे भाई युहन्ना जो छड्डि करी होर कुसकी जो अपणे कन्ने आणा नी दित्ता। 38 देहरे रे सरदार रे घरे पुज्जि करी,तिन्हां ने लोकां जो बडा० रोहदें ते चिडां मारदे दिख्खेया। 39 तां तिन्हां ने अन्दर जाई करी तिन्हेरे जो बोलेया,"तुसी किजो हल्ला मचादें ते रोदें हिन? कुडी मरी नी,अपण सोया करदी है।" 40 से तिन्हेरा मजाक

उडाणा लगे अपण तिन्हां ने सारेयां जो कड्डि करी कुडी रे माँ-प्यो ते अपणे साथियां कने अन्दर,जित्ते कुडी पेई री थी गे। 41 ते कुडी रा हत्थ पकडी करी तिसजो बोलेया,"तलिता कुमी;जिसेरा मतलब है,हे कुडी,मैं तेरे बोलदा,उठ; 42 ते कुडी तिस्सि वेले उठी करी चलने फिरणे लग्गि;किजोकी से बारा साले री थी। इस पर लोक बडे हरान होए। 43 फिरी तिन्हां ने तिन्हेरे बडे समझाई की हुक्म दित्ता कि ए गल्ल कुसकी जो पता ना लगे ते बोलेया,"इसजो किछ खाणे जो देयो।"

### नासरत बिच यीशू जी रा अनादर

6 उत्ते का निकळी करी ओ अपणे देस बिच आया,ते उन्हेरे चेले बी उन्हेरे पिच्छे गे। 2 सब्त रे दिन ओ अराधनालय बिच भाषण दैणे लगेया,ते मते सारे लोक सूणी करी हैरान होए ते बोलणा लगे,"इन्हां जो ए गल्लां कुते का आई गई?ए कदेइ समझ है जे इन्हां जो दित्ति गेइ री है?कदेय सक्ति रे काम्म इन्हां रे हाथ्थ कने दिसदे? 3 क्या ए ओ ही मिस्त्रि नी,जे मरीयम रा पुत्तर,ते याकूब,योसेस,यहूदा,ते शमौन रा भाई है?क्या इसदी भैह्ले इत्ते असां बिच नी रैहिनद?"इस ताई उन्हां ने उन्हेरे बारे बिच ठोकर खाई। 4 यीशू जी ने उन्हेरे जो बोलेया,"भविष्यद्वक्ता री अपणे देस,ते अपणे रिस्तेदारां ते अपणे घर जो छड्डि करी होर कुते बी बेज्जती नी हुदीं।" 5 ओ उत्ते कोई ताकत रा काम्म नी करी सकेया,बस थोड़े जणे बिमारा पर हाथ्थ रख्ख करी उन्हेरे जो ठीक कित्तेया। 6 ते उन्हां जो उन्हेरे भरोसे री कमी पर हैरानी होई,ते ओ चारो पास्से रे ग्रॉ बिच भाषण दिदां फिरदा रैया।

### बारा चेलेयां जो भेजणा

7 उन्हां ने बारहां जो अपणे नेडे सट्टेया ते उन्हेरे जोदो-दो करी के भेजणा लगे;ते उन्नहा जो बूरी-आत्मा पर हक्क दित्तेया। 8 उन्हां ने उन्हेरे जो हुक्म दित्तेया,"रस्ते ताई सोठी जो छड्डि करी होर किछ मत लेयो;ना ता रोह्दि,नाआ ता झोल्लि,ना ता बटुए बिच पैसे, 9 अपण जुटे पाओ ते दो-दो कूरते मत पाओ।" 10 ते उन्हां ने उन्हेरे जो बोलेया,"जित्ते कुथकी तूसी कुसकी घर बिच उतरो,तां जां तिकर उत्तते का निकळी ना जाओ तां तिकर तिस्सि घर बिच ही ठैहरे रेयो। 11 जिस जगह रे लोक तूसां जो ना अपनाण ते तूसां री ना सूणण,उत्ते का जादें ही अपणे तळियां री धूड झाड सूट्टो ताकी तिन्हां पर ग्वाइ हो।" 12 तां उन्हां ने जाई करी प्रचार कित्तेया कि मन फराओ, 13 ते मती सारी बूरी-आत्मा जो कड्डेया,ते मते सारे बमारां पर तेळ मळी करी तिन्हां जो ठीक कित्तेया।

### यूहन्ना बपतिस्मा दैणे वाळे रा खुन होणा

14 हेरोदेस राजे ने बी उन्हेरी गल्लां सूणी,किजोकी उन्हेरा नां फेळि गे रा थिया,ते उन्निये बोलेया,"यूहन्ना बपतिस्मा दैणा वाळा मरेयां बिच का जिन्दा होई गे रा है,इस ताई उन्हेरे का ए सक्ति रे काम्म दिसदे।" 15 होर लोकां ने बोलेया,"ए एलियाह है।" अपण किछ होर लोकां ने बोलेया,"भविष्यद्वक्ता या भविष्यद्वक्ता बिच का कुसकी इक्क साई है।" 16 हेरोदेस ने सुणी करी बोलेया,"जिस यूहन्ना रा सर मैं कटवाया थिया,ओ ही जिन्दा होई गे रा है।" 17 हेरोदेस ने अपणे भाई फिलिप्पुस री लाडी हेरोदियास री वजह कने,जिस कने उन्निये ब्याह करी लित्तेया थिया लोकां जो भेजि करी यूहन्ना जो पकड़वाई करी जेलखन्ने बिच पूआई दित्तेया थिया 18 किजोकी यूहन्ना ने हेरोदेस जो बोलेया थिया,"अपणे भाई री लाडी जो रखणा तेरे जो ठीक नी है।" 19 इस ताई हेरोदियास उसका नफरत करदी थी ते ए चाहिद थी कि उसजो मरवाई रख्खे;अपण इय्यं ना होई सकेया, 20 किजोकी हेरोदेस यूहन्ना जो धर्मी ते पवित्र मणू समजी करी उसका डरदा थिया,ते उसजो बचाई रखदा थिया ते उसेरी गल्ल सूणी करी बडा डरदा थिया,अपण खूसी कने सूणदा थिया। 21 खरा मोक्का आया जां हेरोदेस ने अपणे जन्मदिन अपणे प्रधानां,सेनापती ते गलील रे बड्डे लोकां ताई धाम पाई। 22 तां हेरोदियास री कुडी अन्दर आई,ते नच्चि करी हेरोदेस जो ते उसेरे कन्ने बैह्ले वाळेयां जो खूस कित्तेया।तां राजे ने कुडी जो बोलेया,"तू जे चाहिद मेरे का मगं मैं तेरे जो दैणा।" 23 ते उसेरे कने कसम खाई,"मैं अपणे आद्रे राज तिकर जे किछ तैं

मेरे का मगंगा मैं तेरे जो दिग्गां।" 24 उन्निये बाहू जाई करी अपणी माँ का पुच्छेया, "मै क्या मगंगा?" ओ बोलि, "यूहन्ना बपतिस्मा दैणे वाळे रा सर।" 25 ओ तिस्सि वेळे राजे का अन्दर आई ते उसेरे का मिन्नत किति, "मै चाहिद कि तू अब्बे ही यूहन्ना बपतिस्मा दैणे वाळे रा सर इक्क थाळ बिच मेरे जो मगगाई दे।" 26 ता राजा बड़ा उदास होया, अपण अपणी कसम री वजह कने ते कन्ने बैहे वाळेया री वजह कने उसेरे जो टालणा नी चाह्या। 27 अते राजे ने तिस्सि वेळे इक्क सिपाई जो हुक्म देई करी भेजेया कि उसेरा सर कट्टि अणे। 28 उन्निये जेलखाने बिच जाई करी उसेरा सिर कट्टेया ते इक्क थाळ बिच रख्कि करी लाया ते कूड़ी जो दित्तेया, ते कूड़ी ने अपणी माँ जो दित्तेया। 29 ए सूणीकरी यूहन्ना रे चेले आए, ते उसेरी लाहस जो लेइ गे ते कबर बिच रख्खेया।

### चेलेयां रा वापस जाणा ते यीशु जी रा किल्ला रैहणा

30 चेलेयां ने यीशु जी रे नेडे कट्टि करी, जे किछ तिन्हा ने कित्तेया ते सिखाया थिया, सारा किछ उन्हा जो दस्सि दित्तेया। 31 उन्हा ने तिन्हा जो बोलेया, "तूसी अप्पु कुसकी किल्लि जगह बिच जाई करी आराम करो।" किजोकी मते लोक आदें-जादें थिये, ते उन्हेरे जो खाणे रा बी मोक्का नी मिल्लेया। 32 इस ताई ओ कस्ति पर चढ़ी करी किल्लि जगह पर अलग चली गेय।

### पाँज हजार म्हणुआं जो खुआणा

33 मतेयां ने उन्हेरे जो जादें दिख्खि करी पैहचाणी लिक्तेया, ते सारे सैहरां का कट्टे होई करी उते पैदल दौड़े ते उन्हेरे का पैहे पूजि गे। 34 उन्हा ने उतरी करी बड्डि भीड़ दिख्खि, ते तिन्हा पर तरस खाया, किजोकी ओ तिन्हा भैडुं साई थियां, जिन्हेरा कोई रखवाळा ना हो; ते ओ तिन्हेरे जो मती सारी गल्लां सिखाणा लगेया। 35 जां धिहाडि बड़ी ढळी गेइ, तां उन्हेरे चेले उन्हेरे का आई करी बोलणा लगे, "ए सुनसाण जगह है, ते धिहाडी बड़ी ढळी गे री है। 36 तिन्हेरे जो भेजि देयो कि चारो पास्से री ग्राँ बस्ति बिच जाई करी, अपणे ताई किछ खाणे जप खरिदी लेण।" 37 उन्हा ने जवाब दित्तेया, "तूसी ही उन्हेरे जो खाणे ताई देयो।" उन्हाने उन्हेरे जो बोलेया, "क्या असी सौ दिनार री रोट्टियां खरीदि लेण ते उन्हेरे जो खिलाण?" 38 उन्हाने उन्हेरे जो बोलेया, "जाई करी दिख्खो तूसां का किन्नि रोट्टियां हिन?" उन्हाने पता करी के बोलेया, "पाजं ते दो मछ्छियां बी।" 39 तां उन्हाने उन्हेरे जो हुक्म दित्तेया कि सारेयां जो हरी घा पराले पाँत-पाँत करी के बेठाई देयो। 40 ओ सौ-सौ ते पजां-पजां करी के पाँती-पाँती बैई गे। 41 उन्हा ने तिन्हा पाजं रोट्टिया जो ते दो मछ्छियां जो लिक्तेया, ते स्वर्ग पास्से दिख्खिकरी धन्यवाद कित्तेया, ते रोट्टियां तोडी तोडी करी चेलेयां जो दिदां गेय कि ओ लोक्कां जो देन, ते ओ मछ्छियां बी उन्हा सारेयां बिच बड्डि दित्ति। 42; सारे खाई करी रजि गे। 43 ते उन्हा ने टुकडेयां कने बाहा टोकरियां भरी करी चुक्कि, ते किछ मछ्छियां कने बी। 44 जिन्हाने रोट्टियां खाई ओ पाजं हजार आदमी थिये।

### यीशु जी रा पाणी पर चलना

45 तां उन्हा ने तिस्सि वेळे अपणे चेलेयां जो कस्ति पर चढ़ने ताई मजबूर कित्तेया कि ओ उन्हेरे का पैहे उस पार बैतसैदा जप चली जाण, जां तीकर ओ लोक्कां जो भेजण। 46 उन्हेरे जो भेजी करी ओ पहाड पर प्रार्थना करणे जो गे। 47 जां साजं हूई, तां कस्ति झील रे बिच थी, ते ओ किल्ले जमीन पर थिये। 48 जां उन्हा ने दिख्खेया कि ओ कस्ति चलादें-चलादें डरी गे रे हिन्न, किजोकी बिआर उन्हेरे पूठे पास्से रे थी, तां रात्ति रे चौथे पैहर रे नेडे ओ झील पर चलदे होए उन्हेरे नेडे आए; ते तिन्हेरे का आगे निकळी जाणा चाहदें थिये। 49; अपण तिन्हा ने उन्हेरे जो झील पर चलदे दिख्खिकरी समजेया कि भूत है, ते चिडां मारणा लगे; 50 किजोकी सारे उन्हा जो दिख्खिकरी डरी गे रे थिये। अपण उन्हा ने तिस्सि वेळे तिन्हेरे कने गल्लां किति ते बोलेया, "हिम्मत रख्खो: मैं है: डरो मत!" 51 तां ओ तिन्हेरे नेडे कस्ति पर आया, ते हवा रूकी गेइ: ते ओ बडे ही हैरान होणा लगे। 52 ओ तिन्हा रोट्टियां रे बारे बिच नी समजे थिये, किजोकी उन्हेरे मन सख्त होई गे रे थिये।

### गन्नेसरत बिच बमारां जो ठीक करणा

53 ओ पार उतरी करी गन्नेसरत जो पुजे, ते कस्ति कनारे पर लाई। 54 जां ओ कस्ति का उतरे, तां लोक तिस्सि उन्हेरे जो पैहचाणी करी, 55 नेडे-तेडे रे सारे देसां बिच दौड़े ते बमारां जो मजेयां पर पाई करी जिक्ते-जिक्ते खबर मिल्लि कि ओ है; उक्ते-उक्ते लेई फिरे। 56 ते जिक्ते कुथकी ओ ग्राँ, सैहर, या बस्तियां बिच जादां थिया, लोक बमारां जो बजारां बिच रख्खि करी उन्हा का मिन्नत करदे थिये कि ओ उन्हा जो अपणे कपडे रे पल्ले जो ही छुई लैणा देन: ते जिन्ने उन्हा जो छूदें थे, सारे ठीक होई जादें थिये।

### परम्परा पर चलने पर सवाल

7 ताँ फरीसी अते किच्छ शास्त्री जेहडे कि यरुशलेम जो आए थिये, तिसेरे का इकठ्ठे होये, 2 ते तिन्हा ने तिसेरे किच्छ चेलेयां जो भिट्टे अते बगेर हथ्थ धोत्ते रे रोटी खान्दे दिखेया- 3 किजोकि फरीसी अते सब यहूदी, पूरखां रे रिवाजा पर चलदे थिये, अते जाँ ताँई खरे कने हथ्थ पैर नी धोई लेन ताँ ताँई नी खान्दे थिये; 4 ते बजार का आईकरी, जाँ ताँई न्हाई ना लेन, ताँ ताँई नी खान्दे थिये, अते बड़ी सारी होर गल्लाँ हिन, जे तिन्हेरे का मनणे ताँई पुजाई गेरी हिन, जिय्याँ डुन्ने, ते लोट्टे, अते ताँबे रे भान्डेयाँ जो धुणा-माँजणा। 5 इधेरे ताँई उन्हा फरीसियाँ अते शास्त्रियाँ ने तिन्हा का पूच्छेया, "तेरे चेले किजो पूरखाँ रे रिवाजा पर नी चलदे, ते बगेर हथ्थ धोये रे खान्दे हिन?" 6 यीशु जी ने तिन्हा जो बोलेया, "यथायाह ने तुसाँ पखंडिया रे बारे बिच बड़ी खरी भविष्यवाणी कित्ती है, जिय्याँ लिखेरा है: 'एह मल्लू हाँठाँ कने ता मेरी इज्जत करदे हिन, अपण डुन्हेरा मन मेरे का दुर हिन। 7 एह बेकार मेरी भक्ति करदे हिन, किजोकि मल्लूआँ रे हुकमा जो सिद्धाता रे रुप बिच सिखान्दे हिन।' किजोकि तुसी परमेश्वर रे हुकमा जो टाळी करी मल्लूआँ रे हुकमाँ जो मनदे हिन।" 8 तुसी परमेश्वर रे हुकमाँ जो इक पास्से रख्खी दित्ते रा ए अते मल्लूआँ रे रिवाजां रा सहारा लेया करदे हिन। 9 यीशु जी ने तिन्हा जो बोलेया, "तुसी अपणे रीति रिवाजा जो मनणे ताँई परमेश्वर रे हुकमा जो किन्ने खरे तरिके कने टाळी दिन्दे। 10 किजोकि मूसा ने बोलेया है, 'अपणे प्यो अते अपणी माँ री इज्जत करो, ते 'जे कोई माँ प्यो जो बुरा बोले, से जरूर मारी दित्तेया जाये।' 11 अपण तुसा बोलदे कि जे कोई अपणे प्यो अते माँ जो बोले, 'जे किच्छ तिजो मेरे का जे फायदा मिल्ली सकदा थिया, से परमेश्वर जो अर्पित होई गेरा है मतलब प्रण होई गेरा है।' 12 ता तुसी तिस जो तिसेरे प्यो अते तिसेरी माँ जो किच्छ सेवा करणे नी दिन्दे। 13 ईय्याँ ई तुसी अपणे रिवाजा कने, जिन्हा जो तुसी ने बणाये रा है, परमेश्वर रा वचन टाळी दिन्दे; ते इदेह इदेह बडे सारे कम्म हिन जे तुसी करदे हिन।"

### म्हणु जो बिगाडणे वाळी गल्लां

14 ताँ तिन्हा ने मल्लूआँ जो अपणे का सहेया अते बोलेया, तुसी सब मेरी सुणो, अते समझो। 15 इदेयी कोई चीज नी है जे मल्लू रे न्दर बाहर का आईकरी तिस जो भिट्टा करन, अपण जे चीजाँ मल्लू रे अन्दर का निकलदी, सेहई तिस जो भिट्टा करदी। 16 (जे कुसकी रे कात्र हो, तां सुणी ले।) 17 जाँ से भीड़ का होई करी घरे जो गया ताँ तिन्हेरे चेलेयाँ ने इस उदारण रे बारे बिच तिन्हा का पूच्छेया। 18 यीशु जी ने उन्हा जो बोलेया, "कै तुसी बि इदेह ना समझ हिन? कै तुसी नी समझदे कि जे चीजाँ बाहर का मल्लू रे अन्दर जान्दी हिन, से तिस जो भिट्टा नी करी सकदी? 19 किजोकि से मना बिच नी, अपण पेटा बिच जान्दी हिन अते संडास बिच का निकळी जान्दी?" इस तरिके कने सारी खाणे वाळी चीजाँ सुच्ची हिन। 20 फिरी तिन्हा ने बोलेया, "जेहड़ा मल्लूआँ बिच का निकलदा, सेहई मल्लूआँ जो भिट्टा करदा। 21 किजोकि अन्दर का बल्कि मल्लू रे मन का, बुरी बुरी गल्लाँ, ब्याहतिरी कने व्यभिचार, चोरी, खून करणा, बगेर ब्याहतिरी जनानी कने व्यभिचार 22 लालच, बुरा बोल-चाल, धोखा दैणा, लुचपन, गन्दी नजर, ईश्वरिय बेजती करणा, घमंड, अते बेफकुफी निकलदी। 23 एह सब गल्लाँ अन्दर का ई निकलदी अते मल्लूआँ जो भिट्टा करदी हिन।"

### सुरुफिनीकी जाति री इक्क जनानी रा विस्वास

24 फिरी से तित्ते का उठीकरी सूर अते सैदा रे देसा बिच आया; अते इक घरे बिच आये अते चान्दा थिये कि कोई नी जानण; अपण से लुक्की नी सके। 25 अते झट ई इक जनानी जिसेरी हल्की कुड़ी बिच भिड्डी आत्मा थी, तिन्हेरी गल्लौ सुणी करी आई अते तिन्हेरे पैरा बिच पेई गई। 26 एह यूनानी अते सुरुफिनीकी जाति री थी, तिन्हे यीशु जी रे छन्दे कित्ते की कि से तिन्हेरी कुड़ी बिच का बुरी आत्मा निकाली दें। 27 तिन्हा ने तिस जो बोलेया, "पैले मुन्डेयाँ जो रजणा दे, किजोकि मुन्डेयाँ री रोटी लेइकरी कुतेंयाँ रे मुहागर पाणा ठीक नी है।" 28 तिनिये तिन्हा जो जवाब दित्तेया, "सच्च है प्रभु। ताँ बी कुते बी ता मेज रे थल्ले निक्केयाँ री रोटी रा चुरा चारा खाई लिन्दे।" 29 तिन्हा ने तिस जो बोलेया, "इस गल्लौ री वजाह कने जा; अते बुरी आत्मा तेरी कुड़ी बिच का निकळी गई।" 30 तिनि एअपणे घरे जाईकरी दिखेया कि कुड़ी तियोड़ी पर पैरी थी अते बुरी आत्मा निकळी गेरी थी।

### टोणे ते हकले म्हणुआं रा ठीक होणा

31 फिरी से सूर अते सैदा रे देसाँ का निकळी करी दिकापुलिस का होईकरी गलील री झील पर पुजे। 32 ताँ मल्लुआँ ने इक टोणे जो जेहडा कि खरखा बि थिय्या तिन्हेरे का लियाईकरी तिन्हेरे छन्दे कित्ते कि अपणा हत्थ तिस पर रखन। 33 ताँ से तिस जो भीड़ रे मझाटे का बखरे लेई गे, अते अपणी उंगळियाँ तिसरे कन्ना बिच पाई, अते थूक्की करी तिसरी जीब जो छुत्तेया; 34 अते स्वर्ग रे पास्से दिखी करी साह भरे, अते तिस जो बोलेया, "इफ्तह!" मतलब "खूली जा!" 35 तिसरे कान्न खूली गे अते तिसरी जीब री गन्ड बी खूली गई अते से साफ-साफ बोलणे लगेया। 36 ताँ तिन्हा ने तिस जो समझाया कि कुसकी कने बी मत बोलदा; अपण जिन्ना तिन्हा ने तिस जो समझाया थिय्या तिन्हा ई से होर प्रचार करणे लगेया। 37 से बड़ा ई हैरान होईकरी बोलणे लगेया, "तिन्हा ने जे किच्छ कित्तेया सब खरा कित्तेया है; से टोणेयाँ जो सुनणे री, अते जल्लेयाँ जो बोलणे री शक्ति दिन्दे हिन।"

### चार हजार म्हणुआं जो खुआणा

8 उन्हा रोजाँ बिच फिरी जां बड्डी भीड़ जमा होई, अते तिन्हा का किच्छ खाणे जो नी थिया, ता यीशु जी ने चेल्लेयाँ जो सद्दी करी तिन्हा जो बोलेया, 2 मिन्जो इस भीड़ पर तरस आया करदा है, किजोकि एह त्रै रोजाँ का बराबर मेरे कने हिन, अते इन्हा का किच्छ बी खाणे जो नी है। 3 जे मैं इन्हा जो भूरवा घरे भेजी देयाँ, ता रस्ते बिच थकी करी रेई जाणा; किजोकि इन्हा बिच का किच्छ ता दूर का आये रे हिन।" 4 तिन्हेरे चेल्लेयाँ ने तिन्हा जवाब दित्तेया, "इत्ते बणा बिच झिनी रोटी कोई कुदे का लियाये की एह रजी जान?" 5 तिन्हा ने उन्हा जो पूछेया, "तुम्हारे का किन्नी रोटी हिन?" तिन्हा ने बोलेया, "सत्त।" 6 ता तिन्हा ने मल्लुआँ जो भुईयाँ बैणे रा हुकूम दित्तेया, ते सत्त रोटियाँ लेई अते सुकर करी के तोड़ी, ते अपणे चेल्लेयाँ जो दिदें गे कि से तिन्हेरे अग्रे रखन, ते तिन्हा मल्लुआँ रे अग्रे बंडी दित्ती। 7 तिन्हेरा का थोड़ी करी हल्कियाँ मछियाँ बी थियाँ; तिन्हा ने सुकर करी के तिन्हा जो वी मल्लुआँ रे अग्रे रखणे रा हुकूम दित्तेया। 8 से खाई करी रजी गे ते चेल्लेयाँ ने बचे रे टुकडेयाँ कने सत्त भरे रे टोकरे चुक्के। 9 ते मल्लु चार हजार रे करीब थिये; ताँ तिन्हा ने उन्हा जो भेजी दित्तेया, 10 ते से झट अपणे चेल्लेयाँ कने किशती पर चढी करी दलमूनता प्रदेस जो चली गे।

### फरीसिया रा स्वर्ग री निसानी री मागं करणा

11 फिरी फरीसी आईकरी तिन्हा कने बैहस करणा लगे, ते तिन्हा जो परखणे ताँ उन्हा का कोई स्वर्गिय निशानी मंगी। 12 तिन्हा ने अपणी आत्मा बिच साह भरी करी बोलेया, "इस जुग रे मल्लु किजो निशानी तोपेया करदे हिन? मैं तुसा सच्च बोलदा कि इस जुग रे मल्लुआँ जो कोई निशानी नी दित्ती जाणी।" 13 अते से तिन्हा जो छड्डी करी फिरी किशती पर चढी करी पार चली गे।

### फरीसियां ते हेरोदेस रा खमीर

14 चेल्ले रोटी लेणा भूली गेरे थिये, ते किशती बिच तिन्हेरे का इक ई रोटी थी। 15 तिन्हा ने उन्हा जो समझाया, "दिखो, फरिसियाँ री तराक्क अते हेरोदेस री तराक्क का सावधान रेयो।" 16 से अपु-मिते सोच-विचार करी के बोलणा, "असा का रोटी नी है।" 17 एह जाणी करी यीशु जी ने तिन्हा जो बोलेया, "तुसा किजो अपु-मिते सोच-विचार करेया करदे हिन कि असा का रोटी नी है? 18 कै हाखी हुन्दे वी नी दिखदे, अते कान्न हुन्दे वी नी सुणदे? कै तुम्हारे जो चेता नी है 19 कि जाँ मैं पंज हजार ताँई पंज रोटियाँ तोडियाँ थी ता तुसा बचे रे टुकडेयाँ कने किन्ने टोकरे भरी के चुक्के थिये?" तिन्हा ने बोलेया, "बारा टोकरियाँ।" 20 ते जां चार हजार ताँई सत्त रोटियाँ थी ता तुसा बचे रे टुकडेयाँ कने किन्ने टोकरे भरी के चुक्के थिये?" तिन्हा ने उन्हा जो बोलेया, "सत्त टोकरे।" 21 यीशु जी उन्हा जो बोलेया, "कै तुसा हल्ले ताँई नी समझे?"

### बैतसैदा बिच इक्क अन्ने जो ठीक करणा

22 से बैतसैदा बिच आये, अते मल्लु इक अहन्ने जो तिन्हा का लेई आया अते तिन्हेरे छंदे कित्ते कि तिस जो छुन। 23 से तिस अहन्ने रा हत्थ पकड़ी करी ग्रां का बार लेई आये, अते तिसरी हाख्खी पर थुकी करी तिस पर हत्थ रखे, अते तिस जो पूछेया, "कै तिजो किच्छ लिबदा है?" 24 तिन्हे हाखी चुकी करी बोलेया, "मिन्जो मल्लु लिबदे हिन; से चलदे बुटेयाँ साई लिबेया करदे हिन।" 25 ता तिन्हा ने दुबारा तिसरी हाख्खी पर हत्थ रखे, अते अहन्ने ने ध्यान कने दिखेया। से ठीक होई गया, ते सब किच्छ साफ-साफ लिबणे लगेया। 26 तिन्हा ने एह बोली करी घरे भेजेया, "इस ग्राँ बिच पैर वी मत रखदा।"

### पतरस रा यीशु जी जो मसीह मनणा

27 यीशु जी अते तिन्हेरे चेल्ले कैसरिया फिलप्पी रे ग्राँ जो चली गे। रस्ते बिच तिन्हा ने अपणे चेल्लेयाँ का पूछेया, "मल्लु मिन्जो कै बोलदे हिन?" 28 तिन्हा ने जवाब दित्तेया, "यहून्ना बपतिस्मा देणेवाळा, अपण किच्छ एलियाह ते कोई किच्छ भविष्यवक्ता बिच का इक वी बोलदे हिन।" 29 तिन्हा ने उन्हा जो पूछेया, "अपण तुसा मिन्जो कै बोलदे?" पतरस ने तिन्हा जो जवाब दित्तेया, "तुसी मसीह हिन।" 30 ता तिन्हा ने उन्हा जो समझाई करी बोलेया कि मेरे बारे बिच एह कुसकी कने मत बोलदे।

### अपणे मरणे रे बारे बिच यीशु जी री भविष्यवाणी

31 ताँ से तिन्हा जो सिखाणे लगे कि मल्लु रे पुत्तर जरूरी है कि से बडे दुःख उठान, ते यहूदी मल्लुआँ रे पुरखाँ, परोहताँ रे प्रधाना, अते शास्त्री तिस जो नापसन्द करी के मारी देन, अते से तिजो रोझे जिन्दा होई जान। 32 तिन्हा ने एह गल उन्हा जो साफ-साफ बोली दित्ती। अपण पतरस तिन्हा जो अलग ले जाई करी बकणे लगेया, 33 अपण तिन्हा ने मुडी करी अपणे चेल्लेयाँ पास्से दिखेया, अते पतरस जो झिडकी करी बोलेया, "ओ शैतान, मेरे सामणे का दूर होई जा; किजोकि तू परमेश्वर री गलां पर नी, अपण मल्लुआँ री गलां पर मन लगादा।"

### यीशु जी रे पिच्चे चलणे रा मतलब

34 तिन्हा भीड़ जो अपणे चेल्लेयाँ समेत अपणे का सद्दी करी तिन्हा जो बोलेया, जे कोई मेरे पीछे आणा चान्दा, से अपणे आप्णे का इन्कार करी के अपणी सूली चुकी करी मेरे पीछे होई लेन। 35 किजोकि जे कोई अपणे प्राण बचाणा जो बचाणे री इच्छा रखणा तिन्हे तिस जो खोई दैणा, अपण जे कोई मेरे वजह कने अते शुभ-भसेख ताँई अपणे प्राण खोगाँ, तिन्हे तिस जो बचाणा। 36 जे मल्लु सारी दुनिया जो पाणे ताँई अपणे प्राण जो नुकसान पुजान, ता तिस जो कै फायदा होणा? 37 मल्लु अपणे प्राण रे बुट्टे कै दिंगा? 38 जे कोई इस व्यभिचारी अते पापी जाति रे बीच मेरे का ते मेरी गलां का लजांगा, मल्लु

रे पुत्र ने वी जाँ तिस ने पवित्र दूताँ रे कने अते अपणे पिता री महिमा समेत आणा, ताँ तिस का लजाणा।”

9 यीशु जी ने उन्हा जो बोलेया, “मैं तुसाँ कने सच्च सच्च बोलदा कि जे इत्ते खडे हिन, तिन्हा बिच कोई-कोई इदेह हिन, कि जाँ ताँई परमेश्वर रे राज्य जो शक्ति समेत आंदा नी दिखी लिंदे, ताँ ताँई मौत रा स्वाद नी चखणा।”

### यीशु जी रा बदलणा

2 छै रोजाँ बाद यीशु जी ने पतरस, याकूब अते यहून्ना जो कने लेया, अते कल्ले बिच कुसकी ऊँचे पाहड़ बिच लेई गे। तित्ते तिन्हेरे सामणे तिन्हेरा रुप बदली गया, 3 अते तिन्हेरे कपडे बडे चमकणे लगे जियाँ बर्फ हो, धरती पर कोई धोबी बी तिय्याँ चिट्टा नी करी सकदा। 4 ते तिन्हा जो मूसा अते एलिय्याह लिबे, से यीशु जी कने गल्लाँ करेया करदे थिये। 5 पतरस ने यीशु जी जो बोलेया, “ओ रब्बी, म्हारा ईत्ते रैणा ठीक है: इधेरे ताँई असी त्रै डेरे बणादे; इक तुम्हारे ताँई, इक मूसा ताँई, अते इक एलिय्याह ताँई।” 6 किजोकि से नी जाणदा थिय्या कि कै जवाब देयाँ, इधेरे ताँई कि से बडे डरी गेरे थिये। 7 ताँ इक बदल ने तिन्हा जो घेरी लेया, अते तिस बदल बिच का इक अवाज आई, “एह मेरा प्यारा पुत्र है, इसेरी सुणो।” 8 ताँ तिन्हा ने इकदम चाँ पास्से नजर फेरी, ते यीशु जो छड्डी अपणे कने होर कुसकी जो नी दिखेया। 9 पाहड़ का थल्ले उतरदे बेल्ले तिन्हा ने उन्हा जो हुकम दित्तेया कि जाँ ताँई मल्लू रा पुत्र मरे रेयाँ बिच का जिन्दा नी होई जान्दा, ताँ ताँई जे किच्छ तुसी ने दिखेया से कुसकी कने मत बोलदे। 10 तिन्हा ने इस गल्ल जो चेत्ता रखेया; अते अप्पु मिते बैहस करणे लगे कि, “मरे रेयाँ बिच का जिन्दा होई जाणे रा कै मतलब है?” 11 ते तिन्हा ने उन्हा जो पूछेया, शास्त्री किजो बोलदे हिन कि, एलिय्याह रा पैल्ले आणा जरूरी है?” 12 यीशु जी ने उन्हा जो जवाब दित्तेया, एलिय्याह ने सच्ची ई पैल्ले आईकरी सब किच्छ सुधारणा, अपण मल्लू रे पुत्र रे बारे बिच एह किजो लिखे रा है कि तिन्हेरे बडे दुख उठाणे हिन, ते अपमानिता बिच गिणेया जाणा? 13 अपण मैं तुम्हारे जो बोलदा कि, एलिय्याह ता आई गेरा है, ते जिज्याँ तिसरे बारे बिच लिखेरा है, तिन्हा ने जे चाया तिसरे कने कित्तेया।”

### बुरी आत्मा रे सताए मुडें जो ठीक करणा

14 ताँ से चेल्लेयाँ रे नेडे आये, ता दिखेया कि तिन्हेरे चाँ पास्से बड़ी भीड लगेरी थी, अते शास्त्री तिन्हा कने बैहस करेया करदे हिन। 15 तिन्हा जो दिखदे ई सब बड़ी हैरानी करणा लगे, अते तिन्हेरे का दौड़ी करी तिन्हा जो नमस्ते किती। 16 यीशु जी ने उन्हा जो पूछेया, “तुसी इन्हा कने कै बैहस करेया करदे हिन?” 17 भीड मझाटे का इक जणे ने जवाब दित्तेया, “ओ गुरू, मैं अपणे पुत्र जो, जिस बिच जल्ली आत्मा है, तुम्हारे का लियाया थिय्या। 18 जित्ते कुते बी पकड़दी, तित्ते ई पटकी दिन्दी: अते मूहाँ झग्ग भरीह आन्दा, अते दान्द पीन्दा, अते कमजोर हुन्दा चले रा है। मैं तुम्हारे चेल्लेयाँ जो बोलेया कि से तिस जो निकाली देयो, अपण से निकाली नी पाये।” 19 एह सुणी करी तिन्हा ने उस जो जवाब देईकरी बोलेया, “ओ अविश्वासी पीढी, मैं कधाडी ताँई तुम्हारे कने रैल्ला? ते कधाडी ताँई तुम्हारी सैणी? तिस जो मेरे का लेई आओ।” 20 ताँ से तिस जो तिन्हेरे का लेई आये: अते जाँ तिन्हा ने तिस जो दिखेया, ता तिस आत्मा ने झट ई तिस जो मरोड्या, अते से भुईयाँ पेई गया, ते मूहाँ का झग्ग कडदे लिपटणियाँ खाणे लगेया। 21 तिन्हा ने तिसरे प्यो जो पूछेया, इसेरी एह हालत कब का है?” तिन्हेरे बोलेया, “बचपन का। 22 तिनि ए इस जो मुकाणे ताँई कदी अग ते कदी पाणी बिच सुट्टेया; अपण जे तुसी किच्छ करी सकदे, ता असाँ पर तरस खाई करी म्हारे पर मेहरबानी करो।” 23 यीशु जी ने तिस जो बोलेया, “जे तू करी सकदा? एह कुण गल्ल है! विस्वास करणे वाळे ताँई सब किच्छ होई सकदा।” 24 तिन्हेरे प्यो ने झट छन्दे-मिनता करी के बोलेया, “ओ प्रभु, मैं विस्वास करदा, मेरे अविश्वास रा कोई ईलाज करो।” 25 जाँ यीशु जी ने दिखेया कि मल्लू दौड़ी करी भीड लगाया करदे हिन, ता तिन्हा ने भिड्डी आत्मा जो एह बोली करी झिड़केया, “ओ जल्ली अते टोणी आत्मा, मैं तिजो हूकुम दिन्दा, इस बिच का निकली का आ, अते इस बिच

फिरी कदी बी मत जान्दी।” 26 ता से लैरा मारदी अते तिस जो बड़ा मरोडी करी, निकली आई, अते निक्का अद मरा जदेया होई गया, इत्ते तक मल्लू बोलणा लगे कि से मरी गया। 27 अपण यीशु जी ने तिसेरा हत्थ पकड़ी करी तिस जो उठाया, अते से खड़ा होई गया। 28 जाँ से घरे अन्दर आये, ता तिन्हेरे चेल्लेयाँ ने अलग होई करी तिन्हा का पूछेया, “असा तिस जो किजो नी निकाली सके?” 29 तिन्हा ने उन्हा जो बोलेया, एह जाति बगेर प्रार्थना कुसकी होर तरिके कने नी निकली सकदी।”

### दुबारा अपणे मरणे रे बारे बिच यीशु जी री भविष्यवाणी

30 फिरी से तित्ते का चले, अते गलील का होईकरी जाया करदे थिये। से नी चान्दे थिये कि कोई जानण, 31 किजो कि से अपणे चेल्लेयाँ जो सिक्सा दिदें अते तिन्हा नो बोलदे थिये, “मणु रा पुत्र, मणुआ रे हत्था पकड़ाया जाणा, अते तिन्हा मारी रखणा; अते से मरणे रे तिन रोजा बाद जिंदा होई जाणा। 32 अपण एह गल्ल तिन्हेरी समझ बिच नी आई, अते से तिन्हा का पूछणे का डरदे थिये।

### सबका बड्डा कुण ?

33 फिरी से कफरनहूम बिच आये; अते घरे आईकरी यीशु जी ने उन्हा का पूछेया, “तुसी रस्ते बिच कुस गल्ल जो लेई करी बैहस करेया करदे थिये?” 34 से चुप रह, किजो कि रस्ते बिच तिन्हा ने अपु-मिते एह बैहस किती थी कि असा बिच का बड्डा कुण है। 35 ताँ तिन्हा ने बेईकरी तिन्हा बाराह जो सदेया अते तिन्हा जो बोलेया, “जे कोई बड्डा हुणे री इच्छा रखदा, ता सबणी का छोटा अते सबणी रा नौकर बनण।” 36 अते तिन्हा ने इक निक्के जो लेई करी तिन्हेरे मझाटे खड़ा कित्तेया, अते तिस जो खोखा लेई करी तिन्हा जो बोलेया, 37 जे कोई मेरे नां कने इदेथ निकेयाँ बिच का इक जो वी अपनादां, से मिजो अपनादां, अते जे कोई मिजो अपनादां, से मिजो नी अपण मेरे भेजणेवाळे जो अपनादां।”

### जो खलाफ नी, से कन्ने है

38 ताँ यहून्ना ने तिन्हा जो बोलेया, “ओ गुरू, असा ने इक मणु जो तेरे नां कने दुष्टआत्मां जो कडदे दिखेया अते असा तिस जो ठाकणा लगे, किजोकि से म्हारे पीछे नी चलदा थिया।” 39 यीशु जी ने बोलेया, तिस जो मत ठाको; किजो कि इदेया कोई वी नी जे मेरे नां कने चमत्कार रे कम्म करन, अते झट बिच बाद बिच मिजो बुरा बोली सकन, 40 किजोकि जे खिलाफ बिच नी हिन, से म्हारी तरफ हिन। 41 जे कोई इक दुन्गा पाणी तुसा जो इधेरे ताँई पियाये कि तुसी मसीह रे हिन ता मैं तुसा कने सच्च बोलदा कि से अपणा ईनाम कुसी वी तरिके कने नी खोई सकदा।

### ठोकर री वजह बनणा

42 “जे कोई इन्हा छोटेयाँ बिच का मेरे पर विश्वास करदे हिन, कुसकी जो ठोकर खिलान तिसेरे ताँई भला होणा कि से इक बड्डी चक्की रा पाट तिसेरे गळे बिच लटकाया जान अते तिस जो समुन्द्र बिच सुटी दित्तेया जाये। 43 जे तेरे हत्थ पाप करणी री वजह बणदे हिन ता तिन्हा जो बड्डी दे। टुण्डा होईकरी जिन्दगी बिच आणा तेरे ताँई इसका खरा हुणा कि तेरे दोनो हत्थ हुदें होये नरक री अग बिच पाई दित्तेया जाये जे कदी बुझणे जो नी। 44 (जित्ते ना तिन्हेरा किड़ा मरदा ते ना तित्ते आग बुजदी।) 45 जे तेरा पैर पाप करणे री वजह बणदे हिन ता तिन्हा तिस जो बड्डी दे। लंगड़ा होईकरी जिन्दगी बिच आणा तेरे ताँई इसका खरा हुणा कि तेरे दोनो पैर हुदें होये नरक बिच पाई दित्तेया जाये। 46 (जित्ते ना तिन्हेरा किड़ा मरदा ते ना तित्ते आग बुजदी।) 47 जे तेरी हाखियाँ पाप करणी री वजह बणदी ता ता तिन्हा जो कड्डी दे। टिणा होईकरी परमेश्वर रे राज्य बिच आणा तेरे ताँई इसका खरा हुणा कि तेरी दोनो हाखियाँ हुदें होये तू नरक बिच पाई दित्तेया जाये। 48 जित्ते तिन्हेरा कीड़ा नी मरदा अते अग नी बुझदी। 49 किजोकि हर इक जणा अग कने नमकिन कित्तेया जाणा। 50 नमक खरा है, अपण जे नमक रा सुआद



जांदा रेह, ता तिस जो कुस चीज कने नमकिन करगे? अपणे बिच नमक रख्खो, अते अपु-मिते भाई-चारे कने रेयो।"

### तलाक रे बारे बिच यीशु जी री शिक्षा

10 फिरी से तित्ते का उठी करी यरदन रे पार यहूदिया री सीमा बिच आये। भीड़ फिरी तिन्हेरे का जमा होई गई, अते से अपणे रिवाज रे साहब कने तिन्हा जो सिक्सा देणे लगे। 2 ताँ फरिसियां ने तिन्हेरे का आई करी तिन्हा जो परखणे ताँई तिन्हा का पूछेया, "कै एह ठीक होणा कि मड़द अपणी लाड़ी जो छड्डे?" 3 तिन्हा ने उन्हा जो जवाब दित्तेया, "मूसा ने तुम्हारे जो कै हुकूम दित्तेया ए?" 4 उन्हा ने बोलेया, "मूसा ने त्याग-पत्र लिखणे अते छड्डने रा हुकूम दित्तेया ए।" 5 यीशु जी ने तिन्हा जो बोलेया, "तिस ने तुम्हारे ताँई एह नियम इधेरे ताँई लिख्खेया थिय्या किजोकि तुम्हारे जो किच्छ बी समझ नी आंदा। 6 अपण दुनिया री सुरुआत बिच परमेश्वर ने मड़द अते जनानी करी के बणाया। 7 इस वजह कने मड़द अपणे माँ प्यो का बखरा होई करी अपणी लाड़ी कने रैन्दा, 8 अत्ते दोनां ने इक जिस्म होई जाणा; इधेरे ताँई से दो नी अपण इक जिस्म हिन। 9 इधेरे ताँई जिस परमेश्वर ने जोड़या ए, तिस जो इंसान अलग ना करना।" 10 फिरी से जाँ घरे हटि आये ता चेल्लेयां ने इसेरे बारे तिन्हा का फिरी पूछेया। 11 यीशु जी ने उन्हा जो बोलेया, "जे कोई अपणी लाड़ी जो छड्डि करी दुज्जी कने ब्याह करदा ता से पैल्ली रे खलाफ व्यभिचार करदा; 12 अते जे लाड़ी अपणे लाड़े जो छड्डि करी दुज्जे कने ब्याह करदी ता से व्यभिचार करदी।"

### यीशु जी रा बच्चेयां जो आशीर्वाद देंगा

13 फिरी महु अपणे निक्के-निक्केयां जो तिन्हेरे का लियाणे लगे कि से तिन्हा पर हत्थ रखन, अपण चेल्लेयाँ ने तिन्हा जो झिड़केया। 14 यीशु जी ने एह दिख्खी करी गुस्सा होई गे अत्ते तिन्हा जो बोलेया, "निक्केयां जो मेरे का आणे देयो, अते तिन्हा जो ठाक्रेया मत करो, किजोकि परमेश्वर रा राज्य इदेह ई रा ए। 15 मैं तुसा कने सच्च बोलदा कि जे कोई परमेश्वर रे राज्य जो छोटे बच्चेयां साहई नी अपनादां, से परमेश्वर रे राज्य बिच नी जाई सकदा।" 16 अते यीशु जी ने बच्चेयाँ जो खोख्खा लेया, ते तिन्हा पर हत्थ रख्खी करी तिन्हा जो असिस दित्ती।

### अमीर आदमी ते स्वर्ग री हमेसा री जिन्दगी

17 जाँ से रस्ते पर जाणे ताँई तित्ते का निकळे, ताँ इक महु दौड़ी करी आया, अते तिन्हेरे अगे जानू टेकी करी तिन्हा का पूछणा लगेया, "ओ भले गुरू, अनन्त जीण रा हकदार होणे ताँई मैं कै करां?" 18 यीशु जी ने तिस जो बोलेया, तू मिन्जो भला किजो बोलदा ए? कोई भला नी ए, सिरफ इक बल्कि परमेश्वर। 19 तू हुकूमां जो ता जाणदा ए: 'खुन नी करणा, व्यभिचार नी करणा, चोरी नी करणी, झूठी गुआई नी देणी, धोखा नी देंगा, अपणे मा-प्यो री इज्जत करणी।" 20 तिस ने उन्हा जो बोलेया, "ओ गुरू, इन्हा सबना जो ता मैं अपणे जुआन हून्दे का मनदा आया करदा ए।" 21 यीशु जी ने तिस जो दिखेया अते तिस जो दाह लाई अते तिस जो बोलेया, "तेरे अन्दर इक गल री कमी ए। जा, जे किछ तेरा ए, तिस जो बेची करी गरिबाँ जो देई दे अते तिज्जो स्वर्ग बिच धन मिलणा, अते आई करी मेरे पीछे चली पै।" 22 इस गल कने तिसेरे मूं पर उदासी आई गई, अते से उदास होई करी चली गया, किजोकि से बड़ा अमीर थिया। 23 यीशु जी ने चाँ पास्से दिख्खी करी अपणे चेल्लेयां जो बोलेया, "अमिरां रा परमेश्वर रे राज्य बिच जाणा कियां मुश्किल ए।" 24 चेल्लेयाँ जो तिन्हेरी गल्लां का हरानगी होई। अपण यीशु जी ने फिरी तिन्हा जो बोलेया, "ओ निक्केयो, जे पैसेयाँ पर विस्वास रखदे, तिन्हेरे ताँई परमेश्वर रे राज्य अन्दर जाणा कियां मुश्किल ए। 25 परमेश्वर रे राज्य बिच अमीरां रे जाणे का ता ऊंट रा सुई रे भोक का निकळी जाणा असान ए।" 26 से बड़े ई हरान होई करी अपु-मिते बोलणा लगे, "ता फिरी कुसेरा उद्धार होई सकदा?" 27 यीशु जी ने तिन्हेरे पास्से दिखी करी बोलेया, "महुआँ का ता एह नी होई सकदा, अपण परमेश्वर का होई सकदा, किजोकि परमेश्वर का सब किछ होई सकदा; 28 पतरस तिन्हा जो बोलणे लगेया, "दिख्खो, असा

ता सब किछ छड्डि करी तुम्हारे पीछे चली पेरे हिन।" 29 यीशु जी ने बोलेया, "मैं तुसा कने सच्च बोलदा इदेया कोई नी ए, जिन्ने मेरी खुसखबरी ताँई घर-बार, भाई-भैण, मां-प्यो, निके-निकेयां या जमिनाँ जो छड्डि दित्तेया हो, 30 ते अवे इस बेले सौ गुणा ना पान, घर-बार, भाई-भैण, माईयां, निके-निकेयां, अते जमिनां जो, अपण दुख-तकलीफ कने परलोक बिच अनन्त जीण। 31 अपण बड़े जणे जे पैल्ले हिन, से पिछले होणे; अते जे पिछले हिन, से पैल्ले होणे।"

### अपणे मरणे रे बारे बिच यीशु जी री तिसरी भविष्यवाणी

32 से यरुशलेम जो जाया करदे थिये अते रस्ते बिच थिये, ते यीशु जी तिन्हेरे अगे अगे चलेया करदे थिये: चेल्ले हेरान थिये अते जे तिन्हेरे पीछे-पीछे चलदे थिये से डरे रे थिये। ताँ से फिरी तिन्हा बाराह जो लेईकरी तिन्हा कने से गलां बोलणा लगे, जे तिन्हा पर आणे वाळी थी, 33 दिख्खो, असी यरुशलेम जो जाया करदे हिन, अते महु रा पुत्र परोतां रे प्रधाना ते शास्त्रियां रे हत्थे पकड़ाया जाणा, अते तिन्हा ने तिस जो मौत री सजा देणी अते दुज्जी जाति रे हत्थे देई देणा। 34 तिन्हा तिस जो हसी-मजाक बिच उड़ाणा, तिस पर थूकणा, तिस जो कोड़े मारणे अते तिस जो सजा देई करी मारी देंगा, अते तिन्ने रोजाँ बाद तिन्ने जिंदा होई जाणा।"

### याकूब ते युहन्ना री मिन्नत

35 तां जबदी रे निक्के याकूब अत्ते यहून्ना तिन्हा का आईकरी बोलेया, "ओ गुरू जी, असी चाहन्दे कि जे किच्छ असी तुम्हारे का मंगन, से तुसी म्हारे ताँई करन। 36 तिन्हा ने उन्हा जो बोलेया, कि तुसी कै चान्दे हिन कि मैं तुसा ताँई करां?" 37 उन्हा ने यीशु जी जो बोलेया, "असा जो एह देयो कि तुम्हारी महिमा बिच असा बिच का इक तुम्हारे सज्जे पास्से अते दुज्जा तुम्हारे खब्बे पास्से बैन।" 38 यीशु जी ने तिन्हा जो बोलेया, "तुसी नी जाणदे हिन कि तुसी कै मंगदे हिन? जे दुन्ना मैं पीणा ए, कै तुसी पी सकदे हिन, अते जे बपतिस्मा मैं लैणा ए, कै तुसी लेई सकदे?" 39 तिन्हा ने यीशु जी जो बोलेया, "असा का होई सकदा।" यीशु जी ने तिन्हा जो बोलेया, "जे दुन्ना मैं पीणा, तुसी पिन्ने अते जे बपतिस्मा मैं लैणा, तिस जो लिन्ने। 40 अपण जिन्हेरे ताँई तयार कित्ते रा ए तिन्हा जो छड्डि होर कुसकी जो अपणे सज्जे पास्से अते अपणे खब्बे पास्से बिठाणा मेरा कम नी ए।" 41 एह सुणी करी दसाँ चेल्ले याकूब अते यहून्ना पर गुस्सा होई गे। 42 ता यीशु जी ने तिन्हा जो अपणे का सद्दी करी उन्हा जो बोलेया, "तुसी नी जाणदे हिन कि जे दुज्जी जाति रे शासक समझे जान्दे हिन, से तिन्हा पर राज करदे; अते तिन्हा पर जे बड्डे हिन, तिन्हा पर हक जतादे हिन। 43 अपण तुसा पर इदेया नी ए, अपण जे कोई तुसा बिच का बड्डा होणे री इच्छा रखदा से तुम्हारा नौकर बणे; 44 अते जे कोई तुसा बिच बड्डा होणे री इच्छा रखदा हो, से सबनी रा नौकर बणे। 45 किजो कि महु रा पुत्र इधेरे ताँई नी आया कि तिसेरी सेवा टहल कित्ती जान, अपण इधेरे ताँई आये रा ए कि अपु सेवा-टहल करे; अते बड़े जणेया रे छुटकारे ताँई अपनी जान दें।"

### अन्ने बरतिमाई री हाकिमियां रा ठीक करणा

46 से यीरोह बिच आये, अते जाँ से अपणे चेल्लेयां, अते इक बड्डि भीड़ कने यीरोह का बाहर निकळी करी आये, ताँ तिमार् री निक्का बरतिमाई, इक अहन्ना भिखारी, सड़क रे कनारें बैठे रा थिया। 47 से एह सुणी करी कि यीशु नासरी जी हिन, हक्का लाई लाई करी बोलणे लगेया, "ओ दाऊद री संतान, यीशु जी मेरे पर दया करो!" 48 बड़े जणेया ने तिस जो बक्केया कि चुप रहै, अपण से होर हक्का मारणे लगेया, मेरे पर दया करो!" 49 यीशु जी ने रुकी करी बोलेया, तिस जो सद्दो।" अते महुआँ ने तिस अहन्ने जो सद्दी करी तिस जो बोलेया, "हिम्मत कर! उठ! से तिज्जो सद्दे हिन।" 50 से अपणा कपड़ा सुटी करी झट उठेया, अते यीशु जी का आया। 51 ता यीशु जी ने तिस जो बोलेया, "तू कै चान्दा कि मैं तेरे ताँई करां?" अहन्ने ने तिन्हा जो बोलेया, "ओ रब्बी, एह ई कि मैं दिखणे लगां।" 52 यीशु जी ने तिस जो बोलेया, "चली जा, तेरे विस्वास ने तिज्जो खरा करी दित्तेया ए।" अते से उस्सी बेले खरा होई गया, अते तिन्हेरे पीछे चली पेया।

### यरुशलेम बिच यीशु जी रा विजय-प्रवेश

11 जाँ से यरुशलेम रे नेडे, जैतून पाहड पर बैतफगे अते बैतनिय्याह का आये ता तिन्हा ने अपणे चेल्लेयाँ बिच का दो जो एह बोली भेजेया, 2 "सामणे वाले ग्रॉ बिच जाओ, अते तिन्हे पुजदे ई इक गद्धी रा बच्चा जिस बिच हल्ले ताई कोई नी चढ़ेया, बहन्ने रा तुसा जो मिलणा। तिस जो खोली लेई आओ। 3 जे तुसा जो कोई पूछे, 'एह किजो करदे हिन?' ता बोलणा, 'प्रभु जो इसेरी जरुरत है, ते तिन्हे झट ई तिस जो इत्ते भेजी देणा।' 4 तिन्हा ने जाई करी तिस बच्चे जो बाहर दुआर रे कने गळी बिच बहन्ने रा दिख्खेया, अते खोलणे लगे। 5 तिन्हा बिच का जे तिन्हे खड़े थिये, किच्छ बोलणे लगे, "एह कै करदे हिन गद्धी रे बच्चे जो किजो खोलदे हिन?" 6 जियां यीशु जी ने बोलेया थिया, तियाँ ई तिन्हा उन्हा जो बोली दित्तेया, ताँ मल्लुआं ने तिन्हा जो जाणे दित्तेया। 7 तिन्हा ने बच्चे जो यीशु जी का लेयाई करी तिस पर अपणे कपडे पाई दित्ते अते यीशु जी तिस पर बेई गे। 8 ताँ बडे जणेया ने अपणे कपडे रस्ते बिच बिछाये अते होरां ने बूट्टेयाँ बिच का पत्ते वाली डालियाँ बड्डी-बड्डी बछाई दित्ती। 9 जे तिन्हेरे अग्गे अग्गे चलदे अते पीछे पीछे आन्दे थिये, से जोरे-जोरे बोलदे जाया करदे थिये, "होशाना! धन्न हिन से जे प्रभु रे ना कने आन्दा है। 10 म्हारे पिता दाऊद रा राज्य जे आया करदा है; धन्न हिन! सब का ऊँचे अम्बर बिच होशाना! 11 से यरुशलेम पुजी करी मन्दिर बिच आये, अते चाँ पास्से सब चीजाँ जो दिख्खी करी बाहराँ कने बैतनिय्याह जो गे, किजोकि साँझ होई गेरी थी।

### बगौर फळ वाळा अर्जीर रा बुट्टा

12 दूजे रोज जाँ से बैतनिय्याह का निकळे ता तिन्हा जो भूख लगी। 13 से दूर का अंजीर रे इक हरे बुटे जो दिख्खी करी नेडे गे कि कै पता तिस बिच किच्छ हो: अपण पत्तेयाँ जो छड्डी किच्छ नी थिया; किजोकि फळणे रा मौसम नी थिया। 14 यीशु जी ने तिस जो बोलेया, "अवे का कोई तेरा फल कदी न खान!" अते तिन्हेरे चेल्ले सुणेया करदे थिये।

### देहरे का दुकानदारां रा कड्डेया जाणा

15 फिरी से यरुशलेम बिच आये, अते से मन्दिर बिच गे, अते तिन्हे जे पैसेयाँ रा लेण-देण करेया करदे थिये तिन्हा जो बार कड्डणा लगे, अते सुनियारे रे पीढे अते कबूतर बेचणे वालेयाँ री चौकियाँ उलटेरी दित्ती, 16 अते मन्दिर बिच कुस्की जो समान लेई करी आणे जाणा नी दित्ता। 17 अते सिक्सा देईकरी तिन्हा ने बोलेया, "कै एह नी लिखे रा है कि मेरा घर सब जाति ताँई प्रार्थना रा घर बोलेया जाणा? अपण तुसी ने इस जो डाकूआँ री खोह बणाई दित्ती री है।" 18 एह सुणी करी परोताँ रे प्रधान अते शास्त्री तिन्हा जो मुकाणे रा मौका तोपणा लगे; किजोकि से तिन्हा का उरदे थिये इधरे ताँई कि सब मल्लु तिन्हेरी सिक्सा का हैरान हुन्दे थिये। 19 साँझ हुन्दे ई से सैहर का बाहर चली गे।

### सूके अर्जीर रे बुट्टे री सीख

20 फिरी भ्यागा से जाँ से तिन्हे का जाया करदे थिये ता तिन्हा ने अंजीर रे बुटे जो जड ताँई सुके रा दिखेया। 21 पतरस जो से गल्ल चेट्ता आई, अते तिन्हे तिन्हा जो बोलेया, "ओ रब्बी, दिख्खो! एह अंजीर रा बुटा जिस जो तुसी स्त्राप दित्तेया थिया, सुक्की गेरा है।" 22 यीशु जी ने तिस जो जवाब दित्तेया, "परमेश्वर पर विस्वास रख्खो। 23 मैं तुसा कने सच्च बोलदा कि जे कोई इस पाहड जो बोलन, 'तू उखड़ी जा, अते समुद्र बिच जाई पै, अते अपणे मन बिच कोई शक न करन अपण विश्वास करन कि जे बोलदा है से होई जाये, ता तिसेरे ताँई सेहई होणा। 24 इधरे ताँई मैं तुसा कने बोलदा कि जे तुसी प्राथना करी के मंगन, ता विस्वास करी लेयो कि तुम्हारे जो मिली गेया, अते तुम्हारे ताँई होई जाणा। 25 [ अते जे तुसी माफ नी करणे ता तुम्हारे पिता जे स्वर्ग बिच हिन, तुम्हारे गुनहा माफ नी करणे।" ] 26 (ते जे अगर तुसी माफ ना करो, तां तुसां रे स्वर्गीय पिता ने बी तुसां जो माफ नी करणा।)"

### यीशु जी रे हक्क पर सवाल

27 से फिरी यरुशलेम जो आये, अते जाँ से मन्दिर बिच घूमेया करदे थिये ता परोताँ रे प्रधानां, शास्त्री ते यहूदी लोकाँ रे पुरखा ने तिन्हेरे का आईकरी पूछेया, 28 "तू एह कम्म कुस हक कने करदा? अते एह हक तिजो कुस ने दित्ते रा है कि तू एह कम्म करन?" 29 यीशु जी ने तिन्हा जो बोलेया, "मैं वी तुसा का इक गल्ल पूछदा; मिन्जो जवाब देयो ता मैं वी तुसा जो दस्सणा कि एह कम्म कुस हक कने करदा। 30 यहून्ना रा बपतिस्मा कै स्वर्ग रे पास्से का थिया या मल्लुआं रे पास्से का थिया। मिन्जो जवाब देयो।" 31 ताँ से अपु-मिते बैहस करणा लगे कि जे असी बोलन 'स्वर्ग रे पास्से का, ता तिन्हे बोलणा, 'फिरी तुसी ने तिसेरा विस्वास किजो नी कित्तेया?' 32 अते जे असी बोलन, 'मल्लुआँ रे पास्से का थिया,' ता मल्लुआँ रा डर है, किजोकि सब जाणदे हिन कि यहून्ना वाक्केई भविष्यवक्ता थिया। 33 अते तिन्हा ने यीशु जी जो जवाब दित्तेया, "असी नी जाणदे।" यीशु जी ने तिन्हा जो बोलेया, "मैं वी तुसा जो नी दसणा कि एह कम्म मैं कुस हक कने करदा।"

### बुरे किसानां रा उदारण

12 फिरी से तिन्हा कने उदारण देई करी गल्ल करणा लगे: "कुस्की मल्लु ने अंगूर रा बगीचा लगाया, ते तिसेरे चोन्नी पास्से बाड लगाया, ते तिन्हे इक रस रा कुंड बनाया; ते किसाना जो तिसेरा ठेक्का देई करी अप्पू दूर देश जो चली गेया। 2 फिरी फळणे रे मोसम अन्दर तिनि ए जर्मीदारां का इक नोकर जो भेजेया कि से जाई करी तिन्हा जर्मीदारां का दाख रे बगीचे रा हिस्सा लेई आओ। 3 अपण तिन्हा ने तिस्जो मारी-कुट्टी करी खाली हथ्थ वापस भेजी दित्तेया। 4 फिरी तिनि ए इक होर नोकर जो तिन्हा का भेजेया; तिन्हा तिसेरा सर फाडी रख्खेया ते तिसेरी बेजती किन्ती। 5 फिरी तिनि ए इक होरसी मल्लु जो भेजेया; तिन्हा ने तिस जो मारी रख्खेया। ताँ तिनि ए होर मते जणेयाँ जो भेजेया; तिन्हा बिच का किच्छ जो तिन्हा ने कुट्टेया, अते किच्छ जो तिन्हा ने मारी रख्खेया। 6 अवे इक्कोई रेहई गेरा थिया, जेहडा कि प्यारा पुत्र थिया; आखिरकार तिस बगीचे रे मालक ने अपणे निक्के जो बी तिन्हे ए सोच्ची करी भेजी दित्ता कि से मेरे निक्के री इज्जत करगे। 7 अपण तिन्हा किसाना ने अपु-मिते बोलेया कि, "ए ई ता वारिस है; आओ असी इस्सो मारी रख्खे, ते जमीन-जायदात असा री होई जाणी।" 8 ते तिन्हा ने तिसजो पकडी करी मारी रख्खेया, ते अंगूर रे बगीचे का बाहर सुटि दित्तेया। 9 "अवे अंगूर रे बगीचे रा मालक कै करणा ? तिनि ए आई करी उन्हा किसाना जो मारी रख्खणा, ते अंगूर रा बगीचा कुस्की होरसी जो देई दैणा। 10 कै तुसां ने पवित्र सास्त्र अन्दर ए वचन नी पढ़ेया: 'जिस पथ्थर जो मिस्त्रियाँ ने फजूल रा समझेया थिया, सेहई कोणे रा जरुरी पथ्थर होई गेया 11 इयां प्रभु रे पास्से का होया, ते म्हारी नजरां अन्दर ए इक हरानगी री गल्ल है।" 12 ताँ तिन्हा ने यीशु जी जो पकड़ने री कोसिस किन्ती; से समझी गेरे थिए कि तिन्हा ने ए उदारण असां रे खलाफ सुणाया। अपण से मल्लुआँ का डरे, ते यीशु जी जो छड्डी करी चली गे।

### कैसर जो ल गान दैणा

13 ताँ तिन्हा ने यीशु जी जो गल्लां अन्दर फसाणे ताँई थोडे फरीसियाँ ते हेरोदियाँ जो तिन्हा का भेजेया। 14 तिन्हा ने आई करी यीशु जी का पुछेया, "ओ गुरु जी, असा जो पता है कि तुसी सच्चे हिन ते कुस्की री परवा नी करदे; किजोकी तुसी मल्लुआँ रा मुहू दिख्खी करी गल्लां नी करदे, अपण परमेश्वर रे रस्ते रे बारे अन्दर मल्लुआँ जो सच्चाई कने दस्दे। ता कै कैसर जो चुंगी दैणा चहिंदी की नी ? 15 असी देन कि नी देन ?" यीशु जी ने तिन्हेरे मन रे कपट जो जाणी गे ते तिन्हा जो बोलेया, "मिन्जो किजो परखेया करदे हिन ? मेरे का इक दीनार लेई आओ, मैं से दिखणा।" 16 से लेई आए, ते यीशु जी ने तिन्हा जो बोलेया, "ए छाप अते ना कुसेरा है ?" तिन्हा ने बोलेया, "कैसर रा।" 17 यीशु जी ने तिन्हा जो बोलेया, "जे कैसर रा है, से कैसर जो, ते जे परमेश्वर रा है से परमेश्वर जो देयो।" ताँ तिन्हा जो यीशु जी पर हरानगी होई।

### फिरी जिन्दे होणा ते ब्याह

18 फिरी सदकियाँ ने बी, जे बोल्दे कि कोई बी मरे रेयाँ बिच का जिन्दा नी होई सकदा, यीशु जी का आई करी पुछणा लगे, 19 "ओ गुरु जी, मूसा ने हमारे ताँई लिखेरा है कि अगर कुस्की रा भ्याळ बगैर वारिस रे ई मरी जाओ अते तिसेरी लाडी रेहई जाओ, ता तिसेरा भ्याळ उसेरी लाडी कने ब्याह करी सकदा अते अपणे भ्याळ रा वंस अग्गे बद्धाई सकदा। 20 सत्त भ्याळ थिये। पैह्ला भ्याळ ब्याह करी के बगैर औलादे ई मरी गया। 21 ताँ दुज्जे भ्याळ ने तिस जनानी कने ब्याह करी लेया ते बगैर औलादे ई मरी गया; ते तिय्याँ ई त्रीय्ये ने बी कित्ता। 22 ते सत्त रे सत्त जणेयाँ बिच का इक जणे रे औलाद नी होई। सबनां रे मरणे का बाद, से जनानी बी मरी गई। 23 फिरी दुबारा जिन्दे होणे पर तिस जनानी ने कुसेरी लाडी होणा ? किजोकी से ता तिन्हा सत्त रे सत्त भ्याळां कने ब्याह करी बैठेरी थी ?" 24 यीशु जी ने तिन्हा जो बोलेया, "तुसा इस वजह कने गलत-फैह्नी ता नी होई गेरी है, तुसा जो ना पबित्र सास्त्र रे बारे अन्दर किछ पता है, ते ना ई परमेश्वर री सक्ति रे बारे अन्दर तुसी किछ जाणदे ? 25 किजो कि जाँ तिन्हा ने मरी करी जिन्दे होणा, ता तिन्हा ने ना ता ब्याह करणे अते ना ई से ब्याह अन्दर दित्ते जाणे, बल्कि तिन्हा ने स्वर्ग अन्दर दूतां साहई होणा। 26 मरे रे महुआँ रे बारे अन्दर कै तुसां ने मूसा री कताब अन्दर झिल्लां वाळी कहाणी अन्दर नी पढ़ेया कि परमेश्वर ने उस जो बोलेया, "मैं अब्राहम रा परमेश्वर, इस्हाक रा परमेश्वर, अते याकूब रा परमेश्वर हूँ ? 27 परमेश्वर मरे रेयाँ महुआँ रे नी अपण जिन्देयाँ रे परमेश्वर हिन्; इधेरे ताँई तुसी बड़ी बड़ड़ी गलती-फेमी बिच हिन्।

### सबका बड्डा हुकम

28 धर्म-गुरुआँ बिच का इक जणे ने आई करी तिन्हा जो बैहस करदे सुणेया, ते जाणी करी कि यीशु जी ने तिन्हा जो सही तरिके कने जवाब दित्तेया, तिन्हा का पुछणा लगेया, "सारेयाँ का खास हुकम कुण जणा है ?" 29 यीशु जी ने तिस जो जवाब दित्तेया, "सारे हुकमां बिच का बद्धी करी एह हुकम खास है: 'ओ इस्राएल सुण! प्रभु म्हारा परमेश्वर इक ई प्रभु है, 30 ते तू अपणे प्रभु परमेश्वर कने पूरे मन कने, पूरी जान कने, सारी समझ कने, अते अपणी सारी ताकत कने प्यार करेया।' 31 ते दुज्जा हुकम ए है कि, 'तू अपणे गुआडियां कने अपणे बराबर प्यार करेया।' इस का बड़डा होर कोई हुकम नी है। 32 सास्त्री ने तिन्हा जो बोलेया, "ओ गुरु जी, बड़ी खरी गल है ! तुसां ने सच्च बोलेया कि परमेश्वर इक्को ई हिन्, ते तिन्हा जो छड़ड़ी, होर कोई परमेश्वर नी है। 33 ते तिन्हा कने पूरे मन, पूरी समझ, पूरी जान, अते सारी ताकत कने प्यार करणा चहिंदा; अते गुआडियां कने अपु रे बराबर प्यार करणा, सारी होमबलियाँ अते बलिदानां का बद्धी करी है।" 34 जाँ यीशु जी ने दिखेया कि तिनिए सोची-समझी करी जवाब दित्तेया, ता तिन्हा ने बोलेया, "तू परमेश्वर रे राज्य का दूर नी है।" ते फिरी कुस्की जो बी यीशु जी का किच्छ बी पुछणे री हिम्मत नी होई।

### मसीह कुसेरा पुत्र है ?

35 फिरी यीशु जी ने मन्दिर अन्दर सिक्सा दिन्दे बेले बोलेया, "धर्म-गुरु किय्याँ बोल्दे कि मसीहा दाऊद रा पुत्र है ? 36 दाऊद ने अप्पु ई पवित्र आत्मा अन्दर होई करी बोले रा है: 'प्रभु ने मेरे प्रभु जो बोलेया, 'मेरे सजे पाससे बेह, जाँ ताँई मैं तेरे दुस्मणां जो तेरे पैरां हेठ नी करी दिन्दा। 37 दाऊद ता अप्पु ई तिन्हा जो प्रभु बोल्दा, फिरी किय्यां तिसेरे पुत्र किय्याँ होया ?' अते भीड़ रे महु तिन्हेरी गल्लाँ जो खुसी कने सुणदे थिये।

### शास्त्रियां का सावधान

38 तिन्हा ने अपणी सिक्सा अन्दर तिन्हा जो बोलेया, "धर्म-गुरुआं का बची करी रेयो, जे लम्मे-लम्मे चोगे पाई करी फिरणा अते बजारां अन्दर नमस्ते तोपदे, 39 अते धरम सभा अन्दर खास खास जगह बैह्ला अते धाम अन्दर खास खास जगह तोपदे। 40 से विधवा जनानियाँ रे घरां जो खाई

जान्दे, ते दखावे ताँई बड़ी हाणा ताँई प्राथना करदे रहन्दे। इन्हा जो जादा सजा मिलणी है।"

### कंगाल विधवा रा दान

41 यीशु जी मन्दिर रे भंडार रे सामणे बेहई करी दिखेया करदे थिए कि महु मन्दिर रे भंडार अन्दर दान कुस तरिके कने पांदे; अते मते अमीर महुआँ ने बड़ा किच्छ पाया। 42 इतणे बिच इक गरीब विधवा जनानी ने आई करी दो दमडियाँ, जेहड़ी कि इक अधेले रे बराबर हुन्दियाँ, पाई दित्तियाँ। 43 ताँ यीशु जी ने अपणे चेलेयाँ जो सद्दी करी बोलेया, "मैं तुसां जो सच्च बोल्दा कि मन्दिर रे भंडार अन्दर दान पाणे वाळेयाँ बिच का इस कंगाल विधवा जनानी ने सबनी का बद्धी करी पाया; 44 किजो कि सबनां ने अपणे पैसेयाँ री बढोतरी बिच का पाया, अपण इसा अपणे थोडे जणे पैसेयाँ बिच का जे किछ बी इसेरा थिया, मतलब कि अपणी सारी कमाई पाई दित्ती।"

### देहरे रे बरबाद होणे री भविष्यवाणी

13 जाँ यीशु जी मन्दिर का निकलेया करदे थिये, ताँ तिन्हेरे चेलेयाँ बिच का इक ने तिन्हा जो बोलेया, "ओ गुरु जी, दिखखो, कितणे बड़डे बड़े ते कितणे छैल भवन हिन्।" 2 यीशु जी ने तिस जो बोलेया, "कै तुसी ए बड़डे बड़डे भवन दिखेया करदे हिन् : इत्ते बड़े पर बड्डा बी नी बचणा जेहड़ा कि दया नी जाणा।" खतरा ते कहळा

### मुसीबत ते दुख

3 जाँ से जैतून रे पाहड पर मन्दिर रे साहाणे बैठे रे थिये, ताँ पतरस, याकूब, युहन्ना, अते अन्नदियास ने बखरे जाई करी यीशु जी का पुछेया, 4 "असां जो दस्सो कि एह गल्लाँ कधाडी होणियाँ ? ते जाँ ए सब गल्लाँ पूरी होणे वाळी होणियाँ ता इधेरी कै निसानी होणी ?" 5 यीशु जी तिन्हा जो बोल्णा लगे, "चुकने रेहो कि कोई तुसां जो गलत रस्ते पर नी भटकाई सके। 6 मते जणेयाँ ने मेरा नां लेई करी आणा अते बोल्णा कि, 'मैं से ई है!' ते मते जणेयाँ जो भटकाणा। 7 जाँ तुसी लड़ाईयाँ ते लड़ाईयाँ री गल्लां सुणगे, ता घबरांदे मत; किजोकी ए सब ता होणा ई होणा है, अपण से बेह्ला आखरी बेह्ला नी होणा है। 8 किजो कि जात पर जात ने ते इक राज्य ने दुजे राज्य पर हमले करणे। हर कुते हिल्लण आणे, ते अकाल पेई जाणे। एह ता तकलीफां री सुरुआत ई होणी है। 9 "अपण तुसी अपणे ताँई चुकने रेह; किजो कि महुआँ ने तुसां जो बड़ड़ी सभां अन्दर लेई जाणा अते तुसां जो यहूदी धर्म-सभा अन्दर मारे-कुटेया जाणा, ते मेरी वजह कने तुसां जो राज्यपालां अते राज्ञेयाँ रे साहाणे खड़ा कित्तेया जाणा, ताकि तिन्हा ताँई गुवाई हो। 10 पर जरूरी है कि पैले सबनी जातियाँ अन्दर शुभ-भसेख रा परचार होणा है। 11 जिस बेले तिन्हा ने तुसां जो लेई जाई करी राज्यपालां ते राज्ञेयाँ रे हत्था देई दैणा, ता पैले ई फिकर मत करदे कि तुसां तिन्हा जो जाई करी कै बोल्णा; किजो कि बोल्णे वाळे तुसी नी हिन्, अपण पवित्र आत्मा है। 12 भ्याळ जो भ्याळ ने, ते प्यो जो पुत्र ने मरवाणे ताँई दैणा, ते बच्चेयाँ ने माँ-प्यो रे खलाफ खड़िह करी तिन्हा जो मरवाई दैणा। 13 ते मेरे नां री वजह कने सारे महुआँ ने तुसां कने दुस्मणी रखणी; अपण जेहड़ा आखरी बेले ताँई सबर रखणा, तिसेरा ई उद्धार होणा।

### सबका जादा मुसीबत रा वेला

14 इधेरे ताँई जाँ तुसी तिस उजाड करणे वाळी नफरत रे लायक चीज जो जित्ते ठीक नी है, उत्ते दिखगे, (पढ़णे वाळा समझी लेयो) ताँ जे यहूदिया अन्दर हांणे, से पाहडां जो नहस्सी जायो; 15 जे भोड़ी हुन्गा, से अपणे घरा का किच्छ लैणे ताँई झिक्क ना उतरो ते ना ई अन्दर जाओ; 16 अते जे खेतारा अन्दर हुन्गा, से अपणा कपडे लैणे ताँई पिच्छे ना हटो। 17 तिन्हा रोजां अन्दर जेहड़ी जनानियाँ दुपराणी हुन्गीयाँ अते जे दुध पियाणे वाळियाँ हुन्गीयाँ, तिन्हां ताँई हाय! 18 ते प्राथना करेया करो कि ए सरदी रे मोसम अन्दर नी हो। 19 किजो कि से रोज इदेह कहळा वाळे होणे कि दुनिया रे सुरु होणे का, जेहड़ी परमेश्वर ने बणाए री है, हल्ले ताँई ना ता होये अते ना ई फिरी

कदी होणे। 20 जे प्रभु जी तिन्हा रोज़ां जो घट्ट नी करदे, ता कुस्की बी जीव-जन्तु ने नी बचणा थिया; अपण तिन्हा चुणेरे मळ्हुआं री वजह कने जिन्हा जो परमेश्वर ने चुणेरा है, तिन्हा रोज़ां जो घटाया। 21 तिस बेले अंगर तुसां जो कोई बोल्तो, 'दिख्खो, मसीहा इत्ते हिन,' या 'दिख्खो, उत्ते हिन,' ता तिन्हेरा विसवास मत करदे; 22 किजो कि झुठे मसीहा ते झुठे भविष्यवाणी करणे वाळे खड़ी उठणे, अते तिन्हा मती किस्म री निसानियाँ ते नेक-बनेके कम्म दखाणे ताकि इत्ते तक से चुणेरेयाँ जो बी धोखा देई देन। 23 अपण तुसी चुकने रेयो; दिख्खो, मैं तुसा जो सब गल्लां पैले ई बोली रख्खियाँ।

### म्हणु रे पुत्तार रा फिरी आणा

24 "तिन्हा रोज़ां अन्दर, तिस कळा का बाद सूरज काळा होई जाणा, ते चंद्रमां ने रोसनी नी दैणी; 25 ते अंबरा का तारे छुडकणा लगी पैणे; ते स्वर्ग री (सक्तियां- कनसलटेंट चैकिंग) हिलाई जाणियाँ। 26 ताँ लोकां ने मळ्हु रे पुत्र जो महान सक्ति अते महिमा कने बढळां अन्दर आंदे दिखणा। 27 तिस बेले तिन्हा ने अपणे दूतां जो भेजी करी, धरती रे इस कनारे का अंबरे रे उस कनारे ताँई, चौन्नी दिसां का अपणे चुणेरे मळ्हुआं जो कठेरणा।

### अजीर रे बुट्टे रा उदारण

28 अंजीर रे बुट्टे का ए उदारण सिख्खो : जाँ तिसेरी डाळी नरम होई जांदी, अते पत्ते निकळणा लगी पैँदे; ता तुसां जो पता लगी जांदा कि गरमी आणे वाळी हिन। 29 इय्याँ ई जिस बेले तुसी इन्हा गल्लां जो हुंदे दिखणे, ता समझी जाए की से बेला अवे नेडे है बल्कि द्रोजे का है। 30 मैं तुसां जो सच बोल्दा कि जाँ ताँई ए सारी गल्लां पूरी नी होई जाणियाँ, ताँ ताँई ए पीढी टळी नी सकदी। 31 अंबरे ते धरती टळी जाँगे, अपण मेरी गल्लां कदी बी नी टळणियाँ। जागदे रेहो।

### जागदे रेयो

32 "तिस रोज या तिस बेले रे बारे अन्दर कुस्की जो बी पता नी है, ना स्वर्ग रे दूत अते ना पुत्र; अपण सिरफ पिता जो। 33 दिख्खो, जागदे अते प्राथना करदे रेयो किजोकी तुसां जो पता नी है कि से बेला कधाडी आणा। 34 ए उस मळ्हु साहई है, जे दूर देश जांदे बेले अपणा घर छड्डी जाओ, ते अपणे नोकरां जो हक्क देई जाओ : अते हर इक जो अपणा कम्म देई जाओ, अते द्रोजे रे पैरुआं जो जागदे रेहो रेहो रा हुक्म देई जाओ। 35 इधेरे ताँई जागदे रेहो, किजो कि तुसां जो पता नी है कि घर रे मालक ने कुस बेले आणा है, संझा या धरात्ते बेले, या मुरगे रे बाँग दैणे रे बेले या भ्याग्गा। 36 इय्याँ ना हो कि से चाण-चक्केई आई रेहो ते तुसी सुत्तेरे होन्। 37 अते मैं जे तुसां जो बोल्दा, से ई सबनी जो बोल्दा: जागदे रेहो।"

### यीशु जी रे खलाफ जाल बुनणा

14 दो रोज़ां बाद फसह ते अखमीरी रोटी रा त्हाार होणे वाळा थिया। प्रधान याजक ते सास्त्री इस गल्ल री तोपा अन्दर थिये कि से यीशु जी जो किय्याँ धोखे कने पकड़वाई करी मारी रखन; 2 अपण से बोल्दे थिये, "असां ए कम्म त्हाार वाळे रोज़े नी करणा, कुदखी इय्याँ ना हो कि मळ्हुआँ अन्दर बखेडा पेई जाओ।"

### बैतनिय्याह बिच यीशु जी रा अभिषेक होणा

3 जाँ से बैतनिय्याह अन्दर शमौन कोढी रे घरे रोटी खाणे जो बैठे रे थिये, ताँ तिस बेले इक जनानी चीट्टे पत्थर रे पात्र बिच जटामांसी रा बडा मैहन्ना तेल लेई आई; अते पात्र जो तोडी करी तेल जो तिन्हेरे सरा पर पाई दित्तेया 4 अपण कोई कोई मळ्हु अपणे मनां अन्दर रिसियाई करी बोल्णा लगे, "इस छैळ मुस्क वाळे तेल रा बेडा-गरक किजो कित्तेया ? 5 किजोकी इस तेल जो ता तिन्न सौ दिनार का जादा कीमत अन्दर बेची करी गरीबां जो देई देई सकदे थिये।" अते से तिस जो झिडखा मारणा लगे। 6 यीशु जी ने तिन्हा जो

बोलेया, "इस जो छड्डी दियो; इस जो तंग किजो करेया करदे हिन ? इस ने ता मेरे ताँई खरा कम्म कित्तेया। 7 गरीब तुसां कने हमेसा रैहन्दे, अते तुसी जाँ चान, तिन्हा ताँई खरा करी सकदे; अपण मैं तुसां कने हमेसा नी रैह्ना। 8 जे किछ बी ए करी सकदी थी, तिस ने कित्ता; तिस ने मेरे दब्बे जाणे री त्त्यारी बिच पेळे आई करी मेरे जिस्म बिच तेल मळ्हेया है। 9 मैं तुसां जो सच्च बोल्दा कि सारी दुनिया अन्दर जित्ते बी शुभ-भसेख रा प्रचार कित्तेया जाणा, तित्ते इसेरे इस कम्म रा जिकर उसेरी याद अन्दर कित्तेया जाणा।"

### यहुदा रा धोखा दैणा

10 मैं तुसां जो सच्च बोल्दा कि सारी दुनिया अन्दर जित्ते बी शुभ-भसेख रा प्रचार कित्तेया जाणा, तित्ते इसेरे इस कम्म रा जिकर उसेरी याद अन्दर कित्तेया जाणा।" 11 से ए सुणी करी खुस्स होई गे, ते तिस जो पैसे दैणे जो मन्त्री गे; अते से मोका तोपणा लगेया कि यीशु जी जो कुस तरिके कने पकड़वां।

### चेलेयां कने पसह री आखरी भोज

12 अखमीरी रोटी रे त्हाार का पैले रोज़े, जिस अन्दर से फसह रा बली-दान करदे थिये, उन्हेरे चेलेयाँ ने तिन्हा का पुछ्छेया, "तुसी कुस जगह चाहन्दे कि असी जाई करी तुसां ताँई फसह खाणे री त्त्यारियां करन ?" 13 तिन्हा ने अपणे चेलेयाँ बिच का दो जणयाँ जो ए बोली करी भेजेया, "सैहर अन्दर जाओ, ते तुसां जो तित्ते इक मळ्हु मिलणा जिनिए पाणी रा घडा चुक्करा होणा, तिसेरे पिच्छे चली जायो; 14 ते से जिस घर अन्दर जान्णा, तिस घर रे मालक जो बोले, 'गुरु जी बोल्दे कि मेरा परौणे वाळा कमरा कुते है जिस अन्दर मैं अपणे चेलेयाँ कने फसह खाई सका ?' 15 तिनिए तुसां जो इक सजी-सजायेरी, अते त्त्यार कित्ते रा ऊपर वाळा बड्डा हिन दखाई दैणा, तित्ते असां ताँई त्त्यारी करो।" 16 चेले निकळी करी सैहर अन्दर आये, ते जिय्याँ यीशु जी ने तिन्हा जो बोले रा थिया, तिय्याँ ई दिख्खेया; ते फसह त्त्यार कित्ती। 17 जाँ साँझ होई, ता से बाराह जणयाँ कने आये। 18 जिस बेले से बेहई करी रोटी खाया करदे थिये, ता यीशु जी ने बोलेया, "मैं तुसां जो सच्च बोल्दा कि तुसां बिच का इक जणे ने, जेहडा मेरे कने रोटी खाया करदा है, मिन्जो पकड़वाणा।" 19 चेलेयां पर उदास छाई गेई ते से इक-इक करी के तिन्हा का पुछ्छा लगे कि, "कैसे मैं है ?" 20 यीशु जी ने तिन्हा जो बोलेया, "से बाराह बिच का इक है, जे मेरे कने थाळी अन्दर हथ्थ पाया करदा है। 21 (किजोकी मळ्हु रा पुत्तर ता, जिय्याँ तिसेरे बारे अन्दर लिख्खेरा है, जांदा है अपण तिस) मळ्हु पर हाय जिसेरी वजह कने मळ्हु रा पुत्र पकड़वाया जान्दा है ! जे से मळ्हु पैदा ई नी होये रा हुन्दा, ता तिस ताँई खरा होणा थिया।"

### प्रभु भोज

22 जाँ से खाया ई करदे थिये, यीशु जी ने रोटी लेई, अते आसीस मंगी करी तोडी, अते तिन्हा जो दित्ती, ते बोलेया, "लेयो, ए मेरा जिस्म है। 23 फिरी तिन्हा ने डून्ना लेई करी सुकर कित्ता, अते तिन्हा जो दित्तेया; ते उन्हा सब जणयाँ ने तिस बिच का पित्तेया। 24 ते यीशु जी ने तिन्हा जो बोलेया, "ए वचन रा मेरा से खून है, जे मते जणयाँ ताँई रुढाया है 25 मैं तुसां जो सच्च सच्च बोल्दा कि अंगूर रा रस्स तिस रोज ताँई नी पीणा, जाँ ताँई परमेश्वर रे राज्य अन्दर नौआ ना पीयाँ।" 26 फिरी से भजन गाई करी बाहर जैतून रे पाहड जो चली गे।

### पतरस रे इन्कार री भविष्यवाणी

27 ताँ यीशु जी ने तिन्हा जो बोलेया, "तुसां सबनी जणयाँ ने ठोकर खाणी, किजोकि लिख्खेरा है : 'मैं रखवाले जो मारणा, ते भेड्डाँ ने तितर-बितर होई जाणा।' 28 अपण मैं अपणे जिन्दे होई जाणे का बाद गलील जो जाणा है।" 29 पतरस ने तिन्हा जो बोलेया, "जे सब जणे ठोकर खान ता खान, अपण मैं ठोकर नी खाणी।" 30 यीशु जी ने तिस जो बोलेया, "मैं तेरे कने सच्च बोल्दा कि अज ई रात्ती मुरगे रे दो बरी बाँग दैणे का पैले तैं तिन्न बरी मिन्जो पछियाणे का मुकरणा।" 31 अपण तिनिए होर बी जोर देई करी बोलेया,

“अगर मिन्जो तुसां कने मरणा बी पैंगा, तौं बी मैं तुम्हारे जो पछियानणे का कदी नी मुकरणा।” इय्याँ ई होरनां सब जणैयाँ ने बी बोलेया।

### गतसमनी मे प्रार्थना

32 फिरी से गतसमनी नां री इक जगह जो आए, ते तिन्हा ने अपने चेल्लेयाँ जो बोलेया, “जौं तौंई मैं प्राथना नी करी लिंदा तां तौंई इत्ते बेहई रेह्यो, । 33 ते से पतरस, याकूब अते युहन्ना जो अपने कन्ने लेई गे; ते बड़े ई परेसान अते तिन्हा री तबियत खराब होणा लगी पेई, 34 ते तिन्हा जो बोलेया, “मेरा मन बड़ा उदास है, इत्ते तौंई कि मैं मरणे वाळा है : तुसी इत्ते रुको अते जागदे रेह्यो।” 35 फिरी से थोड़े अग्रे गे अते भूईयां पेई करी प्राथना करणा लगे कि जे होई सकदा ता ए बेला मेरे का चली जाये, 36 अते बोलेया, “ओ अब्बा, ओ पिता, तुसी सब किछ करी सकदे; इस डून्गे जो मेरे नेडे का हटाई लेयो : तौं बी जिय्याँ मैं चाहन्दा तिय्याँ नी, अपण जे तुसी चाहन्दे सेहई हो।” 37 फिरी यीशु जी आये अते तिन्हा जो सुत्ते रा दिख्खी करी पतरस जो बोलेया, “ओ शमान, तू सुत्ते रा है ? के तू थोड़ी हाण तौंई बी नी जागी सकेया ? 38 जागदे ते प्राथना करदे रेह्यो ताकि तुसी परख अन्दर ना पेई जाओ। आत्मा ता त्यारा है, अपण सरीर कमजोर हिन्।” 39 अते से फिरी चली गे ते उन्हा ने सेई गल बोली के प्राथना किती। 40 फिरी आई करी तिन्हा जो सुत्ते रा दिख्खेया, किजोकी तिन्हेरी हाख्खियाँ निन्दर कने भरे री थियाँ; ते तिन्हा जो पता नी थिया कि इन्हा जो कै जवाब देईयो। 41 फिरी तिज्जी बरी आई करी तिन्हा जो बोलेया, “अवे सोन्दे रेह्यो अते अराम करो, बस, बेला आई रेह्या; दिख्खो महु, रा पुत्तर पापियाँ रे हथ्यां पकड़वाया जाणा लगेया। 42 उड्यो, चलदे! दिख्खो, मिन्जो पकड़वाणे वाळा नेडे आई रेह्या।”

### यीशु का धोक्खे कने पकड़आया जाणा

43 से ए बोलेया ई करदे थिये कि यहूदा जेहड़ा बाराह चेल्लेयाँ बिच का इक थिया, अपने कने परोहतां रे प्रधान, धर्म-गुरुआं अते पुरखां रे पास्से का इक बड़्डी भीड़ लेई करी झट्ट आई पुजेया, जिन्हा ने तलवारां अते सोठे लित्तेरे थिये। 44 यीशु जी जो पकड़वाणे वाळे ने तिन्हा जो एह पता दित्तेरा थिया कि जिस जो मैं चूमगा सेहई है, तिस जो पकड़ी करी जबरदस्ति लेई जाये। 45 से आया, अते झट्ट तिन्हेरे का आईकरी बोलेया, “ओ रब्बी!” अते तिन्हा जो बड़ा चुमेया। 46 तौं तिन्हा ने यीशु जी पर हथ्य पाई करी तिन्हा जो पकड़ी लेया। 47 तिन्हा बिच का जे नेडे खड़ितेरे थिये, इक ने तलवार छिक्की करी सबका बड़े परोहत्त रे नोकर पर चलाई दिती, अते तिसेरा कन्न उड़ाई दित्तेया। 48 यीशु जी ने तिन्हा जो बोलेया, “कै तुसी डाकू समझी करी मिन्जो पकड़णे तौंई तलवाराँ अते सोठे लेई करी निकळ रे हिन् ? 49 मैं ता हर रोज मन्दिर अन्दर तुसां कने रेहई करी सिक्सा दिन्दा थिया, ते तौं तुसां ने मिन्जो नी पकड़ेया : अपण एह इधेरे तौंई होया कि पवित्र सास्त्र री गल्ला पूरी होन् 50 तां से सारे चेल्ले यीशु जी जो छड़्डी करी नहस्सी गे। 51 इक जुआन महु अपने नंगे सरीर पर चादर लेई करी तिन्हेरे पिछ्छे चली पेया; अते महुआँ ने तिस जो पकड़ी लेया। 52 अपण से चादर जो छड़्डी करी नंगा नहस्सी गेया।

### महासभा रे सामणे यीशु जी

53 फिरी से यीशु जी जो सबका बड़े परोहत्त का लेई गे; ते सब परोहतां रे प्रधान, पुरखे अते धर्म-गुरु तिन्हेरे किठिह गे। 54 पतरस दूर ई दूर तिन्हेरे पिछ्छे-पिछ्छे सबका बड़े परोहत्त रे अंगण रे अन्दरा तौंई चली गया, अते नोकरा कने बेहई करी अग तपणे लगी पेया। 55 परोहतां रे प्रधान अते सारी सारी सभा यीशु जी जो मारी रखणे तौंई तिन्हेरे खलाफ बिच गवाई री तोप अन्दर थिये, अपण नी मिली। 56 किजोकी मते जह्ने तिन्हेरे खलाफ झूठी गवाईयाँ देया करदे थिये, अपण तिन्हेरी गवाईयाँ इक्क-जदेहई नी थियाँ। 57 तौं किछ महुआँ ने उठी करी तिन्हेरे खलाफ ए झूठी गवाई दिती, 58 “असां ने इस जो ए बोल्दे सुणे रा है, मैं इस हत्थ रे बणे रे मन्दिर जो ढाहई दैणा, अते त्रै रोजां अन्दर दुज्जा बणाई दैणा, जेहड़ा हत्थ कने नी बणे रा होणा।” 59 इस पर बी तिन्हेरी गवाई इक्क-जदेहई नी निकळी। 60 तौं सबका बड़े परोहत्त ने मझाटे खड़े होई करी पुछ्छेया, “तू कोई जवाब नी दिन्दा ? ए महु तेरे

खलाफ कै गवाई दिया करदे हिन् ?” 61 अपण से चुप्प ई रेह, ते कोई जवाब नी दित्तेया। सबका बड़े परोहत्त ने तिन्हा का फिरी पुछ्छेया, “कै तू उस परम धन्य रा पुत्तर मसीहा है ?” 62 यीशु जी ने बोलेया, “मैं है : ते तुसा महु रे पुत्र जो सबका सक्तिसाली रे सजे पास्से बैठेरा, अते अंबर रे बदळां कने आंदे दिखणा।” 63 ता सबका बड़े परोहत्त ने अपने कपड़ेयाँ जो फाडी करी बोलेया, “अवे असां जो गवाई दैणे वाळेयाँ री होर कै जरूरत है ? 64 तुसां ने ए ईश्वर री बुराई सुणी। तुम्हारी कै राय है ?” तिन्हा सबनां ने बोलेया कि ए मारी रखणे लायक है। 65 तौं ता कोई तिन्हा पर थुकणा, मुंह जो ढकणा, मुक्के मारणा, अते तिन्हा जो बोलणा लगे, “भविष्यवाणी कर!” अते अधिकारियां ने तिन्हा जो पकड़ी करी थप्पड़ मारे।

### पतरस रा इन्कार

66 जौं पतरस थल्ले अंगणा अन्दर थिया, ता सबका बड़े परोहत्त री नोकराणियाँ बिच का इक तिन्हे आई, 67 अते तिस ने पतरस जो अग तपदे दिख्खेया, अते तिस जो दिख्खी करी बोलणा लगी, “तू बी ता तिस नासरी यीशु कने थिया।” 68 से मुकरी गया, ते बोलदा, “मैं ना ई जाणदा अते ना ई समझदा कि तू कै बोलेया करदी है।” फिरी से बाहर डेवढी अन्दर गया; अते मुरगे ने बाँग दिती। 69 तिस नोकराणी ने पतरस जो दिख्खी करी जेहडे नेडे खड़ितेरे थिये, तिन्हा जो फिरी बोलणा लगी, “ए तिन्हा बिच का इक है।” 70 अपण से फिरी मुकरी गया। थोड़ी हाण बाद तिन्हा ने जेहडे नेडे खड़ितेरे थिये फिरी पतरस जो बोलेया, “तू जरूर तिन्हा बिच का इक है; किजो कि तू गलीली बी है।” 71 तौं से बुरी-भली लाणता दैणे अते कसम खाणा लगेया, “मैं उस महु जो, जिसेरे बारे अन्दर तुसी गल्ल करेया करदे हिन्, नी जाणदा।” 72 तौं तिस्सी बेले मुरगे ने दुज्जी बरी बाँग दिती। पतरस जो से गल्ल जेहडी कि यीशु जी ने तिस जो बोली थी, याद आई : “मुरगे रे दो बरी बाँग दैणे का पैले तैं तिन्न बेरी मिन्जो पछियानणे का मुकरणा।” ते से इस गल्ल जो सोची करी रोणा लगेया।

### पिलातुस रे सामणे यीशु जी

15 भ्याग हुन्दे ई झट-पट परोहतां रे प्रधान, पुरखे अते धर्म-गुरु ने बल्कि सारी सभा ने सलाह करी करी यीशु जी जो बहनी दित्तेया, अते तिन्हा जो लेई जाई करी पिलातुस रे हथ्यां बिच देई दित्तेया। 2 पिलातुस ने तिन्हा जो पुछ्छेया, “कै तू यहूदियाँ रा राजा है ?” तिन्हा ने तिस जो जवाब दित्तेया, “तू अप्पू ई बोलेया करदा है।” 3 परोहतां रे प्रधान तिन्हा पर मती गल्लां रे इल्जाम लगाया करदे थिये। 4 पिलातुस ने तिन्हा का फिरी पिछ्छेया, “कै तैं कोई जवाब नी दैणा, दिख्ख, ए तेरे पर कितणी सारी गल्लां रा इल्जाम लगाया करदे हिन् ?” 5 यीशु जी ने फिरी कोई जवाब नी दित्तेया; होर-ता-होर पिलातुस जो बड़ी हैरानी होई।

### यीशु जी जो मौत री सजा सुणाया जाणा

6 पिलातुस उस त्यहार अन्दर कुस्की इक कैदी जो जिस जो से महु चांदे थिये, तिन्हा तौंई छड़्डी दिंदा थिया। 7 बरअब्बा ना रा इक महु तिन्हा विद्रोहियां कने कैदी थिया, जिन्नी ने लडाई झगडे अन्दर कुस्की जो मारी रखेरा था। 8 अते भीड़ उप्पर जाई करी तिसेरे छन्दे करणा लगी, कि जिय्याँ तुसी असां तौंई करदे आये हिन् 9 पिलातुस ने तिन्हा जो जवाब दित्तेया, “कै तुसी चांदे कि मैं तुसां तौंई यहूदियाँ रे राजे जो छड़्डी देयाँ?” 10 किजोकी तिस जो पता थिया कि परोहतां रे प्रधाना ने तिस जो इधेरे तौंई पकड़वाया थिया, किजोकि से यीशु जी का फूक्किन्दे थिये। 11 अपण परोहतां रे प्रधाना ने महुआँ बिच हड़कंप पाई दिती कि से बरब्बा जो ई तिन्हा तौंई छड़्डी देयो। 12 एह सुणी करी पिलातुस ने तिन्हा का फिरी पुछ्छेया, “ता जिस जो तुसी यहूदियाँ रा राजा बोलदे तिस कने मैं कै करां?” 13 से फिरी लेरां मारी करी बोलणा लगे, “तिस जो सूळी पर चढाई दे।” 14 पिलातुस ने तिन्हा जो बोलेया, “किजो, इनि ए कै बुरा किन्तेरा है?” अपण से होर बी लेरां मारी करी बोलणा लगे, “तिस जो सूळी पर चढाई दे।” 15 तौं पिलातुस ने महुआँ री भीड़ जो खुस्स करणे तौंई बरअब्बा जो तिन्हा तौंई छड़्डी

दित्तेया, ते यीशु जी जो कोड़े लगवाई करी सूळी पर चढ़ाणे ताँई देई दित्तेया।

### सिपाईयां रा यीशु जी री बेजती करणा

16 सपाई तिन्हा जो किले रे अंगण अन्दर लेई गे जिस जो कि प्रीटोरियुम बोलदे, अते सारे सपाईयां जो सदवाई लेया। 17 ताँ तिन्हा ने यीशु जी जो बेंगणी रंग रे कपड़े पुआये ते कंड़ेयाँ रे ताज जो मरोडी करी तिन्हेरे सारा पर रख्खी दित्तेया, 18 ते एह बोल्ली करी तिन्हा जो नमस्ते करणा लगे, “ओ यहूदियाँ रे राजे, नमस्ते!” 19 से तिन्हेरे सारा पर सरकण्डे कने मारदे थिये, तिन्हा पर थुकदे, ते गोड़डे रे भारे बेहूई करी तिन्हेरी अराधना करी के तिन्हेरा मजाक उडान्दे थिये। 20 जाँ से तिन्हेरा मजाक उडाई बैट्टे, ता तिन्हेरे बेंगणी कपड़े खुलाई करी तिन्हेरे ई कपड़े पुआये; ताँ तिन्हा जो सूळी पर चढ़ाणे ताँई बाहर लेई गे।

### यीशु जी रा कुस पर चढ़ाया जाणा

21 सिकन्दर ते रूफुस रा प्यो शमौन, इक कुरेनी महु, जेहड़ा कि बाहर देश का सैहर जो आया करदा थिया तित्ते का निकलेया; तिन्हा ने तिस जो बेगार अन्दर पकड़ेया ताकि से तिन्हेरी सूळी चुक्की करी लेई चलो। 22 से यीशु जी जो गुलगुता नां री जगह पर, जिसेरा मतलब खोपडी री जगह है, लेई आए। 23 तित्ते तिन्हा जो हरड मिलाये री अंगूर री सराब दैणा लगे, अपण तिन्हा ने नी लिच्ची। 24 ताँ तिन्हा ने यीशु जी जो सूळी पर चढ़ाया ते तिन्हेर कपड़ेयाँ पर चिठ्ठियाँ पाई करी, कि कुस जो कै मिलदा, तिन्हा जो बंडी लेया। 25 अते दिन रा तिज्जा घंटा होई गेया थिया, जाँ तिन्हा ने यीशु जी जो सूळी पर चढ़ाया। 26 अते तिन्हेरा दोषपत्र लिखी करी तिन्हेरे उप्पर लगाई दित्तेया गेया कि “यहूदियाँ रा राजा”। 27 तिन्हा ने यीशु जी कने दो डाकू, इक तिन्हेरे सजे अते दुज्जा तिन्हेरे खब्बे पाससे सूळी पर चढ़ाई दित्ते। 28 ताँ पवित्रशास्त्र री से गल्ल कि से पापियाँ रे बराबर ठेहराया टेय, पुरा होइ गेया। 29 जे तित्ते का टपदा थिया से सर हिलाई-हिलाई करी ए बोल्ली करी तिन्हेरी ईश्वरिये बेजती करदे थिये कि, “वाह! मन्दिर जो द्वाणे वाळे, अते तिन्न रोज्जाँ अन्दर बनाणे वाळे ! 30 सूळी का उतरी करी अपु जो बचाई ले।” 31 इय्याँ ई परोहता रे प्रधान बी, सास्त्री समेत, अपु-मिते मजाक अन्दर बोलदे थिये, “इनि ए होरनां जो बचाया, अपण अपु जो नी बचाई सकदा। 32 इस्राएल रा राजा, मसीहा, अवे सूली का उतरी आओ कि असी दिख्खी करी विस्वास करन।” अते जे तिन्हा कन्ने सूळियाँ पर चढ़ाये थिये, से बी तिन्हेरी बेजती करदे थिये।

### यीशु जी रा मरणा

33 दिन रे नौम्म घंटे यीशु जी ने बड़े जोरे बोलेया, “इलोई, इलोई, लमा शबरकनी ?” जिसेरा मतलब एह है, “ओ मेरे परमेश्वर, ओ मेरे परमेश्वर, तँ मिन्जो किजो छड्डी दित्तेया ?” 34 जाँ धियाडा होणे पर पूरी धरती अन्दर निह्यारा होई गेया, ते दिन रे नौम्म घंटे ताँई रेह्या। 35 जेहड़े नेडे खडितेरे थिये, तिन्हा बिच का किच्छ जह्केयाँ ने एह सुणी करी बोलेया, “दिख्खो, एह एलिय्याह जो सद्देया करदा है। 36 अते इक जह्के ने दौड़ी करी स्पंज जो सिरके अन्दर डोब्वी करी, अते ईख पर रखी करी तिन्हा जो चुसाया अते बोलेया, “रुकी जा, दिखदे कि एलिय्याह इसजो उतारणे ताँई ईंदा कि नी। 37 ताँ यीशु जी ने बड़े जोरे लेर मारी करी प्राण छड्डी दित्ते। 38 मन्दिर रा परदा उपरा का झिक्का ताँई फटी करी दो हिस्से होई गेया। 39 जाँ यीशु जी जो इय्याँ लेर मारी करी प्राण दिन्दे दिख्खेया, ता तिनि ए बोलेया, “सच्ची एह महु, परमेश्वर रा पुत्र थिया। जे सूबेदार तिन्हेरे साह्णणे खडितेरा थिया, 40 जाँ यीशु जी गलील अन्दर थिये ता एह जनानियाँ तिन्हेरे पिच्छे चलदी थियाँ अते तिन्हेरी सेवा-टेहल करदी थियाँ; अते होर मती सारी जनानियाँ बी थियाँ, जे तिन्हा कन्ने यरुशलेम अन्दर आई थियाँ। 41 मती सारी जनानियाँ बी दूर खडी करी दिख्खेया करदी थियाँ : तिन्हा बिच मरियम मगदलीनी, छोट यीशु अते योसेस री अम्मा मरियम, अते सलोमी थी।

### यीशु जी रा दफन कित्तेया जाणा

42 जाँ सांझ होई गेई ता इधरे ताँई कि त्यारी रा रोज थिया, जे सब्त का इक रोज पैले हुन्दा, 43 अरिमतिया रा रैह्के वाळा यूसुफ आया, जे महासभा रा इक हिस्सा थिया अते अपु बी परमेश्वर रे राज्य री भाळ अन्दर रहन्दा थिया। से हिम्मत करी के पिलातुस का गेया अते यीशु जी री लास मंगी। 44 पिलातुस जो हैरानी होई कि यीशु जी इतणे तोळे मरी गे; अते तिनि ए सूबेदार जो सदवाई करी पुछ्छेया, “कै से किच्छ हाण ताँई मरी गेया थिया ?” 45 जाँ तिनि ए सूबेदार का सब किच्छ पता लाई लेया, ता यीशु जी री लास यूसुफ जो दुआई दित्तेया। 46 ताँ तिनि ए सन री इक चादर खरीदी लेई, अते लास जो उतारी करी तिस चादर अन्दर लपेटेया, अते इक कबर अन्दर जेहडी कि फाटी अन्दर खणेरी थी रख्खेया, अते कबर रे दरोजे पर इक पथर रुळकाई दित्तेया। 47 मरियम मगदलीनी ते योसेस री अम्मा मरियम दिख्खेया करदी थियाँ कि तिन्हा जो कुते रख्खेया गेरा है।

### यीशु जी रा जिन्दा होणा

16 जाँ सब्त रा रोज होई गेया, ता मरियम मगदलीनी, ते याकूब री मां मरियम, अते सलोमी ने खुस्बू वाळी चीज्जाँ खरीदी लेईयाँ कि आई करी यीशु जी पर मळी सकन। 2 ते अपु-मिते बोलणा लगियाँ, “असां ताँई कबर रे दरोजे का पत्थर कुण रुळकांगा ?” 3 हफते रे पैले रोजे भ्यागे ई जां सूरज निकलेया थिया से कबर जो गेईयां, 4 जाँ तिन्हा ने हाख्खी चुक्की करी दिख्खेया, ता दिख्खेया कि पत्थर रुळके रा ई थिया- से बड़ा ई बडुड़ा पत्थर थिया। 5 कबर अन्दर जाई करी तिन्हा ने इक जुआन जो चिट्टे कपड़े पाये रे सजे पाससे बैट्टेरे दिख्खेया, ते से बड़ी हैरान होई गेईयाँ। 6 तीनि ए उन्हा जनानियाँ जो बोलेया, “हैरान मत होआ, तुसी यीशु नासरी जो, तोपेया करदी हिन्, जिन्हा जो सूळी पर चढ़ाया गेया थिया, । से जीन्दा होई गेरे हिन्, इत्ते नी हिन्; दिख्खो, एहूई से जगह है, जित्ते तिन्हा ने यीशु जी जो रख्खेया थिया। 7 अपण तुसी जाओ, ते तिन्हेरे चेलेयाँ ते पतरस जो बोलेो कि तिन्हा ने तुसां का पैले गलील जो जाणा। जिय्याँ तिन्हा ने तुसां जो बोलेया थिया, तुसां ने तिन्हा जो तित्ते ई दिखणा।” 8 अते से तित्ते का झट-पट निकळी आई ते कबर का नहस्सी गेईयाँ; किजो कि से कम्मी अते घबराई गेरियाँ थियाँ; ते तिन्हा ने कुस्की जो बी किच्छ नी दरसेया, किजो कि से दसणे का डरदी थियाँ।

### मरियम मगदलीनी जो यीशु जी रा दिखणा

9 हफते रे पैले रोजे तडके ई से जनानियाँ कबर पर तिस खुशबू वाळे लेप जो, जिस जो तिन्हा ने त्यार कित्या थिया, लेईकरी आई। 10 तिसा जाई करी जे यीशु जी कने थिये, जे उदास ते रोया करदे थिये, एह बसेख दित्तेया। 11 तिन्हा ने ए सुणी करी कि यीशु जी जिन्दे हिन् अते मरियम मगदलीनी ने उन्हा जो दिख्खेया, इस गल्ल पर विस्वास नी कित्तेया।

### दो चेलेयां जो यीशु जी जो दिखणा

12 इसका बाद से दुजे रूप बिच तिन्हा बिच का दो जह्केयाँ जो, जाँ से ग्रॉ पाससे जाया करदे थिये, लिब्बे। 13 तिन्हा ने बी जाई करी दुजेयाँ जो बसेख दित्तेया, अपण उन्हा ने तिन्हेरा बी विस्वास नी कित्तेया।

### ग्यारा चेलेयां रा यीशु जी जो दिखणा

14 पिच्छे तिन्हा ग्यारेयां जो बी, जां से रोट्टि खाणे ताँई बैट्टे रे थिये, दिस्से, इन्हा ने इन्हेरा भरोसा नी कित्तेया। ते तिन्हा जो बोलेया, “तुसी सारी दुनिया बिच जाई करी सारी दुनिया रे लोकां जो सुसमाचार सुणाओ। 15 ते तिन्हा ने तिन्हेरे जो बोलेया, “ तुसी सारी दुनिया बिच जाई करी सारी दुनिया रे लोकां जो सुसमाचार सुणाओ। 16 जेहड़ा विस्वास करणा कने बपतिस्मा लिन्हा तिसेरा ई उद्धार होणा, अपण जेहड़ा विस्वास नी करणा से गुनेह्यार मन्नेया जाणा; 17 विस्वास करणे वाळेयाँ अन्दर एह निसानियाँ होणियाँ कि

तिन्हा मेरे नां कने बुरी आत्मां जो कढणा, नोई-नोई भाषा बोलणियाँ,  
 18 तिन्हा कीड़ेयां जो चुक्की लैणा, अते जे से जैहरीली चीज बी पी जान्ने ताँ  
 बी तिन्हेरा कोई नुकसान नी होणा; तिन्हा बमारां पर हत्थ रखणा, ते तिन्हा  
 खरे होई जाणा।”

### यीशु जी रा स्वर्ग वापस जाणा

19 प्रभु यीशु जी उन्हा कने गलां करणे का बाद स्वर्ग पर चुक्की लिक्ते गे, ते  
 परमेश्वर रे सजे पाससे बेहई गे। 20 ते तिन्हा ने निकळी करी हर जगह प्रचार  
 कित्तेया, ते प्रभु तिन्हेरे कन्ने कम्म करदे रेह, अते तिन्हा निसानियाँ रे जरिए  
 जेहड़ी कन्ने कन्ने हुन्दी थियाँ, वचनां जो पक्का करदे रेह। आमीन।

## लूका

1 थियुफिलुस जी, इस धरती बिच जेड़े कम्म यीशु मसीह जी ने कित्ते दे हिन, तिन्हा कम्मा रे बारे बिच बड़े महुआं ने लिख्खेया। अते तिन्हा सबनी कम्मा री जानकारी असां आम-महुआं ताँई पुजाणे वाळे यीशु जी रे से चेले हिन, जिन्हा ने एह सब किच्छ अपणी हारखी कने हुन्दा दिख्खेया, किजोकि से सुरु का ई यीशु जी री समाज-सेवा बिच तिन्हेरे कने थिये, कने इन्हा जो छड़ड़ी करी असां जो उन्हा महुआं का बी थोड़ी-मत्ती जानकारी मिली, जेड़े कि तिस्स बेले तित्ते थिये।<sup>2</sup> इधेरे ताँई यीशु जी रे पैदा होणे का लेई करी स्वर्गा बिच जाणे तक रे बारे री सारी जानकारी जो खरा-कने परखी-पुरखी लैणे का बाद मैं एह फैसला लिचेया, कि यीशु जी ने जे किच्छ बी कित्तेया, तिन्हेरे बारे बिच मैं तुसां जो ध्यान कने अते पूरा सही-सही लिख्खां,<sup>3</sup> ताकि थियुफिलुस जी, तुसी एह जाणी सकन कि यीशु जी रे बारे अन्दर जिन्हा गलां जो तुसां ने सिख्खेया अते जिन्हा जो तुसी सच्च मन्दे हिन, से पूरी तरह कने सही अते पक्की हिन।<sup>4</sup> यहूदिया नां रा इक देश थिया, तित्ते हेरोदेस ना रा इक राजा, राज करदा थिया। तिस्स बेले जकरयाह नां रा इक यहूदी परोह्त थिया, जेह्दा कि अबीय्याह रे झुण्ड अरा परोह्त थिया, अते तिसेरी लाड़ी रा नां इलीशिबा थिया, जेड़ी जे हारुन<sup>b</sup> रे खानदान री थी।

### यहूना रे पैदा होणे रा एलान

<sup>5</sup> जकरयाह अते इलीशिबा परमेश्वर री नजरां बिच खरे अते नेक महु थिये, अते तिन्हेरा चाल-चलन प्रभु रे सबनी हुकमां अते रीति-रवाजां रे साहब कने बेकसुर थिया।<sup>6</sup> अपण इलीशिबा इक ओत्तर जनानी थी, इधेरे ताँई तिन्हेरी कोई औलाद नी थी, अते से दोई जणे बड़े सियाणे बी होई गे रे थिये।

<sup>7</sup> जाँ जकरयाह रे झुण्ड री बारी, मन्दिर बिच परोह्त रा कम्म करणे ताँई आई, अते से परमेश्वर री सेवा करणे ताँई तित्ते ई थिया।<sup>8</sup> तां परोह्तां रे चलाये रे रिवाज रे साहब कने पर्ची जकरयाह रे नां री निकळी, कि से परमेश्वर रे मन्दिर बिच जाई करी धूप बाळे।<sup>9</sup> जाँ धूप बाळणे री बारी आई ता झुण्ड रे सारे महु कड़ीह करी बाहर प्रार्थना करणा लगे<sup>10</sup> जकरयाह मन्दिर बिच ई थिया, कि तिस्सी बेले परमेश्वर रा इक स्वर्गदूत तित्ते धूप री थडी रे सजे पासे आई खड़ा होया।<sup>11</sup> जकरयाह स्वर्गदूत जो दिख्खी करी बड़ा घबराई गया, जिह्यां कि तिसेरे प्राण ई मुह्आं आई रे होन।<sup>12</sup> अपण तिस्स स्वर्गदूत ने उस जो बोल्या, "जकरयाह, डरां मत! किजोकि जे तू चांदा, परमेश्वर ने तिजो से देई दैणा, अवे तेरी लाड़ी इलीशिबा ने, जेड़ी जे ओत्तर है, दुपराणी होणा अते तिन्हेरे इक निके जो जमणा, अते तैं तिस्स निके रा नां यहूना रख्खणा।<sup>13</sup> तिसेरे पैदा होणे पर तिजो ता खूसी होणी ई, अते तिन्हेरे जिस बेले बड़े होणा ता होरनी महुआं ताँई बी खूसी री वजह बनणा।

<sup>14</sup> किजोकि तिन्हेरे प्रभु जी री नजरा बिच महान महु होणा, अते तिन्हेरे कदी बी दाखरस कने दारु नी पीणी, अते तिन्हेरे पैदा होणे का पैले ई पवित्र आत्मा रे वस बिच होणा।<sup>15</sup> तिन्हेरे इस्त्राएल रे मते जणे महुआं का तिन्हेरे पापां का तौबा करणी अते तिन्हा जो प्रभु-परमेश्वर रे पास्से लियाणा।<sup>16</sup> तिन्हेरे परमेश्वर री सक्ति बिच रेहई करी महुआं जो परमेश्वर रे बारे बिच सिखाणा, अते इन्हे बी एलियाह साहई होणा, अते इन्हे यीशु जी रे आंणे का पैले ई महुआं रे मना बिच परमेश्वर रे वचन रा बी बोणा, तिन्हेरे माँ-प्यो जो अपणे निके-निकेयां कने प्यार करणा सिखाणा, अते जे हुकमां जो नी मनणे वाळे हिन, तिन्हा जो परमेश्वर रे रस्ते पर चलणे वाळे खरे अते नेक महुआं साहई बणाई दैणा।

<sup>17</sup> ताँ जकरयाह ने स्वर्गदूत जो पुछ्छेया, कि मैं किह्यां मन्त्री लेयां कि एह सब किच्छ जे तू बोलेया करदा है सच्च होई जाणा? किजोकि, मैं ता बड़ा

सियाणा महु है, अते मेरी लाड़ी बी सियाणी है।<sup>18</sup> ताँ स्वर्गदूत ने तिस्स जो बोलेया, मैं जिब्राईल है, "मैं ओ स्वर्गदूत है, जेह्दा हर बेले परमेश्वर रे सामणे खड़ा रह्न्दा। मिन्जो परमेश्वर ने तेरे का इधेरे ताँई भेजेया कि एह खुसखबरी मैं तिजो सुणाई आँ।<sup>19</sup> अपण दिख्ख, अब्बे मैं जे किच्छ बी तिजो बोलेया, तिन्हा गलां पर तैं विस्वास नी कित्तेया, इधेरी ताँई अवे जाँ ताँई तेरा निक्का पैदा नी होई जान्दा, ताँ ताँई तैं अपणे मुह्आ का किच्छ बी बोली नी सकणा।<sup>20</sup> तित्ते बाहर सारे महु जकरयाह रा मन्दिर का बाहर आणे री भाळ बिच थिये, अते तिन्हा जो एह गल्ल खाई चले री थी की से एड्डी हाण अन्दर कै कमाया करदा है? <sup>21</sup> फिरी जाँ से बाहर आया, ता तिस का किच्छ बी बोली नी होया। अते तिसेरी हरकतां जो दिख्खी करी महु समझी गे, कि इन्हे मन्दिर बिच जाई करी जरूर परमेश्वर रा कोई दरसन दिख्खेया होणा।<sup>22</sup> फिरी जिस बेले जकरयाह रे मन्दिर बिच सेवा करणे रा बेला पूरा होई गया ताँ से अपणे घरे जो हटी गया।

<sup>23</sup> फिरी थोडे रोजां बाद, इलीशिबा दुपराणी होई कने से पन्ज मिहे ताँई महुआं री नजरां का दूर रेहई,<sup>24</sup> "परमेश्वर का खूस होई करी बोल्णा लगी, परमेश्वर बड़े रह्ण दिल हिन, कि तिन्हा ने मेरी सुणी लेई अते मेरे साहई बुड़्डी जनानी बी दुपराणी होई गई। तिन्हा ने मिन्जो महुआं अग्रे मूह दसणे जोग्गा करी दित्ता।"<sup>25</sup> छेमे महिनै बाद परमेश्वर री तरफ का जिब्राईल स्वर्गदूत जो, गलील रे नासरत सैहर बिच,

### यीशु जी रे पैदा होणे रा एलान

<sup>26</sup> इक कुआँरी कुड़ी का भेजेया तिस्स कुआँरी कुड़ी रा नां मरियम थिया, जिसेरी मंगणी यूसुफ नां रे इक महु कने होये री थी अते से दाऊद रे खानदान रा थिया।<sup>27</sup> जिब्राईल मरियम का आई करी बोल्णा लगेया, तेरी जे हो! तेरे पर परमेश्वर ने दया कित्ती, अते तिन्हेरा हत्थ तेरे पर है।<sup>28</sup> स्वर्गदूत री इस गल्ल का घबराई करी मरियम इस सोच्चा बिच पेई गई कि इसेरी इन्हा गलां रा कै मतलब होई सकदा? <sup>29</sup> ताँ स्वर्गदूत ने मरियम जो बोलेया, डरां मत, किजोकि परमेश्वर री दया तेरे पर होये दी है। अवे तैं दुपराणी होणा अते इक निके जो पैदा करणा, जिसेरा नां तू यीशु रख्खेयां।<sup>30</sup> अवे तैं दुपराणी होणा ते इक निके जो जमणा, जिसेरा नां तू यीशु रख्खेयां।<sup>31</sup> से निक्का बड़ा महान होणा अते तिस्स जो महुआं ने परम-परमेश्वर रा निक्का मनणा अते होर ता होर, परमेश्वर ने तिस्स जो दाऊद राजा रा राज-पद दैणा।<sup>32</sup> अते तिन्हेरे सारी उमर ताँई याकूब रे खान-दान पर राज करणा अते तिसेरा राज कदी बी नी मुकणा।<sup>33</sup> एह सुणी करी मरियम ने जिब्राईल स्वर्गदूत जो बोलेया, एह कियां होई सकदा, किजोकि मैं ता कुआँरी ई है।"<sup>34</sup> ताँ जिब्राईल स्वर्गदूत ने मरियम जो बोलेया, "पवित्र आत्मा ने तेरे पर उतरणा अते परमप्रधान री सक्ति ने तेरे पर छा करणी अते से पवित्र जे पैदा होणा, तिस जो परमेश्वर रा पुत्र बोलेया जाणा।<sup>35</sup> होर ता होर, तेरी रिश्तेदार इलीशिबा, जिस जो सब महु ओत्तर समझदे थिये, से बी दुपराणी है होई गेरी कने तिस्स जो इस बेले छेम्मा म्हीना लगे रा है।<sup>36</sup> किजो कि परमेश्वर ताँई किच्छ बी मुस्किल नी है <sup>37</sup> फिरी मरियम ने बोलेया, "दिख्ख, मैं ता परमेश्वर री नौकर है। तू जियां बोलेया तियां ई मेरे कने हो।" ताँ फिरी स्वर्गदूत तित्ते का चली गया।<sup>38</sup> थोडे रोजां बाद मरियम यहूदिया नां रे इक पाहडी गाँ बिच जकरयाह रे घरे जो गई।



### मरियम रा एलीशिबा कने मिलणा

39 अते तित्ते तिन्हे जकरयाह री लाडी, इलीशिबा जो नमस्ते किती।  
40 अते ईय्यां होया कि जिस बेले मरियम ने इलीशिबा जो नमस्ते किती, तिस्सी बेले इलीशिबा रे पेडा बिच निक्का उटकी पेया अते इलीशिबा पवित्र आत्मा रे गलाए, 41 अते मरियम ऊच्ची अवाज बिच बोल्णा लगी, “तू धन्न है अते जिस निक्के जो तैं जमणा, से बी धन्न है 42 मेरे पर एह दया किय्यां होई कि मेरे प्रभू री माँ अप्पु चली करी मेरे कने मिल्णा मेरे घरे जो आई। 43 किजो कि जिह्यां ई तुसां ने मिन्जो नमस्ते बोलेया, तिह्यां ई मेरे पेडा बिच निक्का खूसी कने उटकी पेया। 44 धन्न है से जिनिए भरोसा किता कि जे गल्ला प्रभू रे पास्से का तिस जो दसी री गेरी थी, से पुरी हुणी।” 45 तां मरियम ने बोलेया, कि मैं अपने परमेश्वर रे नां री मन का बड़ाई करदी

### मरियम रा परमेश्वर री स्तुती करणा

46 अते मेरी आत्मा मेरे उद्धार करणे वाळे परमेश्वर का बड़ी भारी खूस है 47 तिन्हा ने अपनी नौकराणी रे निम्तेपन पर कृपा दृष्टि किती, कने आज का बाद अब्बे का लेईकरी जुग-जुगान्तर री पीढीयां ने मिन्जो बोलेणा कि, तू ता बड़ी धन्न है। 48 किजोकि उस शक्तिसाली परमेश्वर ने मेरे ताई बड़े बड़े बड़े कम्म किचे रे हिन, तिन्हेरा नां पवित्र है, तिन्हा । 49 अते तिन्हेरी दया उन्हा सबनी महुआं पर है जेहडे कि तिन्हेरा उर मन्दे, अते तिन्हा पर दया आणे वाळी सारी पीढीयां ताई बणी रहैली। 50 सक्तिसाली परमेश्वर ने अपनी बाईय्यां री सक्ति दरखाई, अते जे दिल का घमंडी थिये, तिन्हा घमण्डियां रा घमण्ड तोड़ी दिता 51 तिन्हा ने घमंडी राज्ञेयां जो तिन्हेरे राज-पद का हटाई दिता, अते निम्ते महुआं जो तिन्हेरी जगह पर बठाया। 52 तिन्हा ने भुखेयां जो खरी खरी चीजां कने रजाया, अपण अमीरां जो खाली हथ भेजी दित्तेया। 53 तिन्हा ने अपने इस्त्राएली महुआं जो सम्भाळी लेया, जिह्यां कि परमेश्वर ने म्हारे पुरखां जो अपने वचना का बोलेया थिया, 54 तिन्हा ने अपने महुआं पर दया रखणी, अते इस गल्ल जो चेत्ता रखेया, जे अब्राहम अते तिसेरे खानदान पर हमेसा बणी रहैली, जिह्यां कि तिन्हा ने म्हारे पुरखां जो बोले रा थिया। 55 मरियम कोई त्रै मिहे ताई इलीशिबा कने रेहई फिरी तिसेरे बाद से अपने घरे जो चली गई। 56 फिरी इलीशिबा रा लौकिणे रा बेला आई गया अते तिसेरे घरे इक निक्का पैदा होया।

### यहूना बपतिस्मा दैणे वाळे रा जनम

57 तिसेरे गुआन्ड अते रिस्तेदारों ने जिस बेले एह गल्ल सुणी कि परमेश्वर ने तिस्स पर दया किती, ता तिन्हा बी इलीशिबा कने मिली करी बड़ी खुसियां मनाईयां। 58 अते फिरी अठमे रोजे निक्के रे खतनेह ताई जकरयाह रे रिस्तेदार तित्ते आये, अते से प्यो रे नां पर तिस निक्के रा नां जकरयाह रखणा लगी पे 59 तिस्सी बेले इलीशिबा बोली पेई, “कि ना, इसेरा नां ता यहूना रखणा है।” 60 ताँ तित्ते आये रे महु बोल्णा लगे कि तेरे रिस्तेदारों बिच ता एह नां कुसेरा बी नी है। 61 ताँ फिरी तिन्हा महुआं ने जकरयाह जो इसारा करी के पुच्छेया, कि तू इसेरा के नां रखणा चाहन्दा? 62 जकरयाह ने इस गल्ल जो बोल्णे ताई इक पट्टी मंगाई अते तिस्स पर लिख्खी दिता, “इसेरा नां यहूना रख्या जाए।” एह दिख्खी करी सब जणे हैरान होई गे। 63 तखणी जकरयाह रा मुंह खुली गया अते मुंह खुलदे ई से परमेश्वर रा सुकर करणा लगी पेया। 64 तिसेरे अक्खी-बक्खी जिन्ने बी महु थिये, से सब एह दिख्खी करी बड़े डरी गे। इस गल्ल री खाप्प यहूदिया रे सारे पहाडी इलाके बिच पेई गई। 65 जिन्हा ने बी एह गल्ल सुणी, से अपने मनां बिच सोचणा लगे, “कि एह निक्का कदेया होणा?” किजोकि इस पर ता खुद, परमेश्वर रा हत्थ है। 66 फिरी यहूना रा प्यो, जकरयाह, पवित्र आत्मा रे गलाए भविष्यवाणी करणा लगेया।

### जक रयाह रा परमेश्वर री स्तुती करणा

67 कि “इस्त्राएल रे प्रभु परमेश्वर री जे हो! किजो कि तिन्हा ने अपने महुआं जो बचाणे ताई इक मदतगार भेजेया, अते अपने महुआं जो पाप का छुड़ाया। 68 तिन्हा ने म्हारे ताई अपने नौकर, दाऊद रे खानदान का असां

जो इक बचाणे वाळा उद्धारकर्ता दिता 69 (जिह्यां कि तिन्हा ने बड़े पैले ई पवित्र भविष्यवक्तां रे जरिये, जेहडे कि दुनिया रे सुरु हुन्दे का ई चले आया करदे हिन, तिन्हा का वचन दिता थिया। 70 तिन्हा ने म्हारे दुस्मणां का अते तिन्हा सबनी जणेयां का, जेहडे कि असां का रडदे, तिन्हा का असां जो बचाणे रा वचन दिता थिया 71 अते म्हारे पुरखां पर दया किती, अपने पवित्र वायदे जो नी भूलेया 72 अते से कसम जेहडी परमेश्वर ने म्हारे पुरखज, अब्राहम कने खाई थी। 73 कि से म्हारे दुस्मणां रे हत्थां का असां जो बचाई लिन्ने, ताकि असी बगैर डरे रे परमेश्वर री सेवा करदे रहै। 74 अते सारी उमर-भर, ते हर रोज, परमेश्वर रे अगगे पवित्र, अते खरे अते नेक रेहई सकन। 75 अते ओ निक्केया, अवे तैं परम-परमेश्वर रा भविष्यवक्ता होणा, किजो कि तैं प्रभु जी रे अगगे-अगगे चली करी तिन्हेरे ताई महुआं जो तयार करणा। 76 अते तिन्हेरे महुआं जो एह बोल्णा कि तिन्हेरे पापों री माफी कने ई तुम्हारा उद्धार होणा। 77 एह सब म्हारे परमेश्वर री उस रहैत कने होणा, जिसेरी वजह कने ऊपर का असां पर भ्यागा री पैली लो पैणी। 78 जेहडा कि न्हारे अते मौत री छाँ बिच बैठे रे हिन तिन्हा पर से लौ चमकणी ताकि से म्हारे पैरां जो अच्छाई रे रस्ते पर चलाई सकन।” 79 जिह्यां-जिह्यां जकरयाह रा निक्का, यहूना, मोटिन्दा गया, तिह्यां ई से आत्मिक तरिके कने बी पक्का हुन्दा गया। अते इस्त्राएली लोकां रे सामणे आणे का पैले से बंजर जगह बिच ई रहन्दा थिया। 80 तिन्हा रोजां बिच रोम रे राजे, ओगुस्तुस ने ऐ हुक्म दिता की सारे महु गिणे जाये ताकी तिन्हेरे का चुँगी वसूली जाए ।

### यीशु जी रा जनम

2 एह जनगणना तिस्स बेले होई थी, जाँ सीरिया राज्य दा राज्यपाल क्विरिनियुस थिया, अते एह जनगणना पैली बारी होया करदी थी। 2 सब महु नां लिखाणे ताई अपने-अपणे सैहर जो गये। 3 ते यूसुफ जेहडा कि गलील परदेस रे नासरत सैहर अन्दर रहन्दा थिया, तिस जो बी यहूदिया परदेस अन्दर बैतलहम सैहर जो जाणा पेया, किजोकि से दाऊद राजे रे टब्बरे रा थिया ते तिसेरे पुरखज बैतलहम सैहर अन्दर रहन्दे थिये। 4 ते से अपनी मंगेतर मरियम, जेहडी कि उस बेले दुपराणी थी, तिस जो बी अपु कन्ने नां लखाणे जो लेई गया। 5 तिन्हेरे बैतलहम बिच पुजदे ई मरियम जो पीडां लगी पेईयां ते तिसेरे जमणे रा बेला आई गया, 6 ते मरियम जो जमणे ताई तित्ते कुस्की बी सरां अन्दर जगाह नी मिली, इधरे ताई तिस जो इक गुआड अन्दर लेई जाणा पेया, ते तित्ते तिनिए अपने जेठे निक्के जो जम्मया अते तिस जो फालडी अन्दर लपेटी करी चरीह अन्दर रख्या। 7 ते तधाडी ई तिस इलाके अन्दर किछ्छ पुहाळ रात्ती बेले अपने धणा रा द्रबडा अन्दर पैहा देया करदे थिये।

### स्वर्गदूतां रा पुहाळां जो खबर दैणा

8 ते तिस बेले इक परमेश्वर रा स्वर्गदूत तिन्हेरे मुहाग्गर आई खडा होया, ते प्रभु री चमक ने तिन्हा जो चौं-पास्से का घेरी लेया, ते एह सब दिख्खी करी से बड़े-भरी डरी गे। 9 ते तिस बेले स्वर्गदूत ने तिन्हा जो बोल्या, तुसां डरो मत किजोकि दिख्खो, मैं तुसां जो इक इदेही खुसी री खबर सुनाणी, जेहडी जे सबनी महुआं ताई होणी, 10 ते ओ खुसखबरी एह है, कि अज दाऊद रे सैहर बैतलहम अन्दर सबनी महुआं ताई इक मुक्तिदाता रा जन्म होया, अते सेहई मसीह प्रभु जी हिन। 11 ते तुसां जो इस गल्ल रा भरोसा करणे ताई एह पछाण दिन्दा, कि तुसां ने इक निक्के जो फालडी बिच लपटितेरा, चरिह अन्दर दिख्खणा।” 12 तिस्सी बेले, चाण-चक्केई तिस स्वर्गदूत कन्ने मते सारे स्वर्गदूतां रा झुण्ड परमेश्वर री बड़ाई करदे करदे लिबेया ते से बोलणा लगे, 13 “स्वर्ग अन्दर परमेश्वर री बड़ाई हो ते धरती अन्दर तिन्हा महुआं अन्दर सान्ति हो, जिन्हा कने परमेश्वर खुस हिन।” 14 जिस बेले से स्वर्गदूत तित्ते का वापस स्वर्ग जो हटी गे तां पुहाळ अपु-मिते बोलणा लगे, “चलो, असां बैतलहम जाई करी एह जे अनोखी गल्ल होई, जिस्सेरे बारे अन्दर प्रभु जी ने असां जो अपने स्वर्गदूत जो भेजी करी बोली, असां दिख्खी आन्दे।” 15 ते तिस्सी बेले से चली गे। ते तित्ते जाईकरी तिन्हा ने मरियम ते यूसुफ जो इक गुआडी बिच, ते तिस निक्के जो फालडी अन्दर लिपटितेरा चरिह अन्दर

लेटेरा दिखेया। 16 एह सब दिखी करी से सारी गल्लां जे इस निके रे बारे अन्दर तिन्हा पुहाळां जो बोले री थियां, तिन्हा ने उते रे सबनी महुआं जो बी दसीयां, 17 जितणे बी महुआं ने पुहाळां री एह गल्ल सुणी, से सब महु हरान होई गे। 18 अपण, मरियम इन्हा सबनी गल्लां जो अपणे मना बिच रखी करी सोचदी रेहई। 19 ते पुहाळ जिह्यां तिन्हा जो बोले रा थिया, तिह्यां ई सब किछ दिखी-सुणी करी परमेश्वर री जै जै कार अते बड़ाई करदे-करदे वापस द्रबड़ा जो अपणे धणा का हटी गे। 20 यीशु जी रे पैदा होणे का अहु रोजां बाद, तिन्हेरा खतना होया ते तिन्हेरा नां यीशु रख्या गया, जिह्यां कि तिन्हेरे पैदा होणे का पैहे ई स्वर्गदूत ने मरियम जो बोल्या थिया।

### यीशु जी रा नां रखेया जाणा

21 जां यीशु जी चाळी रोजां रे होई गे ता मूसा भविस्वयाणी करणे वाळे रे नियम रे साहब कने तिन्हेरे सुच्चा होणेa रा बल्ला आया इधेरे ताई से यीशु जी जो लेई करी प्रभु परमेश्वर का सौंपणे ते सुच्चा होणे ताई यरुशलेम जो गे।

### देहरे बिच यीशु जी रा अर्पण

22 (जिह्यां कि प्रभु परमेश्वर रे नियमां बिच लिखे रा है, कि जिसेरा जेह्वा निक्का हो, से निक्का परमेश्वर रा ई कम्म करन अते प्रभु जो समर्पित कित्तेया जान)। 23 ते परमेश्वर रे नियम रे साहब कने घुघी रा इक जोड़ा या कबूतरे रे दो बच्चेयां जो बलि करी के परमेश्वर जो चढ़ाये जान", इधेरे ताई से बलि चढ़ाणे जो लेई गे। 24 यरुशलेम अन्दर शमौन नां रा इक महु रेहन्दा थिया। से परमेश्वर रे रस्ते पर चलणे वाळा भला अते नेक महु थिया, ते इस्त्राएल रे महुआं री भलाई ताई प्राथना करदा रेहन्दा थिया, ते पवित्तर आत्मा रे गलाये चलदा थिया।

### शमौन रा गीत

25 ते पवित्तर आत्मा ने तिस जो दस्से रा थिया, कि तैं तां ताई नी मरणा है, जां ताई तू परमेश्वर रे भेजे रे मसीह जो अपणी हाखी कने दिखी नी लिहंगा। 26 फिरी शमौन जो पवित्तर आत्मा\* ने यरुशलेम रे देहे अन्दर जाणे जो बोल्या, ते तिस्सी रोजे यूसुफ कने मरियम नियम रे साहब कने अपणे निके, यीशु जो देहे अन्दर लेई आये ताकि से अपणे निके जो परमेश्वर रे अगे सौंपी सकन। 27 शमौन तिस बेले देहे अन्दर ई थिया, ते से यीशु जी जो अपणी खोख्खा चुकी करी परमेश्वर री बड़ाई करदे- करदे बोलणा लग्गोया: 28 "ओ मेरे प्रभु जी, अवे मैं सान्ति कने मरी सकदा, किजोकि तुसां री बोले री गल्ल अज्र पूरी होई गेई, 29 किजोकि, मैं अपणी हाखी कने तुसां रे भेजे रे मुक्तिदाता जो दिखी लेया, 30 जिस जो तुसां ने दुनिया रे सबनी महुआं ताई भेजेया। 31 ताकि एह मसीह होर जातियां रे महुआं ताई लौ बणी सके ते इस्त्राएल रे महु जेहडे कि तुसां रे अपणे हिन, तिन्हा ताई एह परमेश्वर री महिमा लियाणे री वजाह होणा।" 32 यीशु जी रे बारे अन्दर इदेही गल्लां सुणी करी, यूसुफ ते मरियम हरान होई गे। 33 फिरी शमौन ने तिन्हा जो असीस देई करी यीशु जी री मां, मरियम जो बोल्या, एह निक्का इस्त्राएल रे बडे महुआं जो उठाणे ते गिराणे ताई इक इदेही निशाणी है जिसेरे खलाफ बडे जहेया ने खडे होणा। 34 ~ते से गल्लां तेरे मना जो छुरी साहई चुभणियां, जिन्हा जो सुणी करी मन्ना तेरे प्राण मुह्मां ई आई रे होन, अपण इन्हा सब गल्लां कने बडे जहेयां रे सोच-बिचार सामणे आई जाणे। 35 अशेर गोत्र बिच का फनुएल री कुडी हन्ना इक भविस्वयाणी करणे वाळी थी, तिसेरे ब्याह जो हले कोई सत्त साल ई होये रे थिये, कि तिसेरा लाड़ा मरी गया।

### हन्नाह री गुआई

36 ते से फिरी चुरास्सी सालां ताई विधवा ई रेहई। तिनिए देहा कदी बी नी छडेया। ब्रत अते प्राथना करदे परमेश्वर री भक्ति करदी रेहन्दी थी। 37 से तिस्सी बेले तिन्हा का आई, जिस बेले शमौन, यूसुफ ते मरियम कने गल्लां करेया करदा थिया, ते हन्ना ने आई करी परमेश्वर रा सुकर कित्तेया ते यरुशलेम रे महुआं जो जेहडे कि रोमियां री गुलामी का छुटकारे री भाळ अन्दर थिये तिन्हा जो इस निके रे बारे अन्दर दस्सेया। 38 फिरी जिस बेले से

परमेश्वर रे नियम रे साहब कने सब किछ पूरा करी बेट्टे, ता अपणे घरे, नासरत जेहड़ा कि गलील रा इक सैहर है, तित्ते जो हटी गे।

### नासरत जो वापस हटणा

39 ते तित्ते यीशु जी जिस्मानी ते आत्मिक गल्लां अन्दर मुटिंदे गे। से समजदार थिये ते परमेश्वर री मैहर तिन्हा पर थी। 40 फसह रे त्हार पर हर साल यूसुफ ते मरियम यरुसलेम जान्दे थिये।

### बचपन बिच यीशु जी रा देहरे बिच जाणा

41 जां यीशु जी बाराह साले रे होये, ता से हर बरी साहई फसह रा त्यहार मनाणे ताई यरुसलेम जो गे। 42 जां त्यहार खतम होया ते से घरे जो हटेया करदे थिये ता यीशु जी यरुशलेम बिच ई रेई गे। एह गल्ल तिन्हेरे मां प्यो जो पैहे ध्यान बिच नी आई कि तिन्हेरा निक्का तिन्हा कन्ने नी है। 43 तिन्हा ने एह समझेया, कि तिन्हेरा निक्का होरनी महुआं कने होणा, जां से पूरी ध्याडी सफर करदे रे तां से यीशु जी जो अपणे रिस्तेदरां अन्दर तोपणा लग्गे। 44 अपण जां तिन्हा जो अपणा निक्का नी मिलेया तां से दोहई जहे तिस्सो तोपदे-तोपदे यरुशलेम जो वापस हटी गे। 45 फिरी इह्यां होया कि त्रीये रोजे तिन्हा ने यीशु जी जो देहे अन्दर व्यवस्थापकांh रे मंजाटे बैट्टेरा ते तिन्हेरी सुणदे ते तिन्हा कने सुआल-जवाब करदे दिखेया। 46 से सब जहे, जेहडे कि यीशु जी री गल्लां सुणदे थिये, से तिन्हेरी समजदारी अते तिन्हेरे सुआलां का हरान थिये। 47 जां यीशु जी रे मां प्यो ने बी तिन्हा जो दिखेया ता से बी हरान होई गे। ते मरियम ने यीशु जी जो पुछेया, "ओ निकेया, तैं म्हारे कने इह्यां किजो किता, तू ईत्ते किजो रुकी गेरा थिया? असां बडे परेसान होई गेरे थिये, तेरे प्यो ते मैं, तिजो कुते कुते नी तोपेया? 48 यीशु जी ने तिन्हा जो बोल्या, "तुसी मिन्जो किजो तोपदे थिये? कै तुसी एह नी जाणदे कि मेरे ताई अपणे प्यो रे घरे रेह्ना कितणा जरूरी है?" 49 अपण यीशु जी ने जे जवाब दित्तेया, से तिन्हेरी समझ अन्दर नी आया। 50 ते फिरी से तिन्हा कने नासरत जो आई गे ते अपणे मां प्यो रे गलाए पर चलदे रे ते यीशु जी री मां इन्हा सब गल्लां जो अपणे मन बिच ई रखेया। 51 ते यीशु जी समझ, कद-काठी अते परमेश्वर ते महुआं री दया कने बद्धे गे। 52 एह तिस्स बेले री गल्ल है, जिस बेले तिबीरियुस केसर पन्द्रा सालां का रोम रे देश पर राज करेया करदा थिया अते तिस बेले पुन्तियुस पिलातुस यहूदिया परदेस रा राज्यपाल थिया, ते हेरोदेस गलील जिल्ले अन्दर राज करदा थिया, ते तिसेरा भ्याळ फिलिप्पुस जे थिया से इतूरैया अते त्रखोनीतिस नां रे परदेसां अन्दर राज करेया करदा थिया, ते लिसानियास अबीलेने नां रे परदेसा अन्दर राज करदा थिया।

### युहन्ना बपतिस्मा दैणे वाळे रा प्रचार करणा

3 अते तिस बेले हन्ना अते कैफा नां रे दो बड्डे परोहत थिये, ताँ, जकरयाह रे निके, यहून्ना, जेड़ा कि बंजर जगह अन्दर रेहन्दा थिया, तिसेरे का परमेश्वर रा वचन पुजेया। 2 अते तिस ने यरदन द्रया रे अरे-परे रे सबनी इलाकेयां बिच जाई-जाई करी महुआं जो तिन्हेरे पापां का तौबा करी लैणे अते बपतिस्मा लैणे रे बारे अन्दर दस्सेया। 3 यशायाह नां रे भविस्वक्ता री वचनां री कताबा बिच बी जिह्यां लिखे रा है, "बंजर जगह अन्दर इक हक्कां लाणे वाळे महु री अवाज है आया करदी, कि 'प्रभु जी ताई रस्ता त्यार करणा करो, तिन्हा ताई सडकां जो सिध्दी करो। 4 सारे ई नाळे भरी दित्ते जाणे अते सारे पाहड ते घाटी पद्धरी करी दित्ती जाणियां, ते जेहड़ा टेढा मेढा है, से सिध्दा अते जेहड़ा उच्चा-न्हिडा है, से पद्धरा रस्ता बणाई दित्ता जाणा। 5 अते सबनी महुआं ने एह दिखी लैणा, कि परमेश्वर किह्यां महुआं रा उद्धार करदे।' 6 यहून्ना तिन्हा सबनी महुआं जो बोल्दा, जे तिस का बपतिस्मा लैणे जो आए रे थिये, "ओ, सप्प, रे बच्चेयां, तुम्हारे जो कुन्ने दस्सी दित्ता तुसी परमेश्वर रे न्याय रे बेले तुसी बची जाणा? 7 तुसां जो अपणे कम्मा का एह जताणा पैणा कि तुसी ने सच्ची ई अपणे पापां का तौब करी लित्ते दी है। अते तुसी अपणे मना बिच एह मत सोचो 'अब्राहम म्हारा प्यो है।' मैं तुसां जो बोल्दा, परमेश्वर ता इन्हा पत्थरा का बी बच्चे पैदा करी

सकदा।<sup>8</sup> अवे ता झोन्टू बुट्टेयाँ री जड़ां पर रखी गेरा है, इधरे ताँई जिस-जिस बुट्टे अन्दर खरा फळ नी लगदा, से बुट्टा बड्डी दित्तेया जाणा, अते फिरी तिसस जो अग्गी बिच पाई दित्तेया जाणा।<sup>9</sup> ताँ मल्लु यहून्ना का पुच्छणा लगे, “म्हारे जो कै करणा चहिंदा?”<sup>10</sup> तिन्ने तिन्हा जो जवाब दित्ता, जिस जणे का दो कुरते होन, से तिन्हा जो, जिसका लाणे जो किच्छ बी नी हो, तिन्हा कने बन्डी लेन। अते जिसका खाणे जो है से बी ईय्याँ ई करन।<sup>11</sup> फिरी चुँगी लैणे वाळे बी तिस का बपतिस्मा लैणे जो आये, अते तिस जो पुच्छणा लगे, “ओ गुरु जी, म्हारे जो कै करणा चहिंदा? <sup>12</sup> अते यहून्ना ने तिन्हा जो बोलेया, “जितणी चुँगी लैणे जो रोम री सरकार ने तुसां जो बोले रा ए, तिस का जादा चुँगी मत लिंदे। <sup>13</sup> सपाईयाँ ने बी तिस्का एह बोली करी सुआल पुच्छे, “अते म्हारा कै, असां जो कै करणा चहिंदा? तिन्ने तिन्हा जो बोलेया, कुसकी पर दवाब पाई करी तिस का पैसे मत लेयो। अते ना ई कुसकी पर झूठा इल्जाम बी मत लान्दे, अते जितणी तन्खा तुसां जो मिलदी, तिसस कने खूस रेयो। <sup>14</sup> सब मल्लु मसीहा री आणे री भाळ करदे रैन्दे थिये, इधरे ताँई मल्लु एह जानणे ताँई काहळे थिये हुन्दे कि यहून्ना ई कुदखी मसीह ता नी है? <sup>15</sup> ताँ यहून्ना ने तिन्हा सबनी मल्लुआँ जो एह जवाब दित्ता, कि मैं ता तुस्सां जो सिरफ पाणी कने ई बपतिस्मा दिन्दा, अपण जेहड़ा जे ईणे वाळा है, से ता मेरे का बी जादा सक्तसाली है, मैं ता इस जोगा बी नी है, कि तिन्हेरे जुट्टे रे तस्मे जो बी खोली सकां, तिन्हा ने ता बपतिस्मे री रस्म जो पवित्र-आत्मा अते अग्न कने पूरा करणा ए। <sup>16</sup> तिन्हेरे हत्थां बिच अनाज फटकणे वाळा डण्डा है, जिस कने तिन्हा अनाज जो खलाडे बिच पाई करी फटकारी करी अनाज जो भू का बखरा करी देणा ते भू जो अग्गी बिच पाई दैणा जेहडी कि कदी नी बुझणी।” <sup>17</sup> यहून्ना इदेयी गल्लाँ करी करी के परमेश्वर रे बसेख जो समझांदा थिया। <sup>18</sup> (अपण जाँ तिस ने राजा हेरोदेस जो तिसरे भ्याळ री लाडी कने नजायज रिशते अते होर बी दुजे गलत कम्मा ताँई झिडकेया <sup>19</sup> ता राजा हेरोदेस ने तिस जो पकडी करी जेला बिच पाई दित्तेया अते तिन्ने इक होर गलत कम्म अपणे गलत कम्मा कने जोडी लेया।) <sup>20</sup> ईय्याँ होया कि जाँ सब जणे यहून्ना का बपतिस्मा लेया करदे थिये ताँ यीशु जी ने बी आईकरी यहून्ना का बपतिस्मा लेया, अते जाँ यीशु जी प्रार्थना करेया करदे थिये, ता स्वर्ग का परमेश्वर री अवाज आई,

### यीशु जी रा बपतिस्मा लैणा

<sup>21</sup> ते पवित्र आत्मा इक कबूतर रे रूप बिच यीशु जी रे मुहन्डे पर आई बैठेया अते परमेश्वर ने स्वर्ग का बोलेया, “तू मेरा प्यारा पुत्र है, अते मैं तेरे का खूस ए।” <sup>22</sup> जाँ यीशु जी ने अपणी समाज सेवा सुरु कित्ती थी, ताँ से कोई तिह कर साले रे थिये (जिह्याँ कि समझेया जान्दा), यीशु जी यूसुफ रे पुत्र थिये, अते यूसुफ एली रा पुत्र थिया,

### यीशु जी रा खानदान

<sup>23</sup> अते से मत्तात रा, अते से लेवी रा, अते से मलकी रा, अते से यन्ना रा, अते से यूसुफ रा, <sup>24</sup> अते से मत्तीयाह रा, अते से आमोस रा, अते से नहूम रा, अते से असल्याह रा, अते से नोगह रा, <sup>25</sup> अते से मात रा, अते से मत्तीयाह रा, अते से शिमी रा, अते से योसेख रा, अते से योदाह रा, <sup>26</sup> अते से यहून्ना रा, अते से रेसा रा, अते से जरुब्बाबील रा, अते से शालतिएल रा, अते से नेरी रा, <sup>27</sup> अते से मलकी रा, अते से अद्धी रा, अते से कोसाम रा, अते से इलमोदाम रा, अते से एर रा, <sup>28</sup> अते से यहोशु रा, अते से इलाजार रा, अते से योरीम रा, अते से मत्तात रा, अते से लेवी रा, <sup>29</sup> अते से शमौन रा, अते से यहूदाह रा, अते से यूसुफ रा, अते से योनान रा, अते से इलयाकीम रा, <sup>30</sup> अते से मलेआह रा, अते से मिन्नाह रा, अते से मत्तात रा, अते से नातान रा, अते से दाऊद रा, <sup>31</sup> अते से यिशै रा, अते से ओबेद रा, अते से बोअज रा, अते से सलमोन रा, अते से नहशोन रा, <sup>32</sup> अते से अम्मीनादाब रा, अते से अरनी रा, अते से हिस्त्रोन रा, अते से फिरिस रा, अते से यहूदाह रा, <sup>33</sup> अते से याकूब रा, अते से इसहाक रा, अते से अब्राहम रा, अते से तिरह रा, अते से नाहोर रा, <sup>34</sup> अते से सरुग रा, अते से रऊ रा, अते से फिलिग रा, अते से एबीर रा, अते से शिलह रा, <sup>35</sup> अते से केनान रा, अते से अरफक्ष रा,

अते से शेम रा, अते से नूह रा, अते से लिमिक रा, <sup>36</sup> अते से मथूशिलह रा, अते से हनोक रा, अते से यरिद रा, अते से महललेल रा, अते से केनान रा, <sup>37</sup> अते से एनोश रा, अते से शेत रा, अते से आदम रा, अते से परमेश्वर रा पुत्र थिया। <sup>38</sup> फिरी यीशु जी यहून्ना का बपतिस्मा लैणे का बाद पवित्र आत्मा रे वस बिच होई करी यरदन दरया का हटे ते पवित्र आत्मा रे गलाए इक बंजर जगह जो चली गे ते चाळी रोजां ताँई से तित्ते ई रेह।

### यीशु जी रा परखेया जाणा

<sup>4</sup> इन्हा चाळी रोजां ताँई सैतान यीशु जी जो परखदा रेह्या, इन्हा रोजे यीशु जी ने किच्छ बी नी खाये रा थिया, फिरी जाँ ब्रत रा बेला पूरा होई गया ता यीशु जी जो भुख लगी, <sup>2</sup> ताँ सैतान, यीशु जी का आई करी बोलणा लगेया, “जे तू परमेश्वर रा पुत्र है, ता इस पत्थर जो बोल कि एह रोटी बणी जाओ।” <sup>3</sup> यीशु जी ने सैतान जो जवाब दित्तेया, “पवित्र सास्तर अन्दर एह लिखितेरा है: कि ‘मल्लु सिरफ रोटी खाणे कने ई जिन्दा नी रैहन्दा।’ <sup>4</sup> फिरी सैतान तिन्हा जो इक ऊची का ऊची जगह पर लेई गया ते तिन्हेरे दिखदे ई दिखदे दुनिया-भर रे सारे देस दखाए <sup>5</sup> ते तिन्हा जो बोल्या, “मैं एह सारी सान ते इन्हा देसां पर सारा हक्क तिजो देई दिहन्ना, किजोकि एह सब किच्छ मिन्जो दित्तेया गया है, ते जिस्जो बी मैं चाँह् तिरुजो देई सकदा।” <sup>6</sup> इधरे ताँई जे तू मेरी भक्ति करणा ता एह सब किच्छ तेरा होई जाणा। <sup>7</sup> यीशु जी ने सैतान जो जवाब दित्तेया, “पवित्र सास्तर बिच एह लिखितेरा है, ‘तू प्रभु परमेश्वर री ई भक्ति करेया, ते सिरफ तिन्हेरी ई सेवा करेया।’ <sup>8</sup> ताँ फिरी सैतान ने तिन्हा जो यरुशलेम बिच लेई गया अते तिन्हा जो मन्दिर री चोटी पर खड़ा करी के बोलणा लगेया, ‘जे तू परमेश्वर रा पुत्र है, ता इत्ते का छाळ मार।’ <sup>9</sup> किजोकि पवित्र सास्तर अन्दर लिखे रा है, परमेश्वर ने अपणे स्वर्गदूतां जो हुकम देई करी तिजो बचाई लैणा। <sup>10</sup> अते तिन्हा तिजो अपणे हत्थां पर चुक्की करी छुडकणे का बचाई लैणा, ईय्याँ नी होणा कि तेरा पैरा जो पत्थर कने लगी जाओ।” <sup>11</sup> यीशु जी ने तिस जो जवाब दित्तेया, “पवित्र सास्तर अन्दर एह बी लिखे रा है, ‘तू अपणे प्रभु-परमेश्वर जो कदी मत परखदा।’” <sup>12</sup> जाँ सैतान तिन्हेरे जो परखणे ताँई पूरी कोसिस करी बैठेया, ता से अगले मौके ताँई यीशु जी जो छुडी करी चली गया। <sup>13</sup> फिरी यीशु जी पवित्र आत्मा रे गलाए गलील जो चली गे ते तिन्हेरे कम्मां री खप्प गलील, ते अक्खी-बक्खी रे सबनी देसां अन्दर होणा लगी।

### यीशु जी री सेवकाई री सुरुआत

<sup>14</sup> ते से यहूदी मल्लुआं री धर्म सभा अन्दर सिक्सा दिन्दे रे अते सब जल्ले तिन्हेरी बड़ाई करदे थिये। <sup>15</sup> फिरी से नासरत जो आई गे, जित्ते तिन्हेरा बचपन बित्तेया थिया ते से हर बरी साहई सब्त वाळे रोजे धर्म सभा अन्दर गे, ते जाँ से पवित्र सास्तर पढ़ने ताँई खडे होये।

### नासरत बिच यीशु जी रा अनादर

<sup>16</sup> ताँ तिन्हा जो यशायाह भविष्यवक्ता री कताब दित्ती गेई, ते तिन्हा ने से कताब खोली करी ओ जगह कड्डी, जित्ते एह लिखे रा थिया: <sup>17</sup> प्रभु रा आत्मा मेरे अन्दर है, किजोकि तिन्हा ने मिन्जो चुणे रा है कि मैं गरिब मल्लुआं जो परमेश्वर रे राज करणे रे बसेख जो सुणाँ। ते तिन्हा ने मिन्जो कैद मल्लुआं जो एह बोल्णे ताँई भेजेया कि से आजाद हिन, ते अहन्नेयाँ जो एह खबर सुनाणे जो भेजेया कि से फिरी दिखी सकदे, अते दुख-तकलीफां अन्दर फसे रे लोकाँ जो छुटकारा दैणे <sup>18</sup> अते प्रभु जी री दया रे बेले जो दस्सणे ताँई भेजे रा है।” <sup>19</sup> फिरी तिन्हा ने से कताब बन्द कित्ती ते तित्ते कम्म करणे वाळे सेवक रे हत्थां देई करी थल्ले बेहई गे, ते धर्म सभा बिच सबनी मल्लुआं री हाखिख्याँ यीशु जी पर टीक्की रेईयाँ <sup>20</sup> अते फिरी यीशु जी ने तिन्हा जो बोल्या, “अज तुसां रे सुणदे ई पवित्र सास्तर रा एह वचन पूरा होई गया।” <sup>21</sup> जितणे बी मल्लु तित्ते थिये, तिन्हा सबनी ने तिन्हेरी बड़ाई कित्ती, ते यीशु जी रे मूंह का मल्लुआं री भलाई ताँई निकळेरी गल्लां सुणी करी, तित्ते आये रे सब मल्लु हरान होई गे; ते अपु-मिते बोलणा लगे, “कै एह यूसुफ रा पुत्र नी है?” <sup>22</sup> फिरी यीशु जी ने तिन्हा जो बोलेया, “तुसां ने मेरे बारे अन्दर एह

कहावत ता जरूर बोलणी, 'ओ वैद्दा, पैह्णे अपु जो ता खरा करी लै। ते जे किच्छ असां ने तेरे बारे अन्दर सुणे रा है, कि तैं कफरनहूम अन्दर बड़े चमत्कार कित्ते रे हिन, से सब किच्छ अवे अपणे देस अन्दर बी कर।' 23 यीशु जी ने बोलया, "मैं सच्च बोलदा, कुस्की बी भविष्यवक्ता री अपणे देस अन्दर कदर नी हुन्दी। 24 ते एह बी सुणी लेयो कि एलिय्याह रे दिनां अन्दर साङ्गे त्रै साल ताई बरखा नी होई, होर-ता-होर, पूरे देस अन्दर बड़ा अकाल पेया थिया ते इस्राएल अन्दर मती सारी विधवा जनानियां थियां जिन्हा जो मदत री बड़ी जरूरत थी। 25 अपण एलिय्याह जो सैदा जिले रे सारपत ग्रां अन्दर इक विधवा का छडडी करी, कुस्की होर विधवा का नी भेजेया गया, जेहडी कि इस्राएल री रैह्णे वाळी नी थी। 26 या अलीशा भविष्यवक्ता रे बेले बिच इस्राएल अन्दर बड़े कोढी थिये अपण तिन्हा बिच का सीरिया रे रैह्णे वाळे नामान नां रे कोढी जो छड्डी करी होर कुस्की जो बी सुच्चा नी कित्तेया गया।" 27 एह गल्लां सुणी करी जितणे बी महु धर्म सभा अन्दर थिये, तिन्हा सब जह्नेयां जो बड़ा गुस्सा आया। 28 ते तिस्सी बेले से खडे होये ते यीशु जी जो पकडी करी सैहरा का बाहर लेई गे ते जिस पाहड पर तिन्हेरा सैहर बसे रा थिया, तित्ते का थल्ले सुटणा लगी पे। 29 अपण से तिन्हेरे मंझाटे का निकळी करी चली गे। 30 फिरी यीशु जी गलील रे कफरनहूम सैहर जो गे; अते सब्त वाळे रोजे महुआं जो सिक्सा देया करदे थिये।

### बुरी आत्मा रे सताए रे म्हणु रा ठीक होणा

31 अते महु तिन्हेरी गल्लां सुणी करी हरान होई गे, किजोकि से अपणी गल्लां हक कने बोलदे थिये। 32 तिस्सी रोजे धर्म सभा अन्दर इक इदेह्या महु थिया जिस अन्दर भिड्डी आत्मा थी। 33 से महु जोरे-जोरे चिन्ड्डा मारणा लगेया, "ओ यीशु नासरी त तुसां रा असां कने कै लैणा-दैणा है? कै तुसी असां जो इत्ते मारणे ताई आये रे हिन? मिन्जो पता है कि तुसी कुण हिन? तुसी परमेश्वर रे भेजे रे पवित्तर-जन हिन।" 34 यीशु जी ने तिस जो झिडकी करी बोलया, "चुप रेह, अते इस बिच का निकळी जा।" तां से भिड्डी आत्मा तिस जो पखोडी करी, बगैर कोई तकलीफ दित्ते रे तिस बिच का निकळी गई। 35 एह दिख्खी करी सब हरान होई गे ते से अपु-मिते बोलणा लगे, "एह कदेह्या वचन है? किजोकी एह हक अते सक्ति कने भिड्डी आत्मां जो हुकम देया करदे हिन ते से इन्हेरे बोलणे पर निकळी बी जान्दी हिन।" 36 इन्हा गल्लां कने यीशु जी रे कम्मा री खप्प अग साहई हर जगह फैली गई। 37 तिस रोजे यीशु जी धर्म सभा का निकळी करी शमौन रे घरे जो गे। शमौन री सस्सू जो बड़ा ताप थिया, अते तिन्हा ने यीशु जी रे छन्दे कित्ते, तुसी इस जो खरा करी देयो।

### पतरस री सस्सू ते होर लोकां जो ठीक करणा

38 यीशु जी शमौन री सस्सू का गे ते खडे होई करी, ताप जो झिडक दित्ती ते शमौन री सस्सू रा ताप तिस्सी बेले उतरी गया ते से फटा-फट उड्डी करी तिन्हेरी खात्तर-दारी करणा लगी पेई। 39 संझा बेले, जिन्हेरे-जिन्हेरे घरा अन्दर महु नेक-बनेके तरीके री बमारियां का परेसान थिये, से तिन्हा सबनी जो यीशु जी का लेई आये ते कन्ने ई ओ महु बी थिये जिन्हा अन्दर बुरी आत्मा थियां। यीशु जी ने इक-इक पर अपणा हत्थ रखेया, ते से तिस्सी बेले खरे होई गे। 40 ते बुरी आत्मां बी चिन्ड्डां मारदे अते एह बोलदे मते महुआं बिच का निकळी गईयां, "तू परमेश्वर रा पुत्तर है!", अपण यीशु जी तिन्हा जो झिडकदे थिये ते बोलणे नी दिन्दे थिये, किजोकि से जाणदी थियां कि से मसीह हिन।" 41 अगले रोजे, भ्यागा यीशु जी तित्ते का निकळी करी सुनसान जगह जो चली गे ते तित्ते प्राथना करणा लगी पे ते महुआं ने तिन्हेरी तोप पाई दित्ती, ते तोपदे-तोपदे तित्ते ई जाई रे जित्ते यीशु जी थिये, अते से तिन्हेरे का जाई करी तिन्हेरे छन्दे करणा लगे, कि असां जो छड्डी करी मत जाओ।

### मन्दरां बिच प्र चार करणा

42 अपण यीशु जी ने तिन्हा जो बोलया, "मिन्जो होर सैहरां अन्दर बी जाई करी परमेश्वर रे राज करणे री खुसखबरी दैणा जरूरी है किजोकि मिन्जो

इस्सी मकसद कने भेजेया गेरा है।" 43 अते यीशु जी महुआं जो परमेश्वर रे राज करणे री खुसखबरी गलील री बखरी-बखरी जगह बिच जाई करी तित्ते री धर्म सभा अन्दर सुणादे रेह। 44 इक रोज ईह्य्यां होया, कि यीशु जी गन्नेसरत री झीले रे कनारे खडीह करी परमेश्वर रे वचन रे बारे अन्दर महुआं जो सिक्सा देया करदे थिये। लोक इतणे बद्धी गेरे थिये कि; यीशु जी जो पैर रखणे ताई बी जगह नी थी मिलदी।

### पैले चेल्लेयां रा सद्देया जाणा

5 तित्ते तिन्हा ने दिख्खेया, मच्छी पकड़ने वाळे अपणी किस्तियां जो कनारे पर लाई करी अपणे जाल धोया करदे हिन। 2 मते महु होणे री वजह कने यीशु जी तिन्हा दो किस्तियां बिच का इक पर चढी गे जेहडी कि शमौन री थी ते तिन्हा ने शमौन जो बोलया, "किस्ती जो कनारे का जरा कर अगे जो लेई चल।" ते से लेई गया, अते फिरी यीशु जी किस्ती पर बेहई करी महुआं जो सिक्सा दैणा लगे।" 3 जाँ यीशु जी महुआं जो सिक्सा देई बैठे, ताँ तिन्हा ने शमौन जो बोलया, "अपणी किस्ती जो डुग्गे पाणी पास्से लेई चल अते मच्छी पकड़ने ताँई अपणा जाल पाणी बिच पा।" 4 शमौन ने तिन्हा जो जवाब दित्तेया, "ओ मेरे मालको, असां सारी रात मच्छी पकड़ने ताँई बड़ी मेहत्त किस्ती, अपण किच्छ बी नी पकडी सके, फिरी बी जे तुसी बोलया करदे हिन, ता मैं सिरफ तुसां रे बोलणे पर दुबारा जाल पाई दिन्दा।" 5 जिस बेले तिन्हा ने यीशु जी रे बोलणे पर दुबारा जाल पाया, ताँ तिन्हा ने सच्ची अन्दर मती सारी मच्छियां पकड़ियां, अते से इतणी जादा थियां कि तिन्हेरे जाल ई फटणा लगी पे। 6 इतणी देर अन्दर तिन्हा ने अपणे मित्तरां जो इसारा करी के सद्देया, कि आई करी म्हारा हत्थ बटाओ। फिरी तिन्हा ने आई करी दोहई किस्तियां जो मच्छी कने इतणा जादा भरी लेया, कि तिन्हेरी किस्तियां डुबणा ई लगी पेईयां। 7 एह सब किच्छ दिख्खी करी शमौन पतरस यीशु जी रे पैरा पेई करी बोलणा लगेया, "ओ प्रभु जी, मेरे का दूर चली जाओ, किजोकि मैं ता इक पापी महु है। 8 किजोकि इतणी सारी मच्छियां रे पकड़णे कने शमौन अते तिसरे सारे मित्तरां जो बड़ी हरानी होई। 9 अते ईह्य्यां ई जबदी रे दोहई पुत्तर, याकूब ते यूहन्ना, बी हरान होई गे। फिरी यीशु जी ने शमौन जो बोलया, "शमौन उरां मत, किजोकी जिह्य्यां तू मच्छी पकड़दा, तिह्य्यां ई तैं अज्र का बाद महुआं जो परमेश्वर रे चेल्ले बणाया करणा।" 10 ते जिस बेले से सब जह्णे कनारे पर आई गे, ता तिन्हा ने अपणा सब किच्छ छड्डी दित्तेया, अते यीशु जी रे पिच्छ चली पे। 11 जिस बेले से कुस्की सैहर अन्दर थिये, ता उत्ते इक कोढी महु आया, ते से यीशु जी जो दिख्खी करी मुंह रे भारे पेई गया ते यीशु जी रे छन्दे करणा लगेया, "ओ प्रभु जी, जे तुसी चाह ता मिन्जो सुच्चा करी सकदे हिन।"

### कोढ रे मरीज जो ठीक करणा

12 यीशु जी ने अपणा हत्थ अगे करी के तिस जो छुत्तेया ते बोलया, "मैं चाहन्दा कि तू सुच्चा होई जाये।" ते तिसेरा कोढ तिस्सी बेले खरा होई गया। 13 यीशु जी ने तिस जो बोलया, "कुस्की जो बी एह मत बोलदा कि तिजो मैं खरा कित्ता, अपण जाई करी अपु जो परोहत का दिखा, ते मूसा भविष्यवक्ता ने कुस्की कोढी रे सुच्चा होणे ताँई, जे किच्छ बी चढाणे ताँई पवित्तर सास्तर बिच लिख्खेरा है, तिस जो चढा, ताकि महुआं जो बी पता लगे कि तू अवे खरा होई गया ए।" 14 अपण यीशु जी रे कम्मा री खप्प ता होर बी फैलणा लगी पेई, ते मते जह्णे महु उन्हेरी गल्लां जो सुनणे ताँई अते अपणी बमारियां का खरा होणे ताँई यीशु जी का आणा लगी पे। 15 अपण यीशु जी प्राथना करणे ताँई कह्ले बंजर जगह जो चुपचाप चली जान्दे थिये। 16 इक रोज ईह्य्यां होया, यीशु जी महुआं जो सिक्सा देया करदे थिये ते फरीसीw ते व्यवस्थापक तित्ते बैठे रे थिये, जेहडे कि गलील ते यहूदिया रे हर इक ग्रां अते यरुशलेम का आये रे थिये, ते महुआं जो खरा करणे ताँई प्रभु री सक्ति यीशु जी कने थी।

### लकवे रे मरीज जो ठीक करणा

17 तिस बेले मते जेहे महु इक महु जो, जेहडा कि लकवे रा मरीज थिया, बाणी वाळे मन्जे पर लटाई करी महुआं री भीड़ रे बिच का यीशु जी रे बिल्कुल सामणे लेई जाणे री कोसिस करेया करदे थिये। 18 अपण महुआं री वजह कने तिस मरीज जो यीशु जी का लेई जाणे ताँई रस्ता नी थिया, इधेरे ताँई से तिस मरीज जो लेई करी छत्ती पर जाई चढे अते बाणी वाळे मन्जे जो रस्सी कने बहनी करी खपरैल जो हटाई करी तिसेरे बिच का, तिस मरीज जो यीशु जी रे मुहाग्गर उत्तारी दित्तेया। 19 यीशु जी ने तिन्हा महुआं रे विस्वास जो दिख्खी करी तिस मरीज जो बोल्या, “ओ महुआं, मैं तेरे सारे पाप माफ करी दित्ते।” 20 यीशु जी री इन्हा गलां जो सुणी करी यहुदी सास्त्री ते फरीसी अपू-मिते सोच-विचार करणा लगे, “अपु जो परमेश्वर रे बराबर समझणे वाळा, एह हुन्दा कुण? एह ता परमेश्वर री बेजती करेया करदा है, किजोकी परमेश्वर जो छडी करी, होर दुज्जा कोई पापां जो माफ नी करी सकदा।” 21 अपण यीशु जी तिन्हेरे मन री गल्ल जो समझी गे, ते तिन्हा जो जवाब दित्तेया, तुसी अपणे मन अन्दर ईय्यां किजो सोचदे, मैं परमेश्वर री बेज्जती करेया करदा है? 22 कै एह बोलणा असान है, ‘तेरे पाप माफ होई गे कि एह बोलणा, ‘उठ अते हंड? 23 अपण इधेरे ताँई कि तुसी अवे एह जाणी जान कि महु रे पुतर जो धरती पर पाप माफ करणे रा बी हक है। फिरी यीशु जी ने लकवे रे मरीज जो बोल्या, “मैं तिजो बोलदा खडिह जा, अते अपणा मन्जा चुक्की करी घरा जो चली जा।” 24 ताँ से महु तिस्सी बेले सबनी महुआं सामणे खडीह गेया, ते जिस मन्जे पर लेट्टेरा थिया, तिस्जो चुक्की करी परमेश्वर री बडाई करदा, अपणे घरे चली गेया। 25 ताँ फिरी सब जेहे हरान होई गे ते परमेश्वर री बडाई अते बडे भरी डरी गे अते बोलणा लगे, “अज्ज अस्सां ने इक अलग ई नजारा दिख्खेया।” 26 इसेरे बाद से तित्ते का बाहर चली गे ते तिन्हा ने दिख्खेया, इक चुंगी लैणे वाळा महु अपणी चुंगी वसूल करणे वाळी चोकी पर बैठे रा ए, तिसेरा नां लेवी थिया। यीशु जी ने उस जो बोल्या, ‘आ, अते मेरे पिच्छे चल।’

### लेवी रा सद्देया जाणा

27 एह सुणदे ई लेवी खडा होई गेया ते सब कम्म छडुडी करी यीशु जी रा चेला बणी गेया। 28 फिरी लेवी ने अपणे घरे यीशु जी ताँई इक धाम रख्खी, अते तित्ते चुंगी लैणे वाळे ते होर बी मते महु थिये जेहडे यीशु जी कने धाम खाया करदे थिये। 29 ताँ फरीसी ते यहुदी सास्त्री, यीशु जी रे चेलेयां कने सिकाइत करणा लगे, “तुसी यहुदी होई करी चुंगी लैणे वाळे ते पापी महुआं कने किह्यां खाणा-पीणा बेहई जान्दे? 30 यीशु जी ने तिन्हा जो जवाब दित्तेया, जिह्य्यां मरीजां जो ई हकीम अते वैदां री जरुरत हुन्दी, ते जेहडे भले-चन्गे हिन, तिन्हा जो नी, तिह्य्यां ई पापी महुआं जो ई पाप माफ करणा री जरुरत है ना कि भले अते नेक महुआं जो। 31 अपण, “मैं तिन्हा लोकां ताँई नी आया, जेहडे कि भले अते नेक हिन, अपण पापियां जो तिन्हेरे पापां का तौबा करणे ताँई तिन्हा जो सद्दणे ताँई आये रा है।” 32 यहुदी सास्त्रियां ने यीशु जी जो बोल्या, “युहन्ना ते फरीसियां रे चेले प्राथना करदे अते व्रत बी रखदे। अपण तुसां रे चेले ता हर बेले खांदे-पिन्दे ई रैहन्दे।”

### बर्त पर सवाल

33 यीशु जी ने तिन्हा जो बोल्या, “जिस बेले ताँई नौआ लाडा ब्रातियां कने हो, ब्राति भुख्खे नी रैहन्दे। 34 अपण इदेह रोज बी आणे, जिन्हा अन्दर नौआ लाडा ब्रातियां का बखरा करी दित्तेया जाणा, ताँ तिन्हा रोजे ब्रातियां ने अप्पू ई व्रत रखी लेया करणे।” 35 यीशु जी ने तिन्हा जो इक होर उदारण दित्तेया, कोई बी महु नोये कपडे री टल्ली फाडी करी पुराणे कपडे जो खरा करणे ताँई तिस बिच नी लान्दा, किजोकी जे कोई ईह्य्यां करणा ता, से नौआ कपडा ता खराब होणा ई होणा, ते तिस नोये कपडे री टल्ली ने पुराणे कपडे कने कोई मेल बी नी खाणा। 36 अते कोई बी महु नोये दाखरस जो पुराणे खलडू अन्दर नी भरदा, निता नोये दाखरस ने तिस पुराणे खलडू जो फाडी दैणा अते दाखरस ने रुडी करी बाहर आई रैह्ना, ते खलडू बी कुस्की कम्मे रा नी रैह्ना।

37 अपण नोये दाखरस जो नोये खलडू अन्दर ई भरणा चहिंदा 38 अते जिस महु रे मुहा पुराणे दाखरस रा सुआद लगी जाओ, तिस जो नौआ दाखरस खरा नी लगदा, किजोकी तिन्हा बोलणा, ‘पुराणा दाखरस खरा थिया।’ ” 39 इक रोज ईह्य्यां होया कि सब्त वाळे रोजे यीशु जी ते तिन्हेरे चेले खेरां रस्ते का होई करी जाया करदे थिये, अते से चेले चलदे-चलदे कणकां रे दाणेयां जो तोड़ी-तोड़ी करी खाया करदे थिये।

### सब्त रा प्रभु

6 तां फरीसियां ने तिन्हा जो जान्दे दिख्खेया अते से यीशु जी जो बोलणा लगे “तुसी इदेय कम्म किजो करेया करदे हिन, जेहडा कि परमेश्वर रे नियम रे साहब कने सब्त वाळे रोजे करणा ठीक नी है?” 2 यीशु जी ने तिन्हा जो जवाब दित्तेया, “कै तुसां ने पवित्तर सास्तर बिच एह नी पढेया कि जां दाऊद अते तिसेरे साथियां जो भूख्ख लगी ता उन्हा ने कै कित्तेया थियेया? 3 से किह्यां परमेश्वर रे मन्दिर अन्दर गे अते परमेश्वर जो चढाये री रोटियां जो तिनि ए अते तिसेरे मित्रां ने खाया थिया, जिन्हा जो खाणे रा हक सिर्फ पहोतां जो ई थिया।” 4 अते यीशु ने तिन्हा फरीसियां जो बोल्या, कि “महु रा पुतर सब्त वाळे रोजे रा बी प्रभु ए।” 5 इक बरी इह्य्यां होया कि कुस्की होर सब्त वाळे रोजे यीशु जी धर्म सभा अन्दर सिक्सा देया करदे थिये, अते तित्ते इक इदेह्या महु बी थिया, जिसेरा सजा हत्थ सुके रा थिया।

### सूके हात्थ वाळे मरीज जो ठीक करणा

6 फरीसी अते सास्त्री इस भाळ अन्दर बैठे रे थिये कि यीशु जी सब्त वाळे रोजे तिस महु जो खरा करदे कि नी, ताकि तिन्हा जो यीशु जी पर इल्जाम लगाणे रा मौका मिली जाओ। 7 अपण यीशु जी तिन्हेरे मन री गल्ल जाणदे थिये। इधेरे ताँई तिन्हा ने तिस सुके हत्था वाळे जो बोल्या, “उठ अते मंझाट्टे खडीह जा।” अते से महु उठेया अते मंझाट्टे खडा होई गेया। 8 यीशु जी ने तिन्हा सबनी जो, जे तित्ते बैठे रे थिये, बोल्या, “मैं तुस्सां का पुछदा कि सब्त रे रोजे कुस्की रा भला करणा खरा ए, कि बुरा करणा, कुस्की री जान बचाणा खरा है, कि मरणे दैणा खरा ए?” 9 यीशु जी ने उन्हा सबनी पाससे दिख्खेया अते तिस महु जो बोल्या, “अपणा हत्थ अगे कर।” तिस महु ने अपणा हत्थ अगे कित्ता अते तिसेरा हत्थ पूरी तरह कने खरा होई गेया। 10 एह दिख्खी करी, जे यीशु जी रे खलाफ थिये, से लैहरिये अते अपू-मिते एह बोलणा लगे कि यीशु कने कै कित्तेया जाये? 11 फिरी इक रोज यीशु जी प्राथना करणे ताँई पाहड जो निकळी गे अते सारी रात प्राथना करदे रेह।

### बारा चेलेयां जो कम्म दैणा

12 अगले रोजे भ्यागा तिन्हा ने अपणे सारे चेलेयां जो सद्देया अते तिन्हा बिच का बारह जेहेयां जो चुणी लेया अते उन्हा जो ‘प्रेरित’ (यीशु मसीह के धर्म प्रचारक, समाचार प्रचारक) नां दित्तेया गेया, 13 तिन्हेरे नां एह हिन: शमौन, जिस जो यीशु जी पतरस बी बोलदे थिये, अते तिसेरा भ्याळ अन्द्रियास, याकूब, यूहन्ना, फिलीप्पुस, बरतुलमै, 14 मत्ती, थोमा, हलफई रा पुतर याकूब, शमौन जेहडा कि जेलोतेस रे नां कने बी जाणेया जान्दा, 15 याकूब रा पुतर यहुदा, अते यहुदा-इस्करियोती, एह से चेला थिया, जिनि ए यीशु जी जो पकडवाया थिया। 16 जिस बेले यीशु जी पाहड का उतरी करी पद्धरी जगह बिच आई करी खडे होये तां तित्ते तिन्हेरे चेले अते यहुदिया, यरुशलम, सूर अते सैदा रे समुन्द्री इलाकेयां का आये रे मते महु तित्ते आई खडे होये।

### लोकां जो सखाणा ते ठीक करणा

17 एह सब यीशु जी री सिक्सा सुनणे ताँई अते अपणी-अपणी बमारियां का खरा होणे ताँई आये रे थिये। यीशु जी ने तित्ते बडे महुआं बिच का बुरी आत्मां जो कडेया। 18 सब महु तिन्हा जो छुणा चाहन्दे थिये किजोकि तिन्हेरे बिच का सक्ति निकळी करी महुआं जो खरा करदी थी। 19 ताँ यीशु

जी अपणे चेल्ल्यां पाससे दिख्खी करी बोलणा लग्गे, तुसी धन्न हिन्न, जे मन रे खरे हिन, किजोकि परमेश्वर इदेये ई मळ्हुआं पर राज करदे।

### आशिर्वाद ते शाप रे वचन

20 धन्न हिन तुसी, जे अब्बे भुख्खे हिन, किजोकी तुसी रजाये जाणे। धन्न हिन तुसी, जे अब्बे रोन्दे हिन, किजोकी इह्देया बेल्ला बी आणा जाँ तुसी हसणा। 21 धन्न हिन तुसी, जे मळ्हु रे पुत्तर री वजह कने लोक तुसां का नफरत करगे, अत्ते इस समाज का निकाळी दिह्न्ने, तुम्हारी बुराई करण अत्ते तुसां जो बुरा बणाई करी तुसां रा नां बरादरी का कटि दिह्न्ने। 22 तिस रोज तुसी खुसी मनायो, किजोकी स्वर्ग बिच तुसां ताई बड्डा ईनाम ए; किजोकि तुसां कने ईह्दय्यां करणे वाळे मळ्हुआं रे बब्ब-दाद्रे बी, भविस्ववाणी करणे वाळ्यो कन्ने ईह्दय्यां ई करदे थिय्ये। 23 अपण, "हाये तिन्हा मळ्हुआं पर, जे अज बडे अमीर हिन, किजोकी से अपणा सुख-चैन लेया करदे हिन। 24 हाये तिन्हा पर जे अब्बे रज्जे रे हिन, किजोकि तिन्हेरा भूख्खे रैह्णे रा बेल्ला बी आणा। हाय तिन्हा पर, जे अज हसदे हिन, किजोकी इदेह्या बेल्ला बी आणा जां तिन्हा ने रोणा अत्ते दुखी होणा। 25 हाये तुसां पर जां सब मळ्हु तुम्हारी बडी तरीफां करन, किजोकी तिन्हेरे बब्ब-दाद्रे बी झूठे-भविस्ववाणी करणे वाळ्यो री ईह्दय्यां ई बडाई करदे थिय्ये।" 26 अपण मैं तुसां सबनी सुनणे वाळ्यो जो बोलदा, कि तुसी अपणे दुस्मणां कने बी प्यार कने रेह्या करो; जे तुसां कने नफरत करदे, तिन्हेरा भला करो।

### दुस्मणा कने प्यार

27 जे मळ्हु तुसां जो बद-दुआ देंन, तिन्हा जो तुसी असीस देया करो, जे तुसां री बुराई करदे, तिन्हेरे ताँई प्राथना करेया करो। 28 जे तुसां री खाड्डी रे इक पाससे चन्डू मारो, ता तिसेरे अग्गे दूजी खाड्डी बी करी देयो; ते जे कोई तुसां का तुम्हारा सोल खुस्सी लेयो, तिस जो अपणी कमीज बी लैणा देयो। 29 जे कोई तुसां का किच्छ बी मनो तिस दो, अत्ते जिनि ए तुम्हारी कोई चीज लिच्ते री ए ता उसका मंगो मत। 30 जिह्दय्यां तुसी चाह्न्दे कि मळ्हु तुम्हारे कने करो, तिह्दय्यां ई तुसी बी तिन्हा कने करो।" 31 जे तुसी अपणे प्यार करणे वाळ्यो कन्ने ई प्यार कने रैह्न्ने ता इस अन्दर कुण देह्ई बड्डी गल्ल ए? किजोकी पापी मळ्हु बी ता ईह्दय्यां ई करदे। 32 जे तुसी अपणे भला करणे वाळ्यो कन्ने ई भलाई करगे, ता इस अन्दर कुण देह्ई बड्डी गल्ल है? किजोकी पापी मळ्हु बी ता ईह्दय्यां ई करदे। 33 तुसी कुस्की जो उधार देई करी तिस का लैणे री भाळ रखदे ता इस बिच तुम्हारी कै बड्याई ए। किजोकी पापी मळ्हु बी ता ईह्दय्यां ई चाँह्दे कि जितणा दिच्तेया, तितणा ई वापस हटि आओ। 34 अपण तुसी अपणे दुस्मणां कने बी प्यार करो, अत्ते भलाई करो, ते जे कुस्की जो उधार दिच्ते रा हो, ता फिरी दुबारा वापस लैणे री भाळ मत करो। इह्दय्यां करगे ता परमेश्वर रे पाससे का तुसां जो स्वर्ग बिच इक बड्डा ईनाम मिलणा, ते तुसी परम-परमेश्वर रे पुत्तर होई जाणा, किजोकी परमेश्वर ता इतणे दरदेयाळू हिन, कि से तिन्हा मळ्हुआं पर बी, जे परमेश्वर रा सुकर नी करदे अत्ते बुरे हिन, अपणी किरपा दृष्टि बणाई रखदे। 35 जदेह्या तुम्हारा स्वर्ग अन्दर रैह्णे वाळा पिता दरदेयाळू ए, तिह्दय्यां ई तुसी बी दरदेयाळू बणो। 36 कुस्की पर इल्जाम मत लाओ, ताकि न्याय रे बेल्ले तुसां पर बी इल्जाम नी लगाये जाये। दुज्जेयां जो कसुरवार मत समझो, ताकि तुसी बी कसुरवार नी समझे जाओ। अपण, दुज्जेयां जो माफ करी देया करो, ताँ तुसां जो बी माफ किच्ता जाणा।

### इल्जाम मत लाओ

37 दुज्जेयां जो देया करो, ताँ तुसां जो बी दिच्तेया जाणा। मळ्हुआं ने पूरा नापी करी अत्ते जिक्की-जिक्की करी ते हिलाई-हिलाई करी अत्ते उछळदा-उछळदा तुसां री खोख्खा बिच पाणां, किजोकी जिस नाप कने तुसी नापदे, तिस्सी नाप कने तुसां ताँई बी नापेया जाणा" 38 फिरी यीशु जी ने तिन्हा जो इक उदारण दिच्तेया, "कै इक अहन्ना दुजे अहन्ने जो रस्ता दस्सी सकदा? जे दस्मा ता कै तिन्हा दोनां ने गत्ता बिच नी पैणा? 39 चेल्ला अपणे गुरु का बड्डी नी होई सकदा अपण हाँ, जे सब किच्छ सीख्खी लिन्दा, सेह्ई अपणे गुरु

साह्ई होई सकदा। 40 तेरा सारा ध्यान अपणे भ्याळे री हाख्खी रे कण पर ए, अपण अपणी हाख्खी बिच पेरे कण रा कोई पता नी ए? 41 जे तू अपणी हाख्खी रा कण नी दिख्खी सकदा, ता अपणे भ्याळ जो किह्यां बोली सकदा, 'ओ भाई, ठैही जा मैं तेरी हाख्खी रा कण कड्डी दिन्दा? ओ कपटी, पैल्ले तू अपणी हाख्खी रे कण जो ता कड्डी लै, ताँह्ई जे कण तेरे भ्याळे री हाख्खी अन्दर ए, तिस जो तू ठीक तरिके कने दिख्खी करी कड्डी सकगा।" 42 किजोकि कोई बी खरा बूड्डा नी जिस बिच बुरे फळ लगदे हो, अत्ते ना कोई बुरा बूड्डा ए जिस बिच खरा फळ लगदा हो।

### जदेया बूड्डा तैसा इ फळ

43 हर इक बूड्डा अपणे फळां रे जरिये ई पछियाणेया जान्दा; किजोकी मळ्हु कन्डे वाळी झिल्लां का अंजीर अत्ते ना ई ते झडबेरी का अंगूर खुन्डदे। 44 खरा मळ्हु अपणे खरे मन का खरी गल्लां ई कडदा, ते बुरा मळ्हु अपणे बुरे मन का बुरी गल्लां ई कडदा; किजोकी जिन्हा गल्लां कने तिसेरा मन भरितेरा हुन्दा, तिन्हा ई गल्लां जो मूंह पर लियान्दा। 45 फिरी यीशु जी ने बोल्या, "तुसी मिन्जो 'हे प्रभू जी, 'हे प्रभू जी, किजो बोल्दे रैह्न्दे, जनकि तुसी मेरी गल्लां जो मनणे ताँई त्यार नी हिन?"

### घर बनाणे वाळे दो म्हणु

46 हर इक जे मेरे का आई करी मेरी गल्लां जो सुणी करी तिन्हा पर चलदा, मैं तुसां जो दसदा कि से मळ्हु कुसेरे साह्ई ए; 47 से तिस मळ्हु साह्ई ए, जिनि ए अपणा घर डुग्गी नीय्यां खणी करी पक्के पथ्थरां पर पाया अत्ते जाँ हड आया ते तिसेरा पाणी तिस घरा कने बज्या, ता से घर जो हिलाई बी नी सकेया; किजोकी से बडा पक्का बणे रा थिया। 48 अपण जे मळ्हु मेरी गल्लां जो सुणी करी तिन्हा पर नी चलदा, से तिस मळ्हु साह्ई ए, जिनि ए नीय्यां बणाये बगेर ई मिट्टि पर घर पाया अत्ते जाँ हड आया अत्ते तिसेरा पाणी घर कने बज्या, अत्ते से ढेई पेया ते पूरी तरह कने तबाह होई गेया।" 49 जाँ यीशु जी एह सारी गल्लां करी बैठे, ताँ से कफरनहूम सैर जो वापस हटि गे।

### इक सूबेदार रा विस्वास

7 तित्ते इक सुबेदार † थिया, अत्ते तिसेरा इक नोकर थिया, जेडा की तिस जो बडा प्यारा थिया। से बिमारी री वजाह कने मरणे जो होई गेरा थिया। 2 तिस्स सूबेदार ने यीशु जी रे बारे अन्दर बडी गल्लां सुणेरी थियो, इधेरे ताँई तिन्ने किच्छ यह्दियां रे मन्त्री मणुआँ (जोकि उसके साथ होते थे) जो यीशु जी का भेजेया, कि से आई करी तिसेरे नोकर जो ठीक करी देन। 3 ताँ से यीशु जी का जाई करी तिन्हेरे छंदे करदे, कि तुसी म्हारे कन्ने सूबेदार रे नोकर जो ठीक करणा चलो। 4 किजोकी से सूबेदार, असाँ यह्दीयाँ कने बडी दा-पीड रखदा, अत्ते तिन्ने ई म्हारे ताँई धर्म सभा जो बणवाए दा है।" 5 यीशु जी तिन्हा कन्ने चली पे, अत्ते जिस बेल्ले सुबेदार ने यीशु जी जो आन्दे दिखेया, तां तिन्ने अपणे मित्तरां का एह गलाई भेजया, कि "ओ प्रभु जी, तुसी मेरे घरे आणे री तकलीफ मत करो, किजोकी मैं इस जोग्गा नी है, कि तुसी मेरे घरे आनो, 6 अत्ते इस ई वजाह कने मैं अप्पु जो इस जोग्गा नी समझेया, कि तुसां रे नेडे बी आई सकां। इधेरे ताँई तुसी जित्ते हिन, तित्ते का ई अपणे मुँह का बोली देयो कि मेरा नोकर ठीक होई जाओ, ता तिन्ने ठीक होई जाणा। 7 किजोकी, मैं बी कुस्की रे हेठा कम्म करणे वाळा मणु है, अत्ते किच्छ सपाई मेरे बी हेठ कम्म करदे। अगर तिन्हा जो मैं कुदखी जाणे ताँई बोल्दा, तां से जान्दे; आणे ताँई बोल्दा, तां से आन्दे। अत्ते अगर मैं अपणे नोकर जो बोल्दा, कि 'एह कम्म कर', या 'से कम्म कर', तां से तिह्याँ ई करदे।" 8 एह सुणी करी यीशु जी हरान होई गे, अत्ते तिन्हा ने अपणे पिच्छे आणे वाळे मणुआँ जो बोलेया कि, 'इस गैर-यह्दी मणु साँई भरोसा ता मैं कदी इस्त्राएली मणुआँ अन्दर बी नि दिख्खेया।" 9 फिरी जेडे मणु तिस सुबेदार ने भेजे रे थिये, से घरे जो हटी आए अत्ते तिन्हा दिख्खेया कि से बुमार नोकर, जे मरणे जो होई गेरा थिया, से बिल्कुल ठीक होई गेरा थिया। 10 थोडे रोजाँ बाद, यीशु जी

नाईन नां रे ग्रॉ जो जाया करदे थिये, अते तिन्हेरे कन्ने मते जणे मणु अते तिन्हेरे चेले बी थिये।

### इक विधवा रे पुत्र जो जिन्दा करणा

11 जाँ से तिस ग्रॉ रे दुआर का पुजे, ता किछ मणु इक मुदें जो दबाणे ताँई तिस ग्रॉ का बाह लेई चले रे थिये। मरणे वाळा जे थिया, से अपणी अम्माँ रा इक लौता मुन्डा थिया, अते तिसेरी माँ बिधवा थी। 12 एह दिख्खी करी, प्रभू जी (यीशु जी) रा मन रह्य कने भरी गया, अते तिन्हा ने तिस्स बिधवा जो बोलेया, "मत रोओ।" 13 अते से तिस अर्थी का गे अते जाई करी तिस अर्थी जो छुतेया। जिन्हा ने अर्थी चुक्रेरी थी, से रुकी गे। तां यीशु जी ने बोलेया "ओ जुआन, मैं तिजो बोल्दा कि उठी जा!" 14 तां तिस मुदें बिच प्राण आई गे, अते से उठ्ठी करी बेई गया, अते अपणे अरे-परे खडित्तरे मणुआँ कने गल्ल-बात करणा लगी पेया! यीशु जी ने तिस जो तिसेरी माँ का देई दित्ता। 15 एह दिख्खी करी मणु डरी गे, अते परमेश्वर री बड़ाई करदे-करदे बोल्णा लगे कि, "एह कोई बड़ा भविष्यवक्ता\* ई होई सकदा; अते परमेश्वर ने अपणे भक्ताँ पर बड़ी दया कित्ती" है। 16 तिस रोज जे होया थिया, तिसेरी खाप्प यहूदिया अते अरे-परे दे सबनी देसाँ बिच फैली गेई। 17 एह जे किछ बी होया थिया, इन्हा सबनी गल्लाँ रे बारे अन्दर यहूना जो तिसेरे चेलेयाँ ने खबर देई दित्ती।

### यहूना बपतिस्मा दैणे वाळे रा सवाल

18 ताँ यहूना ने अपणे दो चेलेयाँ जो यीशु जी का एह पूछणे ताँई भेजेया, "कि जिस मसीह जो अस्सी भाळदे हिन, से तुसी ई हिन, कि से कोई होर है?" 19 ताँ से चेले यीशु जी का गे अते तिन्हा जो बोल्णा लगे कि, "असां जो यहूना बपतिस्मा\* दैणे लाळे ने एह पूछणे ताँई भेजेया, कि जिस मसीहा जो अस्सी भाळदे हिन, से तुसी ई हिन कि कोई होर हिन?" 20 ताँ यीशु जी ने तिन्हेरे ई सामणे मते जणेर्याँ जो बुमारियाँ का अते तकलीफाँ, अते बुरी आत्माँ का छुड़ाया, अते मते जणे अहन्ने मणुआँ जो लौ दित्ती; 21 फिरी यीशु जी ने यहूना रे चेलेयाँ जो बोलेया, "तुसां ने अब्बे जे किछ बी दिख्खेया-सुणेया, एह जाई करी यहूना जो दस्सी देयो, 'कि अहन्ने दिखदे हिन, लट्टे मणु हन्डदे-फिरदे हिन, कोढ़ी मणु सुचे होया करदे हिन, जे मणु टोणे थिये से सुणेया करदे हिन, मुरदे जिन्दे होया करदे हिन, अते गरीबाँ जो परमेश्वर रा बसेख\* सुणाया जाया करदा है।' 22 फिरी यीशु जी ने बोलेया, "जे कोई मेरी गल्लाँ जो सच्च मन्नी करी, तिन्हा पर भरोसा करणा अते मिन्जो अपनाणे पर तिस जो कोई तकलीफ नी है, ता से मणु धन्न है।" 23 जाँ यहूना रे चेले चली गे, ताँ यीशु जी मणुआँ जो पुछणा लगे, "एह यहूना है कुण, जिस्सो दिखणा तुसी बणा अन्दर गे थिये? के से हवा कने हिलि जाणे वाळे नळप साँई इक कमजोर मणु है? 24 कि तुसी एह सोची करी गे थिये कि, तिचे कोई मैहन्ने अते छैळ कपडे पाणे वाळा मणु होणा? ता कै तुसी एह नी जाणदे कि जेडे मैहन्ने अते छैळ कपडे पान्दे, से मजे कने अपणी कोडियाँ बिच रहन्दे, बणा बिच नी। 25 ता फिरी तुसी कै दिखणा गे थिये? कुसकी भविष्यवक्ता जो? हां, मैं तुसां जो बोल्दा, कि से ता भविष्यवक्ता का बी बड़ड़ा है। 26 यहूना सेहई दूत है, जिसेरे बारे अन्दर पवित्र सास्त्र बिच लिखितेरा है कि: 'दिख्ख, मैं अपणे दूत जो तेरे अग्गे-अग्गे भेजदा, जिन्ने तेरे का पैले जाई करी तेरे मणुआँ जो तेरे ताँई त्यार करणा है।' 27 फिरी यीशु जी ने बोलेया, मैं तुसां जो बोल्दा, कि हले ताँई ईदेया कोई मणु नी जम्मेया, जे यहूना का बधि करी हो। अपण, स्वर्ग अन्दर जेडा सबका छोटा है, से यहूना का बी बधि करी है। 28 ताँ सब मणुआँ ने, इत्ते तक की चुंगी लेणे वाळेयाँ ने बी यहूना री सुणी करी यहूना का बपतिस्मा लिचेया ते यह मन्नी लेया कि परमेश्वर रा रस्ता सहई है। 29 अपण, फरीसियाँ अते व्यवस्थापकाँ\*qने परमेश्वर री मर्जी जो सच्च नी मन्नी करी यहूना का बपतिस्मा लैणे का ठाक्री दित्तेया। 30 यीशु जी ने मणुआँ जो फिरी पुछेया कि, "मैं आज रे जुग रे मणुआँ री बराबरी कुस्स कने कराँ? कि एह हिन कुस्स साँई? 31 किजोकि एह मणु ता तिन्हा बचेयाँ साँई हिन, जेडे कि खेल-खेल बिच इक-दुजे री सिकाइता लान्दे, कि 'असां ने तुसा ताँई पीपणी बजाई अपण तुसी नचे नी, असां ने तुसा ताँई रोणे वाळे गाणे गाए, अपण, तुसी रोए नी।' 32 किजोकि यहूना बपतिस्मा दैणे वाळा ना रोटी

खान्दा अते ना ई दाखरस पिन्दा थियार अपण तुसी बोल्दे हिन कि तिस्स बिच बुरी आत्मा है।" 33 अते मैं, मणु रा पुत्र; रोटी खान्दा अते दाखरास बी पीन्दा, तां तुसी मेरे बारे अन्दर बोल्दे, कि एह ता भुखांग है; अते चुंगी लैणे वाळे अते पाप्पी मणुआँ कन्ने रहन्दे।" 34 अपण परमेश्वर दे वचन रे साहब कने चलणे वाळे मणु ई सचे साबित हुन्दे।" 35 इक फरीसी मणु ने यीशु जी रे छन्दे कित्ते कि, मेरे घरे रोटी खाणे ताँई चलो; अते तिस फरीसी री गल्ल मन्नी करी यीशु जी तिसेरे घरे आए अते रोटी खाणा बेई गे।

### फरीसी रे घरे इक पापण जनानी जो माफ करणा

36 जाँ तिस ग्रॉ री इक पापण जनानी जो पता लगेया, कि यीशु जी फरीसी रे घरे रोटी खाणे ताँई आए दे हिन, ताँ से इक संगमरमर री प्रात अन्दर खुशू वाळा तेल लेई आई। 37 अते अपणे गोडे रे भारे बेई करी रोणा लगी। अते हाख्खी का फुए यीशु जी रे पैरां पर पैणा लगे। अते से यीशु जी रे पैरां जो अपणे बाळां कने पुन्झणा लगी अते तिन्हा जो घड़ी-घड़ी चुम्मी करी तिस पर से खुशू वाळा तेल मलणा लगी। 38 एह दिख्खी करी, से फरीसी जिन्ने यीशु जी जो सद्वरा थिया, अपणे मन अन्दर सोच्छा लगेया कि, "अगर यीशु जी सचे भविष्यवक्ता हुन्दे ता इन्हा जो एह पता लगी जाणा थिया कि इन्हा जो छूणे वाळा एह जनानी कुण है अते कदेई है, किजोकी एह ता पापण है।" 39 अपण यीशु जी जो तिस फरीसी रे मन री गल्ल जाणी गे, अते तिन्हा ने तिस जो जवाब दित्ता, "ओ शमौन (यह शमौन यीशु जी का शिष्य नही है), मैं तेरे कने इक गल्ल लाणी", ता से बोल्दा, "गुरु जी बोल्तो"। 40 कुसकी सेठे रे दो दैण-दार थिये, तिन्हा बिच का इक जणे ने पाँज-सौ कने दुजे ने पंजाह चाँदी रे सिक्के\*s हटाणे थिये। 41 जाँ दोन्नो दैण-दार उधार वापस नी हटाई सके, ताँ तिस सेठ ने तिन्हा पर तरस कित्ता अते दोन्नी रा उधार माफ करी दित्ता; अवे तू बोल, कि तिन्हा बिच का कुन्ने तिस सेठ कने जादा दा-पीड रखणी? 42 फरीसी शमौन ने जवाब दित्ता, "जी! मेरे साहब कने ता, जिसेरी जादा उधारी माफ होई, तिन्ने जादा दा-पीड रखणी। यीशु जी ने तिस्स जो बोलेया, तैं ठीक सोचेया। 43 फिरी यीशु जी तिस जनानी पाससे मुडी करी शमौन जो बोलेया, इस जनानी पाससे दिख्ख, जे अपणे गोडे रे भारे बैठी री है, मैं तेरे घरे आए दा है, अपण, तैं मेरे पैर धुआणें ताँई पाणी नी दित्ता, अते इन्ने ता मेरे पैर अपणे आंसुआँ कन्ने धोए अते अपणे बाळां कने पुंजे। 44 तैं मिन्जो चूम्येया बी नी, अपण जिस बले रा मैं आए दा है, इन्ने मेरे पैरां जो चूमणा बाद नी कित्तेया। 45 तैं मेरे सरा पर तेल मळणा बी जरूरी नी समझेया; अपण इन्ने मेरे पैरां पर खुशू वाळा तेल मळेया। 46 इधेरे ताँई मैं तिजो बोल्दा, कि इसेरे पाप जेडे कि मते थिये, से सब माफ होई गे, किजोकी इन्ने बड़ी दा-पीड रख्खी। अपण जिसेरे घाट पाप माफ होए होन, से प्यार बी घाट ई करदा। 47 अते यीशु जी ने तिस जनानी जो बोलेया, "तेरे पाप माफ होई गे।" 48 ताँ जेडे मणु तिन्हा कन्ने रोटी खाणा बैठे रे थिये, से अपणे मनां अन्दर सोच्छा लगे कि, एह हुन्दा कुण, मणुआँ रे पाप्पां जो माफ करणे वाळा? 49 अपण, यीशु जी ने तिस्स जनानी जो बोलेया, "तेरे भरोसे दी वजाह कने तू बची गेई, अवे मजे कने घरे चलि जा।" 50 इस का बाद यीशु जी मते सैहरां अत्ते ग्रॉ बिच जाई-जाई करी परमेश्वर रे राज करणे री खुसखबरी जो सुणादे रेह। अत्ते तिन्हा कन्ने तिन्हेरे बाराह चेले बी थिये।

### यीशु जी री शिष्या

8 चेलेयाँ जो छडी करी यीशु जी कन्ने जनानियाँ बी थियाँ, जिन्हा जो यीशु जी ने बमारियाँ ते बुरी आत्माँ का बचाये रा थिया। तिन्हा बिच का इक मरियम मगदलीनी नां री जनानी थी। यीशु जी ने तिस बिच का सत्त बुरी आत्माँ कड्डी थियाँ। 2 हेरोदेस राजे रे भंडारी, खुजा री लाडी, योअन्ना, अत्ते सुसन्नाह समेत होर बी मती सारी जनानियाँ थियाँ जेहडी कि अपणे पैसेयाँ कने यीशु जी ते तिन्हेरे चेलेयाँ रे सेवा-पाणी रा इंतजाम करदी थियाँ। 3 इक रोज ईहय्याँ होया कि सैहरा का मते सारे महु यीशु जी री गल्लां सुनणे जो इक जगह किठिह गे ते यीशु जी ने तिन्हा जो इक उदारण देई करी बोलेया, कि

## बी बाणे वाळे रा उदारण

4 इक बीह बाणे वाळा अपणे खेत्रा अन्दर बीह बाणा लगेया, अते बीह बाँदे-बाँदे किच्छ बीह सडका रे कनारे पर पेई गे ते से पैरां हेठ आई गे, ते चिडू-परखेरुआं ने से बीह चुगी ले। 5 अते किच्छ सख्त मिट्टी पर पे, जिस बेले से बद्धणा लगे ता तिन्हा बीआँ जो खरा-करी पाणी नी मिलेया अत्ते से सुकि गे। 6 किच्छ कंडेया वाळी झिल्लों बिच पे। अत्ते झिल्लों बी तिन्हा कने बद्धी पेई ते झिल्लों ने तिन्हा जो दब्बी दितेया। 7 होर किच्छ बीह खरी मिट्टी पर पे अत्ते उगी करी से सौ गुणा फळे।" एह बोली करी यीशु जी ने जोरे-सणे बोल्या, "जिस का सुनणे ताई कत्र हिन से सुणी लें।" 8 ता यीशु जी रे चेले ने उन्हा का पुच्छणा लगे कि इस उदारण रा कै मतलब थिया?

## उदारण दसणे रा मकसद

9 अत्ते यीशु जी ने बोलेया, "परमेश्वर रे राज्य रे भेदां री गल्लां समझणे री समझ तुसां जो दिते री ए, अपण होरनी मल्लुआं जो एह भेद समझणे ताँई उदारण दिते रे हिन, ताकि से दिख्खी करी बी दिख्खी ना सकन, ते से सुणी करी बी समझी ना सकन।" 10 इस उदारण रा मतलब एह ए: बीह परमेश्वर रा वचन ए।

## बी बाणे वाळे उदारण रा मतलब

11 जे बीह रस्ते रे कनारे पे तिये से तिन्हा मल्लुआं साहई हिन, जे परमेश्वर रे वचनां जो सुणी ता लिन्दे अपण सैतान तिन्हेरे मना का वचन जो कड्डी लिन्दा ताकि से विस्वास नी करी सकन अते तिन्हेरा उद्धार नी होई सको। 12 जे बीह बट्टे वाळी, सख्त मिट्टी पर पे थिये, से तिन्हा मल्लुआं साहई हुन्दे जेहडे वचनां जो बडे मजे कने सुणदे अत्ते तिन्हा पर चलणा बी लगी पैदे, अपण वचन तिन्हेरे मना बिच पकड नी बणाई पांदा ते किच्छ बेले ताँई से वचना पर विस्वास ता करदे अपण, जाँ परखिणे रा बेला आन्दा ताँ तिन्हेरा विस्वास कमजोर होई जान्दा। 13 जे बीह झिल्लां अन्दर पे थिये, से तिन्हा मल्लुआं साहई हिन जे वचनां जो सुणी ता लिन्दे अपण जां से अपणे ई रस्ते चलदे ता दुनियावी फिकर, धन-दौलत, जिन्दगी रा सुख, इन्हा सब चीजाँ रे हेठ दबी जान्दे, ते इन्हा सब गल्लाँ कने से अपणे विस्वास अन्दर नी बद्धी पांदे। 14 अपण से बी जेहडे जे छैळ मिट्टी पर पे थिये, से तिन्हा मल्लुआं साहई हुन्दे, जेहडे मन रे खरे अते नेक, ते सच्चे मन कने परमेश्वर रे वचन जो सुणी करी तिन्हा पर चलदे ते तिन्हेरे सबर री वजह कने ई से खरा फळ लियान्दे। 15 कोई बी दिये जो बाळी करी भांडे हेठ नी रखदा, अत्ते ना ई मन्जे हेठ रखदा, अपण दीय्ये जो दीपदान पर रखदे ताकि अन्दर आणे वाळे जो लौ मिलो।

## दिये रा उदारण

16 किजोकि इदेह्या किच्छ बी लुहके रा नी ए जे सामणे नी आणा, अत्ते भेद किच्छ बी नी ए, जे जाणेया नी जाणा अत्ते लौ बिच सामणे नी आणा। 17 इधेरे ताँई ध्यान कने सुणो, जिस का वचना री समझ ए, तिस जो होर दित्ती जाणी अत्ते जिस का नी है, तिस का ता जे ए, से बी लेई लैणी।" 18 इक रोज यीशु जी री माँ अते तिन्हेरे भ्याळ तिन्हा कने मिलणे जो आये, अपण मल्लुआं री भीड़ इतणी जादा थी कि से तिन्हा का पुज्जी नी सके।

## यीशु जी री माँ ते भाई

19 फिरी कुस्की ने तिन्हा जो बोल्या, "तुसां री माँ अते भ्याळ बाहर खडितेरे हिन। से तुम्हारे कने मिलणा चाहन्दे हिन।" 20 यीशु जी ने बोल्या, "मेरी मां अते भ्याळ ता एह हिन जे परमेश्वर रे वचन जो सुणदे अत्ते तिन्हा पर चलदे।" 21 इक रोज इय्यां होया कि यीशु जी अपणे चेलेयां कने किस्ती पर चढे अते तिन्हा जो बोलेया, "चलो, असी झील रे पार चलदे।" ता तिन्हा किस्ती खोली अते चली पे।

## तुफान जो सांत करणा

22 जां से किस्ती चलाया करदे थिये ता यीशु जी सोई गे ते तिस्सी बेले झील अन्दर बडी भरी हनेरी चली। तिन्हेरी किस्ती अन्दर पाणी भरीणा लगी पेया अत्ते तिन्हेरी जान पर आई पेई। 23 फिरी चेलेयाँ ने यीशु जी जो जगाई करी बोल्या, "मालक, ओ मालक, असा दुब्बी जाणा!" तिस्सी बेले यीशु जी उठ्ठे अत्ते तिन्हा हनेरी अत्ते पाणी री छल्हार जो झिडकेया अते से रुकी गई, ते तित्ते सब किच्छ साँन्त होई गया। 24 फिरी यीशु जी ने तिन्हा का पुछ्छेया, "कुते गया तुम्हारा विस्वास?" अपण चेले डरे रे थिये अत्ते हरान बी थिये, से अपु-मिते बोलणा लगे, "एह आखर है कुण, जे हनेरी अत्ते पाणी जो हुक्म दिन्दा ते से बी इसेरे हुक्मां जो झट्ट मन्नी लिन्दे हिन।" 25 फिरी से गिरासेनिया इलाके अन्दर गे, जे गलील झील रे सामणे थिया।

## बुरी आत्मा रे सताए म्हणु जो ठीक करणा

26 तित्ते तिन्हा जो इक मल्लु मिलेया जिस बिच बुरी आत्मां थियाँ। से बडे रोजाँ का ना ता कपडे पांदा थिया अत्ते ना ई घरा अन्दर रेह्या करदा थिय्या बल्कि से कबरस्तान अन्दर रेह्या करदा थिया। 27 जाँ तिनिए यीशु जी जो दिख्खेया ता से चिन्ड मारी करी तिन्हेरे मुहाग्गर आई करी पेई गया ते तिन्हेरे छन्दे करणा लगेया, "ओ परम-परमेश्वर रे पुत्तर, यीशु, तुसी मेरे का कै चाहन्दे? मै छन्दे करदा तुसी मिन्जो तंग मत करो।" 28 किजोकी यीशु जी ने तिन्हा बुरी आत्मां जो तिस मल्लु का निकळणे रा हुक्म देई दिते रा थिया। किजोकी से बुरी आत्मां तिस जो घडी-घडी तंग करदी थियाँ; जिस बेले तिस मल्लु जो संगळाँ अत्ते रस्सियाँ कन्ने बट्टे रा हुन्दा थिया, ताँ से बुरी आत्मा तिन्हा संगळाँ ते रस्सियाँ जो तोडी करी, तिस जो बंजर-बियाबान पाससे दुड्डी थियाँ। 29 ता यीशु जी ने तिस जो पुछ्छेया, "तेरा नां कै ए?" ताँ बुरी आत्मां ने बोल्या, मेरा नाँ "सैना" ए। किजोकी तिस मल्लु बिच मती सारी बुरी आत्मां थियाँ। 30 से यीशु जी रे छन्दे करेया करदी थियाँ कि असां जो नरक रे दुहमे गत्ता अन्दर जाणे रा हुक्म मत दिन्दे।" 31 तिस्सी जगह सूअराँ रा इक झुण्ड घा चरेया करदा थिया। तिन्हा ने छन्दे किते कि असां जो इन्हा सुअराँ रे अन्दर जाणा देयो, ते यीशु जी ने तिन्हा जो सुअराँ अन्दर जाणा दितेया। 32 ताँ से बुरी आत्मां तिस मल्लु का निकळी करी तिन्हा सूअराँ अन्दर चली गईयाँ ते से झुण्ड तिस ढलान का दौडदा झील पर जाई पेया ते डूबी गया। 33 जाँ सुअराँ जो चरणे वाळेयाँ ने एह दिख्खेया, ता तिन्हा दौडी करी सैहर अते ग्राँ बिच जाई करी सबनी जो एह खबर सुणाई दित्ती। 34 फिरी तित्ते रे मल्लु जे किच्छ होया थिया से दिखणे जो आये। से यीशु जी कने मिले। अत्ते तिन्हा ने बुरी आत्मा वाळे मल्लु जो भला-चंगा कपडे पाई करी यीशु जी रे पैरां का बट्टे रा दिख्खेया, एह दिख्खी करी से सब डरी गे। 35 जिन्हा ने एह सब हुन्दे दिख्खेया, तिन्हा ने होरनां जो बी दस्सेया कि जिस मल्लु अन्दर बुरी आत्मा थियाँ, से किह्याँ खरा होया। 36 ते तित्ते जे किच्छ बी होया थिया तिस जो दिख्खी करी गिरासेन इलाके रे रैह्ने वाळे मल्लुआं ने यीशु जी रे छंदे किते कि तुसी इत्ते का चली जाओ किजोकी एह सब दिख्खी करी से सब डरी गेरे थिये। फिरी यीशु जी किस्ती पर चढी करी झील रे दुज्जे पाससे हटि आये। 37 जिस मल्लु रे बिच का बुरी आत्मां निकळी थी, से उन्हा कने चलणे ताँई यीशु जी रे छंदे करणा लगेया। अपण यीशु जी ने एह बोली करी वापिस भेजेया कि, 38 घरे जा अत्ते जे तेरे ताँई परमेश्वर ने कितेया ए, तिस जो दस्स।" ता से जाईकरी, जे किच्छ यीशु जी ने तिस ताँई कितेया, तिस जो अपणे सैहरा जाई करी मल्लुआं जो दस्सणे लगेया। 39 जिस बेले यीशु जी हटि करी आये ताँ मल्लुआं ने तिन्हेरा बड़ा सुआगत कित्ता, किजोकी से सब जह्ने यीशु जी जो भाळदे थिये।

## याईर री मरी री कुडी ते इक्क बमार जनानी

40 उत्ते याईर नां रा इक मल्लु थिया जे तित्ते री धर्म सभा रा इक प्रधान थिया। से यीशु जी रे पैरा पेई गया अते तिन्हा जो घरे चलणे ताँई छन्दे करणा लगेया। 41 किजोकी तिसेरी बारह साले री कुडी थी, अत्ते से मरणे वाळी थी।" जाँ यीशु जी जाया करदे थिये तां मल्लु इत्तणे थिये कि तिन्हा पर आई



पेया करदे थिय्ये। 42 तिन्हा महुआं बिच इक इदेयी जनानी बी थी, जिस जो बारह सालों का खुन चलणे री बमारी थी। तिस ने मती जगह इलाज कराया अत्ते जे तिस का थिय्या से सब खरचणे का बाद बी से खरी नी होई। 43 तिस ने यीशु जी रे पिच्छे का आई करी तिन्हेरे कपडे रा इक कनारा छुत्तेया, अते छुन्दे ई से तिस बारह साल पुराणी बमारी का बिल्कुल खरी होई गई। 44 यीशु जी ने तिस्सी बेले पुछ्छेया, “से कुण ए जिन्ने मिन्जो छुत्तेया?” जां सब ने मन्हा कित्तेया, “ता पतरस ने बोल्या, “ओ मालक, तुसां कने बडी बड़डी लोकां री भीड़ ए, सारे जहे तुसां पर आई पेया करदे हिन, अवे असी एह किह्यां पता लगाई सकदे कि तुसां जो कुस जहे ने छुत्तेया?” 45 अपण यीशु जी ने बोल्या, “कुस्की न कुस्की ने ता मिन्जो जरूर छुत्तेया, किजोकी मेरे अन्दरा का सक्ति निकळी ए।” 46 फिरी से जनानी समझी गई कि अवे मैं होर जादा देर ताँई लुहकी नी सकदी, तां से घबराई करी अत्ते कम्दी-कम्दी यीशु जी रे पैरां पेई गई ते तिस ने सबनी महुआं जो दस्सेया कि मैं किजो यीशु जी जो छुत्तेया थिया अत्ते तिन्हा जो छुन्दे ई मैं किह्यां खरी होई गई। 47 यीशु जी ने तिस जनानी रे विस्वास जो दिख्खी करी बोल्या, “ओ कुड़िए, तेरे विस्वास री वजह कने तेरा उद्धार होया, अवे अराम कने चली जा।” 48 से हले एह बोल्या ई करदे थिय्ये कि यहूदी धर्म सभा रे प्रधान रे घरे का तित्ते कोई आया अत्ते तिस ने प्रधान जो बोलेया, “तेरी कुड़ी मरी गई। इधेरे ताँई गुरु जी जो तकलीफ मत दिंदा।” 49 अपण जां यीशु जी ने एह सुणेया ता याईर जो बोल्या, “बिल्कुल मत डर। सिरफ विस्वास रख्ख ता तिस ने बची जाणा।” 50 घरे जाई करी यीशु जी ने पतरस, यूहन्ना, याकूब, अत्ते तिस कुड़ी रे माँ-प्यो जो अन्दर लेई गे ते होरसी कुस्की जो बी अन्दर नी आणा दित्तेया। 51 सब जहे तिस कुड़ी रे मरी जाणे पर रोया करदे थिय्ये, अपण यीशु जी ने तिन्हा जो बोल्या, “रोणा बंद करो; किजोकी एह कुड़ी ता मरे री नी ए, बल्कि सुत्ते री ए।” 52 इस गल्ल पर तिन्हा मजाक उड़ाया। किजोकि से जाणदे थिय्ये कि कुड़ी मरी गेरी ए। 53 अपण यीशु जी ने तिस कुड़ी रा हल्थ पकड़ेया अत्ते तिस जो बोल्या, “कुड़िए, उठी हो!” 54 ता तिस्सी बेले तिस कुड़ी रे प्राण फिरी हटि आये अत्ते से उठी होई। यीशु जी ने तिसरे माँ-प्यो जो बोल्या, “इस जो खाणे ताँई किछ रोटी देई दयो।” 55 तिसरे माँ-प्यो हरान होई गे कि तिन्हेरी कुड़ी जिन्दी होई गई, अपण यीशु जी ने तिन्हा जो बोल्या कि एह सारी गल्लां कुस्की कने मत लान्दे। 56 इक रोज यीशु जी ने अपणे खास बाराह चेल्लेयां जो सद्वेया, ते तिन्हा जो बमारियां जो खरा करणे ते सारी बुरी आत्मां जो कढणे रा हक दित्तेया।

### बारा चेल्लेयां रा भेजेया जाणा

9 ते तिन्हा जो परमेसवर रे राज करणे री खुसखबरी सारे महुआं जो सुनाणे ते बमार महुआं जो खरा करणे ताँई बाह भेजेया। 2 यीशु जी ने तिन्हा जो बोल्या, कि “तुसां अपणे सफर अन्दर, ना कोई सोठी लैणी, ना झोळा, ना किच्छ खाणे ताँई, ना ई पैसे ते ना ई जादे कपडे। 3 ते तुसी जिस बी ग्राँ अन्दर जाँगे, तित्ते कुस्की इक घर अन्दर प्रोळे बणी करी रे, जाँ ताँई तुसी तिस ग्राँ का बाह नी आन्ने, ताँ ताँई तिस ई घरे रे। 4 जे तिस ग्राँ रे महु तुसां रे बसेख जो नी मनगे, ता तित्ते का निकलदे बेले अपणे पैरां री धूड झाडी आयो, ताकि ए तिन्हा पर गुवाई होई सको कि से अपणी कित्तेरी अप्पु भुगतन।” 5 ताँ से बाराह चेल्ले तित्ते का निकळी करी ग्राँ-ग्राँ अन्दर जाई करी परमेश्वर रे राज करणे री खुसखबरी रे बारे अन्दर सुणां दे रे ते बमार महुआं जो खरा करदे रे। 6 जाँ हेरोदेस राजे जो यीशु जी रे कम्मां रे बारे अन्दर पता लगेया, ता से सुणी करी बड़ा-भरी परेसान होई गया। किजो कि केई महु बोल्दे थिय्ये, कि “ए यूहन्ना बपतिस्मा दैणे वाळा है, जेहड़ा कि मरी करी फिरी जिन्दा होई गेरा है।”

### हेरोदेस री उलझन

7 किच्छ महु बोलदे थिय्ये, कि “ए एलिय्याह-भविस्ववक्ता है।” अते किच्छ महु ता एह बोल्या करदे थिय्ये, कि “एह पुराणे बेले रे भविस्ववक्तां बिच का कोई दुबारा जिन्दा होई गेरा है।” 8 अपण हेरोदेस राजे ने बोल्या, कि “यूहन्ना बपतिस्मा दैणे वाळे रा सर ता मैं ई कटाया थिया, ते अवे ए कुण है जिसेरे

बारे अन्दर मैं एह सब गल्लां सुणेया करदा है?” फिरी ता राजा हेरोदेस यीशु जी जो दिखणे ताँई पूरी कोसीस करणा लगेया। 9 जाँ बाराह खास चेल्ले हटि आए, ताँ जे किच्छ तिन्हा ने कित्तेया थिया, से सब गल्लां यीशु जी जो दस्सियां; ते यीशु जी अपणे चेल्लेयां जो तित्ते का छामत-चारे बैतसैदा नां रे सैहर बिच लेई गे।

### पाँज हजार महुआं जो खुआणा

10 अपण महुआं जो पता लगी गेया ते से बी तिन्हेरे पिच्छे चली पे। यीशु जी ने तिन्हेरा सुआगत कित्तेया; ते यीशु जी ने तिन्हा जो परमेश्वर रे राज करणे रे बारे अन्दर दस्सेया अते बमार महुआं जो खरा कित्तेया। 11 जिस बेले साँझ होणा लगी ताँ चेल्लेयां ने यीशु जी जो आई करी बोल्या, इन्हा महुआं जो नेडे, कुस्की ग्राँ-पदरा अन्दर भेजी देयो, ताकि से तित्ते रेहई सकन ते अपु ताँई रोटी रा इन्तजाम करी सकन। किजो की एह इलाका किल्ला-कलाचा है जित्ते रैले-खाणे ताँई किच्छ बी नी है। 12 यीशु जी ने अपणे चेल्लेयां जो बोल्या, “तुसी ई इन्हेरे ताँई रोटी रा इन्तजाम करो।” तिन्हा ने बोल्या, कि “म्हारे का ता पंज रोटियाँ अते दो मछिछियाँ रे सिवाए होर किच्छ बी नी है, अपण जे असी इन्हा ताँई रोटी खरीदी करी लेई आन, ताँ किछ जुगाड होई सकदा।” तित्ते लाई-पाई करी पंज हजार ता मडद ई थिय्ये। 13 ताँ यीशु जी ने अपणे चेल्लेयां जो बोल्या, कि “इन्हा जो पंजाह-पंजाह करी के पान्द बिच बटाई देयो” 14 चेल्लेयां ने तिह्य्याँ ई कित्ता, ते सब महु भुईय्याँ बेहई गे। 15 फिरी यीशु जी ने तिन्हा पंज रोटियाँ ते दो मछिछियाँ जो हल्थां पर रख्खेया ते स्वर्ग पाससे दख्खी करी परमेश्वर रा सुकर कित्तेया ते फिरी तिन्हा रोटियाँ जो तोड़ी-तोड़ी करी महुआं जो दैणे ताँई अपणे चेल्लेयां का दिन्दे गे। 16 जाँ सब जहे रञ्जी करी खाई बैठे, ताँ बी चेल्लेयां ने बचेरी रोटियाँ रे बाराह टोकरे भरी करी रख्खे। 17 इक रोज यीशु जी महुआं का बखरे होई करी इक कहली जगह बिच प्राथना करणे जो गे, ते तिन्हेरे सोगी चेल्ले बी थिय्ये, ताँ यीशु जी ने तिन्हा का पुछ्छेया, कि “महु मेरे बारे अन्दर कै सोचदे कि मैं कुण है ?”

### पतरस रा यीशु जी जो 'मसीह' मनणा

18 तिन्हा ने जवाब दित्तेया, कि “किच्छ महु ‘यूहन्ना बपतिस्मा दैणे वाळा’ बोल्दे, किच्छ तुसां जो ‘एलिय्याह’ मन्दे, अते किच्छ बोल्दे, कि तुसी पुराणे बेले रे भविस्वाणी करणे वाळेयां बिच का कोई इक हिन, जेहड़ा कि जिन्दा होई गेरा है।” 19 यीशु जी ने अपणे चेल्लेयां का पुछ्छेया, “अपण तुसां जो कै लगदा, कि मैं कुण है ?” पतरस ने जवाब दित्तेया, कि “असी ता तुसां जो परमेश्वर रा भेजेरा मसीहा मन्दे।” 20 ताँ यीशु जी ने तिन्हा जो समझाई करी बोल्या, कि “मेरे मसीहा होणे रे बारे अन्दर कुस्की जो जरा बी मत बोल्दे।” 21 फिरी यीशु जी ने अपणे चेल्लेयां जो बोल्या, कि एह पक्की गल्ल है, कि “महु रे पत्र ने बडे दुख्ख सैले हिन ते बडे-बडे व्यवस्थापक, बडे पुरोहित, अते यहूदी सास्त्रीयां ने तिस जो नकारी दैणा ते मरवाई दैणा, अपण तिनिए त्रीय्ये रोजे फिरी जिन्दे होई जाणा।”

### अपणे मरणे रे बारे यीशु जी री भविष्यवाणी

22 फिरी यीशु जी ने तिन्हा सबनी जो बोल्या, “जे कोई मेरे पिच्छे चलणा चाहन्दा, ता तिस जो अपणे आप जो नकारणा पैणा, ते तिस जो हर रोज अपणी सूळी जो चुकणा पैणा !

### यीशु जी रे पिच्छे चलणे रा मतलब

23 किजो कि, जे तुसी अपणी जान बचाणा चाहन्ने, ता तुसां तिस जो नी बचाई सकणा। अपण जे कोई मेरे ताँई अपणी जान देई दिहन्ना, सिरफ तिस जो ई सच्चा जीण मिलणा 24 किजो कि इस बिच कुस्की महु जो कै फायदा होणा कि से दुनियावी चीजाँ जो हासल करणे ताँई अपणी जान मुकाई देयो या सहई रस्तें का भटकी जाओ ? 25 जे महु मेरे का ते मेरी सिखाए री सिक्सा का मुकरणा; ता मैं, महु रे पुत्र ने बी, जाँ अपणी, ते अपणे पिता-परमेश्वर री, ते स्वर्गदूताँ री, महिमा कने आणा, ता तिन्हा महुआं जो बी

पछियानणे का मुकरी जाणा । 26 अपण मैं तुसां जो सचाई कने बोलदा, कि जे इत्ते खडरे हिन्, तिन्हा बिच का किच्छ इदेह बी हिन्, जिन्हा तिस बेले ताँई नी मरणा, जाँ ताँई से परमेश्वर जो महुआं री जिन्दगी पर राज करदे अपणी हाखवी कने नी दिखवी लिन्दे।” 27 इन्हा गलां रे कोई अड्ड रोजां बाद यीशु जी अपणे कन्ने पतरस, याकूब, ते यूहन्ना जो लेई करी प्राथना करणे ताँई इक पाहड़ पर गे।

### यीशु जी रा बदलणा

28 प्राथना करदे-करदे यीशु जी री रूप ई बदली गया ते तिन्हेरे कपडे लस्कदे-गाडे चिट्टे रंग रे होई गे। 29 ताँ तिस ई बेले झपकदे ई, मूसा नबी ते एलिय्याह भविष्यवक्ता, तित्ते यीशु जी कने गलां करदे लिब्बे। 30 ए सब अपणी महिमा अन्दर लिब्बे, ते से यीशु जी रे यरुशलेम अन्दर मरणे री गलां करेया करदे थिये। 31 पतरस ते तिसरे मित्रां जो बड़ी गैहरी निन्दर आई गेरी थी। जाँ तिन्हेरी निन्दर पूरी तराह कने खुल्ली गेई ताँ, तिन्हा ने बी यीशु जी जो तिन्हेरी महिमा अन्दर मूसा नबी ते एलीयाह भविष्यवक्ता जो, यीशु जी कन्ने खडिहत्तेरा दिखवेया। 32 जाँ मूसा नबी ते एलिय्याह भविष्यवक्ता तित्ते का जाणा लगे ताँ पतरस यीशु जी जो बोलणा लगेया, “ओ मालक, खरा होया जे असी ईत्ते हिन्, असां जो त्रै तम्बू बनाणा चाहिन्दे, इक तुसां ताँई, इक मूसा ताँई अते इक एलिय्याह ताँई।” हालांकि, पतरस जाणदा नी थिया कि से कै है बोलदा ? 33 से हल्ले ए गल्ल करदा ई थिया, कि इक बद्धल ने तिन्हा जो घेरी लेया ते से बडे डरी गे। 34 ते से बद्धल रे अन्दर ई थिये, कि तिस बद्धल बिच का अवाज आई, कि “एह मेरा पुत्र है, जिस जो मैं चुणे रा है, इसेरी सुणेया करो।” 35 जिह्य्याँ ई ए अवाज आणा बन्द होई, तिह्य्याँ ई सिर्फ यीशु जी तित्ते कहल्ले खडरे थिये; ते चेल्लेयाँ ने जे किच्छ बी दिखवेया थिया, इस बारे अन्दर तिन्हा रोजे कुस्की कन्ने कोई गल्ल नी लाई। 36 दुए रोजे जाँ से पाहड़ का उतरे, ता बडे भरी महु यीशु जी का मिलणे ताँई आई पुजे।

### बुरी आत्मा रे सताए मुडे जो ठीक करणा

37 ते तिन्हा महुआं बिच का इक महु जोरे सणे बोली पेया, “ओ गुरु जी, मैं तुसां रे छन्दे करदा, तुसी मेरे निके जो खरा करी के उस पर रैह करे; किजोकि एह मेरा इक्कोई इक पुत्र है। 38 मेरे निके जो इक बुरी आत्मा घडी-घडी पकडदी ते फिरी ए इक्कदम चिन्डा मारणा लगदा। से तिस जो इदेह्या मरोडदी, कि तिसरे मुंह का झग निकळी आन्दी ते से तिस जो बडा भरी मरोडदी ते तिस जो बड़ी मुस्कल कने छडदी। 39 मैं तुसां रे चेल्लेयाँ जो अपणे निके का तिस बुरी आत्मा जो कदणे ताँई बोल्या थिया, अपण से तिह्य्याँ नी करी सके।” 40 फिरी यीशु जी ने अपणे चेल्लेयाँ जो बोल्या, “ओ भरोसा नी करणे वाळे ते परमेश्वर रे रस्ते का भटकेरे महुआँ! मैं तुसां कन्ने कितणे करी रोजाँ ताँई रैहन्ना; ते कधाडी ताँई तुसां री इदेहई गलां बरदास्त करदा रैहन्ना ?” फिरी यीशु जी ने तिस महु जो बोल्या, “अपणे निके जो इत्ते लेई आ।” 41 तिसेरा निक्का आया ई करदा थिया, कि बुरी आत्मा ने तिस जो पटकी करी भुईय्याँ सुटी दित्तेया ते तिस जो मरोडणा लगी, अपण यीशु जी ने बुरी आत्मा जो झिडकेया ते तिस निके जो खरा करी के तिसरे प्यो का देई दित्तेया। 42 ताँ सब महु परमेश्वर रे चमत्कार जो दिखवी करी हरान होई गे। यीशु जी रे चमत्कारी कम्मा जो दिखवी करी सब महु हरान थिये। फिरी यीशु जी ने अपणे चेल्लेयाँ जो बोल्या, 43 “तुसी मेरी गल्ल ध्यान कने सुणो,

### अपणे मरणे रे बारे यीशु जी री दुइ भविष्यवाणी

किजो कि महु रे पुत्र कन्ने धोखा होणे वाळा है ते तिस जो तिसरे दुसमणां रे हथ्थे पकडवाई दित्तेया जाणा।” 44 अपण एह गल्ल चेल्लेयाँ रे पल्ले नी पेई, किजो कि इस गल्ल रा सहई मतलब तिन्हा का छुपी रेह्या ते चेल्ले यीशु जी का इस बारे अन्दर पृच्छणे का डरदे थिये। 45 फिरी चेल्लेयाँ रे बिच इस गल्लपर बैहस होणा लगी पेई, कि तिन्हा बिच सबनी का बड्डा कुण है ?

### सबका बड्डा कुण ?

46 अपण यीशु जी ने तिन्हेरे मन री गल्ल जाणी लेई। इधेरे ताँई तिन्हा ने इक निके जो अपणे नेडे खडा कित्ता। 47 ते तिन्हा जो बोल्या, “जेहडा बी मेरे नां कने इस निके रा आदर करदा, से मेरा आदर करदा, ते जेहडा मेरा आदर करदा, से परमेश्वर रा आदर करदा, जिन्हा ने मिन्जो भेजे रा है, किजो कि जे तुसां बिच सबनी का छोटा है, सेहई सबनी का बड्डा है।” 48 फिरी यूहन्ना ने यीशु जी जो बोल्या, “मालक जी, असां ने इक महु जो तुसां रे नां कने महुआं बिच का बुरी आत्मा जो कददे दिखवेया, ते असां ने तिस जो एह सब करणे का मन्हा कित्तेया, किजो कि से म्हारे बिच का इक नी थिया।”

### जो खलाफ नी, से कन्ने है

49 यीशु जी ने यूहन्ना जो बोल्या, “तिस जो ठाक्को मत; किजो कि जे म्हारे खलाफ नी है, से म्हारे पास्से ई है।” 50 जाँ यीशु जी रा स्वर्ग अन्दर जाणे रा बेला नेडे आया करदा थिया, ताँ तिन्हा यरुशलेम जाणे री सोची ते चली पे।

### सामरियां रा यीशु जी रे खलाफ होणा

51 जाणे का पैहे यीशु जी ने सामरियाँ रे ग्रॉ बिच अपणे चेल्लेयाँ का एह बसेख भिजवाया कि म्हारे आणे ताँई इक जगह त्यार करी रखवो। 52 अपण, तिस ग्रॉ रे महुआं ने तिन्हा जो अपणे ग्रॉ अन्दर आणे का साफ मन्हा करी दित्तेया ते तिन्हेरे चेल्लेयाँ जो वापस हटाई दित्तेया, किजो कि सामरी महु जाणदे थिये, कि तिन्हा ने यरुशलेम जो जाणा थिया। 53 ए दिखवी करी याकूब ते यूहन्ना ने यीशु जी जो बोल्या, “प्रभु जी, कै असी इन्हा महुआं री इस हरकत ताँई अम्बरा का अग सुटी करी इन्हा जो अगी कन्ने भस्म करी दें ?” 54 अपण यीशु जी ने अपणे चेल्लेयाँ जो झिडकेया ते बोल्या, “कै तुसां जो पता नी है, कि तुसी मेरे कन्ने हिन्? महु रा पुत्र महुआं री जान लैणा नी है आए रा, अपण बचाणे ताँई आए रा है।” 55 ते फिरी से कुस्की होरसी ग्रॉ बिच चली गे। 56 जाँ यीशु जी ते तिन्हेरे चेल्ले रस्ते पर चलेया करदे थिये, ता इक महु ने यीशु जी जो बोल्या, कि “ तुसां ने जित्ते जित्ते बी जाणा, मैं बी तुसां कन्ने जाया करणा।”

### यीशु जी रा चेल्ला बनणे री किमत

57 यीशु जी ने तिस जो बोल्या, “गीदडां जो रैहें ताँई कुड्डां ते चिडू-परखेराँ ताँई बसेरे हिन्, अपण महु रे पुत्र जो सर ढकणे ताँई बी कोई ठकाणा नी है।” 58 यीशु जी ने कुस्की दुजे महु जो बोल्या, “तू मेरा चेल्ला बणी जा।” अपण तिनिए जवाब दित्तेया, कि “ओ प्रभु जी, मेरा प्यो मरी गेरा है ते पैहे मिन्जो तिन्हा जो दबणे ताँई जाणा देयो।” 59 यीशु जी ने तिस जो बोल्या, “मरणे वाळेयाँ जो अपणे मुदें दबणा दे, कुस्की बी मरी गेरे महु री परवा करणे रा कोई फायेदा नी है, किजो कि परमेश्वर रा वचन जिन्दे महुआं ताँई है, इधेरे ताँई तेरा फर्ज एह है कि तू महुआं जो परमेश्वर रे राज करणे रे बारे अन्दर दस्स।” 60 फिरी इक जह्ला होर बोलणा लगेया, कि “मैं बी तुम्हारा चेल्ला बनणा, अपण पैहे जाई करी अपणे घरेताँ जो बोली करी आन्दा।” 61 यीशु जी ने तिस जो बोल्या, “इदेह्या कोई बी महु, जे हळ पर हत्थ रखणे का बाद पिच्छे दिखदा, से परमेश्वर रे राज अन्दर रैह जोगा नी है।” 62 इन्हा गलाँ रे होणे का बाद यीशु जी ने सत्तर चेल्ले होर चुणे ते फिरी जिस-जिस सैहरा ते जगह पर तिन्हा अप्पु जाणा थिया, तित्ते दो-दो करी के पैहे तिन्हा जो भेजेया।

### सत्तर चेल्लेयां रा भेजेया जाणा

10 यीशु जी ने तिन्हा सत्तर चेल्लेयाँ जो बोल्या, कि “स्वर्ग अन्दर ता मते महु जाणा चाहन्दे अपण तिन्हा जो स्वर्ग ताँई पुजणे रा रस्ता दसणे वाळे बडे घाट हिन्। इधेरे ताँई तुसी परमेश्वर का प्राथना करो, कि से इस कम्म जो करणे ताँई होर बी जादा महुआं जो त्यार करन।” 2 “चेता रखो, मैं तुसां जो छेलुआँ साहई, इदेह महुआं बिच भेजणा लगेया जे ब्राह्म साहई

dहिन।<sup>3</sup> इधरे ताँई, तुसी जान्दे बेले अपु कन्ने किछ बी मत लिन्दे, ना बटुआ, ना झोळा ते ना ता बूट; अते रस्ते अन्दर कुस्की रा हाल-चाल बी मत पुछ्दे।<sup>4</sup> तुसी जिस बी घर अन्दर जाहन्ने, तिस घर अन्दर रैह्ले वाले मल्लुआं ताँई एह् प्राथना करेयो, कि 'इन्हा मल्लुआं पर परमेश्वर री सान्ती बणी रहेहा।'<sup>5</sup> जे से मल्लु इस असीस जोगे हुन्ने ता से तिन्हा पर बणी रैह्ले; ते जे से इस जोगे नी होये ता से असीस तुसां का वापस हटी आणी।<sup>6</sup> तुसी मल्लुआं रे घरे-घरे मत फिरदे ते जिसेरे बी घरे जान्ने तिन्ने ई टिकी रहेहा ते जे किच्छ बी से तुसां जो खाणे ताँई दें, से ई खाओ किजोकि तुसी परमेश्वर रे कम्मा ताँई निकळे रे हिन ते इस पर तुसां रा हक्क बणदा।<sup>7</sup> जे कुस्की ग्रँ अन्दर जाई करी तिन्ने रे मल्लु तुसां जो खुस्स होई करी किछ बी खुआंगे, से खुसी कने खाई लेयो।<sup>8</sup> तिन्ने रे बमार मल्लुआं जो खरा करो ते तिन्हा जो बोल्लो, कि "परमेश्वर राज करणे ताँई तुसां रे नेडे आई गेरा है।"<sup>9</sup> अपण, जे कुस्की ग्रँ रे मल्लु तुसां रे आणे पर खुस्स नी होन ता तिस जगह री सड़कां पर जाई करी बोल्ल्या करो,<sup>10</sup> कि 'तुसां रे ग्रँ री धूड़ जो असी तुम्हारे सामणे अपणे पैरां का झम्मी करी इत्ते का चली पे, अपण एह् गल्ल समझी लेयो, कि "परमेश्वर राज करणे ताँई तुसां रे नेडे आई गेरा है।"<sup>11</sup> यीशु जी ने तिन्हा चेलेयाँ जो बोल्ल्या, कि "इस सैहर री हालत फैसले वाले रोजे सदोम देस का बी जादा खराब होगी है।"<sup>12</sup> फिरी यीशु जी बोल्ले, 'खुराजीन'ह ते 'बैतसैदा' नां रे सैहरां बिच रैह्ले वाले मल्लुआं ताँई बड़ा बुरा बेला आणे वाला है, किजोकी जिन्ने चमतकारी कम्म में इन्हा दो सैरां बिच जाई करी किन्ने, जे से ई कम्म में 'सूर' ते 'सैदा' नां रे ग्रँ बिच जाई करी करदा, जिन्ने मूरतियाँ री पूजा करणे वाले मल्लु रैह्ले, ता तिन्हा ने बी बोरे रे कपड़े बणाई करी ते अपु पर धूड़ मळी करी अपणे पाप मन्नी लेरे होणे थिये।

### विस्वास ना करणे वाले शहरां पर धिक्कार

<sup>13</sup> अपण परमेश्वर ने जधाड़ी फैसला करणा, तधाड़ी सूर ते सैदा रे मल्लुआं री हालत तुसां का ता खरी ई होगी है, जेह्दे कि खुराजीन ते बैतसैदा अन्दर रैह्या करदे हिन।"<sup>14</sup> ते कफरनहूम रे मल्लुओ, कै तुसां जो स्वरगा अन्दर लेई जाया जाणा है? अपण ना, तुसां जो ता झिक्क नरक अन्दर सुट्टेया जाणा है।"<sup>15</sup> यीशु जी ने एह् बी बोल्ल्या, कि "जेह्दा मल्लु तुम्हारी गल्लां पर भरोसा करणा, इसेरा मतलब एह् होणा कि तिनि ए मेरे पर बी भरोसा करी लेया, ते जेह्दा तुसां जो नीच समझणा, तिनि ए मिन्जो बी नीच ई समझणा है, ते जेह्दा मिन्जो नीच समझणा, तिसेरा मतलब एह् होणा कि तिनि ए मेरे भेजणे वाले 'परमेश्वर' जो बी नीच ई समझेरा है।"<sup>16</sup> जिस बेले से सत्तर चेले वापस हटि करी आए ता यीशु जी जो बोल्ल्या लगे, "ओ प्रभु जी, बुरी आत्मा बी तुसां रे नां कने असां रे हुक्मां जो मनेया करदी हिन।"

### सत्तर चेलेयां रा वापस हटणा

<sup>17</sup> इस गल्ल पर यीशु जी ने तिन्हा जो बोल्ल्या, "में सैतान जो अम्बरा का बिजळी साहई भुइय्यां पँदे दिख्खेया।"<sup>18</sup> दिख्खो, में ता तुसां जो कीड़े ते बिछ्छुआँ जो परेचणे रा, ते दुस्मण री सारी ताकत पर जीतणे रा हक्क दिन्ने रे है; ते तुसां जो कुस्की बी चीज रा कोई नुकसान नी होणा।<sup>19</sup> फिरी बी इस गल्ल पर घमंड मत करदे, कि बुरी आत्मा तुम्हारा गलाया मन्दियाँ, अपण सिरफ इस गल्ले री खुसी मनाओ कि तुम्हारे नां स्वरग अन्दर लिखी दिन्ने रे हिन।"<sup>20</sup> तिस ई बेले यीशु जी पवित्तर आत्मा बिच मघन होई करी बड़े खुस्स होये ते बोल्ल्या लगे, "ओ मेरे पिता जी, तुसी स्वरग ते धरती रे प्रभु हिन, में तुम्हारा बड़ा सुकर करदा, कि तुसां ने इन्हा गल्लां जो उन्हा मल्लुआं का दूर रखेया जेह्दे अपु जो बड़े भरी ज्ञानी ते चलाक मन्दे, ते इन्हा बचेयाँ जो सैहई गल्लां दस्सी दित्तियाँ, हाँ, मेरे पिता जी, तुसां जो ईह्य्याँ करणा ई खरा लगेया।"

### यीशु जी रा खुश होणा

<sup>21</sup> फिरी यीशु जी ने तिन्हा चेलेयाँ जो बोल्ल्या, "मेरे पिता जी ने मिन्जो सबनी चीजाँ पर हक्क दिन्ने रा है; ते पिता ई जाणदे कि पुत्तर कुण है, ते पुत्तर जो छड्डी करी होर कोई नी जाणदा कि पिता कुण है, या तिन्हेरे जो छड्डी करी

से जाणी सकदे जिस जो पुत्तर पिता रे बारे अन्दर दस्सणा चाह्दा।"<sup>22</sup> जिस बेले तिन्ने चेलेयाँ जो छड्डी करी होर कोई बी नी थिया, ताँ यीशु जी ने तिन्हा जो बोल्ल्या, "तुसी धन्न हिन कि एह् सब किछ जे होया करदा है, से अपणी हाख्खियाँ कन्ने दिख्खेया करदे हिन।"<sup>23</sup> किजोकी में तुसां जो बोली दिन्दा, कि मते राजेयाँ ते भविस्ववाणी करणे वालेयाँ ने एह् सब किछ जे तुसां ने दिख्खेया-सुणेया से दिख्खेया-सुनणा चाह्दा अपण ना ता से दिख्खी सके ते ना ई सुणी सके।"<sup>24</sup> फिरी इक व्यवस्थापक उठी होया ते यीशु जी जो परखणे ताँई सुआल पुछ्णा लगेया, कि "ओ गुरु जी, मिन्जो कै करणा चहईदा कि मिन्जो हमेसा री जिन्दगी मिली जाओ?"

### खरे सामरी रा उदारण

<sup>25</sup> तिन्हा ने जवाब दित्तेया, कि "तैं व्यवस्था री कताब बिच कै है पढ़े रा कि जे कुस्की मल्लु जो हमेसा री जिन्दगी चाहिंदी हो ता कै करणा पैदा?"<sup>26</sup> से बोल्ल्या लगेया, कि "तू परमेश्वर कने पूरे मन, पूरे प्राण ते सारी ताकत लाई करी ते अपणी सारी समझ कने प्यार करेयाँ, ते अपणे पड़ोसियाँ जो बी अपु बराबर प्यार करेयाँ।"<sup>27</sup> यीशु जी ने बोल्ल्या, "तैं ठीक जवाब दित्तेया; इतणा ई करेया कर, ता तिजो हमेसा री जिन्दगी मिली जाणी।"<sup>28</sup> अपण, से मल्लु अपु जो बड़ा भला-माणस जताणा चाह्न्दा थिया, इधरे ताँई से तिन्हा का फिरी पुछ्णा लगेया, "तुसी एह् दस्सो कि मेरा पड़ोसी कुण होया?"<sup>29</sup> यीशु जी ने बोल्ल्या, कि इक मल्लु 'यरुशलैम' का 'यरीहो' नां री इक जगह जो जाया करदा थिया, ते रस्ते अन्दर तिस जो डकैत मिली पे ते तिन्हा ने तिसेरे कपड़े खुलाए ते तिस जो मारी-कुट्टि करी धाणस करी के रस्ते पर ई छड्डी करी चली गे।<sup>30</sup> ते ईह्य्याँ होया, कि तिस ई रस्ते का इक परोह्त जाया करदा थिया, अपण तिनि ए तिस्जो तड़फदा दिख्खी करी दुज्जा रस्ता पकड़ी लेया ते तिस बचारे जो अण-दिख्खा करी दित्तेया।<sup>31</sup> फिरी ईह्य्याँ ई इक लेवी। मल्लु उते आया ते से बी तिस जो अण-दिख्खा करी के चली गया।<sup>32</sup> अपण इक सामरी मल्लुआ उते का जाया करदा थिया, जाँ तिनि ए उस बचारे अध-मरे मल्लु जो तड़फदे दिख्खेया, ता तिस जो उस पर बड़ा तरस आया।<sup>33</sup> से तिसेरे नेडे गेया ते तिनि ए तिसेरे जखमां पर तेल ते दाखरसन लाई करी पट्टि बहनी दित्ती ते अपणे खोत्ते पर बठाई करी रैण-बसेरे जो लेई गया, ते तिसेरी सेवा किन्ती।<sup>34</sup> दूर रोजे तिस सामरी मल्लु ने दो चांदी रे सिक्के रैण-बसेरे रे मालक जो दित्ते ते तिस जो बोल्ल्या, कि "इसेरी दिख्-रिख् करदे रहेहाँ ते जे तेरा जादा खरचा होई जाह्न्ना ता से मैं हटदे बेले आई करी तिजो देई दिह्न्ना।"<sup>35</sup> फिरी यीशु जी ने तिस व्यवस्थापक का पुछ्छेया, कि "अवे तू दस कि इन्हा तिन्ने जह्केयाँ बिच का तिस धाणस मल्लु रा पड़ोसी कुण होया?"<sup>36</sup> से बोल्ल्या लगेया, "जिस सामरी मल्लु ने तिस पर तरस खाया थिया।" यीशु जी ने तिस्जो बोल्ल्या, "जा ते अज्र का बाद तू बी ईह्य्याँ ई करेयाँ।"<sup>37</sup> जाँ यीशु जी ते तिन्हेरे चेले यरुशलैम पाससे जाया करदे थिये ताँ से इक ग्रँ बिच पुजे, जिन्ने मारथा नां री इक जनानी ने तिन्हेरा अपणे घरे सुआगत किन्ता।

### मार्था ते मरियम रे घरे यीशु जी

<sup>38</sup> मारथा री इक भैण बी थी, जिसेरा नां मरियम थिया। से यीशु जी रे पैरां का बेहई करी तिन्हेरे वचन सुणेया करदी थी।<sup>39</sup> अपण मारथा रोटी पकाणे री त्यारी जो लेई करी फिर अन्दर पेई गई, से यीशु जी का आई ते बोल्ल्या लगी, "ओ प्रभु जी, कै तुसां जो फिर नी है कि मेरी भैण ने सारा कम्म मेरे उपर पाई दित्ते रा है? इधरे ताँई इस जो बोल्लो की मेरे कने हत्थ बटाए।<sup>40</sup> अपण यीशु जी ने तिस जो बोल्ल्या, "ओ मारथा, तू मती गल्लां रे बारे अन्दर फिर करदी रैह्न्दी।"<sup>41</sup> अपण इक इदेहई गल्ल है जिसेरी फिर करणा जरूरी है, तिस पवित्तर हिस्से जो मरियम ने चुणी लिन्ने रा है; ते एह् इस का कदी बी खुस्सेया नी जाणा।"<sup>42</sup> इक रोज यीशु जी इक जगह पर प्राथना करेया करदे थिये। जाँ से प्राथना करी बैठे ता तिन्हेरे चेलेयाँ बिच का इक ने तिन्हा जो बोल्ल्या, "ओ प्रभु जी, जिह्य्याँ युह्ना ने अपणे चेलेयाँ जो प्राथना करणा सखाए रा है, तुसी बी असां जो तिह्य्याँ ई सिखाओ।"

### चेलेयां रा पर्आर्थना करणा सिखणा

11 तिन्हा ने तिस जो बोलेया, "ठीक है, ता प्राथना करदे बेले ईह्य्याँ बोल्या करो ओ म्हारे पिता जी, महु तुसां रे नां जो पवित्र मन्या करन, तुम्हारा राज इस धरती पर आई जाओ। 2 म्हारी रोज री रोटी असां जो देया करो, 3 ते म्हारे पापां जो तुसी माफ करी देयो, किजो कि, असी बी अपणे गुनेह्यारां जो माफ करदे, ते असां जो परखीळे का बचाई लेयो।" 4 फिरी यीशु जी ने तिन्हा जो बोल्या, कि " तुसां बिच का इदेह्या कुण है कि तिसेरा इक मित्र हो ते से तिसका धरात्ते पर आई करी एह बोली करी त्रै रोटियाँ मन्गो कि;

### प्रार्थना रे बारे बिच यीशु जी री सीख

5 इक महु, जेहड़ा जे मेरा मित्र है ते से सफर का मेरे का आया, ते तिसजो खुआणे ताँई मेरे का अब्बे किछ बी नी है। 6 ते से अन्दर का जवाब देयो, कि 'मिन्जो तंग मत करां; दुआर बन्द होई गेरा है, बछाणा अन्दर मेरे कन्ने मेरे निके-निके चैन कने सुत्तरे हिन, इधेरे ताँई मैं अब्बे बाहर आई करी तिजो रोटीयाँ नी देई सकदा।' 7 मैं तुसां जो बोली दिन्दा, कि इक मित्र होणे री वजह कने बसक से ना उठो, अपण तिसेरे घडी-घडी बगैर झिझक रे मंगणे पर से उठी करी तिसेरी जरूरत रे हसाबे देई दिहन्गा ? 8 ते मैं इधेरे ताँई मैं तुसां जो बोलदा कि तुसी मंगे ता तुसां जो दित्तेया जाणा; तोपणे ता से मिलणा; अते खटखटादे रैहन्गे ता तुसां ताँई दुआर खोली दित्ते जाणे। 9 किजो कि जेहड़ा बी महु मंगदा, तिसजो दित्तेया जांदा; ते जेहड़ा तोपदा, तिसजो मिली जान्दा, ते जेहड़ा खटखटाँदा, तिस महु ताँई दुआर खुली जान्दे। 10 तुसां बिच का इदेह्या कुण प्यो हुँगा, जिसेरा पुत्र तिस का रोटी मंगो ता से तिस जो पथर पकड़ाई देयो: या ता से मच्छी मंगो ता से कीड़ा पकड़ाई देयो ? 11 या पुत्र आंड़ा मंगो ता तिसजो बिचू देई देयो। 12 बुरे मजाज रे महु हुन्दे-सुन्दे बी तुसां जो पता है कि अपणे बचेयाँ जो खरी चीजाँ किह्याँ दित्ती जान्दी, ता अवे तुसी अप्पू सोचो कि म्हारा स्वरग अन्दर रैले वाळा परमेश्वर अपणे मंगणे वाळ्यां जो खुसी कने पवित्र आत्मा किजो नी दिहन्गा।" 13 फिरी यीशु जी ने इक महु बिच का बुरी आत्मा निकाली जेहड़ी कि जहली थी: जिस बेले बुरी आत्मा तिस बिच का निकळी गई ता से महु गल्लाँ लगी पेया करणा; ते महु दिखवी करी हरान होई गे।

### यीशु जी ते बालजबूल

14 अपण तिन्हा बिच का मते जहे बोलणा लगे, कि "ए ता बुरी आत्मा रे राजे बालजबूलप रे नां कने इन्हा बुरी आत्मा जो कडदा।" 15 अपण होर महुआं ने तिन्हा जो परखणे ताँई तिन्हा का स्वर्ग री कोई नसाणी मंगी। 16 अपण यीशु जी तिन्हेरे मन री गल्ल जो समझी गे ते तिन्हा ने जवाब दित्तेया, जिस देस अन्दर फूट पेई गेरी हो, से उजड़ी जान्दा: ते जिस घर अन्दर कहळा हो पेई गेरी से कदी बी बसी नी सकदा। 17 ते अगर सैतान अपु जो नुकसान पुजाणा सुरु करी देयो, ता सैतान रे राज रा सत्यानास होई जाणा। तुसी जे मेरे पर इल्जाम लांदे कि मैं बालजबूल रे नां कने बुरी आत्मा जो कडदा, 18 ता जे ए गल्ल सच्ची है ता तुम्हारे चेले कुसेरा नां लेई करी बुरी आत्मा जो कडदे? इधेरे ताँई तुसां अपणे महुआं रे सामणे अपणी ई गल्लाँ अन्दर फसी जाणा। 19 अपण जे मैं परमेश्वर रा नां लेई करी बुरी आत्मा जो कडदा, ता तुसी ए समझी लेयो कि परमेश्वर तुसां रे बिच राज करणे ताँई आई गेरे हिन्। 20 जाँ कोई ताकतवर महु पूरी तयारी कने अपणे घर री पैरेदारी करदा ता तिसेरा घर-बार बची रैहन्दा। 21 अपण जिस बेले कोई तिस का बी जादा ताकतवर महु आई करी तिस पर हमला करी के तिस जो हराई देयो ता तिसेरे हथियाराँ जो जिन्हा पर तिस जो भरोसा थिया, खुस्सी करी तिसेरा घर-बार लुट्टि करी से सब किछ अपु-मिते बंडी लिन्दे। 22 जे मेरे पाससे नी है से मेरे खलाफ है, ते जे मेरे कन्ने नी बटोळदा, से बखेरी रखदा। 23 जाँ कोई बुरी आत्मा कुस्की महु बिच का निकळी जान्दी ता से अराम करणे ताँई सुक्की जगह का होई करी जान्दी, ते जिस बेले तिस जो अराम नी

मिलदा ता से बोलदी, 'मैं अपणे पुराणे घरे जो दुबारा हटी जान्दी जित्ते का मैं आए री है।'

### अधुरे सुधार री वजह कने मुसीबत

24 ते हटी करी तिस जो से बड़ा साफ सुथरा ते अपणे लायक समझदी। 25 होर ता होर, इस बेरी से अपु कन्ने सत्त होर बुरी आत्मां जो बी कन्ने लेई आँदी, अते तिस बिच वास करणा लगी पैन्दी ते तिसेरी हालत पैहे का बी जादा बुरी होई जान्दी।" 26 जिस बेले यीशु जी हले ए सब गल्लाँ बोल्या ई करदे थिये, कि महुआं री भीड़ बिच का इक जनानी ने जोरे सणे बोल्या, कि "धन्न है से जनानी जिसा तुसां जो अपणे पेड़ा अन्दर रख्खेया ते धन्न है से जनानी जिसा तुसां जो अपणा दुध पियाया।

### धन कुण है ?

27 इस गल्ल पर यीशु जी ने बोल्या, "हां, अपण जादा धन्न से हिन् जेहड़े जे परमेश्वर रे वचनां जो ध्यान कने सुणदे ते तिन्हा पर चलदे बी। 28 जिह्य्याँ जिह्य्याँ महुआं री भीड़ बधणा लगी, ता यीशु जी तिन्हा जो बोलणा लगे कि इस जुग\* रे महु बडे भरी बुरे हिन, से नसानियाँ तोपदे रैहन्दे; अपण इन्हा जो योना रे अलावा होर कोई बी नसानी नी मिलणी है।

### स्वर्गीय निसानी री माँग

29 जिह्य्याँ योना नीनवे रे महुआं ताँई इक निसानी बणेया थिया, तिह्य्याँ ई महु रे पुत्र ने इस जमाने रे महुआं ताँई निसानी बनणा। 30 दक्षिण री राणीर ने इस जमाने रे महुआं पर इल्जाम लगाणे ते तिन्हा जो गुनेह्यार साबित करणा, किजो कि से राजा सुलेमान री समजदारी वाळी गल्लाँ सुनणे ताँई धरती रे इक कुणे का आए थी, ते इत्ते ता कोई राजा सुलेमान का बी बड्डा है। 31 नीनवे रे महुआं ने बी परमेश्वर रे हिसाब लैणे वाळे रोजे अज्ज रे जुग रे महुआं पर इल्जाम लाणे, किजोकी उन्हा ने योना री गल्लाँ सुणी करी अपणे पाप का तौबा कित्ती थी, ते अवे ता योनाs का बी खास कोई इत्ते है। 32 कोई बी महु दीय्या बाळी करी तिस जो लुटकाई करी या भान्डे अन्दर पाई करी नी रखदा, अपण उच्ची बखारी पर रखदा ताकि ईणे-जाणे वाळे जो लौ मिल्दी रेहो।

### सरीर रा दीया

33 महु रे सरीर रा दीय्या तिन्हेरी हाखिख्याँ हिन्, इधेरे ताँई जे अगर तेरी हाखी साफ है ता तेरा पूरा सरीर बी लौ कने चमकदा होणा; अपण जे अगर से बुरी हिन् ता तेरा पूरा सरीर नह्यारा है। 34 इधेरे ताँई ध्यान रेहो, कि तुसां रे अन्दर री लौ नह्यारा नी बणी जाओ। 35 अपण जे तुम्हारा पूरा सरीर लौ कने चमकदा है, ते सरीर रा कोई बी हिस्सा निह्यारे बिच नी है ता से पूरी तरह कने ईह्य्याँ लस्कणा मन्नो कोई दीय्या तुसां पर अपणी किरणां चमकाया करदा है।" 36 जाँ यीशु जी ए गल्लाँ बोली बैठे ता कुस्की फरीसी महु ने तिन्हेरे छन्दे कित्ते, कि तुसी मेरे घरे रोटी खाओ, ते से अन्दर जाई करी रोटी खाणा बेहई गे।

### शास्त्रि ते फरीसीयां जो फटकार

37 जिस बेले तिस फरीसी ने दिख्खेया कि यीशु जी ने रोटी खाणे का पैहे अपणे हत्थ नी धोये ता तिस जो बड़ी हरानी होई। 38 ते इस गल्ल पर प्रभु जी ने तिस जो जवाब दित्तेया, 'ओ फरीसियों, तुसी थाळी ते कटोरी जो ता उपरा-उपरा का माँजदे, अपण तुसी ई अन्दर का लालच अते बुराई कन्ने भरितेरी हिन्। 39 ओ बेअकलो, जिनि ए बाहरले हिस्से जो बणाया, कै से अन्दरले हिस्से जो नी बणान्दा? 40 अपण जे तुसी अन्दरे री चीजां जो दान करी दिहन्गे ता तुम्हारा सब किछ सुचा होई जाणा। 41 अपण, "ओ फरीसियों, तुसां पर लागत है! किजो कि तुसी अपणे पुदीने ते सुदाब बूटियाँ रा दसमाँ हिस्सा ता चढान्दे अपण, परमेश्वर रे प्यार ते तिन्हेरे फैसले जो नकारी दिन्दे। दसमाँ हिस्सा ता दैणा चाहिदा, अपण परमेश्वर रे प्यार अते

तिन्हेरें फॅसले जो नकारे रे बगैर। 42 ओ फरीसी महुआं तुसां पर लागत है! तुसी धर्म सभा बिच छैळ जगह बैणा चाहन्दे ते जाँ बजार जान्दे ता सबनी महुआं का अपु जो नमस्ते करणा चाहन्दे। 43 तुसां पर लागत है! किजो कि तुसी बिना कोई पछाण री उन्हा कबरॉ साहई हिन जिन्हा पर महु अणजाण होई करी चलदे। 44 ताँ कुस्की व्यवस्थापक ने तिन्हा जो जवाब दित्तेया, कि “ओ गुरु जी, इदेहई गल्ला बोली करी तुसी म्हारी बी बेजती करेया करदे हिन।” 45 यीशु जी ने तिस्जो बोल्या, कि “ओ व्यवस्थापकों, तुसां पर बी लागत है! तुसी महुआं ताँई ता इतणे ओखे नियम बणाई दिन्दे जिन्हा पर चलणा मुस्कल है, अपण अपु तुसी तिन्हा नियमां जो उँगळी कने छुणा बी नी चान्दे। 46 तुसां पर लागत है! किजो कि तुसी तिन्हा भविश्यवाणी करणे वाळ्यो ताँई कबरॉ बणान्दे, जिन्हा जो तुसां रे बाबब-दाद्रेयाँ ने ई मारेया थिया। 47 इन्हा सबनी गल्ला कने तुसी ए दस्दे कि तुसी अपणे बाबब-दाद्रेयाँ रे कित्ते रे कम्मां कने राजी हिन, किजोकी तिन्हा ने मारेया थिया ते तुसां ने तिन्हेरी कबरॉ बणाई दित्ती। 48 इधेरे ताँई परमेश्वर रे वचन अन्दर बी बोलेरा है, कि “मैं तिन्हा का भविश्यवाणी करणे वाळ्यो जो ते दूताँ जो भेजणा ते तिन्हा ने उन्हा महुआं बिच का किछ जो मारी देणा ते किछ महुआं ताँई मुसीबत खड़ी करी देणी।” 49 इधेरे ताँई दुनिया री शुरुआत का जितणे बी भविश्यवाणी करणे वाळ्यो रा खून रूळया, तिसेरा हिसाब इस पीढी रे महुआं का लित्तेया जाणा। 50 मतलब ए है कि, हाबिल रे मरणे का लेई करी जकरयाह रे मरणे तक, जेहडे कि परमेश्वर रे मन्दिर ते बेदी रे बिच मरे थिये; तिन्हेरे मरणे रा हिसाब, इस पीढी रे महुआं का लित्तेया जाणा। 51 तुसां व्यवस्था रे समजदाराँ पर लागत है! किजो कि तुसां ने समजदारी री मती सारी गल्लाँ सिख्खी ता लेईयाँ, अपण अपु तिन्हा गल्लाँ पर नी चले ते जेहडे चलणे री कोसिस करदे थिये तिन्हेरे बी रस्ते पर तुसी रूकावट बणे। 52 ते फिरी जाँ यीशु जी तित्ते का चली गे ता फरीसी ते सास्त्री तिन्हेरे खलाफ होई करी बुरे हाले पिच्छे पेई गे कि से होर बी गल्लाँ पर यीशु जी कने सवाल-जवाब करन। 53 किजो कि से तिन्हेरी ई बोलेरियाँ गल्लाँ पर तिन्हा जो फँसाणे री भाळ अन्दर थिये। 54 जाँ हजाराँ रे साहबे महु किट्टि गे ते सब इक दूजे पराले चढया करदे थिये, ताँ यीशु जी ने पैहे अपणे चेलेयाँ जो बोल्या, कि “फरीसी महुआं रे खमीर का जेहडा कि इन्हेरा छळ है, बची करी रेहो।

### पाखण्ड रे खलाफ चतौणी

12 किजो कि इदेहा किच्छ बी छुपे रा नी है जेहडा कि सामणे नी आणा, ते ईदेया किच्छ बी ढकितेरा नी है, जे खोलेया नी जाणा। 2 इधेरे ताँई तुसां ने जे किछ बी निहारे अन्दर बोले रा है, से लौ अन्दर सुणाया जाणा : अते जे किच्छ बी तुसां ने बन्द कमरेयाँ बिच इक-दुजे रे कन्ना अन्दर बोले रा है, से गल्लां घरे री छत्ती पर जाई करी दस्सी जाणीयाँ हिन। 3 अपण मेरे मित्रो, मैं तुसां जो बोलदा तिन्हा का मत डरो जे तुसां जो सिरफ मारी सकदे ते तिसेरे बाद इदेहा किछ बि नी है जे तिन्हेरे बस अन्दर होणा।

### कुस का उरणा चाएदा

4 मैं तुसां जो पक्की गल्ल दसी दिन्दा कि कुस का उरणा चाहिन्दा ? परमेश्वर का डरो जे तुसां जो मारणे रे बाद नरक बिच पाणे रा हक रखदा। हाँ, मैं बोलदा, बस परमेश्वर का ई डरो। 5 कै दो पैसे री पंज चिडियाँ नी बिकदी? फिरी बी परमेश्वर तिन्हा बिच का इक जो बी नी भूलदा। 6 दिखो, तुम्हारे सरे रा इक-इक बाळ बी परमेश्वर ने गिणि रखे रा है। इधेरे ताँई डरो मत, किजो कि तुसी ता बड़ी सारी चिडियाँ का बी जादा किमती हिन।” 7 फिरी यीशु जी ने बोल्या, मैं तुसां जो बोलदा, कि जे कोई मिन्जो महुआं रे सामणे मन्नी लिन्गा, तिस जो महु रे पुत्र ने बी परमेश्वर रे स्वर्ग-दूतां सामणे मन्नी लैणा।

### यीशु जी जो अपनाणा या ना अपनाणा

8 अपण, जे महुआं रे सामणे मेरे का मुकरगा, तिस जो पैहचानणे का परमेश्वर रे स्वर्ग रे दूतां सामणे महु रे पुत्र ने बी मुकरी\* जाणा है। 9 ते हर तिस महु जो माफ कित्तेया जाणा, जे महु रे पुत्र रे खलाफ किच्छ गलत बोल्गा, अपण

जेहडा कोई पवित्र-आत्मा री बेजती करगा, तिस जो माफ नी कित्तेया जाणा। 10 जाँ से तुसां जो यहूदी धर्मसभा, राजेयाँ अते बड़े बाबुआँ रे मुहागर लेई जान्ते ता फिकर मत कर दे कि तुसी अपु जो किह्याँ बचांगे या असां जो कै बोलणा चाईन्दा। 11 किजो कि पवित्र आत्मा ने तुसां जो सखाई देणा कि तिस बेले तुसां जो कै बोलणा चाईन्दा। 12 फिरी तिन्हा महुआं बिच का कुस्की ने बोल्या, “ओ गुरु जी, मेरे भ्याळ जो बोले कि से म्हारे प्यो री जायदात का मेरे हिस्से री जायदात जो मिन्जो देई देयो।

### इक बेवकुफ अमीर आदमी रा उदारण

13 यीशु जी ने जवाब दित्तेया, कि “ओ महुआ, तुम्हारी इन्हा गल्लां रा फँसला करणे वाळा या बटवारा करणे वाळा मिन्जो कुनिए बणाया ?” 14 फिरी यीशु जी ने बोल्या, “ध्यान रखो, कि तुसी कुस्की बी चीज रा लालच मत करदे, किजो कि कुस्की रे जीण री बराबरी तिसेरी जमीन-जायदात रे बाधे होणे कने नी किती जान्दी।” 15 यीशु जी ने ए उदारण बी दित्तेया; कि “इक अमीर महु री जमीन अन्दर बड़ी छैळ फसल लगी। 16 ते से अपणे मनां अन्दर सोचणा लगेया, कि ‘अवे मैं कै करॉ ? इतणा सारा अनाज कुते रखगा, मेरे का ता रखणे ताँई जगह बी नी है ?’ 17 फिरी तिनिए बोल्या, ‘अच्छा, मैं ईह्य्याँ करदा कि अनाज रखणे वाळे ढन्डू जो तोड़ी करी इक बड्ढा कमरा बणादा, ताकि मेरा सारा अनाज तिस बिच आई जाओ। 18 ते फिरी मैं अपणे आप जो बोलणा, कि तेरे का ता बडा भरी अनाज है जे केई सालाँ ताँई तेरे का बची रह्या; अते अवे चैन कने खा-पी ते मजे कने रे।’ 19 अपण परमेश्वर ने तिस जो बोल्या, ‘ओ बेवकुफा, तँ अज राती ई मरी जाणा; ते तँ जे इतणा सारा अनाज कठेरी रखे रा है, से सब कुस जो मिलणा ?’ 20 दिखो, इदेहा ई से महु बी हुन्दा जेहडा अपु ताँई धन कठेरदा, अपण परमेश्वर री नजराँ बिच से अमीर नी है।” 21 फिरी यीशु जी ने अपणे चेलेयाँ जो बोल्या, “इधेरे ताँई मैं तुसां जो बोलदा कि अपणे जीण री फिकर मत करेया करो कि असी हर रोज रोटी ते कपडे कुदका खाने अते लानो।

### परमेश्वर पर भरोसा रखो

22 किजो कि जीणा, रोटी का; ते जिस्म, कपडेयाँ का जादा बद्धी करी है। 23 जरा कउये पाससे ता दिखो; से ना ता बी बांदे, ना फसल कटदे; ना ता तिन्हा का अनाज कने भरे रे बड़े-बड़े कमरे हुन्दे; ताँ बी परमेश्वर तिन्हा जो खाणे जो दिन्दा। तुसी ता चिडू-पखेरुआँ का बी जादा कीमती हिन। 24 तुसां बिच का इदेहा कुण है, जेहडा फिकर करी के अपणी उमर जो इक घडी ताँई बी अगे बदाई सकदा हो ? 25 जे फिकर करी के तुसी इस छोटी जह्नी गल्ल जो नी करी सकदे ता बड्ढी गल्लां री फिकर करी के कै फायदा ? 26 सोसनाँ रे बुटेयाँ पाससे दिखी करी जरा सोचो, कि से किह्याँ उगदे; से ना ता मैहत्त करदे, ना ई खेत्तर बांदे, फिरी बी मैं तुसां जो बोलदा कि राजा सुलेमान रे ठाठ होणे पर बी तिसेरे कपडे इन्हा फुल्लाँ बिच का कुस्की इक का बी जादा छैळ नी थिये 27 इधेरे ताँई अगर परमेश्वर द्रब्बड री घा जो, जेहडी कि अज ईत्ते है, ते कल से अग बिच फूकी दित्ती जाणी, इतणा छैळ सजाई सकदा, ता कै से तुसां जो नी पुआई सकदा। तुसां महुआं अन्दर विस्वास री कमी है।” 28 अपण तुसी इन्हा गल्लां री फिकर मत करो कि असी कै खांगे ते कै पींगे; इधेरे ताँई तुसी मत सोचो। 29 किजो कि धरती रे सब महु इन्हा चीजाँ रे पिच्छे नहस्सेया करदे हिन : अपण परमेश्वर जो पता है कि तुसां जो बी इन्हा सबनी चीजाँ री जरूरत है। 30 बल्कि, तुसी परमेश्वर रे स्वर्ग रे खोजी बणो, ए सब चीजाँ ता तुसां जो मिली ई जाणियाँ। 31 इधेरे ताँई ओ छोटे झुण्ड, डरो मत, किजो की तुम्हारा परम-परमेश्वर चाहन्दा कि तुसी परमेश्वर रे स्वर्ग रे वारिस बणो।

### स्वर्गीय धन-दौलत

32 इधेरे ताँई अवे अपणी जाएदात बेची करी पैसे गरीबाँ जो दान करी देयो; ईह्य्याँ करणे पर तुसी अपणे ताँई स्वर्ग अन्दर धन-दौलत कठेरे जेहडा कि कदी नी मुकणी ते स्वर्ग रे बटुए बिच कोई भोक् बी नी है ते तुम्हारी धन-

दौलत बची रहै तिस जो कोई चोर चोरी नी करी सकदा ते ना ई तिस जो कीड़े-मकौड़े खराब करी सकद दे।<sup>33</sup> किजो कि जित्ते तुम्हारी धन्न-दौलत है तित्ते ई तुम्हारा मन बी है।<sup>34</sup> परमेश्वर रे कम्म ताँई हमेसा त्यार रेह्यो। ते अपणे दीये बाळी रख्यो।

### जागदे रेयो

<sup>35</sup> जिह्य्याँ कि खरा नोकर ब्याहरी धाम का मालक रे वापस हटणे री भाळ अन्दर हुन्दा, ताकि जिह्य्याँ ई से आओ ते दुआर खटखटाओ ता से तिस्स ई बेले तिस ताँई दुआर खोली सको, तुसी बी तिस महु साहई बणो।<sup>36</sup> से नोकर धन्न हिन् जेहडे अपणे मालक रे हटणे री भाळ अन्दर जागदे हुन्दे ते दुआर खोल्णे ताँई त्यार हुन्दे; मैं तुसां जो सच्च बोल्या करदा है, कि तिस मालक ने अपणे नोकरां जो अप्पू रोटी खुआणी ते तिसेरी सेवा बी करणी।<sup>37</sup> तिन्हेरा मालक चाए धरात्ते पर आओ या धराते का पैहे, जे से तिन्हा जो जागदे दिख्खदा ता से धन्न हिन्।<sup>38</sup> जे घरे रा मालक जाणदा हो कि चोर ने कुस बेले आणा है ता से अपणे घरे चोर जो नी आणा देई सकदा।<sup>39</sup> तिह्य्याँ ई तुसी बी त्यार रेह्या करो, किजो कि महु रे पुत्र ने तिस बेले आणा जाँ तुसां तिसेरे आणे रे बारे अन्दर सोचे रा बी नी होणा।<sup>40</sup> ताँ पतरस ने पुछ्छेया, "ओ प्रभू जी, तुसी एह उदारण सिरफ असां चेलेयाँ जो ई सुणाया करदे हिन् कि ए होरनी सबनी महुआं ताँई बी है?"

### भरोसे लायक ते बिना भरोसे रे लायक दास

<sup>41</sup> यीशु जी ने जवाब दित्तेया, "इदेह्या विस्वास लायक अते समझदार मुन्सी कुण है, जिसे रा मालक तिस जो तिसेरे घर री देखभाल ते तिन्हेरे नोकरां जो रोटी दैणे री जिम्मेदारी देई सको? <sup>42</sup> से मुन्सी धन्न है जिस जो मालक आई करी दिख्खो कि से पूरी ईमनदारी कने अपणा कम्म करेया करदा है। <sup>43</sup> मैं तुसां जो सच्च बोलदा, तिसेरे मालक ने तिस जो अपणी सारी जाएदात जो सम्भाणे रा कम्म बी देई दैणा। <sup>44</sup> अपण, "जे से मुन्सी ईह्य्याँ सोचो कि मेरे मालक ने पता नी कधाड़ी आणा, अते से तिसेरे नोकरां ते नोकराणियाँ जो मारणा-कुटणा लगी पेयो ते सराब पी करी मजे करणा लगी पयो, <sup>45</sup> ता तिस मुन्सी रे मालक ने इदेह रोजे आई रहै जिसेरे बारे अन्दर तिनिए सोचेरा बी नी होणा, अते जाँ तिनिए आणा ते आई करी तिस जो कडी सजा देई करी तिन्हा महुआं बिच भेजी दैणा जेहडे कि विस्वास लायक नी हिन् ते तिन्हा बिच ई गिणेया जाणा। <sup>46</sup> से नोकर जेहडा अपणे मालक री मरजी जाणदा हो, अपण, तिह्य्याँ नी करदा हो या जिह्य्याँ तिसेरा मालक चाहन्दा हो अपण से तिह्य्याँ नी करदा हो, तिस नोकर जो बड़ी बुरे हाले मार पैणी। <sup>47</sup> अपण, जिस नोकर जो अपणे मालक री मरजी रे बारे अन्दर कोई जानकारी नी हो, अपण इदेह्या कम्म करी देयो, जेहडा कि मार खाणे जोग्मा हो, ता तिस नोकर जो घट मार पैणी। इधेरे ताँई हर इक महु का जिस जो हद का जादा दित्तेया गेरा है, तिस का तिन्हा ई वापस लिन्तेया जाणा, अते जिस जो तिस का थोड़ा घाट दित्तेया दा है, तिसका तितणा ई घट लिन्तेया जाणा।" <sup>48</sup> फिरी यीशु जी ने बोल्या, "मैं इस धरती पर अग लाणा आये रा है ते मैं ए चाहन्दा थिया कि एह कम्म अब्बे ताँई सुरू होई गेरा हुन्दा, ता खरा थिया।

### यीशु जी रे आणे रा नतीजे

<sup>49</sup> अपण, हले ताँई मिन्जो इक बपतिस्मा लैणे जो है, जाँ ताँई मैं से कम्म पूरा नी करी लिन्दा, ताँ ताँई मिन्जो बैचेनी लगी रहै। <sup>50</sup> कै तुसी ईह्य्याँ ता नी सोचदे कि इस धरती पर सान्ति हो इधेरे ताँई मैं आये रा है? मैं तुसां जो बोली दिन्दा, कि ईह्य्याँ नी है, अपण मैं ता महुआं जो बखरा कारणे ताँई आये रा है। <sup>51</sup> किजो कि अज्र का बाद इक घरा अन्दर पंज जहे इक दुजे रे खलाफ होई जाणे; त्रै, दो जहे रे खलाफ होई जाणे अते दो, त्रै जहे रे। <sup>52</sup> माँ अपणी कुडी रे खलाफ होई जाणी अते कुडी माँ रे खलाफ होई जाणी, प्यो ने अपणे पुत्र रे खलाफ ते सस्सू ने नूँ रे ते नूँ ने अपणी सस्सू रे खलाफ होई जाणा।"

### समय रे लक्षण

<sup>53</sup> अते यीशु जी ने मते जहे किञ्चितेरे महुआं जो बी बोल्या, "जाँ तुसी पश्चिम दिसा का बदळ इदे दिखदे ता झट बोली पैदे कि बरखा होणे वाळी है, ते फिरी तिह्य्याँ ई हुन्दा। <sup>54</sup> ते जाँ दक्षिण दिसा का ब्यार चलदी, ता तुसी बोल्दे कि गर्मी आणे वाळी है, ते तिह्य्याँ ई हुन्दा। <sup>55</sup> अपण, ओ कपटियो, तुसां जो धरती ते अम्बर रे रंग-रूप बदलिणे रा पता ता लगी जान्दा, अपण इस जुग रे रंग-रूप बदलणे रे बारे अन्दर किजो पता नी लगदा?" <sup>56</sup> फिरी यीशु जी ने बोल्या, "तुसी इस गल्ल रा फैसला अप्पू ई किजो नी करी लिन्दे कि ठीक कै है?"

### शिकायत करणे वाळेयां कने समझौता करणा

<sup>57</sup> जाँ तुसी अपणे दुसमण कन्ने न्यायधीस का कचैही जो चले रे होन्, ता रस्ते अन्दर ई तिस कने सुलाह करणे री कोसिस करी लेयो, कुदखी ईह्य्याँ ना हो कि से तुसां जो न्यायधीस का छिक्की करी लेई जाओ ते सपाहीयाँ का पकड़वाई देयो अते सपाही तुसां जो जेला अन्दर ढपपी देयो। <sup>58</sup> मैं तुसां जो बोलदा, कि जाँ ताँई तुसी अपणा सब किछ देई ना दें, ताँ ताँई जेल का छुटी नी सकदे।" <sup>59</sup> तिस बेले तित्ते बैट्टे रे किच्छ महुआं ने यीशु जी कने गल्ल लाई कि, जाँ गलील रे किच्छ महु बलि चढाया करदे थिये ताँ पिलातुस राज्यपाल ने तिन्हा जो मरवाई छड़ेया थिया।

### मन बदलो या बर्बाद होइ जाओ

**13** ए सुणी करी यीशु जी ने जवाब दित्तेया, "तुसी कै सोचया करदे हिन् कि एह गलीली महु दूजे सबनी गलीली महुआं का जादा पापी थिये, कै इधेरे ताँई तिन्हा जो एह गल्ल भुगतणियाँ पेईयाँ थियाँ? <sup>2</sup> मैं तुसां जो बोलदा कि तुसी पाप का तौबा करी लेयो नी ता तुसां बी मरणा। <sup>3</sup> या, तुसी ईह्य्याँ समझदे कि से ठाहा महु जिन्हा पर शीलोह रा गुम्मत पेया थिया, ते से दबी करी मरी गे थिये: कै से यरुशलेम बिच रहै वाळे होरनी महुआं का बी जादा पापी थिये? <sup>4</sup> यीशु जी ने यरुशलेम रे सबनी महुआं जो बोल्या; इदेह्या किच्छ बी नी है; तुसी अपणे पापां का तौबा करी लेयो, नी ता तुसां बी तिह्य्याँ ई मरणा।" <sup>5</sup> ताँ यीशु जी ने तिन्हा जो इक उदारण दित्तेया, "इक महु ने अंगूर रे बगीचे अन्दर त्रिम्बले रा बूडा लाया अते तिस अन्दर कोई फळ लगेया कि नी लगेया, एह दिख्खणे ताँई से घडी-घडी बगीचे जो जान्दा थिया, अपण कोई फळ नी लगेरा हुन्दा थिया। इक रोज से इस गल्ल कने उदास होई गेया।

### बगैर फळ रे अर्जीर रे बूटे रा उदारण

<sup>6</sup> अते तिनिए बगीचे रे माली जो बोल्या, 'तू इस बूटे जो बड्डी दे, किजो कि मिन्जो इस बूटे का फळ तोपदे त्रै साल होई गेरे हिन्, ते इस बूटे ने फजूल अन्दर जगह रोके री है।' <sup>7</sup> माली ने तिस जो बोल्या, 'ओ मालका! इस बूटे जो, इस साल मत बड्को, ते मैं इसेरे चौन्नी पाससे नदारी करी के इस बिच खाद पाई दिहन्ना। ते मैं इसेरी खरे तरीके कने दिक्ख-रिक्ख करणा।' <sup>8</sup> ते फिरी बगीचे रा मालक बोलणा लगेया, कि 'जे अगले साल इस बूटे अन्दर फळ लगी जांगे, ता खरा, नी ता तू इस जो बड्डी देयाँ।' <sup>9</sup> सब्त वाळे रोजे यीशु जी धर्म सभा अन्दर वचन सुणाया करदे थिये।

### सब्त रे दिन इक्क कुबडी जनानी जो ठीक करणा

<sup>10</sup> ताँ इक जनानी, जिस बिच बुरी आत्मा वास करदी थी ते जिनिए तिस जो रोहळा बणाई रख्खे रा थिया ते से कुबडी होई गेरी थी। <sup>11</sup> यीशु जी ने जाँ तिस जो दिख्खया, ताँ तिस जो अपणे का सदेया अते बोल्या, "ओ जनानिये, तँ अज्र अपणी बमारी का छुटकारा पाई लेया।" <sup>12</sup> ते यीशु जी ने तिसेरे सरा पर हत्थ रख्या, ते तिस्स ई बेले, सिद्धी होई करी से खडीह गेई, ते परमेश्वर री बडाई करणा लगी पेई। <sup>13</sup> यीशु जी ने सब्त वाळे रोजे तिस जो खरा करदे दिख्खी करी धर्म सभा रा प्रधान गुस्सा होई गेया। ते महुआं जो

बोलना लगेया, “हफते अन्दर कम्म करने ताँई छे रोज दित्ते रे हिन्, ता तिन्हा रोजाँ बिच ई खरा होणे ताँई आया करो, सब्त वाळे रोजे नी।” 14 यीशु जी ने जवाब दित्तेया, कि “ओ कपटियों, कै इस रोजे तुसी अपने डंगरां जो पाणी पियाणे ताँई नी लिन्दे ? 15 ता कै मेरे ताँई एह जरुरी नी थिया, कि सब्त वाळे रोजे इस जनानी जो बुरी आत्मा का छुड़ा, जिस जो सैतान ने ठाहा सालाँ का जकड़ी रख्खे रा थिया ?” 16 जाँ यीशु जी ने एह गल्लाँ बोली, ताँ तिन्हेरे खलाफ जिन्हे बी मल्लु थिये, से खज्जळ होई गे, ते बाकि सब-जळे तिन्हेरे इस कम्म का खुस्स होई गे। 17 तां यीशु जी ने बोल्या, “परमेश्वर रा राज कदेया है ते मैं इसेरी बराबरी कुस कने कराँ ?

### सरेयां रे दाणे रा उदारण

18 से संरेयाँ दे बी साहई है, जिस जो कुस्की ने अपने खेत्रा अन्दर बाया ते से जाँ बड्डा होया ता इक बुड्डा बणी गया, अते फिरी चीडू-पखेरुआँ ने तिसेरी डालियाँ पर अपने घोंसले बणाई लिन्ते।” 19 यीशु जी ने फिरी पुछ्छेया, कि “मैं परमेश्वर रे राज री बराबरी कुस कने कराँ ?

### खमीर रा उदारण

20 से उस त्राक साहई है, जिस जो कुस्की जनानी ने बबरु बनाणे ताँई आटे अन्दर मलाई दित्तेया। बसक, त्राक तिस आटे का बडी घट थी, ताँ बी तिस त्राक ने पूरे आटे जो त्राक बणाई करी फुलाई दित्तेया।” 21 यीशु जी सैहर-सैहर अते ग्राँ-ग्राँ बिच जाई करी परमेश्वर रे बारे अन्दर सिक्सा दिन्दे दिन्दे यरुशलेम जो जाया करदे थिये।

### सकरा दरवाजा

22 ताँ कुस्की ने तिन्हा जो पुछ्छेया, “प्रभु जी, “कै मुक्ति पाणे वाळे थोडे ई मल्लु हिन ?” 23 यीशु जी ने तिस जो जवाब दित्तेया, “स्वर्ग रा रस्ता थोडा तन्ना जणा है। तिस बिच का जाणे ताँई हर तरह री कोसिस करो, किजोकि बडे जळेयाँ ने अन्दर जाणे री कोसिस करणी अपण जाई नी सकणा। 24 जाँ स्वर्ग रे मालक ने दुआर जो बन्द करी दैणा, ताँ तुसां बार खडे होई करी दुआर जो खट-खटाणा ते बोलणा, ‘ओ प्रभु, असां ताँई दुआर खोली देयो।’ अपण अन्दर का एह जवाब आणा, ‘मैं तुसां जो नी जाणदा।’ 25 तुसां ने बोलणा, अपण ‘असां ने तुसां कन्ने खाएरा ते दाखरास पित्तेरा है, ते तुसी म्हारे ग्राँ री गळियाँ बिच सिक्सा दिन्दे थिये।’ 26 अपण तिन्हा बोलणा, ‘मैं तुसां जो बोलदा, कि मैं तुसां जो नी जाणदा कि तुसी कुत्ते का आये रे हिन्। ओ बुरे मल्लुआँ, तुसी सब मेरे का दूर होई जाओ।’ 27 जाँ तुसां दिखणा कि अब्राहम, इसहाक, याकूब, अते सब भविस्वयक्तां परमेश्वर रे स्वर्ग अन्दर हिन् ते तुसां जो बार कडी डित्तेया गेरा है, तां तिन्हे तुसां रोणा अते दान्द पीळे\*। 28 फिरी पूर्व अते पश्चिम, उत्तर अते दक्षिण का सारे मल्लुआँ ने परमेश्वर रे स्वर्गा अन्दर अपनी जगह लैणे ताँई आणा। 29 ते जिन्हा जो अज्र मल्लु बेईज्रत करदे, तिस बेले तिन्हेरा आदर कित्तेया जाणा, ते जिन्हा जो मल्लुआँ का अज्र बडा आदर मिलेया करदा है, तिन्हा जो तिस बेले बेईज्रत कित्तेया जाणा, किजो कि जेहडे पिच्छे थिये से अगे कित्ते जाणे अते जेहडे अगे थिये से पिच्छे कित्ते जाणे।”

### हेरोदेस री दुस्मणी

30 तिस ई बेले किच्छ फिरीसी मल्लु तिन्हे आई रे ते बोलणा लगे, “राजा हेरोदेस अन्तिपास तुसां जो मारणा चाहन्दा, इधेरे ताँई तुसी इत्ते का कुदखी होरथी चली जाओ।” 31 ताँ यीशु जी ने तिस फिरीसी जो बोल्या, “जाई करी तिस चलाक मल्लु जो बोली दे, कि मैं मल्लुआँ बिच का बुरी आत्मा जो निकालणा; ते मैं अज्र बी बमाराँ जो खरा करणा, ते कल्ल बी। फिरी त्रिये रोजे मैं जिस कम्म ताँई आए रा है, से पूरा करणा है। 32 अते अज्र, कल्ल ते परसू, इन्हा त्रे रोजाँ बिच मैं अपना कम्म करणा ई है। किजो कि कुस्की बी भविस्वयक्ता ताँई ए खरा नी होणा कि से यरुशलेम रे बार मारेया जाओ।

### यरुशलेम ताँई अफसोस

33 ओ यरुशलेम! ओ यरुशलेम! तेरे अन्दर रैहे वाळे मल्लु इदेह हिन् जिन्हा ने भविस्वयक्तां जो मारे रा है। जिन्हा जो परमेश्वर ने इत्ते रे मल्लुआँ ताँई भेजे रा थिया, तिन्हा जो इत्ते रे ई मल्लुआँ ने पत्थराँ कने मारे रा है। मैं बडी बारी इत्ते रे मल्लुआँ रे बिच मेल-मलाप बधाणे री कोसिस किन्ती, जिह्य्याँ इक मुर्गी अपने बच्चेयाँ जो अपने पंखा रे हेठ समेटी लिन्दी, अपण इत्ते रे मल्लुआँ ने ईह्य्याँ करणा नी चाह्ना। 34 ते अवे दिख्खो, परमेश्वर ने तुसां ताँई तुम्हारा घर उजाड़ी रख्खे रा है, ते मैं तुसां जो बोलदा, कि तुसां मिन्जो ताँ ताँई नी दिख्खी सकणा जाँ ताँई से बेला आई नी जान्दा, कि तुसी बोलणा, ‘धन्न है से, जे प्रभु रे ना कने आया करदा है।’ 35 इक बेरी सब्त वाळे रोजे यीशु जी फिरीसियाँ रे प्रधानाँ बिच का कुस्की इक रे घरे रोटी खाणा गे। तिन्हे सबनी फिरीसियाँ री नजरां यीशु जी पर ई थियाँ, कि से इस सब्त वाळे रोजे कै करदे ?

### फरीसी रे घरे यीशु जी

14 तिन्हे इक इदेहा मल्लु बी थिया, जिसेरे हत्थ अते पैर बमारी री वजह कने सुजि गेरे थिये। 2 यीशु जी ने फिरीसियाँ ते यहूदी व्यवस्थापाकाँ का पुछ्छेया, कि “कै मूसा रे नियम रे हिसाब कने सब्त वाळे रोजे कुस्की मल्लु जो खरा करणा ठीक है कि नी ?” 3 अपण तिन्हा ने यीशु जी जो कोई जवाब नी दित्तेया; इधेरे ताँई यीशु जी ने तिस मल्लु जो खरा करी दित्तेया ते तिस जो तिन्हे का भेज्जी दित्तेया। 4 फिरी यीशु जी ने तिन्हा जो पुछ्छेया, “जे तुसां बिच का कुस्की इक जळे रा खोत्ता या दान्द कुस्की गत्ता बिच छुडकी पेयो ता कै सब्त वाळे रोजे तुसां तिसजो तिन्हे का बाह नी कढणा ?” 5 से इस गल्ल पर यीशु जी कने बेहस नी करी सके। 6 जाँ यीशु जी ने दिख्खेया कि रोटी खाणे जो जितणे बी मल्लु आए रे हिन्, से बैणे ताँई इक दुजे का छेळ जगह तोपेया करदे हिन्; एह दिख्खी करी यीशु जी ने तिन्हा जो इक उदारण सुणाया

### नर्म-दिल ते मेहमानां री इज्रत करणा

7 कि “ तुसां जो कोई ब्याह अन्दर सद्दे ता तुसी तिन्हे जाई करी सबनी का अगे, छेळ जल्ली जगह तोपी करी मत बेहई जान्दे, कुदखी ईह्य्याँ ना हो कि तिस ब्याह अन्दर तुसां का बी बड्डा कोई मल्लु सद्देरा हो, 8 ते फिरी तुसां जो बोल्या जाये, कि ‘अपणी जगह का उठी जाओ, इत्ते कुस्की होरसी ने बैणा’ ते तुसां जो सबनी का निचली जगह बैणा पेयो।” 9 इधेरे ताँई तुसी ईह्य्याँ करेया करो कि तुसी सबनी का पिच्छे बेहई जाया करो, फिरी जाँ सदणे वाळे ने तुसां जो दिखणा ता तिन्हे तुसां का आई करी बोलणा, ‘ओ भाई, अगे जाई करी मजे कने बै। इस कने बाकी मल्लुआँ सामणे तुम्हारी इज्रत बधि जाणी। 10 किजो कि जेहडा बी अपु जो बड्डा बणांगा, तिस जो परमेश्वर ने लोकाँ री नजरां अन्दर छोटा करणा, अपण जेहडा अपु जो छोटा बणागा, तिस जो परमेश्वर ने बड्डा करणा।” 11 फिरी यीशु जी ने तिस धाम दैणे वाळे मल्लु जो बोल्या, “तू जाँ बी कदी धाम दिहन्ना, ता अपने मित्तरां, भ्याळाँ, रिस्तेदारां या फिरी पडोसियाँ जो मत सद्दा, नी ता कल्ला जो तिन्हा ने बी तिजो सदणा ते तेरा हिसाब बराबर होई जाणा। 12 जाँ बी तू धाम दिहन्ना, ता सिरफ दुखी, रोळे, लडे अते अन्ने मल्लुआँ जो ई सद्देयाँ। 13 किजो कि तिन्हा का तिजो हटाणे ताँई किछ बी नी है, एह ई गल्ल तेरे ताँई असीस री वजह बणि जाणी। इधेरा फळ तिजो धर्मी मल्लुआँ रे जिन्दे होई उठणे का बाद मिलणा\*।” 14 फिरी तिन्हा कन्ने धाम खाणे वाळे मल्लुआँ रे बिच का इक ने यीशु जी जो बोल्या, “जे परमेश्वर रे स्वर्ग अन्दर धाम खान्ना, तिन्हे बडे धन्न होणा।”

### बड्डे भोज रा उदारण

15 ताँ यीशु जी ने उन्हां जो बोल्या, “इक मल्लु बड्डा धाम री तयारी करेया करदा थिया ते तिन्हे मते मल्लुआँ जो सद्देरा थिया। 16 जाँ धाम तयार होई गी, ता तिन्हे अपने नोकर जो बोल्या, ‘जिन्हा जो मैं सद्देरा है, तिन्हां जो बोली आ कि धाम पक्की गई, ते अवे रोटी खाणे ताँई आई जाओ।’ 17 से सब मल्लु

नी आणे रे नेक-बनेके भात्रे तोपणा लगी पे; इक जह्ने ने बोल्या, 'मैं इक नौआ खेतर खरीदे रा है, ते मैं तिस जो दिख्खणा है, ते इधरे तौई मैं धाम खाणा नी आई सकदा, अते मिन्जो माफ करी देयो।' <sup>18</sup> दुजे महु ने बोल्या, 'मैं अज्र पंज जोडे दाँद रे खरीदे अते तिन्हा जो परखणा जाणा कि से कम्म जोगे हिन बी की नी। इधरे तौई मैं धाम खाणा नी आई सकदा, मिन्जो माफ करी देयो।' <sup>19</sup> इक होर महु ने बोल्या, 'मेरा नोआ-नोआ ब्याह होये रा है, अते मैं बी आई करी धाम नी खाई सकदा।' <sup>20</sup> जाँ तिस नोकर ने हटि करी अपने मालक जो एह सारी गल्लां सुणाई ताँ से सुणी करी बड़ा लैहितेया। ते तिनि ए अपने नोकर जो बोल्या, कि 'सैहर रे बजारा ते गळियाँ बिच झट जाई करी गरीबाँ, दुन्डेयाँ, लट्टेयाँ अते अहन्नेयाँ जो सद्दी करी लेई आ।' <sup>21</sup> नोकर अपने मालक जो बोलदा, 'ओ मालक, जिह्य्याँ तुसां ने बोल्या थिया, तिह्य्याँ ई मैं कित्तेया अपण ताँ बी किछ जगह् खाली रेहई गेई।' <sup>22</sup> ताँ मालक ने नोकर जो बोल्या, 'सडकाँ अते बाडियाँ अन्दर जितणे बी महु मिलगे, तिन्हा जो धाम खाणे तौई जोर पा, ते तिन्हा जो लेई आ, ताकि मेरा घर भरी जाओ।' <sup>23</sup> ते तू सुणी लै, कि जिन्हा महुआं जो मैं पैहे रे धाम पाये री थी, तिन्हा बिच का इक जो बी मेरी इस धाम बिच का किछ बी चख्खणे जो नी मिलणा।' <sup>24</sup> जाँ यीशु जी कन्ने मते महु तिन्हेरे पिच्छे जाया करदे थिये, ताँ तिन्हा ने पिच्छे मुडी करी तिन्हा जो बोल्या,

### चेला बनणे रा मोल

<sup>25</sup> जेहडा महु अपने मां-प्यो, लाडी-बच्चे, भैण-भ्याळ अते अपने आप जो मेरे का बी जादा प्यार करदा हो, से मेरा चेला नी बणी सकदा। <sup>26</sup> जेहडा कोई अपनी सूळी अप्पू चुक्की करी मेरे पिच्छे नी चलगा, ज से मेरा चेला बनणे जोगा नी है। <sup>27</sup> तुसां बिच का इदेहा कुण है जेहडा घर बनाणे का पैहे तिस्जो बनाणे अन्दर लगणे वाळे पैसे रा पैहे का अणदाजा नी लगांगा अते कम्म सुरु करी दिन्ना ? <sup>28</sup> कुदखी ईह्य्याँ नी हो कि से घर री नीय्याँ पाई देयो ते पैसे नी होणे री वजह् कने तिस जो अपना कम्म बँद करणा पेई जाओ, ते जिन्हा ने तिस जो कम्म सुरु करदे दिख्खेया हो से तिसेरा मजाक उडान अते बोलन, <sup>29</sup> कि 'एह महु बडे जोस अन्दर आई करी घर बनाणा ता लगेया थिया, अपण बगैर सोच्चे-समझे बनाणे री वजह् कने इसेरा कम्म अध्धा रुकी गया।' <sup>30</sup> ते इदेहा कुण जणा राजा हुन्गा जेहडा एह नी सोचगा, कि 'मैं अपने दस्स-हजार सपाहीयाँ जो लेई करी दुजे राजे कने किह्याँ लडगा, जिसका बीह-हजार सपाही होन ?' <sup>31</sup> अपण, तिनि ए ता एह ई चाहा कि बी-हजार सपाहीयाँ वाळे राजे कने मेरी जिह्य्याँ-ना-तिह्य्याँ सुलाह होई जाओ, इधरे तौई तिनि ए अपने दूतां जो सुलाह करणे तौई भेजणा ताकि तिन्हेरे बिच सुलाह होई जाओ। <sup>32</sup> ईह्य्याँ ई जाँ तौई कोई महु अपना सब किछ पूरी तरह कने छडी नी दिहन्ना, ताँ तौई से मेरा चेला बनणे जोगा नी है। <sup>33</sup> लूण सुआद तौई ता खरा है अपण तिस ई लूण रा सुआद नी रेह्यो ता तिस जो कुस चीज कने स्वाद कित्तेया जाणा ?

### बेस्वादा लूण

<sup>34</sup> इदेहा लूण नां ता मिट्टी रे कम्मा आन्दा ते ना ई इस जो खाद तौई इस्तेमाल करी सकदे। इदेह लूण जो महु सुट्टी दिन्दे। इस गल्ल जो जे महु सुनणां चान्दे, से सुणन अते समझी लैन।" <sup>35</sup> सब चुन्गी लैणे वाळे ते पापी महु यीशु जी का तिन्हेरी सिक्सा जो सुनणे तौई आए रे थिये;

### गोचे री भैड रा उदारण

**15** एह दिख्खी करी फरिसी ते व्यवस्थापक बुड़-बुड़ करणा लगे, कि "ए ता पापी महुआं कन्ने रैहन्दा अते तिन्हा कन्ने रोटी बी खाई लिन्दा।" <sup>2</sup> इस गल्ल पर यीशु जी ने तिन्हा जो इक उदारण दित्तेया; <sup>3</sup> मन्त्री लेयो कि तुसा बिच का इक जह्ने का सौ भेड्डाँ हिन ते तिन्हा बिच का इक भेड्डाँ चरदे चरदे गोच्ची जाओ, ता कै से महु अपनी नदिनुऐ भेड्डाँ जो द्रबडा बिच खुल्ला छडी करी, तिस गोचेरी भेड्डाँ जो ताँ तौई तोपदा नी रैहगा, जाँ तौई से तिस जो मिली नी जाओ ? <sup>4</sup> अते जाँ तिस जो से भेड्डाँ मिली जाणी, ता तिनि ए बडे खुस्स होई करी तिस जो अपने मुहण्डे पर चुक्की करी

लेई आणा। <sup>5</sup> ते घरे आई करी अपने मित्रा ते पडोसियाँ जो सद्दाई करी तिन्हा जो बोलणा, कि 'मेरी भेड्डाँ गोच्ची मेरी थी, अते से अवे मिली गेई, इधरे तौई तुसी मेरे कन्ने इस गल्ल री खुसी मनाओ।' <sup>6</sup> फिरी यीशु जी ने बोल्या, "मैं तुसां जो बोलदा, कि ईह्य्याँ ई जाँ कोई महु अपने पापां जो छडी करी परमेश्वर रे रस्ते पर चलणा लगी पैन्दा, ता तिसरे तौई बी स्वर्ग अन्दर इतणी ई खुसीयाँ मनाई जान्दियाँ, जितणी कि तिन्हा नदिनुए खरे महुआं तौई नी, किजो कि से पैहे का ई परमेश्वर रे रस्ते पर चले रे हुन्दे, ते तिन्हा जो पापा का तौबा करणे री जरूत नी है।" <sup>7</sup> फिरी यीशु जी ने बोल्या, या "इदेहई कुण जनानी है, जिस का चाँदी रे दास्स सिक्के होन् ते इक सिक्का गोच्ची जाए ते से तिस जो तोपणे तौई दिव्या बाळी करी ते सौत बाई-बाई करी घरे रे हर इक कूणे अन्दर ताँ तौई नी तोपदी रैहगी, जाँ तौई से सिक्का तिस जो मिली न जाओ ?

### गोचे रे सिक्के रा उदारण

<sup>8</sup> फिरी जाँ तिस जो से सिक्का मिली जान्दा ता से अपनी सेल्लियाँ ते पडोसणियाँ जो सद्दी करी बोली, 'मेरा चाँदी रा सिक्का गोच्ची गेरा थिया ते से अवे मिली गया, तिसरे मिलणे री खुसी मेरे कन्ने मनाओ।' <sup>9</sup> मैं तुसा जो बोलदा, कि ईह्य्याँ ई जाँ कोई महु पापा जो छडी करी परमेश्वर रे रस्ते पर चलणा लगी पैन्दा, ता तिसरे तौई बी स्वर्ग अन्दर इन्नी ई खुसीयाँ मनाई जान्दियाँ।" <sup>10</sup> यीशु जी ने तिन्हा जो बोल्या, कि "कुस्की महु रे दो निके थिये;

### लबाड मुडें रा उदारण

<sup>11</sup> तिन्हा बिच का हल्के निके ने अपने प्यो जो बोल्या, 'मिन्जो अपनी जायदात बीच का मेरा हिस्सा देई दे' ते तिसरे प्यो ने अपने दोन्नां निकेयाँ अन्दर बराबबर-बराबबर जायदात बन्डी दिती। <sup>12</sup> हल्ले बडे रोज नी थिये होये रे, कि तिसेरा हल्का निक्का अपना सारा समान बटोळी करी कुस्की दूजे देसा जो चली गया अते तिन्हे अपने सारे पैसे बुरे कम्मा अन्दर उडाई दिती। <sup>13</sup> जिस बेल्हे तिस का सारे पैसे मुकी गे ते जिन्हे से रैहन्दा थिया, तिन्हे अकाल पेई गया ते तिस का किछ बी नी रेह्या; <sup>14</sup> तिनि ए तिन्हे इक जिमीदार रे छन्दे किन्ते कि मिन्जो अपने सुअरां जो चरणे जो रखी लेयो; ते तिस जिमीदार ने तिस जो अपने सुअरां जो चरणे तौई भेजी दित्तेया। <sup>15</sup> जाँ तिन्हे तिस जो भुख लगी ता से सोचना लगेया, कि 'मिन्जो ए फळियाँ खाणे जो मिली जान, जे सुअर खाया करदे हिन, ता खरा रैह्ला।' अपण, कुस की ने तिस जो इक फळी बी खाणे जो नी दिती। <sup>16</sup> फिरी तिस जो अपनी गलती रा एहसास होया ते सोचना लगेया, कि 'मेरे प्यो का कम्म करने वाळे किन्ने ई मजदूर रजी करी रोटी खान्दे थिये, अते खाणे रे बाद रोटी बची बी जान्दी थी, ते मैं इत्ते भूखा मरेया करदा है।' <sup>17</sup> अवे मैं अपने प्यो रे घरे वापस जाणा ते तिन्हा जो बोलणा, कि "मैं परमेश्वर ते तुसा रे खलाफ पाप किन्तेरा है। <sup>18</sup> अते अवे मैं ता इस जोगा बी नी है कि अपु जो तुम्हारा पुत्र बोली सकाँ; अपण तुसी ईह्य्याँ करो कि मिन्जो अपना इक मजूर बनाई करी रखी लेयो।" <sup>19</sup> ताँ से उठी करी अपने प्यो रे घरे चली पेया ते जाँ से घरे नेडे जाई पुजेया ताँ तिसरे प्यो ने तिस जो दूरा का ई दिख्खी लेया ते अपने निके जो इन्ने रोजाँ बाद दिख्खी करी तिसेरा मन रैह कने भरी गया ते से तिस का दोडी गया अते तिस जो गळे लगाई करी सुन्ने दिन्ते। <sup>20</sup> उनि ए अपने प्यो जो बोल्या, "पिता जी, मैं परमेश्वर रे खलाफ होई करी ते तुम्हारी नजरां अन्दर पाप किन्तेरा है ते अवे मैं तुसां रा पुत्र बोलणे जोगा बी नी है रेरा।" <sup>21</sup> अपण, तिसरे प्यो ने अपने नोकराँ जो बोल्या, 'मेरे इस निके तौई छैळ का छैळ कपडे लेई आओ ते इसेरी उंगळी अन्दर अंगूठी पुआओ अते पैरां अन्दर नौई चप्पलां पुआओ।' <sup>22</sup> ते सबनी का बधियां अते मोटा बक्करा बड्डो, किजोकी असां ने मेरे पुत्र रे वापस हटणे री खुसी अन्दर धाम दैणी। <sup>23</sup> किजो कि मेरा हल्का निक्का भटकी गेरा थिया ते अवे ए सहई रस्ते पर आई गया, ए गुअची गेरा थिया, अब्बे जाई करी मिलेया।' फिरी से खुसियाँ मनाणा लगी पे। <sup>24</sup> अपण तिस महु रा जेडा पुत्र, जेहडा कि खेत्रा का कम्म करी के घरा जो हट्टेया करदा थिया, तिनि ए गाणे बजाणे अते नचणे री अवाजां सुणियाँ।



25 तिनिए अपणे इक नोकर का पुछछेया, कि 'ए सब किछ कै होया करदा है ?  
26 तिनिए तिस जो बोल्या, 'तुम्हारा हल्का भ्याळ सहई-सलामत वापस हटि  
आए रा है, इस खुसी अन्दर तुम्हारे प्यो ने सबनी का बद्धिया ते मोटा बकरा  
बी बड्डणा लाए रा है।' 27 ए सुणी करी तिस जो बडी-भरी लैह चढी, ते से  
घरा अन्दर जाणा ई नी चाहन्दा थिया, अपण तिसेरा प्यो अप्पू ई बाह आई  
रेह्या ते तिस जो समझाणा लगेया। 28 अपण से अपणे प्यो जो बोलणा लगेया,  
कि 'मैं ता मते साल्लाँ का तुसां कन्ने ईमानदारी कने कम्म करेया करदा है ते  
अज्र ताँई तुम्हारी कोई गल्ल नी टाळी, अपण तुसी मिन्जो बकरी रा इक छेलू  
बी नी दित्तेया कि मैं अपणे मिन्जो कने खुसी मनाई लेयाँ। 29 अपण, जाँ  
तुम्हारा एह हल्का निक्का तुम्हारी जायदात जो कंजरी जनानियाँ पर लुटाई  
करी खाल्ली हत्थ हटि आया, ता तुसी इस ताँई सबनी का बद्धिया अते मोटा  
बकरा बड्डेया करदे हिन् ?' 30 तिसेरे प्यो ने तिस जो जवाब दित्तेया, 'बचा!  
असी दोहई ता किठे ई रेहन्दे ते जे किछ बी मेरे का है, से सब तेरा ई ता है।  
31 अपण, अज्र असा जो तेरे हल्के भ्याळ रे हटि आणे री खुसी मनाणा  
चाहिन्दी, किजो कि एह पैहे भटकी गेरा थिया ते अवे कुदखी जाई करी सहई  
रस्ते पर हटेया, एह गोचीह गेरा थिया, अवे मिली गेया।' 32 यीशु जी ने इक  
अमीर महु कहाणी अपणे चेल्लेयाँ जो सुणाई, कि 'इक अमीर महु ने अपणे  
कम्म-धन्दे जो संभालणे ताँई इक मुन्सी रखखेरा थिया; अपण तिस पर ए  
इल्जाम लगी गेया कि से अपणे मालक रे पैसेयाँ जो खत्म करेया करदा है

### चालाकी भडांरी

16 इधरे ताँई तिस अमीर महु ने मुन्सी जो सदाया ते तिस का  
पुछछेया, 'मैं जे किछ बी तेरे बारे अन्दर सुणेया करदा है, से सच्च है,  
कि नी ? अवे तू अपणे कम्म रा लेखा-जोखा मिन्जो दस्सी दे किजो कि मैं  
तिजो नोकरा का कड्डी दैणा।' 2 तिनिए सोचेया, 'मेरा मालक मिन्जो नोकरा  
का कडणे वाळा है, फिरी मैं कुते जाहन्ना ? मेरे का ता मजूरी बी नी होणी  
अते लज्जे भीख बी किह्याँ मंग गा ? 3 मिन्जो किछ इदेह्या करणा पैणा कि जाँ  
मेरा मालक मिन्जो नोकरा का कड्डी दिहन्ना, ता मेरे मते जहे मित्र होणा  
चाहिन्दे ताकि से मिन्जो तिस बेले सम्भाळी लेंन।' 4 इधरे ताँई मुन्सी ने  
अपणे मालक रे देन-दारों जो इक-इक करी के सदेया। ते पैहे महु का  
पुछछेया, कि 'मेरे मालक ने तेरे का कितणी उधारी लैणे जो है ?' 5 ताँ पैहे  
देन-दार ने मुन्सी जो जवाब दित्तेया, 'मेरे पर सौ मणा जैतून रा तेल उधार  
है।' ताँ मुन्सी ने बोल्या, कि 'पंजाह मण रा पर्चा बणाई लै।' 6 फिरी तिनिए दुजे  
देन-दार का पुछछेया, कि 'तेरे पर मेरे मालक री किन्नी उधारी है ? अते  
तिनिए बोल्या, सौ मणा कणक री उधारी है, ताँ मुन्सी ने उस जो बोल्या,  
कि 'आस्सी मण री पर्ची बणाई लै।' 7 फिरी इह्य्याँ होया कि तिस अमीर महु  
ने अपणे ठग मुन्सी री तारीफ किन्नी किजो कि तिनिए बडी चलाकी कने  
कम्म किन्ना थिया। तिह्य्याँ ई परमेश्वर जो नी मनणे वाळे महु अपणे साहई  
महुआं कने बरताव करणे अन्दर खरे महुआं का जादा चलाक हिन्। 8 मैं  
तुसां जो बोलदा कि दुनिया री धन-दौलत कने तुसी दुजेयाँ रा भला करो अते  
तिन्हा जो अपणा मिन्जो बणाई लेयो; ते जाँ से धन-दौलत खत्म होई जाणी  
ताँ तिन्हा कम्मा री वजह कने तुसी स्वर्ग बिच लेई जाए जाणे। 9 जे तुसी  
छोटी-छोटी गल्लाँ अन्दर ई कुस्की रा भरोसा तोडी दिहन्ने ता बड्डी-बड्डी  
जिम्मेदारियाँ दैणे अन्दर कोई तुसां पर भरोसा किह्य्याँ करी सकदा ? 10 ते  
तुसी इस जुग बिच कमाये रे पैसेयाँ जो ठीक तरह कने नी सम्भाळणे ता  
असली जायेदात तुसां जो कुनिए दैणी ? 11 ते तुसी बगान्नी जायेदात  
सम्भालणे अन्दर विस्वास जोगे नी हिन् ता जेहडी तुसां री अपणी धन-  
दौलत है, से तुसां जो कुण दिहन्ना ? 12 कोई बी महु दो मालकां री सेवा नी  
करी सकदा, से या ता इक कने नफरत करी सकदा अते दुजे कने दाह-पीड  
या इक जहे कने बडी ईमानदारी कने रेहई सकदा; अपण दुजे जो से अण-  
दिख्खा करी सकदा। इह्य्याँ ई कोई बी महु परमेश्वर अते धन-दौलत, दोन्ना  
री सेवा किठे नी करी सकदा।' 13 फरीसी महु, जेहडे कि पैसे पिच्छे मरदे  
थिये, से इन्हा गल्लाँ जो सुणी करी यीशु जी रा मजाक उडाणा लगे।

### यीशु जी रे किछ भाषण

14 यीशु जी ने तिन्हा जो बोल्या, 'तुसी जे महुआं जो एह जताणा चाहन्दे  
कि असी बडे खरे हिन्, अपण परमेश्वर ता तुम्हारे मनां जो बी जाणदे। दुनिया  
जिस गल्ल रा बडा आदर करदी, से गल्ल परमेश्वर री नजरां अन्दर नफरत  
करणे जोगी है। 15 जाँ बपतिस्मा दैणे वाळा युहन्ना परमेश्वर रा बसेख सुणादा  
थिया, ताँ ताँई मूसा रे जरिये दित्ते गेरे परमेश्वर रे नियम अते भविस्वयक्तां रे  
बसेख ई महुआं रा मार्ग दरसन करदे रे। अवे परमेश्वर रे राज करणे री  
खुसखबरी महुआं ताँई पुजेया करदी है ते स्वर्ग अन्दर जाणे ताँई महु  
उताहले होया करदे हिन्। 16 फिरी बी स्वर्ग ते धरती रा टळी जाणा वता  
असान है अपण परमेश्वर रे नियमाँ अन्दर लिखखेरा इक-इक अख्खर बी नी  
मिहिटि सकदा। 17 जे कोई अपणी लाडी जो तलाक देई करी छड्डी दिन्दा ते  
कुस्की दुज्जी जनानी कने ब्याह करदा ता ए व्याभिचार मन्या जान्दा अते  
जेहडा कुस्की तलाक दित्तेरी जनानी कने ब्याह करी लिन्दा, से बी  
व्याभिचार ई करदा।' 18 दिख्खो, इक महु थिया ते से बडा अमीर थिया। से  
बैंगणी रन्ना रे बडे छैळ अते मैहन्ने मलमल रे कपडे पान्दा थिया ते हर रोज  
बडे ऐश-ओ-अराम री जिन्दगी जिन्दा थिया।

### अमीर महुणु ते गरीब लाजर

19 लाजर नां रा इक दुखी ते गरीब भिखारी तिसेरे दुआर का बेहई रेहन्दा  
थिया ते तिसेरा सारा जिस्म जख्मां कने भरित्तेरा हुन्दा थिया। 20 लाजर  
तिस अमीर महु री जुडी रोटी खाई करी अपणे पेट जो भरणा चाहन्दा थिया  
ते इधरे ताँई से बाह बेहई रेहन्दा थिया, इत्ते तक कि कुते बी आई करी  
तिसेरे जख्मां जो चटदे थिये। 21 इक रोज लाजर मरी गेया ते स्वर्ग रे दूत  
तिसेरी आत्मा जो स्वर्ग अन्दर अब्राहम का लेई गे। से अमीर महु बी थोडे  
रोजों बाद मरी गेया ते तिस जो दब्बी दित्तेया गेया। 22 तिसेरी आत्मा नरक  
बिच चली गई। जाँ से नरक अन्दर तडफदा थिया, ता तिसेरी नजर स्वर्ग पर  
पेई जित्ते से ई गरीब लाजर अब्राहम री खोख्खा अन्दर थिया। 23 ताँ तिस  
अमीर महु ने जोरे हाक्क मारी करी बोल्या, 'ओ पिता अब्राहम! मेरे पर तरस  
खाओ ते इस लाजर जो मेरे का भेज्जी देयो कि ए अपणी उंगळी जो सेडी करी  
मेरी जिब्व जो ठण्डा करी जाओ किजो कि मैं ता इस अग्नी रे सेक कने फुक्की  
चले रा है।' 24 अपण अब्राहम ने बोल्या, 'मेरे पुत्रा, चेत्ता कर कि तेरी जिन्दगी  
अन्दर तेरे का सब किछ थिया अपण लाजर का बुरी चीजाँ जो छड्डी करी होर  
किछ बी नी थिया, अवे से इत्ते स्वर्ग अन्दर अराम कने रेह्या करदा है अते तू  
नरक अन्दर अपणे हिस्से दा दुख सेह्या करदा है। 25 होर ता होर म्हारे बिच  
इक बडा बड्डा गात्त है, जिसेरी वजह कने कोई बी स्वर्ग का नरक जो अते  
नरक का स्वर्ग जो चाहई करी बी नी जाई सकदा। 26 अमीर महु बोलदा,  
'पिता अब्राहम जी ! मैं तुम्हारे छन्दे करदा कि इस जो मेरे प्यो रे घरे भेजी  
देयो। 27 किजो कि, धरती पर मेरे पंज भ्याळ होर बी हिन्, एह तिन्हा का जाई  
करी जे किछ बी मेरे कन्ने होया करदा है, तिन्हा जो दस्सी सको ताकी जिस  
बेले से मरन ता तिन्हा जो नरक अन्दर नी आणा पेयो। 28 अब्राहम ने बोल्या,  
'तेरे भ्याळाँ ताँई मूसा ते भविस्वयक्तां दी कताबाँ हिन्, से तिन्हा जो पडी करी  
तिन्हेरी गल्लाँ पर चली सकदे।' 29 तिनिए बोल्या, 'पिता अब्राहम जी! जे कोई  
मेरे रे महुआं बिच का तिन्हा जो समझाणा जाओ, ताँ ई से अपणे पापा का  
तौबा करी सकदे।' 30 अब्राहम ने तिस जो बोल्या, 'जे से मूसा अते  
भविस्वयक्तां री कताबा बिच जे लिखखेरा है, तिन्हा जो नी सुणदे ता कोई मरे  
रे महुआं बिच का जिन्दा होई करी तिन्हा का जाओ, ताँ बी तिन्हा तिन्हेरा  
भरोसा नी करणा।' 31 यीशु जी ने अपणे चेल्लेयाँ, जो बोल्लया, जिन्हा गल्लाँ  
पर मणुआँ ने सहई रस्ते का भटकणा से गल्लाँ ता होणी ई हिन्, अपण लागत  
है तिस मणु पर जिसेरी वजाह कने से गल्ला होणी।

### ठोकर लगणे री वजह बनणा

17 तिसेरे ताँई एह जादा खरा हुन्दा कि बजाय इसेरे कि से इन छोटे  
मणुआँ बिच का कुसकी जो पाप करणे पर मजबूर करी सकें,  
तिसेरे गळे पर चक्की रा पाट लटकाई करी तिस जो द्रया बीच सुडी दित्तेया

जान्दा। 2 इस गल्ल रा ध्यान रखवो, कि तेरा भाई पाप करे ता तिस जो समझा, जे से अपणी गलती मन्दा ता तिस जो माफ कर; 3 अगर जे कोई इक रोज बिच सात्त बारी तेरे कने बुरा करवा, अते सात्त बारी ई तेरे का आईकरी बोले कि मिन्जो बड़ा मोह होया करवा है अपणी गलती रा, ताँ तिस जो सत्तो बारी माफ कर।" 4 ताँ यीशु जी रे खास चेल्लेयाँ ने बोलेया, 'प्रभु जी, कै म्हारे जो जादा भरोसे री जरूरत है?"

### भरोसा

5 प्रभु यीशु जी ने तिन्हा जो बोलेया, "जे तुमारा भरोसा सँरिया रे दाणे रे बराबर बी हुन्दा, ताँ तुसी इस क्रूँ(शहतुत) रे बूट्टे जो बोल्ले गे, "कि तू जडा का बुट्टि करी समुन्द्रा बिच लगी जा, ताँ तिन्ने तुमारी मन्नी लेणी थी। 6 तुसां रे बिच का ईदेय कुण है, जिसेरा नौकर हळ बाई करी या भेडा जो चराई करी आन्दा, अते तिसेरा मालक तिस जो बोले कि आ अते रोटी खाणा बेई जा?

### इक दास रा फर्ज

7 अपण से तिसेरे बजाए, कै एह नी बोल्गा, "कि मेरे ताँई रोटी तैयार कर, अते मिन्जो खाणे ताँई दे; अते जाँ मै रोटी खाई लिन्गा ताँ तिसेरे बाद तू बी खाई लेयाँ?" 8 कै मालक ने तिसेरा सुकर करणा कि तिन्ने से सब कम्म कित्ते जे तिस जो करणे ताँई दित्ते थिये? 9 ईय्याँ ई जाँ तुसी परमेश्वर रे कम्म जो पूरा करी लिन्ने ता तुसी एह बोलेयो कि असी ता तारीफ लायक नी हिन किजोकि असा ने सेई कित्तेया जे म्हारे जो करना चाईन्दा था। 10 इक रोज ईय्याँ होया कि यीशु जी गलील प्रदेश अते सामरिया प्रदेश री सीमा रे बीच का होईकरी जाया करदे थिये।

### दस कोढ़ रे मरिजां जो ठीक करणा

11 कुसकी ग्राँ बिच बडदे बेले यीशु जी जो दस्स कोढ़ियाँ ने दिखवेया। 12 अते तिन्हा ने यीशु जी जो जोर सणे हाक्क लाई अते बोलेया, "ओ यीशु जी, ओ मालक, असाँ पर मैह करो!" 13 यीशु जी ने तिन्हा जो दिखवेया अते बोलेया, कि अपणे आप जो परोताँ जो दिख्खाओ।" \*i अते तिन्हा तियाँ ई कित्तेया। अते जान्दे-जान्दे से सुच्चे होई गे \*j 14 तिन्हा दस्स कोढ़ियाँ बिच का इक ने दिखवेया कि मै खरा होई गया ता से परमात्म री बड़ाई करदे करदे यीशु जी का आया; 15 अते तिन्हेरे पैरा मूह रे भारे पैया अते तिन्हेरा सुकर करणे लगेया; कने से इक सामरी \*k मणु थिया। 16 यीशु जी ने तिस जो पूछेया, "कै मै दस्स जणेया जो सुचा नी कित्ता, फिरी से बाक्की नौ कुदे हिन? 17 कै परमेश्वर री बड़ाई करणे ताँई इस परदेसी। जो छडी, होर कोई नी आया। 18 यीशु जी ने तिस जो बोलेया, "उठ अते जा, तेरे भरोसे ने तिजो खरा कित्ता।" 19 जाँ फरीसियाँ ने यीशु जी का पूछेया, "कि परमेश्वर ने राज कधाडी करणा, ताँ तिन्हा ने जवाब दित्ता, परमेश्वर रा राज तुसां रे साहब कने लिब्वणे वाळी निशानियाँ कने नी आणा।

### परमेश्वर रे राज्य रा आणा

20 अते मणुआँ ने एह नी बोल्गा, कि दिखवो, इत्ते है, या उत्ते है।' किजोकि, परमेश्वर ता तुसां रे दिला बिच ई राज करदा।" 21 फिरी यीशु जी ने चेल्लयाँ जो दस्सेया, " कि से रोज आणे, जाँ (यीशु) "मणु रे पुत्तर" ने राज करणा ताँ तुसी तिस रोज जो दिखखणे ताँई तरसी जाणा, पर दिखखी नी पाणा। 22 मणुआँ बिच इदेई गल्लाँ बी होणियाँ कि "मणु रा पुत्तर" राज करणे ताँई आई गेरा है अते से इत्ते है या उत्ते है अपण मै तुसां जो बोल्दा, "कि तुसी तिसेरे पिच्छे मत चली जान्दे, या तिन्हा गल्लाँ पर भरोसा मत करी बेन्दे।" 23 जिह्याँ अम्बरा बिच बिजळी इक कुणे का दूर कुणे तक लसकदी, तिस ई तरीके कने मणु रे पुत्तर ने राज करणे ताँई आणा। 24 अपण, एह सब गल्लाँ होणे का पैले एह जरूरी है कि "मणु रा पुत्तर" जो बडे दुख सैके पैणे अते इस जुग दे मणुआँ ने तिस जो नी मनणा। 25 मणु रे पुत्तर ने राज करणे रे बेले बिच बी ओई होणा, जेडा "नू" रे बेले होया थिया, 26 किजोकी नू रे झाजा पर चढने का पैले ताँई बी ब्या-ब्यू, अते धाम्माँ बिच खाणा-पीणा, हुन्दा थिया अते इक रोज इदेया हड़ आया कि तित्ते सब किछ तैहस-नैहस

होई गया। 27 अते तिह्याँ ई लूत रे बेले बी होया थिया, कि मणु ब्या-ब्यू बिच खान्दे-पिन्दे अते कम्म-धन्दे बिच लैण-दैण हुन्दा रैहन्दा थिया, अते खेती-बाडी अते घर-बार बनाणे बिच लगी रैहन्दे थिये; 28 अपण इक रोज जाँ लूत सदोम सैह का चली गया अते तिसेरे जाणे का बाद तित्ते आग अते गन्धक अम्बरा का बरसी पेई अते तित्ते सब किछ तबाह होई गया। 29 मणु रे पुत्तर रे आणे रे रोजे बी इय्याँ ई होणा है। 30 उस रोज जे मणु अपणे घरे री छत्ती पर हो अते से अपणा समान लैणे जो थले ना उतरो। अते तिह्याँ ई जे अपणे खेत्राँ अन्दर होन से अपणे घरा जो ना हटन। 31 लूत री लाडी जो चेत्ता करो, कि उस कने कै होया थिया? 32 उस रोज जेडा बचणे री कोसिस करगा, तिन्ने मरणा, अपण जेडा परमेश्वर पर भरोसा रखी रखगा, तिन्ने बची जाणा है। 33 मै तुसां जो बोल्दा, "कि तधाडी राती दो मणु इक मन्जे पर सुत्तेरे होणे अते इक अपणे कने लेई जाणा अते दुज्जा छड्डी जाणा। 34 तधाडी दो जनानियाँ आडा पिहन्दी होणी अते इक अपणे कने लेई जाणी अते दुज्जी छड्डी जाणी। 35 तधाडी दो जणे खेत्रा बिच हुन्ने, इक गैब होई जाणा अते इक तित्ते ई रेई जाणा। 36 एह सुणी करी चेल्लेयाँ ने बोलेया, "ओ प्रभू जी! एह सब किछ कुदे होणा? जाँ तुसां ने एह सब गल्लाँ हुन्दे दिखणी ता समझी ले कि मणु रे पुत्तर अवे आणे वाळा है।" 37 फिरी यीशु जी ने अपणे चेल्लेयाँ जो एह बताणे ताँई कि से हर बेले प्रार्थना करदे रैन अते दुख्खी ना होण तिधेरे ताँई इक उदारण दित्ता,

### बुरा हाकम ते विधवा रा उदारण

18 तिन्हा ने बोलेया, कुस्की सैहा बिच इक जज थिया से ना ता परमेश्वर जो मन्दा थिया ना ई मणुआँ री परुआ करदा थिया। 2 तिस्सी सैह बिच इक बिधवा जनानी रैन्दी थी। से तिस्का घडी-घडी आन्दी थी अते बोल्दी थी, मेरे दुम्मण ने मेरे कने बे-न्याई करी के मेरा नुकसान कित्ता, अवे मिन्जो तिस मणु का फँसला मिलणा ई चाहिन्दा। 3 तिस जज ने मते रोजाँ ताँई तिस बिधवा री गल्लाँ री कोई परुआ ई नी कित्ती, अपण बाद बिच तिन्ने अपणे मनाँ अन्दर सोचेया, कि मै ना ता परमेश्वर का डरदा ना ई मणुआँ री परुआ करदा। 4 अपण ताँ बी से जनानी घडी-घडी मेरे का आई करी मिन्जो तंग करदी रैन्दी। इधेरे ताँई मै इय्याँ करदा कि तिसेरा फँसला करी ई दिन्दा, नी ता तिन्ने मेरे नक्का धूँ देई रखणा। 5 फिरी प्रभू जी ने बोलेया, सुणो, तिस कोढी जज ने कै बोल्या था?" 6 ता कै परमेश्वर अपणे चुने दे मणुआँ पर ध्यान नी दिन्गा, जे तिन्हा जो रात ध्याडी चेता करदे अते मन्गदे कि असा जो फँसला मिलण? कै परमेश्वर ने तिन्हेरी सुनणे ताँई बडी हाण लगा गाँ? 7 मै तुसा जो बोल्दा, कि परमेश्वर ने तिसी ई बेले तिन्हेरा फँसला करणा। अपण जाँ (यीशु) मणु रा पुत्तर इस धरत बिच आणा, ता ईदेय किन्ने हुन्ने जे ईदेया भरोसा करदे हुन्ने?" 8 जे कोई अपणे नेक होणे पर बडा भरोसा रखदा अते दूज्याँ जो अपणे सामणे किछ छ बी नी समझदे इदेय मणु ताँई यीशु जी ने उदारण सुणाया:

### फरीसी ते चुर्गी लैणेवाळे रा उदारण

9 इक बारी दौ मणु देहे बीच प्रार्थना करने ताँई गे! इक फरीसी थिया, दूजा चुंगी लैणे वाळा थिया! 10 से फरिसि कल्ला खडी करी प्रार्थना करणे लगया, 'ओ परमेश्वर, मै तेरा सुकर करदा, कि मै दूज्याँ साँई ना ई मणुआँ जो ठगदा, ना ई मै गलत करदा, अते ना ई व्यभचारी \*है, अते ना चुंगी लैणे वाळे साँई है। 11 मै हफतँ बीच दौ वारी व्रत रखदा। हाँ, अते अपणी कमाई दा दसमाँ हिस्सा तिजो दिन्दा! 12 अपण, सँ चुंगी लैणे वाळा मणु दूर खडी करी प्रार्थना करणे लगेया ! अपण प्रार्थना करदे बेले स्वर्ग रे पासे अपणी अँखा चुकने री हिम्मत नी करी सकया ! बजाए इसेरे, सँ अपणे हिक्का जो पीटी-पीटी करी बडे दुख्खी मना कने बोल्णे लगया, ओ परमेश्वर, मेरे पर रैहम कर, किजोकी मै बडा पाप्पी मणु है।" 13 यीशु जी ने फिरी बोल्या, " मै तुसा जाँ बोल्दा हाँ कि एह पाप्पी मणु परमेश्वर रे अगे नेक मन्याँ गया, अते अपणे घरे वापिस हटी गया, ना कि दुज्जा! अपण फरीसी कने इदेया नी होया, किजोकि जे कोई बी अपणे आप जो बड्डा समझगा, से छोटा कित्ता जाँणा, अपण जे कोई अपने आप जो छोटा समझगा, तिस जो बड्डा कित्तेया जाँणा।" 14 इक रोज

किछछ माँ प्यो अपणे निक-निकेयाँ जो यीशु जी का लेई आए कि से तिन्हा पर हाथ्य रखण! अपण, यीशु जी रे चेलेयाँ ने तिन्हा जो बोल्या, कि यीशु जी जो तान्ना मत करो।

### बचेयाँ जो आशिर्वाद दैणा

15 अपण यीशु जी ने चेलेयाँ जो बोल्या, "निकयाँ जो मेरे का आणा देयो, अते इन्हा जो मेरे का आणे ताँई ठाक्यो मत! किजोकि परमेश्वर रे स्वर्ग बिच इदेय ई मणु होणे 16 मै तुसा जो सच्च बोल्दा, "कि ईदेया कोई बी जे परमेश्वर रे स्वर्ग जो निके -निके साहई नी मन्ना\*, p स्वर्ग बिच से नी जाई सकदा। 17 इक बारी कुस्की यहूदी मन्त्री ने यीशु जी का सवाल पूछ्या, ओ पवित्र गुरु, अनन्त काल रा जीण पाणे ताँई मै कै कराँ ?"

### अमीर आदमी ते स्वर्ग री हमेसा री जिन्दगी

18 यीशु जी ने बोल्या, " तू मिन्जो पवित्र किजो है बोल्दा? सिरफ परमेश्वर ई पवित्र है ! 19 तिजो परमेश्वर रे नियमाँ रे हुकमा रा पता ई है कि परमेश्वर रे कै हुकम हिन: गलत कम्म नी करने, जान नी लैणी, कने चोरी नी करनी, झूठी गवाई नी दैणी, अते अपणे माँ प्यो री इज्जत करणी!" 20 तिस मणु ने बोल्या, "जाँ मै हल्का थिया, ताँ दा मै एह सारे हुकमा जो मन्ना करदा आया है!" 21 यीशु जी ने एह सारी गल्ला जो सुनी करी तिस जो बोल्या, " तेरे बिच अबे वी इक गल्ल री कमी है, से एह कि अपणा सब किछछ बेची करी गरीबा बिच बन्डी दे; फिरी तिजो स्वर्ग रा धन मिलणा! फिरी आ अते मेरे पिछ्छे चली पे।" 22 अपण जिस बेले तिस मणु ने एह गल्लाँ सुणी तिसेरा मूँ हल्का होई गया किजोकि से बडा अमीर थिया ! 23 जाँ यीशु जी ने तिस जो बडा दुख्खी हुन्दे दिख्खया, ता से अपणे चेलेयाँ जो बोल्णे लगे, " अमीर मणु रा परमेश्वर रे स्वर्ग बीच आणा बडा मुस्कल है! 24 इक सेई बीच का ऊँट आसानी कने निकळी सकदा अपण, इक अमीर मणु स्वर्ग अन्दर चली जाए एह नी होई सकदा ! 25 जिन्हा ने बी एह गल्लाँ सुणी, तिन्हा ने पूछ्या, "ताँ उद्धार कुसेरा हुणा ! 26 ताँ यीशु जी ने जवाब दित्या, "जे मणु का नी होई सकदा, से परमेश्वर का होई सकदा !" 27 पतरस ने बोल्या, "असाँ ने ता तुसां रे पिछ्छे चलणे ताई अपणा घर-बार बेची दित्या" 28 यीशु जी ने तिन्हा जो बोल्या, अपण मै तुसा जो सच्च बोल्दा, " जिन्हे परमेश्वर रे स्वर्ग ताँई, घर-बार, लाडी, भ्याळ, माँ प्यो, या बाल बच्चे छडी दित्ते हो। 29 तिस जो इस जुग बिच ता कई गुणा अशीष मिलणी ई मिलणी अते आणे वाळे बेले तिस जो अनन्त जीण बी मिलणा। 30 फिरी तिन्हा ने अपणे कने खास बारा चेलेयाँ जो लित्या, अते तिन्हा जो बोल्या, असी यरुशलम जो जाए करदे हिन अते जिस बेले असी तित्ते पूजणा, तां "मणु रे पुत्र" रे बारे बिच, भविष्यवक्ता री लिखी रियां सै सारी गल्लाँ पूरी होणी।

### अपणे मरणे रे बारे बिच यीशु जी रि तिजि भविष्यवाणी

31 कि से पापियाँ रे हथ्या पकड़ाया जाणा। तिन्हा ने तिसेरा मजाक उडाणा अते तिस जो कोस्या जाणा अते तिस पर थूकणा ! 32 तिन्हा तिस जो कुटणा अते तिस जो मारी दैणा ! अपण तिन्नी तिजो रोझे फिरी जिन्दा होई जाणा ।" 33 अपण, यीशु जी जे किछछ बोल्या करदे थिये, से गल्लाँ चेलेयाँ रे पल्ले नी थी पेया करदी । अते से इन्हा गल्लाँ का अणजाण रे, अते से जाणी नी पाए कि से कुधरे बारे बोल्या करदे हिन । 34 जाँ से यरीहो रे नेडे जाई पुजे ताँ इक अहन्ना भिखारी सड़क रे कनारे बैठे दा थिया।

### अन्ने भिखारी री हाक्खियां जो ठीक करणा

35 फिरी जाँ मणु तिसेरे मुहाग्गर पुजे ताँ तिन्हेरी अवाज सुणी करी से कुस्की का पुछणा लगेया, "एह कै होया करदा है?" 36 तिन्हा ने तिस जो बोलेया कि, "यीशु नासरी जी जाया करदे हिन।" 37 अते ताँ तिन्हे हाक्क लाई करी बोलेया, "ओ दाऊद रे पुत्र, यीशु जी! मेरे पर रहम करो!" 38 जे मणु यीशु जी रे अग्गे अग्गे चले दे थिये से तिस जो बक्णा लगे, अपण से होर बी जादा जोरे हक्कां लाणे लगेया, "ओ दाऊद रे पुत्र! मेरे पर रहम करो!" 39 ता यीशु जी ने तिसेरी अवाज सुणी, अते अपणे चेलेयाँ जो बोलेया, "इस जो मेरे

का लेई आओ"। जाँ तिस जो लेई आए, ता यीशु जी ने पुछ्छेया, 40 तू कै चान्दा कि मै तेरे ताँई करां?" तिन्हे बोलेया, "ओ प्रभु जी, मै एह चान्दा कि मै अपणी हाक्खियाँ कने दिख्खी सकां।" 41 यीशु जी ने तिस जो बोलेया, "ता ठीक है, तू अवे दिख्खी सकदा; अते तेरे भरोसे ने तिजो खरा किन्ता।" 42 ताँ से तिस्सी बेले दिख्खा लगी पेया अते परमेश्वर री बडाई करणा लगेया अते यीशु जी रे पिछ्छे चली पेया; अते एह सब किछ दिख्खी करी मणु परमेश्वर री बडाई करणा लगे। 43 यीशु जी यरीहो नाँ रे सैहर जो जाया करदे थिये।

### चुगीं लैणेवाळा जक्कई

19 तित्ते जक्कई नाँ रा मणु चुंगी वसूलणे वाळेयां रा प्रधान, अते से बडे पैसे वाळा थिया। 2 से यीशु जी जो दिख्खा चान्दा थिया। अपण, बडे सारे मणुआँ री वजाह कने से दिख्खी नी थिया पाया करदा, किजोकि से बोणा थिया। 3 इधेरे ताँई से दौडी करी त्रिम्बळ रे बूट्टे पर चढ़ी गया, जेडा कि तिसी रस्ते पर लगे दा थिया, अते जिन्हे का यीशु जी ने जाणा थिया। 4 जाँ यीशु जी तिस्स बूट्टे रे रस्ते का होई करी जाणा लगे, ताँ तिन्हा ने बूट्टे पर जक्कई जो दिख्खेया, अते तिस जो बोलेया, 'ओ जक्कई, झट्ट थल्ले उतर किजोकी आज तेरा घरे होणा जरूरी है, किजोकि आज मै तेरे घरे रैणा। 5 जक्कई झट्ट थल्ले उतरेया अते बडी खुसी कने यीशु जी कने मिलेया। अते तिन्हा जो अपणे घरे लेई गया। 6 अपण मणुआँ जो एह गल्ल खरी नी लगी, अते बुडबुडआणा लगी पेय अते बोलणा लगे से ता पाप्पी मणु रे उत्ते प्रोणा बणी करी तिस रे घरे जो गया। 7 जक्कई खडे होई गया अते यीशु जी जो बोल्णा लगेया, 'ओ प्रभु जी' मै अपणी धन-दौलत रा आदा हिस्सा गरीबां बिच बन्डी दिन्ना अते 'प्रभु जी। मै जिन्हा मणुआँ जो ठगी करि तिन्हा का जरुरत का जादा लित्ते दा है तिन्हा जो मै चार गुणा मोडी दिन्ना। 8 यीशु जी ने तिस जो बोलेया, 'आज तेरा अते तेरे घरे वाळेयां रा उद्धार\* होया है। किजोकी तँ अप्पु जो अब्राहम रा पुत्र साबित कित्तेया है। 9 किजोकी "मणु रा पुत्र" तेरे जेदेय होर बी मणुआँ जो तोपणे अते तिन्हेरा उद्धार करणे ताँई आये दा है। 10 यीशु जी यरुशलम रे नेडे कुदकी थिये। अते तित्ते मणु तिन्हेरी गल्लां सुणेया करदे थिये। अते तिन्हेरे मरणे री भविष्यवाणी\* रा पूरे होणे रा बेला आई गेरा थिया, इधेरे ताँई तिन्हा ने मणुआँ जो इक उदारण दित्ता;

### दस मुहरां रा उदारण

11 इक खरे पैसे वाळा मणु अपणे देस रा राजा बनणे दी इजाजत लैणे ताँई रोम देस जो गया। 12 जाणे का पैले तिन्हे अपणे नोकरां जो सद्देया अते बोलेया, कि मै जां ताँई हटि नि आन्दा ताँ ताँई मै तुसां जो दस-दस सोन्ने रे सिक्के देई जान्दा, अते तिन्हा कने किछछ कमाई करे। 13 अपण, तिसेरे सैहर रे मणु तिस जो सुखान्दे नी थिये, इधेरे ताँई तिन्हा ने किछछ मणु तिसेरे पिछ्छे एह बोली करी रोम देस जो भेजी दित्ते, कि अस्सी नि चान्दे कि एह म्हारे पर राज करण। 14 जाँ से राजा अपणे राजा बनणे री मंजूरी लेईकरी आई गया, ताँ तिन्हे जे सोन्ने रे सिक्के नौकराँ जो दित्ते रे थिये, तिन्हेरा साहब-कताब लैणे ताँई तिन्हा जो सद्देया। 15 ताँ पैले नौकर ने आईकरी बोलेया, 'ओ मालक, तुसी जे सिक्के मिन्जो दित्ते थिये, तिन्हा सिक्के कन्ने मे दस गुणा होर सिक्के कमाई ले। 16 'मालक, ने तिस जो बोलेया, 'शाबास, तू ता बडा खरा कन्ने भरोसे रे लायक नौकर है, इधेरे ताँई मै तिजो दस राज्य रा राज्यपाल बणाई दिन्दा। 17 दुजे ने आईकरी बोलेया, 'ओ मालक, तुसी ने जे सिक्के दित्ते थिये तिन्हा कन्ने मै पान्ज गुणा होर सोन्ने रे सिक्के कमाए हिन। 18 तिन्हे तिस जो बोलेया, तिजो बी पान्ज राज्य रा राज्यपाल बणाई दिन्दा। 19 तिजे ने आईकरी बोलेया, 'ओ मालक, मै तुसां रे दित्ते रे सिक्केयाँ जो कपडे बिच बन्नी करी सम्भाळी रखे दा थिया। 20 किजोकि मिन्जो तुसां का उर लगदा, इधेरे ताँई कि तुसी जेडा, तुमारा नी है तिस जो बी लेई लिन्दे अते जेडा तुसी बाया बी नी तिस जो बी कट्टी लिन्दे। 21 से राजा तिस पर टुटी पेया, अते बोल्णे लगेया, ओ नलायक नौकराँ! जे तू मेरे बारे अन्दर इन्ना किछछ जाणदा थिया कि मै बुरा मणु है जेडा कि बान्दा बी नी अते तिस जो कट्टी बी लिन्दा। 22 ताँ तू मेरे सोन्ने रे सिक्केयाँ जो ब्याज पर उधार किजो नी देई दित्ता ताकि मै जाँ वापस हटदा ताँ मिन्जो किछछ ब्याज ता मिली

जान्दा? 23 जे नौकर नेडे खड़ितेरे थिये तिन्हा जो राजे ने बोलेया, इस नौकरा का से सोत्रे रे सिक्के लेई लो अते जिन्हे सबका जादा सिक्के कमाए तिस जो देई दो। 24 नौकराँ ने तिन्हा जो बोलेया, 'ओ मालक, तिसेरे का ता दास्स सोत्रे सिक्के हिन। 25 इस गल्ल पर राजे ने बोलेया, जिन्हा जो जे दित्ते दा है, तिस जो से सहई तरिके कने बरतगे ता तिन्हा जो होर मिलणा, अपण जेड़ा ईया नी करगा ता तिन्हेरे का जे है से बी खोई लेणा। 26 अते जे नी चान्दे कि मैं तिन्हा पर राज करां तिन्हा मेरे दुस्मणा जो मेरे सामणे ले आई करी मारी देयो। 27 फिरी जाँ यीशु जी एह गल्लाँ करी बैठे ताँ से तिसेरे बाद यरुशलेम जो चलणा लगे अते तिन्हेरे पिच्छे उन्हेरे चेले थिये।

### यरुशलेम बिच विजय-प्रवेश

28 जाँ से जैतून पाट्ट पर बसेरे "बैतफगे" अते "बैतनियाह" सैह पर पुजे ताँ यीशु जी ने अपणे चेलेयाँ जो एह बोली करी अगे भेजेया, 29 कि सामणे वाळे ग्राँ बिच जाओ अते जिह्याँ ई तुसी तिस ग्राँ बिच बढ गे, ताँ तुसां जो इक खोती रा बच्चा बन्ने रा मिलणा जिस पर हल्ले ताँई कोई बी नी बैठे रा होणा, तिस जो खोली करी लेई आओ। 30 जे कोई बी तुसां का पुछणा कि कै हिन करेया करदे? ताँ बस इन्ना ई बोलेयो कि "प्रभू जी" जो इधेरी जरूरत है। 31 ताँ से चेले गे, अते जिह्याँ यीशु जी ने बोले दा थिया, तिह्याँ ई खोती रे बच्चे जो बनितेरा दिखेया। 32 अते जाँ से तिस जो खोल्णा लगे ता तिसेरे मालक ने आई करी तिन्हा जो पुछेया, तुसी इस जो किजो खोलदे हिन? 33 ताँ चेलेयाँ ने बोलेया कि "प्रभू जी" जो इधेरी जरूरत है।" 34 फिरी से खोती रे बच्चे जो यीशु जी का लेई आए अते चेलेयाँ ने अपणे कपड़े तिस पर पाए अते यीशु जी जो तिस पर बटाई दित्ता। 35 जाँ यीशु जी खोती रे बच्चे पर बेई करी यरुशलेम जो जाया करदे थिये ताँ मणु बी अपणे कपड़े यीशु जी रे रस्ते बिच बछाँदे यीशु जी कने चले दे थिये। 36 ताँ से, जिन्हे का जैतून पाट्ट री घर सुरु हुन्दी, तिस जगाह पर पुजे ता सारे चेले बडे जोर कने गांदे गांदे परमेश्वर री बडाई करणा लगे। 37 धन्न है से राजा, जेड़ा प्रभू रे नां कने आंदा, स्वर्ग बिच चैन अते सबका ऊँचे अम्बरा बिच परमेश्वर री जे जे कार हो।" 38 ताँ यीशु जी रे पिच्छे चलणे वाळे मणुआँ बिच किछ्छ फरीसी बी थिये अते से बोल्णा लगे, "ओ गुरु जी, एह जे बोलेया करदे हिन इस गल्ल ताँई अपणे चेलेयाँ जो झिडको।" 39 यीशु जी ने जवाब दित्ता जे एह चुप्प होई गे ता रस्ते रे बट्टेयाँ ने बोली पैणा। 40 जाँ से यरुशलेम सैह रे नेडे पुजे ताँ यीशु जी ने तिस सैहर पाससे दिखेया अते तिन्हेरी हाख्खी भरी आई अते बोलणा लगे;

### यरुशलेम ताँई अफसोस

41 किन्ना खरा हुन्दा कि तू हाँ तू ई चैन रे रस्ते जो जाणी पान्दा, अपण अवे बडी हाण होई गेरी है अते चैन तुसां री हाख्खी का गैब होई गेरा है। 42 तोळे ई तेरे दुस्मणां ने तिजो घेरी करी चोँ पाससेयाँ का रोकी लैणा। 43 तिजो अते तेरे बच्चेयाँ जो मिट्टी बिच मिलाई दैणा अते तिजो पूरी तराह कने खत्म करी दैणा, किजोकी जाँ परमेश्वर तेरे का आए थिये, तिस बेले तू तिन्हा जो पछाणेया नी।" 44 जाँ यीशु जी देहे बिच बडे अते जे तिन्हेरे समान बेचया करदे थिये तिन्हा जो देहे का बाह कडणा लगे।

### मन्दर का दुकानदारा जो कडणा

45 यीशु जी ने तिन्हा जो बोल्या, कि पवित्र सास्त्र बिच लिखे दा है कि मेरा देहा प्रार्थना दा घर है अपण तुसां ने इस जो डाकू री कुड बणाई रखे दा है। 46 इस का बाद यीशु जी हर रोज देहे बिच सिक्सा दैणे लगे। अपण बड्डे पुरोत यहूदी धर्म गुरु अते यहूदी मणुआँ रे मन्त्री यीशु जी जो मारणे री सलाह करणा लगे। 47 अपण, से यीशु जी जो मारणे ताँई कोई बेतर नी लाई सके, किजोकी मणु बडा मन लाई करी यीशु जी री गल्लाँ सुणदे थिये। 48 इक रोज यीशु जी मणुआँ जो वचना का सिखाया करदे थिये अते परमेश्वर रा बसेख रे बारे दस्सेया करदे थिये ताँ किछ्छ सियाणे यहूदी मन्त्री अते धर्म गुरु तिन्हा का आई रे।

### यीशु जी रे हक्क पर सवाल

20 से तिन्हा का पूछणा लगे कि तुसा जो एह सारे कम्म जे तुसी करेया करदे हिन, इन्हा जो करणे रा हाक्क कुन्ने दित्ता? 2 यीशु जी ने तिन्हा जो बोलेया, पैले तुसी मेरी इक गल्ल रा जवाब देयो फिरी मैं तुसां रे सुआल रा जवाब दिन्गा। 3 तुसी एह बोली, कि यहून्ना, जे बपतिस्मा दिन्दा थिया, तिसेरा बपतिस्मा परमेश्वर रे पाससे रा थिया की मणुआँ रे पाससे का थिया? 4 ताँ से अप्पु मिते सलाह करणा लगी पे, कि अगर असाँ ने बोलेया कि परमेश्वर रे पाससे का थिया, अते ताँ इन्ने बोल्णा, तुसा तिसेरी गल्लाँ किजो नी मन्त्रीयाँ। 5 अते अगर असाँ ने बोलेया, कि मणुआँ रे पाससे का थिया, ताँ ता इत्ते जितणे बी मणु हिन तिन्हा असा जो मारी छडणा, किजोकि इन्हा मणुआँ री नजरा बिच यहून्ना ता इक भविष्यवाणी करणे वाळा थिया। 6 फिरी तिन्हा ने सलाह करी के यीशु जी जो जवाब दित्ता, " असा जो नी पता है।" कि से कुसेरे पाससे का थिया। 7 फिरी यीशु जी ने बोलेया, ताँ मैं बी तुसा जो नी दस्सणा कि एह कम्म मैं कुस हाक्क कने करदा। 8 फिरी यीशु जी ने मणुआँ जो एह उदारण सुणाया, इक मणु ने अँगूर रा बगीचा लगाया अते तिसेरी दिख-रिख करणे रा ठेका जिमीदाराँ जो देई करी बडे रोजा ताँई कुदकी चली गया।

### बुरे किसाना रा उदारण

9 जाँ अँगूरा रे फळणे रा बेला आया ता तिस मणु ने जिम्मीदारा का इक नौकर भेजेया कि से अँगूरा रे बगीचेयाँ का किछ्छ अँगूर देई देन, अपण तिन्हा जिम्मीदारा ने तिसेरे नौकर जो मारी कुट्टी करी खाली हथ्था भेजी दित्ता। 10 फिरी तिन्ने इक होर नोकर भेजेया, अते तिन्हा ने तिस कने बुरा बर्ताव कित्या अते तिस जो बी मारी कुट्टी करी खाली हथ्था भेजी दित्ता। 11 ताँ फिरी तिन्ने त्रीय्या नोकर भेजेया, अपण तिस कने बी पैले वाळे दो नोकराँ साँई ई होया, अते तिस जो बी जरखी होई करी खाली हथ्था हटणा पेया। 12 बगीचे रा मालक सोचणा लगेया, मेरे त्रेन्ना नोकराँ रा तिन्हा ने बुरा हाल करी रख्या, अवे मैं कै करी? अवे मैं अपणे पुत्तर जो ई भेजदा, होई सकदा कि से जिम्मीदार तिस कने इय्याँ नी करगे। 13 अपण, तिन्हा जिम्मीदाराँ ने अपणे मालक रे पुत्तर जो दिख्खी करी अपु मिते सिक्ख सलाह करी के बोल्णा लगे, एह ता इस बगीचे रा वारस है, अगर असी इस जो मारी देन ता एह बगीचा म्हाारा होइ जाणा। 14 अते तिन्हा ने तिस जो बगीचे का बार धरीडी करी मारी रख्या। फिरी यीशु जी ने तिन्हा मणुआँ का पुछेया, अवे तुसी दस्सो, तिस बगीचे रे मालक ने तिन्हा जिमीदाराँ कने कै करणा? 15 यीशु जी ने बोलेया, तिन्ने आई करी तिन्हा जिमीदाराँ जो मारी दैणा, अते अँगूरा रे बगीचे रा ठेका कुसकी होरनी जो देई देणा।" एह सुणी करी मणुआँ ने बोलेया, "परमेश्वर ना करे कि इय्याँ कदी हो।" 16 फिरी यीशु जी ने तिन्हा पाससे दिख्खी करी बोलेया, "पवित्र सास्त्र बिच एह कै लिखे दा है? जिस बट्टे जो मिस्त्रीयाँ ने फजूल रा समझेया थिया, से ई बड्डा कूणे बिच लाणे वाळा खास बड्डा बणी गया। 17 जेड़ा कोई बी तिस बट्टे पर पैणा, तिसेरे चीत्थडे होई जाणे अते से जिस पर पैणा, तिस जो तिन्ने पीह रखणा। 18 तिस्सी बेले धर्मगुरु अते बड्डे परोत कोई तिगडम लाई करी यीशु जी जो पकडी लेणा चान्दे थिये किजोकी से समझी गेरे थिये, कि यीशु जी ने से उदारण तिन्हेरे ई खलाफ बिच बोल्या है अपण से मणुआँ का उरदे थिये।

### कैसर जो कर दैणा

19 इधेरे ताँई से यीशु जी पर नजर रखणा लगी पे। अते तिन्हा ने अपणे भेदियाँ जो खरे मणु बणाई करी यीशु जी रे पीछे भेजी दित्ते ताकि से तिन्हेरे बिच रैह्क अते तिन्हेरी गलतियाँ पकडी करी यीशु जी जो तिन्हेरी ई गल्लाँ बिच फँसाई करी तिन्हा जो रोम रे राज्यपाल का पकडवाई देन। 20 ताँ तिन्हा ने यीशु जी जो बोलेया, "गुरु जी, असां जो पता है कि तुसी जे ठीक है सेई बोल्दे अते सेहई तुसी सिखादे बी अते तुसी कुस्की कने कोई भेद-भाव नी करदे। बल्कि तुसी सच्चाई अते परमेश्वर रे रस्ते पर चलणा सिखांदे 21 असां जो एह दस्सो कि असां यहूदी मणुआँ जो रोम रे राज्यपाल (कैसर) जो चुन्नी दैणा चाईन्दी कि नी? 22 यीशु जी तिन्हेरी चाल समझी गे कि एह

तिन्हा का इय्याँ किजो पुछेया करदे हिन; इधेरे ताँई तिन्हा जो यीशु जी जवाब दिन्दे, 23 मिन्जो इक रोम रा सिक्का दिखाओ, इस पर कुसेरी मूर्ति अते नां लिखितेरा है? तिन्हा ने बोलेया, "कैसर दा"। 24 यीशु जी ने बोलेया, "ता ठीक है, जे कैसर रा है से कैसर जो ई देयो अते जे परमेश्वर रा है से परमेश्वर जो ई दो"। 25 से मणु यीशु जी जो इस गल्ल पर गलत साबित नी करी सके, अपण से भेदी यीशु जी रे जवाब का हरान रेई गे अते से चुप्प होई गे। 26 फिरी किछ छ सदूकी मणु यीशु जी का आई रे। एह सदूकी से मणु हिन, जे बोल्दे थिये कि मरने का बाद मणु जिन्दा नी होई सकदा। अते से तिन्हा का पुछणा लगे;

### फिरी जिन्दा होणा ते ब्याह रे बारे बिच

27 गुरु जी, मूसा री नियम रे हिसाब कने जे अगर कुसेरा भयाळ मरी जाओ अते तिसेरी कोई औलाद बी नी हो ताँ तिसेरा भयाळ तिसेरी विधवा लाडी कने ब्या करी के तिस का इक निक्के जो पैदा करी सकदा अते से निक्का तिसेरे बड्डे भयाळ रे खानदान जो बड़ाई सके। 28 इय्याँ ई सात्त भयाळ थिये। पैले भयाळ ने कुस्की जनानी कने ब्या किता अते बगैर औलादे मरी गया। 29 फिरी दुजे भयाळ ने तिस जो ब्याई लिता। 30 फिरी इय्याँ त्रिये भयाळ ने बी कितेया। इन्हा सात्त जणेया कने इय्याँ ई होया अते सब जणे बगैर औलादे मरी गे। 31 अते बाद अन्दर से जनानी बी मरी गई। 32 अवे असाँ जो एह बोल्दो कि पुनरुत्थान होणे का बाद से जनानी कुसेरी लाडी मन्त्री जाणी? 33 यीशु जी ने बोलेया, इस जुग रे मणुआँ बिच ता ब्या होया करदा है। 34 अपण, जेड़े मणु तिस जुग ताँई अते जेड़े मरे रेयाँ बिच का जिन्दा होई जाणे ताँई चुनी रखेरे हिन तिन्हा ना ता ब्या करणा अते ना ई तिन्हा कने ब्या जो लेईकरी जबरदस्ती होणी। 35 अते फिरी तिन्हा कदी मरणा बी नी, किजोकि से स्वर्ग रे दूत साँई हिन, अते से नोई जिन्दागी बिच फिरी का जिन्दे किते गे परमेश्वर री औलाद हुणी, । 36 अपण, मरे रे मणु जिन्दा हुन्गे कि नी इस गल्ल जो मूसा ने जळदी झिल्लाँ री काह्नी बिच दरसे रा है कि से प्रभु जी जो "अब्राहम रा परमेश्वर, इसहाक रा परमेश्वर, कने याकूब रा परमेश्वर, बोल्दा था\*y। 37 से मरे रे मणुआँ रा नी बल्कि जिन्दे मणुआँ रा परमेश्वर है। से सारे मणु जे तिन्हेरे हिन, से जिन्दा हिन।" 38 ता एह सुणी करी किछ छ यहूदी गुरुआँ ने बोलेया, "गुरु जी, तुसी ने ठीक ई बोलेया।" 39 इस्का बाद कुस्की जो बी यीशु जी का किछ छ पूछणे री हिम्मत नि पेई। 40 फिरी यीशु जी ने तिन्हा का पूछेया, कि "मसीहा" जो दाऊद री औलाद किजो बोल्दे?

### मसीह कुसेरा पुत्तर ?

41 किजोकि दाऊद ने ता अप्पु ई भजन सँहिता री कताब अन्दर एह लिखेरे दा है कि प्रभु( परमेश्वर) जी ने मेरे प्रभु ( मसीह ) जी जो बोल्दा, 42 मेरे सजे हाथ्य पाससे बैठ जाँ ताँई मैं तेरे दुसमणा जो तेरे पैरा हेठ करी नी देयाँ 43 अवे जाँ दाऊद अप्पु ई मसीहा जो "प्रभु" जी बोल्दा है, ता मसीहा दाऊद री औलाद किह्याँ होई सकदा?" 44 जाँ सब मणु इन्हा गल्लाँ जो सुणदे थिये ता यीशु जी ने अपणे चेन्नयाँ जो बोल्दा,

### शास्त्रियाँ का सावधान

45 इन्हा यहूदी गुरुआँ का बची करी ई रेया, जिन्हा जो लम्मे-लम्मे कपडे पाई करी फिरणा खरा लगदा। जाँ से बजार जान्दे, ताँ तिन्हा जो बडा खरा लगदा कि कोई तिन्हा जो निह्दा होई करी नमस्ते करो अते धर्म सभा अन्दर अते धामि अन्दर तिन्हा जो अगे जाई करी छैळ का छैळ जगाह पर बैणा खरा लगदा। 46 से विधवा जनानियाँ रा घर-बार लुट्टी लिन्दे; अते मणुआँ रे सामणे खरे बनणे ताँई लम्मी-लम्मी प्रार्थना करदे। इदे मणुआँ जो होरनी मणुआँ का जादा बुरी सजा मिलणियाँ हिन। 47 यीशु जी देहे\* बिच थिये ताँ तिन्हा ने अमीर मणुआँ जो दान-पेटी बिच दान पान्दे दिखेया।

### कगाल विधवा रा दान दैणा

21 तिन्हे इक विधवा जनानी आई जेडी कि गरीब थी, अते तिन्हे दान-पेटी बिच दो दमडियाँ पाईयाँ। 2 ताँ यीशु जी ने बोल्दा, "मैं तुसा कने

सच्च बोल्दा, कि इस ने सब मणुआँ का जादा दान पाया है। 3 किजोकि सब मणुआँ ने अपणी कमाई रा थोडा हिस्सा पाया है, अपण, इन्हे अपणी सारी कमाई पाई दिती।" 4 जाँ किछ छ मणु देहे रे बारे गल्लाँ थिये करदे, कि एह ता छैळ बट्टेयाँ, अते परमेश्वर जो चढ़ाई री चीजाँ कने सजाए दा है।

### देहरे रे बर्बाद होणे री भविष्यवाणी

5 ताँ यीशु जी ने बोल्दा, ईदेया बेला बी आणा जाँ, एह जे किछ छ बी तुसी दिख दे हिन, इसेरा काख नी रैणा, इक बट्टा तक नी बचणा, सब किछ छ देई जाणा।" 6 वअते से मणु यीशु जी का पूछणा लगे, "गुरु जी, एह गल्लाँ कधाडी होणी? अते एह गल्लाँ जे होणी वाळियाँ हिन, इधेरा पता किह्याँ चलणा?"

### मुसीबत ते दुख

7 यीशु जी ने बोल्दा, ध्यान रखो, कुदकी कोई तुसां जो ठगी ना लेयो। किजोकि मेरे ना कने बडे जणेयाँ ने आणा अते तिन्हा बोल्णा, कि " मैं मसीहा है, अते एह बी बोल्णा कि से बेला नेडे आई गेरा है।" \*a ताँ तुसी तिसेरे पीछे मत चली जान्दे। 8 जाँ तुसी लड़ाई झगडे कने दँगेया रे बारे सुनणा ताँ डरी मती जान्दे किजोकि एह सब गल्लाँ होणा जरूरी हिन। अपण दुनियाँ रा आन्त तिस्सी बेले ई नी होई जाणा।" 9 फिरी यीशु जी ने तिन्हा जो बोल्दा, : इक जाति रे मणुआँ ने दुज्जी जाति रे मणुआँ रे खलाफ होई जाणा अते इक राज्य ने दुजे रे खलाफ होई जाणा। 10 अते बडे-बडे हिलण आणे अते कई जगाह काल पेणा अते महामारियाँ फैलणियाँ, अम्बरा बिच डराणे वाळी गल्ला होणी अते अनोखी निशाणियाँ लिबबणी। 11 अपण इन्हा गल्लाँ रे होणे का पैले मेरे पीछे चलणे वाळेयाँ मणुआँ जो पकडी लेणा, तुसां पर मुसिबताँ पैणी, तुसां जो पँचायता बिच लेई जाईकरी तिन्हा का देई देणा, अते तुसां जो जेला बिच डप्पी देणा, अते तुसां जो राजेयाँ(न्यायधिसाँ) कने राजपालाँ का लेई जाणा। 12 इन्हा सब गल्लाँ पर तुसां जो मेरे बारे बारे बिच बोल्णे रा मौका मिली जाणा। 13 इधेरी ताँई तुसी पैले ई इधेरी चिन्ता मत करदे कि अस्सी बचणे ताँई कै करण? 14 किजोकि मैं तुसां जो ईदेई जुबान अते अकल देणी कि तुसां रे खलाफ जिन्हे बी होणे तिन्हा तुसां कन्ने हाख्खी नी मिलाई पाणी\*b ना तुमारी गल्लाँ रा जवाब देणे जोग्गा रेणा। 15 अपण तुसां रे माँ-प्यो, भाई भैण, रिशतेदारा, दोसताँ ने ई तुसां जो पकडाणा अते तुसां रे बिच का किछ छ जो मरवाई बी देणा। 16 मेरे पीछे चलणे वाळेयाँ कने सबनी ने दुश्मणी रखणी। इधेरे ताँई कि तुसी मेरे चेले हिन 17 अपण तुमारा बाल बी बाँका नी होणा। 18 तुसां रे सब्बर ने ई तुसां जो बचाई रखणा। 19 जाँ तुसी यरुशलेम जो दुश्मणा री फौज कने घिरे रा दिख्खणा ताँ जाणी लेयो कि तिसेरा तैस नैस होणे रा बेला निडी पेरा है।

### यरुशलेम रे बर्बाद होणे रे बारे बिच भविष्यवाणी

20 ताँ जे यहूदिया सैहर बिच हुन्गे से पाहडा जो नस्सी जायो अते जे यरुशलेम देहे बिच हुन्गे से बाह निकळी आयो अते जे यहूदिया सैह बिच नी हुन्गे से तिस सैहर अन्दर मत बढेदे। 21 किजोकि से रोज सजा देणे रे होणे। ताकि जे "पवित्र सास्त्र" बिच लिखे दा है से पूरा हो। 22 तिन्हा जनानियाँ ताँई जे दुपराणी होणी या तिन्हा जनानी ताँई जे अपणे बच्चे जो दूद पियान्दी हुणी तिन्हा ताँई से रोज बडे डरोणे होणे। किजोकि तिन्हा रोजे इस धरती पर बडी मुसिबताँ आणी अते यहूदी मणुआँ पर परमेश्वर रा प्रकोप हुणा। 23 किछ छ जो तलवारा कने मारी देणा अते किछ छ जो गुलाम बनाई करी दुनियाँ रे सब देसा बिच भेजी देणा। अते यरुशलेम देहे ने ताँ ताँई गैर- यहूदी मणुआँ का अपवित्तर\* होणा जाँ ताँई गैर-यहूदी मणुआँ रा बेला पूरा नी होई जान्दा। d 24 सूरज, चाँद कने तारे बिच अजीब निशाणियाँ लिबबणी अते धरती हर एक देस पर मुसिबताँ आणी अते मणुआँ ने समुन्द्रा री उथल-पुथल अते तिसेरी तबाई जो दिख्खी करी घबराई जाणा।

### म्हणु रे पुत्तर रा वापस आणा

25 दुनियाँ बिच आणे वाळी मुसिबताँ जो दिख्खी करी मणुआँ रे मूह सुक्की जाणे अते तिन्हेरी हिम्मत ने बी जवाब देई जाणा नी रैणी। किजोकि अम्बर

अपणी जगाह का हिली जाणा। 26 ताँ सब मणुआँ ने "मणु रे पुत्तर" जो अपणी शक्ति अते तिन्हेरी जै जै कार हुन्दे बदळा बिच का आन्दे दिखणा। 27 जाँ एह सब गल्लाँ होणे लग गी ताँ तुसी खडे होईकरी अपणा सिर ऊपरा जो उठाई लेयो। किजोकि तुमारा छुटकारा नेडे आया करदा हुणा।" 28 फिरी यीशु जी ने तिन्हा जो इक उदारण दिता, सबनी बूट्टेयाँ जो अते त्रिम्बळ रे बूट्टे जो दिख्खो।

### अजीर रे बूट्टे रा उदारण

29 तिन्हा बिच जिह्याँ ई पत्तियाँ निकळणा लगदी तियाँ ई तुसी जाणी जान्दे कि गर्मी रा मौसम आणे वाळा है। 30 तियाँ ई तुसी इन्हा गल्लाँ जो हुन्दे दिखणा ताँ जाणी लियो कि परमेश्वर तुसा पर राज करणे वाळा है। 31 मैं तुसां जो सच्च बोलदा कि जाँ ताँई एह सब गल्लाँ पूरी नी होई जांगियाँ ताँ ताँई इस पीढी रा अन्त नी होणा। 32 धरती अते अम्बर खत्म होई सकदे पर मेरी गल्लाँ हमेशा पक्की रैणी। 33 ध्यान रख्खो, ताकि तुसां रे मन डटी करी पीणे अते पियाणे ताँई अते इस दुनियाँ री चिन्ता जो लेईकरी बेफिक्करे नी होई जाए। कुदकी ईय्याँ ना हो कि जे तुसी सोचे दा बी नी हो से तुसां कन्ने होई जाओ।

### जागदे रेयो

34 किजोकि से रोज दुनिया रे हर इक मणु पर जरूर आई पेणा। 35 हर बेले त्यार रेयो, अते प्रार्थना करदे रेयो कि तुसा जो इन्हा सब गल्लाँ का, जे होणे वाळी हिन, तिन्हा का बचणे री शक्ति मिली सकें। अते भरोसे कने "मणु रे पुत्तर"\* रे अगे खड़ी सकन। 36 यीशु जी हर रोज देहे बिच सिक्सा दिन्दे थिये, अपण से रात बताणे ताँई सझाँ बेले जैतून नाँ री पाहडी जो चली जान्दे थिये। 37 सब मणु भ्यागा तड़के उठी करी देहे जो जान्दे थिये ताकि से यीशु जी री गल्लाँ सुणी सकन। 38 फसह रा त्यार इणे वाळा थिया, इस त्यार जो खमीरी रोटी रा त्यार बी बोल्दे;

### यीशु जी खलाफ जाल बिछाया जाणा

22 उत्ते बड्डे परोत अते धर्म गुरू यीशु जी जो मारणे री ताक बिच थिये अपण से मणुआँ का डरदे थिये। 2 ताँ सैतान यहूदा इस्करियोती चेल्ले रे सररीर बिच चली गया। एह यीशु जी रे बारा खास चेल्लेयाँ बिच का इक थिया।

### यहूदा रा धोखा दैणा

3 तिन्ने जाई करी बड्डे-परोताँ अते देहे रा पैहा दैणे वाळैयाँ रे प्रधाना कने मिली करी सलाह किन्ति कि से यीशु जी जो तिन्हा का किह्याँ पकडवाई सकदा। 4 यहूदा री एह गल्ल तिन्हा जो बडी छैळ लग्गी अते तिन्हा ने तिस जो इनाम दैणे रा वादा बी किन्ति। 5 यहूदा बी इस गल्ल ताँई त्यार होई गया, अते यीशु जी जो पकडवाणे ताँई भाना तोपणा लगेया, कि जाँ से किल्ले होन ता से तिन्हा जो पकडवाई सको। 6 ताँ फिरी फसह रा त्यार आया, जिस अन्दर छेल्नू री बली दिन्दे थिये।

### चेल्लेयाँ कने फसह रा आखरी भोज

7 यीशु जी ने पतरस अते यहूदा जो फसह री त्यारी करणे ताँई एह बोली करी अगे भेजेया "म्हारे खाणे ताँई फसह री धाम त्यार करी करो"। 8 तिन्हा ने यीशु जी का पुछ्छेया कि, "असी कुस जगाह पर फसह री धाम रखन?" 9 यीशु जी ने पतरस अते यहूदा जो बोलेया, "दिख्खो, यरुशलम अन्दर पुजदे ई तुसां जो इक इदेया मणु मिलणा जिन्ने इक पाणी री गागर चुक्रेरी होणीe, से जिस बी घरा अन्दर जांगा, तुसी बी तिस्सी घरा अन्दर चली जाए। 10 अते तिस घर रे मालक का पुछ्छी ले कि, "गुरु जी ने तेरे का पुछ्छेया है कि से परोणे वाळा कमरा कुदे है, जिस अन्दर तिन्हा ने अपणे चेल्लेयाँ कने बेई करी फसह री धाम खाणी है?" 11 तिन्ने तुसां जो इक बड्डा कमरा दसणा, जे पैले रा ई सजाए दा होणा, तुसी तिन्ने ई धाम री त्यारी करे। 12 फिरी से दोई यरुशलम जो चली गे, अते तिन्हा ने दिख्खेया कि सब किछ

तिह्याँ ई है, जिह्याँ कि यीशु जी ने उन्हा जो बोले रा थिया, अते तिन्हा फसह री धाम री त्यारियाँ करी दिन्ती। 13 फिरी जाँ से बेला आया ता यीशु जी अपणे खास-बारा चेल्लेयाँ कन्ने फसह री धाम खाणे जो बेई गे।

### प्रभु-भोज

14 यीशु जी ने तिन्हा जो बोलेया, मेरी बडी मरजी होए री थी कि मैं मुसीबताँ सैले का पैले अपणे खास-चेल्लेयाँ कन्ने फसह री धाम खाँ। 15 किजोकी मैं तुसां जो बोली दिन्दा कि "जाँ ताँई परमेश्वर रे राज अन्दर फसह रे त्यार रा ईरादा पूरा नी होई जान्गा, ताँ ताँई, मैं इस जो दुबारा नी खाणा है।" 16 फिरी यीशु जी ने अंगूर रे रास्स रा कटोरा लिन्तेया अते परमेश्वर रा सुक्र किन्ता अते अपणे खास-चेल्लेयाँ जो बोलेया, कि इस जो अपु-मिते बंडी लेयो। 17 किजोकी आज का बाद, जाँ ताँई परमेश्वर मणुआँ पर राज नी करी लिन्दा, ताँ ताँई, मैं अंगूर रा रास्स नी पीणा है। 18 फिरी यीशु जी ने रोटी जो पकडी करी परमेश्वर रा सुक्र किन्ता अते तोड़ी करी चेल्लेयाँ जो देई दिन्ती अते बोलेया कि, "एह मेरा जिस्म है, जे तुसां ताँई दिन्ता गेरा है: मिन्जो याद करणे ताँई तुसी इय्याँ ई करेया करो।" 19 इय्याँ ई, यीशु जी ने रोटी खाणे का बाद अंगूर रे रास्स रा कटोरा चुक्रेया अते अपणे खास-चेल्लेयाँ जो बोलेया, " एह दाखरास्स परमेश्वर री तरफ का, तिन्हेरा इक नोए वादे री निशानी है कि मेरे उस खून रे रुप बिच जेडा कि तुसां मणुआँ ताँई बहाया जान्दा।" 20 अपण, आज असां रे बिच से मणु बी बेई करी रोटी खाया करदा है, जिन्ने मिन्जो पकडवाणा है। 21 मणु रे पुत्तर जो ता परमेश्वर रे वचन रे साहब कने मरणा ई है, अपण, लाणत है तिस पर जिसेरे हत्था पकडया जाणा।" 22 ताँ फिरी से बारा चेल्ले अपु-मिते इक दुए का पुछ्छणा लगे कि असां बिच का इदेया कुण हुणा जे एह कम्म करी सकदा? 23 फिरी तिन्हा अन्दर इस गल्ल री बैहस चली पेई कि असां बिच का सबका बड्डा कुस जो मन्नया जान्दा?

### महान कुण ? पर बैहस

24 यीशु जी ने तिन्हा जो बोलेया, " कि गैर यहूदियाँ रे राजे तिन्हा पर राज करदे, अते जे तिन्हा पर अपणा हक्क बी जमान्दे अते से अपु जो तिन्हा दा मित्र बी बुलवाणा चान्दे। 25 अपण तुसां जो ता इय्याँ बिल्कुल बी नी करणा चाहिन्दा, तुसां बिच जे सबनी का बड्डा है तिस जो सबनी का छोटा(निम्ता) बणी करी रैह्ला चाहिन्दा अते जे सबनी रा प्रधान है, तिस जो ता इक नोकर साँई बणी करी रैह्ला चाहिन्दा। 26 तुसी अप्पू सोचो कि जे मणु मेज पर रोटी खाणा बैट्टे रा हो, से बड्डा हुन्दा कि जे मणु तिस जो रोटी खुआया करदा हो, से? बड्डा ता से ई हुन्दा जे मेज पर बेई करी रोटी खाया करदा हुन्दा। अपण, मैं बी ता तुसां कने इक नोकर साँई रैहन्दा। 27 तुसी ता से मणु हिन जे हमेसा ई मेरी परख रे बेले मेरे सोगी रे दे हिन। 28 कने जिह्याँ मेरे पिता-परमेश्वर ने मिन्जो राज करणे ताँई इक परदेस दिन्ते दा है, तिह्याँ ई मैं बी तुसां जो राज करणे ताँई इक परदेस पर पूरा हक्क दिन्दा। 29 ताकि तुसी मेरे मेज पर बेई करी मेरे कन्ने रोटी खान अते सिंहासनां पर बेई करी इस्त्रापल रे बारा गोत्राँ रे मणुआँ रा फँसला करन। 30 ओ शमोन, तुसां सबनी जो सैतान ने कणक साँई छाटणे ताँई चुणि लेरा है।

### पतरस रे इन्कार करणे रे बारे बिच भविष्यवाणी

31 अपण मैं तेरे ताँई परमेश्वर का प्रार्थना किन्ती कि तेरा भरोसा टुटी ना जाओ अते तेरे भरोसे जो दिख्खी करी तेरे भ्याळाँ जो हाँसला होई जाओ। 32 इस गल्ल पर शमोन ने यीशु जी जो बोलेया, "ओ प्रभु जी, मैं तुसां कने जेल जाणे जो अते होर ता होर मरणे जो बी त्यार है।" 33 फिरी यीशु जी ने बोलेया, "पतरस, मैं तिन्ने बोली दिन्दा कि आज मुरोने ने ताँ ताँई बाँग नी दैणी जाँ ताँई तू मिन्जो पछियानणे का तिन्ने बारी मुक्करी नी जान्गा।" 34 ताँ यीशु जी ने तिन्हा का पुछ्छेया, "कि जाँ मैं तुसां जो बगैर बटुए, बगैर झोळे अते बगैर बूट लिन्ते दे भेजेया थिया, ता तुसां जो कुस्की चीज रा घाट्टा होया थिया?" तिन्हा ने जवाब दिन्ता, कि "ना, कुस्की बी चीज रा घाट्टा नी पेया थिया।

### बटुआ, झोळी ते तलवार

" 35 फिरी यीशु जी ने बोलेया, "अवे जिस का बटुआ अते झोळी होन, से तिन्हा जो अपु कन्ने लेई चलो अते जिस का तलवार नी है, से अपणे कपडे बेची करी इक तलवार बी लेई लेयो। 36 किजोकी मैं तुसां जो बोली दिन्दा, कि पवित्र सास्त्र अन्दर मेरे बारे अन्दर लिखेरी गल्ल अवे पूरी होणे वाळि हिन कि, 'से पाप्पी कन्ने गिणेया गया' अते मेरे बारे अन्दर होर जितणी बी गल्लों उस अन्दर लिखेरी हिन, से इक-इक करी के सब पूरी होणे वाळियाँ हिन।" 37 चेल्लेयाँ ने बोलेया, " ओ प्रभू जी, दिखखो, असां का दो तलवाराँ हिन," यीशु जी ने बोलेया, इतणि ई बडी हिन। 38 ताँ यीशु जी तित्ते का जैतून नां रे पाहड़ा पर चली गे, जिह्याँ कि से हर बारी जान्दे थिये अते तिन्हेरे चले बी तिन्हा कन्ने चली पे।

### जैतून रे पहाड़ पर यीशु जी री प्रार्थना

39 तित्ते पुज्जी करी यीशु जी ने चेल्लेयाँ जो बोलेया, "कि प्रार्थना करदे रेयो ताकि तुसी सैतान री परख बिच ना आओ।" 40 फिरी यीशु जी चेल्लेयाँ का थोडे अग्रे चली गे, जितणी दूर ताँई इक पथ्थर सुट्टि सकदे थिये, तितणि दूर जाई करी जानु रे भारे बेई करी परमेश्वर कने प्रार्थना करणा लगे, 41 कि "ओ परम पिता जी, अगर तुसी चान्दे ता इस दुख रे कटोरे जो मेरे का दूर हटाई देयो, अपण, फिरी बी मैं चान्दा कि जे तुसां री मरजी है से ई पूरी हो ना की मेरी मरजी पूरी हो।" 42 ताँ स्वर्ग का इक स्वर्गदूत सामणे आई रेया अते तिन्ने यीशु जी जो सैहने री ताकत दिती। 43 अते यीशु जी बड़े भरी बेचैन होई गे अते होर बी जादा मगन होई करी प्रार्थना करणा लगी पे। तिन्हेरा पसीना ता इथ्याँ थिया निकळेया करदा जिह्याँ कि खून बिना रुके रे धरती पर पैदा। 44 जाँ से अपणे चेल्लेयाँ का आए ता दिखखेया कि से उदास होई करी अते थकी करी सुत्ते दे थिये। 45 यीशु जी ने तिन्हा जो बोलेया, "तुसी सोई किजो रे दे हिन ? उठी जाओ अते प्रार्थना करो, ताकि तुसां पर कोई मुसीबत ना आओ।" 46 यीशु जी हल्ले गल्ल करेया ई करदे थिये कि तित्ते मते जणे मणु आई रे। अते बारा खास-चेल्लेयाँ बिच का इक जिसेरा नाँ यहूदा थिया से तिन्हा सबनी का अग्रे चले दा थिया। से यीशु जी रे नेडे जाई खड़ितेया कि से तिन्हा जो शूना देई सको।

### यीशु जी रा धौखे कने पकड़ाया जाणा

47 यीशु जी ने तिस जो बोलेया, "यहूदा, कै तू शूना देई करी मणु रे पुत्तर (मिन्जो) जो पकडवाणा लगे दा है?" 48 यीशु जी रे चेल्लेयाँ जो लगेया कि, किछ होणे वाळा है तिन्हा ने यीशु जी जो बोल्या, "प्रभु जी, कै असी इन्हा कन्ने लडने ताँई अपणी तलवाराँ कड्डी लैन?" 49 ता तिन्हा बिच का इक जणे ने बड्डे परोत\* रे नोकर रा सज्जा कात्र अपणी तलवार कन्ने बड्डी रख्या। 50 अपण यीशु जी ने बोलेया, "लडीणा बांद करी देयो" अते तिन्हा ने तिस मणु रे कात्र जो छूत्या अते ठीक करी दित्तया। 51 ताँ यीशु जी ने बड्डे परोताँ, देहे रे पैहेदाराँ अते यहूदी मणुआँ दे मन्त्रीयाँ जो बोलेया, "कै तुसी मिन्जो इक डाकू समझदे जेड़ा कि तुसी मिन्जो पकडने ताँई तलवाराँ अते डंडे लेई करी आए दे हिन?" 52 जाँ मैं तुसां कने देहे अन्दर हुन्दा थिया, तुसां ने मिन्जो ताँ किजो नी पकडेया? अपण अज्र एह तुमारा बेला है, अते निहारे रा राज करणे दा बेला है\*। 53 तिन्हा ने यीशु जी जो पकडेया अते बड्डे परोताँ रे घरे जो लेई गे अते पतरस तिन्हा का दूर-दूर रेई करी तिन्हेरा पिच्छे पीच्छे थिया आया करदा।

### पतरस रा इन्कार

54 अते जाँ से पैहेदार अंगणा अन्दर आग्न भखाई करी बेई गे। ताँ पतरस बी तिन्हेरे बिच जाई करी बेई गया। 55 इक जनानी ने पतरस जो अग्नी री लौ अन्दर दिखखी करी पछियाणी लेया अते बोल्या लगी कि एह मणु बी ता यीशु जी रे कन्ने हुन्दा थिया। 56 अपण, पतरस ने तिस जनानी जो बोलेया कि मैं ता तिस जो जाणदा बी नी कि से कुण है। 57 थोडी देर बाद इक होर मणु तिस जो दिखखी करी बोल्या लगेया, "तू बी ता इन्हा बिच का ई है", पतरस ने

बोलेया, "ओ भाई, मैं इन्हा बिच का नी है।" 58 कोई इक कर घंटे बाद इक होर मणु बड़ा जोर देईकरी बोल्या लगेया, " पक्का एह बी तिन्हा कन्ने ई थिया किजोकी एह बी गलील अन्दर रहन्दा।" 59 अपण, पतरस बोल्या लगेया, "ओ भाई, मिन्जो ता पता बी नी है कि तू कुसेरे बारे अन्दर गल्ल करेया करदा है।" जिह्याँ ई तिन्ने एह गल्ल बोली, तिस्सी बेले मुरगे ने बाँग देई दिती। 60 तिस्सी बेले यीशु जी ने पतरस पाससे मुडी करी दिखखेया, ताँ पतरस जो यीशु जी री तिस गल्ल रा चेता आया कि, "आज मुरगे ने ताँ ताँई बाँग नी दैणी जाँ ताँई तू मिन्जो पछियाणणे का तिन्न बारी मुक्करी नी जान्ना।" 61 ताँ पतरस तिस अंगना का बाह चली गेया अते जोरे-जोरे रोणा लगी पेया। 62 जिन्हा मणुआँ ने यीशु जी जो पकडे दा थिया, से तिन्हेरा मजाक उडाणा लगे अते तिन्हा जो मारणा लगी पे।

### यीशु जी रा मजाक उड़ाया जाणा

63 तिन्हा ने यीशु जी री हाखियाँ पर पट्टी बन्नी दिती अते तिन्हा जो मारणा लगे अते तिन्हा का पुछणा लगे कि, अवे तू दस्स कि से कुण है जिन्ने तिन्ने मारेया? 64 अते तिन्हा ने यीशु जी री बेजती करणे ताँई होर बी मती सारी गल्लों बोलेयाँ। 65 जाँ भ्याग होई ता बड्डे परोताँ अते धरम-गुरु समेत यहूदी मणुआँ रे मन्त्रीयाँ री इक पंचायत बैठी, फिरी से मणु यीशु जी जो पंचायत बिच लेई आए। 66 तिन्हा ने यीशु जी का पुछेया, "कि अगर तू मसीहा है, ता असां जो दस्सी दे"। यीशु जी ने तिन्हा जो जवाब दिता, कि "अगर मैं तुसां जो दस्सी बी देयाँ, ताँ बी तुसा मेरे पर भरोसा नी करणा। 67 अते जे मैं तुसां का इक सुआल पुछाँ, ता तुसा ने बी, तिधेरा कोई जवाब नी दैणा।" 68 अपण, अवे का मणु रे पुत्तर (मिन्जो) जो सबका सक्तिसाली परमेश्वर रे सज्जे पाससे बठाया जाणा। 69 फिरी सब पुछेया लगे, "कै तू परमेश्वर रा पुत्तर है?" यीशु जी ने तिन्हा जो जवाब दिता, "तुसी ठीक बोलेया करदे हिन, मैं परमेश्वर रा पुत्तर है।" 70 ताँ तिन्हा ने बोलेया, "अवे असां जो कुस्की होरसी री गुवाई री कै जरुरत है? किजोकी असां ता अप्पू ई इसेरे मुंआ का एह सुणी लेया।" 71 ताँ यहूदी पंचायत रे मणु यीशु जी जो पकड़ी करी पिलातुस राज्यपाल का लेई गे।

### पिलातुस रे सामणे यीशु जी

23 से पिलातुस रे अग्रे यीशु जी पर इल्जाम लगाणा लगे, "कि एह यहूदी मणुआँ जो भडकाया करदा है, अते तिन्हा जो कैसर राजे जो चुंगी देणे जो मन्हा करेया करदा है, अते अस्सा ने इस जो अप्पु जो यहूदिया रा "राजा" कने "मसीहा" बोल्दा बी सुणेया है।" 2 ताँ पिलातुस ने यीशु जी का पूछेया, " कै तू यहूदिया रा राजा है?" यीशु जी ने तिस जो जवाब दिता, " तू अप्पु ई ता बोल्दा कि मैं यहूदिया रा राजा है।" 3 इस गल्ल पर पिलातुस ने बड्डे परोताँ अते मणुआँ जो बोल्या, "मिन्जो इस मणु पर कोई बी बुराई नजर नी आया करदी है।" 4 अपण से होर बी जोर पाणा लगे अते बोल्या लगे, एह सारे यहूदिया बिच मणुआँ जो अपणी सिक्सा देईकरी भडकाया करदा है। अते एह सब किछ इन्ने गलील प्रदेश का शूर किन्तेया थिया।" 5 एह सुणी करी पिलातुस ने मणुआँ का पूछेया, "कै एह गलील रा रैणे वाळा है?" 6 फिरी पिलातुस जो पता लगेया, कि एह गलील प्रदेश दा है ताँ तिन्ने यीशु जी जो हेरोदेस अन्तिपास का भेजी दिता, किजोकि गलील बिच तिसेरा हक्क थिया। 7 हेरोदेस ने जाँ यीशु जी जो दिखखेया ताँ से बड़ा खुश होया किजोकि से बडे रोझा का तिन्हा जो दिखणा चान्दा थिया, से इधेरे ताँई दिखणा चान्दा थिया, किजोकि तिन्ने यीशु जी रे बारे बड़ा किछ सुणेरा थिया, अते से यीशु जी जो अण दिखखे कम्मा जो करदे दिखणे चान्दा थिया।

### हेरोदेस रे सामणे यीशु जी

8 तिस ने यीशु जी का बडे सवाल किन्ते, अपण यीशु जी ने तिसेरे कोई बी सवाल रा जवाब नी दिता। 9 बड्डे परोत अते धर्म गुरू ने तित्ते बी यीशु जी पर इल्जाम लगाणे ताँई कोई कसर नी छडी। 10 हेरोदेस ने बी अपणे सपाईयाँ समेत तिन्हेरी बेजती कीत्ति अते तिन्हेरा मजाक उडाया, अते यीशु जी जो चटकीले रांग रे कपडे पुआई करी वापस पिलातुस का भेजी दिता। 11 तिसी

ई रोज पिलातुस अते हेरोदेस दोस्त बणी गे, हलाकि से इस का पैले इक दुज्जे रे दुश्मण थियो। 12 फिरी पिलातुस ने बड्डे परोताँ अते यहूदी मणुआँ रे मन्त्रीयाँ जो, अते तिन्हा सबनी मणुआँ जो सदाया, अते तिन्हा जो बोल्या;

### पिलातुस रा यीशु जी जो मौत री सजा देणा

13 तुसी इस मणु जो मेरे का लेई आए कि एह मणुआँ जो भडकान्दा। मैं इस बारे बिच तुसां रे सामणे तिस जो जाँचे परखेया। अते जे तुसी इल्जाम लगाया करदे हिन इदेया किछ्छ बी मैं इस पर नी दिखदा; 14 ना ई हेरोदेस ने दिख्खेया, किजोकि तिन्हे इस जो वापस म्हारे का भेजी दित्ता। जिह्याँ कि तुसी दिखदे कि इस ने इदेया किछ्छ बी नी कित्तेया कि इस जो मौत री सजा देण। 16 इधेरे ताँई मैं इस जो बेत लगवाई करी छडी दिन्दा।" 15 इधेरे ताँई मैं इस जो बेत लगवाई करी छडी दिन्दा।" 16 अपण से सब जणे जोरे जोरे लेरा मारी करी बोल्या लगे, इस मणु जो मारी देयो। अते म्हारे ताँई बरअब्बा जो छडी देयो।" 17 तां सारे मिळी करी चिल्लाई उठे, 18 बरअब्बा जो सैहर बिच लड़ाई झगडे अते जान लेणे रे इल्जाम अन्दर जेला बिच पाए दा थिया। 19 पिलातुस यीशु जी जो छडी देणा चान्दा थिया इधेरे ताँई तिन्हे मणुआँ जो फिरी समझाया। 20 अपण मणु होर जोरे जोरे लेरा मारी करी बोल्या लगे, "इस जो क्रुस पर चढाई देयो।" 21 पिलातुस ने मणुआँ का तिज्जी बारी पूछेया, "इस मणु री कै गलती है? मिन्जो इसेरे खलाफ कोई ऐसी गल्ल नि लिब्बी जे मैं इस जो मौत री सजा देयाँ। इधेरे ताँई मे इस जो बेत लगवाई करी छडी दिन्दा।" 22 अपण मणु होर जोरे जोरे लेरा मारी करी अपणी गल्ल जो मनवाणा लगे कि इस जो क्रुस पर चढाई देयो। अते ईय्याँ होया कि तिन्हेरी मरजी पूरी होई गई। 23 अते पिलातुस ने हुकम दित्ता कि एह जिह्याँ चान्दे तियाँ ई हो। 24 पिलातुस ने तिस मणु जो छडी दित्ता जे लड़ाई झगडे अते जान लेणे रे इल्जाम अन्दर जेला बिच पाए दा थिया, अते यीशु जी जो तिन्हेरी मरजी रे मुताबिक तिन्हा का देई दित्ता। 25 जाँ से यीशु जी जो लेई चले ताँ तिन्हा ने कुरैने रे रैणे वाळे शमोन नाँ रे इक मणु जो, जे अपणे कम्मा का आया करदा थिया, तिस जो पकडी लेया अते तिस पर क्रुस जो लदी दित्ता अते उस्स जो यीशु जी रे पीछे पिछे चलणे जो बोल्या।

### यीशु जी रा क्रुस पर चढाया जाणा

26 अते तिन्हेरे पीछे बडे भारी लोकी चले दे थिये अते तिन्हा बिच किछ्छ जनानियाँ बी थियाँ जेडी कि यीशु जी ताँई रुन्दी अते छाती पिटदिया चले दी थियाँ। 27 यीशु जी ने तिन्हा जनानियाँ पास्से मुडी करी दिख्खेया अते बोल्या, " यरुशलैम री जनानियाँ, मेरे ताँई मत रो बल्कि खुद अपणे ताँई कने अपणे बच्चेयाँ ताँई रो अते पटियो। 28 किजोकि इदेया बल्ला आणे वाळा है, जाँ मणुआँ ने बोल्या, 'से जनानिया बडी भाग्गा वाळियाँ हिन, जे औत्तर हिन कने से बी बडी भाग्गा वाळी हिन जिन्हेरी कोख खाली है। से मम्मे धन्न हिन जिन्हा दूद नी पियाया हो।' 29 तिस बेले मणुआँ ने बोल्या, कि पाहड म्हारे पर आई पेयो अते फाटियाँ अस्सा जो दबी दे।' 30 किजोकि जाँ से हरे बूट्टे कने ईय्याँ करदे ता से सूके बूट्टे कने कै किछ्छ नी करगे? 31 दो होर मणु, जे दोई ई बदमाश थे, तिन्हा जो बी यीशु जी रे कने मौत री सजा देणे ताँई लेई चले दे थे। 32 फिरी जाँ से तिस जगाह पर आई रे जिस जो खोपडी बोल्दे, अते तिन्हा ने तीन्ना जो क्रुसाँ पर चढाई दित्ता। इक बदमाश\* यीशु जी रे खब्बे हथ्थाँ पास्से थिया अते दुज्जा सजे हथ्थाँ पास्से थिया। 33 ताँ यीशु जी ने बोल्या, "ओ परम पिता, इन्हा जो माफ करेयाँ किजोकि एह नी जाणदे कि एह कै करेया करदे हिन।" फिरी सपाईयाँ ने यीशु जी रे कपडे ताँई परचियाँ पाईयाँ अते यीशु जी रे कपडे आपस बिच बन्डी ले। 34 तित्ते मणु खडे होईकरी एह सब किछ्छ दिख्खेया थिये। यहूदी मणुआँ रे मन्त्री यीशु जी रा मजाक बणाई करी बोल्या लगे, ' इन्हे दुज्जे मणुआँ रा उद्धार\* कित्तेया है, जे तू परमेश्वर रे चुने रा "मसीहा" है ता तिन्हा जो बोल कि से तिज्जे बचाई लेण।" 35 सपाईयाँ ने बी यीशु जी रा मजाक उड़ाया। तिन्हा ने यीशु जी जो सिरके रा रास्स चुसाया, अते बोल्या; 36 जे तू यहूदिया रा राजा है, ता अप्पु जो बचाई लै। 37 यीशु जी रे क्रुस रे ऊपर लिखी दित्ता कि "एह यहूदिया रा राजा है।" 38 क्रुस पर चढाए रे बदमाशाँ बिच का इक यीशु जी री बेजती करी

के बोल्या लगेया, " कै तू मसीहा नी है? जे है ता म्हारे जो कने अप्पु जो बचाई ले!"

### अपणे गलत कम्म छडणे वाळा इक बुरा म्हुण

39 अपण दुज्जा बदमाश तिसेरे खलाफ होईकरी बोल्या लगेया, " कै तू परमेश्वर का नी डरदा? तू बी ता सेई सजा भोग्या करदा। 40 अस्सा ने जे बी बुरे कम्म कित्ते तिधेरी सजा अस्सा जो मिलया करदी है अपण इस मणु ने ता ईदेया किछ्छ बी नी कित्तेया।" 41 फिरी तिन्हे बोल्या, " यीशु जी जाँ तुसी अपणे स्वर्ग बिच जाने ताँ मिन्जो जरुर याद रखेयो।" 42 यीशु जी ने तिस जो बोल्या, " मैं तिज्जे सच्च बोल्दा, आज्ज ई तू मेरे कने स्वर्गलोक बिच होणा।" 43 तिस बेले धियाडी रे बारा बजे होणे। अते तिस बेले का लेईकरी तीन बजे ताँई पूरी धरती बिच न्हारा होई गया।

### यीशु जी रा मरणा

44 अते सूरज री लौ जान्दी रेई। अते तित्ते देहे रा परदा फटी गया। 45 अते यीशु जी ने जोरे सणे बोल्या, ' ओ परम पिता, मैं अपणी आत्मा तुसां रे हाथ्थ बिच दिन्दा।" अते बोली करी यीशु जी ने अपणे प्राण देई दित्ते। 46 ताँ रोमी सपाईयाँ रे साहब ने जे किछ्छ बी होया थिया तिस जो दिख्खेया अते परमेश्वर री तारीफ करदे बोल्या पक्का एह इक खरा मणु थिया।" 47 कने तित्ते आए रे मणु बी एह सब किछ्छ दिख्खेया अपणी छाती पिटदे-पिटदे वापस हगी गे। 48 अपण यीशु जी रे सब जाण पचाण वाळे अते गलील का आए दी जनानियाँ बी, जेडी कि गलील का यीशु जी रे पीछे पिछे आई थियाँ, तित्ते का थोडे दूर खडे होईकरी इन्हा सब गल्ला जो दिखदे थिये। 49 तित्ते यूसुफ नाँ रा यहूदी पंचायत रा इक बन्दा थिया, से बडा खरा मणु थिया।

### यीशु जी रा दब्बेया जाणा

50 से तिन्हेरे इस फैसले पर राजी नी था, अते ना ई इस कम्म ताँई। से यहूदिया रे इक सैहर अरमतियाह रा रैणे वाळा थिया। परमेश्वर ने असा पर राज करना से तिस रोज जो भाल्दा थिया। 51 से मणु पिलातुस का गया अते तिन्हे तिस का यीशु जी री लास जो मनगेया ताकि से तिन्हा जो दबाई सकन 52 तिस ने यीशु जी जो क्रुस का थल्ले उतारेया अते सन रे कपडे बिच लेपेटी दित्ता। फिरी तिसी ने यीशु जी जो सपड जो कट्टी करी बणाई गेरी कन्न बिच रखी दित्ता, जिस बिच इस का पैले कुसकी जो बी नी रख्खेया गया थिया। 53 तिस रोज शुक्रवार थिया अते से रोज सब्त री तयारी करणे रा रोज थिया। 54 से जनानियाँ जेडी कि गलील का यीशु जी कने आई थी, से यूसुफ रे पीछे पिछे चली पेई, अते तिन्हा ने से कन्न दिख्खी, अते दिख्खेया कि यीशु जी री लास जो किह्याँ रख्खे दा है। 55 फिरी से घरा जो हटी आई अते तिन्हा खुशबू वाळी चीजाँ कने इक लेप तयार कित्तेया। अते तियाँ ई सब्त वाळा रोज आई गेया अते तिन्हा नियमा रे साहब कने तिस रोज आराम कित्ता। 56 हफते रे पैले रोजे तडके ई से जनानियाँ कन्न पर तिस खुशबू वाळे लेप जो, जिस जो तिन्हा ने तयार कित्ता थिया, लेईकरी आई।

### यीशु जी रा दुबारा जिन्दा होणा

24 तिन्हा ने कन्न का पत्थर धिरे रा दिख्खेया, जेडा कि कन्न रे पराले रखे दा थिया। 2 ताँ से अन्दर गेई, अपण तिन्हा जो प्रभु यीशु जी री लास नी मिली। 3 जाँ से इस सोच बिच ई थी कि, तिन्हेरे का लशकदे कपडे पाये रे दो मणु आई खड़ी होए। 4 उरे रे मारे तिन्हा ने अपणे मूह जमीना पास्से करी दित्ते। दो मणुआँ ने तिन्हा जो बोल्या " जे जिन्दा है तिस जो तुसी मुर्दे बिच किजो तोपदे हिन? 5 से कन्न बिच नी हिन। से जिन्दा होई गेरे हिन। चेता करो जाँ से हल्ले गलील बिच ई थिये, तिन्हा ने तुसां जो बोल्या था। 6 तिन्हा ने बोल्या था, "कि (यीशु जी) मणु रे पुत्तर रा पाप्पी मणुआँ रे हत्था पकड़ाया जाणा, अते क्रुस पर चढाया जाणा अते तिन्हे रोजे जिन्दा होई जाणा एह सब हुणा पक्का था।" 7 ताँ तिन्हा जनानियाँ जो यीशु जी री गल्लाँ चेता आई। 8 से जनानियाँ क्रब का वापस हटी आई अते तिन्हा ने एह सब गल्लाँ तिन्हा म्यारा चेलाँ जो अते होर बी मणुआँ जो सुणाई। 9 से



जनानियाँ मरियम मगदलीनी, योअन्ना, अते याकूब री माँ, मरियम थी। अते तिन्हा कन्ने दुज्जी जनानियाँ बी थियाँ जिन्हा जे एह गल्लाँ खास चेल्लाँ जो बताई।<sup>10</sup> अपण तिन्हेरी गल्लाँ चेल्लेयाँ जो रास नी आई अते तिन्हा ने तिन्हेरी गल्लाँ रा भरोसा नी कित्तेया।<sup>11</sup> अपण पतरस खडा होया अते यीशु जी री क्रब रे पाससे दौडी गया। तिन्ने थल्ले झुक्की करी दिख्खेया ता तिस जो सन रे कपडे रे अलावा होर किछ्छ बी नी लिब्बेया। अते से एह सब किछ्छ दिख्खी करी अपणे मनाह बिच बुड्बुडान्दे चली गया।<sup>12</sup> तिसी ई रोज यीशु जी रे चेल्लेयाँ बिच का दो जणे, यरुशलेम का कोई सात्त किलोमीटर दूर इम्माऊस नाँ रे ग्राँ जो जाया करदे थिये।

### इम्माऊस रे रस्ते पर चेल्लेयाँ कने

<sup>13</sup> जे गल्लाँ होई थी, तिस बारे आपस बिच गल्ल बात करेया करदे थिये।  
<sup>14</sup> जाँ से तिन्हा गल्लाँ जो इक दुज्जे कने लाया ई करदे थिये कि तखणी यीशु जी तिते आई पुज्जे अते तिन्हा कन्ने कन्ने चली पे।<sup>15</sup> अपण तिन्हा ने यीशु जी जो पछाणेया नी किजोकि परमेश्वर ने तिन्हेरी हाख्खियाँ\*। बाँन्द करी ररखी थी।<sup>16</sup> यीशु जी ने तिन्हा जो बोल्या, " एह कुण गल्लाँ हिन जे तुसी हन्डदे हन्डदे इक दुज्जे कने लाया करदे हिन?" से हन्डदे हन्डदे से रुकी गे अते जे गल्लाँ होईयाँ तिस वजाह कने तिन्हेरे मूह लटकेरे\*m थिये।<sup>17</sup> तिन्हा बिच का क्लियोपास नाँ रा इक मणु ने यीशु जी बोल्या, " यरुशलेम बिच रेणे वाळा तू कल्ला इक इदेया मणु है जिस जो नी पता है कि पीछे के होया थिया?"<sup>18</sup> यीशु जी ने तिन्हा जो पूछेया, " कुण देई गल्लाँ?" तिन्हा ने यीशु जी जो बोल्या, एह सब गल्लाँ नासरी यीशु जी रे बारे बिच हिन। से इक इदेय मणु थिये जिन्हा ने जे किछ्छ कित्ता अते बोल्या तिस जो परमेश्वर अते सबनी मणुआँ जो एह दिखाई दित्ता कि से इक बडे शक्तिसाली भविष्यवक्ता थे।<sup>19</sup> अते असी इस ई बारे गल्लाँ करया करदे थिये कि म्हारे बड्डे परोताँ अते यहूदी धर्म गुरूआँ ने यीशु जी मौत री सजा दैणे ताँई पकडवाई दित्तया अते मणुआँ ने तिन्हा जो ने क्रुस पर चढाई दित्ता। असी सोचे दा थिया कि तिन्हा ने इस्त्राएल जो गुलामी का छुड़ाणा। अते इन सब गल्लाँ जो होए दे आज्ञ तिज्जा रोज है,<sup>20</sup> अते महायाजका ते असां रे सरदारानं ने तिन्हा जो पकडवाई दित्तेया, कि तिन्हा जो मौत री सज दित्ती जाए, ते तिन्हा जो क्रुस पर चढवाया।<sup>21</sup> अते म्हारी टोळी री जनानियाँ ने म्हारे जो सोच्चा बिच पाई दिते दा है। से आज्ञ भयागा तडके ई कन्न पाससे गई थी;<sup>22</sup> अते तिन्हा जो तिते यीशु जी री लास नी मिली तिन्हा ने तिते का आई करी अस्साँ जो बोल्या कि तिन्हा स्वर्ग दूत्ते रा दरसन दिख्खेया अते तिन्हा बोल्या था कि यीशु जी जिन्दा हिन।<sup>23</sup> अते फिरी म्हारे बिच का किछ्छ कन्न जो गे अते जिह्याँ तिन्हा जनानियाँ ने बोल्या थिया तियाँ ई दिख्खेया कि यीशु जी री लास तिते नी थी।"<sup>24</sup> ताँ यीशु जी ने तिन्हा जो बोल्या, " तुसी बडे बेवकुफ हिन। भविष्यवक्ता ने जे किछ्छ बोल्या था तिन्हा गल्लाँ पर भरोसा करणा तुसां जो बडा मुशकल लगेया करदा है? <sup>25</sup> कै मसीहा ताँई जरूरी नी था कि से इन मुसिबताँ जो भोगी करी अपणे स्वर्ग बिच जाँन?"<sup>26</sup> ताँ यीशु जी ने मूसा अते सारे भविष्यवक्ता री खुद रे बारे पवित्र शास्तर बिच लिखी री गल्लाँ रा मतलब शुरु का तिन्हा जो समझाया।<sup>27</sup> से जाँ तिस ग्राँ रे नेडे पुज्जे, जित्ते से रेन्दे थिये, यीशु जी रे बर्ताव कने ईय्याँ लगेया कि जिह्याँ तिन्हा ने अग्गे जाणा थिया।<sup>28</sup> अपण तिन्हा ने यीशु जी पर बडा जोर पाया अते बोल्या, तुसी म्हारे का ईत्ते रुकी जाओ किजोकि सूरज डुब्बी गेरा है अते कळेला होणे वाळी है आखिर यीशु जी तिन्हेर तिते रुकणे ताँई तिन्हा कने अन्दर चली गे।<sup>29</sup> जाँ यीशु जी तिन्हा कने रोटी खाणे जो बैठे ताँ तिन्हा ने रोटी चुक्की अते परमेश्वर रा सुकर कित्ता। फिरी तिस जो तोडी करी तिन्हा जो दित्ती;<sup>30</sup> कि

तखणी तिन्हेरी हाख्खी खुली गई\*।<sup>n</sup> अते तिन्हा यीशु जी जो पछाणी लेया। अपण यीशु जी तिते का छुपन्त होई गे।<sup>31</sup> फिरी से आपस बिच बोल्णा लगे, "रस्ते बिच जाँ से म्हारे कने गल्लाँ करदे थिये अते म्हारे जो पवित्र शास्तर जो समझाया करदे थिये ता कै म्हारे दिल्ला बिच आग नी पेई\*<sup>32</sup> फिरी से झाट उठ्ठे अते वापस यरुशलेम जो चली गे। अते तिते तिन्हा जो गयारा चेल्ले अते होर बी मणु लिब्बे अते से तिन्हा कन्ने मिल्ले;<sup>33</sup> जे बोल्या करदे थिये, " प्रभु जी, सच्ची ई जिन्दा होई गेरे हिन तिन्हा ने (पतरस) शमौन जो दरसन दित्तया है।"<sup>34</sup> फिरी तिन्हा दोन्ना ने, जे किछ्छ तिन्हा कन्ने रस्ते बिच होया थिया, तिसेरे बारे अन्दर बोल्या अते एह बी कि, जाँ यीशु जी ने रोटीयाँ रे टुकडे तोडे ता तिन्हा ने यीशु जी जो किह्याँ पछाणेया थिया।"<sup>35</sup> हल्ले से तिन्हा जो एह गल्लाँ बोल्दा ई था कि यीशु जी खुद तिन्हेरे गब्बे आई खडे होए अते तिन्हा जो बोल्णा लगे, " तुसां जो चैन मिल्ले।"

### यीशु जी र चेल्लेयाँ जो दिसणा

<sup>36</sup> अपण से झुडकी पे अते डरी गे। तिन्हा सोचेया कि कोई म्हारे कने छळ है होया करदा।<sup>37</sup> अपण यीशु जी ने तिन्हा जो बोल्या, " तुसी किजो घबराया करदे हिन? तुसां रे दिन्ना बिच सवाल किजो आया करदे हिन?<sup>38</sup> मेरे हथ्याँ अते पैराँ जो दिख्खो। मिन्जो दुओ, अते दिख्खो कि कुसकी भुत रा लोदा अते हड्डियाँ नी हुन्दी अते तुसी दिख्खे हिन मेरे बिच से सब किछ्छ है।"<sup>39</sup> एह बोल्दे बोल्दे यीशु जी अग्गे आए, अते तिन्हा जो अपणे हाथ्य पैर दिखाए।<sup>40</sup> अपण तिन्हा जो खुश बी थी अते हरानगी बी थी तिस वजाह कने तिन्हा ने यीशु जी पर पूरा भरोसा नी कित्तेया, ता यीशु जी ने तिन्हा का पूछेया, तुसां का किछ्छ खाणे जो है?"<sup>41</sup> अते तिन्हा ने पकाई री मच्छी रा इक टुकडा यीशु जी जो दित्ता।<sup>42</sup> यीशु जी ने तिस जो लेईकरी तिन्हा सामणे ख्राया।<sup>43</sup> फिरी यीशु जी ने तिन्हा जो बोल्या, " एह से गल्लाँ हिन जे मैं तुसां जो बोली थियाँ, जाँ मैं तुसां कन्ने थिया, "कि हर से गल्ल जे मेरे बारे बिच मूसा रे नियमा बिच, भविष्यवक्ता री कताबाँ बिच अते भजना री कताबाँ बिच लिख्खी दी हिन, से सब गल्लाँ पूरी हुणी हिन।"<sup>44</sup> फिरी पवित्र शास्तर जो समझणे ताँई यीशु जी ने तिन्हेरी मन्द बुद्धि जो खोली दित्ता।<sup>45</sup> अते तिन्हा जो बोल्या, " पवित्र शास्तर, बिच ईय्याँ लिख्खे दा है, कि मसीहा ने मुसिबताँ झेलणी अते तिन्हेर रोजे मेरे रे मणुआँ बिच का जिन्दा होई जाणा।<sup>46</sup> अते तिन्हेरा नाँ लेई करी यरुशलेम अते सब देसाँ बिच पापाँ का तौबा अते माफी हासिल करणे रा बसेख सुणाया जाणा।<sup>47</sup> तुसी इन सब गल्लाँ रे गवाह हिन।<sup>48</sup> अते दिख्खो मेरे परम पिता ने जे इक वादा कित्तेया है, तिस पवित्र आत्मा जो तुसां ताँई भेजगा। अपण जाँ ताँई पवित्र आत्मा आइकरी तुसाँ जो स्वर्ग री शक्ति कने चुणी नी लेयो ताँ ताँई तुसी इस सैहर बिच ई रयो।"<sup>49</sup> यीशु जी फिरी तिन्हा जो बैतनिय्याह ताँई लेई गे। अते तिन्हा जो हाथ्य चुक्की करी असीस दित्ती।

### यीशु जी रा स्वर्ग जाणा

<sup>50</sup> तिन्हा जो असीस दिन्दे दिन्दे ई यीशु जी ने तिन्हा जो छडी दित्ता अते फिरी तिन्हा जो शक्ति ने स्वर्ग जो चुक्की लेया।<sup>51</sup> ताँ तिन्हा ने यीशु जी री जे जे कार कीति अते बडी खुशी कने यरुशलेम जो हटी आए।<sup>53</sup> अते से रोज देहे बिच परमेश्वर री बडाई करदे करदे अपणा अग्गे रा जीण जीणे लगे। आमीन!<sup>52</sup> अते से लगातार देहरे बिच आई करी परमेश्वर री स्तुती करेय करदे थिये।<sup>53</sup> सुरु विच ई वचन थिया कने वचन परमेश्वर रे कने थिया

# यूहन्ना

## वचन सरीर बिच आया

1 ते वचन ई परमेश्वर थिया। 2 एह सब किच्छ तिसी री शक्ति कने पैदा होया कने जे किच्छ वी पैदा होयरा है तिस बिच का कोई वी चीज तिसेरे बिना पैदा नी होई। 3 तिस बिच जिन्दगी थी कने सेह जिन्दगी मणुआ री लो थी। 4 लो न्याहरे बिच चमकदी है ते न्याहरा तिसजो अपणादा नी। 5 इक मल्लु परमेश्वर रे पासे का आई खडा होया जिसेरा ना यहून्ना थिया। 6 से गवाई देणा आया कि लो री गवाई दे। ताकी तिसेरे जरिए सारे विश्वास लयान। 7 से अप्पू ता लो नी थी अपण तिस लो री गवाई देने तेंई आएरा थिया। 8 सच्ची लो जेहड़ी हर इक मल्लु जो प्रकाशित करदी से संसार बिच आणे वाळी थी। 9 से संसार बिच थिया कने संसार तिसेरी वजह कने पैदा होया, ते संसार ने तिस जो इ नी पछाणेया। 10 से अपणे घरे आया अपण तिसेरे घरेता ने तिसजो नी अपणाया। 11 पर जितणेया ने तिसजो अपणाया तिसने तिन्हा जो परमेश्वर रे पुत्र होणे रा हक्क दिता। तिन्हा जो जेहडे तिसेरे ना पर विश्वास रखदे। 12 से ना ता खून न देह री मर्जि कने, ना मल्लु री मर्जि कने, अपण परमेश्वर का पैदा होए रे हिन्। 13 वचन देहदारी होया ते से दया ते सच्चाई कने भरी कने तिस ने हमारे मझाटे डेरा किता। कने अस्सी तिसेरी इदेई महिमा दिखी जियां बाबे ने ईकलौते री महिमा दिखी। 14 यहून्ना ने तिसेरे बारे गवाई दिती कने जोरे कने बोल्या कि ए सेई है जिसेरे बारे मैं तुसां जो दसयां थिया। कि जेहडा मेरे बाद आए करदा है। सेह मेरे का वी बदी करी है। किजो कि से मेरे का वी पैहले थिया। 15 किजो किं तिसी का असां जो सब किछ मिलया अते मेर पर मेर। 16 इस तेंई कि कनून ता मूसा रे पासे का दिते गे रे थिये। अपण मेर कने सच्चाई यीशु मसीह रे जरिए पुजी। 17 परमेश्वर जो ता कुसी ने वी नी दिख्खेया इको इ जेठा जेहडा बाबे री गोदी बिच है तिसी ने तिसजो साम्हने लयांदा। 18 यहून्ना री गवाई ऐ है कि जिस टैमां यहूदियां ने यरुशलम रे पुजाळे कने प्रोता जो तिसका ऐ पूछने जो भेजया कि तू कुण है।

## यूहन्ना बपतिस्मा दैणे वाळे री गुआई

19 तिसने एह मन्त्री लेया ते मना नी किता। ते मनी लेया कि मैं मसीह नी है। 20 तां तिन्हाँ ने तिसजो पूछया ता फिरी कुण है ? क्या तू एलिया है ? तिसने बोलया मैं नी है। तां क्या तू भविष्यवाणी करणे वाला है ? तिसने जवाब दिता नी। 21 तां तिन्हा ने तिस जो पूछया, फिरी तू कुण है ताकी अस्सी अपणे भेजने वालया जो जवाब देई सकन् कि तू अपणे बारे बिच क्या बोलदा है। 22 तिसने बोलया जियां यशायाह भविष्यवाणी करने वाले ने बोलया है, मैं जंगला बिच इक सदने वाले रा बोल (शब्द) है कि तुसी परमेश्वर रा रस्ता सिधा करो। 23 से फरिसियां रे पासे का भिजवाए रे थिए। 24 तिन्हा ने तिसका एह सवाल पूछया, “अगर तू न मसीह है न एलियाह ते न ही सेह भविष्यवाणी करने वाला है ता फिरी बपतिस्मा किजो दिंदा। 25 यहून्ना ने तिहना जो जवाब दिता मैं ता पानी कने बपतिस्मा दिंदा अपण तुम्हारे बिच ईक डेदया मणु खडिते रा है तिसजो तुसी नी जाणदे। 26 जेहडा मेरे बाद आनेवाळा है मैं ता तिसेरी जूते रे तसमे खोलणे रे जोगा वी नी है। 27 ए गल्ला यरदन रे पार बैतनिय्याह बिच होई जिन्ते यहून्ना बपतिस्मा दिदां थिया। 28 दुए दिन तिसने यिशु जो अपणे पासे आंदे दिखी करी बोल्या, दिखो ए परमेश्वर रा मेम्ना है जेहडा दुनिया (जगत) रा पाप चुकी लेई जांदा है।

## परमेश्वर रा मेमना

29 ए सेई है जिसेरे बारे बिच मैं बोल्या थिया। ईक मणु मेरे का बाद आणे वाळा है जेहडा कि मेरे का बदी करी है किजो कि से मेरे का पैहले थिया 30 मैं ता तिसजो पछियाणदा नी थिया इसी तेंई मैं पाणी कने बपतिस्मा दिंदा आया कि से इस्त्राएल रे सामणे आई जाए। 31 कने यहून्ना ने गवाई दिती, मैं आत्मा जो कबूतर रे सेई अम्बर का उतरदे दिख्खेया ते से तिस पराले उत्तरी गेया। 32 मैं ता तिसजो पछियाणदा नी अपण जिसने मिन्जो पानी रा बपतिस्मा दैणे जो भेजया तिसी ने मिन्जो बोलया, जिस पराले तू आत्मा जो उतरदे कने रुकदे दिख्खेया सेई पवित्र आत्मा कने बपतिस्मा देने वाळा है। 33 ते मैं दिख्खेया कने गवाई दिती कि ऐई परमेश्वर रा पुत्र है। 34 दुए दिन फिरी यहून्ना कने तिसेरे चेलयां बिच का दो मणु खडिते रे थिए।

## यीशु जी रे पैले चेले

35 कने तिसने यीशु जे जाए करदे थिये दिख्खी करी बोल्या दिखा ए परमेश्वर रा मेम्ना है। 36 तां से दोई चले तिसका एह सुणी करी यीशु रे पीछे चली पे। 37 यीशु ने मुडीकरी तिन्हा जो पिछे आंदे दिख्खेया ते बोलेया तुसी कुस जो तोपदे हिन् ते तिन्हा जो बोलया, हे गुरु तू कुते रिदां। 38 तां तिन्हा ने उन्हा तिक्कर रैके जो जगह दिख्खी ते तिस रोजे से तिन्हा कने इ रेह् । एह दस घंटया रे लगभग थिया। 39 तिन्हा दोई बिच का जेहडे यहून्ना री गल्ल सुणी करी यीशु रे पीछे होएरे थिए इक शमौन पतरस रा भ्याल अन्द्रियास थिया। 40 तिसने पहले अपणे सगे भ्याल शमौन जो मिली करी तिस जो बोलया हमारे जो मसीह मिली गे 41 से तिस जो यीशु जी का लई आया । यिशु ने तिसजो दिख्खी करी बोलया, तू यहून्ना रा निक्का शमौन है तू कैफा कहलाणा। 42 दुए दिन यीशु ने गलील जो जाणां चाया सेह फिलिप्पुस कने मिलया कने बोलया, मेरे पिछे आई जा।

## फिलिप्पि ते नतनेल रा सद्देया जाणा

43 फिलिप्पुस अन्द्रियास कने पतरस रे ग्रां बैतसदा रा रेणे वाळा थिया । 44 फिलिप्पुस नतनएल कने मिलया कने तिसजो बोलया जिसेरी चर्चा मुसा ने कनून बिच कने भविष्यवाणी करने वाळेया ने किती री है। से हमारे जो मिली गेया से युसफ रा पुत्र यीशु नासरी है। 45 नतनएल ने तिसजो बोलया, क्या कोई बदिया चीज वी नासरत का निकळी सकदी है। फिलिप्पुस ने तिस जो बोलया, चली करी दिखी लै। 46 यीशु जी ने नतनएल जो अपणे पास्से आंदे दिख्खी करी उसेरे बारे बिच बोलेया: इस बिच कपट नी ए।” 47 नतनएल ने तिसजो बोलया, तू मिन्जो कियां करी जाणदा ? यीशु ने तिसजो जवाब दिता इसेरे का पैहले फिलिप्पुस ने तिजो सदया जिस वेले तू अंजीर रे बूटे रे हेटा (थले) थिया, तिस वेले मैं तिजो दिख्खेया थिया। 48 नतनएल ने तिसजो जवाब दिता हे गुरु तू परमेश्वर रा पुत्र है तू इस्त्राएल रा महाराजा है। 49 यीशु ने तिसजो जवाब दिता, मैं जे किछ तिजो बोलया कि मैं तिजो अंजीर रे बूटे रे हेटा दिख्खेया क्या तु इसी वास्ते विश्वास करदा है। तु इसेरे का बड्डे- बड्डे कम दिखगां। 50 फिरी तिस ने बोलया, मैं तुम्हरे कने सच्च-सच्च बोलदा कि तुसी स्वर्गा जो खुले रे कने परमेश्वर रे स्वर्गदुता जो मल्लु रे पुत्र पराले उतरदे कने ऊपर जांदे दिखणा। 51 फिरी तिसेरे दिन गलील रे काना बिच कुसी रा व्याह थिया कने यीशु री अम्मा वी तिन्ते इ थी।

### गलील रे काना बिच यीशु जी रा पैला चमत्कार

2 यीशु कने तिसरे चले वी तिस व्याह बिच सदे रे थिये। 2 जिस वेले दाखरस घटी गेया ता यीशु री अम्मा ने तिसजो बोलया, तिन्हा का दाखरस मुकी गेया। 3 यीशु ने तिस जो बोलया, ओ जनानी मिन्जो तेरे कने क्या कम्म ? अब्बे मेरा टैम नी है आएरा। 4 तिसेरी मां ने नौकरा जो बोलया, जे किच्छ से तुम्हारे जो बोलदा तियां इ करो। 5 तित्ते यहूदियां ने साफ करने री रसम अनुसार पत्थर रे छः घढे रखखेरे रे थिए। जिस बिच दो-दो तिन-तिन मन आन्दा थिया। 6 यीशु ने तिस जो बोलया घढया जो पाणी कने भरी दो। तिन्हा ने तिस जो मुआ मुआ तक भरी दिता। 7 तां तिसने तिन्हा जो बोलया, अब्बे निकाली करी धाम रे प्रधान का लेई जाओ ते से लेई गे। 8 जिस वेले धाम रे प्रधान ने से पाणी चखया जेहडा दाखरस बणी गेयरा थिया कने नी जाणदा थिया कि सेह कुत्ते का आया। ता धाम रे प्रधान ने लाडे जो सदी करी तिसजो बोलया। 9 हर ईक मणु पैहले खरा दाखरस दिंदा कने जिस बेले मणु पी करी थकि जान्दे ता तिस का हल्का दिंदे अपण तु खरा दाख रस अब्बे तक रखी छुडे रा है। 10 यीशु ने गलील रे काना बिच अपणा ए पहला चमत्कार दिखाई करी अपणी महिमा दिखाई। कने तिसरे चेलयां ने तिस पर विश्वास किता। 11 इसेरे बाद से कने तिसेरी अम्मा कने तिसरे भ्याळ कने तिसरे चले कफरनहूम जो गे कने तित्ते किछ दिन रे। 12 यहूदियां रा फसह रा त्योंहार नजदीक थिया कने यीशु यरुशलेम जो गे।

### देहरे बिच का दुकानदारां रा कड्डेया जाणा

13 तिसने देहरे बिच बैल, भेड कने कबूतर रे बेचनेवाले कने सौदेबाजा जो बैठे रे दिखखेया। 14 तां तिस ने रस्सी जो बड्डी करी सारे डगंरा जो देहरे का कडी दिता कने सौदे बाजा रे पैसे खलारी दित्ते कने फटीया जो पलटाई दिता 15 कने कबूतर बेचने वाळेया जो बोलेया इन्हा जो इत्ते का लेई जाओ मेरे बाबे रे घर जो वयप्पार रा घर मत बणाओ। 16 तां तिसरे चलेया जो चेता आया कि लिखे रा है कि तेरे घरे री अवाज ने मिंजो खाई जाणा। 17 इस पर यहूदियां ने तिस जो बोलेया तु जेहडा ऐ करदा ता हमारे जो कुण वाला चमत्कार दसदा ? 18 यीशु ने तिन्हा जो जवाब दिता इस देहरे जो ढाई देयो ते मै इस जो तिन दिना बिच खडा करी दिगां 19 यहूदियो ने बोलेया इस देहे जो बनाणे तिक्कर छताळी साल लगे रे हिन् ता क्या तु तिस जो तिन दिना बिच खडा करी दिगां। 20 अपण तिस ने अपणी देह रे देहे बारे बिच बोलया थिया। 21 इधेरे ताँई जां यीशु जी मुदर्याँ बिच का जिन्दे होई गे तां तिन्हेरे चेल्लेयां जो चेता आया कि यीशु जी ने एह बोल्या थिया; तां तिन्हा ने पवित्र सास्त्र ते तिस गल्ल रा भरोसा किच्तेया, जेहडी यीशु जी ने बोली थी। 22 जिस वेले से यरुशलेम बिच फसहारे रे टैमा मेले अन्दर थिया ता वडेया ने उस रे चमत्कार जेडा से दसदा थिया से दिखी करी तिस पर विश्वास किता।

### यीशु जी इन्सान रे मन जो जाणदे

23 अपण यीशु ने अपु जो तिनहेरे भरोसे पर नी छडया किजो की से सबनी जो जाणदा थिया। 24 कने तिस जो कोई जरूरत नि थी कि से मणुआ रे बारे बिच कोई गवाई दे किजो कि से अपु ही जाणदा थिया कि मणुआ रे मना बिच क्या है 25 फरीसियां बिच निकुदेमुस ना रा इक मणु थिया जेडा यहूदिया रा सरदार थिया।

### यीशु जी ते नीकुदेमुस

3 राती आई करी यीशु जो बोलया है स्वामी अस्सी जाणनदे तु परमेश्वर रे पासे का गुरु होई करी आयरा है किजो कि कोई भी इन्हा चमत्कारा जो जे तु दिखांदा है जिस बेले तक परमेश्वर तिसरे कने न होन् नी दिखाई सकदा। 2 यीशु ने तिस जो जवाब दिता। मै तुसां कने सच्ची सच्ची बोलदा जे कोई नोए सिरे का नी जम्मे ता परमेश्वर रे राज्य जो नी दिखी सकदा। 3 नीकुदेमुस ने तिसका पुछया महु जिस बेले सयाणा होई जाए ता से दुबारा किया जमी सकदा। क्या से अपणी माँ रे पेटा बिच दुबारा जाई करी जन्म लेई सकदा ? 4 यीशु ने जवाब दिता मै तिजो सच्च-सच्च बोलदा जिस बेले तक

कोई मणु पाणी ते आत्मा कने न जन्मे तिस बेले तिकर से परमेश्वर रे राज्य बिच नी आई सकदा। 5 किजो कि जेडा देह बिच जमया सेह देह है ते जेडा आत्मा बिच जमया से आत्मा है। 6 हैरान मत हो कि मै तिजो बोलया कि तीजो नोए सिरे का जन्म लेणा जरूरी है। 7 हवा जित्ते चाहन्दी तिते चली आन्दी तु उसदी आवाज ता सुणदा पर नी जाणदा कि कुत्ते का आंटी है कने कुत्ते जांटी ? जेडा भी आत्मा बिच जमया से इदेया इ है 8 नीकुदेमुस ने जवाब दिता। ऐ गल्ला किया होई सकदीयां। 9 ए सुणी करी यीशु ने बोलया तु इस्त्राएलिया रा गुरु होई करी भी क्या हन्हा गल्ला जो वी नी समझदा। 10 मै तुसां कने सच्ची सच्ची बोलदा असी जेडा जाणदे ओ बोलदे कने जिस जो असी दिखदे तिस दी ही गवाई दिन्दे तुसी हमारी गवाई जो नी अपनान्दे। 11 जिस वेले मै तुम्हारे कने जमीन री गल्ला करदा ता तुसी विश्वास नी करदे। कने जिस वेले मै तुम्हारे कने स्वर्ग दिया गल्ला करगां ता तुसी कियां विसवास करणा। 12 कोई स्वर्ग पर नी चढयां सिर्फ सई जेहडा स्वर्ग का उतरया हालांकि मणु रा पुत्र जेहडा स्वर्ग बिच है। 13 जिस तरीके कने मुसा ने जंगल बिच किडे जो ऊचे पर चढाया उसी तरीके कने जरूरी है कि मणु रा प भी पुत्र उचें पर चढाया जाए। 14 तां कि जेहडा कोई तिस पर विश्वास करे से हमेसा री जिन्दगी पाए। 15 किजो कि परमेश्वर ने दुनिया कने इदेई दाह किन्ती कि तिसणे अपणा इकलौता पुत्र देई दिता कि जेहडा तिस पर विश्वास करे से नास न हो अपण हमेशा री जिन्दगी पाओ। 16 परमेश्वर ने अपणे पुत्र जो दुनियां बिच इस ताँई नी भेजया कि दुनिया जो सजा रा हुक्म दे अपण इस तैई कि दुनिया तिसरे जरिए मुक्ति पाए। 17 जेहडा तिस पर विश्वास करदा है तिसरे पर सजा रा हुक्म नी हुन्दा अपण जेहडा तिस पर विश्वास नि करदा से दोषी ठहरी चुकया। इस तैई कि तिसने परमेश्वर रे इकलौते पुत्र रे ना पर विश्वास नि किता। 18 ते सजा रे हुक्म री वजह एह है कि लौ दुनिया अन्दर आई, ते महुआं ने न्ह्यारे जो लौ का प्यारा मन्त्रेया किजो की तिन्हेरे कम्म बुरे थिये। 19 कि जे कोई बुराई करदा से लो कने दुश्मनी रखदा कने लो रे नेडे नी आंदा, इदेया न हो कि तिसरे कम्मा पर दोष लगाया जाए। 20 अपण जेहडा सच्च पर चलदा से लो रे नेडे आंदा है तां कि तिसरे कम सामणे आन कि से परमेश्वर रे पासे का किते रे हिन्। 21 इसेरे बाद यीशु कने तिसरे चले यहूदिया देश बिच आए कने से तित्ते तिन्हा कने रेई करी बपतिस्मा दैणे लगया।

### यीशु जी रे बारे यूहन्ना री गुआई

22 यहून्ना वी शालेम रे नेडे एनोन बिच बपतिस्मा दिंदा थिया। किजो कि तित्ते बडा -भारी पाणी थिया। कने महु आई करी बपतिस्मा लिन्दे थिए। 23 यहून्ना तिस टैमा तिक्कर जेल खाने बिच नी पायरा थिया। 24 तित्ते यहून्ना रे चेलयां रा कुसी यहूदी कने सफाई रे बारे बिच लडाई झगडा होया। 25 कने तिन्हा ने यहून्ना रे नेडे आई करी तिसजो बोलया हे गुरु जेहडा मणु यरदन रे पार तेरे कने थिया कने जिसेरी तू गवाई दिती दिख से बपतिस्मा दिन्दा है कने सब तिसरे का आंदे हिन्। 26 यहून्ना ने जवाब दिता जिस वेले तक महु जो स्वर्ग का न दिता जाए तिस वेले तक सेह कुछ वी नी पाई सकदा। 27 तुसी ता अप्पु ही मेरे गवाह हिन् कि मै बोलया मै मसीह नी अपण तिसरे अग्रे भेजेरा है। 28 जिसेरी लाडी है, सेहई नौलाडा है; पर नौलाडे रा मित्र जेहडा खडीह करी तिसेरी सुणदा, नौलाडे री गल्लां कने बडा खुस्स हुन्दा अवे मेरी ए खूसी पूरी होइ गई। 29 जरूरी है कि से बधन ते मै घटा। 30 "जेहडा उप्परा का आन्दा से सबनी का जादा बधि करी है; जेहडा धरती का आन्दा से धरती रा है, ते धरती री ई गल्लां करदा : जेहडा स्वर्ग का आन्दा, से सबनी का उपर है। 31 जेहडा किच्छ तिसने दिखया कने सुणेया है तिसेरी ही गवाई दिंदा है। कने कोई तिसेरी गवाई जो मन्दा नी। 32 जिनिए तिसेरी गवाहई मन्नी लेई तिनिए इस गल्ल पर छाप लगाई दिन्ती कि परमेश्वर सच्चे हिन्। 33 किजो कि जिसजो परमेश्वर ने भेजे रा है। से परमेश्वर री गल्लां बोलदा किजोकि से आत्मा तोली- तोली करी नी दिंदा। 34 प्यो पुत्र कने प्यार रखदा, ते तिन्हा ने सारी चीजां पुत्र रे हथ्यां अन्दर देइ दित्तेरी हिन्। 35 जेहडा पुत्र पर भरोसा करदा, हमेसा री जिन्दगी उसेरि है; अपण जेहडा पुत्र री नी मनदा, तिनिए जिन्दगी नी दिखणी है, अपण तिस पर परमेश्वर गुसा

रह्ला।" 36 फिरी जां प्रभू जी जो पता लगेया कि फरिसियाँ ने सुणेरा है कि यीशु युहन्ना का बी जादा चेले बणांदा ते तिन्हा जो बपतिस्मा दिन्दा ।

### यीशु जी ते सामरी जनानी

4 हालांकि यीशु अप्पु नी अपण तिसरे चले बपतिस्मा दिंदे थिए। 2 तां से यहूदियां जो छडी करी फिरी गलील जो चली पे। 3 कने तिन्हा जो सामरियां का होई करी जाणा जरूरी थिया। 4 इस तेंई से सुखार ना रे सामरियां रे इक ग्रां तक आया जेहडा तिस जमीन रे नेडे है जिसजो यकूब ने अपने निक्के युसूफ जो दिता थिया। 5 कने याकूब दा कुआं वि तित्ते थिया। तां यीशु रस्ते रा थक्के रा थिस कुएं पर ईयां ही बैइ गया। ए तकरीबन छे घन्टे रे लगभग थी। 6 इतणे बिच इक सामरी जनानी पाणी भरने आई यीशु ने तिसजो बोलया, मिन्जो पाणी पिया। 7 किजो कि तिसरे चले ता ग्रां बिच रोटी खरीदणे गेयरे थिए। 8 तिस सामरी जनानी ने तिसजो बोलया, तू यहूदी होई करी मेरे जेंई सामरी जनानी का पाणी किजो मंगंदा। 9 यीशु ने जवाब दिता जे तु परमेश्वर रे वरदान जो जाण्दी कने ए वी जाण्दी कि से कुण है जेहडा तिजो बोलदा । मिन्जो पाणी पिया, ता तु तिसका मंगदी कने से तिजो जिन्दगी रा पाणी दिंदा। 10 जनानी ने तिसजो बोलया, हे प्रभु तेरे का ता पाणी भरने तेंई किछ है वी नी कने कुआँ डुंगा है। तां सेह जिन्दगी रा पाणी तेरे का कुत्ते का आया। 11 क्या तू असा रे बाबे यकूब का बड्डा है जिसने असा जो ए कुआँ दिते रा है। कने अप्पु ही अपणे पुत्र कने अपणे उंगरा समेत इस बिच का पिन्दा। 12 यीशु जी ने जवाब दिता जेहडा कोई ए पाणी पिंगा तिन्ही फिरी प्यासा होणा। 13 अपण जेहडा कोई तिस पाणी बिच का पिन्ना, जे मैं तिस जो दैणा, तिस जो फिरी हमेसा ताँई त्रेह नी लगणी; अपण जेहडा पाणी मैं तिस जो दैणा, तिसेरा उस महु अन्दर इक सोता बणी जाणा जेहडा सारी उमर ताँई उमड्दा रह्ला। 14 जनानी ने तिसजो बोलया, हे प्रभु ए पाणी मिन्जो दे तां कि मैं प्यासी न होवा कने पाणी भरणे जो इनी दूर न आँ। 15 यीशु ने तिसजो बोलया, जा अपने लाडे जो ईत्थे सद्दी लेई आ । 16 जनानी ने जवाब दिता, मैं ते बिना लाडे रे है। यीशु ने तिस जो बोलया, तु ठीक बोलदी है कि मैं बिना लाडे रे ए। 17 किजो कि तू पाँज लाडे करी चुकी री है कने अब्बे जिसेरे कने है से वी तेरा लाडा नी है। ए तू सच ही बोलया । 18 जनानी ने तिन्हा जो बोलेया, "ओ प्रभू जी, मिन्जो लगदा कि तुसी भविश्यवाणी करणे वाळे हिन् । 19 असा रे बाबे दादया ने ईसी पहाडा पर भक्ति किती कने तुसी बोलदे कि जित्ते भक्ति करनी चायदी से यरुशलम बिच है। 20 यीशु ने तिसजो बोलया हे जनानी मेरी गल्ल रा विश्वास कर कि से टैम आंदा है कि न ता तुसी इस पहाड पर बाबे री भक्ति करणी न ही यरुशलम बिच। 21 तुसी जिस जो नी जाणदे, तिसेरी भक्ति करदे; ते असी जिस जो जाणदे तिसेरी आराधना करदे; किजो कि उद्धार यहूदियाँ बिच का है । 22 अपण से टैम आणे वाळा है हालांकि अब्बे वी है जिस बिच सच्चे भक्त बाबे री भक्ति आत्मा कने सच्चाई कने करणी। किजो कि बाबा इदंए भक्ता जो तोपदा। 23 परमेश्वर आत्मा है कने जरूरी है कि तसेरी भक्ति करने वाळा आत्मा ते सच्चाई कने भक्ति करे। 24 जनानी ने तिसजो बोलया, मैं जाण्दी कि मसीह जेहडा प्रभु है आणे वाळा, जिस वेले तिसने आणा ता सारी गल्ला असाँ जो दसणियाँ। 25 यीशु ने तिस जो बोलया मैं जे किछ तेरे कने बोले करदा है मैं सेई ए। 26 इतणे बिच इ तिसरे चले आई गे कने हैरान होई गे कि से जनानी कने गल्ल करे करदा । फिरी वी कुसी ने नी पुछया, कि तू क्या चाहन्दा है ? या कुस ताँई तिसरे कने गल्ला करे करदा ।

### चेलेयां री वापसी

27 ता जनानी घडा छडी करी ग्रां बिच चली गई ते मणुआ जो बोलणा लगी। 28 आओ कने इक महु जो दिखो जिसने सारा किच्छ जे मैं कित्ते रा मिन्जो दसी दिता। कुत्ते ऐई ता मसीह नी है 29 इधेरे ताँई से सैह का निकळी करी तिन्हेरे का आणा लगे। 30 इसेरे बिच यीशु रे चलेया ने छन्दे करी के बोलया कि हे गुरु कुछ खाई लियो । 31 अपण तिसने तिन्हा जो बोलया मेरे का खाणे वास्ते इदेई रोटी है जिसेरे बारे बिच तुसी नी जाणदे। 32 तां चलेया ने आपस बिच बोलया, क्या कोई तिसरे तिक्कर किछ खाणे जो ल्यारा है। 33 यीशु ने तिन्हा जो बोलया, मेरी रोटी से है कि अपणे भेजणे वाले री मर्जी रे साहब

कने चलां ते तिसेरा कम्म पुरा करा। 34 कै तुसी इह्याँ नी बोलदे, 'फसलां कटणे जो हले ताँई बी चार म्हीन्ने बचेरे हिन् ?' दिख्खो, मैं तुसां जो बोलदा, अपणी हाख्खियाँ चुक्की करी खेतरां पर नजर देयो कि से कटणे जोगे होई गेरे हिन्। 35 कटणे वाळा मजदूरी लिन्दा ते हमेसा ताँई फळ बटोळ्दा, ताकी बाणे वाळा ते कटणे वाळा दोहूई जल्हे मिली करी खुसी मणान्। 36 किजो कि कि इत्ते एह कहावत ठीक बैन्दी है कि बाणे वाळा होर है ते कटने वाळा होर। 37 मैं तुम्हारे जो सेह खेतर कटने तेई भेजया जिस बिच तुसी कोई मेहनत नी किती। दूजया ने मेहनत किती कने तुसी तिसेरी मेहनत रे फल रे हिस्से दार होए। 38 उस ग्रां रे बडे- भारी सामरियां ने तिस जनानी रे बोलने पर यीशु पर विश्वास किता। किजो कि तिसने एह गवाही दिती थी तिसने सब किच्छ जो मैं कितेरा है मिन्जो बताई दिता।

### सामरियां रा विश्वास करणा

39 जिस वेले सामरी तिसरे नेडे आए ता तिसरे छन्दे करने लगे कि म्हारे का इत्ते रहू। ते से तित्ते दो दिन् तक रुकेया। 40 तिन्हा रे वचन री वजह कने होर वी कई मणुआ ने तिस पर विसवास किता। 41 अते तिस जनानी कने बोलया, अब्बे अस्सी तेरे बोलणे कने विसवास नी करदे किजो कि अस्सी अप्पु ही सूपी लिता कने जाणदे हिन् कि ऐई सच्चे इ दुनिया उद्धार करणे वाळा है। 42 फिरी तिन्हा दो दिना रे बाद से तित्ते का निकळी करी गलील जो चली गे। 43 किजो कि यीशु जी ने अप्पु ई गवाहई दिती कि भविश्यवक्ता अपणे देस अन्दर आदर-खातर हासल नी करी सकदा। 44 जां से गलील बिच आया ता गलीली तिस कने बडी-भारी खुशी कने मिले। किजो कि जिने कम्म तिसने यरुशलम बिच त्योहार रे टैमा किते थिए तिन्हा ने उन्हा सारया कमा जो दिखया थिया, किजो कि से सारे वी त्योहार बिच गेयरे थिए।

### राजे रे कम्म करणे वाळे रे मुडें जो ठीक करणा

45 तां से फिरी का काना बिच आए जित्ते तिन्हा ने पाणी जो दाख रा रस बनाया थिया। तित्ते राजे रा इक नोकर थिया जिसेरा निक्का कफरनहूम बिच बिमार था। 46 से ए सुणी करी कि यीशु यहूदिया का गलील बिच आई गेयरा है तिसरे का गया। कने तिसरे छन्दे करना लगेया चली करी मेरे निक्के जो ठीक कर किजो कि सेह मरने वाळा थिया। 47 यीशु ने तिसजो बोलया जिस वेले तक तुसी चम्तकार नी दिखी लैणे तिस टैमा तक तुसी कदी विश्वास नी करणा। 48 राजे रे नौकर ने तिसजो बोलया, हे प्रभु मेरे निक्के री मौत होणे का पहले तित्ते चल। 49 यीशु ने तिसजो बोलया, जा तेरा निक्का जिन्दा है। तिस मणु ने यीशु री बोली री गल्ल रा विसवास किता कने चली गया। 50 से रस्ते बिच ई था कि तिसरे नौकर ने तिस कने आई मिले कने बोलणा लगे तेरा निक्का जिन्दा है। 51 तिसने तिसका पूछया, कुस टैम से ठीक होणा लगा तिन्हा ने तिसजो बोलया कल सतवे घंटे बिच तिसेरा बुखार उतरी गया। 52 तां बाबे जो पता लगी गया कि एह तिसी टैमा होया जिस वेले यीशु ने तिसजो बोलया कि तेरा निक्का जिन्दा ए । उसेरे कने तिसरे पूरे टब्बर ने विसवास किता। 53 ए दुआ चम्तकार थिया जेहडा यीशु जी ने यहूदिया का गलील बिच आई करी किता। 54 इन्हा गल्ला रे बाद यहूदिया रा इक त्योहार होया ते यीशु जी यरुशलम बिच गे।

### अठती साल रे इक्क बमार जो ठीक करणा

5 यरुशलम अन्दर भेड्डू-फाटक रे नेडे इक पाणी रा तळा है जिस जो इब्रानी भासा अन्दर बैतहसदा बोल्दे; इसेरे कनारे पर पंज बरांडे बणेरे हिन्। 2 इस बिच बडे-भारी बिमार, अन्ने, लट्टे, सूखे अंगा वाले पेई रिंदे थिए। 3 तित्ते इक महु थिया जेहडा अठती साला रा बिमारी अन्दर पेयरा थिया। 4 किजोकी ठेहराये रे समय पर परमेश्वर रे स्वर्गदूत कुण्ड बिच उतरी करी पाणी जो हिलाया करदे थे, पाणी हिलदे ई जे पैले कुण्ड बिच उतरी जादां था तिसेरी कोइ बी ठीक होई जादी थी। 5 यीशु ने तिसजो पेयरा दिखी करी कने एह बूजी गे कि से बडे दिना रा इस्सी हालत बिच पेयरा है तिसने पुछया क्या तू ठीक होणा चांदा ? 6 तिस बिमार ने तिसजो जवाब दिता, हे प्रभु मेरे का कोई वी इदेया मणु नी है कि जिस वेले सेह पाणी हिलाया जांदा ता मिन्जो

तिस तलां बिच उतारे। अपण मेरे पूजदे- पूजदे दुजा मेरे का पैहले उत्तरी जांदा। 7 यीशु ने तिसजो बोलया, उठ अपना मंजा चूक कने चल फिर। 8 से महु झट्ट ठीक होई गया कने अपना मंजा चुकी करी चलणा फिरणा लगया। 9 से सवत रा दिन थिया इस ताई यहूदी जेहडा ठीक होया ता तिसजो बोलणा लगे, अज ता सवत रा दिन है कने तेरा मंजा चुकना बि ठीक नी है। 10 तिसने तिन्हा जो जवाब दिता जिन्नी मिन्जो ठीक किता तिसी ने मिन्जो बोलया कि अपना मंजा चुक ते चल फिर। 11 तिन्हा ने तिसका पुछया, सेह कुण महु है जिन्नी तिजो बोलया, मंजा चुक कने चल फिर ? 12 अपण जेहडा ठीक होयरे थिया से नी जाण्दा थिया कि से कुण है। किजो कि तिस जगह भिड़ होणे री वजह कने यीशु उते का हटी गेयरा थिया। 13 इन्हा गल्ला रे बाद से यीशु जो देहरे बिच मिलया। यीशु ने तिसजों बोलया, दिख तू ठीक होई गेयरा है: फिरी पाप मत करदा, इयां न हो कि इसेरे का वी कोई वडी विपत्ता तेरे पर आई पे। 14 तिस महु ने जाई करी यहूदिया जो बोली दिता कि जिह्ने मिन्जो ठीक किता से यीशु है। 15 इसेरी वजह कने यहूदी यीशु जो सताणा लगे। किजो कि से इदेह कम्म सवत रे दिन करदा थिया। 16 इस पर यीशु ने तिसजो बोलया, मेरा बाबा अब्बे तक कम्म करदा कने मै वी कम्म करदा है। 17 इस वजह कने यहूदी होर वी बधी करी तिसजो मारणे री कोशीश करणा लगे किजो कि सेह न सिर्फ सवत रे दिन रे रिति रिवाज जो तोडदा थिया। अपण परमेश्वर जो अपना बाबा बोली करी अप्पू जो परमेश्वर रे बराबर करदा थिया। 18 इस पर यीशु ने तिन्हा जो बोलया, मै तुम्हारे जो सच- सच बोलदा, पुत्र अपणे का किच्छ नी करी सकदा, सिर्फ सेई जेहडा बाबे जो करदे दिखदा है। किजो कि जेहडे-जेहडे कम्मा जो से करदा तिसजो पुत्र वी तिसी तरीके करदा है।

### पुत्तर रा हक्क

19 किजोकि बाबा पुत्र कने दाह रखदा कने जेहडे-जेहडे कम्म से करदा सेह सारे तिसजो दिखंदा है। कने सेह इसका का वी बड्डे-बड्डे कम्म तिसजो दिखंगा ताकि तुसी हैरान न हो। 20 कि जिंया सारे मणु बाबे री इज्जत करदे तियां ही निक्के री वी इज्जत करन। जेहडा निक्के री इज्जत नी करदा, सेह बाबे री वी जिनी तिसजो भेजे रा है इज्जत नी करदा। 21 पिता कुस्की रा न्याय नी करदा, अपण न्याय करणे रा सारा कम्म पुत्तर जो सौंपी दितेया गेरा है, 22 ताकि सब जक्के जिह्णां पिता री इज्जत करदे तिह्णां ई पुत्तर री वी इज्जत करेया करन। जेहडा पुत्तर री इज्जत नी करदा, से पिता री, जिन्हा ने तिस जो भेजेरा है, इज्जत नी करदा। 23 मै तुम्हारे कने सच-सच बोलदा, जेहडा मेरा वचन सुणी करी मेरे भेजणे वाले पर विश्वास करदा हमेसा री जिन्दगी तिसका है। कने तिस पर सजा रा हुक्म नी हुन्दा। अपण से मौत जो टप्पी करे जिन्दगी बिच जाई चुके रा है। 24 मै तुम्हारे जो सच-सच बोलदा, से टैम आंदा है, कने अब्बे इ है जिस वक्त मरे रे परमेश्वर री आवाज सुणे कने जेहडे सुणे से जिगे। 25 किजो कि जिस तरिके बाबा अप्पू अन्दर जिन्दगी रखदा तिसी तरिके तिसने पुत्र जो वी ए हक्क दितेरा है कि अप्पू बिच जिन्दगी रखे। 26 हालांकि तिसजो न्याय करने रा वी हक्क दितेरा है। इस ताई कि से परमेश्वर रा पुत्र है। 27 इस बिच हैरान मत हो, किजो कि से वक्त आंदा है कि जिन्ने कब्रा बिच हिन् तिन्हा तिसेरी आवाज सुणी करी निकळी आणा। 28 जिह्ना ने भलाई किती री है से जिन्दगी री दूजी जिन्दगी वास्ते जी उठणे, कने जिन्हा ने बुराई किती री है से सजा री दूजी जिन्दगी वास्ते जी उठणे। 29 मै अप्पू का किच्छ नी करी सकदा, जिंयां सुण्दा तिदेया न्याय करदा कने मेरा न्याय सच्चा है किजो कि मै अपणी मर्जी नी अपण अपणे भेजने वाले री मर्जी चाहन्दा।

### यीशु जी रे बारे गुआई

30 जे मै अपणी ही गवाई अप्पू देयां तां मेरी गवाई सच्ची नी ए। 31 इक होर है जेहडा मेरी गवाई दिन्दा ते मै जाण्दा जेडी मेरी गवाही दिन्दा से सच्ची है। 32 तुसी यहून्ना का पुछवाया ते तिनी सच्चाई री गवाई दिती। 33 अपण मै अपणे बारे बिच महु री गवाई नी चाहन्दा। तां वि ए गल्लां इस तैई बोलदा कि तुंहारे जो उद्धार मिलें। 34 से ता बळदा कने चमकदा होया दिया है। कने तुम्हारे जो थोडी देर तक तिसेरी लो बिच मस्त होणा ठीक लगया। 35 अपण

मेरे का जेडी गवाई है से यहून्ना री गवाई का बड्डी है किजो कि जेडा कम्म बाबे ने मिन्जो पुरा करने जो दितेरा है। हालांकि ऐई कम्म जेहडे मै करदा है सेई मेरे गवाह हिन् कि कि बाबे ने मिन्जो भेजे रा है। 36 कने बाबा जिने मिन्जो भेजे रा है तिसी ने मेरी गवाई दिती री है। तुसी न कदी तिसेरे बोल सुणे ते न तिसेरा रूप दिख्खेया। 37 कने तिसेरे वचन जो मना बिच पक्का नी रखदे किजो कि जिसजो तिसने भेजया तुसी तिसेरा विश्वास नी करदे। 38 तुसी पवित्रसास्त्र बिच तोपदे हिन् किजो कि समझदे हिन् कि तिन्हा बिच हमेसा री जिन्दगी मिलदी कने एह सेई है जेहडा मेरी गवाई दिंदा है। 39 फिरी बी तुसी जिन्दगी पाणे तिक्कर मेरे नेडे आणा नी चाहन्दे। 40 मै महुआ का इज्जत नी चाहन्दा। 41 अपण मै तुम्हारे जो जाण्दा है कि तुम्हारे बिच परमेश्वर री दाह नी है। 42 मै अपणे बाबे रे ना कने आए रा है ते तुसी मिन्जो नी अपणादे। अपण जे कोई अपणे ना कने ही आए ता तिसजो ग्रहण करी लिंगे। 43 तुसी जेहडे इक-दुजे का इज्जत चाहन्दे हिन् कने से इज्जत जेहडा इक मात्र परमेश्वर रे पासे का है, नी चाहंदे, कुस तरिके विसवास करी सकदे ? 44 इयां मत समझो कि मै बाबे रे सामणे तुम्हारे पर दोस लगांगा, तुम्हारे पर दोस लगाणे वाला ता मूसा है। जिस पर तुसी विश्वास किता। 45 किजो कि जे तुसी मुसा रा विसवास करदे ता मेरा वी विसवास करदे, इस ताई की तिसने मेरे बारे बिच लिखेरा है। 46 अपण जे तुसी तिसेरी लिखी री गल्लां पर विसवास नी करदे तां मेरी गल्ला पर विसवास कियां करी करगें। 47 इना गल्ला रे बाद यीशु गलील री झीला मतलब की तिबिरियास री झीला रे पार चली गे।

### पाँज हजार म्हुणुआं जो खुआणा

6 कने इक बडी भीड तिसरे पिछे चली पेई। किजो कि जेहडे चन्तकार सेह बिमारा पर दसदा थिया से तिन्हा जो दिखदे थिए। 2 तां यीशु जी पहाडा पर चडी करी अपणे चलेयां कने उते बेई गे। 3 यहूदिया रा फसह रा त्यौहार नेडे थिया। 4 जिस वेले यीशु जी ने अपणी अख्खा चुकी करी इकक बड्डी भीड जो अपणे पासे आंदे दिखेया, ता फिलिप्पुस जो बोलया, अस्सी इन्हा रे खाने ताई रोटी कुते का रोटी खरिदी करी लेई आन। 5 तिसने ए गल्ल तिसजो परखने तिक्कर बोली। किजो कि सेह अप्पू जाण्दा थिया कि तिसने क्या करणा। 6 फिलिप्पुस ने तिसजो जवाब दिता, कि दौ सौ दिनार री रोटी वी तिनेरे ताई पूरी नी होणी कि तिहनां तिस बिच का हर ईक जो थोडी थोडी वी मिली जाए। 7 तिसरे चलेयां बिच का शमौन पतरस रा भ्याल अन्द्रियास ने तिस जो बोलया। 8 इत्ते इक मुडां है जिस का जौ री पन्ज रोटीयां ते दो मछीयां हिन् पर इतणे कोका ताई नि होणियां। 9 यीशु जी ने बोलेया लोका जो बठाई देओ। तिस जगह बड्डा भारी चाह थिया। तां मणु जिहना बिच महु री गिनती तकरिबन पाँज हजार थी बेई गे। 10 तां यीशु जी ने रोटीयां लेइयां दे धन्याबाद करी के बैणे बाळे जो बन्डी दितियां ते तियां इ मछीयां जितनी से चान्दे थिये बन्डी दितियां 11 जां से खाई करी से रजी गे तां तिन्हा ने अपणे चलेयां जो बोलेया बचे रे रोटी रे टोकडे किह्ने करी लिओ कि किछ बी सुटे ना जान। 12 ते तिन्हा ने तिसजो कठेरया कने जौ री पाँज रोटी रे टुकडे जेहडे खाने वालया का वचे करदे थिए बाहरा टोकरिया भरियां। 13 तां जेहडा चन्तकार तिसने करी दखाया तिसजो दिखी करी महुणु बोलणा लगे, से भविष्यवाणी करने वाला जेहडा दुनिया अन्दर आनेवाळा थिया, पक्का ऐई है। 14 यीशु ए जाणी करी कि सेह मिन्जो राजा बनाणे तैई पकडना चाहन्दे हिन् फिरी से पहाड पर किल्ला चली गया। 15 जिस वेले सँझ होई ता तिसेरे चले झील रे किनारे चली गे।

### यीशु जी रा पाणी पर चलणा

16 कने किशती पर चड्डी करी झीलां रे पार कफरनहूम जो जाणे लगे। तिस वेले निहारा होई गेयरा थिया। कने यीशु तिस बेले तक तिनेरे का नी आयरा थिया। 17 तूफान री वजह कने झिलां अन्दर लहरां उठणे लगियां। 18 जिस वेले से चप्पू मारदे-मारदे तिन चार मील रे लगभग निकळी गे। तां तिन्हा ने यीशु जो झीला पर चलदे किशती रे नेडे आंदे दिखया कने डरी गे। 19 अपण तिसने तिन्हा जो बोलया, मत डरो मै है। 20 ते से तिसजो किशती पर चढाने वास्ते तयार होए कने से किशती तिस जगह जाई पुजी जिहत्थे से जाए करदे

थिए।<sup>21</sup> दूजे दिन तिस भीड ने, जेहडी झीला रे पार खडी थी, ए दिखया कि इहत्थे इक जो छडी करी होर कोई किशती नी थी। कने यीशु अपणे चेलयां कने तिस किशती पर नी चढेरा थिया। अपण सिर्फ तिसरे चले ही गे थिए।

### लोक्यां रा यीशु जी जो तोपणा

<sup>22</sup> तां बाकि किशतिया तिबरियास का तिस जगहा रे नेडे आई, जिहत्थे तिहना ने प्रभु रे धन्यावाद करने रे बाद रोटी खाई थी।<sup>23</sup> इस तैई जिस वेले भीड ने दिख्खेया कि इत्ते ना यीशु है कने ना तिसरे चले, तां सेह वी किशतिया पर चढी करी यीशु जो तोपदे कफरनहूम का पूजे।<sup>24</sup> झील रे पार जिस वेले से तिस कने मिले ता बोलया, हे गुरु, तू इत्ते कुस वेले आया।

### यीशु जी जिन्दगी री रोट्टि

<sup>25</sup> यीशु ने जवाब दिता, मै तुसा कने सच-सच बोलदा तुसी मिन्जो इधरे ताई नी थे तोपदे कि तुसी मेरे चन्तकार दिखे अपण इस तैई कि तुसी रोट्टिया खाई करी रखे।<sup>26</sup> नाशवान रोटी ताई परिश्रम न करो, अपण तिस रोटी ताई जेहडा कि हमेशा री जिन्दगी तक रिन्दि, जिस जो महु रा पुत्र तुसां जो दिगां किजो कि बाबा, अपण परमेश्वर ने तिस पर अपनी मोहर लाई री है।<sup>27</sup> तिन्हा ने तिसजो बोलया, परमेश्वर रा कम्म करने ताई अस्सी क्या करीए ?<sup>28</sup> यीशु जी ने तिन्हा जो जवाब दिता; परमेश्वर रा कम्म ए है, कि तुसी तिस पर जिस जो तिन्ही भेज्या रा है, भरोसा करो।<sup>29</sup> तां तिन्हा ने तिस जो बोलया, फिरी तू कुण चिन्ह दिखान्दा है कि अस्सी उस जो दिखीकरी तुसां पर विश्वास करन ? तू कुण देय्या कम्म दसदा ?<sup>30</sup> अस्सा रे बाबे दादेया ने बणा अनदर मन्ना खाया; जियां लिख्या रा है; कि तिन्ही तिन्हा जो खाने ताई स्वर्ग री रोटी भेजी।<sup>31</sup> यीशु ने तिन्हा जो बोलया, मै तुसा जो सच-सच बोलदा कि मूसा ने तुसा जो से रोटी स्वर्ग का नी दित्ती, अपण मेरा बाबा तुस्सां सच्ची रोटी स्वर्ग का दिन्दा।<sup>32</sup> किजो कि परमेश्वर री रोटी ओ ई है, जेडी स्वर्ग का उत्तरी करी जगत जो जीवन दिन्दी।<sup>33</sup> तां तिन्हा ने बोलया, हे प्रभु ए रोटी अस्सा जो हमेसा देया कर।<sup>34</sup> यीशु ने तिन्हा जो बोलया, जीवन री रोटी मै हि है: जे मेरे का आंगा से कदी वी भूखा नी रिंगा। कने जेडा मेरे पर भरोसा करगां से कदी वी प्यासा नी रिगां।<sup>35</sup> अपण मै तुसां जो बोलदा कि तुसा ने मिन्जो दिखी वी लिख्या तां वी भरोसा नी करदे।<sup>36</sup> जे किच्छ मेरा बाबा मिन्जो दिंदा है से मेरे का आंगा, तिस जो मै कदी नी कढगां।<sup>37</sup> किजो कि मै अपनी मर्जी नी, अपण अपने भेजनेवाले री मर्जी पूरी करने ताई स्वर्ग का उतरेया।<sup>38</sup> अपण मेरे भेजनेवाले री इच्छा ए है कि जे किच्छ तिन्ही मिन्जो दिता है, उस बीच का मै किच्छ न गवांया अपण तिसजो आखिरी दिन फिरी जिन्दा करणा।<sup>39</sup> किजो कि मेरे बाबे री इच्छा ए है कि जे कोई पुत्र जो दिख्खे, कने तिस पर भरोसा रखे, से हमेसा री जिन्दगी पाये कने मै तिसजो आखिरी दिन फिर जिन्दा करगां।<sup>40</sup> फिरी यहूदी तिस पर बडबढाने लगे, इस ताई कि तिन्ही बोलया था; कि जेडी रोटी स्वर्ग का उतरी है, से मै है।<sup>41</sup> फिरी तिन्हां ने बोलया; क्या ए यूसुफ रा निक्का यीशु नी ए, जिस्स रे अम्मा बाबे जो अस्सी जाणदे ? तां फिरी ए किजो बोलदा कि मै स्वर्ग का उतरया है।<sup>42</sup> यीशु ने तिन्हा जो जवाब दित्या, कि आपु बिच मत बडबडाओ।<sup>43</sup> कोई मेरे नेडे नी आई सकदा, जा तक बाबा, जिन्नी मिन्जो भेजेया रा है, तिस जो खिची न ले; फिरी मै तिसजो आखिरी दिन फिरी जिन्दा करगां।<sup>44</sup> भविष्यवाणी करने वाले री किताब बिच ए लिखया रा है, कि से सब परमेश्वर रे पासे का सिखाए रे हौणे। जिन्नी वी बाबे का सुण्या कने सिखया, से मेरे नेडे आन्दा।<sup>45</sup> ए नी कि कुसी ने बाबे जो दिख्खेया अपण जे परमेश्वर रे पासे का है, तिन्ही ही बाबे जो दिख्खेया है।<sup>46</sup> मै तुसां जो सच-सच बोलदा, कि जे कोई भरोसा करदा है, हमेसा रा जीवन तिस्सेरा ही है।<sup>47</sup> जीवन री रोटी मै ही हैं।<sup>48</sup> तुसां रे बाबे दादेया ने जंगल मिन्ज मानचना खाया ते फिरी मरी गे।<sup>49</sup> ए से रोटी है जेडी स्वर्ग का उत्तरी है ताकि महु तिस बिच का खाए ते न मरन।<sup>50</sup> जीवन री रोटी जेडी स्वर्ग का उत्तरी से मै है। जे कोई इस रोटी जो खान्दा से सदा जिन्दा रिंगा कने जेडी रोटी मै जगत रे जीवन ताई दिगां, से मेरा मांस है।<sup>51</sup> इस पर यहूदी ए बोली करी आपु मिते लडने लगे, कि ए महु कियां अपना मांस खाने जो देई सकदा।<sup>52</sup> यिशु ने तिन्हा जो

बोलया; मै तुसा जो सच-सच बोलदा जां ताई महु रे पुत्र रा मांस नी खांगे, कने तिसेरा खुन नी पिगे, तुसा च जीवन नी है।<sup>53</sup> जे कोई मेरा मांस खान्दा, कने मेरा लहु पिन्दा है, हमेसा रा जीवन तिस्सेरा है, कने मै अन्त रे दिना फिरी तिसजो जिन्दा करणा।<sup>54</sup> किजो कि मेरा मांस सचोई इ खाणे री चीजां है कने मेरा खून सचोई पिणे पिने री चिज है।<sup>55</sup> जे मेरा मांस खान्दा कने मेरा लहु पिन्दा है, से सदा मेरे अन्दर बणी रिगां, कने मै तिस च।<sup>56</sup> जियां जिन्दे बाबे ने मिन्जो भेजया कने मै बाबे रे कारण जिन्दा है तिया ही से वी जे मिन्जो खांगा मेरे कारण जिन्दा रिंगा।<sup>57</sup> जेडी रोटी स्वर्ग का उतरी सेई है, तिस रोटी सेई नी जेडी बब-दादेयां ने खाई ते मरी गे, जे कोई ए रोटी खांगा, से हमेसा जिन्दा रिंगा।<sup>58</sup> ए गल्ला तिन्ही कफरनहूम रे ईक देहरे बिच उपदेश दिन्दे वेले बोली।<sup>59</sup> तिसरे चले बिच मत्ते जह्ने ने ए सुणी करी बोले, कि ए गल्ल मुसकल है; इस जो कुन सुणी सकदा।

### हमेसा री जिन्दगी रे वचन

<sup>60</sup> यीशु जी ने अपने मना बिच ए जाणी करी कि मेरे चले अप्पु बिच इस गल्ल पर बडबडान्दे है, तिन्हा जो पूछया क्या इस गल्ल च तुसा जो ठेस लगी।<sup>61</sup> अपण जे तुसी महु रे पुत्र जो जित्ते से पहले थिया, उत्ते का ऊपर जांदे दिखगे, ता क्या हुगां ?<sup>62</sup> आत्मा ते जिवनदायक है, शरीर कने किछ फायेदा नी: जेडी गल्ला मै तुसां जो बोली, से आत्मा है कने जीवन बी है।<sup>63</sup> अपण तुसा बिच किने इदेए हिन्' जे भरोसा नी करदे: किजोकि यिशु तां पहले का ही जाण्दे थिये कि जे भरोसा नी करदे से कुण हीन् ? ते कुण मिन्जो पकडवागां।<sup>64</sup> फिरी तिन्ही बोलया, इस ताई मै तुसां जो बोलया थिया जां ताई कुसी जो बाबे रे पासे का वरदान नि मिलगा तां ताई से मेरे का नी आई सकदा।<sup>65</sup> इसेरे बाद तिसरे चेलया बिच बडे जणे फिरी गे फिरी तिसरे बाद तिन्हा कने कोई नी चलया।

### पतरस रा विस्वास

<sup>66</sup> तां यिशु ने तिन्हा बारा जो बोलया, क्या तुसी वी चली जाना चाहदें ?<sup>67</sup> शमौन पतरस ने तिसजो जवाब दिता, कि है प्रभु अस्सी कुस का जाईए ? हमेसा री जिवन री गल्ला ता तुसा का हैं।<sup>68</sup> फिरी अस्सा ने भरोसा कित्या, कने जाणी गए हिन्, कि परमेश्वर रा पवित्र जन तू ही है।<sup>69</sup> यीशु ने तिन्हा जो जवाब दिता, कि मै तुसां बारह जो नी चुणी लिच्छेया ? तां वि तुसां मिन्ज ईक मणु शैतान है।<sup>70</sup> ए तिन्हा ने शमौन इस्करियोती रे पुत्र यहूदा रे बारे बोलया, किजो कि ए ओई बारह बिच का ईक थिया, जिनी तिस जो पकडवाणे पर थिया।<sup>71</sup> इन्हा गल्ला रे बाद यीशु जी गलील बिच फिरदे रे, किजो कि यहूदी तिन्हा जो मारणे रा मौका थे तोपदे, इस ताई से यहूदिया च फिरना नी चाहन्दे थे,

### यीशु जी ते तिन्हेरे भ्याळ

**7** फिरी यहूदियां रे मण्डपों रा त्योंहार नेडे थिया।<sup>2</sup> इस ताई तिसेरे भ्यालां ने तिस जो बोलया, अस्सा जो छडी करी यहूदिया जो चली जा, कि जेडे कम्म तु करदा ए, से तेरे चले भी दिखन्।<sup>3</sup> किजो कि इद्या कोई नी होणा जेडा मशुहर होना चाहे, फिरी छिपी करी कम्म करे: अपण तु ए कम्म करदा है, तां अपणे आप जो संसार बिच दस।<sup>4</sup> किजो कि तिसेरे भ्याल वी तिस पर भरोसा नी करदे थिए।<sup>5</sup> तां यीशु जी ने तिन्हा जो बोलया, मेरा टैम अब्बे नी आया, अपण तुसा ताई सारा टैम है।<sup>6</sup> दुनियां तुसा कने बैर नी करी सकदी, अपण से मेरे कने बैर करदा है, किजो कि मै तिसेरे खिलाफ ए गवाई दिन्दा कि तिसेरे कम्म बुरे हिन्।<sup>7</sup> तुसी त्योंहार जो जाओ, मै अब्बे इस त्योंहार नी जाणा, किजो कि अब्बे तिक्कर मेरे वक्त पूरा नी होया।<sup>8</sup> तिन्ही तिन्हा कने ए गल्ला करी के गलील अन्दर इ रहई गया।<sup>9</sup> अपण जां तिसेरे भ्याल त्योंहार जो चली गए, तां से अपु ई चुप चाप लुकदे कुकदे गया।

### झोपड़ियां रा पर्व बिच यीशु जी

<sup>10</sup> तां यहूदी त्योंहार अन्दर तिन्हा जो ए बोली करी तौपणा लगे कि से कुते है।<sup>11</sup> फिरी लोकां ने तिसेरे बारे चोरी - चोरी बडी गल्ला कित्ती; थोड़े बोलदे

थिए; से खरा मल्लु है, ते थोडे बोलदे थिए; नां से मल्लुआं जो बैहकांदा । 12 तां वि यहूदियां रे उर्रे रे मारे कोई बी मल्लु तिसेरे बारे खुली के नी बोलदा थिया। 13 फिरी जां त्योंहार रे अधे दिन बीती गे; तां यिथु देहरे अन्दर जाई करी वचन बोलणे लगे।

### पर्व बिच यीशु जी रा उपदेश

14 तां यहूदियां ने हैरान होई करी बोल्या, कि इस जो बगैर पढे इना ज्ञान कियों का आया ? 15 यीशु जी ने तिन्हा जो जवाब दित्या, कि मेरा वचन मेरा नी, अपण मेरे भेजनेवाले रा है। 16 अगर कोई तिसेरी मर्जी पर चलणा चाहे, कने तिसेरे वचन रे बारे जो जाणी जाए कि से परमेश्वर रे पासे का है या फिरी अपणे पासे का बोलदा । 17 जे कोई अपणे पासे का बोलदा से अपणी अप्पु ई बढाई करदा ; अपण जे अपणे भेजनेवाले री बढाई चाहन्दा है सेई सच्चा है, कने तिस विच अधर्म नी है । 18 क्या मुसा ने तुसां जो व्यवस्था नही दित्ती ? तां वि तुसां विच का कोई व्यवस्था पर नी चलदा। तुसी किजो मिन्जो मारना चाहन्दे। 19 लोकानं ने जवाब दिता, " कि तुसां बिच बुरी आत्मा है ! कुण तुसां जो मारणा चाहन्दा। 20 यिथु ने तिन्हा जो जवाब दित्या, कि मैं ईक कम्म कित्या, कने तुसी सारे हैरान हिन्। 21 इधरे ताई मुसा ने तुसा जो खतने रा हुक्म दित्ता (ए नी की मुसा रे पासे का अपण बाबे दादेया रे पासे का चली आई री है), फिरी तुसी सब्ब रे दिन मल्लु रा खतना करदे । 22 जां सब्ब रे दिन मल्लु रा खतना कित्ता जान्दा ताकि कि मुसा री व्यवस्था री हुक्म न टळो, तां तुसी मेरे पर किजो गुस्सा हुन्दे, कि मैं सब्ब रे रोजे ईक मल्लु जो पुरी रीती कने ठीक कित्ता। 23 मुंह दिखिकरी फैसला मत करो, अपण सही-सही फैसला करो। 24 तां किछ यरुशलम बाळे बोलणे लगे; क्या ए सेई नी, जिस जो मारने रा कोसीस करणा लपरी है

### क्या यीशु जी इ मसीह हिन ?

25 अपण दिखो, से ता खुलेआम गल्लां करदा कने कोई तिसजो किछ नी बोलदा; क्या सरदाराने -सच्ची जाणी लेया कि ऐह ई मसीह हैं। 26 इस जो ता असी जाणदे , कि ए कुते रां हैं; अपण मसीह जिस मौके आगां, तां कोई नी जाणगां कि ओ कुते रा है। 27 तां यिथु ने देहरे अन्दर वचन बोलदे होए हक देई के बोल्या, तुसी मिन्जो जाणदे कने ए वी जाणदे कि मैं कुते का हैं: मैं अपणे पास्से का नि आया अपण मेरा भेजणे वाळा सच्चा हैं, उस जो तुसी नी जाणदे। 28 मैं तिस जो जाणदा , किजो कि मैं तिसेरे पासे का है ते तिस ने मिन्जो भेज्या रा हैं। 29 इस पर तिन्हा ने उन्हा जो पकड़णा चाह्या,तां बी कुसे ने बी उन्हा पर हत्थ नी पाया किजो की तिन्हेरा वक्त हाल्ले तिकर नी आया थिय्या। 30 फिरी बी भीड़ बिच का मते लोकानं ने उन्हा पर भरोसा कित्ता,ए बोलणा लगे,"मसीह ने जां आणा तां क्या इसका बदिह करी चमत्कार दिखाणे जे इन्हा ने दिखा ए ?" 31 फरिसियां ने लोकानं जो उन्हेरे बारे बिच ए गल्लां लुकी करी करदे सुणेयां;ते प्रधान याजकां ते फरिसियां ने तिन्हेरे जो पकड़णे ताई सिपाही भेजे ।

### यीशु जी जो पकड़णे री कोसीस

32 इस पर यीशु जी ने बोल्लेया,"मैं थोड़ी होर देर तिकर तुसां कन्ने है,तां अपणे भेजणे वाळे का चली जाणा। 33 तूसी मिन्जो तोपणा,पर मैं नी मिलणा,ते जित्ते मैं है,उत्ते तूसी नी आई सकदे।" 34 इस पर यहूदियां ने अप्पु बिच बोल्लेया,"इन्हा ने कूते जाणा कि असी इन्हा जो तोपी नी सकदे ? क्या ए उन्हेरे का जागें जे युनानियां बिच तित्तर-बित्तर होई करी रहन्दे,ते युनानियां जो बी उपदेस दिगां ? 35 ए क्या गल्ल है जे उन्हा ने बोल्लि,कि 'तुसी मेरे जो तोपणा अपण नी मिलणा;ते जित्ते मैं है,उत्ते तुसी नी आई सकदे ?" 36 त्याहार रे आखरी दिन,जे खास दिन है, यीशु जी खडे होए ते हक मारी करी बोल्लेया,"जे कोई प्यासा हो तां मेरे का आए ते पिए ।

### जिन्दगी री पानी री नदियाँ

37 जे मेरे पर भरोसा करगा,जिय्यां पवित्र-साशत्र बिच लिख्खे रा है,'उसेरे दिल बिच का जिन्दगी रे पाणी री नदीयाँ फूटि निकळनी ।" 38 तिन्हा ने ए

वचन पवित्र आत्मा रे बारे बिच बोल्लेया थिया, जिस जो उन्हेरे पर भरोसा करणे वाळे पाणे वाळे थिये;किजो कि आत्मा हल्ले तिकर नी उतरेया थिया,किजो कि यीशु जी हल्ले तिकर अपणी महीमा जो नी पुजे थिये । 39 तां भीड़ बिच का कुसकी-कुसकी ने ए गल्लां सूणी करी बोल्लेया,"सच्ची ए इ भविष्यदक्ता है ।" 40 दुज्जेया ने बोल्लेया,"ए मसीह है।"अपण किछ ने बोल्लेया,"किजो ? क्या मसीह ने गलील का आंठगा ? 41 क्या पवित्रसाशत्र बिच ए नी लिख्खे रा है कि मसीह ने दाउद रे घराने ते बेतलेहम ग्राँ का आणा,जित्ते दाउद रहन्दा थिया ?" 42 अते तिन्हेरी वजह कने लोका बिच फूट पेइ गई। 43 तिन्हा बिच का किछ उन्हेरे जो पकड़णा चाहदें थिये,अपण कुसकी ने उन्हा पर हत्थ नी पाया । 44 तां सिपाही प्रधान याजकां ये फरीसियां का हटी आए,"तिन्हा ने उन्हा जो बोलेया,"तुसी उन्हा जो किजो नी लयाए ?"

### यहूदी अगुवां रे विस्वास री कमी

45 सिपाहइयां ने जवाब दित्ता,"कुसकी मल्लु ने कदी इदेई गल्लां नी कित्ती।" 46 फरिसियां ने तिन्हा जो जवाब दित्ता," क्या तुसी बी बैहकी गे ? 47 क्या सरदाराने ते फरिसियां बिच का कुसकी ने बी उन्हेरे पर भरोसा कित्ता है ? 48 अपण ए मल्लु जे व्यवस्था नी जाणदे श्रापित हिन्। 49 नीकुदेमुस ने,जे पेट्ले तिन्हेरे का आया थीया ते तिन्हेरे बिच का इक थिया,तिस ने बोल्लेया, 50 क्या असां री व्यवस्था कुसकी मल्लु जो,जां तिकर पैह्ले उसेरी सुणी करी जाणी ना ले कि ओ क्या करदा,गलत ठहरादी ? 51 तिन्हा ने उन्हेरे जो जवाब दित्ता,"क्या तुसी बी गलील रे हिन् ?तोप्यो ते दिख्खो कि गलील का कोई भविष्यदक्ता नी बणी सकदा।" 52 तां सारे जणे अपणे-अपणे घरा जो चली गे । 53 फिरी यीशु जेतून रे पहाड जो गे।

### जिस्म रा धधां करणे वाळी जनानी जो माफी दैगा

8 कने भ्यागा से फिरी देरे च आया, ते सारे मणु तिसका आए; कने से बई करी तिन्हा जो उपदेश दैणे लगया। 2 तां शास्त्री कने फरीसी ईक जनानी जो लयाये, जे व्यभिचार करदे पकड़ीत्ती थी, अत्ते तिस जो मझाटे खड़ा करी के यीशु जी जो बोल्लेया। 3 ओ गुरु, एह जनानी व्यभिचार करदे पकड़ीत्ती। 4 व्यवस्था बिच मूसा ने असां जो हुकम दित्तेया है कि इदेई जनानी जो पत्थर कने मारो: तुसी इस जनानी रे बारे बिच क्या बोलदा है 5 तिन्हा ने तिस जो परखने ताई ए गल्ल बोली ताकी तिस पर कोई दोष लागाई सकन, अपण यीशु झुकी करी उंगली कने जमीन पर लिखणा लगया। 6 जां से तिस का पुछदे रे, तां तिन्ही सिधे होई करी तिन्हा जो बोल्लेया, कि तुसां रे बिच का कुन बगैर पाप रे है, सेई पहले इस जो पत्थर मारो। 7 कने फिरी झुकी करी धरती पर लिखने लगया। 8 अपण ए सुणी करी बड्यां का लेई करी हल्ले तक ईक-ईक करी के निकळी गए, कने यीशु कलां रेई गया, कने सेई जनानी बिच खडी रेई गई। 9 यिथु ने सिधे होई करी तिस का पुछ्या, ओ जनानी से कुत्ते गए ? क्या कुसी ने बी तीजो सजा नी दित्ती। 10 तिन्ही बोल्लेया, हे प्रभु, कुसी ने नी: यीशु ने बोलया, मैं वी तिजो सजा नी दिन्दा; जा, कने फिरी पाप मत करदी। 11 तां यीशु ने तिन्हा मणुआं जो बोल्लेया, जगत री लौं मैं हा ; जे कोई मेरे पिछे चलगां, से नेहरे च नी चलगां, अपण जीवन री लौं पांगा।

### यीशु जी जगत री रौसनी

12 फरिसियों ने तिस जो बोल्लेया; तू अपनी गवाही आपु दिन्दा ; तेरी गवाही ठीक नी। 13 यीशु ने तिन्हा जो जवाब दित्या; कि जे मैं अपनी गवाही आपु दिन्दा हां, तां वि मेरी गवाही ठीक हैं, किजो कि मैं जाणदा, कि मैं कुते का आया कने कुते जो जान्दा ? अपण तुसी नी जाणदे कि मैं कुते का आन्दा कने कुतें जो जान्दा। 14 तुसी शरीर रे अनुसार न्याय करदे हिन; मैं कुसी रा न्याय नी करदा। 15 अपण जे मैं न्याय करा वी, तां मेरा न्याय सच्चा हैं; किजो कि मैं कलां नी, अपण मैं ए, कने बाबा है जिन्ही मिन्जो भेजया। 16 कने तुसां री व्यवस्था च वी लिख्खेरा हैं; कि दो जनया री गवाही मिली करी ठीक हुन्दी हैं। 17 इक ते मैं आपु अपनी गवाही दिन्दां हां, कने दुजा बाबा मेरी गवाही

दिन्दा हँ जिन्ही मिन्जो भेजयां। 18 तिन्हा ने उन्हेरे जो बोलेया, "तुसां रा प्यो कुते है?" यीशु जी ने जवाब दित्ता, "ना तुसी मेरे जो जाणदे, ना मेरे प्यो जो, जे अगर मेरे जाणदे तां मेरे प्यो जो बी जाणदे।" 19 ए गल्ला तिन्ही देरे च उपदेश दिन्दे होए भण्डार घर च बोली, कने कुसी ने तिस जो नी पकड़या; किजो कि तिसेरा अब्बे टैमं नी आया थिया। 20 तिन्ही फिरी तिन्हा जो बोल्या, मैं जान्दा ते तुसा ने मिन्जो तोपणा कने अपणे पाप च मरणा: जित्थे मैं जादां उथे तुसी नी आई सकदे।

### अपणे बारे बिच यीशु जी इक्क गल्ल

21 इस पर यहूदियां ने बोल्या, क्या से अपने आप जो मारी दिंगा, जो से बोलदा हँ, कि जित्ते मैं जान्दा हां उते तुसी नी आई सकदे 22 तिन्ही तिन्हा जो बोल्या, तुसी निचे का हीन, मैं ऊपर का; तुसी संसार दे हीन, अपण मैं संसार नी है। 23 इस ताई मैं तुसां जो बोलदा, कि तुसी अपने पाप च मरणा; किजो कि जें तुसी भरोसां नी करगें कि मैं सेई हँ, तां तुसी अपणे पाप च मरगें। 24 तिन्हां ने तिस जो बोल्या, तु कुण है? यीशु ने तिन्हा जो बोल्या, मैं सेई हँ जेडा शुरु का तुसां जो बोलदा आए रा ऐ। 25 तुसां रे बारे च मिन्जो बडा किछ बोलणा हँ कने फैसला करना हँ अपण मिन्जो भेजनेवाला सच्चा हँ; कने जे किछ मैं तिसका सुणेया, सेई संसार च बोलदा। 26 से न समझे कि असां जो बाबे रे बारे च दसदां है। 27 तां यीशु ने बोलया, कि जां तुसी मणु रे पुत्र जो ऊचें पर चढांगे, तां जाणगें कि मैं सेई हँ, कने अपने आप का कुछ नी करदा, अपण जियां बाबा मिन्जो सिखान्दा, सेई गल्ला मैं बोलदा। 28 कने मेरा भेजणे वाळा मेरे कने है; तिन्ही मिन्जो कल्ला नी छडेया; किजो कि मैं सदा सेई कम्म करदा, जिस का से खुश हुन्दा। 29 ओ ए गल्लां बोलेया ई करदे थिये कि मते जणेया ने तिन्हा पर भरोसा कित्ता। 30 तां यीशु जी ने तिन्हा यहूदियां कने जिन्हा ने तिन्हा पर भरोसा कित्ता थिया, बोलेया, "जे तुसी मेरे वचन बिच बणी रहन्गे, तां हकीकत बिच मेरे चेले ठैहरगे।

### सच ने तुसां जो अजाद करणा

31 तुसी सच जो जाणना, ते सच्चाई ने तुसां जो अजाद करणा।" 32 तिन्हा ने उन्हा जो जवाब दित्ता, "असी ता अब्राम रे वशं का हिन, ते कदी कुसकी रे गुलाम नी होए। फिर तुसी किय्यां बोलदे की तुसी अजाद होई जाणा?" 33 यीशु जी ने तिन्हा जो जवाब दित्ता, "मैं तुसां जो सच बोलदा कि जे कोई पाप करदा से पाप रा गुलाम है। 34 गुलाम हमेशा घरे नी रहन्दा; पुत्र हमेशा रहन्दा। 35 इस ताई जे पुत्र तुसा जो अजाद करगा, तां सच्ची तुसी अजाद होई जाणा। 36 मैं जाणदा कि तुसी अब्राम रे वशं का हिन; तां बी मेरा वचन तुसां रे दिल बिच जगह नी पादां, इस ताई तुसी मेरे जो मारी रखणा जादें। 37 मैं सेई बोलदा, जे अपणे प्यो रे इत्ते दिखे रा है; ते तुसी सेई करदे रहन्दे जे तुसी अपणे प्यो का सुणे रा है।" 38 तिन्हा ने उन्हेरे जो जवाब दित्ता, "असां रा प्यो ता अब्राम है।" यीशु जी ने तिन्हा जो बोलेया, "जे अगर तुसी अब्राम री औळाद हुदें, तां अब्राम रे साई कम्म करदे। 39 अपण अवे तुसी मेरे जदेय म्हणु जो मारी रखणा चाहदें जिन्हे तुसां जो ओ सच्चि गल्ल दस्सि जे परमेश्वर का सुणेया; इदेया तां अब्राम ने नी कित्ता थिया। 40 तुसी अपणे प्यो साई कम्म करदे।" तिन्हा ने उन्हेरे जो बोलेया, "असी हल्ड नी जम्मे, असां रा इक्क प्यो है मतलब परमेश्वर। 41 यीशु जी ने तिन्हा जो बोलेया, "जे परमेश्वर तुसां रा प्यो हुदां, तां तुसि मेरे कने प्यार करदे किजो की मैं परमेश्वर रे पाससे का आए रा है। मैं अप्पु नी आया, अपण तिन्हा ने ही मेरे जो भेजेया। 42 तुसी मेरी गल्ल किजो नी समजदे? इस ताई किजो की तुसी मेरा वचन सुणी नी सकदे। 43 तुसी अपणे प्यो सैतान का हिन ते अपणे प्यो री मर्जी जो पूरा करणा चाहदें। ओ ता हमेशा का ई खुनि है ते सच्चाई पर टिकेया नी किजोकी सच्चाई तिस बिच है ही नी। जां ओ झूट बोलदा, तां अपणी आदत कने ई बोलदा।" किजोकी ओ झूटा है बल्कि झूट रा प्यो है। 44 अपण मैं जे सच बोलदा, इस ताई तूसी मेरा भरोसा नी करदे। 45 तुसां बिच कुण मेरे जो पाप्पि ठैहरादा? जे मैं सच बोलदा तां तुसी मेर भरोसा किजो नी करदे? 46 जेडा परमेश्वर का हुदां, से परमेश्वर री गल्लां सूपदा। ते तुसी इस ताई नी सुणदे किजो की परमेश्वर रे पाससे का नी हिन। 47 ए सूणी करी यहूदियां ने तिन्हा जो

बोलेया, "क्या असी ठिक नी बोलदे कि तु सामरी है, ते तेरे बिच बुरी आत्मा ह

### यीशु जी ते अब्राहम

48 यीशु जी ने जवाब दित्ता, "मेरे बिच बुरी आत्मा नी; अपण मैं प्यो री इज्जत करदा ते तुसी मेरी बेज्जति करदे। 49 अपण मैं अपणी बडाई नी चाहदां, इक्क है जे चाहदां ते ईसांफ करदा। 50 मैं तुसां कन सच-सच बोलदा कि जे कोई म्हणु मेरे गलाए पर चलदा तां उन्निए कदी बी मौत जो नी दिखणा।" 51 यहूदियां ने तिन्हा जो बोलेया, "अवे असी जाणी लिक्ता की तेरे अन्दर बुरी आत्मा है। अब्राहम मरी गया, ते भविष्यद्वक्ता बी मरी गे; ते तुसी बोलदे जे कोई मेरे गलाए पर चलगा तां उन्निये कदी बी मौत रा स्वाद नी चखणा।" 52 असां रा प्यो अब्राहम ता मरि गया, क्या तुसी उसका बड्डे हिन? ते भविष्यद्वक्ता बी मरी गे। तुसी अपणे आप जो क्या दसदा?" 53 यीशु जी ने जवाब दित्ता, "जे मैं अप्पु अपणी बडाई करां, तां मेरी महीमा किछ नी; अपण मेरी महीमा करणे वाळा मेरा प्यो है, जिस जो तुसी बोलदे कि तुसां रा परमेश्वर है। 54 तुसी तां उन्हा जो नी जाणेया: अपण मैं तिन्हा जो जाणदा। जे मैं बोलां कि मैं तिन्हा जो नी जाणदा, तां मैं तुसां साई झूटा ठैहरणा; अपण मैं तिन्हा जो जाणदा ते तिन्हेरे गलाए पर चलदा। 55 तुसां रा प्यो अब्राहम मेरे दिन दिखणे ताई उम्मीद कने बडा भारी मगन थिया; ते उन्निए दिखेया ते बडा खुस होया।" 56 यहूदियां ने तिन्हा जो बोलेया, "हल्ले तिकर तुसी पजां साले रे बी नी हिन, फिरी बी तुसी अब्राहम जो दिखे रा है?" 57 यीशु जी ने तिन्हा जो बोलेया, "मैं तुसां जो सच-सच बोलदा, कि पैहले इसेरे कि अब्राहम पैदा होया, मैं थिया।" 58 तां तिन्हा ने उन्हेरे जो मारणे ताई बट्टे चुक्के, अपण यीशु जी लुकी करी देहरे का निकळी गे। 59 फिरी जान्दे होए तिन्हा ईक मणु जो दिखेया, जे जन्म का अन्धा थिया।

### जन्म रे अन्ने री हाक्खियां ठीक करणा

9 कने तिसेरे चलेया ने तिस जो पुछ्या, हे गुरु, कुनी पाप कित्या थिया कि ए अन्धा जमित्या, इस महणु ने, या इसेरे अम्मा बाबे ने? 2 यीशु जी ने जवाब दित्ता, "ना ता इनिए पाप कित्ता थिकने तिसेरे चलेया ने तिस जो पुछ्या, हे गुरु, कुनी पाप कित्या थिया कि ए अन्धा जमित्या, इस मणु ने, या इसेरे अम्मा बाबे ने? थ्या, ना इसेरे माँ-प्यो ने; अपण ए इस ताई होया ताकी परमेश्वर रे कम्म इस बिच प्रकट होन। 3 जां ताई मैं दुनियां बिच है, तां ताई दुनियां री लौं है 4 जां ताई मैं दुनियां बिच है, तां ताई दुनियां री लौं है।" 5 ए बोल्किरी उन्हा ने जमीन पर थूक्रेया, ते तिस थूक कने मिट्टी सेडी, ते से मिट्टी तिस अन्ने री हक्खां पर लाई करी 6 तिस जो बोलेया, "जा, शिलोह रे तलाब बिच धोई लेय" (शिलोह रा मतलब 'भेजे रा' है)। उन्निए जाई करी धोया, ते दिखदे-दिखदे हटी आया। 7 तां पडोसी ते जिन्हा ने पैहले तिस जो भिख मगदे दिखेया थिया, बोलणा लगे, "क्या ए ओ इ नी, जे बैई करी भिख मगंया करदा थिया?" 8 किछ लोकां ने बोलेया, "ए ओ इ है," दुजेयां ने बोलेया, "नी, अपण तोस साई है।" उन्निए बोलेया, "मैं ओ इ है।" 9 तां से तिस जो पुछणा लगे, "तेरी हक्खां किय्यां खुली गई?" 10 उन्निए जवाब दित्ता, "यीशु ना रे इक्क म्हणु ने मिट्टी सेडी ते मेरी हक्खां पर लाई करी मेरे जो बोलेया, "शिलोह बिच जाई करी धोई ले, अते मैं गया ते धोया ते दिखणा लगेया।" 11 तिन्हा ने तिस जो पुछेया, "ओ कूते हिन?" उन्निये बोलेया, "मेरे जो नी पता।" 12 मणु तिस जो जे पैहले अन्ना थिया फरिसियां का लेई गे।

### फरिसी लोक यीशु जी ठीक कित्ते रे लोकां री जाँच-पड़ताळ करदे

13 जिस दिन यीशु जी ने मिट्टी सेडी करी तिसेरी हक्खां खोल्लि थियां, से सब्त रा दिन था। 14 फिरी फरिसियां ने बी तिस जो पुछेया कि तिसेरी हक्खां कुस तरिके कने खुली गई। तिसिने उन्हा जो बोलेया, "तिन्हा ने मेरी हक्खां पराले मिट्टी लाई, फिरी मैं से धोई लिक्ती, तेन अवे दिखदा।" 15 इस पर किछ फरिसी बोलणा लगे, "ए म्हणु परमेश्वर रे पाससे का नी, किजोकी ओ सब्त रा दिन नी मनदा।" दुजेयां ने बोलेया, "पाप्पि म्हणु इदेय चमत्कार किय्यां दिखाई सकदा?" अते तिन्हा बिच फूट पेइ गे। 16 तिन्हा ने तिस अन्ने



जो फिरी बोलेया, "तिन्नि ए तेरी हक्खाँ खोली। तू तिसेरे बारे बिच क्या बोलदा?" तिन्नि ए बोलेया, "ए भविष्यद्वक्ता है।" 17 अपण यहूदिया जो भरोसा नी होया कि से अन्ना थिय्या ते अवे दिखदा, जा ताई तिन्हा ने तिसेरे, जिसेरी हक्खाँ खुली गई री थी, माँ-प्यो जो सदी करी 18 तिन्हा का ना पुछ्छेया, "क्या ए तुसां रा पुत्तर, जिसजो तुसी बोलदे कि अन्ना जम्मेया थिय्या? फिरी अवे ए किय्यां दिखदा?" 19 तिसेरे माँ-प्यो ने जवाब दित्ता; अस्सी ता जाणदे कि ए अस्सां रा पुत्तर है ते अन्ना जम्मेया थिया; 20 अपण अस्सी ए नी जाणदे कि अवे किय्यां दिखदा, ते ना इ ए जाणदे की कुन्निए इसेरी हक्खाँ खोली। ओ समजदार है, तिसका इ पुछ्छि लयो; ओ अपणे बारे बिच अप्पु इ बपल्लि लिगां। 21 ए गल्लां तिसेरे माँ-प्यो ने इस ताई बोलि किजोकी से यहूदियां का डरदे थिय्ये, किजोकी यहूदी इक्क पाससे होई गे रे थिय्ये कि जे कोई बोले कि ओ मसीह है, तां देहरे बिच का कड्डेया जाए। 22 इस ताई तिसेरे माँ-प्यो ने बोलेया, "ओ समजदार है, तिस जका इ पुछ्छि लयो।" 23 तां उन्हा ने तिस म्हणु जो जे अन्ना थिय्या, दुई बारी सद्धि करी तिस जो बोलेया, "परमेश्वर री महीमा कर। असी तां जाणदे कि ओ म्हणु पाप्पि है।" 24 उन्निए जवाब दित्ता, "मै जाणदा कि ओ पाप्पि है या नी; मै इक्क गल्ल जाणदा कि मै अन्ना थिय्या ते अवे दिखदा।" 25 तिन्हा ने तिस जो फिरी बोलेया, "उन्निए तेरे कने क्या कित्ता? ते किय्यां तेरी हक्खाँ खोली?" 26 तिन्हा उन्हा जो बोलेया, "मै तां तुसां जो बोलि बैठा, ते तुसी नी सुणेया; अवे दुई बारी किजो सुणणा चाहदे?" क्या तूसी बी उन्हेरे चेले बनणा चाहदे?" 27 तां से तिस जो बुरा भला बोलणा लगे, "तु ई तिन्हेरा चेला है, अस्सी तां मुसा रे चेले हिन। 28 अस्सी जानदे कि परमेश्वर ने मुसा कने गल्ला कित्ती; अपण इस म्हणु जो नी जाणदे कि ए कुते रा हैं।" 29 उन्निए तिन्हेरे जो जवाब दित्ता, "ए ता हरानी वाळी गल्ल है कि तूसी नी जाणदे कि ओ कुते रा हैं, तां बी तिन्हा ने मेरी हक्खाँ खोली दित्ति। 30 अस्सी जाणदे कि परमेश्वर पाप्पियां री नी सुणदा, अपण जे कोई परमेश्वर रा भक्त हो, ते तिन्हेरी मर्जी पर चलदा हो, तां ओ तिन्हेरी सुणदा। 31 दुनिया री सुरुआत का ए कदी सुनणे बिच नी आया कि कुसकी ने जन्म रे अन्ने री हक्खाँ खोली होन। 32 जे ए म्हणु परमेश्वर रे पाससे का नी हुन्दा, तां किछ्छ बी नी करी सकदा।" 33 तिन्हा ने तिस जो जवाब दित्ता, "तु तां बिलकुल पाप्पां बिच जम्मे रा है, तु अस्सा जो क्या सिखान्दा?" ते तिन्हा ने तिस जो बाहर कड्डि दित्ता। 34 यीशु जी ने सुणेया कि उन्हा ने तिसजो बाह कड्डि दित्ते रा है, ते जां तिस कने मूलाकात होई तां बोलेया, "क्या तू परमेश्वर रे पुत्तर पर भरोसा करदा?"

### आत्मा रा अन्नापण

35 उन्निए जवाब दित्ता, "हे प्रभु, से कुण है, कि मै तिस पर भरोसा करां?" 36 यीशु जी ने तिस जो बोलेया, "तैं तिस जो दिख्खे रा बी है, ते जे तेरे कने गल्लां करया करदा है, से ओ ई है।" 37 उनिये बोलेया, "ओ प्रभु, मै भरोसा करदा।" ते तिन्हा जो प्रणाम कित्ता। 38 तां यीशु जी ने बोलेया, "मै इस दुनियां बिच ईसाफ करणे ताई आए रा है, ताकी जे नी दिखदे से दिखन, ते जे दिखदे से अन्ने होई जान।" 39 जे फरिसी उन्हेरे कने थिय्ये तिन्हा ने ए गल्लां सूणी करी तिन्हा जो बोलेया, "क्या असी बी अन्न हिन?" 40 यीशु जी ने तिन्हा जो बोलेया, "अगर तुसी अन्ने हुदें तां पाप्पि नी मन्ने जादें; अपण अवे बोलदे कि असी दिखदे, इस ताई तुसां आ पाप बणी रहन्दा। 41 मै तुसां जो सच-सच बोलदा कि जे कोई दरवाजे का गुआड़ बिच नी बड़दा, अपण कुसकी दुए पाससे का चउदा, ओ चोर ते डाक्कु है।

### पुहाळ ते भेडां रा उदारण

10 अपण जे दरवाजे का अन्दर जान्दा ओ भेड्डां रा पूहाळ हैं। 2 तिसेरे ताई पैहरेदार दरवाजा खोळि दिदां, ते भेडां तिसेरी अवाज सुणदी, ते ओ अपणी भेडां जो नां लेइ-लेइ करी सददा ते बार लेई जादां। 3 जिस वेले ओ अपणी सारी भेडां जो बार कड्डि बैहन्दा, तां तिन्हेरे आगे-आगे चलदा, ते भेडां तसरे पिच्चे-पिच्चे चली पैदीं, किजोकी से तिसेरी अवाज पैहचाणदी। 4 अपण तिन्हा ने पराए का नी जाणा, अपण तिसका नहसणा किजोकी से पराए री अवाज नी पैहचाणदी।" 5 यीशु जी ने तिन्हेरे कने ए उदारण बोलेया

अपण से नी समजे की ए क्या गल्लां हिन जे से असां कने बोलदे। 6 तां यीशु जी ने फिरी तिन्हा कने बोलेया, "मै तुसां कने सच-सच बोलदा भेडां रा दरवाजा मै है।

### यीशु जी अच्छे चरवाहे

7 जिन्ने मेरे का पैह्ले आए से सारे चोर ते डाक्कु हिन अपण भेडां ने तिन्हेरी नी सूणी। 8 दरवाजा मै है; जे अगर कोई मेरे का अन्दर आए, तां छुटकारा पाणा, ते अन्दर बार आया जाया करणा ते चारा पाणा 9 चोर कुसकी होर कम्म ताई नी अपण सिर्फ चोरी करणे ते मारणे ते तबाह करणे ताई आदां; ऐ इस ताई आया की ओ जिन्दगी पाण ते रज्जि करी पाण। 10 खरा पुहाळ मै है; खरा पुहाळ अपणी भेडां ताई अपणी जान दिदां। 11 मजदूर जे ना पुहाळ है ते ना ई भेडां रा माळक है, भेड्डिए जो आदां दिख भेडां जो छड्डि करी न्हसी जादां; ते भेड्डिया तिन्हा जो पकड़दा ते तिन्हा जो बिखेरी दिदां। 12 ओ इस ताई न्हसी जादां की ओ मजदूर है, ते तिसजो भेडां री फिक्र नी। 13 खरा पुहाळ मै है; मै अपणी भेडां जो जाणदा, ते मरी भेडां मेरे जो जाणदी। 14 जिन्नां प्यो मेरे जो जाणदा ते मै प्यो जो जाणदा-ते मै भेडां ताई अपणी जान दिदां। 15 मेरी होर बी भेडां हिन, जे इस गुआड़ री नी हिन। मेरे जो तिन्हा जो बी लाणा जरुरी है। तिन्हा ने मेरी अवाज सुणनी, तां इक्क इ झुडं ते इक्क इ पुहाळ होणा। 16 प्यो इस ताई मेरे कने प्यार करदा किजोकी मै अपणी जान दिदां कि फिरी तिसजो लेई लयां। 17 कोई तिसजो मेरे का खुसदा नी, बल्कि मै अप्पु ई तिसजो दिदां, मेरे जो तिसजो देणा रा बी हाक्क है, ते तिसजो फिरी लेई लैणे रा बी हाक्क है: ए हुक्म मेरे जो मेरे प्यो का मिल् री है।" 18 इन्हा गल्लां री वजह कने यहूदियां बिच फिरी फुट पेड़। 19 तिन्हा बिच का मते सारे बोलण लगे, "तिन्हा बिच बुरी आत्मा है, ते से पागल हिन तिन्हेरी किजो सुणदे?" 20 होर लोक्कां ने बोलेया, "ए गल्लां इदेय म्हणु री नी जिसेरे बिच बुरी आत्मा हो। क्या बुरी आत्मा अन्नेयां री हाक्खि खोली सकदी?" 21 यरुशलेम बिच स्थापना रा त्याहार मणायया जाया करदा थिय्या, "सर्दियां रा मौसम थिय्या।

### यहूदियां रे भरोसे रे कमी

22 यीशु जी देहरे बिच सुलेमान रे डैवड़ी पर घुम्मेया करदे थिय्ये। 23 तां यहूदियां ने तिन्हा जो घेरी लिक्ता ते पुछ्छेया, "तुसी असां रे मन जो कधाडी तिकर उलझणा बिच पाई रखणा? जे अगर तुसी मसीह हिन तां असां कने साफ-साफ बोलि देयो।" 24 यीशु जी ने तिन्हा जो जवाब दित्ता, "मै तुसां जो बोलि दित्ता पर तुसी भरोसा ई नही करदे। जे कम्म मै अपणे प्यो रे ना कने करदा ओ इ मेरे गुआह हिन, 25 अपण तुसी इस ताई भरोसा नी करदे किजोकी मेरी भेडां बिच का नी हिन। 26 मेरी भेडां मेरी अवाज सुणदी; मै तिन्हा जो जाणदा, ते ओ मेरे पिच्चे पिच्चे चलदी; 27 ते मै तिन्हा जो हमेशा री जिन्दगी दिदां। से कदी बी बर्बाद नी होणे, ते कोइ तिन्हा जो मेरे हाथ्य का नी खुस्सि सकदा। 28 मेरा प्यो जिन्हा ने तिन्हेरे जो मेरे जो दित्ते रा है, अब का बड्डा है ते कोई तिन्हा जो प्यो रे हाथ्य का छिन्नि नी सकदा। 29 मै ते प्यो इक्क हिन।" 30 यहूदियां ने तिन्हा पर बट्टे मारणे ताई फिरी बट्टे चुक्के। 31 इस पर यीशु जी ने तिन्हा जो बोलेया, "मै तुसां जो अपणे प्यो रे पाससे का मते सारे खरे कम्म दिखाए रे हिन; तिन्हा बिच का कुस्स कम्म ताई तुसी मेरे जो बट्टे मारदे?" 32 यहूदियां ने तिन्हा जो जवाब दित्ता, "खरे कम्म ताई असी तुस जो बट्टे नी मारदे अपण परमेश्वर री बेजती करणे री वजह; ते इस ताई की तुसी म्हणु होई करी अप्पु जो परमेश्वर बणादां।" 33 यीशु जी ने तिन्हा जो जवाब दित्ता, "क्या तुसां री व्यस्था बिच नी लिख्खे रा है, 'मै बोलेया, तुसी इश्वर हिन,'? 34 जे अगर तिन्हा जो इश्वर बोलेया जिन्हेरे का परमेश्वर रा वचन पुजेया (ते पवित्र-शास्त्र री गल्ल झुट नी होई सकदी), 35 तां जिसजो प्यो ने पवित्र ठैहराई करी दुनिया बिच भेजेया, तुसी उसजो बोलदे, 'तु बेजती करदा; इस ताई कि मै बोलेया, 'मै परमेश्वर रा पुत्तर है?' 36 जे मै अपणे प्यो रे कम्म नी करदा, तां मेरा भरोसा मत करो। 37 अपण जे अगर मै करदा तां चाए मेरा भरोसा ना बी करो अपण उन्हा कम्मां रा ता भरोसा करो, ताकी तुसी जाणो ते समजो की प्यो मेरे बिच है ते मै प्यो बिच।" 38 तां तिन्हा ने फिरी तिन्हा जो पकड़ने री कोसीस किक्ती अपण ओ तिन्हेरे हथ्यां का निकळी गे।

39 फिरी से यरदन रे पार तिस जगह पर चली गे जित्ते युहन्ना पैह्ले बपतिस्मा देया करदा था, ते उक्ते ई रेया। 40 मते सारे लोक तिन्हरे नेड़े आई करी बोलदे थे, "यूहन्ना ने ता कोई चमत्कार नी दिखाया, अपण जे किछ यूहन्ना ने इन्हरे बारे बिच बोलेया थिय्या, से सारा किछ सच थिय्या।" 41 ते उक्ते मते लोकां ने यीशु जी पर भरोसा कित्ता। 42 मरियम ते उसदी भैण मार्था रे ग्रा बैतनियाह र लाजर ना रा इक्क मणु बिमार थिया।

### लाजर री मौत

11 ऐ औ ई मरियम थी जिन्नये प्रभु रे पैरां पर इत्र पाइ करी उन्हेरे पैरां जो अपणे बाळां कने पुन्जेया थिया, इसेरा ई भाई लाजर बिमार थिया। 2 अते उसेरी भैण ने उसजो कहळाई भेजेया, "हे प्रभु, दिख, जिसजो तु चाहदां, औ बिमार है।" 3 ऐ सुणीकरी यीशु ने बोलेया, "ऐ बिमारी मरणे ताई नि; अपण परमेश्वर री महिमा (बढाई) ताई है, कि उस कने (उसदे जरिए) परमेश्वर रे पुत्र री बढाई हो।" 4 यीशु मार्था, मरियम ते लाजर जो प्यार करदा था। 5 फिरी जां उन्निये सुणेया कि औ बिमार है, तां जिस जगह पर औ थिया, उक्ते दो दिनां ताईए होर रुकि गया। 6 इसदे बाद उन्निये चलेयां जो बोलेया, "आओ, असी फिरी यहुदिया जो चलदे।" 7 चलेयां ने उसजो बोलेया, "हे गुरु, अब्बे ता यहुदी तेरे पर पत्थर सुटणा चाहदें, ते क्या तु फिरी बी उक्ते ही जादा?" 8 यीशु ने उत्तर दित्तेया, "क्या दिन रे बारा घटें नि हुदें? अते जे कोई दिन अन्दर चळे तां औ ठोकर नि खादां, किजोकी इस दुनिया रा उजाळा दिखदा। 9 अपण जे कोई रात्ति चले ताम उसजो ठोकर लगदी, किजोकी उस अन्दर रौशनी नि है।" 10 उन्निये ऐ गल्लाम बोली, अते इसदे बाद उनां जो बोळणा लगेया, "असां रा दोस्त लाजर सोई गैरा है, अपण मै उसजो जगाणे जाया करदा है।" 11 तां चलेयां ने उसजो बोलेया, हे प्रभु, जे ओ सोई गैरा है, तां उन्निये ठीक बि होइ जाणा। 12 यीशु ने उसेरे मरणे रे बारे विच बोलेया थिया, अपण औ समजे की निद्रं कने सोणे रे बारे विच है बोळदा। 13 तां यीशु ने उनां जो साफ साफ दस्सि दित्तेया, "लाजर मरी गेरा है; 14 ते मै तुम्हारी वजह कने खुश है कि मै उक्ते नि थिया जिस कने तुसि भरोसा करो, अपण अवे आओ, असी उसका चले। 15 तां थोमा ने जे दिदुमुस कहलादां, अपणे साथी चलेयां जो बोळदा, "आओ, असी बि उस कने मरणे जो चलदे।" 16 उक्ते पुजणे पर यीशु जो ऐ पता चलेया कि लाजर जो कब्र विच रखे चार दिन होई गे रे हिन।

### यीशु जी, पुनरुत्थान ते जिन्दगी

17 बैतनियाह यरुशलम रे नेड़े कोई चार मील री दुरी पर थिया। 18 मते सारे यहुदी मार्था ते मरियम जो उन्हेरे भाई रे मरणे पर शान्ति देणे ताई आए रे थिये 19 जां मार्था ने यीशु रे आणे री खबर सुणी तां उसजो मिळणे जो गयी, अपण मरियम घरे ही बेई रई। 20 मार्था ने यीशु जो बोलेया, हे प्रभु, जे तु इक्ते हुन्दा, तां मेरा भाई कदी नि मरदा। 21 ते अब्बे बि जाणदि कि जे किछ तु परमेश्वर का मणगा, परमेश्वर ने तेरे जो देणा। 22 यीशु ने उसजो बोलेया, "तेर भाई फिरी जिन्दा होई जाणा। 23 मार्था ने उसजो बोलेया, "मै जाणदी कि आखिरी दिन विच पुनरुत्थान रे वेले उन्निये फिरी जिन्दे होई जाणा।" 24 यीशु ने उसजो बोलेया, "पुनरुत्थान ते जिन्दगी मै इ है; जै कोई मेरे पर भरोसा रखदा, औ मरी बि जाए तां बि जिगां (जिणा), 25 और जे कोई जिन्दा है ते मेरे पर भरोसा रखदा उन्निये कदि नि मरणा। क्या तु इस गल्ल पर भरोसा करदी?" 26 उन्निये उसजो बोलेया, "हाँ हे प्रभु, मै भरोसा करदि कि परमेश्वर रा पुत्र मसीह जे धरती पर आणे वाळा थिया, ओ तु इ है।" 27 ऐ बोळि करी औ चली गई, ते अपणी भैण मरियम जो सद्दि करि चुपचाणे दस्सेया, "गुरु इत्ते ई है ते तेरे जो सद्देया करदा है।"

### यीशु जी रा रोणा

28 ऐ सुणदे औ झटपट उठीकरी उसका आई। 29 यीशु हल्ले ग्रां विच नि पुज्जेया थिया अपण उसी जगह पर थिया जित्ते मार्था उसजो मिल्लि थी। 30 तां जे यहुदी उसेरे कने घर अन्दर थिये ते तिसजो शान्ति थिये दिए करदे, ऐ दिखि करि कि औ झटपट उठी करि बार जो गे रि है समझे कि औ कब्र

† पुनरुत्थान दुबारा जिन्दे होणा to be resurrected again

पररोणे जो जाया करदि है, इस ताँईए उसदे पिच्छे चलि गे। 31 जां मरियम उक्ते पुज्जि जित्ते यीशु थिया, ताँ उसजो दिखदे कने ही उसदे पैरां पर पेई गई ते बोळणा लग्गि, हे प्रभु, जे तु इक्ते हुन्दा ताँ मेरा भाई नी मरदा।" 32 जां यीशु ने उसजो ते उनां यहुदियां जो जे उस कने आए रे थिए, राँदें दिखेया, ताँ आत्मा विच बडा भारी उदास ते भावुक होई गया, 33 ते बोल्या, "तुसाँ ने उस जो कुते रखे रा है?" उनां ने उस जो बोल्या, "हे प्रभु, चली करि दिखि ले।" 34 यीशु रोया। 35 ताँ यहुदी बोळणा लगे, "दिखो, औ उस कने किन्ना प्यार करदा थिया। 36 अपण उनां विच का कुछ ने बोल्या, "क्या जिन्ने अन्नेया री हाखिख खोली औ इन्ना बि करि सकेया कि ए मणु नि मरदा?" 37 यीशु मन विच फिरी बडा ई उदास होई करि कब्र पर आया। औ इक्क गुफा थी ते इक्क पत्थर उस पर रखे रा थिया।

### लाजर जो जिन्दा करणा

38 यीशु ने बोलेया, "पत्थर हटाओ।" तिस मुदें रि भैण मार्था उसजो बोळणा लग्गि, "हे प्रभु, उस विच का अवे ता मुस्क आंदि, किजोकि उसजो मरे रे चार दिन होई गे रे हिन।" 39 यीशु ने उसजो बोलेया, "क्या मै तेरे जो नि बोलेया थिया किजे तु भरोसा करगि, ताँ परमेश्वर रि महिमा जो दिखगी।" 40 ताँ उनां ने तिस पत्थर जो हटाया। यीशु ने हाखिख उठाई करि बोलेया, "हे पीता, मै तेरा धनवाद करदा कि तें मेरी सुणि लित्ति रि है। 41 मै जाणदा था कि तु हमेशा मेरी सुणदा, अपण जै भीड़ नेड़े-तेड़े खड़िती रि है, उनहेरि वजह कने मै ए बोलेया जिस कने ए भरोसा करण कि तें मेरेजो भेजे रा है।" 42 ऐ बोळि करि उन्निये बड़े जोर कने हाक्क मारी, हे लाजर, निकळि आ।" 43 जै मरि गया था औ कफन कने हत्थ-पैर भन्निरे रे ही बार आई गया, ते उसदा मुँह कपड़े कने भन्निरे रा थिया, यीशु ने उना जो बोलेया उसजो खोली दयो ते जाणे दयो। 44 ताँ जे यहुदी मरियम का आए रे थिये ते उसदा ए काम्म दिखेया थिया, उनां विच का मतेयां ने उस पर भरोसा कित्तेया।

### यीशु जी रे खलाफ जाल बिछाणा

45 अपण किछ ने फरिसीयां का जाई करी यीशु रे काम्मां री खबर दित्ति। 46 इस पर प्रधान याजकां ते फरिसीयां ने महाभा सद्दी, ते बोलेया "असी क्या करदे? ए मणु ता मते चमत्कार दिखांदा है। 47 जे असी उस जो इयां ई छड्डि दिंदे, ताँ सारेयां ने उस पर भरोसा करी लैणा, ते रोमियां ने आई करी हमारि जगह ते जाती दोन्नां पर कब्जा करि लैणा।" 48 तां उनां विच कैफा नां रे इक्क मणु ने जे उस साल रा महायाजक थिया, उनां जो बोलेया, "तुसि किछ नि जाणदे; 49 ते ना हि ऐ समजदे कि तुम्हारे ताँईए ऐ ई भळा होणा कि हमारे लोकां ताँईए इक्क मणु मरे, ते सारी जाती नाश (बर्बाद) ना हो।" 50 ऐ गल्ल उन्निये अपणे पास्से का नि बोळि थी, अपण उस साल र महायाजक होई करी भविष्यवाणी कित्ति, कि यीशु ने उस जाति ताँईए मरणा; 51 ते ना सिर्फ उस जाति ताँईये अपण इस ताँईए बि परमेश्वर रे तित्तर-बित्तर बचेयां जो बि इक्क करि दे। 52 अते उसी दिन का से उसजो मारणे री तरकिब्बा बनाणा लग्गि पेया।" 53 इधरे ताँई यीशु जी उस वेले का यहुदियां रे विच खुळी करी नी घुम्मे, अपण उक्ते का जगल रे नेड़े रे वाळी जगह रे इफ्राईम ना रे इक्क नगर जो चली गेय; ते अपणे चलेयां कने उक्ते ई रेहणा लगे। 54 यहुदियां रा फसह त्योहार नेड़े थिया, ते मते लोक त्योहार आ पैहले ग्रां का यरुशलम जो गेय कि अपणे आप जो शुद्ध करण। 55 अते औ यीशु जो तोपणा लगे ते मन्दरा विच आपस अन्दर खड़ी करी बोळणा लगे, "तुसी क्या सोचदे? क्या उन्निये त्योहार पर नि आणा? 56 प्रधान याजकां ते फरिसीयां ने ऐ हुक्म देई रखे रा थिया कि जै जाणदा हो कि यीशु कुते है औ दस्से, ताकी औ उसजो पकड़ी सकण। 57 यीशु फसह का छः दिन पैहले बैतनिय्याह जो आया जित्ते लाजर थिया, जिसजो यीशु ने मरेयां का (मुदियां) का जिन्दा कित्तेया था।

### यीशु जी रे पैरां पर इत्तर पाणा

12 तित्ते उनां ने उस ताँई रोडि बनाई; ते मार्था सेवा करदी थी, ते लाजर उनां विच का इक्क थिया जे रोडि खाणा थिये बैठे रे थिये। 2 ताँ मरियम ने जटामांसी रा आद्या सेर किमती इत्र लेइ करी यीशु रे पैरां पर

पाया,ते अपने बाळां कने उसदे पैर पुन्जे; ते इत्र री खुमबू कने सारा घर खुसबूदार होई गया।<sup>3</sup> अपण उसदे चेलैयाँ विच का यहूदा इस्करियोति जे उसजो पकड़वाणे वाळा थिया, बोलना लग्येया,<sup>4</sup> "ऐ तिन सौ दिनार विच बेचिकरी गरिबां जो किजो नि दित्तेया गया?<sup>5</sup> उन्निये ए गल्ल इस ताँईए नि बोल्लि कि उसजो गरिबां रि चिन्ता थी,अपण इस ताँईए किजोकि ओ चोर थिया ते उन्हेरी थैलि हमेशा उसका रँहँदि थी ते जे किछ बि उस विच पाया जादां थिया,ओकड्डि लिदां थिया।<sup>6</sup> यीशु ने बोल्हेया,"उसजो रँहणा दयो।उसजो ए मेरे दब्बे जाणे दे दिन ताँईए रखणा दयो।<sup>7</sup> किजोकि गरिब ताँ तुम्हारे कन्ने हमेशा रँहँदे,अपण मैं तुम्हारे कन्ने हमेशा नि रँहणा।"<sup>8</sup> जाँ यहूदियां रि बड़ी भीड़ जो पता चली गया कि ओ उत्ते है,ताँ से ना सिर्फ यीशु रि वजह कने आए,अपण इस ताँईए बि कि लाज़र जो दिख्खे,जिसजो उन्निये मरेयाँ विच आ जिलाया थिया।

### लाज़र रे खलाफ चाल

<sup>9</sup> ताँ प्रधान याजकां ने लाज़र जो मारणे रि तरकीब सोचि।<sup>10</sup> किजोकी उसदे वजह कने मते सारे यहूदी चली गेय ते यीशु पर भरोसा कित्तेया।<sup>11</sup> दुज्जे दिन मते लोकां ने जे पर्व विच आए थिए ए सुणेया कि यीशु यरुशलेम विच आया करदा है।

### यरुशलेम बिच विजय-प्रवेश

<sup>12</sup> इस ताँईए उनां ने खजुर री डाळियां लिच्छि ते उस कने मिलणे जो निकळे,ते हक्का मारणा लग्ये , होशाना! धन इस्राएल रा राजा,जे प्रभु रे ना कने आंदा।"<sup>13</sup> जाँ यीशु जो गद्हे रा बच्चा मिल्लेया;ताँ औ उस पर बेइ गेया,जियां लिख्खे रा है,<sup>14</sup> हे सिय्योन रि कुडी मत डर; दिख,तेरा राजा गद्हे रे बच्चे पर चढ़ी करी चळी आया करदा है।"<sup>15</sup> उसदे चेल्ले पैले ए गल्ल नि समजे थिए;अपण जाँ यीशु री महिमा सामणे आई ताँ उनां जो याद आया कि ए गल्लाँ उसदे बारे विच लिख्खि गेई रि हिन ते लोकां ने उस कने इसी तरिके रा बर्ताव कित्तेया थिया।<sup>16</sup> ताँ भीड़ रे तिन्हा लोकां ने ग्वाही दित्ति,जे उस वेल्हे उस कन्ने थिये जाँ उन्निये लाज़र जो कब्र का सद्दी करी मुर्दयाँ विच का जिन्दा कित्तेया थिया।<sup>17</sup> इसी वजह कने लोक उसजो मिळणे जो आए थिये किजोकी उनां ने ए सुणेया थिया कि उन्निये ए चमत्कार दिखाए रा है।"<sup>18</sup> ताँ फरिसीयां ने आपस विच बोल्हेया,सोचो ता सही कि तुम्हारे का किछ नि बणदा दिख्खो दुनिया उसदे पिच्छे होई चलि रि है।"<sup>19</sup> जे लोक उस पर्व विच पूजा करणे जो आए थिए उनां विच का किछ युनानी थिये।

### यूनानियां रा यीशु जी जो तोपणा

<sup>20</sup> उन्हाने गलील रे बैतसैदा रे रँहणेवाळे फिलिप्पुस का आई करी उसका मित्रत कित्ति की,श्रीमान,असी यीशु जो मिळणा चांदे।<sup>21</sup> फिलिप्पुस ने आई करी अन्नदियास जो बोल्हेया,ताँ अन्नदियास ते फिलिप्पुस ने जाई करी यीशु जो बोल्हेया।<sup>22</sup> इस पर यीशु ने उनां जो बोल्हेया,"ओ वक्त आई गेरा है कि मनुष्य रे पुत्र रि महिमा हो।<sup>23</sup> मे तुम्हारे जो सच सच दसदा कि जा तिकर गेरु रा दाणा जमीन पर पेई करी मरी नी जादां,औ किल्ला रेन्दां;अपण जाँ औ मरी जादां,ताँ बडा फळ लान्दा।<sup>24</sup> जे अपणी जान जो प्यार करदा,औ उसजो गौची दिन्दा; अपण जे इस दुनिया विच अपणे प्राण जो प्यार नी करदा,ओ हमेशा री जिन्दगी ताँई उसदी रक्षा करगा।<sup>25</sup> जे कोई मेरी सेवा करे,तां मेरे पिच्छे होई ले;ते जित्ते मैं है उत्ते मेरा बि होणा।जे कोई मेरी सेवा करे,तां पिता ने उसदा आदर करणा।<sup>26</sup> अवे मेरा मन भावुक है।इस ताँईए अवे मैं क्या बोल्हाँ?हे पिता मेरेजो इस घड़ी का बचा?न,किजोकी मैं इसी वजह कने इस घड़ी जो पुजेया।

### कूस पर मौत रा ईशारा

<sup>27</sup> हे पिता,अपणे ना री बडाई कर।"तां ए आकाशवाणी हुई,"मैं उसदी बडाई कित्ति रि है तै फिरी बि करगा।"<sup>28</sup> तां जे लोग खडित्ते रे सुणदे थिये उनां ने बोल्हेया कि बढळ गरजेया।दुज्जयां ने बोल्हेया,"कोई स्वर्गदूत उस कने बोल्हेया।"<sup>29</sup> इस पर यीशु ने बोल्हेया,"ए मेरे ताँई नि अपण तुम्हारे ताँई आ रा

है।<sup>30</sup> अवे इस दुनिया रा इंसाफ हुदां है,अवे इस संसार रा सरदार कड्डी दित्तेया जाणा;<sup>31</sup> ते जे मैं धरती का ऊच्चे पर चढाया गया तां सारेयां जो अपणे पास्से छिकगा।"<sup>32</sup> इयां बोलि करि उन्निये ए साफ करी दित्तेया कि उन्ने कदेई मौत कने मरणा।<sup>33</sup> इस पर लोकां ने उसजो बोल्हेया,असां ने व्यवस्था री ए गल्ल सुणे रि है कि मसीह ने हमेशा रँहणा,फिरी तु किजो बोळ्दा कि मणु रे पुत्र जो ऊच्चे पर चढाया जाणा जरूरी है? ए मणु रा पुत्र कुण है?"<sup>34</sup> यीशु ने बोल्हा,"रौशनी अवे थोडी देर तिकर तुम्हारे मझाटे है। जां तिकर रौशनी तुम्हारे कन्ने है तां तिकर चलदे चलो,इयां ना हो कि न्याहरा तुम्हारे जो आई घेरे;जे न्याहरे विच चलदा ओ नी जाणदा कि कुते जाया करदा है।<sup>35</sup> जां तिकर रौशनी तुम्हारे कन्ने है,रौशनी पर भरोसा रख्खो ताकी तुसी रौशनी री सतांन बणो।"<sup>36</sup> उन्निये उन्हेरे सामणे इन्ने चमत्कार दिखाए,

### यहूदियां रा अविश्वास बिच बणे रँहणा

तां बि उनां ने उस पर भरोसा नि कित्तेया;<sup>37</sup> ताकि यशायाह भविष्यद्वक्ता रा पुरा हो जे उसने बोल्हेया थिया: "ओ प्रभु, हमारी खबर रा कुन्निये भरोसा कित्तेया? ते प्रभु रा जोर कुस पर प्रगट होया है?"<sup>38</sup> इस ताँईये ओ विश्वास नि करी सकें,किजोकी यशायाह ने ए बि बोल्हेया है:<sup>39</sup> उन्निये उन्हेरी हाखूखि अन्नि ते, उन्हेरा मन मजबूत करि दित्तेया रा है; कुते इयां ना हो कि ओ हाखूखि कने दिख्ख,ते मन कने समझण, ते फिरण,ते मैं उन्हेरे जो ठीक करां।"<sup>40</sup> यशायाह ने ए गल्लाँ इस ताँई बोल्हि किजोकी उसने उसदी बडाई दिख्खि,ते उसदे बारे विच गल्लां कित्ति।<sup>41</sup> तां बि अधिकारियां विच मते लोकां ने उस पर भरोसा कित्तेया,अपण फरिसीयां री वजह कने खुलि करि नी मणदे थिये,कि कुते ऐसा ना हो कि ओ आरधनालय का बार कड्डि दित्ते जाण:<sup>42</sup> किजोकी मणुआं रे पास्से री बडाई उनां जो परमेश्वर रे पास्से री बडाई का जादा प्यारी थी।<sup>43</sup> यीशु ने हाक्क मारी करी बोल्हेया,"जे मेरे पर भरोसा करदा,ओ मेरे पर नी अपण मेरे भेजणे वाळे पर भरोसा रखदा।

### यीशु जी रे वचन : ईसांफ री नीं

<sup>44</sup> ते जे मेरेजो दिखदा,ओ मेरे भेजणे वाळे जो दिखदा।<sup>45</sup> मैं दुनिया विच रौशनी होई करी आए रा है, ताकि जे कोई मेरे पर भरोसा करे, ओ न्याहरे विच ना रेहू<sup>46</sup> जे कोई मेरी गल्लां सुणी ना मन्ने,तां मैं उसजो गळत नी ठहरादां,किजोकी मैं दुनिया रा गळत ठहराणे ताँई नी,अपण दुनिया रा छुटकारा करणे ताँइये आए रा है।<sup>47</sup> जे मेरे जो निकमा जाणदा ते मेरी गल्लां नि मणदा उसजो गळत ठहराणे वाळा ता इक्क है:उन्निये ही पिच्छे दिन विच उसजो गळत ठहराणा।<sup>48</sup> किजोकी मैं अपणे पास्से का गल्लां० नि कित्ति;अपण पिता जिन्ने मेरे जोम भेजे रा है उन्ने ही मेरे जो हुक्म दित्तेया कि क्या-क्या केहणा ते क्या-क्या बोळणा?<sup>49</sup> ते मैं जाणदा कि उसदा हुक्म हमेशा री जिन्दगी है।इस ताँई मैं जे किछ बोळ्दा,औ जैसा पिता मेरे जो बोळ्दा तैसा ही बोळ्दा।"<sup>50</sup> फसह रे त्हायार का पैहे, जां यीशु जी ने जाणी लेया कि मेरा से बेल्हा आई गया कि दुनियां छड्डी करी पिता का जां, ता अपणे मल्लुआं जो जे दुनियां बिच थिये जियां से दाह-पीड़ रखदे थिये अन्त ताँई तियां ई दाह-पीड़ रखदे रेहू।

### यीशु जी रा चेल्लेयां रे पैर धोणा

**13** जां सैतान शमौन रे निके यहूदा इस्करियोती रे मन बिच एह गल्ल पाई बँडे रा थिया कि से तिन्हा जो पकड़वान ता रोटी खाणे रे बेल्हे<sup>2</sup> यीशु जी ने एह जाणी करी कि पिता ने सब किच्छे मेरे हल्थ पर करी दित्तेया ते मैं परमेश्वर रे पास्से का आया ते परमेश्वर का जाया करदा है।<sup>3</sup> रोटी का उड्डी करी अपणे परालें कपड़े उतारी दित्ते ते अंगोछा लेईकरी अपणी कमर बन्नी।<sup>4</sup> तां भांडे बिच पाणी भरी करी अपणे चेल्लेयाँ रे पैर धोणे ते जिस अंगोछे कने अपणी कमर बन्नी थी तिसी कने पुंजणे लगे।<sup>5</sup> जां से शमौन पतरस का आये ता पतरस ने तिन्हा जो बोल्हा, "कै तुसा मेरे पैर धोया करदे हिन?"<sup>6</sup> यीशु जी ने तिस जो जवाब दित्तेया, "जे मैं करदा, तू तिस जो हल्ले नी जाणदा, अपण इधरे बाद समझणा।"<sup>7</sup> पतरस ने तिन्हा जो बोल्हा, "तुसा मेरे पैर कदी बी नी धोई पाणे!" एह सुणी करी यीशु जी ने तिस

जो बोल्या, "जे में तेरे पैर ना धोआं, ता तेरा मेरे कने कोई सांझा नी।" 8 शमोन पतरस ने तिन्हा जो बोल्या, "ओ प्रभु जी, ता मेरे पैर ई नी, बल्कि हन्थ ते सिर बी धोई देयो।" 9 यीशु जी ने तिस जो बोल्या, "जे न्हाई बैठे रा है तिसेरे पैर रे सवाये होर किछ्छ बी धोणे री जरुरत नी है, अपण से बिल्कुल सुच्चा है; ते तुसा सुचे हिन, अपण सब रे सब नी।" 10 से ता अपणे पकड़वाणे वाळे जो जाणदे थिये इधेरे तांई तिन्हा बोल्या, "तुसा सब रे सब सुचे नी हिन।" 11 जां से तिन्हेरे पैर धोई बैठे ता से अपणे कपड़े पाई करी फिरी बेई गे, ते तिन्हा जो बोल्णे लगे, "कै तुसा नी समझे के में तुसा कने कै कित्तेया? 12 तुसा मिन्जो गुरु ते प्रभु बोलदे, ते ठीक ई बोलदे, किजोकि में है। 13 जे में प्रभु ते गुरु होई करी तुम्हारे पैर धोये, ता तुसा जो बी इक दूये रे पैर धोणा चाहिदे। 14 किजोकि में तुसा जो इक नमूना दस्सी दित्तेया कि जियां में तुसा कने कित्तेया, तुसा बी तियां ई करेया करो। 15 में तुसा कने सच्च सच्च बोल्दा, नौकर अपणे मालक का बड्डा नी, ते ना ई भेजे रा अपणे भेजणे वाळे का। 16 तुसा एह गल्ला जाणदे हिन, ते जे उन्हा पर चलो ता तुसा धन्न हिन। 17 में तुसा सबनी रे बारे नी बोलदा, जिन्हा जो में चुणी लेरा है, तिन्हा जो में जाणदा, अपण एह इधेरे तांई है कि पवित्र सास्तर रा एह वचन पूरा हो, 'जे मेरी रोटी खांदा, तिस ने मेरे पर लत्त चुक्की।' 18 अवे में तिसेरे होणे का पैहे तुसा जो जताई दिंदा कि जां एह होई जांगा तां तुसा भरोसा करो कि से में ई है। 19 में तुसा जो सच्चई बोल्द कि जे मेरे भेजे रयां जो अपनांदा, से मिन्जो अपनांदा, अते जे मिन्जो अपनांदा, से मेरे भेजणे वाळेयां जो अपनांदा।" 20 एह गल्लां बोली करी यीशु जी आत्मा बिच मग्न होये ते एह गुवाहई दित्ती, "में तुसा जो सच्च सच्च बोलदा तुसा बिच इक ने मिन्जो पकड़वाणा।"

### धोखे रे पास्से ईशारा

21 चेन्ने शक्क कने, कि एह कुसेरे बारे बिच बोलेया करदे हिन, इक दूजे पास्से दिख्खणा लगे। 22 तिन्हेरे चेन्नेयां बिच का इक जिस कने यीशु जी दाह-पीड रखदे थिये यीशु जी री छाती का झुकी करी बेदुटे रा थिया। 23 शमोन पतरस ने तिस जो इशारा करी के पूछ्छेया, "दस्स ता, एह कुसेरे बारे बिच बोलेया करदे हिन?" 24 तां तिस ने तियां ई यीशु जी री छाती पास्से झुकी तिन्हा जो पूछ्छेया, "ओ प्रभु जी, से कुण है?" 25 यीशु जी ने जवाब दित्तेया, "जिस जो में एह रोटी रा टुकड़ा डुबाई करी दिंगा सेहई है।" तां तिन्हा ने टुकड़ा डुबाई करी शमोन इस्कारियोती रे निके यहूदा जो दित्तेया। 26 टुकड़ा लिंदे ई सैतान तिस बिच समाई गया। तां यीशु जी ने तिस जो बोल्या, "जे तू करेया करदा, झट कर।" 27 अपण बैणे वाळेयां बिच का कुन्ने नी जाणेया कि तिन्हा ने एह गल्ल तिस जो कुधेरे तांई बोली। 28 यहूदा का इक थैली हुन्दी थी, इधेरे तांई कुस कुस ने समझेया कि यीशु जी तिस जो बोलया करदे हिन कि जे किछ्छ असा जो त्धार तांई चहिंदा से खरीदी लै, या एह कि कंगाळा जो किछ्छ दे। 29 ते से टुकड़ा लेईकरी झट बाह चली गया; ते एह राती रा बेल्हा थिया। 30 जां से बाह चली गया ता यीशु जी ने बोल्या, "अव्वे मल्लु ए पुत्र री बड़ाई होई, अते परमेश्वर री बड़ाई तिस बिच होई है;

### नोई आज्ञा

31 {जे उस बिच परमेश्वर री बड़ाई होई है, } ता परमेश्वर ने बी अपणे बिच तिसेरी बड़ाई करणी ते झट करणी। 32 ओ बच्चेयां, में होर थोड़ी हाण तुम्हारे कने है: फिरी तुसा मिंजो तोपणा, ते जियाम यहूदियां जो बोल्या, जित्ते जाया करदा है तित्ते तुसा नी आई सकदे, 'तियां ई में तुसा जो बी बोल्दा। 33 में तुसा जो इक नौआ हुकम दिंदा कि इक दूये कने दाह-पीड रख्खो, जियां में तुसा कने दाह-पीड रख्खी है, तियां तुसा बी इक दूये कने दाह-पीड रख्खो। 34 जे अपु मिते दाह-पीड रख्खे, ता इसी कने सब जो पता चलणा कि तुसा मेरे चले हिन।" 35 शमोन पतरस ने तिन्हा जो बोल्या, "ओ प्रभु जी, तुसा कुते जाया करदे हिन?" यीशु जी ने जवाब दित्तेया, "जित्ते में जाया करदा है तू अब्बे तित्ते नी आई सकदा, अपण इसेरे बाद मेरे पिच्छे आणा।"

### पतरस रे मुकरी जाणे पास्से ईशारा

36 पतरस ने तिन्हा जो बोल्या, "ओ प्रभु जी, अब्बे में तुसा रे पिच्छे किजो नी आई सकदा? में ता तुसा तांई अपणी जान बी देई दिंगा।" 37 यीशु जी ने जवाब दित्तेया, "कै तू मेरे तांई अपणी जान देई दिंगा? में तेरे कने सच्च सच्च बोल्दा कि मुर्गा ने बांग नी देणी जां तांई तू त्रै बरी मेरे का मन्हा नी करी दिंगा। 38 तुसा रा मन बैचेन न होन; परमेश्वर पर भरोसा रख्खो ते मेरे पर बी भरोसा रख्खो।

### परमेश्वर तिकर पुजणे रा रस्ता

14 मेरे पिता रे घरे बड़ी सारी रैह्ले री जगाह हिन, जे नी हुन्दे ता में तुसा जो बोली दिन्दा; किजोकि में तुसा तांई जगाह त्यार करणे तांई चलेया। 2 में तुसा तांई जगाह त्यार करदा, ताकि फिरी आई करी तुसा जो अपणे कने उते लेहई जांगा किजोकि जित्ते में रेह्यां तित्ते तुसा बी रेह्यो। 3 जित्ते में जाया करदा है तुसा तित्ते रा रस्ता जाणदे।" 4 थोमा ने यीशु जी जो बोल्या, "ओ प्रभु जी, असा नी जाणदे कि तुसा कुते जाया करदे हिन, ता रस्ता कियां जाणगे?" 5 यीशु जी ने तिस जो बोल्या, रस्ता अते सच्च ते जिन्दगी में ई है, बगैर मेरे कोई पिता का नी पुञ्जी सकदा। 6 जे तुसा मिन्जो जाणेया हुन्दा, ता मेरे पिता जो बी जाणी लैणा थिया: अते अव्वे तिन्हा जो जाणदे हिन, ते तिन्हा जो दिख्खेया बी है।" 7 फिलिप्पुस ने तिन्हा जो बोल्या, "ओ प्रभु जी, पिता जो असा जो दखाई देयो, ऐहई असा तांई बड़ा है।" 8 यीशु जी ने तिस जो बोल्या, "ओ फिलिप्पुस, में इत्तणे रोझे रा तुसा कने है, ते कै तू मिन्जो नी जाणदा? जिन्ने मिन्जो दिख्खेया तिस ने पिता जो दिख्खेया है। ता फिरी तौ किजो बोल्या करदा है कि पिता जो असा जो दिख्खाओ? 9 कै तू भरोसा नी करदा कि में पिता बिच है ते पिता मेरे बिच हिन? एह गल्लां जे में तुसा कने बोल्या करदा है अपणे पास्से का नी हे बोल्या करदा अपण पिता मेरे बिच रेहई करी अपणा कम्म करेया करदे हिन। 10 मेरे भरोसा करो कि में पिता बिच है ते पिता मेरे बिच हिन, नी ता कम्मा ई री वजाह कने मेरे पर भरोसा करो। 11 "में तुसा कने सच्च बोलदा, जे मेरे पर भरोसा रख्खदा, एह कम्म जे में करदा तिन्ने बी करणे अपण तिन्ने इन्हा का बी बड्डे कम्म करणे किजोकि में पिता का चलेया। 12 जे किछ्छ तुसा मेरे नां कने मंगे, से में करणे ताकि पुत्र रे जरिये पिता री बड़ाई हो। 13 जे तुसी मेरे नां च मंगे, तां में तिस जो करगा। 14 "जे तुसा मेरे कने दाह-पीड रख्खे ता मेरे हुकमा जो मन्नो।

### पवित्रात्मा रा वादा

15 कने में बाबे का विनती करगा, कने से तुसा जो ईक मददगार दिंगा, कि से सदा तुसा कने रे। 16 मतलब सच्चाई रा आत्मा जिस जो दुनिया अपनाई नी सकदी, किजोकि से ना ता तिन्हा जो दिख्खदा ते ना ई जाणदा; तुसा तिस जो जाणदे, किजोकि से तुम्हारे कने रेहन्दा, ते से तुसा बिच होणा। 17 "में तुसा जो अनाथ नी छड्डणा, में तुसा का आन्दा। 18 ते थोड़ी हाण रेहई गेई फिरी दुनियां ने मिन्जो नी दिख्खणा, अपण तुसा ने मिन्जो दिख्खणा, किजोकि में जिंदा है, तुसा बी जिंदे रेह्ला। 19 तिस रोज तुसा जाणना कि में पिता बिच है, ते तुसा मेरे बिच हिन, ते में तुसा बिच। 20 जिस का मेरे हुकम हिन ते तिन्हा जो मन्दा, सेहई मेरे कने दाह-पीड रख्खदा अते जे मेरे कने दाह-पीड रख्खदा तिस कने मेरा पिता ने दाह-पीड रख्खणी अते में तिस कने दाह-पीड रख्खणी ते अप्पु जो तिसेरे सामणे लियाणा।" 21 तिस यहूदा ने जे इस्करोति नी थिया तिस ने बोल्या, "ओ प्रभु जी, कै होया जे तुसा अप्पु जो म्हारे सामणे लियाणा चांदे अपण दुनियां सामणे नी?" 22 यीशु जी ने तिस जो जवाब दित्तेया, "जे कोई मेरे कने दाह-पीड रख्खगा तिनिये मेरे वचनां जो मनणा, ते मेरे पिता ने तिस कने दाह-पीड रख्खणी ते असा तिसा का आणा ते तिसेरे कने वास करणा। 23 जे मेरे कने दाह-पीड नी रख्खदा से मेरा वचन नी मन्दा, अते जे वचन तुसा सुणदे हिन से मेरे नी अपण पिता रे हिन, जिन्हे ने मिन्जो भेजेया। 24 "एह गल्लां में तुसा कने रेहन्दे तुसा जो बोली। 25 अपण मददगार मतलब पवित्र आत्मा जिस जो पिता ने मेरे नां कने भेजणा तिस ने

तुसा जो सब गल्लां सखाणी, अते जे किच्च मैं तुसा जो बोलया से सब गल्लां तिन्हे तुसा जो चेता कराणी। 26 मैं तुसा जो सान्ति दिंदा जांदा, अपणी सान्ति तुसा जो दिंदा, जियां दुनियां दिंदी, तियां मैं तुसा जो नी दिंदा, तुम्हारा मन बैचन ना हो ते डरन ना। 27 तुसा ने सुणेया जे मैं तुसा जो बोलया, मैं जांदा, ते तुम्हारे का फिरी आणा।' जे तुसा मेरे कने दाह-पीड रखदे ता इस गल्ल कने खुस हुन्दे कि मैं पिता का जाया करदा है, किजोकि पिता मेरे का बड्डे हिन। 28 ते मैं इसेरे होणे का पैले तुसा जो बोली दित्तेया, कि जां से होई जांगा, तां तुसा भरोसा करन। 29 मैं अवे तुसा कने जादा गल्लां नी करणी, किजोकि इस दुनियां रा सरदार आया करदा है मेरे पर तिसेरा कोई हक नी है, 30 अपण एह इधेरे ताई होया करदा है कि दुनियां जाणे कि मैं पिता कने दाह-पीड रखदा, ते जियां पिता ने मिन्जो हुकूम दित्ते हिन मैं तियां ई करदा। उड्डो, इत्ते का चलदे। 31 यीशु जी ने बोलेया, "सच्ची अंगूर री बेल मैं ए, अते मेरे पिता दिख-रिख करणे वाले हिन।

### यीशु जी सच्ची दाखलता

15 मेरी हर इक डाळी जो जिस बिच फळ नी लगदा, से बड्डी दिन्दे, अते मेरी हर इक डाळी जो जे फळदी, से तिस जो छांटदे हिन ताकि होर जादा फळ लगन। 2 "तुसी मल्लू ता जे सिक्सा मैं तुम्हारे जो दित्ती ए, तिसेरी वजह कने पैले ई सुचे होई गेरे हिन। 3 तुसी मेरे बिच रेह्यो मैं तुम्हारे बिच रेहन्ना। जिय्यां डाळी जे अंगूर री बेल कने नी जुडी रेह, ता से फळी सकदी, तिय्यां ई तुसी बी जे मेरे कने जुडी नी रेहन्ने ता नी फळी सकदे। 4 "मैं अंगूर री बेल ए, तुसी डाळी हिन। जे मेरे कने जुडी रेहन्दा, अते मैं तिस कने, से बडा फळदा, किजोकि मेरे का बखरे होई करी तुसी किच्छ नी करी सकदे। 5 जे कोई मेरे कने जुडी नी रेहन्दा तिस जो भज्जी(टूटी) री डाळी साहई सूटि दित्तेया जांदा अत्ते से सूक्री जांदा अत्ते मल्लू तिस जो बटोरी करी अगी करी बिच फूक्री दिंदे। 6 जे तुसी मेरे बिच बणी रेहन्ने, अते मेरे सिक्सा तुम्हारे बिच रेहन्नी, ता जे किच्छ तुसी चाहन्दे हिन मंगगे, से तुम्हारे जो मिली जाणा। 7 इस कने मेरे पिता री महिमा हुन्दी कि तुसी मते फळ लियाओ अते मेरे चेले रेयो। 8 जदेया मेरे परम पिता ने मेरे कने प्यार कित्तेया, मैं बी तिय्यां ई तुम्हारे कने प्यार कित्तेया। मेरे प्यार बिच बणी रेह्यो। 9 जे तुसी मेरे हुकमां जो मंगगे, ता मेरे प्यार बिच बणी रेहन्ने, तिय्यां ई जिय्यां मैं अपणे पिता रे हुकमां जो मनदा अते तिन्हेरे प्यार बिच बणी रेहन्दा। 10 मैं एह गल्लां तुम्हारे कने इधेरे ताई बोली कि मेरी खुस्सी तुम्हारे बिच रेह, ताकि तुम्हारी खुस्सी पूरी होई जाओ। 11 मेरा हुकम एह ए कि जिय्यां मैं तुम्हारे कने प्यार कित्तेया, तिय्यां ई तुसी बी इक दूजे कने प्यार करो। 12 इस का बड्डा प्यार होर कुसकी रा नी, कि कोई अपणे दोस्तां ताई अपणी जान देई देयो। 13 जे हुकम मैं तुम्हारे जो दित्तेया, जे तुसी तिस जो मंगगे ता तुसी मेरे दोस्त हिन। 14 अवे मैं तुम्हारे जो नौकर नी बोलणा किजोकि कोई नौकर नी जाणदा किउसेरा मालक कै ए करेया करदा, अपण मैं तुम्हारे जो दोस्त बोलेया, किजोकि से सब गल्लां जे मैं अपणे पिता का सुणी तुम्हारे जो दस्सी दित्ती हिन। 15 तुसी मिंजो नी चुणेया, अपण मैं तुम्हारे जो चुणेया अते इधेरे ताई रखेया कि तुसी जाओ अते फळ लियाओ ते तुम्हारे खरे कम्म बणी रेह, ताकि मेरे नां कने तुसी जे किच्छ बी पिता का मगो से तुम्हारे जो देंन। 16 मैं तुम्हारे जो एह हुकम इधेरे ताई देया करदा एह ताकि तुसी इक-दूजे कने प्यार करो। 17 जे दुनियां तुम्हारे कने नफरत करदी ता याद रख्यो से तुम्हारे का पैले मेरे का नफरत करदी।

### संसार रा बैर

18 जे तुसी इस दुनियां रे हुन्दे ता दुनियां ने तुम्हारे कने अपणेयां साहई प्यार करणा थिय्या, अपण तुसी इस दुनियां रे नी हिन मैं तुम्हारे जो इस दुनियां का चुणी लेरा ए अते इधेरे ताई दुनियां तुम्हारे कने नफरत करदी। 19 मेरा वचन याद रख्यो: इक नौकर अपणे मालक का बड्डा नी एह। इधेरे ताई जे तिन्हा मिंजो तंग कित्तेया एह ता तुम्हारे जो बी तंग करणा। अते जे तिन्हा मेरा वचन मन्नेयां ता तुम्हारी गल्लां बी मनणी। 20 अपण तिन्हा मेरे नां री वजह कने एह सब किच्छ तुम्हारे कने करणा, किजोकि से जिस ने मिंजो

भजेया तिस जो नी जाणदे। 21 जे मैं नी आंदा अते तिन्हा कने गल्लां नी करदा ता से कुसकी बी पाप रे कसुरवार नी हुन्दे। अपण अवे तिन्हा का तिन्हेरे पापां ताई कोई बी भाह्ना नी ए। 22 जे मेरे कने नफरत करदा से मेरे पिता कने बी नफरत करदा। 23 जे मैं तिन्हेरे बिच कम्म नी करदा जे कुसकी ने बी नी कित्ते ता से पाप रे कसुरवार नी हुन्दे अपण अवे जां से दिख्खी बैठे हिन तां बी मेरे कने अत्ते मेरे पिता दोनां का नफरत करदे हिन। 24 अपण एह इधेरे ताई होया कि एह वचन पूरा हो जे तिन्हेरे नियमां बिच लिख्खे रा ए: 'तिन्हा ने बेकार ई मेरे कने नफरत कित्ती।' 25 जां से मदतकार आणा जिस जो मैं पिता रे पास्से का तुसां का भेजणा, बल्कि सच्चाई री आत्मा जे पिता रे पास्से का आंदी, तिस ने मेरी गवाई दैणी, 26 अते तुसी ने बी गवाई दैणी, किजोकि तुसी सुरु का ई मेरे कने हिन। 27 मैं एह गल्ला इधेरे ताई तुम्हारे कने बोली हिन, ताकि तुम्हारा विस्वास उगमगाई नी जाओ।

16 तिन्हा तुम्हारे जो अराधना भवन का बाहर कड्डी दैणा, बल्कि से बेला आया करदा ए जां तुम्हारे बिच का कुसकी जो बी मारी करी हर कोई ने सोचणा कि से परमेश्वर रा कम्म करेया करदा एह। 2 अत्ते तिन्हा ने इय्यां इधेरे ताई करणा किजोकि तिन्हा ने ता स्वर्ग बिच रेह्ने वाले पिता जो जाणे ना ता मिंजो। 3 अत्ते एह गल्लां मैं इधेरे ताई बोली कि जां बेला आये ता तुसी चेत्ता करेयो कि मैं तुम्हारे जो इधेरे बारे बिच दस्सी दित्तेया थिय्या, अत्ते एह गल्लां मैं तुम्हारे जो सुरु बिच इधेरे ताई नी दस्सी किजोकि मैं तुम्हारे कने थिय्या। 4 अपण अवे मैं अपणे भेजणे वाले का चलेया जिन्ने मिंजो भजेया ए अते तुसा मेरे का मत पूछदे,

### पवित्रात्मा रे कम्म

'तू कुते चलेया?' 5 किजोकि मैं एह गल्लां तुम्हारे जो दस्सी दित्ती हिन, तुम्हारा मन दुखी होई गेया रा ए। 6 अपण मैं तुम्हारे कने सच्च-सच्च बोलदा कि तुम्हारे ताई भला ए कि मैं जाया करदा ए। किजोकि जे मैं नी जांगा ता मदतगार ने तुम्हारे का नी आणा। अपण जे मैं चली जांगा ता तिस जो तुम्हारे का भेजी दिंगा। 7 अते जां तिस ने आणा ता पाप, धार्मिकता, न्याय रे बारे बिच दुनियां रा शक दूर करणा। 8 पाप रे बारे बिच, इधेरे ताई कि से मेरे पर विस्वास नी करदे, 9 अत्ते धार्मिकता रे बारे बिच, इधेरे ताई कि मैं पिता का चलेया, अत्ते तुसी मिंजो फिरी नी दिख्खी सकणा, 10 अते न्याय रे बारे बिच, इधेरे ताई कि दुनियां रे शासक जो कसुरवार बोली दित्तेया गेया ए। 11 मिंजो तुम्हारे होर बी मती सारी गल्लां करणी हिन, अपण अबे तुसी उन्हा जो सेहई नी सकदे। 12 अपण जां सच्चाई री आत्मा ने आणा, ता तिस ने तुम्हारे जो सच्चाई रा रस्ता दस्सणा, किजोकि तिस ने अपणे पास्से का किच्छ नी बोलणा, अपण जे किच्छ तिस ने सुनणा, सेहई बोलणा अत्ते होणे वाली गल्लां जो तुम्हारे सामणे लियाणा। 13 तिस ने मेरे नां जो ऊंचा उठाणा, किजोकि तिस ने मेरी गल्लां जो तुम्हारे सामणे लियाणा। 14 जे किच्छ पिता का ए से सब मेरा ए; इधेरे ताई मैं बोलेया कि जे किच्छ मेरा ए तिन्हा गल्लां जो लेईकरी तिस ने तुसा जो दस्सी दैणा। 15 "थोड़ी देर बाद तुसी मिंजो नी दिखणा, अत्ते तिसेरे बाद तुसी मिंजो फिरी दिखणा।"

### दुःख सुख बिच बदली जाणा

16 तां तिन्हेरे चेलेयां बिच का किच्छ ने अपु-मित्ते बोलेया, "एह कै गल्ल ए जे एह म्हारे कने दस्सेया करदे हिन, 'थोड़ी देर बाद तुसी मिंजो नी दिखणा, अत्ते तिसेरे बाद तुसी मिंजो फिरी दिखणा, किजोकि मैं पिता का चलेया?" 17 फिरी से बोलणा लगे एह, "थोड़ी हाण बाद कै ए!" जिसेरे वारे बिच एह दस्सेया करदे हिन। एह कै बोलेया करदे हिन असा जो नी ए लगेया करदा पता।" 18 यीशु जी समझी गे कि से मेरे का पूछणा चाहन्दे हिन, अत्ते यीशु जी ने बोलेया, "कै तुसी इस गल्ल रे बारे बिच अपु-मित्ते सोच-विचार करेया करदे हिन, जे मैं बोली, 'थोड़ी देर बाद तुसी मिंजो नी दिखणा, अत्ते तिसेरे बाद तुसी मिंजो फिरी दिखणा?' 19 मैं तुम्हारे के सच्च-सच्च बोलदा कि तुसी रोणा ते पीटिणा, अपण इस दुनियां ने खुस होणा। तुसी दुखी होणा, अपण दुख खुसी बिच बदली जाणा। 20 जां कोई जनानी जमणे लगदी, तां तिस जो पीडां हुन्दी अत्ते जां से बच्चा जम्मी बैहन्दी ता इस खुसी बिच कि इस दुनियां

बिच इक होर पैदा होया अपणी पीड़ां जो भूली जांदी। 21 इधरे ताई तुसी अवे दुखी ता हिन, अपण में तुम्हारे कने फिरी मिलणा अते तुम्हारे मन खुस होई जाणे, अते तुम्हारी खुसी जो कोई तुसा का खौई नी सकदा। 22 तिस रोज तुसी मेरे का कोई सवाल नी करणा। मैं तुम्हारे कने सच्च-सच्च बोलदा, जे तुसी मेरे ना कने पिता का जे किच्छ बी मंगेया तिन्हा तुम्हारे जो दैणा। 23 हल्ले ताई तुसी मेरे नां कने किच्छ बी नी मंगेया: मंगे, अते तुम्हारे जो मिली जाणा, ताकि तुसी खुस होई जाओ। 24 "एह गल्लां में तुम्हारे कने उदारण बिच बोली हिन, अपण से बेला आया करदा ए जां में तुम्हारे कने उदारण देई-देई करी होर जादा गल्ल-बात नी करी पाणी।

### ससांर पर जीत हासिल करणा

25 उस रोज तुसी मेरे ना कने मंगणा, अते मैं तुम्हारे कने एह नी एह बोलदा कि मैं तुम्हारे ताई पिता का छंदे करणा, 26 किजोकि पिता खुद तुम्हारे कने प्यार करदे, किजोकि तुसा ने मेरे कने प्यार कित्तेया अत्ते एह विस्वास कित्तेया कि मिंजो पिता ने भेजेया ए। 27 मिंजो पिता ने भेजेया अते इस दुनियां बिच आया, मैं फिरी दुनियां जो छडी करी पिता का चलेया।" 28 यीशु जी रे चेल्लेयां ने बोलेया, "दिखखो अवे तुसी बिना उदारण रे खुली करी दस्सेया करदे हिन। 29 अवे असी समझी गे कि तुसी सब किच्छ जाणदे, अते तुम्हारे जो जरूरत नी ए कि कोई तुम्हारे का सवाल करन। इस कने असा विस्वास करदे कि तुम्हारे जो पिता ने भेजेया ए।" 30 यीशु जी ने जवाब दित्तेया, "कै तुसी अवे विस्वास करदे? 31 दिखखो, से बेला आया करदा ए, बल्कि आई गया कि तुसी तित्तर-बित्तर होई करी अपणे-अपणे घरे चली जाणा अते मिंजो किल्ला छडी दैणा, फिरी बी मैं किल्ला नी ए, किजोकि पिता मेरे कने हिन। 32 एह गल्ला मैं तुम्हारे कने बोली हिन कि तुम्हारे जो मेरे जरिये सांति मिल्लो। दुनियां बिच तुम्हारे जो तकलिफाँ मिल्ली हिन, अपण हिम्मत रखखो में दुनियां जो जीती लेया ए।" 33 यीशु जी ने एह गल्लां बोली करी ऊपर अम्बरा पाससे दिखखी करी बोलेया, "ओ पिता जी, से बेला आई रेह्या; अपणे पुत्तर रे नां जो ऊंचा उठा ताकि पुत्तर बी तुम्हारे नां ऊंचा उठाई सको।

### यीशु जी री महायाजकीय प्रार्थना (अप्यु ताई)

17 किजोकी तुसां ने अपणे पुत्तर जो पुरी मल्लु जाति पर हक दित्ते रा है कि से, हर इक जो, जिन्हा जो तुसां ने उस जो दित्ते रा है, हमेसा री जिन्दगी देयो। 2 ते हमेसा री जिन्दगी एह है कि से तुसां इक मात्र सच्चे परमेश्वर अत्ते यीशु मसीह जो, जिस जो तुसां ने भेजे रा है, जाणी सकन। 3 जेहड़े कम्म तुसां ने मिन्जो दित्ते थिय्ये, उन्हा जो पूरा करी के धरती बिच में तुम्हारे नां जो ऊंचा उठाया ए। 4 इधरे ताई तुसी अवे अपणे कने मेरे नां जो बी ऊंचा उठाओ। ओ पिता जी! तिय्यां ई महिमा मिंजो देयो, जे दुनिया बनणे का पैल्ले मिंजो तुम्हारे कने मिलदी थी। 5 धरती बिच जिन्हा मल्लुआं जो तुसी मिंजो दित्तेया, मैं तुम्हारे बारे उन्हा जो दस्सेया। से तुम्हारे थिय्ये अपण तुसां ने उन्हा जो मिंजो दित्तेया ते तिन्हा तुम्हारे वचन जो मन्नी लिक्तेया ए।

### अपणे चेल्लेयां ताई

6 अवे इन्हा जो पता लगी गेरा है कि जे किछ बी तुसां ने मिन्जो दित्ते रा है, से सब किच्छ तुम्हारे पाससे का ई है; 7 मैं तिन्हा जो सेहई सिक्सा दित्ती जे तुसां ने मिंजो दित्ती थी अत्ते तिन्हा ने उस जो अपनाई लेया। से पक्का जाणदे कि मैं तुम्हारे बिच का निकलेया, अत्ते उन्हा ने विस्वास कित्तेया कि तुसां ने ई मिंजो भेजेया है। 8 में दुनिया ताई प्राथना नी करेया करदा है बल्कि उन्हेरे ताई प्राथना करेया करदा है जिन्हा जो तुसी मिंजो दित्तेया है, किजोकि से तुम्हारे हिन, 9 अते सब किच्छ जे मेरा है, से तुसां रा है, अत्ते जे तुम्हारा है, से मेरा है। अत्ते मिंजो उन्हेरे जरिये महिमा मिल्ली। 10 अवे मैं धरती पर नी रैह्ला अपण से धरती बिच हिन अवे मैं तुम्हारे का आया करदा है पर इन्हा ने ई रैह्ला, ते मैं तुसां का आई जाणा। ओ पबित्तर पिता, अवे अपणे उस नां री सक्ति कने उन्हेरी रक्षा कर जे तुसां ने मिंजो दित्तेया है ताकि जिय्यां में ते तुसी इक हिन, से बी इक होई सकन। 11 जां में तिन्हेरे कने थिय्या, मैं तुम्हारे उस नां री सक्ति कने जे तुसी मिंजो दित्तेया है उन्हेरी रक्षा कित्ती, सिवाय

बिनाश रे पुत्र जो छडी उन्हा बिच कोई खत्म नी होया, इधरे ताई कि पवित्रशास्त्र री गल्ल पूरी हो। 12 अवे मैं तुम्हारे का आया करदा है अपण एह गल्लां में धरती बिच रेहई करी बोलेया करदा है ताकि तिन्हा जो दिल का खुस मिल्लो। 13 मैं तुम्हारा वचन तिन्हा जो दित्तेया अपण दुनिया ने उन्हा कने नफरत कित्ती किजोकि जिय्यां दुनियां चलदी तिय्यां से नी चलदे। तिय्यां ई जिय्यां में इस दुनियां कने नी चलदा। 14 मैं एह प्राथना नी है करदा कि तुसी इन्हा जो दुनिया का चुक्री लेयो बल्कि एह कि तुसी उन्हेरी बुरे सैतान का रक्षा करो। 15 से जिय्यां दुनियां चलदी तिय्यां से नी चलदे। तिय्यां ई जिय्यां में इस दुनियां कने नी चलदा। 16 सच्चाई रे जरिये तुसी उन्हा जो अपणी सेवा ताई अपण करो-तुम्हारा वचन सच्चा है। 17 जिय्यां तुसां ने मिन्जो दुनिया अन्दर भेजेया, तिय्यां ई मैं बी इन्हा जो दुनिया अन्दर भेजेया; 18 मैं उन्हेरे ताई अपू जो तुम्हारी सेवा ताई अर्पित करेया करदा है ताकि से बी सच्चाई रे जरिये अपू जो तुम्हारी सेवा ताई अर्पित करन। 19 अपण में सिर्फ उन्हेरे ताई ई प्राथना नी करेया करदा है बल्कि उन्हेरे ताई बी जे इन्हेरी सिक्सा रे जरिये मेरे पर विस्वास करगे,

### सारे भरोसा करणे वाळ्ळेयां ताई

20 कि से सब इक्क हॉन। तिय्यां ई जिय्यां ओ पिता जी, तुसी मेरे बिच हिन अत्ते मैं तुम्हारे बिच है। से बी असा बिच का इक हॉन। ताकि दुनियां विस्वास करन कि तुसां ने मिंजो भेजेया है। 21 से महिमा जे तुसां ने मिन्जो दित्ती है, मैं उन्हा जो दित्ती, ताकि से बी तिय्यां ई इक्क होई सकन जिय्यां असी इक्क हिन, 22 मैं उन्हा बिच होणा ते तुसी मेरे बिच होणा, ताकि से पुरे सेहई होई करी इक होई जान, अत्ते दुनियां जाणी जाये कि तुसां ने मिंजो भेजेया है ते तुसा ने उन्हा कने बी तिय्यां प्यार कित्तेया जिय्यां मेरे कने प्यार करदे हिन। 23 "ओ पिता जी! जे मल्लु तुसी मिंजो दित्ते हिन, मैं चाहन्दा कि जित्ते मैं है, से बी मेरे कने हो ताकि से मेरी उस महिमा जो दिखखी सकन जे तुसां ने मिंजो दित्ती है। किजोकि दुनियां री रचना का बी पैल्ले तुसी मेरे कने प्यार करदे हिन। 24 ओ धरमी पिता, दुनिया तुसां जो नी जाणदी अपण मैं तुसा जो जाणदा ने मेरी कदर नी कित्ती, अपण मैं तुसां जो जाणदा। अत्ते मेरे चेल्ले जाणदे कि तुसां ने मिंजो भेजेया है, 25 अत्ते मैं तुम्हारा नां इन्हा जो दस्सेया अत्ते दस्दे रैह्ला ताकि जे प्यार तुसां ने मेरे कने कित्तेया उन्हा बिच बी हो, अत्ते मैं बी उन्हा बिच रेह्यां। 26 यीशु जी एह गल्लां बोली करी अपणे चेल्लेयां कने किद्रोन नाळे रे पार इक बगीचे जो चली गे।

### यीशु जी रा पकड़वाया जाणा

18 तिन्हा जो पकड़वाणे वाळा यहूदा बी तिस जगह रे बारे अन्दर जाणदा थिया, किजोकी यीशु जी अपणे चेल्लेयां कने तित्ते मिलदे थिय्ये। 2 इधरे ताई यहूदा रोमी सिपाईयां रा इक झुन्ड अत्ते बड्डे परोहतां ते फरीसियां रे भेजे रे मल्लु, अत्ते मन्दिर रे पैहरेदारां कने मशालां, दीय्ये, अत्ते हथियार लेई करी तित्ते आई गेया। 3 फिरी यीशु जी जे सब किच्छ जाणदे थिय्ये कि तिन्हा कने कै होणे वाळा है, अग्गे आये अत्ते तिन्हा जो बोलेया, "तुसी कुस जो तोपेया करदे हिन?" 4 उन्हा ने यीशु जी जो जवाब दित्तेया, "यीशु नासरी जो।" यीशु जी ने तिन्हा जो बोलेया, "से मैं है।" तित्ते तिन्हा जो पकड़वाणे वाळा यहूदा बी तिन्हा कने खड़ितेरा थिय्या। 5 जिय्यां ई यीशु जी ने तिन्हा जो एह बोलेया "से मैं है" से पिच्छे हटि करी भुय्यां पेई गे। 6 तां यीशु जी ने तिन्हा का फिरी पुच्छेया, "तुसी कुस जो तोपेया करदे हिन?" तिन्हा बोलेया, "यीशु नासरी जो।" 7 यीशु जी ने जवाब दित्तेया, "मैं तुसां जो बोलेया, से मैं ई है। जे तुसी मिन्जो तोपेया करदे हिन ता इन्हा जो जाणा देयो।" 8 एह तिन्हा ने इधरे ताई बोलेया कि जे उस ने बोलेया थिय्या, से सच्च हो, मैं उन्हा बिच का कुसकी जो नी गुआया, जे तुसी मेरे हवाले कित्ते थिय्ये।" 9 फिरी शमौन पतरस ने, जिस का तलवार थी, अपणी तलवार निकाली ते बड्डे परोहतर रे नौकरा रा सीद्धा कान उड़ाई करी जखमी करी दित्ता। तिस नोकरा रा नां मलखुस थिया। 10 फिरी यीशु जी ने पतरस जो बोलेया, "अपणी तलवार मयान बिच रखख। कै मैं मुसिबतां रा गेया से कटोरा नी पियां जे परम पिता ने मिंजो दित्तेया है?" 11 फिरी रोमी सिपाईयां अत्ते

तिन्हेरे सुबेदारां, ते यहूदियाँ रे मन्दिर रे पैहरेदारां ने यीशु जी जो पकड़ी लेया।

### हन्ना रे सामणे यीशु जी

12 अत्ते तिन्हा जो बहनी करी पैले हन्ना का लेई गे जे उस साल रे बडे परोहट कैफा रा सौरा थिय्या। 13 एह कैफा सेहई महु थिय्या जिनि ए यहूदी मन्त्रियां जो सलाह दिती थी कि सब महुआं ताई इक रा मरणा खरा है। 14 शमौन पतरस अत्ते इक होर चेला यीशु जी रे पिच्छे चली पे। बड्डा परोहट इस चेले जो अच्छी तरह जाणदा थिय्या, इधेरे ताँई से यीशु जी कने बडे परोहट रे अंगणा अन्दर चली गया।

### पतरस रा मुकरी जाणा

15 अपण पतरस बाहर दरवजे का ई रूकी गया। फिरी बडे परोहट री जान-पछाण वाळा चेला बाहर गया अत्ते पैहेदारणी जो बोली करी पतरस जो अन्दर लेई आया। 16 तिस पैहेदारणी ने पतरस जो बोलेया, "होई सकदा तू बी यीशु रा ई चेला हो?" पतरस ने जवाब दित्तेया, "ना, मैं नी है।" 17 किजोकि ठंड बडी थी नौकर अत्ते मन्दिर रे पैहरेदार अग बाळी करी तित्ते खडे अग तपेया करेया थिय्ये। पतरस बी तिन्हा कने खडा थिय्या अत्ते अग तपेया करदा थिय्या। 18 फिरी बडे परोहट ने यीशु जी का तिन्हेरी सिक्सा अत्ते चेलेयाँ रे बारे पूछेया।

### महायाजक रा यीशु जी कने पुछपाछ करणा

19 यीशु जी ने तिस जो जवाब दित्तेया, "मैं हमेसा महु रे बीच हर कुसकी कने खुली करी गल कित्ती हिन। मैं हमेसा प्राथना सभा बिच अत्ते मन्दिर बिच, जित्ते सारे यहूदी इकट्ठा हुन्दे सिक्सा दिती है। मैं किच्छ बी लुकाई करी नी बोलेया। 20 फिरी तू मेरे का किजो पुछेया करदा है? मैं कै बोलेया है उन्हा का पुछ जिन्हा मिंजो सुणेया। मैं कै बोलेया, तिन्हा जो पता है।" 21 जाँ यीशु जी ने एह बोलेया ता मन्दिर रे इक पैहरेदार ने जे तित्ते ई खडा थिय्या, यीशु जी जो इक चांड मारी अत्ते बोलेया, तू बडे परोहट कने इय्यां गल करणे री हिम्मत किय्यां कित्ती?" 22 यीशु जी ने तिस जो जवाब दित्तेया, "जे मैं कोई बुरी गल कित्ती ता तिस जो साबित कर अत्ते दस्स कि उस बिच बुरा कै थिय्या, अत्ते जे मैं ठीक है बोलदा ता तू मिंजो मारदा किजो है?" 23 फिरी हन्ना ने तिन्हा जो बहिनैता ई बडे परोहट कैफा का भेज्ती दित्तेया। 24 जाँ शमौन पतरस खडी करी अग तपेया करदा थिया ताँ तिस का पुछेया, "कुदखी तू बी इसेरे चेलेयाँ बिच का ता नी है?" तिनिए इस गल का मन्हा कित्तेया। तिन्ने बोलेया "ना मैं नी है।"

### पतरस रा दुबारा मुकरी जाणा

25 बडे परोहट रे इक सेवक ने जे उस महु रा रिशतेदार थिय्या जिसेरा पतरस ने कान उड़ाया थिय्या, पुछेया, "दस्स कै मैं तिजो उस कने बनीचे बिच नी दिखेया थिय्या?" 26 पतरस फिरी मुकरी गया, अत्ते तिस्सी बेले मुरगे ने बांग देई दिती। 27 फिरी से यीशु जी जो कैफा रे घरे का रोमी राज्यपाल रे मैहल लेई गे। भ्याग रा बेला थिया। यहूदी महु राज्यपाल रे मैहल बिच अप्पू नी जाणा चाहन्दे थिय्ये कि कुदखी से भिडे नी होई जाओ। अत्ते फसह री धाम नी खाई सको।

### पिलातुस रे सामणे यीशु जी

28 ताँ पिलातुस उन्हा का बाहर आया अत्ते बोलेया, "तुसी इस महु पर कै इल्जाम लगाया करदे हिन?" 29 जवाब बिच तिन्हा ने उस जो बोलेया, "जे एह बेकसुर हुन्दा ता असी इस जो तुम्हारे हवाले किजो करणा थिय्या।" 30 पिलातुस ने तिन्हा जो बोलेया, "तुसी इस जो लेई जाओ अत्ते अपणे नियम रे विधान रे साहब कने इसेरा न्याय करो।" यहूदियाँ ने उस जो बोलेया, "असां जो कुसकी जो मौत री सजा दैणे रा हक नी है।" 31 एह इधेरे ताँई होया कि यीशु जी री गल पूरी होई जाओ जे तिन्हा ने अपणे मरणे रे बारे

बोली थी कि तिन्हेरी मौत किय्याँ होणी। 32 ताँ पिलातुस राज्यपाल रे महल बिच वापिस चली गया। अत्ते यीशु जी जो सदवाई करी तिन्हा का पुछेया, "कै तू यहूदियाँ रा राजा है?" 33 यीशु जी ने जवाब दित्तेया, "कै तू एह गल अपणे पास्से का बोलेया करदा है या मेरे बारे अन्दर होरनियाँ ने तिजो दस्सी हिन?" 34 पिलातुस ने जवाब दित्तेया, "कै तू सोचदा कि मैं यहूदी है? तेरे महुआं ने अत्ते बडे परोहटां ने तिजो मेरे हवाले कित्तेया है। तैं कै है कित्ते रा?" 35 यीशु जी ने जवाब दित्तेया, "मेरा राज्य इत्ते रा नी है; जे मेरा राज्य इत्ते रा हुन्दा ता मेरी प्रजा मिंजो यहूदियाँ रे हवाले दैणे का बचाणे ताँई लड़ाई करदी। अपण असलियत बिच मेरा राज्य इत्ते रा नी है।" 36 पिलातुस ने तिन्हा जो बोलेया, "ता तू राजा है?" यीशु जी ने जवाब दित्तेया, "तू बोल्दा कि मैं राजा है। मैं इधेरे ताँई पैदा होया अत्ते इस जरूरत कने दुनिया अन्दर आया कि सचाई री गवाई देयाँ। हर इक से महु जे सचाई रे पास्से है, से मेरी गल्लां सुणदा।" 37 पिलातुस ने यीशु जी जो बोलेया, "सच्च कै है?" एह बोली करी से फिरी यहूदियाँ का गया अत्ते उन्हा जो बोलेया, "मिन्जो ता इस महु अन्दर कोई गलती नी मिली। 38 अत्ते तुम्हारा एह रुआज है कि फसह रे त्यहार रे मौके बिच मैं तुम्हारे ताँई कुसकी इक जो छड्डी देयाँ।

### मौत री सजा रा हुकम

ता कै तुसी चाहन्दे कि मैं इस "यहूदिया रे राजे" जो तुम्हारे ताँई छड्डी देयाँ?" 39 अपण से चिन्डों मारी करी बोलणा लगे, "इस जो नी, बल्कि असां ताँई बरअब्बा जो छडी देयो।" (बरअब्बा इक डाकू थिया) 40 ताँ पिलातुस ने यीशु जी जो पकड़वाई करी कोडे लुआये।

19 सिपाईयाँ ने कंडेया री डाळी जो मोडी करी इक मुकुट बणाया अत्ते तिन्हेरे सिर पर रखी दित्तेया, अत्ते तिन्हा जो बैगणी रान्ग रे कपडे पुआये, 2 अत्ते तिन्हा का आईकरी बोलणा लगे, "यहूदिया रे राजे री लम्बी हो उमर हो" अत्ते तिन्हा जो चन्डा मारणा लगे। 3 पिलातुस इक बरी फिरी बाहर आया अत्ते महुआँ जो बोलया, "दिखो, मैं तिस जो तुम्हारे का फिरी बाहर लेई आन्दा ताकि तुसी जाणी सकन कि मैं तिस बिच कोई गलती नी दिखदा।" 4 ताँ यीशु जी बाहर आये। अत्ते तिन्हा ने कंडेया रा मुकुट अत्ते बैगणी रंग रा चोगा पाये रे थिया। अत्ते पिलातुस ने तिन्हा जो बोलेया, "एह रेह्या से महु।" 5 जाँ तिन्हा ने दिखेया ता बडे परोहटां अत्ते मन्दिर रे पैहरेदारां ने जोरे सणे बोलेया, "इस जो सूली पर चढाओ! इस जो सूली पर चढाई देयो!" पिलातुस ने तिन्हा जो बोलया, "तुसी ई इस जो लेई जाओ अत्ते सूली पर चढाई देयो, किजोकि मिंजो इस बिच कोई गलती नजर नी आया करदी है।" 6 यहूदियाँ ने तिस जो जवाब दित्तेया, "म्हारे नियम हिन जे बोलदे हिन, इस जो मरणा पैणा किजोकि इस ने अपु जो परमेश्वर रा पुत्र दस्सेया है।" 7 अवे जाँ पिलातुस ने एह गल्लां सुणी ताँ से बडा डरी गया। 8 अत्ते फिरी राज्यपाल रे मैहल रे अन्दर जाई करी यीशु जी जो बोलेया, "तू कुते का आया?" अपण यीशु जी ने तिस जो कोई जवाब नी दित्तेया। 9 फिरी पिलातुस ने तिस जो बोलया, "मेरे कने किजो नी है बोलदा? कै तू मेरे कने गल नी करणा चाहन्दा? कै तू नी जाणदा अत्ते तिजो सूली पर चढाणे रा हक बी मिंजो है।" 10 यीशु जी ने जवाब दित्तेया, "जे तिजो परम पिता का एह हक नी मिलदा, ता तेरा मेरे पर कोई हक नी हुन्दा; इधेरे ताँई जिस ने मिन्जो तेरे हवाले कित्तेया है, से तेरे का बी बड्डा पापी है।" 11 एह सुणी करी पिलातुस यीशु जी जो छड्डणे री कोसिस करणा लगेया, अपण यहूदी लैरा मारी-मारी करी बोलणा लगे, "जे तुसी इस जो छड्डी दिन्ने, ता तुसी कैसर रे दोस्त नी हिन, कोई बी जे अपु जो राजा बोलणे रा दावा करदा, से कैसर रे खिलाफ है।" 12 एह गल्लां सुणी करी पिलातुस यीशु जी जो बाहर उस जगह लेई गया जिस जो कि "पत्थर रा चबूतरा" बोलेया जांदा थिय्या। अत्ते इब्रानी भाषा बिच 'गबता।' अत्ते तित्ते न्याय करणे वाळे आसन पर बेहई गया। 13 एह फसह री त्यारी रा हफता थिय्या। अत्ते लगभग कोई दिन्ने रे बाहरा होणे बजे रेह। पिलातुस ने यहूदियाँ जो बोलेया, "एह रेह्या तुम्हारा राजा।" 14 अपण से फिरी लैरा मारणा लगे, "इस जो लेई जाओ! इस जो लेई जाओ! इस जो सूली पर चढाओ!" पिलातुस ने तिन्हा जो बोलया, "कै तुसी चाहन्दे कि मैं तुम्हारे राजे जो सूली पर चढाऊँ?" बडे परोहटां ने जवाब दित्तेया, "कैसर जो

छड्डी म्हारा होर कोई राजा नी है।" 15 फिरी पिलातुस ने यीशु जी जो सूली चढ़ाणे ताँई उन्हेरे हवाले करी दित्ता। 16 इधेरे ताँई से यीशु जी जो लेई गे, अते यीशु जी अपणी सूली चुक्की करी तिस जगह गे जिस जो कि "खोपड़ी री जगह" बोलेया जांदा थिय्या अत्ते इब्रानी भाषा बिच 'गुलगुता।'

### कूस पर चढ़ाया जाणा

17 तित्ते तिन्हा ने यीशु जी जो दो होर जणेयां कने सूली पर चढ़ाया, इक जो सीद्धे हत्थ पाससे, अत्ते दूये जो पूठे हत्थ पाससे ते मझाटे यीशु जी जो। 18 पिलातुस ने गलती नामा लिखी करी सूली पर लगाई दित्तेया, अते तिस बिच एह लिखे रा थिय्या, "यीशु नासरी, यहूदियाँ रा राजा।" 19 एह गलती नामा बडे जणे यहूदियाँ ने पढ़ेया, किजोकि से जगह जित्ते यीशु जी जो सूली पर चढ़ाया गया थिय्या सँहर कने ई थी; अत्ते चिड्डी इब्रानी, लतीनी, ते युनानी भाषा बिच लिखी गई थी। 20 ताँ यहूदियाँ रे परोहताँ रे प्रधाना ने पिलातुस जो बोलेया, "यहूदिया का राजा" मत लिख्खो अपण एह कि तिसने बोलेया, "मैं यहूदिया रा राजा है," 21 पिलातुस ने जवाब दित्तेया, "मैं जे लिख्खी दित्तेया, से लिख्खी दित्तेया।" 22 जाँ सिपाई यीशु जी जो सूली पर चढ़ाई बैठे ता तिन्हा यीशु जी रे कपडे चार हिस्से बिच बंडी ले, हर सिपाई रे ताँई इक हिस्सा। ते कुरता बी लेई लेया। किजोकि से कुरता बगैर सिलाई रे ऊपर का थल्ले ताँई बुणे रा थिय्या। 23 इधेरे ताँई तिन्हा ने अप्पु-मिते बोलेया, "इस जो फाड़ो मत बल्कि कुन्ने लैणा, इस ताँई पर्ची पाँदे।" ताकि शास्त्र रा एह वचन पूरा हो, तिन्हा ने मेरे कपडे अप्पु-मिते बंडी लेह अत्ते मेरे कपडे ताँई पर्ची पाई।" इधेरे ताँई सिपाईयां इय्यां कित्तेया। 24 यीशु जी री सूली कने तिन्हेरी माँ, अते तिन्हेरी माँ री भैण, क्लोपास री लाडी मरियम, अत्ते मरियम मगदलीनी खडितेरी थी। 25 जाँ यीशु जी ने अपणी माँ ते तिस चेले जो जिस कने से दा-पीड रखवे थिय्ये नेडे खडितेरा दिखेया ता अपणी माँ जो बोलया, "ओ जनानी, दिख, एह तेरा पुत्र है।" 26 फिरी यीशु जी ने चेले जो बोलेया, "एह रेहई तेरी माँ।" अते तिस्सी बेले से चेला तिस जो अपणे घरे लेई गेया। 27 इसेरे बाद यीशु जी ने एह जाणी के कि अवे सब कुच्छ पूरा होई गेया। फिरी इधेरे ताँई कि पवित्र शास्त्र री सचाई पूरी सहई हो यीशु जी ने बोलेया, "मिंजो प्यास है लगे री।"

### यीशु जी रा मरणा

28 तित्ते सिरके कने भरितेरा इक भांडा रख्खे रा थिय्या, अत्ते तिन्हा इक संपज जो सिरके बिच पुरा डूबाई करी जूफे री डाळी पर रख्खी करी तिन्हेरे मूँह कने लगाया। 29 जाँ यीशु जी ने से सिरका लेया, ता बोलेया, "पूरा होया।" ताँ तिन्हा ने अपणा सिर झुकाई करी अपणे प्राण छड्डी दित्ते। 30 से फसह री तयारी रा रोज थिय्या। सवत रे रोज लास सूली पर लटकी ना रेह(किजोकि से सवत रा रोज बड़ा खास दिन थिय्या), इधेरे ताँई यहूदियाँ ने पिलातुस जो बोलेया कि से हुकम दें कि इन्हेरी लत्ता भन्नी दित्ती जान अत्ते तिन्हेरी लास तित्ते का हटाई दित्ती जान।

### भाळा मारेया जाणा

31 अते सिपाईयाँ ने आई करी पैले, पैले वाळे री अत्ते फिरी दूजे वाळे री जे यीशु जी कने सूली पर चढ़ाये थिय्ये, लत्ता भन्नी। 32 अपण जाँ यीशु जी का आई करी दिखेया कि से मरी गेरे हिन, ताँ तिन्हेरी लता नी भन्नी। 33 अपण तिन्हा बिच का इक सिपाई ने यीशु जी री बरख्खी पर बरखा मारी दित्तेया अते तिस्सी बेले तिस बिच का बिच का खून अत्ते पाणी निकलेया। 34 जिन्ने एह दिख्खेया थिय्या, तिन्ने गवाई दित्ती, अते तिसेरी गवाई सच्ची है; अते से जाणदा है कि से सच बोलेया करदा है ताकि तुसी बी विस्वास करो। 35 एह गल्लाँ इधेरे ताँई होई कि पवित्रशास्त्र रा वचन पूरा हो, "तिसेरी कोई हड्डी तोड़ी नी जाणी।" 36 फिर पवित्र शास्त्र री इक होर हिस्से बिच लिख्खेरा है, "जिस जो तिन्हा ने बरखे कने बेधेया, तिन्हा तिस जो ताकणा।" 37 इन्हा गल्लाँ रे बाद अरिमतियाह रे यूसुफ ने जे यीशु जी रा चेला थिय्या, अपण यहूदिया रे डर मारे इस गल्ल जो छुपाई रखदा थिय्या, तिस ने पिलातुस का यीशु जी री

लास लेई जाणे ताँई छंदे कित्ते अत्ते पिलातुस ने तिसेरी अर्जी सुणी, अते से आईकरी तिन्हेरी लास लेई गेया।

### यीशु जी रा दब्बेया जाणा

38 अत्ते नीकुदेमुस बी, जे पैले यीशु जी का राती आया थिय्या, लगभग पंजाह किलो छेळ मुस्क वाळा तेल अते एलवा रा घोळ लियाया। 39 ताँ तिन्हा ने यीशु जी री लास जो लेया अत्ते यहूदिया रे दब्बणे रे रिवाज रे हिसाब कने तिस छेळ मुस्क वाळी चीज कर्ने(टलू बिच)कपडे बिच लपेटेया। 40 उस जगह पर जित्ते यीशु जी जो सूली पर चढ़ाया गया थिय्या तित्ते इक बगीचा थिय्या, अत्ते तिस बगीचे बिच इक नौई कब्र थी जिस बिच हल्ले ताँई कुसकी जो बी नी रख्खे रा थिय्या। 41 किजोकि से सवत री तयारी रा दिन शुक्रवार थिय्या अत्ते से कब्र बडे नेडे थी, इधेरे ताँई तिन्हा ने यीशु जी जो उस्सी बिच ई रख्खी दित्तेया। 42 हफते रे पैले रोजे मरियम मगदलीनी भ्यागा तडके न्यहारे बिच ई कब्र जो आई, अते दिख्खेया कि कब्र का पत्थर घिरे रा ए।

### खालि कबर

20 फिरी से दौड़ी करी शमौन पतरस अत्ते तिस दुजे चेले का जे यीशु जी जो प्यारा थिय्या, पुज्जी। अत्ते बोलणा लग्गी, "से प्रभु जी जो कब्र का निकाली करी लेई गे। अत्ते असा जो नी है पता कि तिन्हा ने उन्हा जो कुते रख्खे रा है।" 2 ताँ पतरस अते दुज्जा चेला निकळी करी कब्र पाससे चली गे। 3 से दोनों कने-कने दौड़या करदे थिय्ये, अपण दुज्जा चेला पतरस का अगे निकळी करी कब्र पर पैले पुजेया। 4 तिन्ने निहट्टा होईकरी (टलू रे) कपडे पेरे दिख्खे। अपण से अन्दर नी गेया। 5 ताँ शमौन पतरस बी, तिसेरे पीच्छे-पीच्छे आई पुजेया, अते कब्र रे अन्दर चली गेया अते तिस ने(टलू रे)कपडे पेरे दिख्खे; 6 अते से कपडा जे दब्बे बेले तिन्हेरे सिर कने बनिहतेरा थिय्या, (टलू)कपडेयाँ कने नी, बल्कि इक जगाह पर तैह लगाई करी रख्खे रा थिय्या, 7 ताँ दुज्जा चेला बी जेहडा कि कब्र पर पैले पुजेया थिय्या, अन्दर गेया अते तिन्ने दिख्खेया ते विस्वास कित्तेया। 8 से ता हल्ले तक बी पवित्रशास्त्र री इस गल्ल जो नी समझे थिय्ये कि उसेरा मरे रेयां बिच का जिंदा होणा पक्का है। 9 अते से चेले फिरी अपणे घरे हटी गे। 10 अपण मरियम कब्र रे बाहर खडी होई करी रुन्दी रेहई, अते रुन्दे-रुन्दे से कब्र अन्दर दिख्खणे ताँई झुकी,

### मरियम मगदलीनी जो दिसणा

11 अत्ते जित्ते यीशु जी री लास जो रख्खे रा थिय्या तित्ते तिस ने दो स्वर्गदूताँ जो चिट्टे कपडे पाये रे इक जो सिराणे अते दुजे जो पैरा का बैठे रे दिख्खेया। 12 अत्ते तिन्हा ने मरियम जो बोलेया, "ओ कुडिये, तू किजो रुन्दी है?" तिन्ने तिन्हा जो बोलेया, "से मेरे प्रभु जो चुक्की लेई गे हिन अते मिंजो नी है पता कि तिन्हा ने उन्हा जो कुते रख्खे रा है।" 13 एह बोलणे रे देर ई थी कि से पिच्छे मुडी अते तिन्ने यीशु जी जो खडितेरा रा दिख्खेया, अपण नी पछियाणेया कि से यीशु जी हिन। 14 यीशु जी ने तिस जो बोलेया, "ओ कुडिये, तू किजो रुन्दी है? तू कुस जो तोपदी है?" मरियम ने यीशु जी जो माली समझी करी तिन्हा जो बोलेया, "ओ महाराज, जे तुसा तिन्हा जो लेई गेरे हिन ता मिन्जो दस्सी देयो कि तिन्हा जो कुते रख्खेया रा है? मैं तिन्हा जो लेई जांगी।" 15 यीशु जी ने तिस जो बोलेया, "मरियम!" तिस ने पीच्छे मुडी करी तिन्हा जो इब्रानी भाषा बिच बोलेया, रब्बूनी!" मतलब 'ओ गरु जी'। 16 यीशु जी ने तिस जो बोलेया, "मिन्जो मत छू, किजोकि मैं हल्ले ताँई पिता का ऊपर नी गेया, अपण मेरे भ्याळा का जाईकरी तिन्हा जो बोली दे, "मैं अपणे परम पिता अते तुम्हारे परम पिता, अते अपणे परमेश्वर अते तुम्हारे परमेश्वर का ऊपर चली पेया।" 17 मरियम मगदलीनी ने जाईकरी चेलेयाँ जो दस्सेया कि, "मैं प्रभु जी जो दिख्खेया, अते तिन्हा ने मिंजो एह गल्लाँ दस्सी हिन।" 18 उसी रोज संझा बेले, जे हफते रा पैला रोज थिय्या, उन्हेरे चेलेयाँ ने यहूदियाँ रे डर रे मारे दरवाजे बंद कित्ते रे थिय्ये, उस्सी बेले यीशु जी आई



करी तिन्हरे मंझाटे खड़े होई गे अत्ते तिन्हा जो बोलेया, “तुसाँ जो शान्ति मिल्लो।”

### चेलेयाँ जो दिसणा

19 अते एह बोली करी तिन्हा ने अपणे हत्थ अते अपणी बख्खी तिन्हा जो दस्सी। चेलेयाँ ने जां यीशु जी जो दिख्केया ता बड़े खुस होये। 20 तां यीशु जी ने तिन्हा जो फिरी बोलेया, “तुसाँ जो शान्ति मिल्लो। जिय्याँ परम पिता ने मिन्जो भेजेया है, तिय्याँ ई मे बी तुसाँ जो भेजदा।” 21 एह बोली करी तिन्हा ने तिन्हा पर फूक मारी अते तिन्हा जो बोलेया, “पवित्र आत्मा लो। 22 जिस कुसकी रे पाप तुसी माफ करदे, उन्हा जो माफी मिलदी अत्ते जिन्हरे पाप तुसी माफ नी करदे, से बगेर माफी मिल्ले रे रेहन्दे हिन।” 23 थोमा जे बारहा बिच का इक थिय्या अत्ते दिदमुस मतलब तिस जो जुंउवा बोलदे थिय्ये, जां यीशु जी आये थिय्ये तां से उन्हेरे कने नी थिय्या।

### थोमा जो दिसणा

24 दुज्जे चेले तिस कने बोलणा लगे, “असाँ ने यीशु जी जो दिख्केया।” अपण तिस ने बोलेया, “जां तांई मैं उसेरे हत्थां बिच मेख्खा रे निसान नी दिख्खी लिंदा अत्ते उन्हा बिच अपणी उंगली नी पाई लिन्दा अत्ते उसेरी बख्खी बिच अपणा हत्थ नी पाई लिंदा, तां तांई मिंजो विस्वास नी होणा।” 25 आठु रोजां बाद तिन्हरे चेले फिरी घरे रे अन्दर थिय्ये, अते थोमा तिन्हरे कने थिय्या; ते दुआर बन्द थिय्ये, ताँ यीशु जी आई करी तिन्हरे मंझाटे खड़े होई गे अत्ते बोलेया, “तुसाँ जो शान्ति मिल्लो।” 26 फिरी यीशु जी ने थोमा जो बोलेया, “अपणी उंगली पाई करी मेरे हत्थ दिख्ख, अपणा हत्थ चौड़ा कर अत्ते मेरी बख्ख बिच पा। शक करणा छडु अत्ते विस्वास कर।” 27 एह सुणी करी थोमा ने जवाब दित्येया, “ओ मेरे प्रभु, ओ मेरे परमेश्वर।” 28 यीशु जी ने तिस जो बोलया, “तू मिन्जो दिख्खी करी, मेरे पर विस्वास कित्येया। अपण धन्न हिन से जे बिना दिख्खे रे मेरे पर विस्वास रखदे हिन।” 29 यीशु जी ने होर बी बड़े सारी हरान करणे वाळी निशानियाँ अपणे चेलेयाँ जो दस्सी, जे इस किताब बिच नी लिख्खी हिन;

### इस कताब रे लिख्खे जाणे र मकसद

30 अत्ते जे गल्लां लिख्खी हिन, से इधरे ताँई हिन कि तुसी विस्वास करो कि यीशु जी ई परमेश्वर रे पुत्र, मसीह हिन। अत्ते इधरे ताँई कि विस्वास करदे तुम्हारे जो उसेरे नां बिच जिंदगी मिल्लो। 31 इन्हा गल्लाँ रे बाद यीशु जी ने खुद जो तिबिरियस झीले रे कनारे चेलेयाँ रे सामणे लियाया।

### तिबिरियास झील रे कनारे चेलेयाँ जो दिसणा

21 अते इस तरिके कने सामणे आये: शमोन पतरस अते थोमा जिस जो कि दिदमुस बी बोलेया जान्दा, अते गलील रे काना सैहर का नतनएल, जबदी रे पुत्र, अते यीशु जी रे चेलेयाँ बिच का दो जणे होर इकठे थिय्ये। 2 शमोन पतरस ने तिन्हा जो बोलेया, “मैं मच्छी पकड़ने चलया।” तिन्हा ने तिस जो बोलेया, “असी बी तेरे कने चलदे।” अत्ते से निकळी करी किशती पर चढ़ी गे, अपण तिस राती किच्छ बी नी पकड़या। 3 भ्याग हुन्दे ई यीशु जी कनारे पर आये; अपण चेलेयाँ ने नी पछियाणेया कि से यीशु जी हिन। 4 ताँ फिरी यीशु जी ने तिन्हा जो बोलेया, “ओ बच्चो, कै तुम्हारे का किच्छ मच्छियाँ हिन?” तिन्हा ने जवाब दित्येया, “ना।” 5 यीशु जी ने उन्हा जो बोलेया, किशती रे सज्जे पाससे जाल पाओ ता किच्छ मिलणा।” इधरे ताँई तिन्हा ने जाल पाया अपण मच्छियाँ जादा होणे री वजह कने तिन्हा का जाल खीची नी होया। 6 ता तिस चेले ने जिस कने यीशु जी प्यार करदे थिय्ये, पतरस जो बोलेया, “एह ता प्रभु हिन।” शमोन पतरस ने एह सुणी करी कि से प्रभु हिन बाहरला कपड़ा पाई लित्येया (किजोकि से नंगा थिय्या) अत्ते झीला पर कुदी पेया। 7 अपण दुज्जे चेले किशती पर मच्छियाँ कने भरितेरा जाल

खीचदे कनारे आये, किजोकि से कनारे का जादा नी, अपण कोई दो सौ हत्थ दूर थिय्ये। 8 जाँ से कनारे आये ताँ तिन्हा ने तिन्हे बख्खे रेह कौळे अत्ते तिन्हा पर मच्छी ते रोटी रख्खे री दिख्खी। 9 यीशु जी ने तिन्हा जो बोलेया, “जे मच्छियाँ तुसी अबे पकड़ी हिन तिन्हा बिच का किच्छ लियाओ।”

10 शमोन पतरस गया अत्ते किशती पर चढ़ी करी इक सौ त्रियुन्जा बड्डी मच्छियाँ कने भरितेरा जाल कनारे पर खीची लियाया, अते इतनी मच्छियाँ होणे पर बी जाल नी फट्टेया। 11 यीशु जी ने तिन्हा जो बोलेया, “आओ, रोटी खाओ।” चेलेयाँ बिच का कुसकी री बी हिम्मत नी होई कि, “तू कुण ए?” किजोकि से जाणदे थिय्ये कि एह प्रभु ई हिन। 12 यीशु जी आये अत्ते रोटी लेईकरी तिन्हा जो दिती ते तिय्याँ ई मच्छी बी। 13 एह तिज्जी बारी ए कि यीशु जी मरे रे बिच का जिन्दा होणे का बाद चेलेयाँ जो लिबबे। 14 रोटी खाणे का बाद यीशु जी ने शमोन पतरस जो बोलेया, “ओ शमोन, यहून्ना रे पुत्र, कै तू इन का जादा मेरे कने प्यार करदा?” तिन्हे तिन्हा जो बोलेया, “हन्जी प्रभु जी; तुसी ता जाणदे हिन कि मैं तुसा कने प्यार करदा।” तिन्हा ने तिस जो बोलेया, मेरे छेलूआँ जो चरा।”

### यीशु जी ते पतरस

15 तिन्हा ने फिरी दुज्जी बरी तिस जो बोलेया, “ओ शमोन, यहून्ना रे पुत्र, कै तू मेरे कने प्यार करदा?” तिन्हे तिन्हा जो बोलेया, “हन्जी प्रभु जी; तुसी ता जाणदे हिन कि मैं तुसा कने बड़ा प्यार करदा।” तिन्हा ने तिस जो बोलेया, मेरी भेड़ा री रखवाली कर।” 16 तिन्हा ने तिज्जी बरी तिस जो बोलेया, “ओ शमोन, यहून्ना रे पुत्र, कै तू मेरे कने प्यार रखदा?” पतरस उदास होई गया कि तिन्हा ने तिस का तिज्जी बरी इय्याँ बोलेया कि, “कै तू मेरे कने प्यार रखदा?” अते तिस ने बोलेया, “ओ प्रभु जी, तुसी ता सब किच्छ जाणदे; तुसी जाणदे हिन कि मैं तुसाँ कने प्यार रखदा।” यीशु जी ने तिस जो बोलेया, “मेरी भेड़ा जो चरा। 17 मैं तेरे कने सच्च सच्च बोलदा, जाँ तू जुआन थिय्या ताँ अपणी कमर बन्नी करी जित्ते चान्दा थिय्या तित्ते चली जादा थिय्या; अपण जाँ तू बूड्डा होणा ताँ तू अपणे हत्थ फैलाणे, अते दुज्जे ने तेरी कमर बन्नी करी जित्ते तू नी चान्दा तित्ते तिज्जे लेई जाणा।” 18 तिन्हा ने एह दिखाणे ताँई इय्याँ बोलेया कि पतरस ने कदेई मौत कने परमेश्वर री महिमा करणी। इत्तणा बोली करी यीशु जी ने पतरस जो बोलेया, “मेरे पिच्छे चल।” 19 पतरस मुड़ेया अते दिख्खेया कि से चेला जिस कने यीशु जी प्यार रखदे थिय्ये, उन्हेरे पिच्छे आया करदा ए। एह सेहई थिय्या जिन्हे रोटी खांदे बेले तिन्हेरी छाती पाससे झुकी करी पुच्छेया थिय्या, “ओ प्रभु, तुम्हारे जो धोखा देई करी पकड़वाणे वाळा कुण ए?”

### यीशु जी तिन्हरे प्यारा चेला

20 तिस जो दिख्खी करी पतरस ने यीशु जी जो बोलेया, “ओ प्रभु जी, इसेरा कै हुणा?” 21 यीशु जी ने तिस जो बोलेया, “जे मैं चाँह कि से मेरे आणे तक, एह इत्ते ई रेह, ता तिज्जे कै? तू मेरे पिच्छे चल।” 22 इय्याँ एह गल्ल भाइयाँ बिच फैली गई कि तिस चेले ने नी मरणा; अपण यीशु जी ने तिस कने एह नी बोलेया थिय्या कि तिस ने नी मरणा। अपण ऐई बोलेया थिय्या, “जे मैं एह चाँह कि से मेरे आणे तक, एह इत्ते ई रेह, ता तिज्जे कै?” 23 एह सेहई चेला ए जे इन्हा गल्लाँ री गवाई दिन्दा अत्ते जिन्हे इन्हा गल्लाँ जो लिख्खेया, अते असी जाणदे कि तिसेरी गवाई सच्ची ए।

### उपसहार

24 अत्ते होर बि बड़े सारे कम्म हिन, जे यीशु जी ने कित्ते। जे उन्हा जो इक इक करी के लिख्खे, ता मैं समझदा कि जे कताबाँ लिखी जान्दिया ता एह दुनियाँ छोटी पेई जाणी थी। 25 हे थियुफिलूस, मैं पैली कताब उन्हा सारी गल्लाँ रे बारे बिच लिख्खे री थी जे यीशु जी सुरुआत का लेई करी करदे ते सखांदे रेह।

# प्रेरितों के काम

## परिचय

1 तिस दिन तिकर जां तिकर से तिन्हा चेल्लेयां जो जिन्हा जो तिन्हा ने चुणेया थिया पवित्र-आत्मा रे जरिये हुकम देइ करी उपपर चुक्रेया नी गया। 2 तिन्हा ने दुख झेळणे रे बाद मते सारे पक्के सबूतां कने अप्पु जो तिन्हेरे सामणे जिन्हा दस्सेया, ते चाळी दिनां तिकर से तिन्हा जो दिसदे रेह, ते परमेश्वर रे राज री गल्लां करदे रेह। 3 ते तिन्हा कने मिली करी तिन्हेरे जो हुकम दित्तेया, "यरुशलेम जो मत छड्डो, अपण पिता री तिस वादे रे पुरे होणे रा इतंजार करदे रेयो, जिसेरी गल्लां तुसी मेरे का सुणी बेट्टे रे हिन्। 4 किजोकी यहून्ना ने ता पाणी बिच बपतिस्मा दित्ते रा है अपण थोड़े रोजां बाद तुसी पवित्र-आत्मा का बपतिस्मा पाणा। 5 अते तिन्हा ने कट्टे होई करी उन्हेरे का पुच्छेया, "हे प्रभु, क्या तुसी इसी बेले इस्राएल रा राज हटाई दिगां?"

### यीशु जी र स्वर्ग पर चुक्रेया जाणा

6 उन्हा ने तिन्हेरे जो बोलेया, "उन्हा वेलेयां या युगां जो जाणना, जिन्हेरे जो पिता ने अपणे ही हक बिच रखे रा है, तूसां रा कम्म नी है। 7 अपण जां पवित्रात्मा तुसां पर ईणा तां तुसी ताकत पाणी; ते यरुशलेम ते सारी यहुदिया ते सामरिया बिच, ते धरती रे आखर तिकर तुसी मेरे ग्वाह होणे।" 8 ए बोलि करी ओ तिन्हेरे दिखदे-दिखदे उपपर चुक्रे लेय गये, ते बढळां ने तिन्हेरे जो तिन्हेरी हख्खां का लुकाइ लिच्छेया। 9 तिन्हेरे जादें बेले जां से आसमान रे पाससे दिख्खेया करदे थिये, तां दिख्खो, दो म्हणु चिट्टे कपड़े पाई करी तिन्हेरे नेडे आई खडित्ते, 10 ते तिन्हेरे जो बोलेया, "हे गलीली म्हणुओं, तुसी किजो खडी करी आसमान पाससे दिख्खेया करदे हिन्? एई यीशु जी, जे तुम्हारे का स्वर्ग पर चुक्रे लिच्छे गे रे हिन्, जिस तरिके कने तुसी उन्हा जो स्वर्ग पर जादें दिख्खेया तिसी तरिके कने उन्हा ने फिरी ईणा।" 11 तां से जेतून नां रे पहाडा का जे यरुशलेम रे नेडे इक्क सवत रे दिन री दुरी पर है, यरुशलेम जो हटी आए।

### मत्तियाह जो यहुदा री जगह मिलणा

12 जां से उते पुजे तां तिस अटारी पर गे, जित्ते पतरस ते यहुन्ना ते याकूब ते अन्द्रियास ते फिलिप्पुस ते थोमा ते बरतुलमै ते मत्ति ते हलफई रा मुडां याकूब ते शमौन जेलोतेस ते याकूब रा मुडां यहुदा रेहन्दे थिये। 13 ए सारे मत्ती जनानियां ते यीशु जी री मां मरियम ते उन्हेरे भ्याळां कने इक्क मन होई करी प्रार्थना बिच लगी रेय। 14 तिन्हा ई दिनां बिच पतरस भाईयां रे बिच जो इक्क सौ बी लौकां रे नेडे-तेडे थिये, खडी करी बोलणा लगेया, 15 हे भाईयो, जरूरी थिया कि पवित्र-शास्त्र रा ओ लेख पुरा हो जे पवित्रात्मा ने दाउद रे मुँह का यहुदा रे बारे बिच, जे यीशु जी रे पकडणे वाळेयां रा प्रधान थिया पैहले का बोले रा थिया। 16 किजोकी ओ ता असां बिच गिणेया गया, ते इस सेवकाई बिच हिस्सेदार होया। 17 (तिन्नि ए पाप री कमाई कने इक्क खेत्तर खरीदि लिच्छा, ते सरे रे भारे पेया ते तिसेरा पेट फटी गया ते तिसेरी सारी आन्दां निकळी आई। 18 इस गल्ल जो यरुशलेम रे सारे रैके वाळे जाणी गे, इत्ते तिकर कि तिस खेत्तर रा ना तिन्हेरी भाषा बिच 'हकलदमा' मतलब की 'खुन रा खेत्तर' पेई गया।) 19 भजन सहिता बिच लिख्खे रा है, 'तिसेरा घर उजडी

जाए, ते तिसेरे बिच कोई ना बसे ते, 'तिसेरा औहदा कोई होर लेई ले।' 20 इस ताई जिन्ने दिनां तिकर प्रभु यीशु जी हमारे कन्ने आदें जादें रेह - मतलब की यहून्ना रे बपतिस्मे का लेइ करी तिसेरे हमारे नेडे का चुक्रे लिच्छे जाणे तिकर-जे लोग बराबर असां कन्ने रेह, 21 ठीक है कि तिन्हेरे बिच का इक्क म्हणु हमारे कने तिन्हेरे जिदें होणे रा ग्वाह होई जाए।" 22 तां उन्हा ने दो जो खडा कित्ता, इक्क युसुफ जो बर-सबा कहलादां, जिसेरा दुआ ना युसतुस है, दुए मत्तियाह जो, 23 ते ए प्रार्थना कित्ती, "हे प्रभु तुसी जे सारेयां रे मनां जो जाणदे, ए प्रकट करो कि इन्नाह दोन्नां बिच का तुसि कुसजो चुणे रा है, 24 कि से इस सेवकाई ते चेल्लेपन रा हक ले, जिसजो यहुदा छड्डि करी अपणी जगह चली गया।" 25 तां तिन्हा ने तिन्हेरे बारे बिच छिट्टियां पाई, ते चिट्टि मत्तियाह रे ना पर निकळी। अते ओ तिन्हा ग्यारह चेल्लेयां कने गिणेया गया। 26 जां पित्तेकुस्त रा दिन आया, तां से सारे इक्क जगह कठित्ते रे थिये।

### पवित्र आत्मा रा उतरणा

2 चाणचक्रे ई आसमान का इक्क बड्डे तूफान जदेई सनसनाहट री आवाज होई, ते तिस कने सारा घर जित्ते से बैठे रे थिये, गुंजी गया। 2 ते तिन्हा जो आग जदेई जिब्बां फटदी होई लिब्बि ते तिन्हा बिच का हर इक्क पर आई टिकी। 3 ते चाणचक्रे इ आसमान का सनसनाहट री आवाज होइ, ते जित्ते से लोक बैठे रे थिये, से गुर्जी गया। 4 से सारे पवित्र आत्मा कने भरी गे, ते जिय्यां आत्मा ने तिन्हा जो बोलणे री ताकत दित्ती से बखरी-बखरी बोलि बिच बोलणा लगे। 5 दुनिया रे हर इक्क जाति बिच का भक्त यहुदी यरुशलेम बिच रेह्या करदे थिये। 6 जां ए आवाज होई तां भीड कड्डि गई ते लोक डरी गे, किजोकी हर इक्क जो एइ सुणिदां थिया की ए मेरी ई बोलि बिच बोलेया करदे हिन्। 7 ओ सारे हरान होई करी बोलणा लगे, "दिख्खो, ए जे बोलेया करदे हिन् क्या सारे गलीलि नी हिन्? 8 तां फिरी किजो असां बिच का हर इक्क अपणी-अपणी मातृ भाषा बिच किय्यां सुणेया करदा है? 9 असी जे पार्थी, मेदी, एलामी, मेसोपोटामिया, यहुदिया, कप्पूकिया, पुन्तुस ते आसीया 10 ते फुगिया, पंफुलिया, मिस्र, लिबिया, देश जे कुरेने रे नेडे-तेडे हिन्, इन्हा सारे देसां रे रैहणे वाळे ते रोम रे रैके वाळे, 11 मतलब की यहुदी ते यहुदी धर्म अपणाणे वाळे, क्रेती ते अरबी बी हिन्, अपण अपणी-अपणी भाषा बिच तिन्हेरे का परमेश्वर रे बड्डे-बड्डे कम्मां री गल्लां सुणदे।" 12 ते ओ सारे हरान होए ते डरी करी इक्क दुए जो बोलणा लगे, "एह क्या होया करदा है?" 13 अपण होरनां ने मजाक उडाई करी बोलेया, "ओ तां नौई शराब रे नशे बिच हिन्।" 14 तां पतरस तिन्हा ग्याराह कने खडित्ता ते उच्ची आवाज बिच बोलणा लगेया, "ओ यहुदियों ते ओ यरुशलेम रे सारे रैके वाळेओ, ए जाणी लेयो, ते कन्न लाई करी मेरी गल्लां सुणो।

### पतरस रा भाषण

15 जिय्यां तुसी समजेया करदे हिन्, एह लोक ने बिच नी हिन्, किजोकी हले भ्यागे रे नौ ई बजे रे हिन् 16 अपण एह से गल्ल है, जे योएल भविष्यद्वक्ता रे जरिए बोली गई थी; 17 'परमेश्वर बोलदे, कि आखरी दिनां बिच इय्यां होणा

कि मैं अपना आत्मा सारे लोकां पर उधरणा, ते तुसां रे मुडें ते तुसां री री कुडीयां ने भविष्यवाणी करणी,ते तुसां रे जवान्नां ने दर्शन दिखणे ते तुसां रे बुर्जुगां ने सुपणे दिखणे। 18 इत्ते तिकर मैं अपने नोकर ते नोकराणियां पर बी तिन्हा दिनां बिच अपनी आत्मा बिच का उधरणा,ते तिन्हा ने भविष्यवाणीयां करणी। 19 ते मैं उप्पर आसमान बिच अन्नोखे कम्म ते थल्ले धरती पर निशानियां, मतलब की खून, ते ग,ते धुएं रा बढळ दिखाना। 20 परमेश्वर रे महान ते तेजस्वी दिन रे आणे का पैल्ले सूरज न्याहा ते चाँद खुन जदेया होई जाणा। 21 ते जे कोई परमेश्वर रा ना लिह्मां उन्निए छुटकारा पाणा। 22 "ओ इस्राएलियों, ए गल्लां सूपां: यीशु नासरी इक्क म्हणु थिये जिन्हेरा परमेश्वर रे पास्से का होणे रा सबूत तिन्हा सक्ति रे कम्मां, हरानी रे कम्मां ते निशानियां कने अपू जो साबित किता, जे परमेश्वर ने तुसां मझाटे तिन्हेरे का करी दखाए जिन्हेरे जो तुसी अप्पु ई जाणदे 23 तिसी यीशु जी जो, जे परमेश्वर री ठेहराई री योजना ते पल्ला ज्ञान रे मुताबक पकड़ावाए गे, तिन्हा ने अर्धमियां रे हाथ्थ का सुळी पर चढवाई करी मरवाई दिता 24 अपण तिन्हा ई जो परमेश्वर ने मौत रे बधन का छुड़ाई करी जिन्दा करी दिता; किजोकी ए नामुकिन थिया कि ओ तिसरे बस बिच रहन्दे। 25 किजोकी दाउद तिन्हेरे बारे बिच बोलदा, 'मैं प्रभू जो हमेशा अपने सामणे दिखदा रेह्या किजोकी ओ मेरे दैह्ले पास्से हिन, ताकी मैं छुडकी ना पैय्यां। 26 इसी वजह कने मेरा मन खुश होया ते मेरी जिब मगन होई; बल्कि मेरा सरीर बी उम्मीद बीच बणी रह्ला। 27 किजोकी तुसी मेरे जान जो पताळ बिच नी छडणा; ते ना अपने पबित्र म्हणु जो सडणा ई दिगां। 28 तुसी मेरे जो जिन्दगी रा रस्ता दस्से रा है; तुसी मेरे जो अपने दर्शन कने खुशी कने भरी दैणा। 29 ओ मेरे भाईयो, मैं कुलपती दाउद रे बारे बिच तुसां कने हिम्मत कने बोल्लि सकदा कि ओ तां मरी गया ते दब्बेया बी गया ते तिसेरी कन्न आज तिकर हमारे इत्ते पाई जादीं। 30 ओ भविष्यदक्ता थिया, ओ जाणदा थिया कि परमेश्वर ने मेरे कने कसम खाई री है कि मेरे घराने बिच का इक्क म्हणु जो तेरे गट्टि पर बैठाणा; 31 तिनि ए होणे वाळी गल्ल जो पैहल्ले का ई दिखि करी मसीह रे जिन्दे होणे रे बारे बिच भविष्यवाणी किती की ना तां तिन्हा रा प्राण पताळ बिच छडुया गया ते ना तिन्हेरा जिस्म सडी पाया। 32 इसी यीशु जी जो परमेश्वर ने जिन्दा किन्तेया, जिसेरे असी सारे ग्वाह हिन। 33 इस तरिके कने परमेश्वर रे दैहणे हाथ्थ का सबका बड्डा पदवी पाई करी, ते पिता का से पबित्रात्मा पाई करी जिसेरा वादा किता गया थिया, उन्हा ने ए उधेरी दिन्ते रा है जे तुसी दिखदे ते सुणदे हिन। 34 किजोकी दाउद ता स्वर्ग पर नी चढेया; अपण से आप बोळदा, 'प्रभू ने मेरे प्रभू जो बोलेया, मेरे दैहणे बैहू, 35 जां तिकर की मैं तेरे दुस्मणा जो तेरे पैरां थल्ले रा पटरा नी बणाई देयां। 36 अते अवे इस्राएल रा सारा घराना खरी तरिके कने जाणी लेय कि परमेश्वर ने तिसी यीशु जी जो जिसजो तुसी सुळी पर चढाई दिता, प्रभू बी ठेहराया ते मसीह बी। 37 तां सुनणे वाळ्यां रे दिल छिदी गे, ते पतरस ते बाकि चेल्लेयां का पुछणा लगे, 'हे भाईयो, असी क्या करन?' 38 पतरस ने तिन्हा जो बोलेया, 'मन फराओ, ते तुसी बिच का हर इक्क अपने-अपणे पाप्पां री माफी वास्ते यीशु मसीह जी रे ना कने बपतिस्मा ले; तां तुसी पवित्रात्मा रा दान पाणा। 39 किजोकी ए वादा तुसी, तुसां री औलादां, ते उन्हा सारे दुर-दुर रे लोकां वास्ते बी है जिन्हेरे जो प्रभू हमारा परमेश्वर अपने नेडे सदगा। 40 तिन्हिये होर मती गल्लां कने बी ग्वाई देई-देई करी समझाया कि अपने आप जो इस टेडि जाती का बचाओ। 41 अते जिन्हा ने तिसेरा वचन अपनाया तिन्हा ने बपतिस्मा लिता; ते तिसी दिन तिन हजार लोकां रे लगभग तिन्हा बिच मिली गे। 42 ते से चेल्लेयां का शिक्षा पाणे, ते सगती रखणे, ते रोडि तोड़णे, ते प्रार्थना करणे बिच मगन रेय। 43 ते सारे लोकां पर डर छाई गया, मते सारे अनौखे कम्म ते निशानियां प्रेरितां रे जरिए सामणे आन्दे थिये।

### विश्वासियां री सगती

44 ते सारे भरोसा करणे वाळे कट्टे रहन्दे थिये, ते तिन्हेरी सारी चिजां आपस बिच साझे बिच थीं। 45 से अपनी जायदाद ते समान बेचि-बेचि करी जदेई जिसेरी जरूरत हूदीं थी बंडि देया करदे थिये। 46 से हर रोज इक्क मन होई करी देहरे बिच कठिदें थिये, ते घर-घर रोडि तोड़दे होए खुशी ते मन रे

सिद्धेपन कने भोजन करेया करदे थे, 47 ते परमेश्वर री स्तूती करेया करदे थिये, ते सारे लोक तिन्हा का खुस थिये: ते जे छुटकारा पादें थिये, तिन्हेरे जो प्रभू हर दिन तिन्हा बिच मळाई दिदें थिये।

### लट्टे भिखारी रा ठीक होणा

3 ते लोक इकक जन्म रे लट्टे जो अणेया करदे थिये, जिसजो से हर रोज देहरे रे तिस दरवाजे का जे 'सुन्दर केहलांदा, बिहाळी दिदें थिये कि से देहरे बिच जाणे वाळ्यां का भिख मर्ग। 2 जां तिन्हिए पतरस ते युहन्ना जो देहरे बिच जादें दिखेया, तां तिन्हेरे का भिख मर्ग। 3 पतरस ने युहन्ना कने तिसेरे पास्से ध्यान कने दिखि करी बोलेया, 'हमारे पास्से दिख्ख;', 4 अते से तिन्हेरे का किछ पाणे री उम्मीद रखि करी तिन्हेरे पास्से दिखणा लगेया। 5 तां पतरस ने बोलेया, 'चाँदी ते सोना ता मेरे का नी है, अपण जे मेरे का है से तेरे जो दिदां; यीशु मसीह नासरी जी रे ना कने चल-फिर'। 6 ते तिन्हिए तिसरा सीद्धा हथ्थ पकड़ी करी तिसजो चुकेया; ते तिस्सि वेल्ले तिसेरे पैरां ते गोडुयां बिच ताकत जोर आई गया। 7 ओ उटकी करी खडी गया ते चलणे-फिरणे लगि पेया; ते चलदा, ते उटकदा, ते परमेश्वर री महिमा करदा होया तिन्हेरे कने देहरे बिच गया। 8 सारे लोकां ने तिसजो चलदे-फिरदे ते परमेश्वर री महीमा करदे दिखि करी, 9 तिसजो पेहचाणी लिन्तेया कि ए सेइ है जे देहरे रे 'सुन्दर' दरवाजे का बेइ करी भिख मर्गोया करदा थिया; ते तिस गल्ल कने जे तिस कने होइ थी से बडे हैरान होए। 10 जां तिन्हिए पतरस ते युहन्ना जो पकड़े रा थीया, तां सारे लोक बडे हरान हुदें होए तिस बेराडें बिच जे सुलेमान रा केहलादां, तिन्हेरे का दोडी करी आए।

### मन्दर बिच पतरस रा उपदेश

11 ए दिखि करी पतरस ने लोकां जो बोलेया, 'हे इस्राएलियों, तुसी इस म्हणु पर किजो हरान हुदें, ते असां पास्से इय्यां किजो दिखेया करदे हिन कि मन्नां असा ई ने अपनी ताकत या भक्ति कने इसजो चलणे-फिरणे जोगा बणाई दिता। 12 अब्राहम ते इसहाक ते याकूब रे परमेश्वर, हमारे बाब्बे-दाद्रे रे परमेश्वर ने अपने सेवक यीशु जी री महीमा किती, जिन्हेरे जो तुसी पकड़वाई दिता, ते जां पिलातुस ने तिन्हेरे जो छड्डी देणे रा फैसला किता, तां तुसी तिसेरे सामणे तिन्हेरा इन्कार किता। 13 तुसी तिस पवित्र ते धर्मी रा इन्कार किता, ते मिन्नत किती कि इक्क हथयारे जो तुसां वास्ते छड्डी दिता जाए; 14 ते तुसी जिन्दगी रे राजकुमार जो मारी रखेया, जिसजो परमेश्वर ने मुदेंयां बिच का जिन्दा किता; ते इस गल्ल रे असी ग्वाह हिन। 15 ते तिन्हिए तिसरा सीद्धा हथ्थ पकड़ी करी तिसजो चुकेया; ते तिस्सि वेल्ले तिसेरे पैरां ते गोडुयां बिच ताकत जोर आई गया। 15 ते तिन्हा ई रे ना ने, तिस भरोसे रे वजह कने जे तिन्हेरे ना पर है, इस म्हणु जो जिसजो तुसी दिखदे ते जाणदे हिन ताकत दिन्ते री है। तिसी भरोसे ने जे तिन्हेरे वजह कने है, इसजो तुसी सारेयां रे सामणे बिल्कुल भला-चगां करी दिन्ते रा है। 16 'अवे हे भाईयो, मैं जाणदा कि ए कम्म तुसी नासमजी बिच किता, ते तियां इ तुसां रे सरदारं ने बी किन्तेया। 17 अपण जिन्हा गल्लां जो परमेश्वर ने सारे भविष्यदक्ता रे मुँह का पैहल्ले ई दस्सि दिन्ते रा थिया, कि तिन्हेरे मसीह ने दुख झेलणा, तिन्हा जो उन्हा ने इस तरिके कने पुरा किता। 18 इस ताई, मन फराओ ते हटी आओ की तुसां रे पाप मिटाए जाण जिस कने परमेश्वर रे सामणे सुख-चैन रे दिन आण, 19 ते से यीशु जी जो भेजे जे तुसां वास्ते पैहल्ले इ का मसीह ठहराएगे रे हिन। ; 20 जरूरी है कि ओ स्वर्ग बिच तिस वेल्ले रहण जां तिकर की ओ सारी गल्लां रा सुधार ना करी लैण जिसेरी गल्ल पूराणे जमाने का परमेश्वर ने अपने पवित्र भविष्यदक्ताओं रे मुँह का किती री हिन। 21 जिय्यां कि मुसा ने बोलेया, 'प्रभू परमेश्वर तुसां रे भाईयां बिच का तुसां वास्ते मेरे साई इक्क भविष्यदक्ता जो उठाणा, जे किछ से तुसां जो बोले, से सुणना। 22 अपण हर इक्क म्हणु जे तिस भविष्यदक्ता री ना सुणे, लोकां बिच का नाश किता जाणा। 23 ते शमुएल का लेई करी तिसेरे बाद वाळ्यां तिकर जिन्हे भविष्यदक्ता बोले तिन्हा सारेयां ने इन्हा दिनां रा पैगाम दिन्ते रा है। 24 तुसी भविष्यदक्ता री औलादां ते तिस वादे रे हिस्सेदार हो जे परमेश्वर ने तुसां रे बाब्बे-दाद्रे कने बन्नि, जां तिन्हा ने अब्राहम कने बोलेया, 'तेरे वशं रे वजह कने धरती रे सारे घराने ने बरकत

पाणी।' 25 परमेश्वर ने अपने सेवक जो चुक्कि करी पैहले तुसां का भेजेया, कि तुसां बिच का हर इक्क जो तिसेरी बुराईयां का फेरी करी बरकत दे।' 26 जां से लोकां जो ए बोलेया करदे थिये, तां याजक ते देहरे रे सरदार ते सदूकी पर चढ़ी आए।

### महासभा रे सामणे पतरस ते युहन्ना

4 किजोकी से बड़े गुस्से होए कि से लोकां जो सखादें ते यीशु जी रा उदारण देइ देइ करी मरे होए रे लोकां रे जिन्दे होणे रा प्रचार करदे थे। 2 तिन्हा ने तिन्हेरे जो पकड़ी करी दुजे दिन तिकर हवालात बिच रखेया किजोकी साजं होइ गे रे थी। 3 अपण वचन रे सुनणे वाळेयां बिच का मते जणेया ने भरोसा कित्ता, ते तिन्हेरी गिनती लगभग पाँज हजार आदमियां तिर होइ गी। 4 दुए दिन इयां होया कि तिन्हेरे सरदार, पुरनिये ते शास्त्रि, 5 ते महायाजक हन्ना ते कैफा ते युहन्ना ते सिकदंर ते जिन्ने बी महायाजक रे खानदान रे थिये, सारे यरुशलम बिच कठी गे। 6 से तिन्हा जो बिच मझाटे खड़ेरी करी पुच्छणा लगे कि तुसां ने ए कम्म कुस ताकत ते कुस नां कने कित्ते रा है। 7 तां पतरस ने पवित्रात्मा कने भरी करी तिन्हेरे जो बोलेया, 8 "ओ लोकां रे सरदारों ते पुरनियों, इस कमजोर म्हणु कने जे भलाई कित्ती गे री है, जे आज्ज असां तिसेरे बारे बिच पुछ-ताछ कित्ती जादी, कि से कियां खरा होया। 9 तां तुसी सारे रे सारे इस्राएली जाणी लेण कि यीशु मसीह नासरी रे नां कने जिन्हा जो तुसी कुस पर चढाया थिया, ते परमेश्वर ने मरे रे लोकां बिच का जिन्दा कित्ता, ए म्हणु तुसां रे सामणे ठीक-ठाक खडित्ते रा है। 10 ए से इ बट्टा है जिसजो तुसी राजमिस्त्रियां ने बेकार समजेया ते से कुणे रे सिरे रा बट्टा बणी गेया। 11 कुसकी दुए रे जरिये छुटकारा नी; किजोकी स्वर्ग रे थले म्हणुआं बिच होर कोइ दुआ ना नी दित्तेया गेया जिसेरे जरिये असी छुटकारा पाइ सके।" 12 जां तिन्हा ने पतरस ते युहन्ना रि हिम्मत दिखिखे ए ए दिखेया कि ए अनपढ़ ते आम लोक हिन तां हेरान होए; फिरी तिन्हेरे जो पेहचानेया कि ए यीशु कने रेय रे हिन। 13 तिस म्हणुजो जे ठीक होया थिया तिन्हेरे कने खडित्ते रा दिखिखेया से विरोध बिच किछ बी ना बोलि सके। 14 अपण इन्हा जो सभा का बार जाणे रा हुकम देइ करी से अपु बिच गल्ल-बात करणा लगे। 15 "असी इन्हा लोकां कने क्या करण? किजोकी येरुशलम बिच रहणे वाळे सारे लोकां जो पता है, कि इन्हेरे जरिए इक्क मसहूर चमत्कार दखाया गे रा है; ते असी इसेरा इन्कार नी करी सकदे। 16 अपण ईधेरे तांई कि ए गल्ल लोकां बिच होर जादा फैलि ना जाए असी तिन्हेरे जो धमकादें कि से इस नां कने फिरी कुसकी कने गल्ल ना करण।" 17 तां तिन्हा जो अन्दर सद्देया ते चेतावनी देइ करी तिन्हेरे जो ए हुकम दित्ता कि यीशु रे नां कने ना किछ बोलणा ते सखाणा।" 18 अपण पतरस ते युहन्ना ने तिन्हा जो जवाब दित्ता, "तुसी अपु इ ईसाँफ करो, क्या ए परमेश्वर रे सामणे खरा है कि असी परमेश्वर का जादा तुसां गल्ल मनण। 19 किजोकी ए ता असां का होइ नी सकदा कि जे किछ असां ने दिखेया ते सुणे रा हे से ना बोलणा।" 20 तां तिन्हा ने तिन्हेरे जो होर धमकाइ करी छड्कि दित्ता, किजोकी लोकां री वजह कने तिन्हेरे जो सजा दैणे रा कोइ मोकां नी मिलेया, ईधेरे तांई जे गल्ल होए री थी तिसेरी वजह कने सारे लोक परमेश्वर री बडाई करदे थे। 21 से म्हणु, जिस पर ए ठीक होणे रा चमत्कार दखाया गेया थिया, चाळी साल का जादा उमर वाळा आदमी थिया। 22 से छुटिकरी अपणे साथियां का आए, ते जे किछ प्रधान याजकां ते पुरनियां ने तिन्हा जो बोले रा थिया, तिन्हा जो सुणाई दित्ता।

### विश्वासियां री प्रार्थना

23 ए सुणि करी तिन्हा ने इक्क मन होइ करी बड्कि अवाज बिच परमेश्वर जो बोलेया, "हे स्वामी, तुसी से इ हिन जिन्हा ने स्वर्ग ते धरती ते समुंदर ते जे किछ तिस बिच है बणाया। 24 तुसी पवित्रात्मा रे जरिए अपणे सेवक असां रे पिता दाऊद रे मुँह का बोलेया 'होर जातियां रे लोकां ने हल्ला किजो मचाया ते देस-देस रे लोकां ने बेकार री गल्लां किजो सोचि। 25 प्रभु ते तिन्हेरे मसीह रे खलाफ धरती रे राजे खडी पे, ते हाकम कठी गे।' 26 किजोकी तुसां रे सेवक यीशु जी रे खलाफ, जिन्हेरा तुसां ने अभीषेक कित्तेया हेरोदेस ते पिन्तयुस

पिलातुस बी होर जातिया ते इस्राएलियां कने इस सैहर बिच कठे होए। 27 कि जे किछ तुसां री ताकत ते सोच रे हसाब कने ठेहरे रा थिया से इ करण। 28 अवे हे प्रभु, तिन्हेरी धमकियां जो दिखेया; ते अपणे सेवकां जोए वरदान देयो कि तुसां रा वचन बड़ी हिम्मत कने सुनाण। 29 ठीक करणे तांई तुसी अपणा हत्थ बधाओ कि चमत्कार ते हरान करणे वाळे कम्म तुसां रे पवित्र सेव यीशु जी रे नां कने कित्ते जाण।" 30 जां से प्रार्थना करी बैठे, ता से जगह जित्ते से कठित्ते रे थिये हिली गेया ते से सारे पवित्रात्मा कने भरी गे, ते परमेश्वर रा वचन हिम्मत कने सुणादे रेय। 31 भरोसे करणे वाळेयां री मडली इक्क मन रे थिये, इत्ते तिकर कोइ बी अपणी जायदाद जो अपणा नी बोलदा था, अपण सारा किछ आपस रा थिया।

### विश्वासियां री सामुहिक जिन्दगी

32 प्रेरित बड़ी ताकत कने प्रभु यीशु जी रे जिन्दे होइ जाणे री गुआई दिदें रेय ते तिन्हा सारेयां बडा अनुग्रह थिया। 33 तिन्हा बिच कोइ बी गरीब नी थिया किजोकी जिन्हा का जमीन या घर थिये से तिन्हेरे जो बेचि-बेचि करी बिके री चिजां रा पैसा लेइ करी आदें ते प्रेरितां रे पैरां बिच रखि दिदें थे; 34 ते जदेइ जिसेरी जरुरत हुदी थी तिसेरे हसाब कने हर इक्क जो बड़ी देया करदे थे। 35 युसूफ नां रा इक्क साईप्रस रा इक्क म्हणु थिया जिसेरा नां प्रेरितां ने बरनबास (मतलब कि शातीं रा पुत्तर) रखे रा थिया। 36 तिसेरी किछ जमीन थी, जिसजो तिसने बेचेया ते दाम रे पैसे लाई करी प्रेरितां रे पैरां बिच रखि दित्तेया। 37 हनन्यातें ह नां रा इक्क म्हणु ते तिसेरी लाड़ी, सफीरा ने किछ जमीन बेचि।

### हनन्याह ते सफिरा

5 हनन्याह ना रे इक मणु ते तिसेरी लाड़ी सरीफा ने थोड़ी जमीन बेची ते तिस रक्म का अपु जो थोड़ा बचाइ लिता; ते से गल्ल तिसेरी लाड़ी बी जाणदी थी, ते तिसेरा किछ हिस्सा अणी करी चेलेयां रे पैरां बिच रखि दित्तेया। 2 पतरस ने बोलेया, "हे हनन्याह! शैतान ने ए गल्ल तेरे मन बिच किजो पाई की तू पवित्रात्मा कने झूट बोले, ते जमीन रे दाम बिच का किछ रखि छड्के? 3 जां तीकर से तेरे का थी, क्या तेरी नी थी? ते जां से बिकी गी, क्या बस बिच नी थी? ए गल्ल अपणे मन बिच किजो सोचि? तें म्हणुआं कने नी अपण परमेश्वर कने झूट बोले रा है। 4 ए गल्लां सुणदे इ हनन्या छुडकी पेया ते तिसेरी जान निकळी गी ते सारे सुनणे वाळे बड़े डरी गे। 5 फिरी जवानां ने उठी करी तिसेरी अर्थी बणाई ते बार ले जाई करी गाडी दित्ता। 6 लगभग त्रै घटें रे बाद तिसेरी लाड़ी, जे किछ होए रा थिया बगैर जाणे अन्दर आई। 7 तां पतरस ने तिसजो बोलेया, "मेरे जो दस्स क्या तुसी से जमीन इन्ने बिच इ बेचि थी?" तिसने बोलेया, "हां, इन्ने बिच इ। 8 पतरस ने तिसजो बोलेया, "ए क्या गल्ल है कि तुसी दोनां ने प्रभु री आत्मा री परिक्षा तांई इक्क मन बणाया? दिख, तेरे लाडे रे गाड़णे वाळे दुआर पर इ खडित्ते रे हिन ते तेरे जो बी बार लेइ जाणा।" 9 तां से तिसि वेले तिन्हेरे पैरां पर पेइ गी ते तिसेरी जान बी निकळी गी; ते जवानां ने अन्दर आई करी तिसजो मरे रा पाया ते बार लेइ जाई करी तिसेरे लाडे रे नेडे दब्बि दित्तेया। 10 सारी कलिसीया पर ते इन्हा गल्लां रे सुनणे वाळे बड़े भारी डरी गे। 11 प्रेरितां रे हत्थां का बड़े चमत्कार रे हरान करणे वाळे कम्म लोकां बिच दखाए जादें थे, ते से सारे सुलेमान रे औसारे बिच कठिदें थे।

### निसानियां ते अनौखे कम्म

12 अपण होरां बिच का कुसकी जो ए हिम्मत नी हुदी थी कि तिन्हा बिच जाई मिले; तां बी लोक तिन्हेरी बडाई करदे थे। 13 भरोसा करणे वाळे मते सारे लोक प्रभु री कलिसीया बिच बड़ी भारी गिनती बिच मिलदे रेय। 14 इत्ते तिकर कि लोक बमारां जो सड़कां पर लाइ-लाइ करी मजेयां ते झुलेयां ओर लेटाई दिदें थिये किजां पतरस आये तां तिसेरी परछाई इ तिन्हा बिच का कुसकी पर पेइ जाए। 15 येरुशलम रे नेडे-तेडे रे सैहरां बिच का बी मते सारे लोक बमार ते बुरी आत्मा रे सताए रे लोकां जो लाई-लाई करी कठिदें

थिये,ते से सारे ठीक करी दित्ते जादें थिये। 16 तां महायाजक ते तिसेरे सारे साथी जे सदुकियां रे पथं का थिये,कड़वेपन कने भरी गे।

### प्रेरितां री गिरसप्तारी

17 ते प्रेरितां जो पकड़ी करी जेलखाने बिच डपि दित्ता। 18 अपण रात्ति प्रभु रे इक्क स्वर्गदूत ने जेलखाने रे दुआर जो खोलि री तिन्हरे जो बार लाइ करी बोलेया, 19 "जाओ,देहरे बिच खड़ी करी इस जिन्दगी री गल्लां सारे लोकां जो सुणाओ। 20 से ए सुणि करी भ्यागा उठी करी देहरे बिच जाई करी ए उपदेस देणा लगे। तां महायाजक ते तिसेरे साथिया ने आई करी महासभा जो ते इस्राएलियां रे सारे पुरनियां जो कठेरेया ते जेलखानेयां बिच ए केहलाई भेजेया कि तिन्हरे जो लाए। 21 अपण प्यादेयां ने तित्ते पुज्जि करी तिन्हरे जो जेखाने बिच नी पाया, ते हटी करी तिन्हरे जो खबर दित्ती, 22 "असां ने जेलखाने जो बड़ी सावधानी कने बंद कित्ते रा थिया ते पेहरे वाळेयां जो बार खडित्ते रे पाया अपण जां खोलेया तां अन्दर कोई ना मिलेया। 23 जां देहरे रे सरदार ते प्रधान याजकां ने ए गल्लां सुणी ता तिन्हरे बारे बिच बड़ी चित्तां बिच पेड़ गे कि तिन्हरेया क्या होया! 24 इन्ने बिच कुसकी ने आई करी तिन्हरे जो दस्सेया,"दिख्खो, जिन्हा जो तुसी जेलखाने बिच बंद करी के रख्खे रा थिया,से लोक देहरे बिच खडित्ते रे लोकां जो उदेस देया करदे हिन।" 25 तां सरदार ने प्यादेयां कने जाई करी,तिन्हरे जो लेइ आया,अपण जोर-जबरदस्ति कने नी,किजोकी से लोकां का डरदे थे कि असां पर बट्टे ना सुटण। 26 तिन्हा ने तिन्हरे जो अणी करी महासभा रे सामणे खड़ेरी दित्ता,तां महायाजक ने तिन्हरे जो पुच्छेया, 27 "क्या असां ने तुसां जो चेतावनी देइकरी हुकम नी दित्तेया थिया कि तुसि इस नां कने उपदेस मत करदे? तां बी दिख्खो,तुसां ने सारे यरुशलम जो अपणे उपदेस कने भरी रख्खे रा है ते तिस म्हणु रा खून असां री गर्दन पर लाणा चाहंदे। 28 तां पतरस ते होर प्रेरितां ने जवाब दित्ता,"म्हणुआं रे हुकम का बधी करी परमेश्वर रे हुकम जो मनणा इ असां री जिम्मेदारी है। 29 असां रे बाबे-दादेयां रे परमेश्वर ने यीशु जी जो जिन्दा कित्तेया,जिसजो तुसां ने क्रुस पर लटकाई करी मारी रख्खेया थिया। 30 तिसजो इ परमेश्वर ने प्रभु ते छुटकारा दैणे वाळा बणाई करी अपने सजे हत्थ पास्से उचां करि दित्तेया कि से इस्राएलियां जो मन फिराणे री ताकत ते पापां री माफी देइ सके। 31 असी इन्हा गल्लां रे गुआह हिन ते तियां इ पवित्रात्मा बी,जिसजो परमेश्वर ने तिन्हा जो दित्ते रा है जे तिन्हरेया हुकम मनदे। 32 असी इन्हा गल्लां रे गुआह हिन ते तियां इ पवित्रात्मा बी,जिसजो परमेश्वर ने तिन्हा जो दित्ते रा है जे तिन्हरेया हुकम मनदे। 33 ए सुणी करी से जलणा लगी पे ते तिन्हा जोमारी रख्खणा चाएया। 34 अपण गमलिऐल नां रे इक्क फरिसी ने जे व्यवस्थापक ते सारे लोकां बिच बड़ा मन्नेया जादां था,न्यायालय बिच खड़ी करी प्रेरितां जो थोड़ी देर ताईबार करी दैणे रा हुकम दित्तेया। 35 तां तिसने बोलेया,"हे इस्राएलियां तुसी जे किओ इन्हा म्हणुआं कने करणा चाहंदे सोचि-समजि करी इ करेयो। 36 किजोकी इन्हा दिनां का पैल्ले थियुदास ए बोलदा होया उठेया थिया,कि मै बी किछ है; ते कोई चार सौ म्हणु तिसेरे कने होइ गे,अपण से मारेया गया ते जिन्ने लोक तिसजो मनदे थे, सारे तित्तर-बित्तर होइ गे ते मिटी गे। 37 तिसेरे बाद नां लिखणे रे दिनां बिच यहुदा गलिली उठेया,ते किछ लोक अपणे पास्से करी लिच्ते; से बी मुकी गया ते जिन्ने लोक तिसजो मनदे थे सारे तित्तर-बित्तर होइ गे। 38 ईधेरे ताई अवे मै तुसां जो बोलदा कि इन्हा म्हणुआं का दूर इ रेयो ते इन्हरे कने किछ कम्म मत रख्खो,किजोकी जे ए धर्म या कम्म म्हणुआं रे पास्से का हो तां ता मिटी जाणा; 39 अपण जे परमेश्वर रे पास्से का है तां तुसी तिन्हरे कदी मिटाई नी सकगे।कुते इदेया ना हो कि उसि परमेश्वर कने बी लडणे वाळे बणी जाओ। 40 तां तिन्हा ने तिसेरी गल्ल मन्नि लिच्ति; ते प्रेरितां जो सद्धि करी कुटवाया,ते ए हुकम देइ करी छड्ढि दित्तेया कि यीशु रे नां कने फिरी कोइ गल्ल मत करदे। 41 से इस गल्ल का खुस होइ करी महासभा रे सामणे का चली गे,कि असी तिन्हरे नां ताई बेइज्जत होणे रे जोगे तां ठेहरे। 42 से हर रोज देहरे बिच ते घर-घर बिच उपदेस करणे,ते इस गल्ल रा सुसमाचार सुनाणे का कि यीशु जी इ मसीह हिन नी रुके।

### सात्त सेवकां रा चुणेया जाणा

6 तिन्हा दिनां बिच जां चेलेयां री गिनती मती बदणा लग्गि,तां यूनानि भाषा बोळणा वाळे इब्रानी भाषा बोळणे वाळेयां पर कुडकुडाणा लगे,कि हर दिन री सेवकाई बिच असां री विधवा जनानियां री खैर-खबर नी लिदें। 2 तां तिन्हा बारां ने चेलेयां री मण्डली जो अपणे का सद्धि करी बोलेया,"ए ठीक नी कि असी परमात्मा रा वचन छड्ढि करी खिळाणे-पिळाणे री सेवा बिच लग्गि रैह्ण। 3 इस ताई,हे भाईयो,अपणे बिच का सात्त खरे ना वाळे म्हणुआं जो जे पवित्रात्मा ते समजदारी कने भरित्ते रे होण,चुणी लो कि असी तिन्हरे जो इस कम्म पर ठहराई देण। 4 अपण असी ता प्राथना बिच ते वचन री सेवा बिच लग्गि रैह्ण।" 5 ए गल्ल सारी मण्डली जो खरी लग्गि,ते तिन्हा ने स्तिफनूस ना रे इक्क म्हणु जो जे विश्वास ते पवित्रात्मा कने भरित्ते रा थिया,ते फिलिप्पुस,ते प्रुखुरुस,ते निककोर,ते तिमाँन,ते ते परमिनास,ते अन्ताकिया रे रैह्णवाळे निकुलाउस जे यहुदी मत बिच आई गे रा थिया,चुणी लिच्ता। 6 इन्हा जो चेलेयां सामणे खड़ेरेया ते तिन्हा ने प्राथना करी के तिन्हा पर हात्थ रख्खे। 7 परमात्मा रा वचन फैळदा गया ते यरुशलम बिच चेलेयां री गिनती मती बददी गेइ;ते याजकां रा इक्क बड्डा समाज इस मत जो मनणे वाळा होई गया।

### स्तिफनूस री गिरफ्तारी

8 स्तिफनूस अनुग्रह ते ताकत कने भरी करी लोकां बिच बड्डे अनौखे कम्म ते निशानियां दिखाया करदा थिया। 9 तां तिस अराधनालय बिच का जे लिबिरतिनो की कहलाई थी,ते कुरैनी ते सिकन्दरिया ते किलकीया ते एशीया रे लोकां बिच कई इक्क उड्डी करी स्तिफनूस कने बैहस करणा लगे। 10 अपण तिस ज्ञान ते तिस आत्मा रा जिस कने ओ गल्लां करदा थिया,से सामणा नी करी सके। 11 इस पर तिन्हा ने कई लोकां जो उकसाया जे बोळणा लगे,"असी इसजो मुसा ते परमात्मा रे विरोध बिच गलत गल्लां बोलदे सुणे रा है।" 12 ते लोकां ते बुर्जुगां ते शास्त्रियां जो भडकाई करी चढी आए ते तिसजो पकड़ीकरी महासभा बिच लेई आए। 13 ते झुट्टे ग्वाह खड़े किच्ते,जिन्हा ने बोलेया,"ए म्हणु इस पवित्र जगह ते व्यवस्था रे विरोध बिच बोळणा नी छडदा। 14 किजोकी असी तिसजो ए बोळदे सुणे रा है कि ए इ यीशु नासरी जी ने इस जगह जो ढाहई देणा,ते तिन्हा रितियां जो बदली देणा जे मुसा ने असां जो सौपि री हिन।" 15 तां सारे लोककां ने जे सभा बिच बैठे रे थिये,तिस पर नजरां टिकाई ते तिसेरा मुँह स्वर्गदूत जदेया दिख्खेया।

### स्तिफनूस रा भाषण

7 . तां फिरी महायाजक ने बोलेया, "क्या ए गल्लां सच हिन?" 2 स्तिफनूस ने बोलेया,"ओ भाईयो,ते बुजुर्गां सुणो,असां रा पीता अब्राहम हरान इच बसणे का पैल्ले जां मेसोपोटमिया बिच थिया; तां उजळे परमेश्वर ने तिन्हा जो दरसन दित्ता। 3 ते तिस जो बोलेया,"तु अपणे देस ते अपणे रिस्तेदारां बिच का निकळी करी तिस देस जो जा,जिसजो मै तेरे जो दिखाणा।" 4 . तां से कसदियां रे देस का निकळी करी हरान बिच जाइ बसेया।तिसेरे पीता रे मौत रे बाद परमेश्वर ने तिसजो तित्ते का इस देस बिच ले आई करी बसाया जिस बिच अवे तुसी बसदे, 5 ते तिसजो किछ मिरास बल्कि पैर रखणे री जगह नी दित्ती, अपन वादा किच्ता कि मै ए देस तेरे ते तेरे बाद तेरे वशं रे हत्थां करी देणा; हालांकि तां तिसेरा कोइ पुत्तर बी ना थिया। 6 . ते परमेश्वर ने इयां बोलेया,"तेरे सतांन रे लोकां ने पराये देस बिच परदेसी होणा,ते तिन्हा ने तिन्हरे जो गुलाम बनाणा ते चार सौ सालां तिकर दुख देणा।" 7 . फिरी परमेश्वर ने बोलेया,"जिस जाती रे से गुलाम होणे तिसजो मै सजा देणी ते इसेरे बाद से निकळी करी इसी जगह बिच मेरी सेवा करणी।" 8 ते तिसने तिस कने खतने रा वादा किच्ता; ते तिसी हाल बिच इसहाक तिस का पैदा होया ते अठमे दिन तिसेरा खतना किच्तेया गया;ते इसहाक का याकूब ते याकूब का बारा कुलपती पैदा होए। 9 . "कुलपतियां ने युसूफ का रडी करी के तिसजो मिस्र देस जाणे वाळेया रे हत्थां बेचेया।अपण परमेश्वर तिसेरे कने थिये। 10 . ते तिसजो तिसेरे सारे दुखां का छुड़ाई करी मिस्र रे

राजा फिरौन री नजर बिच अनुग्रह ते समज दित्ती,ते तिन्हा ने तिसजो मिस्र पर ते अपणे सारे घर पर हाकम बणाया। 11 . तां मिस्र ते कनान रे सारे देस बिच अकाल पेया ते जिस कने बड़ा भारी दुख होया ते असां रे बाबे-दादेयां जो अनाज नी मिलदा थिया। 12 . अपण याकूब ने ए सुणी करी कि मिस्र बिच अनाज है असां रे बाबे-दादेयां जो पैलि बारी भेजेया। 13 . दुई बारी युसूफ ने अपु जो अपणे भाईयां रे सामणे लाया ते युसूफ री जाती फिरौन जो पता लगी गी। 14 . तां युसूफ ने अपणे पीता याकूब ते अपणे सारे रिस्तेदारां जो जे पचतर जणे थिये,सदि भेजेया। 15 . तां याकूब मिस्र बिच गया;ते से ते असां रे बाए-दादे मरी गे। 16 . तिन्हेरी लाशां शकेम बिच पुजाई करी तिस कबर बिच रखे गे जिसजो अब्राहम ने चाँदी देइ करी शकेम बिच हमोर रे बचेया का खरिदी लित्तेया थिया। 17 "अपण जां तिस वादे रे पुरे होणे रा वेल्हा नेडे आया जे परमेश्वर ने अब्राहम कने कित्तेया थिया,तां मिस्र बिच से लोक बधी गे ते मते होइ गे। 18 . तां मिस्र बिच दुआ राजा होया जे युसूफ जो नी जाणदा था। 19 . तिसने असां री जाती कने चलाकी करी के असां रे बाबे-दादेया कने इत्ते तिकर बदसुलुकी किन्ती कि तिन्हा जो अपणे बचेयां जो सुटि देणा पेयां कि से जिन्दे ना रहण। 20 . तिस वेल्हे मूसा पैदा होया। से परमेश्वर री नजर बिच बड़ा इ छैल थिया। से त्रै महिने तिकर अपणे प्यो रे घरे पाळेया गया। 21 जां सुटि दित्तेया गया तां फिरौन री कुडी ने तिसजो चुकि लिततेया ते अपण पुत्तर करी के पाळेया। 22 मूसा जो मिस्र री सारे तौर-तरिके सखाए गे,ते से वचन ते कम्मां,दोत्रां बिच पक्का थिया। 23 "जां से चाळी साल रा होया तां तिसरे मन बिच आया कि मै अपणे इस्राएली भाईयां कने मिलां। 24 . तिसने इक्क म्हणु पर नाईसांफ हुदें दिख्खिकरी तिसजो बचाया,ते मिस्र जो मारी री तिस सताए रे म्हणु रा बदला लिता। 25 . तिसने सोचेया कि तिसरे भाई समजगे कि परमेश्वर ने तिसरे हत्थां का तिन्हेरा छुटकारा करणा,अपण तिन्हा ने नी समजेया। 26 . दुए दिन जां से अपु बिच लडेया करदे थिये,तां से तित्ते आई निकळेया;ते ए बोलि करी तिन्हेरा मेळ करणे तांई समजाया,'हे आदमियो तुसी ता भाई-भाई हिन, इक्क-दुए कने किजो नाईसाँफी करदे?' 27 . अपण जे अपणे पडोसी कने नाईसाँफी करेया करदा थिया तिसने तिन्हा जो ए बोलि करी हटाई दित्ता,'कि तेरे जो असां पर कुसने ईसाँफ करणे वाळा बणाया रा है?' 28 . क्या जिस तरिके कने कल तिस मिस्रि जो मारौ रखेया मेरे जो बी मारी रखणा चाहंदा?' 29 . ए गल्ल सुणी करी मूसा न्हसेया ते मिद्यान देस बिच परदेसी होइ करी रहणे लगेया,ते तित्ते तिसरे दो मुडें पैदा होए। 30 . "जां पुरे चाळी साल होइ गे,तां इक्क स्वर्गदूत ने सीने पहाड़ रे जंगल बिच तिसजो बलदी होइ झाडी री आग बिच दरसन दित्तेया। 31 . मूसा जो ए दरसन दिख्खिकरी हरानी होइ ए जां दिखणे तांई नेडे गेया तां प्रभु री ए अवाज आई, 32 . 'मै तेरे बाबे-दादे,अब्राहम,इसहाक ते याकूब रा परमेश्वर है,'तां फिरी मूसा कबीं पेया,इत्ते तिकर की तिसजो दिखणे री हिम्मत बी नी रेइ। 33 . तां प्रभु ने तिसजो बोलेया,'अपणे पैरां का जुत्ती उतारी ले,किजोकी जिस जगह तू खडित्ते रा है,से पवित्र जमीन है। 34 . मै सचमुच अपणे लोकां री जे मिस्र बिच हिन,बुरी हालत जो दिख्खे रा है; ते तिन्हेरी आह ते तिन्हेरे रोणे जो सुणे रा है; इंधेरे तांई तिन्हेरे जो छुडाणे तांई उतरे रा है;अवे आ,मै तेरे जो मिस्र बिच भेजणा।' 35 . "जिस मूसा जो तिन्हा ने ए बोलिकरी नक्करेया थिया'तेरे जो कुस ने असां पर हाकम या ईसाँफ करणे वाळा बणाए रा है?'तिसी जो परमेश्वर ने हाकम ते छुडाणे वाळा बणाई करी,तिस स्वर्गदूत रे जरिए जिसने तिसजो झाडियां बिच दरसन दित्ते रा थिया,भेजेया। 36 ए इ म्हणु मिस्र ते लाल समुदर ते जंगल बिच चाळी साल तिकर हरान करणे वाळे कम्म ते चमत्कार दिखाई-दिखाई करी तिन्हा जो कड्डि ले आया। 37 ए से इ मूसा है,जिनिये इस्राएलियां जो बोलेया,'परमेश्वर तुसां रे भाईयां बिच का तुसां बिच का मेरे साहूई इक्क भविष्यद्वक्ता जो ऊठाणा।' 38 ए से इ है,जिसने जंगल बिच कलिशीया रे बिच तिस स्वर्गदूत कने सीने पहाड़ पर तिस कने गलां किन्ती ते असां रे बाबे-दादेयां कने थिया,तिसी जो जिन्दे वचन मिल्ले कि असां तिकर पुजाए। 39 अपण असां रे बाबे-दादेया ने तिसेरी मनणी नी चाइ,बल्कि तिजसो हटाई करी अपणे मन मिस्र रे पाससे फेरे, 40 ते हारुन जो बोलेया,'असां तांई इक्क इदेया देवता बणा जे असां रे आगे-आगे चले किजोकी ए मूसा जे असां जो मिस्र देस का कड्डि लेइ आए रा है,असी नी जाणदे कि तिसजो क्या होया?' 41 तिन्हा दिनां बिच तिन्हा ने इक्क बछड़ा बणाइ करी तिसेरी मुर्ती रे

आगे बळी चढाई ते अपणे हत्थां रे कम्मां बिच मगन होणा लगी पे। 42 अते परमेश्वर ने मूह मोड़ी करी तिन्हा जो छडि दित्तेया,कि आसमान रे तारेयां री पूजा करण जियां भविष्यद्वक्तां री कताबां बिच लिख्खे रा है,'हे इस्राएल रे घराने,क्या तुसी जगळ बिच चाळी सालां तिकर जानवर री बली ते अनाज रा चढावा सिर्फ मेरे जो इ चढावें रेय? 43 तुसी मलेक रे तम्बु ते रिफान देवते रे तारे जो लेइ करी फिरदे थे मतलब तिन्हा मुर्तियां जो जिन्हा जो तुसी प्रणाम करणे तांई बणाए रा थिया। अते मै तुसां जो बेबिलोन का परे लेइ जाई करी बसाणा।' 44 "गुआई रा तम्बु जंगल बिच असां रे बाबे-दादेयां रे बिच-मझाटे थिया,जियां तिन्हा ने ठेहराया जिनिये मूसां कने बोलेया,'जे अकार तैं दिख्खे रा है,तिसेरे हिसाब कने इसजो बणा।' 45 तिसी तम्बू जो असां रे बाबे-दादे पुराणे जमाने का पाई करी यहोशू कने इत्ते लेइ आए; जिस वेल्हे कि तिन्हा ने तिन्हा जातियां पर हक पाया,जिन्हा जो परमेश्वर ने असां रे बाबे-दादे रे सामणे का कड्डि दित्तेया, ते से तम्बु दाऊद रे वेल्हे तिकर रेया। 46 तिस पर परमेश्वर ने अनुग्रह कित्तेया; अते तिसने मित्रत किन्ती कि से याकूब रे परमेश्वर तांई रहणे री जगह बणाए। 47 अपण सुलैमान ने तिन्हेरे तांई घर बणाया। 48 अपण परमप्रधान हत्थां रे बणाए रे घरां बिच नी रहंदा,जियां कि भविष्यद्वक्ता ने बोलेया, 49 'प्रभू बोलदे कि स्वर्ग मेरा सिहांसन ते धरती मेरे पैरां रे थल्ले री पिढी है,मेरे तांई तुसी कुस तरिके रा घर बणांगे? ते मेरे अराम करणे री कुण सी जगह होणी? 50 क्या ए सारी चिजां मेरे हत्थां री बणाए री नी हिन?' 51 "हे जिद्धि मन ते कन्नां रे बौर खतने वाळे लोकां,तुसी हमेसा पवित्रात्मा रा विरोध करदे।जियां तुसां रे बाबे-दादे करदे थिये, तियां ई तुसी बी करदे। 52 भविष्यद्वक्ता बिच का कुसजो तुसां रे बाबे-दादेयां ने नी तग किता? तिन्हा ने तिस धर्मी रे आणे री खबर दैणे वाळे तिन्हा पैले जमाने रे लोकां जो मारी रखेया ते अवे तुसी बी तिसेरे पकड़वाणे वाळे ते मारी रखणे वाळे होए। 53 . तुसां ने स्वर्गदुतां रे जरिये ठेहराए री व्यवस्था ता पाई,अपण तिसजो मन्नेया नी।"

### स्तिफनुस जो बट्टे मारणा

54 ए गलां सुणी करी से लोक फुकी पे ते तिस पर दादं पिह्ला लगी पे। 55 अपण तिसने पवित्रात्मा कने भरी करी स्वर्ग रे पाससे दिख्खेया ते परमेश्वर री महीमा जो ते यीशु जी जो परमेश्वर रे सजे पाससे खडित्ते रा दिख्खि करी 56 बोलेया,"दिख्खो,मै स्वर्ग जो खुले रा ते म्हणु रे पुत्तर जो परमेश्वर रे सजे पाससे खडित्ते रा दिख्खेया करदा है।" 57 तां तिन्हा ने बड़ी जोरे लेर मारी करी कात्र बंद करी लित्ते,ते कठे इ तिस पर झपटे; 58 ते तिसजो सैहर रे बार कडि करी तिस पर बट्टे मारणा लगी पे। गुआइ दैणे वाळेयां ने अपणे कपडे शाऊल नां रे इक्क जवान रे पैरां का उतारी करी रख्खि दित्ते। 59 से स्तिफनुस पर बट्टे मारदे रेय ते से ए बोलि करी प्रार्थना करदा रेया,"ओ प्रभु यीशु जी मेरी आत्मा जो अपणाई लेयो।" 60 फिरी गोड्डे भारे बेइ करी बड़ी अवाज कने बोलेया"हे प्रभु,ए पाप इन्हा पर मत ला।" ते ए बोलि करी से सोइ गेया।शाऊल तिसेरे मारे जाणे बिच सहमत थिया।

### कलीसिया पर जुल्म

8 यीशु जी फिरी तिन्हा कने उदारणा बिच गलां करण लगे, 2 स्वर्ग रा राज तिस राजे साहूई है,जिनिए अपणे मुडें रा ब्याह कराया। 3 ते तिसने अपणे नौकरां जो भेजेया की सद्दे रे लोकां जो ब्याह री धाम बिच सद्दे;

### सामरिया बिच फिलिप्पुस रा प्रचार

4 फिरी तिसने अपणे नौकरां जो ए बोलि करी भेजेया,"सद्दे रे लोकां जो बोल्लो : दिख्खो,मै धाम तयार करी बैठा रा है,मेरे बैल ते पालतु जानव मारे गे रे हिन,ते सारा किछ तयार है; ब्याह री धाम बिच आओ।" 5 अपण से आनाकानी करी के चली गे: कोइ अपणे खेतारां जो,कोई अपणे कम्मां जो। 6 होर लोकां ने जे बचेया करदे थिये तिसेरे नौकरां जो पकड़ी करी बेईजत किता ते मारी रखेया। 7 तां राजे जो गुस्सा आया,ते तिसने अपणी सेना जो भेजि करी तिन्हा खुनि म्हणुआं जो खत्म करी दित्ता,ते तिन्हेरे नगर जो फुकि

रखेया। 8 तां तिनि ए अपणे नौकरां जो बोलेया, "ब्याह री धाम ता तयार है अपण सद्धे रे लोक इस जोगे नी निकले

### जादुगर शमौन

9 इस ताई चोक पर जाओ 10 अते तिन्हा नौकरां ने सड़कां पर जाई करी क्या खरे क्या बुरे, जिन्ने मिले, सारेयां जो कठेरेया; ते ब्याह रा घर मेहमानां कने भरी गया। 11 "जां राज्ञा मेहमानां जो दिखणे ताई अन्दर आया, तां तिसने तित्ते इक्क म्हणु जो दिखेया, जे ब्याह रे कपड़े पाई करी नी आया थिया। 12 तिसने तिसजो पुच्छेया, "मित्तरा; तु ब्याह वाले कपड़े पाए बगैर इत्ते किजो आई गया?" तिसेरा मुँह बन्द होइ गया। 13 तां राज्ञे ने नौकरां जो बोलेया, "इसेरे हत्थ-पैर बन्नि करी इसजो बार न्याहरे बिच पाई देयो, तित्ते रौण ते दादं पिह्ला होणा।"

### सामरिया बिच पतरस ते युहन्ना

14 किजोकी सद्धे रे लोक ता मते हिन अपण चुणे रे घट हिन। 15 तां फरीसियां ने जाई करी अपु बिच गल्ल किन्ती की तिसजो कुस तरिके कने गल्लां बिच फसाइये 16 अते तिन्हा ने अपणे चेलेयां जो हेरोदियां कने तिन्हेरे का ए बोलणे जो भेजेया "हे गुरु, असी जाणदे कि तुसी सच्चे हिन ते परमेश्वर रा रस्ता सच्चाई कने दसदे, ते कुसकि री बी परवाह नी करदे किजोकी तुसी म्हणुआ 17 इसी ताई असां जो दस्सो की तुसी क्या सोचदे? कैसर जो चुर्गी दैणा ठीक है या नी।" 18 जां शिमौन ने दिखेया कि प्रेरितां रे हात्थ रखणेकने पवित्रात्मा दित्तेया जादां, तां तिनहेरे का रुपे लाई करी बोलणा लग्गया, 19 "ए हक मेरे जो बी देयो, कि जिस कुसकि पर हात्थ रखां तिसजो पवित्रात्मा मिली जाए।" 20 पतरस ने तिसजो बोलेया, "तेरे रुपे तेरे कने खतम होइ जाण किजोकी तैं परमेश्वर रा दान रुपे कने खरिदणे री गल्ल सोचि। 21 इस गल्ल बिच ना तेरा हिस्सा है, ना इ कोइ भाग; किजोकी तेरा मन परमेश्वर रे आगे सिद्धा नी। 22 इधेरे ताई अपणी इस बुराई का मन हटाई करी पभु का प्रार्थना कर, होइ सकदा कि तेरे मन री ए सोच माफ किन्ती जाए। 23 किजोकी मै दिखदा कि तु पित्त जदेइ कौड़ेपन ते अधर्म रे बन्धन बिच पे रा है। 24 शिमौन ने जवाब दित्ता, "तुसी मेरे ताई परमेश्वर का प्रार्थना करो कि जे गल्लां तुसां ने बोलि, तिन्हा बिच का कोइ मेरे पर ना आई पे।" 25 अते से गुआई देइ करी प्रभु री गल्लां सुणाई करी यरुशलेम जो हटी गया, ते सामरियां रे मते सारे ग्रां बिच खुसखबरी सुणादेंगे।

### फिलिप्पुस ते कूश देश रा अधिकारी

26 फिरी परमेश्वर रे इक्क स्वर्गदूत ने फिलिप्पुस जो बोलेया, "उठ ते दक्षिण रे पाससे तिस रस्ते पर जा, जे यरुशलेम का गादा जो जादां।" ए रेगिस्तानी रस्ता है। 27 से उठी करी चली पेया, ते दिख्खो, कूश देस रा इक्क म्हणुआया करदा थिया जे खोजे ते कूशियां री राणी कदाकिया रा मत्रीं ते खजाची थिया। से अराधना करणे जो यरुशलेम आया थिया। 28 से अपणे रथ पर बैठे रा थिया ते यशायाह भविष्यद्वक्ता री कताब पढ़दा होया हटेया करदा थिया। 29 तां आत्मा ने फिलिप्पुस जो बोलेया, "नेडे जाई करी इस रथ कने होइ जा।" 30 फिलिप्पुस तिसेरे पाससे न्हसेया ते तिसजो यशायाह भविष्यद्वक्ता री कताब पढ़दे होये सुणेया ते पुच्छेया, "तु जे पढ़ेया करदा क्या तिसजो समजदा बी?" 31 तिसने बोलेया, "जां तिकर कोइ मेरे जो ना समजाए तांइ तिकर मै कियां समजा?" ते तिसने फिलिप्पुस का मिन्नत किन्ती की से चढ़ि करी तिसेरे कने बे। 32 पवित्रशास्त्र रा जे अध्याय से पढ़ेया करदा थिया से ए थिया: "से भेड़ रे सांई बडणे तांईइ पुजाया गया, जियां मेमना पणे ऊनु कुतरणे वाळेयां रे सामणे चुपचाणे रहन्दा, तियां इ तिसने बी अपणा मुँह नी खोलेया। 33 तिसेरी दीनता तिसेरा ईसाँफ नी होइ सकेया। तिसेरे वेले रे लोकां रे बारे बिच कुसने दसणा? किजोकी धरती का तिसेरी जिन्दगी चुक्कि लिन्ती जादी।" 34 इस पर खोजे ने फिलिप्पुस का पुच्छेया, "मैं तेरे का मिन्नत करदा, ए दस्स कि भविष्यद्वक्ता ए कुसेरे बारे बिच बोलेया करदा है, अपणे या कुसकी होरसी रे बारे बिच?" 35 तां फिलिप्पुस ने अपण मुँह खोलेया, ते इसी शास्त्र का सुरु करी के तिसजो यीशु जी रा सुसमाचार सुणाया। 36 रस्ते बिच

जादें-जादें से कुसकी पाणी वाळी जगह पुजे। तां खोजे ने बोलेया, "दिख्ख इत्ते पाणी है अवे मेरे जो बपतिस्मा लैणे बिच क्या रोक है? 37 फिलिप्पुस ने तिसजो बोलेया, जे अगर तू अपणे पुरे मन कने भरोसा करदा, तां ए होई सकदा: तिसने जवाब दित्तेया कि मै विश्वास करदा कि यीशु मसीह परमेश्वर रे पुत्तर हिन। 38 तां तिनिये रथ खड़ा करणे रा हुकम दित्ता, ते फिलिप्पुस ते खोजा दोन्नां पाणी बिच उतरी गे, ते तिसने खोजे जो बपतिस्मा दित्ता। 39 जां से पाणी बिच निकळी करी उप्पर आये तां प्रभु रा आत्मा फिलिप्पुस चुकी करि लेई गे, ते खोजे ने फिरी तिसजो नी दिख्खेया ते से खुसी मणादें मणादें अपणे पर चली गया। 40 फिलिप्पुस अशदोद बिच आई निकळेया, ते जां तिकर केसरिया बिच ना पुजेया तां तिकर सैहर सैहर बिच खुस-खबरी सुणादां गया।

### शाऊल रा मन बदलणा

9 शाऊल जे हल्ले तिकर प्रभु रे चेलेयां जो मारणे ते धमकाणे री धुन बिच थिया, महायाजक का गया 2 ते तिसका दमिश्क रे आराधनालय रे नां इस गल्ल पर चिड्डियां मर्गी कि क्या मर्द ते क्या जनानी, जिन्हेरे जो बी से मसिहियत बिच पाए तिन्हेरे जो बन्नि करी यरुशलेम लेइ आए। 3 अपण चलदे-चलदे से दमिश्क रे नेडे पुजेया, ते चाणचक्के इ आसमान का चारो पाससे का रौसनी चमकी, 4 ते से धरती पर पेइ गया, ते ए अवाज सुणी, ओ शाऊल, ओ शाऊल, तू मिंजो किजो तगं करेया करदा है। 5 तिसने पुच्छेया, "ओ प्रभु जी, तुसी कुण हिन? तिन्हा ने बोलेया, मै यीशु है, जिसजो तू तगं करेया करदा है। 6 अपण अवे उठी करी सैहर बिच जा, अते जे तेरे जो करणा है से तेरे जो दस्सि दित्तेया जाणा," 7 जे मल्लु तिस कने थिये से हरान रेइ गे, किजोकी तिन्हेरे जो अवाज ता सुणिदीं थी अपण किछ दिस्सेया नी करदा थिया। 8 तां शाऊल उठेया ते जां हाकिख खोलि तां तिसजो किछ बी नी दिस्सेया, ते से म्हणु तिसेरा हात्थ पकड़ी करी दमिश्क जो लेइ गे। 9 से त्रै दीनां तिकर किछ बी नी दिखि सकेया ते ना किछ खाया पित्ता। 10 दमिश्क बिच हनन्याह नां रा इक्क चेला थिया तिसजो परमेश्वर ने दरसन देइ करी बोलेया, "ओ हनन्याह" तिसने बोलेया 'हाँ, प्रभु जी' 11 तां प्रभु जी ने तिस जो बोलेया, उठी करी तिस गळी बिच जा जिसजो सिद्धि बोलदे, यहूदा रे घरे, शाऊल नां रे इक्क तरसुर रे रैहणे वाले जो तोप, किजोकी दिख से प्रार्थना करेया करदा है, 12 अते तिस ने हनन्याह नां रे इक्क म्हणु जो आदें ते अपणे पराले हात्थ रखदे दिख्खे रा है ताकी से फिरी दिखि सके।" 13 हनन्याह ने जवाब दित्तेया, ओ 'प्रभु जी', मै इस म्हणु रे बारे बिच मते जणेया का सुणे रा है कि तिस ने यरुशलेम बिच तुसां रे पवित्र लोकां कने बड़ी भारी बुराई कित्ते री है, 14 ते इत्ते बी इस जो प्रधान याजकां का अधिकार मिले रा है कि जे लोक तुसां ना लिदें तिन्हा सारेयां जो बन्नि ले। 15 अपण " 'प्रभु जी' ने तिस बोलेया " किजोकी से ता होर जातियां रे लोकां, राजेया अते इस्राएल रे सामणे मेरा नां जाहिर करणे तांई मेरा चुणे रा है। 16 ते मै तिसजो दसणा कि मेरे नां तांई तिसजो कदेया-कदेया दुख चुकणा पैणा" 17 तां हनन्याह उठी करी तिस घर जो गया, ते तिस पर अपणा हात्थ रखि करी बोलेया, ओ भाई शाऊल, प्रभु जी, मतलब यीशु जी जे तिस रस्ते पर जिस का तु आया तेरे जो दिस्सेया थिये, तिन्हा ने इ मेरे जो भेजे रा है ताकी तु फिरी दिखि सके ते पवित्तर आत्मा कने भरी जाए।" 18 ते तिसी वेले तिसेरी हाकिखिया का छिलके जेय पेय ते से दिखणा लग्गया ते उठी करी बपतिस्मा लिन्तेया, 19 फिरी रोटी खाई थोड़ी जान आई, से मते रोजां तांई तिन्हा चेलेयाँ का इ रेह्या जे दमिश्क बिच थिये

### दमिश्क बिच पौलुस रा प्रचार

20 ते से तोळे इ धर्म सभा बिच जाई यीशु जी रा परचार करणा लग्गया कि से इ परमेश्वर रा पुत्तर हिन। 21 सारे सुणेणे वाले ए सुणी करी हरान होइ करी बोलणे लग्गया, "क्या ए सेइ म्हणु नी है जे ए नां लिदें थिये तिन्हेरे जो मुकाई दिदां थिया, ते इत्ते बी इधेरे तांई इ आया थिया कि तिन्हेरे एजो बन्नि करी प्रधान याजकां का लेइ जाए?" 22 अपण शाऊल होर बी ताककतवर हुदां गया ते इस गल्ल जो साबित करी के कि मसीह इत्ते इ है, दमिश्क बिच रैहणे वाले

यहुदियां रा मुँह बंद करदा थिया, 23 जां मते दिन होइ गे, तां यहुदिया ने मिळी करी तिसजो मारणे री योजना बनाई। 24 अपण तिन्हेरी योजना रा शाऊल जो पत लगि गया। से ता तिसजो मारी रखणे तांई दिन-रात दरवाजेयां का बेइ रहन्दे थिये 25 अपण रात्ति तिसरे चेलेयां ने तिसजो टोकरे बिच पाया ते सँहर री दुआल का टर्गी करी तिसजो उतारी दित्तेया

### यरुशलेम बिच शाऊल

26 यरुशलेम बिच पुज्जि करी चेलेयाँ कने मिळी जाणे री कोसिस किन्ती, अपण सारे तिसका डरदे थिये, किजोकी तिन्हेरे तिसेरा भरोसा नी हुदां थिया कि से बी इक्क चेल्ला है। 27 अपण बरनबास ने तिसजो अपणे कने चेलेयाँ का लेइ जाई करी तिन्हेरे जो दस्सेया कि किय्यां तिसने रस्ते बिच प्रभु जो दिख्खेया ते किय्यां प्रभु जी ने तिस कने गल्लां किन्ती, ते दमिश्क बिच किय्यां तिस कने प्रभु जी रा प्रचार कित्तेया। 28 से तिन्हेरे कने यरुशलेम आदां-जादां रेह्वा। 29 ते बिना डरे प्रभु रे नां लेई करी प्रचार करदा थिया ते युनानि भासा बोलणे वाळे यहुदिया कने गल्ल-बात ते बहस-बाजी करदा थिया, अपण से तिसजो मारी रखणे री कोसिस करणा लग्गे। 30 ए जाणी करी भाई तिसजो केसरिया लेइ आए ते तरसुर जो भेजि दित्तेया। 31 इस तरिके कने सारे यहुदिया, गलील ते सारे सामरिया बिच कलिसीया जो सातीं मिल्लि अते तिसेरी तरकि हुदीं गेइ, ते से प्रभु रे डर ते पवित्तर आत्मा री सातीं बिच बधदी गेइ।

### लूद्दा ते याफा बिच पतरस

32 फिरी इय्यां होया कि पतरस सारी पास्से घुमदा फिरदा तिन्हा लोक्कां बी पुजेया जे लुद्देया बिच रहन्दे थिये। 33 से तिसजो एनियास नां रे इक्क लकवे रे बमारी वाळा म्हणु मिल्लेया जे आठ सालां का बिस्तर पर पेरा थिया। 34 पतरस ने तिसजो बोलेया, "ओ एनियास! यीशु मसीह तेरे जो खरा करदा। उठ, अपण बछाण बिछ।" तां से ऊठी बैठेया। 35 तां लुद्देया ते शारोन रे सारे रहणे वाळे तिसजो दिखि करी प्रभु जी रे नेडे आई गे। 36 याफा बिच तबिता मतलब दोरकार नां री इक्क विश्वास करणे वाळी रहन्दी थी, से बडे भले रे कम्म रे दान पुन्य करदी रहन्दि थी। 37 तिन्हा इ रोजां बिच से बमार होइ करी मरी गी, ते तिन्हा ने तिसजसो नुहाई करी अटारी पर रखि दित्तेया। 38 इधेरे तांइ कि लूद्दा याफा रे नेडे थिया, चेलेयां ने ए सुणी करी कि पतरस तित्ते है, दो जणेया जो भेजी करी तिसका मिन्नत कि आसां का आणे बिच देर मत कर।" 39 तां पतरस उठी करी तिन्हेरे कने गया ते जां से पुजेया तां से तिसजो तिस अटारी पर लेइ गे। सारी विधवा जनानियां आई करी तिसका खड़ी गी, ते जे कपडे दोरकास ने तिन्हेरे कने रेइ करी बनाए थिये से दिखाणा लग्गी। 40 तां पतरस ने सारेयां जो बार करी दित्तेया, ते गोड्डे रे भारे बेइ करी प्रार्थना किन्ती ते लास रे पास्से दिखि करी बोलेया, "तबिता, उठ" तां तिसने अपणी हाकिख्यां खोलि दित्ती ते पतरस जो दिखि करी उठी गेइ। 41 तिसने हात्थ देइ करि तिस जो खड़ेरेया ते पवित्तर लोक्कां ते ते विधवा जनानियां जो सद्धि करी तिन्हेरे जो से जिन्दी दिखाई दित्ती। 42 ए गल्ल सारे याफा बिच फैलि गी अते मते जणेया ने परमेश्वर पर भरोसा कित्तेया। 43 ते पतरस याफा बिच शमौन नां से कुसकी चमडे रे कम्म करणे वाळे रे घरे मते दिनां तांई तित्ते रेह्वा।

### कुरनेलियुस रा पतरस जो सदणा

10. कैसरिया बिच कुरनेलियुस नां रा इक महु थिय्या, जे इतालियानी नाण री पलटन रा सरदार थिय्या। 2. से भक्त महु थिय्या, ते सारा टब्बर परमात्मा रा डर मन्दा थिय्या, ते गरीब महुआं जो बडा दान दिंदे थिय्ये, ते लगातार परमात्मा कने प्राथना करदे थिय्ये। 3. तिन्हेरे धियाडी रे तिन्हेरे पेहर रे नेडे-भेडे दर्शन बिच साफ ढग कने दिख्खेया, कि परमात्मा रा इक स्वर्गदूत मेरे का अन्दर आई करी बोल्दा, कि ओ कुरनेलियुस। 4. तिन्हेरे ध्यान कने दिख्खेया, ते डरी करी बोल्या, ओ प्रभु जी एह कै है? तिस ने तिस जो बोल्या, तेरी प्राथना ते तेरे दान जो इक समारक रे रूप बिच तिन्हेरे चेत्ता दुआणे तांई परमात्मा का पुजे हिन। 5. ते अवे याफा बिच महुआं जो

भेजी करी शमौन जो, जिस जो कि पतरस बी बोल्दे, सद्धी ले। 6. से शमौन चमडे रा धन्धा करणे वाळे रे परोणा हहे, जिसेरा घर समुन्द्र कनारे है। 7. जाम से स्वर्गदूत जिस ने एह गल्लां बोली थी चली नगेया, ता तिन्हेरे दो नौकर, तेजे तिसका मौजूद रहन्दे थिय्ये तिन्हा बिच का इक भक्त सपाहुई जो सद्धेया। 8. ते तिन्हा जो सब गल्लां दस्सी करी याफा जो भेजेया। 8. दूजे रोज, जां से चलदे-चलदे सँहर रे नेडे पूजे, ता दूजे पेहर रे नेडे-भेडे पतरस कोठे पर प्राथना करणे जो चढ़ेया।

### पतरस रा दर्शन

9. ते तिस जो भूख लग्गी, ते किच्छ खाणा चांदा थिय्या, अपण जां से रोटी बनाया करदे थिय्ये, ता से बेसुध होई गया। 10. ते तिस ने दिख्खेया, कि अम्बर खुली गया, ते इक पात्र बड्डी चादर साहुई चारो कुणे का लटकदा, धरती पर उतरदा थिय्या। 11. जिस बिच धरती रे हरेक तरह रे चारे पैरा अते रंगणे वाळे जन्तु ते अम्बर रे चीडू-पखेरु थिय्ये। 12. ते तिस जो इक इदेयी अवाज सुणित्ती, कि ओ पतरस उठ, मारी के खा। 13. अपण पतरस ने बोल्या, नी प्रभु, कदी बी नी, किजोकि मैं कदी कोई अपवित्र या असुच्ची नी खाई। 14. फिरी दूजी बरी तिस जो अवाज सुणित्ती, कि जे किच्छ परमात्मा ने सुच्चा कित्ते रा है, तिस जो तू असुच्चा मत बोल। 15. त्रे बरी इह्य्यां ई होया, तां तिसकी बेले से पात्र अम्बरा जो चुक्की लित्तेया गया। 16. जां पतरस अपणे मनाह बिच सोचेया ई करदा था, कि एह दर्शन जे मैं दिख्खेया कै है, ता दिख्खो, से महु जिन्हा जो कुरनेलियुस ने भेजेया थिय्या, शमौन री डेवढी पर आई खडे होये। 17. ते हक्क लाई करी पूछणा लग्गे, कै शमौन जिस जि कि पतरस बी बोल्दे, परोणा बणी करी ईत्ते ई है ना रुके रा? 18. पतरस जे दर्शन रे बारे सोचेया ई करदा था, कि आत्मा ने तिस जो बोल्या, दिख्ख, त्रे महु तेरी तोप बिच हिन। 19. इधेरे तांइ थले जा, ते बे-झिझक तिन्हा कने चली जा, किजोकि मैं ई तिन्हा जो भेजे रा है। 20. तां पतरस ने थले उतरी करी तिन्हा मन्हुआं जो बोल्या, दिख्खो, जिसेरी तोप तुसा पाये री है, से मैं ई है, तुसां री आणे री वजाह कै है? 21. तिन्हा ने बोल्या, कुरनेलियुस सूबेदार जे भला अते नेक कने परमात्मा रा डर मनणे वाळा ते सबनी जाति बिच इजत दार महु है, तिस स्वर्गदूत ने तिन्हेरे अपणे घरे सदणे तांइ ते जे किच्छ तुसा बोल्या तिस जो असा जो सुनणे तांइ बोले रा है। 22. तां तिस ने तिन्हा जो अन्दर सद्धी करी तिन्हेरी मेहमान नबाजी किन्ती। ते दूजे रोज, से तिन्हा कने गया, ते याफा रे भाइयां बिच का केई तिन्हा कने गे। 23. दूजे रोज से कैसरिया बिच पूजे, ते कुरनेलियुस अपणे रिश्तेदारां ते अपणे प्यारे मित्रां कने इकट्ठा होई करी तिन्हा जो भाळेया करदे थिय्ये।

### कुरनेलियुस रे घरे पतरस

24. जां पतरस अन्दर आया करदा थिय्या, ता कुरनेलियुस तिन्हा का आई करी मिल्लेया, ते पैर बंदी करी तिन्हा जो नमस्ते किन्ती। 25. अपण पतरस ने तिस जो उठाई करी बोल्या, खड़ी जा, मैं बी ता महु है। 26. ते तिसके कने गल्ल-बात करदे-करदे अन्दर गया, ते बडे महुआं को इकट्ठा दिख्खी करी। 27. तिन्हा जो बोल्या, तुसा जाणदे हिन, कि होर जातियां कने मिल्गा-जुलगा या तिन्हेरे तित्ते जाणा यहुदी महुआं तांई विधान रे खलाफ है, अपण परमात्मा ने मिंजो दस्से रा है, कि कुसकी बी महु जो अपवित्र या असुच्चा नी बोलू। 28. इधेरे तांई मिंजो जां सद्धेया, ता बिना किच्छ बोले रे चली आया, अवे मैं पूछदा कि मिंजो कुस कम्म तांई सद्धेया है? 29. कुरनेलियुस ने बोल्या, कि इस बेले पूरे चार रोज होये, कि मैं अपणे घरे तिन्हेरे पेहर प्राथना करेया करदा थिय्या, कि दिख्खो, इक महु चमकीले कपडे पाई करी, मेरे मुहागर आई खडा होया। 30. ते बोल्णे लग्गीया, ओ कुरनेलियुस, तेरी प्राथना सुणी लेई, ते तेर दान परमात्मा रे सामणे चेत्ता कित्ते गे हिन। 31. इधेरे तांई कुसकी जो याफा भेजी करी शमौन जिस जो कि पतरस बी बोल्दे, सद्ध, से समुन्द्र रे कनारे शमौन चमडे रा धन्धा करणे वाळे रे घरे परोणा बणी करी रुके रा है। 32. तां मैं झट तेरे का महु भेजी दित्ते, ते तुसा खरा कित्ता, जे आई गे, अवे असा सब परमात्मा रे सामणे हिन, ताकि जे किच्छ परमात्मा ने तुसा कने बोल्या तिस जो सुनन। 33. तां पतरस ने बोल्या,



### पतरस रा उपदेश

34. अवे मिंजो पक्का होया, कि परमात्मा कुसकी कने बी भेद भाव नी करदा, अपण से हर जाति जे तिन्हा रा उर मनदे ते भले कम्म करदे, तिन्हा जो से अपनाई लिंदे। 35. जे वचन तिन्हा ने इस्त्राएल बिच भेजेया, हालाकिं तिन्हा ने यीशु मसीह रे जरिये ( जे सबनी रे प्रभु हिन ) सान्ति रा बसेख सुणाया। 36. से गला तुसां जाणदे हिन यूहन्ना रे प्रचार रे बाद गलील का सूरु होईकरी सारे यहूदिया बिच फैली गया। 37. कि परमात्मा ने कुस तरिके कने यीशु नासरी जो पवित्र आत्मा री सक्ति कने चुणेया, से भलाई करदे, ते सबनियां जो जे सैतान रे सताये रे थिये, खरा करदे गे, किजोकि परमात्मा तिन्हा ने थिये। 38. अते असा उन्हा सबनी कम्मा रे गवाह हिन, जे तिन्हा ने यहूदिया रे देस ते यरुशलेम बिच बी कित्ते थिये, ते तिन्हा ने यीशु जी जो सूळी पर लटकाई करी मारी छडुया। 39. तिन्हा जो परमात्मा ने तिन्हे रोज जिंदा करी दित्तेया। 40. सबनी महुआं जो नी अपण तिन्हा गवाह जो जिन्हा जो परमात्मा ने पैहे ई चुणी लेरा थियेया, मतलब असां जो जिन्हा ने तिन्हेरे मरी करी फीरी जिंदा होई जाणे का बाद तिन्हा कने खाया पित्तेया। 41. ते तिन्हा ने असा जो हुकुम दित्तेया, कि महुआं बिच प्रचार करो, ते गवाई देयो, कि एह ओई हिन, जिन्हा जो परमात्मा ने मरे रेयां रा न्याय करणे ताई ठहराये रा है। 42. तिन्हेरी सब भविष्यवाणी करणे वाले गवाई दिंदे, कि जे कोई तिन्हा पर विसवास करगा, तिस जो तिन्हेरे नां रे जरिये पाफ का माफी मिलन। 43. पतरस एह गलां बोल्या ई करदा थियेया, किपवित्र आत्मा वचन जो सुनणे वाले सबनियां पर उतरी आया।

### गैर यहूदियां पर पवित्र आत्मा रा उतरणा

44. ते जितणे रा खतना होये रा थियेया जे पतरस कने आये थिये, से सब हरान होई गे कि होर जातियां रे महुआं पर बी पवित्र आत्मा रा दान दित्तेया गेया। 45. किजोकि तिन्हा ने उन्हा जो अलग-अलग भाषा बोल्दे ते परमात्मा री बड़ाई करदे सुणेया। 46. इस गल पर पतरस ने बोल्या, कै कोई इन्हा महुआं जो बपतिस्मा दैणे ताई, पाणी सुलभ करणे जो मन्हा करी सकदा? इन्हा जो बी तिह्य्यां ई पवित्र आत्मा मिलेया, जिह्य्यां असां जो मिलेया थियेया। 47. ते तिस ने हुकुम दित्तेया कि तिन्हा जो यीशु मसीह रे नां कने बपतिस्मा दित्तेया जाये, तां तिन्हा ने तिसेरे छन्दे कित्ते की कि किच्छ रोज असां कने रुकी जान। 48. ते तिस ने हुकुम दित्तेया कि तिन्हा जो यीशु मसीह रे नां कने बपतिस्मा दित्तेया जाये। तां तिन्हा ने तिसेरे छन्दे कित्ते कि किच्छ रोज होर तिन्हा का रुकी जाये।

### पतरस रा अपणे कम्मां री सफाई दैणा

11. ते खास चेल्लेयां ते भाईयां ने जे यहूदिया बिच थिये सुणेया, कि होर जातियां ने बी परमात्मा रे वचन जो मन्नी लेया। 2. अते जां पतरस यरुशलेम बिच आया, ता जिन्हा रा खतना होये रा थियेया से महु तिस कने बेहस करणा लगे। 3. कि तू जिन्हा रा खतना नी है होये रा तिन्हा कने खाया-पित्तेया। 4. तां पतरस ने तिन्हा जो सूरु का इक-इक गल दस्सी; 5 कि मै याफा सैहर बिच प्रार्थना करेया करदा थियेया, ते बेसुद्ध होईकरी दर्शन दिखेया, कि इक पात्र, बड्डी चादर साहई चों कुणे का लटकेरा, अम्बरा का उतरी करी मेरे का आया। 6. जां मै तिस पर ध्यान दित्तेया, ता दुनियां रे चार पैरा अते जंगली जानवर ते रेंगेणे वाले जीव-जन्तु ते अम्बरा बिच उड़ने वाले परेखर दिखे। 7. ते एह अवाज बी सुणी कि ओ पतरस उठ मार अते खा। 8. मै बोल्या, नी प्रभु, नी, किजोकि कोई अपवित्र या असुच्ची चीज मेरे मूहा बिच कदी नी गई। 9. इस जवाब बिच अम्बरा का दूजी बारी अवाज आई, कि जे किच्छ परमात्मा ने सुच्चा कित्तेया है तिस जो असुच्चा मत बोल। 10. तीन बारी इह्य्यां ई होया, तां फिरी सब किच्छ अम्बरा जो खिच्ची लित्तेया। 11. ते दिखेयो, तिस्सी बेले त्रै महु कैसरिया का मेरे का आये ते आई खडे होये। 12. तां पवित्र आत्मा ने मिंजो तिन्हा कने जाणे जो बोल्या, ते एह छै: भ्याळ मेरे कने चली पे, अते असी तिस महु रे घरे आये। 13. ते तिन्हे दस्सेया कि, मै इक स्वर्ग दूत जो अपणे घरे खड़ा दिखेया, जिस ने मिंजो बोल्या, कि

याफा बिच महुआं जो भेजी करी शमोन जिस जो कि पतरस बी बोलदे, सद्दी लेईया। 14. तिन्हे तुसां कने इहदेई गलां बोलणी, जिन्हा कने तैं अते तेरे टब्बर रा उद्धार होणा। 15. जां मै गलां करणे लगेया, ता पवित्र आत्मा तिस्सी ई तरिके कने उतरेया, जिस तरिके कने असां पर उतरेया थियेया। 16. तां मिंजो प्रभु रा से वचन चेत्ता आया, जे तिन्हा ने बोल्या थियेया, कि यूहन्ना ने ता पाणी कने बपतिस्मा दित्तेया थियेया, अपण तुसां ने पवित्र आत्मा कने बपतिस्मा पाणा। 17. हलांकि तिन्हा जो बी सैहई दान मिलेया, जे असां जो प्रभु यीशु जी पर विश्वास करणे पर मिलेया थियेया, ता मै कुण हँ जे परमात्मा जो रोकी सकदा? 18. एह सुणीकरी, से चुप रेह, ते परमात्मा री बड़ाई करी के बोल्या लगे, ता परमात्मा ने होर जातियां रे महुआं जो बी अपणी जिंदगी बिच अपणे पापां का तौबा करणे रा दान दित्तेया है।

### गैर यहूदियां री कलीसिया

19. ता जे महु तिस क्लेस रे मारे जे स्तिफनुस री वजाह कने पेया थियेया, तित्तर-बित्तर होई गे थिये, से चलदे-चलदे फीनीके ते कुप्रुस ते आन्ताकिया बिच जाई पुजे, अपण यहूदियां जो छड्डी करी होर कोई बी नी तिन्हेरे वचन सुणदे थिये। 20. अपण तिन्हा बिच का कितणे ई कुप्रुसी ते कुरेनी थिये, जे आन्ताकिया अन्दर आईकरी युनानियां जो बी प्रभ यीशु जी री खुसखबरी रा संदेस सुणाणा लगे। 21. ते प्रभु रा हत्थ तिन्हा पर थियेया, ते बडे महु विश्वास करी के प्रभु यीशु जी रे पाससे आई गे। 22. तां तिन्हेरी चर्चा यरुशलेम री कलीसिया ने सुणी, ते तिन्हा ने बरनबास जो आन्ताकिया भेजेया। 23. से तित्ते पुज्जी करी परमात्मा री मैहर जो दिख्खी करी बड़ा खुस होया ते सब जो सिक्कास दिती की तन मन लगाईकरी प्रभु यीशु जी कने लिपटी रेयो। 24. किजोकि से भले महु थिये, ते पवित्र आत्मा रे वस बिच थिये, ते बडे महुआं ने प्रभु जी जो अपनाया। 25. तां से शाऊल जो तोपणे तरसुस जो चली गया। 26. ते जां तिन्हा कने मिलेया ता से तिन्हा जो आन्ताकिया लेई आया, ते इह्य्यां होया कि से इक साल ताई कलीसिया कने मिलदे ते बडे जणेया जो सिक्कास दिंदे रेह, ते चेल्लेयां जो सबका पैहे आन्ताकिया बिच मसीही बोल्या गया। 27. तिन्हा ई रोजाभ बिच केई भविस्वाणी करणे वाले यरुशलेम का आन्ताकिया जो आये। 28. तिन्हा बिच का इक अगबुस नां रे महु ने खडे होईकरी पवित्र आत्मा रे गलाये एह दस्सेया, कि सारी दुनियां बिच बड़ा अकाल पेणा, ते से अकाल क्लैदियुस रे बेले पेया। 29. तां चेल्लेयां ने फैसला लित्तेया, कि हर इक अपणी अपणी पूंजी रे साहब कने यहूदिया बिच रेहे वाले हर इक भाई री सेवा ताई किच्छ ना किच्छ भेजन। 30. ते तिन्हा ने तियां ई कित्तेया, ते बरनबास ते शाऊल रे हत्थां प्राचीनां का किच्छ भेजी दित्तेया।

### पतरस री जैल का मुक्ति

12. तिस बेले हेरोदेस राजे ने कलीसिया रे केई महुआं जो दुख दैणे ताई तिन्हा पर हत्थ पाया। 2. तिस ने यहून्ना रे भ्याळ याकूब जो तलवार कने मरवाई छडेया। 3. ते जां तिस ने दिखेया, कि यहूदी महु तिस का खुस हुन्दे, ता तिस ने पतरस जो बी पकड़ी लेया, से रोज अरखमीरी रोटी रे रोज थिये। 4. ते तिस ने पतरस जो पकड़ी करी जेल्ला बिच पाई दित्तेया, ते रखवाली ताई, चार-चार सपाहई रे चों पहरा बिच रखेया; इस इच्छा बिच कि से फसह रे बाद तिस जो महुआं रे सामणे लिया। 5. ता जेल्ला बिच पतरस री रखवाली होया करदी थी, अपण कलीसीया, तिसेरे ताई लौ लाईकरी प्रार्थना करेया करदी थी। 6. ते जां हेरोदेस तिस जो जो तिन्हेरे सामणे लियाणे जो थियेया, ता तिस्सी रात पतरस दो संगळा कने बनितेरा दो सपाहई रे बीच सोया करदा थियेया, ते रखवाली करने वाले दुआर का जेल्ला री रखवाली करेया करदे थिये। 7. ते दिखेयो, प्रभु जी रा इक स्वर्ग दूत आई खड़ा होया ते तिस कोठरी बिच लौ चमकी ते तिस ने पतरस री पसली पर हत्थ मारी करी तिस जो जगाया, ते बोल्या, उठ फूर्ती मार, ते तिसेरे हत्थ का संगळा खुली करी पेई गई। 8. तां स्वर्गदूत ने तिस जो बोल्या, तैयार होई जा, अपणे जुत्ते पाई लै, तिस ने तियां ई कित्ता, फिर तिस ने तिस जो बोल्या, अपणे कपडे पाई करी मेरे पिच्छे चल। 9. से निकळी करी तिसेरे

पिच्छे चली गया; अपण एह नी जाणदा थिय्या, कि जे किच्छ स्वर्गदूत बोल्या करदा है, से सच्ची ई होया करदा है, अपण एह समझेया, कि मैं दर्शन दिखखेया करदा है।<sup>10</sup> .तां से पैहे ते दूजे पैहे का निकळी करी लोये रे दुआर का पुजे, जे सैहर पास्से थिया, से तिन्हा ताई अपणे आप ई खुली गया, ते से निकळी करी इक ई गळी होईकरी गे, इतणे बिच स्वर्गदूत तिस जो छड्डी करी चली गया।<sup>11</sup> .तां पतरस ने होस बिच होईकरी बोल्या, अवे मिंजो सच्ची पता लग्गी गया कि प्रभु जी ने अपणा स्वर्गदूत भेजी करी मिंजो हेरोदेस रे हत्थां का बचाई लेया, ते यहूदियां री आस तोडी दित्ती।<sup>12</sup> ते एह सोची करी, से तिस यहूना री मां मरियम रे घरे गया, जिस जो कि मरकुस बी बोल्दे; तित्ते बडे महु इकड्डा होईकरी प्रार्थना करेया करदे थिय्ये।<sup>13</sup> .जां तिस ने दुआर जो खटखटाया, ता रुदे नां री इक भक्तणी दिखखेणे जो आई।<sup>14</sup> .ते पतरस री अवाज सुणी करी पछाणी लेया, ते खुसी रे मारे दुआर बी नी खोल्या, अपण दौडीकरी अन्दर आई ते अन्दर तिन्हा जो दस्सेया कि पतरस दुआर पर खडा है।<sup>15</sup> .तिन्हा ने तिस जो बोल्या, तू पागल है, अपण से निडर होईकरी बोलणा लगी किना ऐसी ई गल्ल है, तां तिन्हा ने बोल्या, तिसेरा दूत होणा।<sup>16</sup> .अपण पतरस दुआर खटखटान्दा ई रेह्या, ते तिन्हा दुआर खोल्या, ते तिस जो दिखखी करी हरान होई गे।<sup>17</sup> .तां तिस ने हत्थां कने इसारा कित्तेया कि, से चुप रहै, ते तिन्हा जो दस्सेया, कि प्रभु जी ने कुस तरिके कने मिंजो जेला का निकाळेया, ते फिरी बोल्या, कि याकूब रे भ्याळा जो एह गल्ल बोली देयां, तां से निकळी करी दूजी जगाह चली गया।<sup>18</sup> .भ्यागा तडके ई सपाहईयां बिच बडी अफरा-तफरी पेई गई, कि पतरस जो कै होया।<sup>19</sup> .जां हेरोदेस ने तिसेरी तोप पाई ता से नी मिल्लेया, ते पेहेदारा री जांच-पडताल रे बाद एह हुकुम दित्तेया गया कि तिस जो मारी दित्तेया जाये, एह सुणी करी पतरस यहूदिया जो छड्डी करी कैसरिया बिच जाई करी रहै लग्गीया।

### हेरोदेस री मौत

<sup>20</sup> .ते से सूर ते सैदा रे महुआं का ना-खुस थिय्या, अते से इक मन होईकरी तिस का आये ते बलास्तुस जो, जे राजे रा इक कर्मचारी थिय्या, मनाईकरी तिन्हेरा मेल करणा चाया, किजोकि राजे रे देसा कने ई तिन्हेरे देसा रा पालन पोषण हुन्दा थिय्या।<sup>21</sup> .तराये रे रोजां बिच हेरोदेस राजपहनावा पाईकरी राजगद्दी पर बैठेया ते तिन्हा जो समझाणे लग्गीया।<sup>22</sup> .ते महु बोली पे, कि एह ता महु रा नी अपण परमात्मा रा वचन है।<sup>23</sup> .उस्सी बेले प्रभु जी रे इक स्वर्गदूत ने तिस जो मारी दित्तेया, किजोकि तिस ने परमात्मा री महिमा नी कित्ती ते से कीडे-पडके मरी गया।<sup>24</sup> .अपण परमात्मा रा वचन बद्धदा ते फैलदा गया।<sup>25</sup> .जां बरनबास ते शाऊल अपणी सेवा पूरी करी बैठे, ता यहूना जिस जो कि मरकुस बी बोल्दे कने लेईकरी यरुशलम का हटि आये।

### बरनबास ते शाऊल रा भेजेया जाणा

**13** .आन्ताकिया री कलीसिया बिच कित्तणे भविष्यवाणी करणे वाळे ते सिकसक थिय्ये, मतलब बरनबास ते शमौन जिन्हा जि कि नीगर बी बोल्दे, ते लूकियुस कुरेनी, ते देस रे चौथे हिस्से रा राजा हेरोदेस रा दूद्धभ्याळ मनाहम ते शाऊल।<sup>2</sup> .जां से ब्रत समेत प्रभु री भक्ति करेया करदे थिय्ये, ता पवित्र आत्मा ने बोल्या, मेरे निमित्त बरनबास ते शाऊल जो तिस कम्म ताई अलग करो जिस ताई मैं इन्हा जो चुणी लेरा है।<sup>3</sup> .तां तिन्हा ने ब्रत ते प्राथना करी के तिन्हा पत हत्थ रखे ते तिन्हा जो भेजी दित्तेया।

### पौलुस री पैली प्रचार यात्रा

<sup>4</sup> .ते से पवित्र आत्मा रे भेजे रे सिलूकिया जो गे, ते तित्ते का जहाज पर चढी करी कुप्रुस जो चली गे।<sup>5</sup> ते सलमीस बिच पूज्जी करी, परमात्मा रे वचन जो यहूदियां री धर्म सभा बिच सुणाया, ते यहूना तिन्हेरा सेवक थिय्या।<sup>6</sup> .ते तिस सारे टापू बिच घूमदे-फिरदे, से पाफूस जाई पूजे तित्ते तिन्हा जो बार-यीशु नां रा इक यहूदी जादू-टोळे करणे वाळा झूठा भविष्यवाणी करणे वाळा मिल्लेया।<sup>7</sup> .से सिरगियुस पौलुस सूबे रे कने थिय्या, जे समझदार महु थिय्या, तिस ने बरनबास ते शाऊल जो सद्देया ते तिन्हा का परमात्मा रा

वचन सुनणा चाया।<sup>8</sup> अपण इलीमास जादू-टोळे करणे वाळे ने, किजोकि ऐई तिसेरे नां रा मतलब है तिन्हेरे खलाफ होईकरी, सूबे जो विसवास करणे का रोकणा लग्गीया।<sup>9</sup> तां शाऊल ने जिस जो की पौलुस बी बोल्दे, पवित्र आत्मा रे वस बिच होईकरी तिस पास्से दिखखेया।<sup>10</sup> .ओ सारी बुराई अते कपट कने भरितेरे, सैतान री ओलाद, तू हर इक नेक गल्ल रा दुस्मण है। कै तू परमात्म रे सीधे-सच्चे रस्ते जो टेढा करणा नी छडणा? <sup>11</sup> .अवे दिखख, प्रभु रा हत्थ तेरे कने छुईतेरे है, तू तां ताई अन्ने रेह्या जां ताई सूरज जो नी दिखखी लिन्दा, ते तिस्सी बेले धुन्दा अते न्यहारा तिस पर छाई गया, ते से ईत्ते-उत्ते हत्थ पैर चलाणे लग्गीया, ताकि तिसेरा हत्थ पकडी करी तिस जो कोई लेई चलन।<sup>12</sup> .तां सूबे ने जे किच्छ होया था, दिखखी करी अते प्रभु री सिकसा का हरान होईकरी विसवास कित्तेया।

### पिसीपिया रे अन्ताकिया बिच

<sup>13</sup> .पौलुस ते तिसेरे साथी पाफूस का जहाज जो खोलीकरी पंफूलिया रे पिरगा बिच आये ते यहूना तिन्हा जो छड्डी करी यरुशलम जो हटि गया।<sup>14</sup> .ते पिरगा का अगे जाई करी पिसीदिया रे आन्ताकिया पूजे ते सब्त वाळे रोजे धर्म सभा बिच बेई गे।<sup>15</sup> .ते नियमां ते भविष्यवाणी करणे वाळेयां री कताबां रे पढने का बाद सभा रे सरदारा ने तिन्हा का बोली, भेजेया, कि ओ भाइयों, जे महुआं री सिकसा ताई तुसां रे मन बिच कोई गल्ल है ता बोली।<sup>16</sup> .तां पौलुस ने हत्थ हिलाई करी बोल्या लग्गीया, ओ इस्त्राएलियों, ते परमात्मा रा डर मनणे वाळेयां सुणों।<sup>17</sup> .इन्हा इस्त्राएलियां रे परमात्म ने असां रे बब-दाद्रेयां जो चुणी लेया, ते जां एह मिस्त्र देस बिच परदेसी होईकरी रेहन्दे थिय्ये, ता तिन्हेरी उन्नति कित्ती, ते अपणी महान सक्ति कने तिन्हा जो तित्ते का निकाळी लियाये।<sup>18</sup> .ते से कोई चाळी सालां ताई तिन्हा कने बणा बिच ई रेह्या।<sup>19</sup> .ते कनान देस बच सत्त जातियां रा नास करी के तिन्हेरा देस कोई साढे चार सौ साल बिच इन्हेरे हक बिच करी दित्तेया।<sup>20</sup> .इसेरे बाद तिन्हा ने शामुएल भविष्यवाणी करणे वाळे ताई तिन्हा बिच न्याय करणे वाळे बणाई दित्तेया।<sup>21</sup> .तिसेरे बाद तिन्हा ने इक राजा मँगेया, तां परमात्मा ने चाळी सालां ताई बिन्यामीन रे गौत्र बिच का कीश रे निके पुत्र शाऊल जो तिन्हेरा राजा बणाई दित्तेया।<sup>22</sup> .फिरी शाऊल जो हटाई करी दाऊद जो तिन्हेरा राजा बणाई दित्तेया, जिसेरे बारे बिच तिन्हा ने गवाई दित्ती, मिंजो इक महु थिय्ये रा निक्का दाऊद, मेरी मर्जी रे साहब कने मिल्ली गया। तित्ते ई जे मैं चांदा से पूरा करणा।<sup>23</sup> .इसेरे ई वंश बिच का परमात्मा ने अपणी कसम रे साहब कने इस्त्राएल रे महुआं का इक मुक्तिदाता मतलब यीशु जी जो भेजेया।<sup>24</sup> .जिन्हा रे आणे का पैहे यहूना ने सब इस्त्राएल रे महुआं जो तिन्हेरे पापां का तौबा करणे रा प्रचार कित्तेया।<sup>25</sup> .ते जां यहूना अपणा बेला पूरा करणे जो थिय्या, ता तित्ते बोल्या, तुसा मिंजो कै समझदे? मैं से नी है! अपण दिखखो, मेरे बाद इक आणेवाळा है, जिसेरी पैरा री मैं जूती खोलणे रे लायक बी नी है।<sup>26</sup> .ओ भाइयों, तुसा जे अब्राहम री ओलाद हिन, ते जे तुडसा परमात्मा रा डर मनदे, तुसा का इस उद्धार रा वचन भेजेया गेरा है।<sup>27</sup> .किजोकि यरुशलम रे रेह्णे वाळे ते तिन्हेरे सरदारां ने, ना ता तिन्हा जो पछाणेया, ते तिन्हा जो कसुरवार ठहराई दित्तेया। ते इह्थ्यां तिन्हा ने भविष्यवाणी करणे वाळे री गल्लां जो पूरा कित्तेया, जे हर सब्त रे रोज पढी जान्दी थी।<sup>28</sup> .पिलातुस ने जां तिन्हा जो मारी दैणे लायक कोई कसुर नी पाया, तां बी पिलातुस रे छंदे कित्ते की, कि तिन्हा जो मारी दित्तेया जाये।<sup>29</sup> .तिन्हेरे बारे जे बी लिखखे रा थिय्या, जां से सब किच्छ पूरा करी बैठे ता तिन्हा जो सूळी का उतारी करी इक कब्र बिच रखखी दित्तेया।<sup>30</sup> .अपण परमात्मा ने तिन्हा जो मरे रेयां बिच का जिंदा करी दित्तेया।<sup>31</sup> .ते से तिन्हा जो जे तिन्हा कने गलील का यरुशलम जो आये थिय्ये, बडे दिनां ताई लिबबदे रेह, महुआं रे सामणे से अब्बे बी गवाह हिन।<sup>32</sup> .ते असा तुँसा जो तिस वादे रे बारे बिच, जे बब-दाद्रेयां कने कित्तेया गया थिय्या, एह खुसखबरी सुणान्दे हिन।<sup>33</sup> .कि परमात्मा ने यीशु जी जो जिंदा करी के, सेहई वादा असां री ओलाद ताई पूरा कित्तेया, जिह्थ्यां कि दूजे भजन बिच लिखखे रा है, कि तू मेरा निक्का, अज्र मैं तिजो जन्म दित्तेया है।<sup>34</sup> .ते तिन्हेरे इस तरिके कने मरे रेयां बिच का जिंदा होई जाणे रे बारे बिच बी, कि से कदी

नी सड़न, तिन्हा ने इहय्यां बोल्या है: कि मैं तिज्जो से पवित्र ते अटल असीस दैणी जिन्हा जो दैणे रा वचन मैं दाऊद जो दित्तेया थिय्या।<sup>35</sup> इधेरे ताई तिन्हा ने इक होर भजन बिच बोल्या है; कि तू अपणे पवित्र जन जो सड़ने नी दैणा।<sup>36</sup> किजोकि दाऊद ता परमात्मा री मर्जी रे साहब कने अपणे बेले बिच सेवा करी के सोई गया, ते अपणे पित्रां कने जाई मिल्लेया; ते सडी भी गया।<sup>37</sup> अपण जिस जो परमात्मा ने जिंदा कित्तेया, से सडी नी पाया।<sup>38</sup> इधेरे ताई, ओ भाइयों, तुसा जाणी लेयो कि इन्सेरे ई जरिये तुसा जो पापां री माफी री खुसखबरी दिती जाया करदी है।<sup>39</sup> ते जिन्हा गल्लां कने तुसां मूसा रे नियमां रे जरिये बेकसुर नी होई सकदे थिय्ये, तिन्हा सबनी हर इक गल्ल कने इक विसवास करणे वाळा तिन्हेरे जरिये बेकसुर ठहरदा।<sup>40</sup> इधेरे ताई त्यार रेयो, इहय्यां ना हो कि जे भविष्यवाणी करणे वाळे बोले रा है से तुसा कने बी होई जान।<sup>41</sup> ओ बेजती करणे वाळ्यो, दिखखो, ते हरान होईकरी खत्म होई जाओ, किजोकि मैं तुसां रे जुग बिच इक इदेया कम्म करदा, कि जे कोई तुसा कने तिसेरी चर्चा करन, ता तुसा कदी विसवास नी करणा।<sup>42</sup> तिन्हेरे बाहर निकळदे बेले मल्लु तिन्हेरे छंदे लगे करणा, कि अगले सब्त वाळे रोजे असां जो ऐई गल्लां सुणाई जान।<sup>43</sup> ते जां सभा उठी गेई ता यहूदियां अते गैर-यहूदी भक्तां बिच का बडे जणे पौलुस ते बरनबास ते पिच्छे चली पे, ते तिन्हा ने तिन्हा कने गल्लां करी के समझाया, कि परमात्मा री दया बिच बणी रेयो।

### पौलुस रे जरिये गैर यहूदियां बिच प्रचार री सुरुआत

44. अगले सब्त वाळे रोजे सैहर रे सारे मल्लु परमात्मा रा वचन सुनणे ताई इकट्टा होई गे<sup>45</sup> अपण यहूदी मल्लुआं री भीड़ जो दिखखी करी कुदी गे, ते बेजती करदे पौलुस री गल्लां रे खलाफ होईकरी बोलणा लगे।<sup>46</sup> तां पौलुस ते बरनबास ने निडर होईकरी बोल्या, जरूरी था, कि परमात्मा रा वचन पैहे तुसां जो सुणाया जांदा, अपण जबकि तुसा तिस जो दूर करदे हिन, ते अपु जो अन्नत जीवन रे लायक नी समझदे, ता दिखखो, असां होर जातियां रे मल्लुआं पाससे मुडेया करदे हिन।<sup>47</sup> कोजोकि प्रभु ने असां जो हुकुम दित्तेया है, कि मैं तिज्जो होर जाति रे लोकां री लौ ठहराया है, ताकि तू दुनियां रे कुणे ताई उद्धार रे रस्ते रा जरिया हो।<sup>48</sup> एह सुणी करी होर जाति रे मल्लु खुस होई गे, ते परमात्मा रे वचन री बड़ाई करणा लगे, ते जित्तेणे अन्नत जीवन ताई ठहराये गेरे थिय्ये, तिन्हा ने विसवास कित्तेया।<sup>49</sup> तां प्रभु रा वचन सारे देस बिच फैलणे लगेया।<sup>50</sup> अपण यहूदियां ने भक्तां ते कुलीन जनानियां जो ते सैहर रे बडे मल्लुआं जो उकसाया, ते पौलुस ते बरनबास पर जोर जबरदस्ती करी के तिन्हा जो अपणे सैहर का बाहर कडी दित्तेया।<sup>51</sup> तां से तिन्हेरे सामणे अपणे पैरा री धूल झम्मी करी इकुनियुस जो गे।<sup>52</sup> ते चेले खुसी कने ते पवित्र आत्मा कने भरपूर हुन्दे गे।

### ईकेनियुम बिच पौलुस ते बरनबास

14. इकुनियुस बिच इहय्यां होया कि से यहूदियां री धर्म सभा जो इकट्टे गे, ते इहदेयी गल्लां किन्ती की, कि यहूदियां ते यूनानियां बिच का केई जणेया ने भरोसा कित्तेया।<sup>2</sup> अपण नी मनणे वाळ्यो यहूदियां ने होर जातियां रे मल्लुआं रे मनाह बिच भाईयां रे खलाफ उकसाया, ते सब किच्छ बिगाडी दित्तेया।<sup>3</sup> ते से बडे रोजां ताई तित्ते रेह, ते प्रभु रे भरोसे हिम्मत कने गल्लां कने करदे थिय्ये; ते से तिन्हेरे हत्थां का निसानियां ते चम्तकारी कम्म करवाई करी अपणे मैहर रे वचनां पर गवाई दिन्दा थिय्या।<sup>4</sup> अपण सैहर रे मल्लुआं बिच फूट पेई गेई थी, इस कने किन्ने ई ता यहूदियां रे पाससे, ते कित्तेणे ई खास चेलेयां रे पाससे होई गे।<sup>5</sup> अपण जां होर जातियां ते यहूदी तिन्हेरी बेजती ते तिन्हेरे पर बडे बरसाणे ताई अपणे सरदारां समेत तिन्हा पर दौड़े।<sup>6</sup> ते इस गल्ल जो जाणी गे, ते लुकाउनिया रे लुस्त्रा ते दिरबे सैहरा बिच, ते अखखी-बखखी रे देसा बिच नस्सी गे।<sup>7</sup> ते तित्ते खुसखबरी सुनाणा लगे।

### लुत्रा ते दिरबे बिच

8. लुस्त्रा बिच इक इदेया मल्लु बैठे रा थिय्या, जे पैरां का निर्बल थिय्या, से जन्म का ई लंगडा था, ते कदी बी नी चले रा नी थिय्या।<sup>9</sup> से पौलुस जो गल्लां करदे सुणेया करदा थिय्या ते पौलुस ने तिसेरे पाससे दिखखेया कि इस बिच खरा होई जाणे रा भरोसा है।<sup>10</sup> ते पौलुस ने जोरे सणे बोल्या, अपणे पैरा रे भारे सीधा खड़ा होई जा, तां से उटकदा-उटकदा हंडणा-फिरणा लगेया।<sup>11</sup> मल्लुआं ने पौलुस रा एह कम्म दिखखी करी जोर सणे बोल्या, देवता असां का उतरी आये हिन।<sup>12</sup> ते तिन्हा ने बरनबास जो ज्यूस, ते पौलुस जो हिरमेस बोल्या, किजोकि एह गल्लां करणे बिच मुख्य थिय्या।<sup>13</sup> ते ज्यूस रे तिस देहे रा पूजारी जे तिस सैहर रे सामणे थिय्या, दान्द ते फुल्ला री माळा फाटका पर लियाई करी मल्लुआं कने बलिदान करणा चांदा थिय्या।<sup>14</sup> अपण बरनबास ते खास पौलुस चेले ने जां सुणेया, ते अपणे कपडे झाड़े, ते मल्लुआं री भीड़ बिच बडी गे, ते अवाज देईकरी बोलणा लगे, तुसां कै करेया करदे हिन? <sup>15</sup> असां बी ता तुसां साहई दुख-सुख भोगणे बिच भागी मल्लु हिन, ते तुसां जो खुसखबरी सुणादे, कि तुसा इन्हा बेकार री चीजां का बखरे होईकरी जिंदा परमात्मा जो जाणो, जिन्हा ने स्वर्ग ते दुनियां ते समुन्द्र ते किच्छ तिसा बिच है तिन्हा जो बणाया।<sup>16</sup> तिन्हा ने पैहे सब जातियां रे मल्लुआं जो अपणे-अपणे रस्ते चलणे दित्तेया।<sup>17</sup> तां बी तिन्हा ने खुद जो बे-गवाह नी छडेया, अपण से भलाई करदे रेह, ते अम्बरा का बरखा ते फलवन्त मौसम देईकरी, तुसां रे मनाह जो रोटी ते खुसी कने भरदे रेह।<sup>18</sup> एह बोली करी बी उन्हा ने मल्लुआं जो बडी मुस्किल कने रोकेया कि तिन्हा ताई बलिदान ना करन।<sup>19</sup> अपण किन्ने ई यहूदियां ने आन्ताकिया ते इकुनियम का आईकरी मल्लुआं जो अपणे पाससे करी लेया, ते पौलुस पर बडे भणकाये, ते मरे रा समझी करी तिस जो सैहर का बाह धरीडी लेई गे।<sup>20</sup> अपण जां चेले तिसेरे चाँ पाससे आई खडे होये, ता से उठी करी सैहर जो गया ते दूजे रोज बरनबास कने दिरबे जो चली गया।

### सीरिया रे अन्ताकिया बिच हटणा

21. ते से तिस सैहरा रे मल्लुआं जो खुसखबरी सुणाई करी, ते बडे सारे चेले बणाई करी, लुस्त्रा ते इकुनियम ते आन्ताकिया जो हटि आये।<sup>22</sup> ते चेलेयां रे मनाह जो मजबूत करदे रेह ते जह सिक्सा दिंदे थिय्ये, कि असां जो बडे कलेस सेहईकरी परमात्मा रे राज्य पर जाणा है।<sup>23</sup> ते तिन्हा ने हरेक कलीसिया बिच तिन्हेरे ताई प्राचीन रखवे, ते ब्रत समेत प्राथना करके, तिन्हा जो प्रभु रे हत्थां साँपेया जिन्हा पर तिन्हा ने भरोसा कित्तेया थिय्या।<sup>24</sup> ते पिसीदिया को हुन्दे से पंफुलिया बिच पूजे, <sup>25</sup> ते पिरगा बिच वचन सुणाई करी अचलिया बिच आये।<sup>26</sup> ते तित्ते का जहाज बिच आन्ताकिया बिच आये, जित्ते का से तिस कम्म ताई जे तिन्हा ने पूरा कित्तेया थिय्या परमात्मा री दया पर साँपे गे थिय्ये।<sup>27</sup> तित्ते पूजी करी, तिन्हा ने कलीसिया इकट्टी किन्ती ते दरसेया, कि परमात्मा ने असां कने होईकरी कदेय बडे-बडे कम्म कित्ते ते होर जातियां ताई विसवास रा दुआर खोली दित्तेया।<sup>28</sup> ते से चेलेयां कने बडे रोज ताई तित्ते ई रेह।

### यरुशलेम री सभा

15. फिरी कितणे मल्लु यहूदिया बिच आईकरी भाइयां जो सखाणे लगे कि जे मूसा तरे साहब कने तुसा रा खतना नी हो ता तुसा उद्धार नी पाई सकदे।<sup>2</sup> जां पौलुस ते बरनबास रा तिन्हा कने बडी लडाई ते बैहस-बाजी होई ता एह ठहराया, कि पौलुस ते बरनबास, ते असा बिच का कितणे होर मल्लु इस गल्ल रे बारे बिच यरुशलेम जो खास चेलेयां का ते प्राचीनां का जान।<sup>3</sup> ता सारी मण्डली ले ने तिन्हा जो थोड़ी दूर छडेया, ते से फीनीके ते सामरिया का हुन्दे होर जाति रे लोकां जो पाफ का तौबा करणे रा बसेख सुणान्दे गे, ते सब भाइयां जो बडा खुस कित्तेया।<sup>4</sup> जां यरुशलेम पुजे, ता कलीसीया ते खास चेलेयां ते प्राचीन तिन्हा कने खुसी कने मिल्ले, ते तिन्हा ने दरसेया कि परमात्मा ने तिन्हा कने होईकरी कदेय-कदेय कम्म कित्ते थिय्ये।<sup>5</sup> अपण फरीसियां रे दल रे किच्छ विसवासी, तिन्हा बिच का कितणे जणेया

ने उठी करी बोल्या, कि तिन्हेरा खतना ते मूसा रे नियमा जो मनणे रा हुकुम दैणा चहिंदा। 6.तां खास चेल्ले ते प्राचीन इस गल्ल रे बारे सोच-विचार करणे ताई इकठ्ठा होये। 7.तां पतरस ने बडी बेहस-बाजी रे बाद खडे होईकरी तिन्हा जो बोल्या। ओ भाइयों तुसा जाणदे हिन, कि बडे रोज होये, कि परमात्मा ने तुसा बिच का मिंजो चुणी लेरा है, कि मेरे मूंह का होर जाती जो खुसखबरी रा वचन सुणाई करी तिन्हा जो विसवास पर लियाऊं। 8.ते मनाह जो परखणे वाळे परमात्मा ने तिन्हा जो बी म्हारे साहई पवित्र आत्मा देईकरी तिन्हेरी गवाई दिती। 9.ते विसवास रे जरिये तिन्हेरे मन सुचे करी के असा बिच ते तिन्हेरे बिच कोई भेद-भाव रखेया। 10.ता अवे तुसा किजो परमात्मा जो परखदे हिन? कि चेल्ल्यां री कियाडी पर इदेया जुआ रखो, जिस जो कि न म्हारे पित्र चुकी सके थिये ते ना असा चुकी सकदे। 11.हां, असा रा ता पक्का है, कि जिस तरिके कने असा प्रभु यीशु जी री दया कने उद्धार पाया, तिस्सी तरिके कने से बी पान। 12.ता सारी सभा चुपचाप होईकरी बरनबास ते पौलुस री सुनणे लगे, कि परमात्मा ने तिन्हेरे जरिये होर जाति रे महुआं बिच कदेयी-कदेयी निसानियां, ते अनोखे कम्म दिख्खाये। 13.जां से चुप होये, ता याकूब बोल्णे लगेया, ओ भाइयों, मेरी सुणो, 14.शमौन ने दस्सेया थियेया कि परमात्मा होर जातियाँ रे लोकां रे बिच का किच्छ अपणे नां ताई चुणी करी तिन्हा पर अपणा सर्वप्रथम प्रेम प्रकट कित्तेया थियेया। 15.ते इस कने भविष्यवाणी करणे वाळे री गल्लां मिलदी, जिह्ययां लिख्खे रा है कि: 16.इसेरे बाद मैं फिरी आई करी दाऊद रे गिरे रे घर जो फिरी खडा करणा, ते खंडरा जो फिरी बनाणा, ते तिन्हा जो खडा करणा। 17.इधेरे ताई जे बचे रा महु, मतलब अब होर जातियां रे महुआं जो जे मेरे हिन, प्रभु जो तोपन। 18.एह ओई प्रभु बोल्दे हिन जे दुनिया री सुरुआत का ई इन्हा गल्ला रा बसेख दिंदे आये हिन। 19.इधेरे ताई मेरा विचार एह है, कि होर जातियां रे महुआं बिच का जे महु परमात्मा रे पाससे आई जांदे, असा तिन्हा जो दुख ना दें। 20.अपण तिन्हा जो लिख्खी भेजो, कि से मूर्ता जो चढाई री रोटी तुसा जो नी लैणी चहिंदी। ते व्यभिचार का बची रें। गळा घोटी करी मारे रे जानवर रा मांस ना खान ते खून जो कदी ना खान। 21.किजोकि पुराणे बेल्ले का सैहर सैहर मूसा रे नियमां रा प्रचार करणे वाळे चली आया करदे हिन, मूसा रे नियम हर सब्त वाळे रोजे धर्म सभा बिच पढ़े जांदे हिन।

### गैर यहूदी विश्वासियां जो चिठी

22.जां सारी कलीसीय समेत खास चेल्लेयां ते प्राचीनां जो अच्छा लगेया, कि अपणे बिच का केई महुआं जो चुनण, मतलब यहूदा जिस जो कि बरनबास बी बोल्दे, ते सीलास जो जेहडे कि भाइयां बिच मुखिया थिये, ते तिन्हा पौलुस ते बरनबास रे कन आन्ताकिया भेज्जेया। 23.ते तिन्हेरे हत्थां एह लिख्खी भेज्जेया, कि आन्ताकिया ते सूरिया ते किलिकिया बिच रेह्ले वाळे भाइयां जो जेहडे कि होर जाति रे हिन, खास चेल्लेयां रा रे प्राचीनां रा नमस्कार। 24.असा ने सुणेया, कि असा बिच का कितणेयां ने जाईकरी, तुसा जो अपणी गल्लां कने डराई दित्तेया, ते तुसा रे मन बदली दित्ते अपण असा ने तिन्हा जो हुकुम नी दित्तेया थियेया। 25.इधेरे ताई असा ने इक मन होईकरी ठीक समझेया, कि चुणे रे महुआं जो अपणे प्यारे बरनबास ते पौलुस जो तुसां का भेज्जना। 26.एह ता महु हिन, जिन्हा ने अपणे प्राण असा रे प्रभु यीशु मसीह रे नां ताई मुस्किल बिच पाये हिन। 27.ते असा ने यहूदा ते सीलास जो भेज्जेया, ताकि से अपणे मूंह कने बी एह सब गल्लां बोली दें। 28.पवित्र आत्मा जो, ते असा जो ठीक लगेया, कि इन्हा जरूरी गल्लां जो छडी, तुसा पर होर कोई बोझ ना पान। 29.कि तुसा मूर्ता जो चढाई री रोटी तुसा जो नी लैणी चहिंदी। ते व्यभिचार का बची रें। गळा घोटी करी मारे रे जानवर रा मांस ना खान ते खून जो कदी ना खान। इन्हा सब का दूर रेयो, ता तुसा रा भला होणा अगे विदा। 30.फिरी से विदा होईकरी आन्ताकिया पूजे, ते सभा इकठ्ठा करी के से चिट्ठी तिन्हा जो देई दिती। 31.ते से पढी करी तिस सिक्सा री गल्लां का बडे खुस होये। 32.ते यहूदा ते सीलास ने जे खुद बी भविष्यवाणी करणे वाळे थिये, बडी गल्लां कने भाइयां जो सिक्सा देईकरी मजबूत कित्तेया। 33.से किच्छ रोज रुकी करी भाइयां कने सान्ति कने विदा होये, कि अपणे भेजणे वाळेयां का जान। 34.(अपण सीलास जो तित्ते रेह्ले

खरा लगेया।) 35.ते पौलुस अते बरनबास आन्ताकिया बिच रुकी गे, ते बडे होर महुआं कने प्रभु रे वचन री सिक्सा ते खुसखबरी सुणादे रेह।

### पौलुस री दुई प्रचार यात्रा - पौलुस ते बरनबास बिच बहस होणा

36.किच्छ रोजां बाद पौलुस ने बरनबास जो बोल्या, कि जिन्हा जिन्हा सैहरा बिच असा ने प्रभु रा वचन सुणा या थियेया, चलो, फिर तित्ते जाईकरी अपणे भाइयां जो दिख्खदे, कि कदेय हिन। 37.ते बरनबास ने यहूदा जिस जो कि मरकुस बी बोल्दे, कने लैने रे बारे अन्दर सोचेया। 38.अपण पौलुस ने तिस जो जेहडे कि पंफुलिया बिच तिन्हा का बखरे होई गे थिये, ते कम्म पर तिन्हा कने नी गे थिये, कने लेई जाणा ठीक नी समझेया। 39.ता से इक दूजे रे खलाफ होई गे, ते इक दूजे का बखरे होई गे ते बरनबास, ते मरकुस जो लेईकरी जहाज पर कुप्रुस जो चली गया। 40.अपण पौलुस ने सीलास जो चुणी लेया, ते भाइयां का परमात्मा री दया पर सौंपी दित्तेया ते तित्ते का चली गया। 41.ते कलीसीया जो मजबूत करदा, सूरिया ते किलिकिया का हुन्दे होये निकळी गया।

### पौलुस रा तिमथियुस जो कन्ने लैणा

16.फिरी से दिरबे ते लुस्त्रा बिच बी गया, ते दिख्खो, तित्ते तीमथियुस नां रा इक चेल्लां थियेया, जे कुसकी विसवान यहूदिनी रा निक्का थियेया, अपण तिसेरा पुत्र युनाना थियेया। 2.से लुस्त्रा ते इकुनियुम रे भाइयां बिच तिसेरी बोलचाल खरी थी। 3.पौलुस ने चाया, कि एह मेरे कने चलन, ते जे यहूदी महु तिन्हा जगाह बिच थिये तिन्हेरी वजाह कने तिसेरा खतना कित्तेया, कोजोकि से जाणदे थिये, कि तिसेरा प्यो यूनानी थियेया। 4.ते सैहरा सैहरा रा सफर करदे तिन्हा ने तित्ते रे महुआं जो तिन्हा नियमां जो दस्सेया जिन्हा जो यरुशलेम रे खास चेल्लेयां ने ते बुजुर्गां ने पक्का कित्तेया थियेया। 5.ते इह्ययां तित्ते री कलीसिया रा विसवास मजबूत हुन्दा गया ते दिन-व-दिन तिन्हेरी गिनती बढ़ना लगी।

### त्रोआस बिच पौलुस रा दर्शन

6.से फ्रुगिया ते गलातिया का होईकरी निकळे किजोकि पवित्र आत्मा ने तिन्हा जो एशिया बिच वचन सुणाणे जो मन्हा करी दित्तेया थियेया। 7.फिरी से जां मूसिया री सीमा पर पूजे ता तिन्हा ने बितुनिया जाणे री कोसिस किती। अपण यीशु जी री आत्मा ने तिन्हा जो तित्ते जाणे नी दित्तेया। 8.ता से मूसिया का हुन्दे त्रोआस पूजे। 9.रात्ती रे बेल्ले पौलुस ने दर्शन बिच दिख्खेया कि मकिदुनिया रा इक महु तिस कने प्राथना करदे बोल्या करदा थियेया, मकिदुनिया बिच आ ते असा री मदद कर। 10.इस दर्शन जो दिख्खणे का बाद झट ई से फैसला लिन्दे कि परमात्मा रे तिन्हा महुआं बिच खुसखबरी रा प्रचार करणे ताई असा जो सहेया, असा ने मकिदुनिया जाणे री ठाणी लेई। 11.ता असा ने त्रोआस का पाणी रस्ते जाणे तांकी अपणी किस्तियां खोली दित्ती ते सीधे समोश्रोके जाई पूजे। फिरी अगले रोजे नियापुलिस चली गे। 12.तित्ते का असा फिलिप्पी पूजे जे मकिदुनिया जिह्ले रा इक मुख्य सैहर थियेया। इस सैहर बिच असा किच्छ रोज गुजारे। 13.फिरी सब्त रे रोज एह सोचदे कि प्राथना करणे ताई तित्ते कोई जगाह हुन्नी असा सैहर रे फाटक रे बाहर द्रया जो गे। असा तित्ते बेई गे ते इकट्ठी होये री जनानियां कने गल्ल-बात करणा लगे। 14.तित्ते ई लीदिया नां री इक जनानी थी। से बैंगणी रंग रे बेचदी थी। से परमात्मा री भक्तणी थी से बडे ध्यान कने असा री गल्लां सुणेया करदी प्रभु ने तिसेरे मन रे दुआर खोली दित्ते थिये ताकि, जे किच्छ पौलुस बोल्या करदा थियेया, से तिन्हा गल्लां पर ध्यान देई सकन। 15.अपणे सारे टब्बर समेत बपतिस्मा लैणे का बाद तिस ने असा रे छन्दे कित्ते कि, "जे तुसा मिन्जो परमात्मा री सच्ची भक्तण मन्दे ता चलो मेरे घरे रुको।" ते से असा जो मनाईकरी अपणे घरे लेई गई।

### पौलुस ते सिलास जेल बिच

16.फिरी इह्ययां होया कि जा असा प्राथना री जगाह जो जाया करदे थिये, ता असा जो इक भक्तणी मिली जिस बिच इक शुकुन दस्सणे वाली

आत्मा थी। से महुआं रा भाग्य दस्सी करी अपणे मालका जो बड़ा पैसा कमाई करी दिन्दी थी। 17 .से पौलुस ते असा रे पिच्छे-पिच्छे आईकरी लैहा मारणा लगी कि एह महु परम प्रधान परमात्मा रे सेवक हिन, जे असा रे उद्धार रे रस्ते ताई बसेख सुणादे हिन। 18 .से बड़े रोजां ताई इह्य्यां ई करदी रेई अपण पौलुस परेसान होई गया, ते अपणा मूंह फेरी करी तिस बुरी आत्मा जो बोल्या जे तिस जनानी अन्दर थी, मैं तिजो यीशु मसीह रे नां कने हुकुम दिंदा, कि इस बिच का निकळी जा ते तिस्सी बेले निकळी गई। 19 .जां तिसरे मालका ने दिख्खेया, कि असा री कमाई री आस पर ता पाणी फिरी गया, ता पौलुस ते सीलास जो पकड़ी करी बजारां रे बीच अधिकारीयां का धरीडी लेई गे। 20 .ते तिन्हा जो सजा दैणे वाळ्यां का लेई जाईकरी बोलणा लगे, "एह महु यहुदी हिन ते असा रे सैहरा बिच बड़ी कट्ठा पाये करदे हिन। 21 .एह इदेय रीति रवाजां री वकालत करेया करदे हिन जिन्हा जो अपनाणा या तिन्हा जो मनणा असा रोमियां ताई ठीक नी है। 22 .तां लोकां री भीड़ तिन्हेरे खलाफ बिच इकट्ठे होई करी तिन्हा पर चढ़ी आये, ते सजा दैणे वाळ्यां ने तिन्हेरे कपड़े फाडी करी खोली दित्ते, ते तिन्हा जो बेत मारणे रा हुकुम दित्तेया। 23 .ते बड़े बेत लगाईकरी तिन्हा जो जेल्ला बिच पाई दित्तेया, ते जेल रे अधिकारी जो हुकुम दित्तेया कि इन्हा जो कड़ी निगरानी बिच रखन। 24 .ते तिन्हा ने हुकुम रे मुताबिक तिन्हा जो जेल री अन्दरिली कोठरी बिच पाई दित्तेया। ते तिन्हेरे पैरा बिच काठ कस्सी दित्ते।

### पौलुस ते सिलास री जेल का अजादी

25 .अद्धी रात्ती रे करीब पौलुस ते सीलास परमात्मा रे भजन गान्दे प्राथना करेया करदे थिये, ते दुजे कैदी तिन्हा जो सुणेया करदे थिये। 26 .कि इतणे बिच इक हिलण गया ते तिन्हे जेल री नीय्यां तक हिलाई सुटी, अते झट ई जेल रे सारे दुआर खुली गे, ते सब री बेडियां ढिल्ली होई गई। 27 .अते जेल रा अधिकारी जागी होया, ते जेल रे दुआर खुल्ले दिख्खी करी से समझेया कि कैदी नस्सी गे, ता तिन्हे तलवार कड़ी करी अपु जो मारणा चाया। 28 .अपण पौलुस ने जोरे सणे बोल्या, अपु जो कोई नुकसान मत दे, किजोकि असा सब ईत्ते हिन। 29 .ताँ तिस जेल रे अधिकारी ने मशाल मंगवाई ते अन्दर चली गया, ते कंमदा-कंमदा पौलुस ते सीलास रे पैरा पेई गया। 30 . ते तिन्हा जो बाहर लियाई करी बोलणा लगेया, ओ महान महुआं, उद्धार पाणे ताई मैं कै करां? 31 .तिन्हा ने बोल्या, प्रभु यीशु जी पर विसवास कर, ता तेरे घरे उद्धार आणा। 32 .ते तिन्हा ने तिस जो, ते तिसरे सारे घरेतां जो प्रभु रा वचन सुणाया। 33 .फिरी जेल रा से अधिकारी तिस्सी रात ते तिस्सी बेले तिन्हा जो तित्ते का लेई गया। तिस ने तिन्हेरे जखम धोये, ते तिस ने अपणे घरेतां समेत बपतिस्मा लित्तेया। 34 .फिरी से पौलुस ते सीलास जो अपणे घरे लेई गया ते तिन्हा जो रोटी खुआई ते सारे घरेतां जो परमात्मा पर भरोसा करणे री खुसी होई। 35 .जां भ्याग होई तां सजा दैणे वाळ्यां ने अपणे सपाहईयां जो तित्ते भेजेया तिन्हा जो छड़ी दित्तेया जान। 36 फिरी जेल रे अधिकारी ने एह गलां पौलुस जो दस्सी कि सजा दैणे वाळ्यां ने तुसा जो छड़ी दैणे ताई भेजेया है। इधरे ताई अवे तुसा बाहर आई जाओ ते मजे कने चली जाओ। 37 .अपण पौलुस ने तिन्हा सपाहईया जो बोल्या, तिन्हा ने असा जो जे रोमी महु हिन , कसुरवार ठहराये बगेर, महुआं रे सामणे मारेया, ते जेल्ला बिच पाई दित्तेया, ता कै अवे चुप चाणे असा जो भेजणा चान्दे हिन, अपण इह्य्या नी होणा, हुणा ता इह्य्यां चहिंदा की से अपु आईकरी असा जो बाहर कडण। 38 .सपाहईयां ने एह गला सजा दैणे वाळ्यां जो बोली दित्ती, ते से सुणी करी कि से रोमी महु हिन, डरी गे। 39 .ते आईकरी से तिन्हा का माफी मंगणा लगे, ते बाहर लेई जाईकरी छन्दे कित्ते कि से चली जान। 40 .पौलुस ते सीलास जेल रे बाहर निकळी करी लीदिया रे घरे पूजे। ते भाइयां कने मिल्ले ते तिन्हा ने तिन्हेरा हौंसला बद्धाया ते तित्ते का चली गे।

### थिस्तुलनिके शहर बिच

17 .फिरी से अम्फिपुलिस ते अपुल्लोनिया होईकरी थिस्तुलनिके बिच आये, जित्ते यहुदियां री इक धर्म सभा थी। 2 ते पौलुस अपणे तरिके कने तिन्हा का गया, ते त्रै सब्द रे रोज पवित्र सास्त्र का तिन्हा कने बेहस

कित्ती। 3 ते तिन्हेरा मतलब खोली करी समझान्दा थिय्या, कि मसीह रा दुख उठाणा, ते मरे रे बिच का जिंदा होई जाणा जरूरी था, ते ऐई यीशु जी जिसेरी मैं तुसा जो कहाणी सुणाया करदा, मसीह हिन। 4 .तिन्हा बिच किन्नेया ने, ते भक्त यूनानियां बिच का बड़े जणेया ने ते बड़ी सारी कुलीन जनानियां ने मन्त्री लेया, ते पोलुस ते सीलास कने मिल्ले गे। 5 अपण यहुदियां ने डाह बिच आईकरी बजार का केई गुन्डेया जो अपणे कने लेया, ते भीड़ लगाईकरी सैहर बिच हल्ला मचाणे लगे, ते यासोन रे घरे पर चढ़ाई करी के तिन्हा महुआं जो सामणे लियाणा चाया। 6 अपण तिन्हा जो से नी मिल्ले ता तिन्हा ने यासोन ते कितणे ई दूजे होर भाईयां जो सैहर बिच राज्यपाल रे सामणे लेई आये, कि एह महु जिन्हा ने सारी दुनिया बिच उथल-पुथल मचाई रख्खे री है, अवे ईत्ते आई गे। 7 .ते यासोन ने इन्हा जो बड़ी इज्जत कने अपणे घरे रख्खे रा है। ते एह सब कैसर रे हुकुमां रे खलाफ होईकरी कम्म करदे हिन ते बोल्दे हिन, इक राजा होर है जिसेरा नां यीशु है। 8 . जां लोकां री भीड़ ते सैहर रे अधिकारियां ने एह सुणेया ता से लैहिते। 9 ते तिन्हा ने यासोन ते बाकी महुआं जो मुचलका लेईकरी तिन्हा जो छड़ी दित्तेया।

### बिरीया शहर बिच

10 फिरी झट ई तिन्हा जो रातो रात भाइयां ने पौलुस ते सिलास जो बिरिया भेजी दित्तेया। तित्ते पूजी करी से यहुदी धर्म सभा बिच गे। 11 एह महु थिस्तुलनिके रे महुआं का जादा खरे थिये। इन्हा ने पूरा मन लगाई करी वचन सुणेया ते हर रोज सास्त्र जो उलटदे पलटदे एह जांचदे रेह कि पौलुस ने जे गलां दस्सी, कै से सच हिन। 12 ता तिन्हा बिच का बड़े जणे यहुदियां ने ते कुलीन यूनानी जनानी ते मडदा ने विसवास कित्तेया। 13 अपण जो थिस्तुलनिके रे यहुदी जाणी गे, कि पौलुस बिरीया बिच बी परमात्मा रा वचन सुणाया करदा है, ता तित्ते बी आई करी महुआं जो उकसाणे ते हल्ला मचाणा लगे। 14 ता भाइयां ने झट पौलुस जो भेजी दित्तेया, कि समुन्द्र रे कनारे चली जा, अपण सीलास ते तीमुथियुस तित्ते रेहई गया। 15 पौलुस जो पूजाणे वाळे तिस जो अथेने तक लेई गे, ते सीलास ते तीमुथियुस ताई एह हुकुम देईकरी कि से जल्दी का जल्दी मेरे का आई जान, तित्ते का चली पे।

### एथेन्स शहर बिच

16 जां पौलुस अथेने बिच तिन्हा जो भाळेया करदा थिय्या, ता सैहर जो मूर्तियां कने भरितेरा दिख्खी करी तिसेरा कळेजा फूकी गया। 17 ता से धर्म सभा बिच यहुदियां ते भक्तां कने ते चौक बिच जे महु मिलदे थिये, तिन्हा कने हर रोज बेहस-बाजी करदा थिय्या। 18 तां इपिकुरी ते स्तोईकी पणतां बिच का किन्ने तिस कने तर्क करणे लगे, ते कितणेयां ने बोल्या, एह अंत-शंट बोलणे वाळा कै बोलणा चांदा? अपण होरनियां ने बोल्या, से दूजे देवता रा प्रचारक लगदा, किजोकि एह यीशु रा, ते मरी करी फिरी जिन्दे होई जाणे रा प्रचार करदा। 19 .ताँ से तिस जो अपणे कने अरियुपगुस जो लेई गे ते पूछेया, कै असा जाणी सकदे, कि एह नौई सिक्सा जे सुणान्दा, से कै है? 20 किजोकि तू अनोखी गलां असां जो सुणान्दा, इधरे ताई असा जानणा चांदे कि इसेरा मतलब कै है? 21 तित्ते रेह्या करदे एथेस रे सब महु ते परदेसी सिस्फ किच्छ नौआ सुनणे या तिन्हा गलां री चर्चा रे अलावा कोई बी जोर गल्ल बिच अपना बेला नी लगान्दे थिये।

### अरियुपगुस री सभा बिच पौलुस रा भाषण

22 तां पोलुस ने अरियुपगुस रे मझाटे खड़ी करी बोल्या, ओ अथेने रे महुआं मैं दिख्खदा, कि तुसा हर गल्ल पर देवता जो बड़े मनणे वाळे हिन। 23 किजोकि घूमदे-फिरदे तुसा री भक्ति वाळी चीजां जो दिख्खेया करदा थिय्या, ता इक वेदी दिख्खी जिस पर लिख्खेरा थिय्या, कि अनजाणे ईश्वर ताई। ता तुसा जिस जो बिना जाणे पूजदे हिन, अपण मैं तुसां जो तिसेरा बसेख सुणान्दा। 24 जिस परमात्म ने दुनियां ते तिस बिच सब चूजां जो बणाया, से सवर्ग ते दुनियां रा मालक होईकरी बी हत्था रे बणाये र देहे बिच नी रेहन्दा। 25 न कुसकी चीजां री जरूरत ताई महु रे हत्थां री सेवा लिंदे हिन, किजोकि से ता अपु ई सब जो जिन्दगी ते होर किच्छ बी दिन्दा।

26 तिन्हा ने इक ई किमत कने महुआं री सबनी जातियां सारी दुनियां पर रहे वाळ्यां ताई बनाई है, ते तिन्हा ने ई महुआं रा बेला पक्का करी दितेया है ते तिस जगाह री, जिन्ते से रेहन सीमाये बंदी दित्ती। 27 तिसेरी जरूरत एह थी कि महु परमात्मा जो तोपन। होई सकदा कि से तिन्हा का पूजई करी तिन्हा जो पाई लेंन। इत्तणा होणे पर बी असां का कुसकी का बी से दूर नी हिन: 28 किजोकि असा तिन्हा बिच ई जिन्दे हिन, ते हन्डदे-फरदे, ते मजबूत रेहन्दे हिन, जिहय्यां तुसां रे किन्ने सारे लेखकां ने ई बोले रा है, कि असा ता तिसेरे ई वंश बी हिन। 29 ता परमात्मा रा वंश होईकरी असा जो एह समझणा ठीक नी, कि से दिव्य असलियत सोने या चाँदी या पत्थर री बणे री महणु री सोच रा मिस्त्रियां रे बणी री कुसकी मूर्ति जदेयी है। 30 इधेरे ताई परमात्मा अज्ञान रे जुग बिच आनाकानी करी के, अवे हर जगाह सब महुआं जो अपणे पापां का तौबा करी लैणे रा हुकुम दिदे हिन। 31 किजोकि तिन्हा ने इक रोज पक्का कितेया है, तिन्हा महुआं रे जरिये धर्म कने जगत रा न्याय करणा, जिन्हा जो तिन्हा ने चुणे रा रा है तिन्हा जो मरे रेयां बिच का जिंदा करणा, एह गल्ल सबनियां पर प्रमाणित करी दित्ती गेरी है। 32 .मरे रेयां रे फिरी जिंदा होई जाणे री गल्ल सुणी करी कित्तेणे ई मजाक उड़ाणा लगे, ते कित्तेणेया ने बोल्या, एह गल्ल असा तुसा क फिरी कदी सुणगे। 33 . तां पौलुस तिन्हेरे बिच का निकळी गेया। 34 .अपण केई महु तिस कने मिली गे, ते विसवास कितेया, जिन्हा बिच का दियुनुसियुस अरियुपगी था, ते दमरिस नाँ री इक जनानी थी, ते तिन्हा कने होर बी मते सारे महु थिये। ● ●

### कुरुन्थुस शहर बिच

18 इसेरे बाद पौलुस अथेने जो छडी करी कुरिन्थुस बिच आय। 2 ते तित्ते अक्विला ना रे इक यहूदी कने मिलेया, जिसेरा जन्म पुन्तुस बिच होया थिय्या, ते अपणी लाडी प्रिस-किल्ला समेत इतालिया का नौआ आया थिय्या, किजोकि क्लैदिया ने सब यहूदियां जो रोम का निकळी जाणे रा हुकुम दितेया थिय्या, ता पौलुस तिन्हेरे उत्ते गेया। 3 ते पौलुस ते तिन्हेरा इक ई मकसद थिय्या, इधेरे ताई से तिन्हेरे ई रुकेया, ते से कम्म करणे लगे, ते तिन्हेरा मकसद तम्बू बनाणे रा थिय्या। 4 ते से हर इक सब्त वाळे रोज धर्म सभा बिच बैहस-बाजी करी के यहूदियां जो समझांदा थिय्या। 5 जां सीलास ते तीमुथियुस मकिदुनिया का आये, ता पौलुस वचन सुनाणे बिच मग्न होईकरी यहूदियां जो गवाई दिन्दा थिय्या कि यीशु ई मसीह है 6 अपण जां से खलाफ होईकरी बेजती करणा लगे, ता पौलुस ने अपणे कपडे फाडी करी तिन्हा जो बोल्या, तुसां रा खून तुसा री कियाडी पर रेह; मैं बेकसुर है, अवे मैं होर जाति रे महुआं का जाणा। 7 ते तित्ते का चली गेया ते तितुस युस्तुस नां रे परमात्मा रे भक्त रे घरे आया, जिसेरा घर धर्म सभा रे कने ई थिय्या। 8 तां धर्म सभा टरे सरदार क्रिस्पुस ने ते तिसेरे टब्बर ने प्रभु पर विसवास कितेया, ते बडे कुरिन्थियां ने बी सुणेया ते विसवास कितेया ते बपतिस्मा लितेया। ते प्रभु जी ने राती दर्शन रे जरिये पौलुस जो बोल्या, मत डर, अपण बोल्दा रेह, ते चुप मत हो। 9 राती प्रभु जी ने दर्शन रे जरिये पौलुस जो बोल्या, "मत डर। प्रचार करदा जा ते चुप मत हो; 10 किजोकि मैं तेरे कने है, ते कोई बी तिजो नुक्सान नी पुजाई सकदा, किजोकि इस सैहर मेरे बडे महु हिन। 11 ता से तित्ते परमात्मा रा वचन सुणादा रेह्या ते तित्ते डेढ साल रेह्या। 12 .जां गल्लियो अखाया देस रा राज्यपाल थिय्या ता यहूदी महु पौलुस रे खलाफ होई गे, ते तिस जो न्याय आसन रे सामणे लियाई करी, बोल्णा लगे। 13 .कि एह महुआं जो समझान्दा, कि परमात्मा री भक्ति इस तरिके कने करो, जे नियमां रे उलट हो। 14 .जां पौलुस बोल्णे पर ई थिय्या, ता गल्लियो ने यहूदियां जो बोल्या, ओ यहूदियों, जे एह किच्छ बे-न्यायी या बुराई री गल्लां हुन्दी ता ठीक था ते मैं तुसा री सुणदा। 15 .अपण जे एह बैहस-बाजी री गल्लां, ते नां-नुम, ते तुसां रे ईत्ते रे नियमां रे बारे बिच हिन, ता तुसा ई जाणो, किजोकि मैं इन्हा गल्लां रा फैसला करणे वाळा नी बनणा चांदा। 16 .ते तिस ने तिन्हा जो न्याय आसन रे सामणे का कडी दितेया। 17 तां सब ,महुआं ने धर्म सभा रे सरदार सोरिथनेस जो पकडी करी न्याय आसन रे सामणे मारेया, अपण गल्लियो ने इन्हा सब गल्लां री फिकर नी कित्ती।

### अन्ताकिया जो वापस हटणा

18 .ता पौलुस बडे रोजां ताई तित्ते ई रेह्या, फिरी भाईयां का विदा लेईकरी से किस्ती पर बेई करी सीरिया जो चली गेया। तिसेरे कने प्रिसकिल्ला कने अक्विला बी थिये। पौलुस ने किखिया बिच अपणे बाळ मुण्डवाये किजोकि तिस ने इक मन्नत मन्त्री थी। 19 फिरी से इफिसुस पूजे और पौलुस ने प्रिसकिल्ला ते अक्विला जो तित्ते ई छडी दितेया। ते अपु धर्म सभा बिच जाई करी यहूदियां कने बैहस करणे लगेया। 20 जां तित्ते रे महुआं ने तिस जो किच्छ रोज होर रेहे ताई जो बोल्या ता तिस ने मन्हा करी दितेया। 21 अपण जां दे बेले तिस ने बोल्या, "जे परमात्मा री मर्जी हुन्गी ता मैं तुसा का फिरी आंगा।" फिर तिस ने इफिसुस कने किस्ती बिच सफर कितेया। 22 फिरी कैसरिया पूजी करी से यरुशलेम जो गेया ते कलीसिया रे महुआं कने मिलेया। फिरी से आन्ताकिया जो चली गेया।

### पौलुस री तिजि प्रचार यात्रा

23 .तित्ते किच्छ हाण रुकेया ते तिसेरे बाद तित्ते का चली ते गलातिया ते फ्रुगिया रे इलाक्यां बिच इक जगाह का दूजी जगाह पर सफर करदे सबनी चेल्ल्यां जो विसवास बिच बढ़ाणे लगेया।

### ईफिसुस शहर बिच अपुलोस

24 .तित्ते ई अपुलोस नां रा इक यहूदी महु थिय्या। से सिक्ंदरिया रा रेहे वाळा थिय्या। से विद्वान महु थिय्या। से इफिसुस बिच आया। पवित्र सास्त्रां रा तिस जो पूरा ज्ञान थिय्या। 25 .तिस जो प्रभु रे रस्ते री सिक्सा मिली थी। से मन अन्दर खुसी करी प्रचार करदा ते यीशु जी रे बारे बिच बडी सहई-सहई सिक्सा दिदा थिय्या। अपण तिस जो सिरफ यहून्ना रे बपतिस्मा रे बारे अन्दर ई ज्ञान थिय्या। 26 .से धर्म सभा बिच निडर होईकरी बोल्णा लगेया, अपण प्रिसकिल्ला ते अक्विला ने तिसेरी गल्ला सुणी करी, तिस जो अपणे ईत्ते लेई आये ते परमात्मा रा रस्ता तिस जो होर बी सहई-सहई बताया। 27 .ते जां तिस ने पक्का करी लितेय कि पार उतरी करी से अखाया जो जान ता भाईयां ने तिस जो हिम्मत देईकरी भेजेया ते तित्ते रे चेल्लेयां जो इसेरा स्वागत करणे ताई लिख्खी भेजेया, ते तिस ने पूजी करी तित्ते तिन्हा महुआं री बडी मदद कित्ती जिन्हा ने परमात्मा री दया री वजाह कने भरोसा कितेया थिय्या। 28 .किजोकि से पवित्र सास्त्र का प्रमाण देईकरी, कि यीशु जी ई मसीह हिन, तिन्हा ने यहूदियां जो लोकां रे मझाटे जोरदार गल्लां बोल्दे सास्त्र बिच पछाड़या थिय्या।

### ईफिसुस शहर बिच पौलुस

19 .ते जां अपुलोस कुरिन्थुस बिच थिय्या, ता पौलुस बारलै सारे देसा बिच सफर करदा इफिसुस बिच आई पूजेया। तित्ते तिस जो किच्छ चेल्ले मिले। 2 .तिन्ने तिन्हा जो बोल्या, कै तुसा जो जां तुसा विसवास कितेया थिय्या तिस बेले पवित्र आत्मा मिलेया थिय्या? तिन्हा ने जवाब दितेया, असा ने ता सुणेया तक नी कि कोई पवित्र आत्मा है बी। 3 .पौलुस ने तिन्हा जो बोल्या, ता फिरी तुसा कुसेरा बपतिस्मा लितेया? तिन्हा बोल्या, यहून्ना रा बपतिस्मा। 4 .पौलुस ने बोल्या यहून्ना ने एह बोली करी, पापां का तौबा करणे रा बपतिस्मा दितेया, कि जे मेरे का बाद आणे वाळा है, तिस पर मतलब यीशु जी पर भरोसा करेयो। 5 .यह सुणी करी तिन्हा ने प्रभु यीशु रे नां रा बपतिस्मा लितेया। 6 ते जां पौलुस ने तिन्हा पर हल्थ रख्खे, ता तिन्हा पर पवित्र आत्मा आया, ते से अलग अलग भाषा बोल्णे लगे ते भविष्यवाणी करणे लगे। 7 एह सब कोई बारह महु थिये। 8 ते से धर्म सभा बिच जाईकरी त्रे मिहे ताई बेखोफ होई करी बोलदा रेह्या, ते परमात्मा रे राज्य रे बारे बिच बैहस करदा ते समझान्दा रेह्या। 9 .अपण जां कितणेया ने सख्त होईकरी तिसेरी नी मन्त्री ते विसवास करणे जो मन्हा करी दितेया, ते महुआं रे सामणे इस रस्ते जो बुरा भला बोलणा लगे, ते तिस ने तिन्हा जो छडेया ते चेल्लेयां जो लेई करी चली गेया, ते हर रोज तुरन्नुस री पाठसाला बिच बैहस करदा थिय्या। 10 दि साल ताई इहय्यां ई हुन्दा रेह्या, ईत्ते तक कि आसिया रे रेहे

वाले के यहूदी, के यूनानी सब ने प्रभु रा वचन सुणोया। 11 ते परमात्मा पौलुस रे हत्थां का सक्ति रे अनोखे कम्म करान्दे रेह। 12 ईत्ते तक की तिन्हेरे छुतेरे रूमाल ते अँगोछेयां जो बमारा का लिन्दे थिये ते तिन्हेरी बमारियां हटी जान्दी थी अते बुरी आत्मां तिन्हा का निकळी जान्दी थी। 13 अपण किन्ने ई यहूदी जे झाड़-फक करदे फिरदे थिये, एह करणे लगे, कि जिन्हा बिच बुरी आत्मा हो तिन्हा जो प्रभु यीशु रे नां कने एह बोली करी निकाळो कि जिस यीशु रा प्रचार पौलुस करदा में तुसा जो तिसेरी ई कसम दिंदा। 14 ते सिक्का ना रे इक सबका बड्डे यहूदी परोहत्त रे सत्त पुत्र थिये, जे इहय्यां ई करदे थिये। 15 अपण बुरी आत्मा एह जवाब दिदी थी, कि यीशु जो असा जाणदे हिन, ते पौलुस जो बी पछाणदे, अपण तुसा कुण हिन? 16 ते तिस महु ने जिस बिच बुरी आत्मा थी, तिन्हा पर लपटी पेई, ते तिन्हा जो अपणे वस बिच लियाई करी, तिन्हा कने इदेयी जोर-जबरदस्ती किन्ती, कि से नंगे ते जरखी होईकरी तिस का घरे का नस्सी गे। 17 ते एह गल्ल इफिसुस रे रेहे वाळे यहूदी ते यूनानी बी जाणी गे, ते सब जणे बडे डरी गे, ते प्रभु यीशु रे नां री बडाई होर जादा होणा लगी। 18 ते जिन्हा ने विसवास किन्तेया थिय्या, तिन्हा बिच का बडे जणेया मे आई करी अपणे अपणे पापां जो मन्त्री लेया ते तिन्हा कम्मा जो सामणे लियाया। 19 ते जादू-टोणा करणे वाळेयां बिच का बडे जणेया ने अपणी अपणी कताबां इकट्टी करी के सबणी रे सामणे फूकी दित्ती, ते जा तिन्हेरी कीमत जोड़ी, ता पंजाह हजार निकळी। 20 ते प्रभु रा वचन जोरो-शोरो कने दूर दूर तक फैलदा गया। 21 जां एह गल्लां होई गेई, ता पौलुस ने अपणे मन बिच मकिदुनिया ते अखिया हुन्दे यरुशलम जाणे री सोच्ची लेई। ते बोल्या, कि मिंजो तित्ते जाणे का बाद मिंजो रोम जो बी दिखणा जरूरी है। 22 ते तिसने तिसेरी सेवा करणे वाळेयां बिच का तिमथियुस ते इरासतुस जो मकिदुनिया भेज्जी करी किच्छ रोज आसिया बिच रेहा।

### इफिसुस बिच लड़ी झगड़ा

23 तिन्हा रोजां कताबां जो लेई करी बड़ी जोर जबरदस्ती होई। 24 किजोकी देमेत्रियुस नां रे एह सुनियारा अरतिमिस रे चाँदी रे मन्दर बणाईकरी मिस्त्रीयां जो बडा कम्म दुआन्दा थिय्या। 25 तिस ने तिन्हा जो, ते तिस कम्म कने जुडे रे होर बी दूजे मिस्त्रीयां जो इकठ्ठा करी के बोल्या, ओ महुआं, तुसा जाणदे हिन, कि इस कम्म ताई असा जो किन्ने पैसे मिलदे हिन। 26 अते तुसा दिखदे सुणदे हिन, कि सिरफ इफियुस बिच ई नी, बल्कि सारेबासिया बिच एह बोली करी की इस पौलुस ने बडे महुआं जो बहलाया फुसलाया, कि महुआं रे हत्थां कने बणाये रे देवते सच्चे देवते नी हिन। 27 ते अवे सिरफ इक ई गल्ल रा डर नी, कि असा रा धन्दा बदनाम होया करदा है, बल्कि एह कि महान देवी अरतिमिस रे देहे जो बी घटिया समझेया जाणा जिस को की सारा आसिया ते दुनिया पूजदी तिसेरा गौरव बी जान्दा रेह्ला। 28 से एह सुणी करी लैहते, ते जोरे जोरे बोलणा लगे, "इफिसियो री अरतिमिस महान है।" 29 ते सारे सैहर बिच बड़ी कहळा पेई गेई ते महुआं ने गयुस ते अरिस्तरखुस मकिदुनियां जो जेहडे कि पौलुस रे कने सफर करेया करेया थिये पकड़ी लेया ते तिन्हा जो रंगशाला बिच लेई गे। 30 जां पौलुस ने महुआं रे सामणे जाणा चान्दा थिय्या अपण चेलेयां ने तिस जो जाणे नी दित्तेया। 31 आसिया रे अधिकारियां ने जे तिसेरे मित्र थिये, तिन्हा जो एह बोली भेजेया, कि रंगशाला बिच जाईकरी कोई जोखिम मत उठान्दा। 32 अवे कोई किच्छ होर बोल्या करदा थिय्या, ते कोई किच्छ होर, किजोकि सारी सभा बिच कहळा पेई गेरी थी। तिन्हा बिच का जादातर अधिकारी एह नी जाणदे थिये कि से ईत्ते इकठ्ठा किजो होये रे हिन। 33 ता तिन्हा ने सिक्न्दर जो, जिसेरा नाण यहूदियां जो सूजेया थिय्या, तिस जो अगे खडा किन्तेया, सिक्न्दर न अपणे हत्थां कने इसारा करी के महुआं रे सामणे बचाव पक्ष प्रस्तुत करणा चाया। 34 अपण जां तिन्हा जो पता चलेया कि से इक यहूदी है ता से सब कोई दो घण्टे ताई इक ईस सुर बिच लेरां मारदे एह बोलदे रेह, "इफिसुसियां री देवी अरतिमिस महान है।" 35 तां सैहर रे मन्त्री महुआं जो सान्त करी के बोल्या, ओ इफिसियो, कुण नी जाणदा, कि इफिसियां रे सैहर री महान देवी अरतिमिस रे मन्दर, ते ज्यूस रे पास्से का छुडके री मूर्ति रा टहलुआ है। 36 किजोकि इन्हा गल्लां का कोई मुकरी नी

सकदा। इधरे ताई तुसां जो सान्त रेह्ला चहिंदा ते बिना सोचे समझे किच्छ नी बोल्या चहिंदा। 37 किजोकि तुसा इन्हा महुआं जो लियाये, जे ना मन्दर जो लूटणे वाले हिन, ते ना असा री देवी जो बेईज्जत करदे। 38 जे देमेत्रियुस ते तिसेरे साथी मिस्त्रीयां जो कुसकी कने कोई सिकाईत है त कचेरी खुली है ते तित्ते अधिकारी हिन। तित्ते अपु मिते अभियोग चलाई सकदे। 39 अपण जे तुसा इसका होर जादा जानणा चान्दे हिन ता तिसेरा फैसला नियत सभा बिच किन्तेया जाणा। 40 जे किच्छ तिसेरे साहब कने असा जो इस गल्ल रा डर है कि अज्ज रे जोर जबदस्ती रा इल्जाम असा पर नी थोपी दित्तेया। इस दंगे ताई असा का कोई बी इदेया किच्छ नी है जिस कने असा इस जो ठीक ठहराई सकन। 41 ते एह बोली करी तिसेरे सभा जो भेज्जी दित्तेया। ● ●

### मकिदुनिया, युनान ते त्रोआस बिच पौलुस

20 जां कहळा मुक्की गेइ तां पौलुस ने चेलेयां जो सहवाई करी तिन्हा जो समजाया ते तिन्हा का विदा लेई करी से मकिदुनिया जो चली पेया। 2 तिस पुरे प्रदेसबिच का होई करी ते चेलेयां री हिम्मत बधाई करी से युनान बिच आई गया। 3 जां त्रै महिन्ने रेहई करी से तित्ते का जहाज का सीरिया जाणे वाळा थिया, तां यहूदी तिस जो मारणे जो भाळेया करदे थिये, इधरे ताई तिनिए सोचेया कि मैं मकिदुनिया का होई करी हटि जाए। 4 बिरिया रे रेहे वाळे पुरूस रा पुत्तर सोपत्रुस ते थिस्सलुनीकियां बिच का अरिस्तरखुस ते सिक्न्दुस ते दिरबे रा गयुस ते तीमुथियुस ते आसिया रा तुखिकुस ते युफिमुस आसिया ताई तिसेरे कने आये। 5 से आगे जाई करी त्रोआस बिच असां जो भाळदे रेय। 6 ते असी अखमीरी रोटी रे दिनां का बाद फिलिप्पी का जहाज पर चढ़ी करी पाँज रोजां बिच त्रोआस बिच तिसका पुजे, अते सात्त रोजां ताई तित्ते ई रेय।

### त्रोआस बिच यूतुखुस रा जिन्दा किन्तेया जाणा

7 हपते रे पैले रोजे, जां असी रोटी तोड़णे ताई कठिये, तां पौलुस ने, जे दुए रोजे चली जाणा वाळा थिया, तिन्हा कने गल्लां किन्तियां; अते अधि रात्ती ताई गल्लां करदा रेह्ला। 8 जिस अटारी पर असी कठित्ते रे थिये, तिस बिच मते सारे दीर्ये बळेया करदे थिये। 9 ते यूतुखुस नां रा इक जवान मुन्डा खिडकी पर बैठे रा गैहरी निदंर बिच झुकैया करदा थिया। जां पौलुस बड़ी हाण ताई गल्लां करदा रेह्ला, ता से निदंर री वजह कने तिसेरी आक्ख लागि गेइ ते से तिज्जी अटारी का पेई गया, ते जां तिस जो चुकैया ता से मरी गेरा थिया। 10 अपण पौलुस उतरी करी तिस कने लिपटी गया, ते तिस जो गळे लाई करी बोलेया, "फिकर मत करो; किजोकी इसेरी जान इस अन्दर ई है।" 11 फिरी उप्पर जाई करी रोटी जो तोड़ेया ते खाई करी इतणी देर ताई तिन्हा कने गल्लां करदा रेह्ला कि भ्याग होई गेई। फिरी से चली गया। 12 ते से तिस जवान जो जिन्दा लेई आए ते तिन्हा जो बडा चैन मिलेया।

### त्रोआस का मिलतुस रा सफर

13 असी पैले ई जहाज पर चढ़ी करी अस्सुस पास्से का एह सोच्ची करी आगे चली गे कि तित्ते का असी पौलुस जो चढ़ाई लिंगे, किजोकी तिनिए ए इधरे ताई ठैहाया थिया कि से अप्पु ई पैदल जाणे वाळा थिया। 14 जां से अस्सुस बिच असां जो मिलेया तां असी तिस जो चढ़ाई करी मितुलेने जो आई। 15 तित्ते का जहाज खोली करी असी दुए रोजे खियुस रे सामणे पुजे, ते अगले रोजे सामुस बिच जाई लगे; फिरी दुए रोजे मिलेतुस बिच आइ रेया। 16 किजोकि पौलुस ने इफिसुस रे नेडे का होई करी जाणे रा मन बणाए रा थिया कि इयां ना हो कि तिस जो आसिया बिच देर लगे; किजोकी तिस जो बड़ी तोळ लगेरी थी कि जे होई सको ता से पिन्तेकुस्त रे रोजे यरुशलम बिच रेय।

### इफिसुस रे प्राचीन लोकां जो उपदेश

17 तिनिए मिलेतुस का इफिसुस बिच बोलि भेजेया, अते धरम सभा रे बुजुरगां जो सदाया। 18 जिस बेले से तिसेरे नेडे आए ता से तिन्हा जो बोलणा लगेया, "तुसां जो पता है कि पैले दिन का ई, जां मैं आसिया बिच पुजेया, मैं

हर बेले तुसां कन्ने कियां रेया- 19 मतलब कि बड़े निम्नते होइ करी, ते अथरू कड़्डी कड़्डी करी, ते तिन्हा परिक्षां बिच का जे यहूदियां री चलाकि री वजह कने मेरे पर आई पेइ, मैं प्रभू जी री सेवा करदा ई रेया; 20 ते जे-जे गल्लां तुसां रे फेदे री थी, तिन्हा जो दसणे ते महुआं रे सामणे ते घरे-घरे जाई करी सखाणे का कदी बी नी झिजकेया, 21 अपण यहूदियां ते यूनानियां रे सामणे गुआई दिन्दा रेया कि परमेश्वर रे पास्से मन फेरणा अते असां रे प्रभू यीशु मसीह जी पर भरोसा करणा चाएदा। 22 अवे दिख्खो, मैं आत्मा बिच बन्निचे रा यरुशलम जो जाया करदा है ते मिन्जो कोई पता नी है कि तित्ते मेरे कने कै कै होणा; 23 सिरफ ए ई कि पवित्र आत्मा हर इक सैहर बिच गुआइ देई-देई करी मेरे जो बोलदा कि बंधन ते कहळा तेरे ताई त्यार हिन। 24 अपण मैं अपणी जान जो किछ बी नी समझदा कि तिस जो प्यारा समजां, अपण ता ए कि, मैं अपणी दौड़ जो ते तिस सेवा जो पूरा करां, जे मैं परमेश्वर रे अनुग्रह री खुसखबरी पर गुआई दैणे ताई प्रभू यीशु जी का पाए री है। 25 अवे दिख्खो, मेरे जो पता है कि तुसी सब जणे, जिन्हा बिच मैं परमात्मा रे राज रा प्रचार करदा फिरेया, तुसां मेरा मुंह फिरी नी दिख्खणा। 26 इधेरे ताई मैं आज रे दिन तुसां जो गुआई देई करी बोलदा, कि मैं सारेयां रे खून रे इल्जाम का बचे रा है। 27 किजोकी मैं परमेश्वर रे सारे मतलब जो पूरी तरिके कने तुसां जो दसणे बिच ना झिजकेया। 28 इधेरे ताई अपणी ते अपणे सारे झुण्ड री चुकन्ने रेहई करी देख-रेख करो जिस बिच पवित्र-आत्मा ने तुसां जो मुखिया बणाए रा है कि तुसी परमेश्वर री कलिसिया री रखवाली करो जिस जो तिस ने अपणे खून कने खरिदी लित्ते रा है 29 मिन्जो पता है कि मेरे जाणे का बाद फाडी रखणे वाले भेड़िए तुसां रे बिच आई रैह्के जिन्हा ने झुण्ड जो छडणा नी है। 30 तुसां रे बिच का बी इदेय-इदेय महु निकळणे, जिन्हा ने चेल्लेयां जो अपणे पिच्छे छिक्की लैणे ताई टेडि-मेडि गल्लां बोलणी। 31 इधेरे ताई जागदे रेयो, ते चेत्ता करो मैं त्रे सालां ताई रात-दिन रोई रोई करी हर इक महु जो चेतावनी दैणा नी छडडेया। 32 ते अवे मैं तुसां जो परमेश्वर, ते तिन्हेरे अनुग्रह रे वचन जो सौंपी दिन्दा; जे तुसां री तरक्की करी सकदा ते सारे पवित्र कित्ते रे महुआं बिच साइझी करी के विरासत बिच देई सकदा। 33 मैं कुस्की रे चान्दी, सौन्ने या कपडे रा लाळच नी कित्तेया। 34 तुसां जो अप्पु ई पता है कि इन्हा ई हत्थां ने मेरी ते मेरे साथियां री जरूरतां पूरी किति। 35 मैं तुसां जो सब किछ करी के दस्सेया कि इस तरिके कने मैहत करी के कमजोर महुआं जो सम्भाळना ते प्रभू यीशु जी रे वचनां जो याद रखणा जरूरी है, जे तिन्हा ने अप्पु ई बोले रा है, 'लैणे का दैणा धन्न है।' 36 एह बोली करी तिनिये गोड्डे रे भारे बेई करी ते तिन्हा सबनी कने प्रार्थना कित्ती। 37 तां से सब बड़ा रोये ते पौलुस रे गळे कने लिपटि करी तिस जो चूमणा लगे। 38 से खास कर इस गल्ल कने दुखी थिये जे तिनिए बोली थी कि, 'तुसां मेरा मुंह फिरी नी दिखणा।' तां तिन्हा ने तिस जो जहाज तिकर पुजाया।

### पौलुस रा यरुशलम जो जाणा

21 . जिस बेले असां ने तिन्हा का बखरे होई करी झाज खोल्लेया, ता सिधे रस्ते का कोस अन्दर आये, ते दुए रोजे रुदुस अन्दर अते तित्ते का पतरा अन्दर 2 तित्ते इक झाज फीनीके जो जान्दा होया मिल्लेया, ते असां तिस पर चढ़ी करी तिस जो खोली दित्तेया। 3 जिस बेले साईप्रस लिब्बेया, ता असां ने तिस जो खब्बे हथ्थ छड्डी दित्तेया, ते सीरिया जो चली करी सूर अन्दर उतरी गे; किजो कि उते झाज रा समान उतारणा थिया। 4 चेल्लेयां रे मिली जाणे का बाद असी तित्ते सत्त रोजां ताई रेह। तिन्हा ने आत्मा रे सखाएरे पौलुस जो बोलेया कि यरुशलम अन्दर पैर मत रखदे। 5 . जां से दिन पूरे होई गे, तां असी तित्ते का चली पे; ते सबनां ने जानानियां अते निके-निकेयां समेत असां जो सैहर का बाह ताई पुजाया; ते असां ने कनारे पर जाहन्नु रे भारे बेहई करी प्राथना कित्ती। 6 . तां इक-दुजे का बखरे होई करी असी ता झाज पर चढ़ी गे अते से अपणे-अपणे घरे हटि गे। 7 तां असी सूर का पाणी रा सफर पूरा करी के पतुलिमथिस अन्दर पुजे, ते भ्याळां जो नमस्ते करी के तिन्हेरे कन्ने इक दिन रुके। 8 दुए रोजे असी तित्ते चली करी कैसरिया अन्दर आये, ते फिलिप्पुस खुसखबरी सुनाणे वाले रे घरे जेहडा सत्त बिच का इक थिया; जाई करी तिसका रेह। 9 . तिसेरी चार कुवारी

कुड़ियां थी, जेहडी भविष्यवाणी करदी थियां। 10 जां असां जो तित्ते रुकेरे मते रोज होई गे, ता अगबुस नां रा इक भविष्यवाणी करणे वाला यहूदिया का आया। 11 तिनिए म्हारे नेडे आई करी पौलुस रा पटका लित्तेया, ते अपणे हथ्थ पैर बन्नी करी बोलेया, "पवित्र आत्मा एह बोल्दा कि जिस महु रा एह पटका है, तिस जो यरुशलम अन्दर यहूदी महु इह्यां ई बन्ना , ते होरसी जाती रे हथ्थां सौंपी देणा।" 12 . जां असां एह गल्लां सुणी, ता असां ते तित्ते रे लोकां ने तिसेरे छन्दे कित्ते कि यरुशलम जो मत जान्दा। 13 . अपण पौलुस ने जवाब दित्तेया, "तुसी करदे कै हिन ; कि रोई-रोई करी मेरा दिल तोडेया करदे हिन ? मैं ता प्रभू यीशु जी ताई यरुशलम अन्दर ना सिरफ कैद होणे ताई अपण ता मरणे ताई बी त्यार है।" 14 जां से नी मन्नेया ता असी एह बोली करी चुप्प होई गे, "प्रभू जी री मरजी पूरी होइ जाओ।" 15 इन्हा रोजा का बाद असां त्यारी कित्ती ते यरुशलम जो चली गे। 16 कैसरिया का बी किछ छे चेल्ले असा कने चली पे, ते असां जो मनासोन नां रे साईप्रस रे इक पुराणे चेल्ले का लेई आये, कि असी तिस का रुकन।

### पौलुस रा याकुब कने मिलणा

17 जां असी यरुशलम अन्दर पुजे, ता भाई असा कने बड़ी खुसी कने मिले। 18 . दूए रोजे पौलुस असा जो लेई करी याकुब का गया, जित्ते सारे बुजुर्ग किट्टिहत्तेरे थिये। 19 तां तिनिए तिन्हा जो नमस्ते करी के, जे जे कम्म परमात्मा ने तिसेरी सेवा रे जरिये होरसी जाती अन्दर कित्तेरे थिये, इक-इक करी के सब दस्से। 20 तिन्हा ने एह सुणी करी परमात्मा री महिमा कित्ती, फिरी तिस जो बोलेया, "ओ मेरे भाई तू दिखदा ई है कि यहूदियां बिच का केई हजारों लोकां ने भरोसा कित्तेया; अते परमेश्वर नियमा जो लेई करी बड़े भारी खुस हिन। 21 . उन्हा जो तेरे बारे अन्दर सिखायेरा था कि तू होरसी जाती रे बिच रैह्के वाले यहूदियां जो मूसा का हटी जाणे रे बारे अन्दर सखाया करदा है, ते बोलेया करदा है कि, ना ता अपणे निके-निकेयां रा खतना कराओ ते नां ई रवाजां पर चलेया करो। 22 . ता फिरी कै कित्तेया जाए ? महुआं ने ए जरूर सुनणा कि तू आएरा है। 23 इधेरे ताई जे असी तिजो बोलेया करदे हिन , से कर। असा बिच का चार जह्के हिन जिन्हा ने मन्नत मन्ने री है। 24 . तिन्हा जो लेई करी तिन्हेरे कने अपु जो बी सुद्ध कर; ते तिन्हेरे सीर मुंडाणे ताई खरचा दे। तां सबनी जो पता लगणा कि जे गल्लां तिन्हा जो तेरे बारे अन्दर दस्सी गेइयां, तिन्हा अन्दर कोई सच्चाई नी है अपण, तू अप्पु बी व्यवस्था जो मन्नी करी तिसेरे साहबे चलदा। 25 . अपण, तिन्हा होरसी जाती रे बारे अन्दर, जिन्हा ने भरोसा कित्तेया, असां ने एह फैसला करी के लिख्खी करी भेजेरा है कि से मूरतियां रे सामणे बलि कित्तेरे मांस का, ते खून का, ते गळा घोड़ेरेयां रे मांस का, अते व्याभिचार का बची रैह्के। 26 तां पौलुस तिन्हा महुआं जो लेई करी, ते दूए रोजे तिन्हा कने सुद्ध होई करी देहे अन्दर गया, ते तित्ते दस्सी दित्तेया कि सुद्ध होणे रे रोजे, मतलब कि तिन्हा बिच का हर इक जह्के ताई चढतर चढाये जाणे तक रे रोज कधाडी पूरे होणे।

### मन्दर बिच पौलुस रा पकडेया जाणा

27 . जां से सत् रोज पूरे होणे वाले थिये, ता आसिया रे यहूदियां ने पौलुस जो देहे अन्दर दिख्खी करी सबनी महुआं जो भेकाया, ते इह्यां लेर मारी करी तिस जो पकडी लेया, 28 "ओ इस्राएलिओ, मदद करो; ऐ सेहई महु है, जे लोकां रे ते व्यवस्था रे अते इस जघा रे खलाफ हर जघा सबनी महुआं जो सखांदा, होर ता होर, यूनानी महुआं जो बी देहे अन्दर अणी करी तिनिए इस पवित्र जघा जो अपवित्र कित्तेया।" 29 उन्हा ने इस का पैले इफिसुस रे रैह्के वाले त्रुफिमस जो तिसेरे कन्ने सैह अन्दर दिख्खेया थिया, ते समझेया थिया कि पौलुस तिस जो देहे अन्दर लेई आया। 30 तां सारे सैह अन्दर हल्ला पेई गया, ते महु दौड़ी करी किट्टिह गे ते पौलुस जो पकडी करी देहे का बाह घसीटी अन्देया, अते झट्ट दरोजे बन्द करी दित्ते। 31 जां से तिस जो मारी रखणा चाहन्दे थिये, ता पलटन रे सरदार जो बसेख पुजेया कि सारे यरुशलम अन्दर रोळा पेई गेरा है। 32 . तां से झट-पट सपाहईयां ते सूबेदारां जो लेई करी तिन्हेरे का थल्ले दोड़ी आया; ते तिन्हा ने पलटन रे सरदार जो ते सपाहईयां जो दिख्खी करी पौलुस जो मारणा-कुटणा छड्डी दित्तेया।



33 तां पलटन रे सरदार ने नेड़े आई करी तिस जो पकड़ी लेया; ते दो संगळां कने बनणे रा हुक्म देई करी पुछणा लगेया, "ऐ कुण है ते इनि ए कै किन्तेरा है ?" 34 पर, भीड़ बिच का कोई किछ ते कोई किछ लेरां मारदा रेह्या। जां ऐसी हालत री वजह कने से सचाई जो खरा करी नी जाणी सकेया, ता तिस जो अड्डे अन्दर लेई जाणे रा हुक्म दित्तेया। 35 जां से पैडी पर पुजेया, ता इह्यां होया कि भीड़ री वजह कने सपाईयां जो तिस जो चुक्की करी लेई जाणा पेया। 36 किजो कि महुआं री भीड़ ए लेरां मारदी तिसरे पि छछे पेरी थी, "इसरा नास करी दीयो।" 37 जिस बेले से पौलुस जो अड्डे अन्दर लेई जाणे वाळे थिये, ता तिनिए पलटन रे सरदार जो बोलेया, "कै मिन्जै हुकुम है कि मैं तिजो किछछ बोली सकां ?" तिनिए बोलेया, "कै तिजो यूनानी भासा इन्दी ? 38 कै तू से मिस्री नी है, जेहड़ा इन्हा रोजां का पैले दुस्मण बनाई करी, चार झार कटारबन्द महुआं जो बणा अन्दर लेई गया ?" 39 पौलुस ने बोलेया, "मैं ता तरसुस रा यहूदी महु है ! किलिकिया रे मस्हूर सैह रा रैह्ने वाळा। मैं तेरे छन्दे करदा कि तू मिन्जो महुआं कने गलां करणा दे।" 40 जां तिनिए हुक्म दित्तेया, ता पौलुस ने पैडी पर खड़े होई करी महुआं जो हथ्य कने इसारा कित्तेया। जां से चुप्प होई गे ता से इब्रानी भासा अन्दर बोलणा लगा :

### भीड़ रे सामणे पौलुस रा भाषण

22 ओ भ्याळो, मेरा जवाब सुणो, जेहड़ा मैं तुसां रे सामणे बोलणा लगेया।" 2 से ऐ सुणी करी कि ऐ असां कने इब्रानी भासा अन्दर गल्ल करेया करदा है, होर बी चुप्प होई गे। तां तिनिए बोलेया : 3 " मैं ता यहूदी महु है, अते मेरा जन्म किलिकिया रे तरसुस अन्दर होया ; अपण इस सैह अन्दर गमलीएल रे पैरां रे नेड़े बटाई करी पढाया गेरा है, ते बबब-दाद्रेयां री व्यवस्था मिन्जो खरे तरीके कने सखाई गेरी है; मेरे अन्दर परमेश्वर तांई बड़ा जोश थिया जिंयां अज तुसां अन्दर है । 4 मैं इस झुंड रे महुआं जो इतणा तंग कित्तेया कि उन्हेरे प्राण तक लेई ले। मैं जनानी अत्ते मडदा दोनां जो बहनी करी जेला पाई दित्तेया। 5 इस गल्ल तांई बड़े प्रोथ ते सारे बजुर्ग गवाह हिन, कि तिन्हा का मैं भ्याळां रे नां री चिट्टियाँ लेई करी दमिशक जो जाया करदा थिया, कि जेहड़े तिन्हे होन तिन्हा जो बी सजा दुआणे तांई बहनी करी यरुशलेम अन्दर लेई आं।

### अपणा दिल रे बदलणे री गुआई

6. जां मैं चलदे-चलदे दमिशक रे नेड़े पुजेया, ता इह्यां होया कि कोई धियाडी बेले इक-दम्म इक बडुडी लो अम्बरा का मेरे चोन्नी पाससे लस्की। 7. अते मैं धरती पर पेई गया ते एह सब्द सुणीयां, 'ओ शाऊल, ओ शाऊल, तू मिन्जो किजो तंग करदा?' 8 मैं जवाब दित्तेया, 'हे प्रभू जी, तुसी कुण हिन् ?' तिन्हा ने मिन्जो बोलेया, 'मैं यीशु नासरी है, जिस जो तू तंग करदा।' 9 जे मेरे कने थिये तिन्हा ने बी से लौ ता दिख्खी, अपण उस अवाज जे मेरे कने गल्ल करेया करदी थी, से समझी नी सके 10. तां मैं बोलेया, 'ओ प्रभू जी, मैं कै करां ?' प्रभू जी ने मिन्जो बोलेया, 'उठी करी दमिशक अन्दर जा ते जे किछ तेरे करणे तांई ठैहाया गेरा है, तिन्हे तिजो दस्सी दित्तेया जाणा।' 11. जां तिस जोत री रोसनी री वजह कने मिन्जो किछ नी लिबेया, ता मैं अपणे मित्रां रे हथ्य पकड़ी करी दमिशक अन्दर आया। 12. तां हनन्याह नां री व्यवस्था रे हसाबे इक भगत महु, जेहड़ा तिन्हे रैह्ने वाळे यहूदियाँ बिच का नामी थिया, मेरे का आया, 13. ते खड़ीह करी मिन्जो बोलणा लगेया, 'ओ भाई शाऊल, अवे दिख् ।' तिस्सी बेले मेरी हाखिखां खुलि गेइ ते मैं तिस जो दिख्खेया। 14 फिरी तिनिए बोलेया, 'म्हारे बबब-दाद्रेयां रे परमात्मा ने तिजो इस तांई रख्खेरा है तकि तू तिन्हेरी मरजी जो जाणे, ते तिस धरमी जो दिख्खे ते तिन्हेरे मुंहूआ का गलां सुणे। 15 किजोकी तैं तिन्हेरे पाससे का सबनी महुआं सामणे तिन्हा गलां रा गवाह होणा जे तैं दिख्खी ते सुणेरी हिन् । 16. अवे ऐड्डी हाण किजो लाया करदा है? उठ, बपतिस्मा लै, ते तिन्हेरा नां लेई करी अपणे पापां जो धोई लै।'

### गैर यहूदियां बिच प्रचार रा आवहान

17 जिस बेले मैं फिरी यरुशलेम अन्दर आई करी देहे अन्दर प्राथना करेया करदा थिया, ता मिन्जो अपणी कोई होस नी रेह्ई, 18 ते तिस जो दिख्खेया कि से मिन्जो बोल्दा, 'तोळे ई यरुशलेम का झट निकळी जा; किजोकी तिन्हा ने मेरे बारे अन्दर तेरी गवाहई नी मनणी।' 19. मैं बोलेया, 'ओ प्रभू जी, तिन्हा जो ता पता है कि मैं तुसां पर भरोसा करणे वाळेयां जो जेला पाई दिन्दा ते हर इक धरम सभा अन्दर मार खुआन्दा थिया। 20. जां तेरे गवाह स्तिफनुस रा खून रुडेया करदा थिया तां मैं बी तिन्हे खडित्तेरा थिया ते इस गल्ल कने सैह्यत थिया, अते तिसजो मारणे वाळेयां रे कपडेयां जो सम्भाळेया करदा थिया।' 21. ते तिनिए मिन्जो बोलेया, 'चली जा : किजोकी मैं तिजो होरसी जाती लोका रे बिच दूर-दूर तांई भेजणा।' 22. ते से इस गल्ल तांई तिसेरी सुणदे रेह्, फिरी जोरे-जोरे बोलणा लगे, 'इदेह महु रा नास करी देयो, इसेरा जिन्दा रैह्ना खरा नी है।' 23. जिस बेले से लेरां मारदे थे ते कपडे सुटदे ते अम्बरा अन्दर धूड़ उड़ाया करदे थिये; 24. ता पलटन रे सरदार ने बोलेया, 'इस जो अड्डे अन्दर लेई जाओ, ते कोडे मारी करी परखो, ताकि मिन्जो पता लगो कि महु कुस वजाह कने तिसेरे खलाफ इह्यां लेरां मारेया करदे हिना।' 25. जिस बेले तिन्हा ने उस जो रस्सी कने बहनेया ता पौलुस ने तिस सुबेदार जो, जेहड़ा कि नेड़े ई खडित्तेरा थिया, बोलेया, 'कै ऐ ठीक है कि तुसी इक रोमी महु जो, ते से बी बगैर इल्जाम साबित होएरे, कोडे मारो?' 26 सुबेदार ने ऐ सुणी करी पलटन रे सरदार जो जाई करी बोलेया, 'तू ऐ कै करेया करदा है? ऐ ता रोमी महु है ।' 27 तां पलटन रे सरदार ने तिसेरे का आई करी बोलेया, 'मिन्जो दस्स, कि तू रोम रा है ?' तिनिए बोलेया, 'हाँ।' 28. ऐ सुणी के पलटन रे सरदार ने बोलेया, 'मैं रोमी होणे रा दरजा मते सारे पैसे देई करी हासल कित्तेरा है।' पौलुस ने बोलेया, 'मैं ता पैदा हुन्दे का ई रोमी है।' 29 तां जेहड़े महु तिस जो परखणे वाळे थिये, से झट तिसेरे नेड़े का हटि गे; अते पलटन रा सरदार बी ऐ जाणी करी कि ऐ रोमी है ते मैं इस जो बहनेरा है, डरी गया।

### महासभा रे सामणे पौलुस

30 दूर रोझे पौलुस जो खरा करी जांचणे तांई कि यहूदी इस पर किजो इल्जाम लांदे, तिस जो खोली दित्तेया ; ते प्रधान याजकां अते सारी महा-सभा जो किठिळे रा हुक्म दित्तेया, ते पौलुस जो थले लेई जाई करी तिन्हेरे सामणे खड़ा करी दित्तेया।

23. पौलुस ने महासभा पाससे नझाई करी दिख्खेया ते बोलेया, "ओ भ्याळो, मैं अज तक परमेश्वर तांई बिलकुल सच्चे विवेक कने जिन्दगी बितायेरी हे।" 2. इस गल्ल पर हनन्याह महायाजक ने तिन्हा जो जेहड़े तिसेरे नेड़े खडित्तेरे थिये, पौलुस रे मुहँ पर चन्ड मारणे रा हुक्म दित्तेया। 3 तां पौलुस ने तिस जो बोलेया, "ओ सफेदी फेरे री दिवार, परमेश्वर ने तिजो मारणा। तू व्यवस्था रे हसाबे मेरा न्याय करेया करदा है, ते फिरी कै व्यवस्था रे खलाफ मिन्जो मारणे रा हुक्म देया करदा है ?" 4. जेहड़े नेड़े खडित्तेरे थिये तिन्हा ने बोलेया, "कै तू परमेश्वर रे बड़े प्रोथ जो बुरी-बुरी गलां बोलेया करदा है ?" 5. पौलुस ने बोलेया, "ओ भ्याळो, मिन्जो पता नी था कि ऐ बड़े प्रोथ हिन्, किजो कि लिख्खेरा है : 'अपणे महुआं रे परधान जो बुरा नी बोलणा चाहिन्दा।'" 6. तां पौलुस ने ऐ जाणी करी कि इक झुण्ड सदूकियां रा ते दुज्जा फरीसियां रा है, सभा अन्दर हक मारी करी के बोलेया, "ओ भ्याळो, मैं फरीसी ते फरीसियां रे टब्बर रा है, मुरदेयां री आस ते दुबारा जिन्दे होई जाणे रे बारे अन्दर मेरा मुकदमा होया करदा है।" 7. जां तिनिए ऐ गल्ल बोली ता फरीसियां ते सदूकियां अन्दर अपु-मिते लड़ाइयां होणा लगी पेइ; ते सभा अन्दर फूट पेई गेई। 8. किजो कि सदूकी महु ता ऐ बोलदे कि, ना दुबारा जीन्दे होई जाणा सच्च है, ना स्वर्ग रे दूत अते ना ई आत्मा हुन्दी; अपण फरीसी इन्हा सबनी गलां जो मन्दे। 9. फिरी बड़ा रोळा पेई गया ते किछ सास्त्री जेहड़े कि फरीसियां रे दल रे थिये, उठी होए ते ऐ बोली करी लड़ीणा लगी पे, "असां जो इस महु अन्दर कोई बुराई नी मिली, ते अगर कोई आत्मा या स्वर्ग रा दूत तिस कने बोलेरा है ता फिरी कै? 10 जां बड़ी

लड़ाई होई, ता पलटन रे सरदार ने इस डर कने कि से पौलुस रे टुकड़े-टुकड़े ना करी रखन, पलटन जो हुक्म दित्तेया कि उतरी करी पौलुस जो तिन्हेरे बिच का जबरदस्ती लड्डी लेन, ते गढ़ अन्दर लेई जान।<sup>11</sup> तिस्सी रात्ती प्रभू जी ने तिसेरे नेडे खड़े होई करी बोलेया, “ओ पौलुस, हिम्मत कर; किजो कि जदेहई तैं यरुशलम अन्दर मेरी गवाहई दित्ती, तदेहई गवाहई तिजो रोम अन्दर बी दैणा पोणी।”

### पौलुस जो मारणे री चाल

12 जां संझ होई ता यहूदियां ने साजिस किन्ती ते कसम खाई कि जां तांई असी पौलुस जो मारी नी छडगे, तां तिक्कर असी किछ खान या पीन ता असां पर लाणत है।<sup>13</sup> तिन्हा ने अपु अन्दर ऐ कसम खाई थी, से चाळी मल्लु का बी जादा थिये।<sup>14</sup> तिन्हा ने बड़े प्रोथा ते बजुर्ग का जाई करी बोलेया, “असां ने एह सोच्ची लिक्तेरा है कि जां तांई असी पौलुस जो मारी नी छडदे तां तांई अगर किछ चखन बी ता असां पर लाणत हो।<sup>15</sup> इधेरे तांई अवे महासभा समेत पलटन रे सरदार जो समझाओ कि तिस जो तुसां का लेई आओ, ते इह्यां लगे कि तू तिसेरे बारे अन्दर होर बी जांच-पडताल करणा चाहन्दा; ते असी तिसेरे पुजणे का पैल्ले ई तिस जो मारी रखणे तांई त्यार रहन्तो।”<sup>16</sup> पौलुस रे भाणजे ने सुणी लिया कि से तिस जो मारणे री त्यारी अन्दर हिन्, ता तिनि ए अड्डे अन्दर जाई करी पौलुस जो बोली दित्तेया।<sup>17</sup> पौलुस ने सूबेदारां बिच का इक जो अपणे नेडे सद्दी करी बोलेया, “इस जुआन जो पलटन रे सरदार का लेई जाओ, ऐ तिस जो किछ बोलणा चाहन्दा।”<sup>18</sup> इधेरे तांई तिनि ए तिस जो पलटन रे सरदार का लेई जाई करी बोलेया, “कैदी पौलुस ने मिन्जो सद्दी करी मेरे छन्दे किन्ते कि ऐ जुआन पलटन रे सरदार कने किछ बोलणा चाहन्दा है; इस जो तिसेरे का लेई जा।”<sup>19</sup> पलटन रे सरदार ने तिसेरा हथ्थ पकड़ी करी ते तिस जो अलग लेई के पुछ्छेया, “तू मिन्जो कै बोलणा चाहन्दा ?”<sup>20</sup> तिनि ए बोलेया, “यहूदियां ने साजिस किन्तेरी है कि तेरे का छन्दे करन कि कल पौलुस जो महासभा अन्दर अणन, ते इह्यां लगे कि से तिसेरे बारे अन्दर होर बी जांच-पडताल करणा चाहन्दे होन।<sup>21</sup> पर तिन्हेरी मत मनदा, किजो कि तिन्हा बिच का चाळी का जादा मल्लु पौलुस जो मारणे री भाळा अन्दर हिन्, जिन्हा ने ऐ पक्का सोच्ची लिक्तेरा है कि जां तांई से पौलुस जो मारी नी रखन, तां तांई नां ता तिन्हा किछ खाणा ते ना ई किछ पीणा, ते अवे से त्यार हिन् ते तेरे बोलणे री भाळा अन्दर हिन्।”<sup>22</sup> तां पलटन रे सरदार ने तिस जुआन जो एह हुक्म देई करी बिदा दित्तेया, “कुस्की जो बी मत दस्दा कि तैं मिन्जो एह गल्लां बोलेरी हिन्।”

### पौलुस को फेलिक्स का भेजणा

23 तां तिनि ए दो सूबेदारां जो सदुआइ करी बोलेया, “दो सौ सैनिक, सत्तर सवार ते दो सौ भालैत, रात्ती रे पैहा होई जाणे का बाद कैसरिया जो जाणे तांई त्यार रखवो।<sup>24</sup> ते पौलुस री सवारी तांई घोड़े त्यार रखवो, कि तिस जो फेलिक्स हाकिम तांई सम्भाळी करी पुजाई देन।”<sup>25</sup> तिनि ए इस तरीके कने इक चिट्ठी बी लिखी :<sup>26</sup> “महामहिम् फेलिक्स हाकिम जो क्वौदियुस लूसियास री तरफ का नमस्ते।<sup>27</sup> इस मल्लु जो यहूदियां ने पकड़ी करी मारी दैणा चाह्या, अपण जां मिन्जो पता लग्गेया कि एह रोमी है, ता मैं पलटन लेई करी इस जो छुड़ाई करी लेई आया।<sup>28</sup> मैं पता लाणा चाहन्दा थिया कि से इस पर किजो इल्जाम लाया करदे हिन्, इधेरे तांई तिस जो उन्हेरी महासभा अन्दर लेई गेया।<sup>29</sup> तां मिन्जो पता लग्गेया कि से अपणी व्यवस्था रे गल्ला री वजह कने इस पर इल्जाम लाया करदे हिन्, अपण मारी रखणे जोगी या बह्नी रखणे जोगी इस अन्दर कोई बुराई नी है।<sup>30</sup> जां मेरे कने गल्ल लाई गेई कि से इस मल्लु जो मारणे री भाळा अन्दर हिन् ता मैं इस जो झट तेरे का भेज्ती दित्तेया; ते मुद्दइयां जो बी हुक्म दित्तेया कि तेरे सामणे तिस पर नालिश ना करन।”<sup>31</sup> इधेरे तांई जदेह्यां सैनिकां जो हुक्म दित्तेया थिया, तिह्यां ई से पौलुस जो लेई करी रातो-रात अन्तिपत्रिस अन्दर आये।<sup>32</sup> दूर रोजे से सवारां जो तिस कने जाणे जो छड्डी करी अपु अड्डे जो हटि आये।<sup>33</sup> तिन्हा ने कैसरिया पुजी करी राज्यपाल जो चिट्ठी दित्ती; ते पौलुस जो बी तिसेरे सामणे खडेरी दित्तेया।<sup>34</sup> तिनि ए चिट्ठी पढी करी पुछ्छेया, “ऐ कुस

जिले रा है ?”<sup>35</sup> ते जां पता लग्गेया कि किलिलिया रा है ता तिस जो बोलेया, “जिस बेले तेरे मुद्देई बी आंगे, तां मैं तेरा मुकदमा करणा।” ते तिनि ए उस जो हेरोदेस रे किले अन्दर रखणे रा हुक्म दित्तेया।

### हाकिम फेलिक्स रे सामणे पौलुस

24 पंज रोजा बाद हनन्याह माहायाजक मते सारे बजुर्ग जो ते तिरतुलुस नां रे कुस्की वकील जो कन्ने लेई करी आया। तिन्हा ने राज्यपाल रे सामणे पौलुस पर नालिश किन्ती।<sup>2</sup> जां तिस जो सद्देया ता तिरतुलुस तिस पर इल्जाम लाई करी बोलणा लगेया : “ओ माहामहिम फेलिक्स, तेरी वजह कने असां रे बिच बड़ा खरा हुन्दा; ते तेरे इन्तजाम कने इस जाती री मती सारी बुराइयां सुधरदी जान्दियां।<sup>3</sup> इस जो असी हर जगह ते हर किस्म कने सुकर गुजारी कने मन्दे।<sup>4</sup> अपण इधेरे तांई कि तिजो होर दुख नी दैणा चाहन्दा, मैं तेरे छन्दे करदा कि रह्य करी के म्हारी दो-इक गल्लां सुणी लैं।<sup>5</sup> किजो कि असां ने इस मल्लु जो उपद्रवी ते दुनिया रे सारे यहूदियां बिच झगड़ा/बलवा करणे वाळा, ते नासरत अन्दर रह्ये वाळेयां रे कुपंथ रा परधान पापरा है।<sup>6</sup> तिनि ए देहे जो असुध करणा चाह्या, अपण असां तिस जो पकड़ी लेया। [असां तिस जो अपणी व्यवस्था रे साब्ये सजा दित्तेरी होणी थी;<sup>7</sup> अपण पलटन रे सरदार लूसियास ने जबरदस्ती म्हारे हथ्थां का खुस्सी लेया,<sup>8</sup> ते आरोपी जो तेरे सामणे इण्णे रा हुक्म दित्तेया।] इन्हा सबनी गल्लां जो जिन्हेरे बारे अन्दर असी तिस पर इल्जाम लान्दे, तैं अप्पू ई तिस जो परखी करी पता लाई लैणा।”<sup>9</sup> यहूदियां ने बी तिसेरा साथ देई करी बोलेया, ऐ गल्लां इदेहइ ई हिन्।

### पौलुस रा जवाब

10 जिस बेले राज्यपाल ने पौलुस जो बोलणे रा इसारा कित्तेया, ता तिनि ए जवाब दित्तेया : “इस गल्ल रा पता लगणे का बाद कि तू मते साल्लां का इस जात रे मल्लुआं रा न्याय करेया करदा है, मैं खुसी कने अपणा जवाब दिन्दा।<sup>11</sup> तू अप्पू इ पता लाई सकदा कि जां रा मैं यरुशलम अन्दर आराधना करणे तांई आया, मिन्जो बारा दिनां का उप्पर नी होए।<sup>12</sup> उन्हा ने मिन्जो नां देहे अन्दर नां धरम सभा अन्दर, नां सैह अन्दर कुस्की कने लडीन्दे या भीड़ करदे दिख्खेया;<sup>13</sup> ते नां ता से तिन्हा गल्लां जो, जिन्हेरा से अब्बे मेरे पर इल्जाम लान्दे, तेरे सामणे सच्च साबित करी सकदे।<sup>14</sup> अपण मैं तेरे सामणे एह मन्त्री लिन्दा कि जिस पंथ जो से कुपंथ बोलदे, तिसेरे ई नियम पर मैं अपणे बबब-दाद्रेयां रे परमेश्वर री सेवा करदा; अते जेहडी गल्लां व्यवस्था ते भविस्वाणी करणे वाळेयां री कताबां अन्दर लिख्खेरी हिन्, तिन्हा सबनी पर भरोसा करदा।<sup>15</sup> ते परमेश्वर का उम्मिद रखदा जे से अप्पू बी रखदे, कि धरमी ते अधरमी दोनो किस्मे रे मल्लुआं ने दुबारा जिन्दे होई जाणा।<sup>16</sup> इस कने मैं अप्पू बी कोसीस करदा कि परमेश्वर रे, ते मल्लुआं रे पास्से मेरा मन/विवेक हमेसा बेकसूर रेह्यो।<sup>17</sup> मते साल्लां बाद मैं अपणे लोकां जो दान पुजाणा, ते चढावा चढाणा आया थिया।<sup>18</sup> तिन्हा ने मिन्जो देहे अन्दर, सुध हालत अन्दर, बगैर भीड़ रे कने, ते बगैर दंगा करदे-करदे चढावा चढान्दे दिख्खेया, हाँ, आसिया रे मते यहूदी थिये – जिन्हा जो चाहिन्दा थिया<sup>19</sup> कि अगर मेरे खलाफ तिन्हा का कोई गल्ल हो ता इत्ते तेरे सामणे आई करी मेरे पर इल्जाम लान्।<sup>20</sup> या ऐ अप्पू ई दसन कि जिस बेले मैं माहासभा रे सामणे खडित्तेरा थिया, ता तिन्हा ने मेरे अन्दर कुण जह्नी गलती दिख्खी ?<sup>21</sup> इस इक गल्ल जो छड्डी करी जेहडी मैं तिन्हेरे बिच खडीह करी लेर मारी करी बोली थी : ‘मुरदेयां रे दुबारा जिन्दे होई जाणे रे बारे अन्दर अज्र मेरा तुसां सामणे मुकदमा होय करदा है।’<sup>22</sup> फेलिक्स ने, जहडा इस पंथ री गल्लां खरी करी जाणदा थिया, तिन्हा जो ऐ बोली करी टाळी दित्तेया, “जां पलटन रे सरदार ने लूसियास आणा, ता तुसां री गल्ल रा फैसला करगां।”<sup>23</sup> ते सूबेदार जो हुक्म दित्तेया कि पौलुस जो किछ छूट अन्दर रख्खी करी दिख-रिख करे, ते तिसेरे मित्रां बिच का कुस्की जो बी तिसेरी सेवा करणे का मत रोकदा।

### फेलिक्स ते दुसिल्ला रे सामणे पौलुस

24. थोड़े रोज़ा बाद फेलिक्स अपनी लाड़ी दुसिल्ला जो, जहड़ी यहूदी जानानी थी, कन्ने लेई करी आया ते पौलुस जो सदुआई करी तिस भरोसे रे बारे अन्दर जे मसीह यीशु जी पर है, तिसका सुणेया। 25. जां से धरम, ते सबर, ते इण्णे वाळे न्याय री रे बारे अन्दर बोलेया करदा थिया, ता फेलिक्स ने डरी रे रे जवाब दित्तेया, “अब्बे ता चली जा; मोक्का दिख्खी करी मैं तिज्जो फिरी सद्दी लिन्गा।” 26. तिस जो पौलुस का किछ पैसे मिलणे री बी उम्मीद थी, इधेरे ताई से तिस जो होर बी सद्दी-सद्दी करी तिस कने गल्लां करदा रहन्दा थिया। 27. अपण जिस बेले दो साल होई गे, ता पुरकियुस फेस्तुस, फेलिक्स री जगह पर आया; ते फेलिक्स यहूदियां जो खुस्स करणे री चाहत अन्दर पौलुस जो कैद अन्दर ई छड्डी गया।

### पौलुस रा सम्राट री दोहाई दैणा

25 फेस्तुस तिस ग्राँ अन्दर पुजणे का तिन्न रोज़ां बाद कैसरिया का यरुशलेम जो गया। 2. तां परधान याजकां ते यहूदियां रे खास महुआं ने तिसेरे सामणे पौलुस री नालिश किन्ती; 3 ते तिसेरे छन्दे करी के पौलुस रे खलाफ एह वरदान मंगणा लगे कि से तिस जो यरुशलेम अन्दर सदुवाओ, किजो कि से तिस जो रस्ते अन्दर ई मरी रखणे री भाळा अन्दर थिये। 4 फेस्तुस ने जवाब दित्तेया, “पौलुस कैसरिया अन्दर कैद है, ते मैं अप्पू तोळे तित्ते जाणा।” 5. फिरी बोलेया, “तुसां बिच का जेहडे अधिकारी हिन्, से कन्ने चलो, ते अगर इस महु ने किछ गलत कम्म किन्तेरा ऐ ता इस पर इल्जाम लाओ।” 6. तिन्हेरे बिच से कोई अड्ड-दस रोज रेहई करी कैसरिया जो चली गया; ते दुए रोजे न्याय करणे वाळी कुरसी पर बेहई करी पौलुस जो अनणे रा हुकम दित्तेया। 7. जां से आया, ता जेहडे यहूदी यरुशलेम का आएरे थिये, तिन्हा ने अरे-परे खडे होई करी पौलुस पर मते सारे बड्डे-बड्डे इल्जाम लाये, जिन्हेरा सबूत से नी देई सकदे थिये। 8. अपण पौलुस ने जवाब दित्तेया, “मैं नां ता यहूदियां री व्यवस्था रे ते नां देहे रे, अते नां ई कैसर रे खलाफ कोई कम्म किन्तेरा है।” 9 तां फेस्तुस ने यहूदियां जो खुस करणे री मरजी कने पौलुस जो बोलेया, “के तू चाहन्दा कि तू यरुशलेम जो जाओ; ते तित्ते मेरे सामणे तेरा एह मुकदमा चलाया जाओ?” 10 पौलुस ने बोलेया, “मैं कैसर रे न्याय करणे री कुरसी रे सामणे खडित्तेरा है; मेरे मुकदमे रा फैसला इत्ते ई होणा चाहिन्दा। जिह्याँ तिज्जो खरा करी पता है, कि मैं यहूदियां रे खलाफ कोई गुनाह किन्तेरा नी है। 11. अगर मैं कसुरवार है ते मारी रखणे जोगी कोई गलती किन्तेरी है, ता मैं मरणे का मुकरदा नी; अपण जिन्हा गल्लां रा ऐ मेरे पर इल्जाम लान्दे, अगर तिन्हा बिच का कोई बी गल्ल सच्च साबित नी हुन्दी, ता कोई बी मिन्जो तिन्हेरे हथ्थां सौपी नी सकदा। मैं राजे री दोहाई दिन्दा।” 12. तां फेस्तुस ने मन्त्रियाँ री सभा कने गल्लां करी के तिस जो जवाब दित्तेया, “तैं राजे रीदोहाई दिन्ती, तैं कैसर का ई जाणा।”

### राजा अग्रिप्पा रे सामणे पौलुस

13. थोड़े रोज़ां बाद अग्रिप्पा राजा ते बिरनीके, कैसरिया अन्दर आई करी फेस्तुस कने मिले। 14. तिन्हेरे मते रोज़ां रैके का बाद फेस्तुस ने पौलुस रे बारे अन्दर राजे जो दस्सेया : “इक महु है, जिस जो फेलिक्स कैद अन्दर छड्डी गेरा है। 15. जां मैं यरुशलेम अन्दर थिया, ता परधान याजक ते यहूदियां रे बजुर्ग ने तिसेरी नालिश किन्ती ते से चाहन्दे थिये कि तिस जो सजा दिन्ती जाओ। 16. अपण मैं तिन्हा जो जवाब दित्तेया कि रोमी महुआं री एह रीत नी है कि कुस्की महु जो सजा ताई सौपी देन; से तां ताई इह्याँ नी करदे जां ताई कि आरोपी जो अपणे मुद्देइयाँ रे सामणे खडे होई करी इल्जामां रा जवाब दैणे रा मोका नी मिलो। 17. इधेरे ताई जिस बेले से इत्ते किठहत्ते, ता मैं जरा बी हाण नी लाई, अपण दुए ई रोजे न्याय करणे वाळी कुरसी पर बेहई करी तिस महु जो अनणे रा हुकम देई दिन्ता। 18. जिस बेले तिसेरे पर इल्जाम लाणे वाळे खडे होये, ता तिन्हा ने इदेहई गलत गल्लां रा इल्जाम नी लाया, जदेह्या मैं समझदा थिया। 19. अपण से अपणे ई मत रे अते यीशु नां रे कुस्की महु रे बारे अन्दर, जेहड़ा मरी गेरा थिया ते पौलुस बोलदा

थिया कि से जिन्दा है, बैस करदे थिये। 20 मैं परेसान था कि इन्हा गल्लां रा पता किह्याँ लां ? इधेरे ताई मैं तिस का पुछ्छेया, ‘के तैं यरुशलेम जो जाणा कि जित्ते जाई करी तेरी इन्हा गल्लां रा फैसला होई सको ?’ 21. अपण जां पौलुस ने दोहाई दिन्ती कि तिसेरे मुकदमे रा फैसला माहाराजाधिराज का होये, ता मैं हुकम दित्तेया कि जां ताई तिस जो कैसर का नी भेज्जां, तिस जो कैद अन्दर रख्खेया जाओ।” 22. तां अग्रिप्पा ने फेस्तुस जो बोलेया, “मैं बी तिस महु री सुनणा चाहन्दा।” तिन्हा बोलेया, “तैं कल्ल सुणी लैणा।” 23. ते दूए रोजे जां अग्रिप्पा ते बिरनीके बड़ी धूम-धाम कने आये ते पलटन रे सरदारों ते सैहर रे खास महुआं कने दरबार अन्दर पुजे। तां फेस्तुस ने हुकम दिन्ता कि से पौलुस जो लेई आन। 24. अपण मिन्जो पता लगी गेया कि इन्हा इदेह्या किछ बी नी किन्तेरा है कि इस जो मारी रख्खेया जाओ; अते हालांकि इन्हा अप्पू ई माहाराधिराज री दोहाई दिन्ती, ता मैं इस जो भेजणे रा फैसला लिन्तेया। 25. अपण मिन्जो पता लगी गेया कि इन्हा इदेह्या किछ बी नी किन्तेरा है कि इस जो मारी रख्खेया जाओ; अते हालांकि इन्हा अप्पू ई माहाराधिराज री दोहाई दिन्ती, ता मैं इस जो भेजणे रा फैसला लिन्तेया।

26. मैं इसेरे बारे अन्दर कोई पक्की गल्ल नी दिख्खी कि अपणे मालक जो लिख्खां। इधेरे ताई मैं इस जो तुसां रे सामणे ते खास कर राजा अग्रिप्पा, तुसां रे सामणे लेई आया ताकि परखणे का बाद मिन्जो किछ लिखणे जो मिलि जाओ। 27. किजो कि कैदी जो भेजणा ते जे इल्जाम तिस पर लगाए गेरे हिन्, तिन्हा जो नी दसणा, मिन्जो फजूल ई लगदा।”

### अग्रिप्पा रे सामणे पौलुस रा सफाई दैणा

26. अग्रिप्पा ने पौलुस जो बोलेया, “तिज्जो अपणे बारे अन्दर बोलणे रा इजाजत है।” तां पौलुस हथ्थ अगगे करी के जवाब दैणा लगेया, 2. “ओ राजा अग्रिप्पा, जितणी गल्लां रा यहूदी मेरे पर इल्जाम लान्दे, अज्ज तेरे सामणे तिन्हेरा जवाब दैणे अन्दर मैं अपु जो धन्न समझदा, 3. खास कर इधेरे ताई, किजो कि तू यहूदियां रे सारे बरताव अते कहळा रे बारे अन्दर जाणदा। इधेरे ताई मैं छन्दे करदा, सबर कने मेरी सुण। 4. “मेरा चाल-चलन सुरु का अपनी जात रे लोकां बिच ते यरुशलेम अन्दर जदेह्या थिया, से सारे यहूदी जाणदे। 5. अगर से गवाहई दैणा चाह, ता सुरु का ई मिन्जो जाणदे कि मैं फरीसी होई करी अपणे धरम रे सबनी का खरे पंथ रे हसाब कने चलेया। 6. ते अवे तिस प्रतिज्ञा अन्दर आस री वजह कने जेहड़ी परमेश्वर ने असां रे बब्ब-दाद्रेयां कने किन्ती थी, मेर पर मुकदमा चलेया करदा है। 7. तिस्सी प्रतिज्ञा रे पूरे होणे री आस लाई करी, म्हारे बारा गोत्तर अपणे सारे मनां कने दिन-रात परमेश्वर सेवा करी रे-रे हिन्। ओ राजा, इस ई आस रे बारे अन्दर यहूदी मेरे पर इल्जाम लान्दे। 8. जदकि परमेश्वर मरी गेरे महुआं जो जिन्दा करी दिन्दे, ता तुसां पास्से का ऐ गल्ल भरोसे रे लाएक किजो नी समझी जान्दी ? 9. मैं बी समझेया थिया कि यीशु नासरी रे खलाफ मिन्जो मता किछ करणा चाहिन्दा। 10. ते मैं यरुशलेम अन्दर इह्यां ई किन्तेया; ते परधान याजकां का अधिकार लेई करी मते सारे पवित्र महुआं जो जेह्ला अन्दर पाया, ते जां तिन्हा जो मारी रख्खे थिये ता मैं बी तिन्हेरे खलाफ अपनी सैह्यती दिन्दा थिया। 11. हर इक धरम-सभा अन्दर मैं तिन्हा जो सजा दुआई-दुआई करी यीशु जी री बेजती करान्दा थिया; ते होर ता होर, लैर री वजाह कने इदेह्या पागल होई गेया कि बाहरे सैहरां अन्दर बी जाई करी तिन्हा जो तंग करदा थिया।

### अपणे दिल रे बदलणे रे बारे बिच पौलुस री गुआई

12. इस्सी धुन अन्दर जां मैं परधान याजकां का अधिकार ते आज्ञा-पत्तर लेई करी दमिश्क जो जाया करदा थिया; 13. तां ओ राजा, रस्ते अन्दर धियाडी बेले मैं अम्बरा का सूरज रे तेज का बी बधी करी इक लो जो, अपणे ते अपणे कन्ने चलणे वाळेयां रे चौन्नी पास्से चमकदी दिख्खी। 14. जिस बेले असी सारे जणे धरती पर छुडकी पे, ता मैं इब्रानी भासा अन्दर, मेरे कने ऐ बोल्दे इक सब्द सुणेया, ‘ओ शाऊल, ओ शाऊल, तू मिन्जो किजो तंग करदा ? पैंने पर लत्त मारणा तेरे ताई मुस्कल है।’ 15. मैं बोलेया, ‘ओ प्रभू जी, ‘तुसी कुण हिन् ?’ प्रभू जी ने बोलेया, ‘मैं यीशु है, जिस जो तू तंग करदा।’

16. अपण तू उठ, अपणे पैरां पर खड़े होई जा; किजो कि मैं तिजो इधरे तांई दरसन दिता कि तिजो तिन्हा गल्लां रा बी सेवक ते गवाह ठैहां, जे तैं दिखिखायां, ते तिन्हा गल्लां रा बी, जिन्हा तांई मैं तिजो दरसन दैणा। 17. ते मैं तिजो तेरे लोकां का ते होरसी जाती का बचान्दे रैह्ला, जिन्हा का मैं अब्बे तिजो भेजणा 18 कि तू तिन्हेरी हाखिखायां खोल्लो जिस कने से न्हारे का रोसनी पाससे, ते सैह्तान रे अधिकार का परमेश्वर पाससे फिरन; ताकि पापां री माफी ते तिन्हा मल्लुआं कने जेह्दे मेरे पर भरोसा करणे कने पबित्तर कित्ते गेरे हिन, मीरास पान।'

### अपणे कम्मां रे बारे दसणा

19. इधरे तांई ओ राजा अग्रिप्पा, मैं तिस स्वर्ग वाले दरसन री गल्ल नी टाळी, 20 अपण पैल्ले दमिश्क रे, फिरी यरुशलम रे, ते फिरी तां यहुदिया रे सारे देस रे रेह्ले वाळ्यां जो ते होरसी जाती जो समझान्दा रेह्ला, कि मन फेरो ते परमेश्वर पाससे फिरी करी मन बदणे जोग्गा कम्म करो। 21. इन्हा गल्लां री वजह कने यहुदी मिन्जो देहे अन्दर पकड़ी करी मारणे री कोसिस करदे थिये। 22. अपण परमेश्वर री मदद कने मैं अज्र तांई बणी रे रा है ते हल्के-बड्डे सबनी सामणे गवाहई दिन्दा, ते तिन्हा गल्लां जो छड्डी करी होर किछ छ नी बोलदा जे भविस्ववाणी करणे वाळ्यां ने अते मूसा ने बी बोलेया कि से होणे वाळियाँ हिन, 23 कि प्रभू यीशू जी जो दुख सैहणा पैणे, ते तिन्हा ने ई सबनी का पैल्ले जिन्दे होई करी, म्हारे लोकां अन्दर ते होरसी जाती अन्दर जोत रा परचार करणा।" 24. जिस बेले से इस तरीके कने जवाब देया करदा थिया, ता फेस्तुस ने उच्चि अवाज अन्दर बोलेया, "ओ पौलुस, तू पागल है। मते सारे ज्ञान ने तिजो पागल करी दित्तेरा है।" 25 अपण पौलुस ने बोलेया, "ओ माहामहिम फेस्तुस, मैं पागल नी है, अपण मैं सच्ची ते बुधि री गल्लां बोलदा। 26. राजा बी, जिसेरे सामणे मैं बगैर डरे रे बोलेया करदा है, इन्हा गल्लां जो जाणदा; ते मिन्जो भरोसा है कि इन्हा गल्लां बिच का कोई बी गल्ल इन्हा का छुपेरी नी है, किजो कि ऐ घटना कुस्की कौणे अन्दर नी होई।

### पौलुस री क्रेते तिकर रोमि यात्रा

27 ओ राजा अग्रिप्पा, कै तू भविस्ववाणी करणे वाळ्याँ पर भरोसा करदा ? हाँ, मिन्जो पता है कि तू भरोसा करदा।" 28 तां अग्रिप्पा ने पौलुस जो बोलेया, "तू थोडा करी समझाई करी मिन्जो मसीही बनाणा चाहन्दा ?" 29 पौलुस ने बोलेया, "परमेश्वर का मेरी प्राथना है कि कै थोडे अन्दर कै मते अन्दर, सिरफ तू ई नी अपण जितणे बी मल्लु अज्र मेरी सुणदे हिन, इन्हा बन्धनां जो छड्डी करी से मेरे सेई होई जान।" 30 तां राजा ते राज्यपाल ते बिरनिके ते तिन्हेरे कन्ने बैह्ले वाळे खड़ी उठे; 31 ते बखरे जाई करी अपु-मिते बोलणा लगे, "इस मल्लु ने इदेह्ला ता किछ बी नी कित्तेरा है, कि इस जो मारणे री या जेला द्रपणे री सजा दित्ती जाओ।" 32 अग्रिप्पा ने फेस्तुस जो बोलेया, "अगर एह मल्लु कैसर री दोहाई नी दिन्दा, ता छुटि सकदा थिया।"

27 जाँ इयां पक्का होई गया कि असा झाज पर इटली जाणा, ता तिन्हा ने पौलुस अते थोडे होरनी कैदियां जो बी यूलिययुस नां री औगुस्तुस री पलटन रे इक सूबेदार रे हथथा देई दित्तेया। 2 अद्रमुत्तियुम रे इक झाज पर जेह्दा आसिया रे कनारे री जघा पर जाणे वाळा थिया, चढी करी असां तिस जो खोल्ली दित्तेया, ते अरिस्तरुस नां रा इक थिस्सलुनीके रा इक मकिदनी असां कने थिया। 3 दूए रोञ्जे असां सैदा अन्दर डेरा लाया, ते यूलियुस ने पौलुस पर रैह्ल करी के तिस जो मित्रां का जाणा दित्तेया कि तिसेरी आदर-खातर होई सको। 4. तित्ते का झाज खोल्ली करी ब्यार कने रुकावट होणे री वजह कने असी साइप्रस री आड अन्दर चले; 5. ते किलिकिया ते पंफूलिया रे नेडे रे समंदर बिच का होई करी लूसिया रे मूरा अन्दर उतरे। 6. तित्ते सूबेदार जो सिकन्दरिया रा इक झाज इटली जाया करदा मिलेया, ते तिनिए असां जो तिस पर चढाई लिच्तेया। 7. जां असी मते रोञ्जा तांई मठे-मठे चली करी बडी मुस्कला कने कनिदुस रे सामणे पुञ्जे, ता इधरे तांई कि ब्यार असां जो अग्गे बधणा नी देया करदी थी, असी सलमोन रे सामणे का होई करी क्रेते री आड अन्दर चले; 8. ते तिसेरे कनारे-कनारे बडी मुस्कला कने चली करी 'सुभलंगरबारी' नां री इक जघा पुञ्जे, जित्ते का

लसया सैह नेडे थिया। 9. जां मते रोज होई गे ते पाणी रे सफर अन्दर मुस्कलां इधरे तांई हुन्दी थियां कि व्रत रे रोज अवे मुकी गेरे थिये। इधरे तांई पौलुस ने तिन्हा जो एह बोली करी समझाया, 10 ओ सज्रन मल्लुओ, मिन्जो इह्या लगेया करदा है कि इस सफर अन्दर मुस्कल अते मता सारा नुकसान होणे वाळा है, जेह्दा कि सिरफ माल ते झाज रा ई नी होणा, अपण म्हारी जान रा बी होणे वाळा है।" 11. अपण सूबेदार ने पौलुस री गल्लां का कप्तान ते झाज रे मालक री गल्लां जो जादा बधी करी मन्नेया। 12 से बन्दरगाह सरदियां कटणे जोग्गा खरा नी थिया, इधरे तांई मते जह्थ्याँ ने सोबेया कि तित्ते का झाज खोल्ली करी अगर कुस्की तरीके कने होई सके ता फिनिकस पुजी करी सरदियां कट्टी जान। ऐ ता क्रेते रा इक बन्दरगाह है जेह्दा दक्षिण-पश्चिम ते उत्तर-पश्चिम रे पाससे का खुलेरा है।

### समुंदर बिच तुफान

13 जिस बेले थोडी-थोडी दक्षिण वाळी ब्यार चलणा लगी, ता एह समझी करी कि म्हारा मकसद पूरा होई गया, लंगर चुकेया ते कनारा पकड़ी करी क्रेते रे नेडे का जाणा लगे। 14 अपण थोडी हाणा अन्दर धरती पाससे का इक बड्डी आंधी आई, जिस जो 'यूरकुलीन' बी बोलदे। 15 जां से आंधी झाजा पर लगी ता से तिसेरे सामणे ठैही नी सकेया, ते असां तिस जो रुडणा दित्तेया ते इह्याँ ई रुडदे-रुडदे चली गे। 16 तां कौदा नां रे इक हल्के जह्ले टापू री आड अन्दर रुडदे-रुडदे असी मुस्कल कने डोंगी जो बस अन्दर अणी सके। 17 फिरी मल्लाहां ने तिस जो चुक्की करी मते सारे बेतर लाई करी झाज जो थल्ले का बहनेया, ते सुरतिस रे चारबालू पर टिकी जाणे रे डरा कने पाल ते समान उतारी करी रुडदे-रुडदे चली गे। 18 जां असा हवा कने मते सारे हिचकोळे अते धक्के खाए, ता दूए रोञ्जे से झाज रा माल सुटणा लगे; 19 अते त्रीय्ये रोञ्जे तिन्हा ने अपणे हथथां कने झाज रा समान बी सुटि दित्तेया। 20 जां मते रोञ्जा तांई ना सूरज, ना तारे लिब्बे ते बडी हवा चलदी रेहई, ता आखर अन्दर असां रे बचणे री सारी उम्मीद बी मुकी गई। 21 जां से मते रोञ्जा तांई भुख्खे रेहई बैठे, ता पौलुस ने तिन्हेरे बिच खड़े होई करी बोलेया, "ओ मल्लुओ, इह्याँ करणा चाहिन्दा थिया कि तुसी मेरी गल्ल मन्नी करी क्रेते का झाज नी खोलदे, ते फिरी नां ऐ मुस्कल आणी थी ते नां ऐ नुकसान सैह्ला पैणा थिया। 22 पर अवे मैं तुसां जो समझान्दा कि हिम्मत रखो, किजो कि तुसा बिच का कुस्की री बी जान नी जाणी, अपण सिरफ झाज रा नुकसान होई जाणा। 23 किजो कि परमेश्वर जिन्हेरा मैं है, ते जिन्हेरी सेवा करदा, तिन्हेरे स्वर्ग रे दूत ने अज्र रात्ती मेरे का आई के बोलेया, 24 ओ पौलुस, डर मत ! तिजो राजे रे सामणे खड़े होणा ई पैणा। दिख्ख, परमेश्वर ने सबनी जो, जेह्दे तेरे कने सफर करेया करदे हिन, तिजो दित्तेरा है।" 25 इधरे तांई, ओ सज्रन मल्लुओ, हिम्मत रखो ; किजो कि मैं परमेश्वर रा भरोसा करदा, कि जिदेह्ला मेरे कने बोलेया गेरा है, तिदेह्ला ई होणा है। 26 पर असा जो कुस्की टापू पर जाई करी टिकणा पैणा।"

### जहाज रा टुटणा

27 जां चोदमी रात आई, ते असी अद्रिया समुन्दर अन्दर भटकदे फिरेया करदे थिये, ता अधधी रात्ती जो मल्लाहां ने तुक्का लाई करी पता लगाया कि कुस्की देस रे नेडे पुञ्जेया करदे हिन। 28 थाह लिच्ती ता तिन्हा जो बीह पुरसा डुग्गा मिलेया, ते थोडे अग्गे बधि करी फिरी थाह लेई ता पंद्रा पुरसा थिया। 29 तां पथरीली जघा कने टक्कर होणे रे डरा कने तिन्हा ने झाज री पिछाडी चार लंगर पाए, ते भ्याग होणे री भाळा बेहई रेह। 30 अपण जां मल्लाह झाजा का नहसणा चाहन्दे थिये, ते गलही का लंगर पाणे रे भात्रे डोंगी जो समुन्दर अन्दर उतारी दिता; 31 ता पौलुस ने सूबेदार ते सैनिकां जो बोलेया, "अगर ऐ झाजा पर नी रैहन्ने, ता तुसा बी नी बची सकणा।" 32 तां सैनिकां ने रस्से कटी करी डोंगी सुटि दित्ती। 33. जिस बेले भ्याग होणे वाळी थी, तां पौलुस ने ऐ बोली करी, सबनी जो रोटी खाणे तांई समझाया, "अज्र चोदा रोज होई गे कि तुसी आस दिखदे-दिखदे भुख्खे रेह, ते किछ बी नी खाया। 34 इधरे तांई तुसां जो समझाया करदा है कि किछ खाई लेयो, जिस कने तुम्हारा बचाव होई सको; किजो कि तुसा बिच का कुस्की रे सरे रा इक बी बाळ नी

पैणा।<sup>35</sup> ए बोली करी तिनि ए रोटी लेई करी सबनां रे सामणे परमेश्वर रा धन्यावाद कित्तेया ते भन्नी करी खाणा लगेया।<sup>36</sup> तां से सब जह्ने बी हिम्मत करी कने रोटी खाणा लगे।<sup>37</sup> असी सारे जह्ने मिली करी झाजा पर दो सौ छिहत्तर महु थिये।<sup>38</sup> जां से रोटी खी करी रज़ी गे, ता कणक जो समुन्दर अन्दर सुट्टी करी झाज जो पोला करणा लगे।<sup>39</sup> जिस बेले भ्याग होई ता तिन्हा ने तिस देस जो नी पछाणेया, अपण इक खाली जगह दिख्खी, जिसेरा कनारा चोरस थिया, ते सोचेया कि अगर होई सको ता इस पर ई झाज जो टिकान।<sup>40</sup> तां तिन्हा ने लंगरां जो खोली करी समुन्दर अन्दर छड्डी दित्तेया ते तिस्सी बेले पतवारां रे बन्धन खोली दित्ते, ते ब्यार रे सामणे अगला पाल चढाई करी कनारे पाससे चले।<sup>41</sup> अपण दो समुन्दरां रे मिलणे री जघा पर तिन्हा ने झाज जो टिकाया, ते गलही ता धक्का खाई करी गडी गेई ते टळी नी सकी; अपण पिछाडी लैहां रे जोर कने टुटणा लगी।<sup>42</sup> तां सैनिकां जो ए सोच आई कि कैदियां जो मारी रखदे, इहाँ ना हो कि कोई तैरी करी नहसी जाओ।<sup>43</sup> अपण सूबेदार ने पौलुस जो बचाणे री मरजी कने तिन्हा जो रोकणे तांई ए बोलेया कि, जेहडे तैरी सकदे, से पैले छाळ मारी करी कनारे जो चली जान; <sup>44</sup> ते बाकी कोई पटरेयां पर, ते कोई झाज री होरनी चीजां रे साहे निकळी जान। इस तरीके कने सब जह्ने धरती पर बची निकळी।”

### माल्दा द्वीप पर पौलुस

**28** जां असी बची करी निकळी आये, ता पता लगेया कि इस जगह रा नां माल्दा है।<sup>2</sup> तित्ते रे रैह्ने वाळ्यां ने असां पर बड़ा रैह्ने कित्तेया; किजो कि बरफ पैणे री वजह कने ठण्ड होई गेरी थी, इधेरे तांई तिन्हा ने अग बाळी करी असां सबनी जह्नेयां जो ठैहराई लिता।<sup>3</sup> जां पौलुस ने लकडीयां रा ढेर कठेरी करी अग्गी पराले रखेया, ता इक कीडे जो सेक लगणे री वजह कने से तिन्हा लकडियां बिच का निकळी करी पौलुस रे हथथा कने लिपटिह गेया।<sup>4</sup> जिस बेले तित्ते रे रैह्ने वाळ्यां ने तिसरे हथथा कीडा लिपटित्तेरा दिख्खेया, ता से अपु-मिते बोलणा लगे, “सच्ची ऐ महु खून्नी है किजो कि अगर समुन्दर का बची गेया, तां बी न्याय ने इस जो जिन्दा नी रैह्ना दित्तेया।”<sup>5</sup> तां तिनिये कीडे जो अग्गी अन्दर तुडकी दित्तेया, ते पौलुस जो कोई नुकसान नी होया।<sup>6</sup> पर से भाळदे रे-रे थिये कि तिनिये सुजी जाणा या इक्क-दम्म मरी करी छुडकी पैणा, अपण जिस बेले से बड़ी हाणा तांई दिखदे रेह अते दिख्खेया कि तिसेरा ता किछ बी नी बिगडेया, ता अपणी सोच बदली करी बोलणा लगे, “ऐ ता कोई देवता है।”<sup>7</sup> तिस जगह रे अरे-परे तिस टापू रे प्रधान पुबलियुस री जमीन थी। तिनिये असां जो अपणे घरे लेई जाई करी त्रै रोजां तांई मित्र-भाव कने देख रेख कित्ती।<sup>8</sup> पुबलियुस रा प्यो बुरखार अते आँव-लहू कने बमार पेरा थिया। इधेरे तांई पौलुस ने नेडे जाई करी तिसेरे घरा अन्दर जाई करी प्राथना कित्ती ते तिस पर हथथ रख्खी तिस जो खरा करी दित्तेया।<sup>9</sup> जां इहाँ होया ता, तिस टापू रे होर बी बमार महु आये ते खरे कित्ते।<sup>10</sup> तिन्हा ने म्हारी बड़ी इज्जत कित्ती, ते जिस बेले असी चलणा लगे ता जे किछ बी असा तांई जरूरी थिया, झाजा पर रख्खी दित्तेया।

### माल्दा द्वीप का रोम रे पाससे

<sup>11</sup> तिन् म्हीन्ने बाद असी सिकन्दरिया रे इक झाज पर निकळी गे, जेहडा तिस द्वीप पर सरदीयां तांई रुकेरा थिया अते जिसेरी निसानी दियुसकूरी

थिया।<sup>12</sup> सुरकूसा अन्दर लंगर पाई करी असी त्रै रोजां तांई टिकी रेह।<sup>13</sup> तित्ते का असी घुम्मी करी रेगियुम अन्दर आये; ते इक दिन बाद दक्षिण री ब्यार चली, तां असी दूए रोजे पुतियुली अन्दर आये।<sup>14</sup> तित्ते असा जो भ्याळ मिले, ते तिन्हेरे बोलणे पर असी तिन्हा का सत्त रोजां तांई रेह; अते इस तरीके कने असी रोम चली जो पे।<sup>15</sup> तित्ते का भाई म्हारी खबर सुणी करी अप्पियुस रे चौक ते तिन्-सराए तांई असा कने मिलणे जो निकळी आये, जिन्हा जो दिख्खी करी पौलुस ने परमात्मा रा सुकर कित्तेया ते हांसला बहन्नेया।<sup>16</sup> जिस बेले असी रोम पुजे, ता पौलुस जो इक सैनिक रे कत्रे जेहडा तिसेरी दिख-रिख करदा थिया, किले रैह्ने रा हुक्म मीली गेया।

### रोम बिच पौलुस

<sup>17</sup> त्रै रोजां बाद तिनिये यहूदियाँ रे खास महुआं जो सदुवाया, ते जां से किठिह गे ता तिन्हा जो बोलेया, “ओ भ्याळों, मैं अपणे लोकां रे या बब्ब-दाद्रेयाँ रे व्यवहारां रे खलाफ किछ बी नी कित्तेया, तां बी कैदी बनाई करी यरूशलेम का रोमीयाँ रे हथथा सोंपेया गेया।<sup>18</sup> तिन्हा ने मिन्जो परखी करी छडी दैणा चाह्या, किजो कि मेरे अन्दर इदेहई कोई बी गलती नी थी कि मिन्जो मारी दित्तेया जाओ।<sup>19</sup> अपण जां यहूदी इसेरे खलाफ बोलणा लगे, ता मिन्जो राजे री दोहाई दैणा पेई : एह नी है कि मैं अपणे महुआं पर कोई इल्जाम लाणा थिया।<sup>20</sup> इधेरे तांई मैं तुसा जो सदुवाया कि तुसा कने मिलां ते गल्ल-बात करां; किजो कि इस्त्राएल री आस कने मैं इस जंजीरा कने जकडित्तेरा है।”<sup>21</sup> तिन्हा ने पौलुस जो बोलेया, “असा ना ता तेरे बारे अन्दर यहूदियां का चिडियां पाइयां, ते ना ता भ्याळों बिच का कुस्की ने आई करी तेरे बारे अन्दर किछ दस्सेया अते ना बुरा बोलेया।<sup>22</sup> अपण तेरा कै विचार है ? सेहई असी तेरे का सुनणा चाहन्दे, किजो कि असा जो पता है कि हर जघा इस गल्ल रे खलाफ महु गल्लां करदे।”<sup>23</sup> तां तिन्हा ने उस तांई इक दिन रख्खेया, ते मते सारे महु तित्ते तिस का किठिह गे, अते से परमेश्वर रे राज री गवाहई दिन्दा, ते मूसा री व्यवस्था अते भविस्वयाणी करणे वाळ्यां री कताबां का यीशु जी रे बारे अन्दर समझाई-समझाई करी भ्याग्गा का लेई करी संझा तांई गैहाई कने दस्दा रेह्या।<sup>24</sup> तां थोडे जह्नेयाँ ने तिन्हा गल्लां जो मन्नी लेया, अते किछ जह्नेयाँ ने भरोसा नी कित्तेया।<sup>25</sup> जां से अपु-मिते इक मत नी होये, ता पौलुस री एह गल्ल बोलणे पर चली गे : “पवित्र आत्मा ने यशायाह भविस्वयक्ता रे जरिये तुम्हारे बब्ब-दाद्रेयाँ कने ठीक ई बोलेया,<sup>26</sup> ‘जाई करी इन्हा महुआं जो बोल कि तुसा सुणदे ता रैह्ना, अपण समझणा नी, अते दिखदे ता रैह्ना, अपण पछियाणी नी सकणा; <sup>27</sup> किजो कि इन्हा महुआं रा मन मोटा अते इन्हेरे कत्र भारे होई गेरे हिन्, ते इन्हा ने अपणी हाखिखियाँ बन्द कित्तेरी हिन्, इहाँ ना हो कि से कदी हाखिखियाँ कने दिखन ते कत्रां कने सुणन ते मनां कने समझन अते बदली जान, ते मैं तिन्हा जो खरा करां।’<sup>28</sup> इधेरे तांई तुसां जो पता लग्गो कि परमात्मा रे इस उद्धार री काहणी होरसी जाती का भेजेया गेरी है, ते तिन्हा ने सुनणा है।<sup>29</sup> जिस बेले तिनिये एह बोलेया ता यहूदी अपु-मिते बड़ी बैहस करणा लगे ते तित्ते का चली गे।<sup>30</sup> से पूरे दो सालां तांई कराये रे घरा अन्दर रेह्या।<sup>31</sup> ते जेहडे तिस का ईन्दे थिये, तिन्हा सबनी कने मिलदा रेह्या ते बगैर रोक-टोक रे, बड़ा निडर होई के परमेश्वर रे राज्य रा प्रचार करदा ते प्रभू यीशु मसीह जी री गल्लां सखांदा रेह्या।

# रोमियों

## अभिवादन

1 जिन्हें बिच का तुसी बी यीशु मसीह जी रे होणे ताई सद्दे गे रे हिन।  
2 तिन्हा सारेयां रे नां जे रोम बिच परमेश्वर रे प्यारे हिन ते पवित्र होणे ताई सद्दे गे रे हिन: हमारे पिता-परमेश्वर ते प्रभू यीशु मसीह री और का तुसां जो दया ते सांति मिलदि रेय। 3 पैल्ले मै तुसां सारे वास्ते यीशु मसीह रे जरिए अपणे परमेश्वर रा धनवाद करदा, किजोकी तुसां रे भरोसे री गल्लां सारी दुनिया बिच होया करदी है। 4 परमेश्वर जिन्हेरी सेवा मै अपणी आत्मा का तिन्हेरे पुत्तर री खुसखबरी रे बारे बिच करदा, से ई मेरा ग्वाह है कि मै तुसां जो कुस तरिके कने लगातार याद करदा रहन्दा, 5 ते लगातार अपनी प्रार्थना बिच विनती करदा कि कुसकी तरिके कने अवे तुसां का आणे ताई मेरा सफर परमेश्वर री इच्छा कने कामयाब हो। 6 किजोकी मै तुसां का मिलणे री इच्छा करदा कि मै तुसां जो कोइ आत्मिक वरदान देयां जिस कने तुसी टिकी जाओ; 7 मतलब ए की जां मै तुसां रे बिच होयां, तां असी तिस भरोसे रे जरीए जे मेरे ते तुसां बिच है, इक्क-दुज्जे का हांसला पान

### धनवाद री प्रार्थना

8 हे भाईयो, मै नी चांदा की तुसी इस का अनजान रेयो कि मै घड़ी-घड़ी आणा चाएया, कि जदेया मेरे जो दुई जातियां बिच फल मिलेया, तदेया तुसां इच बी मिले, अपण हल्ले तिकर रोकिया गया। 9 मै युनानिया ते होर भासा बोलणे वालेयां रा, ते समजदां ते नासमजां रा कर्जदार है। 10 अते मै तुसां जो बी जे रोम बिच रहन्दे खुसखबरी सुनाणे जो पुरी तरिके कने तैयार है। 11 किजोकि मै शुभ-भसेख का नी शर्मादा, किजोकी से हर इक्क भरोसा करणे वाले ताई, पैल्ले ता यहूदी ते फिरी युनानी ताई, छुटकारे ताई परमेश्वर री सक्ति है। 12 किजोकी तिस बिच परमेश्वर री धार्मिकता भरोसे कने ताई भरोसे दिसदी।; जियां लिख्खे रा है, "भरोसे कने धर्मी म्हणु ने जिन्दे रह्ला।" 13 परमेश्वर रा गुस्सा ता तिन्हा लोकां री सारी अभक्ति ते अधर्म पर स्वर्ग का आंदा, जे सच जो अधर्म कने दबाई रखदे। 14 इस ताई की परमेश्वर रा ज्ञान तिन्हेरे मन बिच प्रकट है, किजोकी परमेश्वर ने तिन्हा पर प्रकट कित्ते रा है। 15 तिन्हेरे अनदेखे गुण, मतलब तिन्हेरी ताकत ते इश्वरत्व, दुनिया रे बनाणे रे वक्त का तिन्हेरे कम्मां रे जरिए दिखणे बिच आंदे, इत्ते तिकर की तिन्हेरा कोई जवाब नी है।

### सुसमाचार री ताकत

16 ईधेरे ताई की परमेश्वर जो जानणे पर बी तिन्हा ने परमेश्वर ए जोमो बडीयाई ते धनवाद नी कित्ता, अपण बेल्लि गल्लां सोचणा लगे, इत्ते तिकर की तिन्हेरा नासमज मन न्याहरा होई गया। 17 से अपणे आप जो समजदार दस्सि करी बेवकुफ बणी गे,

### इनसानां रा पाप करणा

18 ते अविनाशी परमेश्वर री महीमा जो नाशवान म्हनुआं जो ते चिडी-पखेरु, डारां ते साप्प-किडेयां री मुर्तियां री बराबरी बिच बदली दित्तेया। 19 इस तरिके कने परमेश्वर ने तिन्हा जो तिन्हेरे मनां री इच्छा रे मुताबक

गन्दगी ताई छड्डि दित्तेया कि से आपस बिच अपणे सरिरां जो बेईज्जत करण। 20 किजोकी तिन्हा ने परमेश्वर री सच्चाई जो बदली करी झुट बनाई दित्ता, ते दुनिया री पुजा ते सेवा कित्ति, ना की तिस बनाणे वाले री जे हमेसा धन है! आमीन। 21 इस ताई परमेश्वर ने तिन्हा जो घटिया इच्छा रे बस अन्दर छड्डि दित्ता; इत्ते तिकर की तिन्हेरी जनानियां ने बी कुदरती स्वभाव जो बदली करी जे तिसेरे खलाफ है तिस बिच बदली दित्ता। 22 तियां ई आदमी बी जनानियां कने कुदरती बर्ताव छड्डि करी अप्पु बिच कामातुर होई करी जलणा लगे, ते आदमियां ने आदमियां कने बेशर्मी रे कम्म करी के अपणे भ्रम रा ठीक फल पाया। 23 जां तिन्हा ने परमेश्वर जो पेहचानना नी चाएया, तां परमेश्वर ने बी तिन्हा जो तिन्हेरे निकम्मे मनां पर छड्डि दित्तेया कि से गलत कम्म करण। 24 इस ताई से हर तरह रे अर्धम, ते दुष्टता, ते लाळ्च, ते नफरत कने भरी गे; ते जलन, ते खून, ते झगडे, ते धोखा, ते हिंस कने भरी गे, ते चुगलखोर, 25 बदनाम करणे वाले, परमेश्वर कने नफरत करणे वाले, दुए रा बेईज्जति करणे वाले, घमंडी, डिगां मारणे वाले, बुरी-बुरी गल्लां बनाणे वाले, माँ-प्यो री गल्लां नी मनणे वाले, 26 नासमज, धोखेबाज, गल्ल नी समजणे वाले, तरस नी खाणे वाले होई गे। 27 से ता परमेश्वर री ए नियम जाणदे कि इदेय-इदेय कम्म करणे वाले मौत री सजा रे जोमो हिन, ते बी ना सिर्फ इदेय कम्म करदे अपण करणे वालेयां का खुस बी हुदें। 28 अते हे इल्जाम लाणे वाले, तू कोई किजो नी हो तेरे का कोई जवाब नी है; किजोकी जिस गल्ल बिच तु दुए पर इल्जाम लांदा तिसी गल्ल बिच अप्पु जो बी गलत ठेहरादां, इस ताई तु जे इल्जाम लांदा अप्पु ई से कम्म करदा। 29 असी जाणदे की इदेय-इदेय कम्म करणे वालेयां पर परमेश्वर रे पास्से का ठीक-ठीक सजा रा हुक्म हुंदा। 30 हे म्हणु, तु जे इदे-इदेय कम्म करणे वालेयां पर इल्जाम लांदा ते अप्पु ई से कम्म करदा; क्या ए समजदा की तु परमेश्वर री सजा रे हुक्म का बची जाणा? 31 क्या तु तिन्हेरी दया, सहनशीलता, ते सबर करणे रे धन जो बेकार समजदा? क्या ए नी समजदा की परमेश्वर री किरपा तेरे जो मन फिराणे जो सिखांदी? 32 अपण तु अपणे कडेपन ते जिद्धि मन री वजह कने तिन्हेरे गुस्से रे दिन ताई, जिस बिच परमेश्वर रा सच्चा ईसांफ सामणे ईणा, अप्पु ताई गुस्सा कमाया करदा है।

### परमेश्वर रा ईसांफ

2 से हर इक्क जो तिन्हेरे कम्मा रे हसाब कने तिन्हेरे जो बदला देंगा:  
2 जे खरे कम्मा बिच टिके रेइ करी महीमा, ईज्जत ते अमरता री खोज बिच हिन, तिन्हा ने उन्हा ने हमेसा री जिन्दगी देंगी; 3 अपण जे बहसबाज हिन ते सच्चाई जो नी मनदे, अपण बुरे कम्मा जो मनदे, तिन्हा पर गुस्सा ते कैहर भडकणा। 4 ते दुख ते मुसीबत हर इक्क म्हणु रे जान पर जे बुरा करदा, ईणा, पैल्ले यहूदी पर फिरी युनानी पर; 5 अपण महीमा ते इज्जत ते कल्याण हर इक्क जो मिलणा, जे भला करदा, पैल्ले यहूदी जो फिरी युनानी जो। 6 किजोकी परमेश्वर लोकां बिच फर्क नी रखदा। 7 इस ताई जिन्हा ने बगैर व्यवस्था पाए रे पाप कित्ता, तिन्हा ने बगैर व्यवस्था रे खत्म बी होइ जाणा; ते जिन्हा ने व्यवस्था पाई करी पाप कित्ता, तिन्हेरी सजा व्यवस्था रे हसाब कने होणी; 8 (किजोकी परमेश्वर रे इत्ते व्यवस्था रे सुनणे वाले धर्मी नी अपण

व्यवस्था पर चलने वाले धर्मी ठहरणे। 9 फिरी जां होर जाति रे लोक जिन्हा का व्यवस्था नी है, स्वभाव कने ई व्यवस्था री गल्लां पर चलदे, तां व्यवस्था तिन्हेरे का ना होणे पर बी से अपणे तांई अप्पु इ व्यवस्था हिन। 10 से व्यवस्था री गल्लां अपणे-अपणे दिलां बिच लिख्खेरी दसदे ते तिन्हेरे अतंर-आत्मा बी ए गल्ल बोलदी, ते तिन्हेरे गल्लां अप्पु ई इल्जाम बी लांटी ते बेकसुर ठेहरांटी; 11 जिस दिन परमेश्वर मेरी खुसखबरी रे मुताबक यीशु मसीह जी रे जरिए म्हणुआं री लिके री गल्लां रा हसाब करणा। 12 जे तु यहूदी केहलांदा, ते व्यवस्था पर भरोसा रखदा, ते परमेश्वर रे बारे घमंड करदा, 13 ते तिन्हेरी इच्छा जाणदा ते व्यवस्था री शिक्षा पाई करी खरी-खरी गल्लां जो पसंद करदा; 14 ते अप्पु पर भरोसा रखदा की मै अन्नेयां जो रस्ता दसणे वाळा ते न्याहरे बच पे रे लोकां री रौशनी, 15 ते नासमजां जो सखाणे वाळा, ते बच्चेयां जो सखाणे वाळा; ते ज्ञान, ते सच्चाई रा उदारण, जे व्यवस्था बिच है, मेरे जो मिले रा ऐ। 16 अते क्या जे तु दुज्जेयां जो सखांदा, अप्पु जो नी सखांदा? तु जे चोरी ना करणे जो बोलदा, अप्पु ई चोरी करदा?

### यहूदी ते व्यवस्था

17 तु जे बोलदा 'व्यभिचार मत करदे, क्या अप्पु ई व्यभिचार करदा? तु जे मुर्तियाका नफरत करदा, क्या अप्पु ई देहरे जो लुटदा? 18 तु जे व्यवस्था रे बारे बिच घमंड करदा, क्या व्यवस्था नी मन्नि करी परमेश्वर री बेज्जति करदा?' 19 किजोकी तुसां री वजह कने होर जातियां बिच परमेश्वर रे ना री बेज्जति कित्ति जांटी, जिय्यां लिख्खे रा बी है। 20 जे तु व्यवस्था पर चले तां खतने का फैदा ता है, अपण जे तू व्यवस्था जो नी मन्ने तां तेरा खतना बिन खतने री हालत बिच रेया। 21 इस तांई जे बगैर खतने वाळा म्हणु व्यवस्था री गल्लां जो मन्नेया करे, ते क्या तिसेरी बगैर खतने री हालत खतने रे बराबर नी गिणी जाणी? 22 ते जे म्हणु सरिरी तौर पर बगैर खतने रे रेया जे अगर से व्यवस्था जो पुरा करे, ते क्या तेरे जो जिसजो चिड्डियां मिली ते खतना कित्ते जाणे पर बी व्यवस्था जो नी मनदा, गलत नी ठेहराणा? 23 किजोकी यहूदी से नी जे सामणे-सामणे यहूदी है; ते ना से खतना है जे सामणे-सामणे है ते सरिरी बिच है। 24 अपण यहूदी से ई है जे मन बिच है; ते खतना सेइ है जे मन बिच ते आत्मा बिच है, ना की चिड्डियां रा; इदेय जणे री तारिफ म्हणुआं रे पाससे का नी अपण परमेश्वर रे पाससे का हुंटी। 25 अते यहूदी री क्या बडा ई या खतने रा क्या फैदा? 26 हर तरिके कने मता किछ। पैले ता ए की परमेश्वर री गल्लां तिन्हा जो दित्ते गे। 27 जे कोई धोखेबाज निकले बी ता क्या होया? क्या तिन्हेरे धोखेबाज होणे री वजह कने परमेश्वर री सच्चाई बेकार ठेहरणी? 28 बिल्कूल बी नी! बल्कि परमेश्वर सच्चा ते हर इक्क म्हणु झुटा ठेहरे, जिय्यां लिख्खे रा है, "जिस कने तु अपणी गल्लां बिच धर्मी ठेहरे ते ईसांफ करदे वेले तु जीत हासिल करे।" 29 इस तांई जे हमारा अधर्म परमेश्वर री धार्मिकता ठेहराई दिंदा, तां फिरी असी क्या बोलण? क्या ए की परमेश्वर जे गुस्सा करदा ना-ईसांफी है? (ए ता मै म्हणुआं री तौर-तरिके कने बोलेया करदा है)।

3 बिल्कूल बी नी! नी ता परमेश्वर ने दुनिया रा हसाब किय्यां करणा? 2 जे मेरे झूट री वजह कने परमेश्वर री सच्चाई तिन्हेरी महीमा तांई, बधी करी सामणे आई तां फिरी किजो पापी सांहुई सजा रे काबल ठेहराया जांदा? 3 असी किजो बुआई ना करण की भलाई निकले? जिय्यां अस पर ए इल्जाम लाया बी जांदा, ते किछ बोलदे की इन्हा रा ए इ बोलणा है। अपण इदेयां रा गुन्हेगार ठेहरणा ठीक है। 4 तां फिरी क्या होया? क्या असी तिन्हा का खरे हिन? कदी नी; किजोकी असी यहूदी ते युनानी दोन्नां पर ए इल्जाम लाई चुके रे हिन की से सारे रे सारे पाप रे बस बिच हिन। 5 जिय्यां लिख्खे रा है: "कोई धर्मी नी, इक्क बी नी। 6 कोई समजदार नी; कोई परमेश्वर जो तोपणे वाळा नी। 7 सारे भटकी गे हिन, सारे रे सारे निक्कमे बणी गे रे हिन; कोई खरा कम्म करणे वाळा नी, इक्क बी नी। 8 तिन्हेरा गळा खुली कबर है, तिन्हा ने अपणी जीबां कने धोखा कित्ते रा है, तिन्हेरे होटां बिच साँपा रा जैह है।

### कोई धर्मी नी है

9 तिन्हेरा मुँह बद्दुआ ते कड़वाट कने भरे रा है। 10 तिन्हेरे पैर खून बहाणे जो फुर्तिले हिन, 11 तिन्हेरे रस्तेआं बिच नाश ते दर्द है। 12 तिन्हा ने भलाई रा

नी जाणेया। 13 तिन्हेरी हखॉं रे सामणे परमेश्वर रा डर नी है।" 14 असी जाणदे की व्यवस्था जे किछ बी बोलदी तिन्हा जो ई बोलदी जे व्यवस्था रे थले हिन: इस तांई हर इक्क मुँह बंद कित्ता जाए ते सारी दुनिया परमेश्वर री सजा रे जोगे रेय: 15 किजोकी व्यवस्था रे कम्मां कने कोई इन्सान तिन्हेरे सामणे धर्मी नी ठेहरणा, इस तांई की व्यवस्था री वजह कने पाप री पहचान हुंटी। 16 अपण अवे व्यवस्था का अलग परमेश्वर री से धार्मिकता सामणे आई री है, जिसेरी ग्वाई व्यवस्था ते भविष्यत्ता दिंदे। 17 मतलब परमेश्वर री से धार्मिकता जे यीशु मसीह जी पर भरोसा करणे के कने सारे विश्वासियां तांई है किजोकी किछ भेद नी; 18 ईधेरे तांई की सारेयां ने पाप कित्तेया ते परमेश्वर री महीमा का छुड़की गे रे हिन, 19 अपण तिन्हेरे अनुग्रह कने तिस छुटकारे रे जरिये जे मसीह यीशु बिच है पुरे पुरे तरिके कने धर्मी ठेहराये जांदे। 20 तिसजो परमेश्वर ने तिन्हेरे खून री वजह कने इक्क इदेया मन फिराव ठेहराया, जे भरोसा करणे कने काम्म करदा, कि जे पाप पैले कित्ते गे ते जिन्हेरे पर परमेश्वर ने अपणे सहन करणे री वजह कने ध्यान नी दित्ता। तिन्हेरे बारे बिच से अपणी धार्मिकता सामने लाए।

### विस्वास रे जरिये धार्मिकता

21 बल्कि इसि वेले तिन्हेरी धार्मिकता सामणे आई जाए की जिस कने से अप्पु ई धर्मी ठेहरी जाए, ते जे यीशु जी पर भरोसा करे तिसेरा बी धर्मी ठेहराणे वाळा हो। 22 तां घमंड करणा कुते रेया? तिसेरी ता जगह बी नी। कुण सी व्यवस्था री वजह कने? क्या कम्मां री व्यवस्था कने? नी, बल्कि भरोसे री व्यवस्था री वजह कने। 23 ईधेरे तांई असी इस अजांम पर पुजदे कि म्हणु व्यवस्था रे कम्मां का बखरा ई, भरोसे री व्यवस्था कने धर्मी ठेहरदा। 24 क्या परमेश्वर सिर्फ यहूदियां ई रा है? अन्यजातियां ना री? हाँ, अन्याजातियां रा बी है। 25 किजोकी इक्क ई परमेश्वर है जिन्हा ने खतनावालेयां जो बी ते बिना खतनावालेयां जो बि भरोसे कने ई धर्मी ठेहराणा। 26 तां क्या असी व्यवस्था जो भरोसे कने बेकार ठेहरादे? बिल्कूल बी नी अपण मजबूत करदे। 27 इस तांई असी क्या बोलण कि असां रे सरिरी प्यो अब्राहम जो क्या मिलेया? 28 किजोकी जे अब्राहम कम्मां कने धर्मी ठेहराया जांदा, तां उसजो घमंड करने रा मोक्का हुंदा, अपण परमेश्वर रे नेडे नी। 29 पवित्रशास्त्र क्या बोलदा? ए की अब्राहम ने परमेश्वर पर भरोसा कित्ता ते ए उस तांई धार्मिकता गिणेया गेया 30 कम्म करणे वाळे जो मजुरी दैणा दान नी अपण हक्क समजेया जांदा। 31 अपण जे कम्म नी करदा अपण बूरे जो धर्मी ठेहराणे वाळे पर भरोसा रखदा, तिसेरा भरोसा तिस तांई धार्मिकता गिणेया जांदा।

### अब्राहम रा उदारण

4 जिसजो परमेश्वर बगैर कम्मां रे धर्मी गिणदा, तिसजो दाऊद बी धन बोलदा: "धन हिन से जिन्हेरा अधर्म माफ कित्ते गे, ते पाप ढके गे। 2 धन है से म्हणु जिसजो परमेश्वर पाप्पि ना ठेहराए।" 3 तां ए धन वचन, क्या खतने वालेयां तांई ई है या बगैर खतने वालेयां तांई बी है? असी ए बोलदे, "अब्राहम तांई तिसेरा भरोसा धार्मिकता गिणेया गेया।" 4 तां ए धन वचन, क्या खतने वालेयां तांई ई है या बगैर खतने वालेयां तांई बी है? असी ए बोलदे, "अब्राहम तांई तिसेरा भरोसा धार्मिकता गिणेया गेया।" 5 तां से किय्यां गिणेया गेया? खतने री हालत इच या बिना खतने री हालत बिच? खतने री हालत बिच नी अपण बिना खतने री हालत बिच। 6 तिनिए खतने री निसानी पाई की तिस भरोसे री धार्मिकता पर छाप होई जाए जे तिनिए बिना खतने री हालत बिच रखेया थिया, जिस कने से तिन्हा सारेयां रा प्यो ठेहरे जे बिना खतने री हालत बिच भरोसा रखदे ताकी से बी धर्मी कहलाए; 7 अते तिन्हा खतने वालेयां रा प्यो ठेहरे, जिन्हा ने ना सिर्फ खतना कराया अपण हमारे प्यो अब्राहम रे भरोसे री तिस लीक पर बी चलदे जे तिनिए इना खतने री हालत बिच कित्ता थिया। 8 किजोकी ए वादा की से दुनिया रा वारिस होणा, ना अब्राहम जो ना तिसेरे वंश जो व्यवस्था रे जरिए दित्तेया गेया थिया, अपण भरोसे री धार्मिकता रे जरिए दित्तेया गेया थिया। 9 किजोकी अगर व्यवस्था वाळे वरिस हिन, तां भरोसा बेकार ते वादा नाकामयाब रेया। 10 व्यवस्था ता गुस्सा पैदा करदी, ते जित्ते व्यवस्था नी उते तिसेरा तोड़णा बी नी। 11 इस

ताई वादा भरोसे पर है की करुणा रे मुताबक हो,कि ओ तिन्हेरे सारे वंशजा ताई मजबूत हो,ना की उस ताई जे व्यवस्था वाळा है अपण उस ताई बी जे अब्राहम साई भरोसे वाळे हिन:से ई तां सारेयां रा प्यो है, 12 जिय्यां लिख्खे रा है,“मे तेरे जो मती जातियां रा प्यो ठैहराए रा है”-तिस परमेश्वर रे सामणे जिस पर तिनिए भरोसे कित्ते रा है,ते मरे रे लोकां जो जिन्दा करदा,ते जे गलां है ई नी तिन्हेरा नां ईय्यां लिदां जिय्यां से हिन।

### विस्वास रे जरिये वादे रा पुरा होणा

13 तिनिए नाउम्मिदी बिच उम्मिद रख्खि करी भरोसा कित्ता,इस ताई कि तिस वचन रे मुताबक कि,तेरा वंश इदेया होणा,” से मती जातियां रा प्यो हो। 14 से जे इक्क सौ साले रा थिया,अपणे मुर्दे जदेय सररीर का ते सारा रे गर्भ री मरी री हाल्त दिख्खि करी बी भरोसे बिच कमजोर नी होया, 15 ते ना इ अविश्वासी होई करी परमेश्वर रे वादे पर शक कित्ता,अपण भरोसे बिच मजबूत होई करी परमेश्वर री महीमा कित्ति; 16 ते पक्का जाणी लिक्ता की जिस गल्ल रा तिन्हा ने वादा कित्ता,ओ तिसजो पूरा करणे रे बी काबल हिन। 17 इस ताई ए तिस ताई ए धार्मिकता गिणेया गया। 18 ते ए वचन,भरोसा तिस ताई भरोसा गिणेया गया,“ना सिर्फ उस ताई रखेया गया, 19 बल्कि असी ताई बी जे जिन्हेरे ताई भरोसा रखणा धार्मिकता गिणेया जाणा,मतलब असां ताई जे तिन्हा पर भरोसा रखदे जिन्हा ने असां रे प्रभू यीशु जी जो मुर्देंयां बिच का जिन्दा कित्ता। 20 ओ असां रे पाप्यां ताई पकड़ाए गे,ते असां रे धर्मी ठैहराणे ताई जिन्दे बी कित्ते गे। 21 अते जां असी भरोसे कने धर्मी ठैहरे,तां अपणे प्रभू यीशु मसीह जी रे जरिए परमेश्वर कने मेल रखिए, 22 जिसेरे जरिए भरोसे कने इस करुण बिच जिसेरे बिच असी बणे रे हिन,असां री पोहंज बी होई,ते परमेश्वर री महीम री उम्मीद पर घंमड करण। 23 सिर्फ ए इ नी,अपण असी मुसिबतां बिच बी घंमड करण,ए जाणी करी की मुसीबतां कने सबर, 24 ते सबर कने खरा बनणा,ते खरा बनणे कने उम्मीद पैदा हूंदी; 25 ते उम्मीद कने शर्म नी हूंदी,किजोकी पवित्रा-त्मा जे असां जो दिक्ता गे रा है तिसेरे जरिए परमेश्वर रा प्यार हमारे मनां बिच पाया गे रा है।

### परमेश्वर कने मेल

5 किजोकी जां असी कमजोर इ थिये,तां मसीह ठीक क्त पर पापियां ताई मरेया। 2 कुसकी धर्मी म्हणु ताई कोई मरे ,ए ता दुर्लभ है;अपण होई सकदा कि कुसकी धर्मी म्हणु ताई कोई मरणे री हिम्मत बी करे। 3 अपण परमेश्वर असां पर अपणे प्यार री भलाई इस तरिके कने पेस करदे की जां असी पाप्पि इ थिये ताई मसीह असां ताई मरे। 4 अते जां असी अवे तिन्हेरे खून रे जरिए धर्मी ठैहरे ,तां तिन्हेरे जरिए परमेश्वर रे गुस्से क किजो नी बचगे? 5 किजोकी दुश्मनी बिच तिन्हेरे पुत्तर री मौत रे जरीए हमारा मेल परमेश्वर कने होया,तां मेल होई जाणे पर तिन्हेरी जिन्दगी री वजह कने असी छुटकारा किजो नी पाणा? 6 सिर्फ ए इ नी,अपण असी अपणे प्रभू यीशु मसीह जी रे जरिए ,जिन्हेरे जरिए हमारा मेल होए रा है,परमेश्वर बिच खुसी मणादे। 7 इस ताई जियां पाप इक्क म्हणु रे जरिए इस दुनिया बिच आया,ते पाप रे जरीए मौत आई,ते इस तरिके कने मौत सारे लोकां बिच फैलि गई,किजोकी सारेयां ने पाप कित्तेया। 8 व्यवस्था रे दिक्ते जाणे तिकर पाप जगत बिच ता थिया,अपण जित्ते व्यवस्था नी उक्ते पाप गिणेया नी जांदा। 9 तां बी आदम का ले इ करी मुसा तिकर मौत ने तिन्हा सारेयां ने पर राज कित्ता,जिन्हा ने तिस आदम जे आणे वाळे री निसानी है,ते अपराध रे बराबर पाप नी कित्ता। 10 अपण जदेइ अपराध री दशा है तदेई करुणा रे वरदान री नी है,किजोकी जां इक्क म्हणु रे अपराध कने मते मरे ,तां परमेश्वर री करुणा ते तिन्हेरा दान जे इक्क म्हणु रे ,मतलब यीशु मसीह जी री,करुणा कने होया मते सारे लोकां पर बड़ा बहिध करी होया। 11 जदेया इक्क म्हणु रे पाप करणे रा फल होया,तियां ई दान री दशा नी,किजोकी इक्क इ रे वजह कने सजा रे हुकम रा फैसला होया,अपण मते सारे अपराधां री वजह कने सजा रे हुकम रा फैसला होया,अपण मते सारे अपराधां री वजह कने इक्क ऐसा वरदान पैदा होया जिस कने सारे धर्मी ठैहराए जाण।

### आदम रे जरिये मौत - मसीह रे जरिये जिन्दगी

12 किजोकी जां इक्क म्हणु रे अपराध री वजह कने मौत ने तिस इक्क इ रे जरिए सारेयां पर राज कित्ता,तां जे लोक करुण ते धर्मरूपी वरदान बहिध-चढ़ी करी पांटे से इक्क म्हणु रे,मतलब यीशु मसीह जी रे जरिए हमेसा री जिन्दगी बिच जरुर राज करगे। 13 इस ताई जियां इक्क अपराध सारे म्हणुआं ताई सजा रे हुकम री वजह बणेया,तियां ई इक्क धर्म रा कम्म भी सारे म्हणुआं ताई जिन्दगी ताई धर्मी ठैहराए जाणे री वजह बणेया। 14 किजोकी जियां इक्क म्हणु रे गल्ल ना मनणे री वजह कने मते सारे लोक पापि ठैहरे,तियां ई इक्क म्हणु रे गल्ल मनणे री वजह कने मते सारे लोक धर्मी ठैहरणे। 15 व्यवस्था बिच आई गी की पाप मता हो,अपण जित्ते पाप मता होया यक्ते करुण उसका बी जादा होई, 16 कि जियां पाप ने मौत फैलादे होए राज कित्ता,तियां ई हमारे प्रभू यीशु मसीह जी रे जरिए करुणा बी हमेसा री जिन्दगी ताई धर्मी ठैहरादे होए राज करे। 17 ता फिरी असी कै बोलन? कै असी पाप ई करदे रँह ताकि परमेश्वर री दया बड़ी हो? 18 बिल्कुल नी, असी जे पाप ताई मरी गेरे हिन ता फिरी अगे उस बिच किजो जिंदगी जीण? 19 कै तुसी नी जाणदे, कि असी जिन्हा ने यीशु मसीह बिच बपतिस्मा लिक्तेया है ता उसेरी मौत रा ई बपतिस्मा लिक्तेया है। 20 इधेरे ताई उसेरी मौत बिच बपतिस्मा लैणे कने असी बी तिसेरे कने दब्बी दिक्ते गे, ताकि जिय्यां परम पिता री महिमामय सक्ति ने यीशु जी जो मरे रेयां बिच का जिंदा करी दिक्तेया थिय्या, तिय्यां ई असा जो बी नौई जिंदगी मिलो। 21 किजोकि जां असी उसेरी मौत बिच तिसेरे कने रेह ता उसेरे साहई फिरी जिंदा होई जाणे पर बी तिस कने ई रेह्ना।

### पाप ताई मुर्दा : मसीह ताई जिन्दे

6 असी एह जाणदे कि असा रा पुराणा हाव-भाव यीशु जी कने ई सूळी पर चढ़ाई दिक्तेया गया थिय्या ताकि म्हारे पापी सररीर खत्म होई जाये। अक्ते असी अगे ताई पाप रे गुलाम नी बणी रेह्ना। 2 किजोकि जे मरी गया तिस जो पाप रे बन्धन का छुटकारा मिली गया। 3 इधेरे ताई जे असी मसीह कने मरी गे, ता म्हारा विस्वास है कि असी तिसेरे कने जीणा बी। 4 असी एह जाणदे हिन, कि मसीह जिस जो कि मरे रेयां बिच का जिंदा कित्तेया थिय्या अमर है। तिस पर मौत रा वस कदी नी चलणा। 5 किजोकि से जे मरी गया ता म्हारे पापां ताई इक्क ई बरी मरी गया, अपण जे जिंदा है, ता परमेश्वर ताई जिंदा है। 6 इय्यां ई तुसी बी अपणे ताई बी सोचो कि तुसी पाप ताई मरी गेरे हिन अपण मसीह बिच परमेश्वर ताई जिंदा हिन। 7 इधेरे ताई पाप तुम्हारे खत्म होई जाणे वाळे सररीर बिच राज नी करे। ताकि तुसी पाप री मर्जी पर कदी नी चलो। 8 अते ना अपणे जिस्म जो अधर्म रे कम्मा री सेवा ताई हवाले करो, बल्कि अपू जो मरे रेयां बिच का जिंदा होये रा समझी करी परमेश्वर रे हवाले करी देयो। 9 तुसा पर पाप रा राज नी होणा। किजोकि तुसी नियमां रे सहारे नी जिंदा बल्कि परमेश्वर री दया रे सहारे जिंदा हिन। 10 ता असी कै करन? कै असी पाप करन? किजोकि असी पाप रे थल्ले रेहई करी नी बल्कि परमेश्वर री दया रे थल्ले रेहई करी जिंदा हिन। बिल्कुल ई नी। 11 कै तुसी नी जाणदे कि जां तुसी कुसकी रा हुकम मनणे ताई अपू जो सेवक रे रूप बिच उसेरे हवाले करदे ता तुसी सेवक हिन। फिरी चाये तुसी पाप रे सेवक बणो, जिन्ने तुम्हारे जो मारी रखणा अक्ते चाये हुकम मनणे वाळे रे, जिन्ने तुम्हारे जो धार्मिकता री तरफ लेई जाणा। 12 अपण प्रभु रा सुकर हो कि जे तुसी पाप रे सेवक थिय्ये तां बी तुसा ने अपणे मन का उस सिक्सा जो मन्नेया है जिस जो तुम्हारे हवाले कित्तेया है। 13 तुसा जो पापां का छुटकारा मिली गया अक्ते तुसी धार्मिकता रे सेवक बणी गे हिन। 14 मैं तुम्हारी सारिरिक कमजोरियां री वजह कने मल्लुआं रे तौर-तरिके पर बोलदा। जियां तुसी अपणे सररीर रे हिस्सेयां जो बुरे कम्मां ताई भिडे अक्ते बुरे कम्मां रे सेवक करी के हवाले करी दिक्तेया थिय्या, तिय्यां ई अवे अपणे हिस्सेयां जो पवित्रता ताई धर्म रे सेवक करी के हवाले करी दो।



## धार्मिकता रे दास

15 किजोकि जां तुसी पाप रे सेवक थिये ता धार्मिकता री तरफ का तुसा पर कोई बन्धन नी थिया। 16 इधेरे ताई जिन्हा गल्लां का अबे तुसी शर्मिन्दा हून्दे हिन, उन्हा का उस बेले तुम्हारे जो कै फल मिलेया? 17 किजोकि उन्हेरा अंत ता मौत है अपण अवे तुम्हारे जो पाप का छुटकारा मिली गया है अत्ते परमेश्वर रे सेवक बणी करी तुम्हारे जो जे फल मिलेया जिस कने पवित्रता मिलदी, अत्ते उसेरा अंत अन्नत जिंदगी है। 18 किजोकि पाप री मजदूरी ता मौत है, अपण परमेश्वर रा वरदान म्हारे प्रभु यीशु मसीह बिच अन्नत जिंदगी है। परमेश्वर रा मुफ्त रा वरदान है। 19 ओ मेरे भाइयों, कै तुसी जाणदे मैं नियमां जो मनणे वाल्या जो बोलदा, कि जां ताई मल्लु जिंदा है, तां ताई उस पर नियमां रा राज रहैन्दा? 20 किजोकि बियाहतिरी जनानी अपणे लाडे कने नियमां रे हिसाब कने तां ताई बहतिरी है जां ताई से जिंदा है जे तिसेरा लाडा मरी जांदा, ता से ब्याह जो लेईकरी नियमां का छुट्टी जांदी। 21 इधेरे ताई लाडे रे जिंदा जी जे कुसकी होर मल्लु कने रिश्ता रखन ना ता तिस जो व्यभचारिणी बोलेया जांदा अत्ते जे उसेरा लाडा मरी जांदा ता ब्याह जो लेईकरी नियम तिस पर नी लगदा अत्ते इधेरे ताई जे से दूजे मल्लु री होई जांदी तां बी से व्यभचारिणी नी है। 22 ओ मेरे भाइयों, इय्यां ई मसीह रे सरीर रे जरिये नियमां ताई तुसी बी मरी गेरे हिन। इधेरे ताई अवे तुसी बी इक दूजे कने नाता जोड़ी सकदे। उस कने जिस जो मरे रेयां बिच का जिंदा कित्तेया गेया: ताकि परमेश्वर ताई फल लियांन। 23 किजोकि जां असी इंसानी स्वभाव रे हिसाब कने जिया करदे थिये ता म्हारे पाप करणे रे इरादे जे नियमां का आये थिये, म्हारे सरीर रे अंगा पर हावी थिये। ताकि असी अपणे कम्मां री इदेयी खेती करन जिसेरा अंत मौत है।

## ब्याते री जिन्दगी रा उदारण

7 अपण अवे म्हारे जो नियमां का छुटकारा देई दित्तेया है किजोकि जिन्हा नियमां रे नीचे रेहई करीअसा जो कैदी बणाया थिय्या, असी उसेरे ताई मरी गेरे हिन। ते अवे पुराणे लिखे रे नियमां का नी, बल्कि आत्मा रे नोये तौर-तरिके कने प्रेरित होई करी असी अपणे मालक परमेश्वर री सेवा करदे हिन। 2 ता फिरी असी कै बोलन? कै नियम पाप हिन? बिल्कुल बी नी! जे बी हो जे नियम नी हुन्दे ता मिंजो पता बी नी लगणा थिय्या कि पाप कै है? जे नियम नी दसदे कि लालच मत कर ता मैं लालच जो नी जाणदा। 3 अपण पाप ने मौका पाई करी हुकमां जरिये मेरे बिच हर तरह रा लालच पैदा कित्तेया, किजोकि बगेर नियमां रे पाप मुर्दा है। 4 मैं ता नियमां बगेर पैले जिंदा थिय्या, अपण जा नियमां रा हुकमा आया ता पाप जी गया, ते मैं मरी गया। 5 अत्ते सेहई हुकम जे जिंदगी देणे ताई थिय्ये, मेरे ताई मौत लेई आये। 6 किजो कि पाप ने मौका पाई करी पाप रे जरिये मिंजो बहकाया, अत्ते उसेरे ई जरिये मिंजो मारी बी दित्तेया।

## व्यवस्था ते पाप

7 इधेरे ताई परमेश्वर रे नियम पवित्र हिन, अत्ते हुकम बी भले ते ठीक हिन। 8 ता फिरी इसेरा मतलब एह होया कि जे भला है, सेहई मेरी मौत री वजह बणेया? बिल्कुल नी! बल्कि पाप उस भली चीज रे जरिये मेरे ताई मौत री वजह इधेरे ताई बणेया कि पाप जो पछाणेया जाई सके, अत्ते हुकमां रे जरिये पाप बड़ा ई पापमय दिखाया जाई सके। 9 किजोकि असी जाणदे कि परमेश्वर रे नियम आत्मिक हिन, अपण मैं सरीरिक अत्ते पाप रे हत्थ बिके रा है। 10 मैं नी जाणदा कि मैं कै करेया करदा है किजोकि जे मैं करणा चाहन्दा से, नी करदा, बल्कि मिंजो से करणा पैदा जिस का मिंजो नफरत है। 11 अत्ते जे मैं सेहई करदा जे मैं करणा चाहन्दा ता मैं मनदा कि परमेश्वर रे नियम भले हिन। 12 अपण असलियत बिच से मैं नी है जे एह सब करेया करदा है, बल्कि एह मेरे अन्दर बसे रा पाप है। 13 हाँ, मैं एह जाणदा कि मेरे बिच मतलब मेरे सरीर बिच कोई खरी चीज वास नी करदी। नेकी करणे री मर्जी ता मेरी है अपण नेक कम्म मेरे का नी हुन्दा।

## महणु री अदरुनी लड़ाई

14 किजोकि जे खरा कम्म मैं करणा चाहन्दा मैं नी करदा बल्कि जे मैं नी करणा चाहन्दा, सेहई बुरे कम्म मैं करदा। 15 अत्ते जे मैं सेहई करदा जिन्हा जो मैं नी करणा चाहन्दा ता असलियत बिच उन्हा जो करणे वाला जे उन्हा जो करेया करदा है, मैं नी है, बल्कि से पाप है जे मेरे अन्दर बसे रा है। 16 इधेरे ताई मैं अपणे बिच एह नियम दिखदा कि जां मैं खरा करणा चाहन्दा, ता मैं अपणे बिच बुराई जो ई दिखदा। 17 अपणी अन्तरात्मा बिच मैं परमेश्वर रे नियम का बड़ा खुस हुन्दा। 18 अपण अपणे सरीर बिच मैं इक दूजे ई नियम जो कम्म करदे दिखदा एह मेरी बुद्धि पर राज करणे वाले नियम कने लड़ाई करदा अत्ते मिंजो पाप रे नियम रा कैदी बणाई लिंदा जे मेरे सरीर रे हिस्से बिच है। 19 मैं इक अभागा मल्लु है! मिंजो इस मौत रे सरीर का कुन्ने छुडाणा? 20 अपणे प्रभु यीशु मसीह रे जरिये मैं परमेश्वर रा सुकर करदा! इधेरे ताई मैं अपु बुद्धि का ता परमेश्वर रे नियमां का, अपण मल्लु सरीर का पाप रे नियमां रा सेवक है। 21 इधेरे ताई अवे जेदे प्रभु यीशु मसीह बिच हिन् तिनहा पर सजा रा हुकम नी है: किजो कि से अवे सरीर रे साहबे नी अपण आत्मा रे साहब कने चलदे हिन। 22 किजो कि जिन्दगी री आत्मा रे कानून ने प्रभु यीशु जी ने मिन्जो पाप रे कानून बिच का अजाद करी दित्ते रा ऐ। 23 किजो कि जेड़ा कम्म सरीर री कमजोरी री वजह कने नी करी सकी, उस कम जो परमेश्वर ने कित्ता, मतलब की अपणे ई पुत्र जो पापमय सरीर रे बराबर बिच, अत्ते पाप तिकर बलिदान होणे ताई भेजकरी, सरीर बिच पाप री सजा रा हुकम दित्तेया। 24 इधेरे तिकर कि कानून रे तरिके कने असा जो जे सरीर रे साहबे नी बल्कि आत्मा रे साहबे चलदे हिन, पूरे कित्ते जान। 25 किजो कि दुनियायी स्भाव रा मल्लु सरीर री गल्लां पर मन् लगान्दे हिन; अपण आत्मिक मल्लु आत्मा री गल्लां पर मन् लगान्दे हिन।

## पवित्र आत्मा रे जरिये जिन्दगी

8 सरीर पर मन् लगाणा ता मौत है, अपण आत्मा पर मन लगाणा जिन्दगी अत्ते सान्ति है। 2 किजो कि सरीर पर मन लगाणा ता परमेश्वर कने बैर रखणा है, किजो कि ना ता परमेश्वर कानून रे थल्ले हिन ते ना ई होई सकदे हिन। 3 अत्ते जे सरीर री हालत बिच हिन्, से परमेश्वर जो खुस नी करी सकदे। 4 अपण जां कि परमेश्वर री आत्मा तुम्हारे बिच बसदा, ता तुसी दुनियायी स्भाव री हलात बिच नी, बल्कि आत्मिक हालत बिच हिन। जे कुसकी बिच मसीह रा आत्मा नी है ता से उसेरा बन्दा नी है। 5 अत्ते जे मसीह तुसा अन्दर है, ता सरीर पाप री बजह कने मरे रा है; अपण आत्मा धर्म री बजह कने जिन्दा है। 6 अत्ते जे उस्सी रा आत्मा जिन्ने यीशु जी जो मरे रेयां का जिन्दा कित्तेया तुसा बिच बसे रा है; ता जिन्ने मसीह जो मरे रेयां बिच का जिन्दा कित्तेया, से तुम्हारे खत्म होई जाणे वाले सरीर जो अपणी आत्मा रे जरिये जे तुम्हारे बिच बसे रा है जिन्दा करणा। 7 इधेरे ताई ओ भाइयों, असी सरीर रे कर्जदार नी हिन्, कि असी सरीर रे साहबे दिन गुजारन्। 8 किजो कि जे तुसी सरीर रे साहबे दिन गुजारगे, ता मरगे, जे आत्मा कने सरीर रे कम्मां जो मारगे, ता जिन्दा रह्ये। 9 इधेरे ताई जे परमेश्वर री आत्मा रे साहब कने चलदे हिन, सेहई परमेश्वर रे पुत्र। 10 किजो कि तुम्हारे जो गुलाम री आत्मा नी मिली री है, कि तुसी फिरी डरन् अपण तुसा जो पुत्र गोद लेणे वाली आत्मा मिले री ऐ, जिस कने असी ओ ओ अब्बा, ओ पिता बोली करी बुलांदे हिन। 11 आत्मा अपु ई म्हारी आत्मा री गवाही दिन्दी कि असी परमेश्वर री औलाद हिन्। 12 ते जे औलाद हिन् ता वारस बी, बल्कि परमेश्वर रे वारस ते प्रभु यीशु मसीह रे कने वारस हिन्, जे असी तिस कने दुःख उठांदे ता तिस कने महिमा बी पान्। 13 किजो कि मैं समझदा कि इस बेले दुःख तकलिफां तिस महिमा रे सामणे जेड़ी असा पर जाहिर होणे वाली है, तिसेरे अग्रे किच्छ बी नि ए है। 14 किजो कि दुनिया बड़ी उमेद कने कने परमेश्वर रे पुत्र रे सामणे आपे ताई भाळदी है। 15 किजो कि दुनिया अपणी मर्जी कने नी अपण नीचा करणे वाले री तरफ का ओछेपन रे थल्ले इस उमेद कने कित्ती गई है। 16 कि दुनिया बी अपु ई विनास रे बंधन का छुटकारा पाई करी परमेश्वर रे बच्चेयां री महिमा री

अजादी कने अजादी पान् । 17 किजो असी जाणदे कि सारी दुनिया अबे तिक्कर पीड़ा बिच किलदी अत्ते तड़फदी है ।

### भविष्य बिच मिलणे वाळी इज्जत

18 अत्ते सेहई ई नी अपण असी बी जिन्हा जो आत्मा रा पैला फळ मिल्लेया है, अपणे अन्दर किलेया करदे हिन। किजोकि असा जो उसेरे जरिये पूरी तरह कने अपनाये जाणे री भाळ है कि म्हारे सरीर जो मुक्ति मिली जाणी। 19 इस उमेद कने म्हारा छुटकारा होए रा है अपण जिस चिज री उमेद किती जान्दी जे से सामणे आई जाओ, ता फिरी उमेद कुते रेई ? किजो जिस चिज जो महु दिखदा है तिसेरी क्या भाळ करणी ? 20 अपण जिस चिज जो असी नी दिखदे तिसेरी ही भाळ रखदे ते सबर कने तिसेरी भाळ बी करदे । 21 इस्सी तरिके कने आत्मा बी म्हारी कमजोरी विच म्हारी मद्दत करदी, किजो कि असी अपु नी जाणदे कि असा जो कुस तरिके कने प्राथना करनी चाएदी अपण आत्मा अपु ई शाहू भरी-भरी के जेडी बयान का बार है असा ताई मिन्नत करदा । 22 ते मना जो परखणे वाळा अपु ई जाणदा कि आत्मा रा विचार है क्या ? किजो कि से पवित्र मणुआं ताई परमेसवर री मर्जी रे साहब कने बिनती करदा। 23 असी जाणदे कि जेडे महु परमेसवर कने प्यार करदे तिन्हेरे ताई सारी गल्लां भलाई जो पैदा करदी मतलब तिन्हेरे ताई जेहडे उसेरी मर्जी रे हिसाब कने सद्दे गेरे हिन। 24 किजोकि जिन्हा जो उसने पैले का जाणी लिक्ते रा है तिन्हा जो पैले का चुणे रा बी है कि उसेरे पुत्र रे रूप बिच हो ताकि बडे सारे भाईयां बिच से बड्डा भाई बणी सकन। 25 जिन्हा जो तिन्नी पैले चुणेया तिन्हा जो सद्दे रा बी है अते जिन्हा जो सद्दे रा ऐ तिन्हा जो धर्मी बी बणाया ते तिन्हा जो महिमा बी दिक्ती। 26 अत्ते असी तिन्हा गल्लां रे बारे कै बोलन? जे परमेसवर म्हारी तरफ है ता म्हारे खिलाफ कुण होई सकदा? 27 जिन्नी अपणे पुत्र जो बी नी छड्डेया अपण उस जो असा सबनी ताई देई दिक्तेया, तिन्हा असा जो इस कने होर सब किच्छ किजो नी देंगा। 28 परमेसवर रे चुणे रेयां पर इल्जाम कुन्नी लगाणा? परमेसवर ई है जे उन्हा जो धर्मी ठहराणे वाळा है। 29 फिरी कुण है जे सजा रा हुकम दिंगा? मसीह ई है जे मरी करी जिंदा होई गेया अत्ते परमेसवर रे सज्जे पाससे है ते म्हारे ताई बिनती बी करदा। 30 कुण असा जो मसीह रे प्यार का अलग करी सकदा? कै दुख-तकलिफां या मुसिबतां, लड़ाई-झगडे, अकाल, नगांपन, खतरा या तलवार?

### परमेसवर रा प्यार

31 जिय्यां कि लिख्खे रा है तेरे ताई असी पूरी धियाडी मौत रा सामना करदे, असी बडणे वाळी भेडा साहई गिणे गेरे हिन। 32 अपण इन्हा सब गल्लां जो जिस ने असा कने प्यार किक्तेया जीत पाणे का बी बड्डी करी है। 33 किजोकि मैं पक्का जाणदा, कि ना मौत ना जिंदगी ना स्वर्गदूत ना स्वर्ग बिच रेक्के वाळे शासक, ना अज, ना आणे वाळा कल ना सक्ति ना ऊचाई, 34 ना कोई असा रे ऊपर ना कोई असा रे थले, ना दुनियां री कोई होर चीज असा जो प्रभु रे उस प्यार का, जे असा रे अन्दर प्रभु यीशु मसीह रे ताई है, असा जो बखरा करी सकगी। 35 मसीह बिच मैं सच बोलेया करदा है। मैं झूठ नी बोलदा अत्ते मेरी सही-गलत री समझ बी पवित्र आत्मा बिच गवाई दिदी। 36 कि मिंजो बडा दुख है अत्ते मिंजो बडी काहडी हुन्दी। 37 किजोकि मैं एह चाहन्दा थिय्या, कि अपणे भाइयां ताई जे सरीर रे भाव कने मेरे रिश्तेदार हिन तिन्हा ताई मैं मसीह रा श्राप अपणे ऊपर लेई लिंदा। 38 जे इस्त्राएली हिन अत्ते जिन्हा जो गोद लिक्ते रे बच्चे रा हक्क है, जे परमेसवर री महिमा रा दर्शन दिख्खी बैठे रे हिन, जे परमेसवर रे वादे रे साझी हिन। जिन्हा जो मूसा रे नियम, सच्ची भक्ति अत्ते वचन दिक्तेया गेया है। 39 पुरखे तिन्हा कने ई रिश्ता रखदे, अते मसीह बी सरीर भाव का उन्हा बिच का ई पैदा होया जो सब रा परमेसवर है अत्ते हमेसा धन्न है ! आमीन !

### परमेसवर ते तिन्हेरे चुणे रे लोक

9 अपण इय्यां नी है कि परमेसवर ने अपना वचन पूरा नी किक्तेया किजोकि जे इस्त्राएल रे वंश रे हिन, से सब इस्त्राएली नी हिन। 2 अत्ते ना ई से अब्राहम री औलाद होणे री वजह कने से सब सच्ची अब्राहम री

औलाद हिन। बल्कि (जिय्यां परमेसवर ने बोलेया) इसहाक का ई तेरा वंश मन्नेया जाणा। 3 मतलब एह नी एह कि कुदरती तरिके कने सरीर का पैदा होणे वाळे परमेसवर रे बच्चे हिन, बल्कि परमेसवर रे वचन का प्रेरित होणे वाळे उसेरा वंश मन्ने जांदे हिन। 4 वचन इस तरिके कने बोलेया गेया थिय्या, कि मैं इस बेल्हे रे हिसाब कने आणा, ते सारा रे पुत्र होणा। 5 अत्ते इत्तणा ई नी जां रिबका बी इक महु मतलब म्हारे पिता इसहाक का दुपराणी होई। 6 अत्ते हल्हे तिन्हेरे कोई बच्चा नी था, अत्ते ना तिन्हा ने किच्छ भला-बुरा किक्तेया थिय्या कि रिबका जो बोलेया गेया, "बड्डे मुन्डे ने छोटे मुन्डे री सेवा करणी।" 7 इधेरे ताई कि परमेसवर री से मर्जी पूरी सही हो जे उसेरे चुणे कने पूरी सही हुन्दी। अत्ते जे महु रे कम्मां पर नी टिकी री है बल्कि उस परमेसवर पर टिकी री है जे सद्दणे वाळा है। 8 पवित्र सास्त्र बोलदा, "मैं याकूब जो चुणेया अत्ते एसाव जो नकारी दिक्तेया।" 9 ता फिरी असी कै बोलन? कै परमेसवर अन्यायी है? बिल्कुल नी ! 10 किजोकि उस ने मूसा कने बोलेया थिय्या, "मैं जिस पर बी दया करणा चांगा, उस पर दया करी के दिखाणी। अत्ते जिस कुसकी पर मेहर करणा चाहन्गा, मेहर करणी।" 11 इधेरे ताई एह ना ता कुसेरी मर्जी पर निर्भर करदा अत्ते ना कुसेरी दौड़ धूप पर बल्कि दरदयाळू परमेसवर पर निर्भर करदा। 12 किजोकि शास्त्र बिच परमेसवर ने फिरौन कने बोलेया थिय्या, "मैं तिजो इधेरे ताई खडा किक्तेया थिय्या कि मैं अपनी सक्ति तेरे पर दिखाई सकां अत्ते मेरे नाम पूरी धरती पर लिक्तेया जाये।" 13 इधेरे ताई परमेसवर जिस पर चाहन्दा दया करदा अत्ते जिस जो चाहन्दा तिस जो सख्त बनाई दिंदा। 14 ता फिरी तू मेरे कने बोलणा, "जे म्हारे कम्मां जो काबू करणे वाळा परमेसवर है ता उस बिच म्हारी गलती किजो समझदा?" आखिरकार उसेरी मर्जी रे खिलाफ कुण होई सकदा? 15 महु कुण हुन्दा जे परमेसवर जो हटि करी जवाब दे? कै कोई बणी री चीज अपणे बणाणे वाळे का पूछी सकदी, "तू मिंजो इदेया किजो बणाया?" 16 कै कुसकी कुम्हार जो मिट्टी पर एह हक्क नी है कि से कुसकी मिट्टी रे पैडे का इक भांडा खास जरूरत ताई अत्ते दूज्जा बेकार जरूरत ताई बणाये? ता इस बिच कुण जदेयी हरानगी री गल्ल है? 17 कि परमेसवर ने अपना गुस्सा दिखाणे ताई अत्ते अपनी सक्ति जो जताणे ताई उन्हा भांडेया री, जे गुस्से रे लायक थिय्ये बडे सबर कने बरदाश किक्ती, 18 उसने उन्हा जो इधेरे ताई बरदाश किक्तेया ताकि से उन्हा भांडेया रे फायदे ताई जे दया रे लायक थिय्ये जिस जो उस ने अपनी महिमा ताई बणाया थिय्या, उन्हा पर अपनी महिमा रे धन जो सामणे लियाई सके।

### परमेसवर रा गुस्सा ते तिन्हेरी दया

19 मतलब असी जिन्हा जो तिस ने ना सिरफ यहूदियां बिच का सद्देया बल्कि गैर यहूदियां बिच का भी सद्देया। 20 जिय्यां कि होशे री कताब बिच लिख्खे रा है: जे महु मेरे नी थिय्ये उन्हा जो मैं अपना बोलणा।, जनानी जे प्यारी नी थी मैं उस जो प्यारी बोलणा।" 21 "अत्ते तिय्यां ई होणा जिय्यां उस जगह बिच उन्हा कने बोलेया थिय्या, तुसी लोक मेरी प्रजा नी हिन।" तिते ई तिन्हा जो जिंदे परमेसवर रे बच्चे बोलणा।" 22 अत्ते यशायाह इस्त्राएल रे बारे रोई करी बोलदा: जे इस्त्राएल रे बच्चे समुन्द्र री बालू रे कण साहई अणगिणत हिन ता बी तिन्हा बिच का थोडेया ने ई बचणा। 23 किजोकि प्रभु ने धरती पर अपणे न्याय जो पूरी तरह कने जल्दी ई पूरा करणा।" 24 अत्ते जिय्यां कि यशायाह ने भविष्यवाणी किक्ती थी, "जे सबका सक्तिसाली म्हारे ताई वंशज नी छडदे ता असी सदोम जदेय अत्ते अमोरा साहई होई जांदे।" 25 ता फिरी असी कै बोलन? असी इस नतीजे पर पुज्जे हिन कि होर जाति रे लोकां जो जे धार्मिकता री तोप बिच नी थिय्ये, तिन्हा ने धार्मिकता जो पाई लिक्तेया मतलब उस धार्मिकता जो जे विस्वास कने है। 26 अपण इस्त्राएल रे महु; जे धर्म रे नियमां री तोप करदे उन्हा नियमां तक नी पूज्जे। 27 किजो नी? किजोकि से उस जो विस्वास कने नी बल्कि अपणे कम्मां कने उन्हेरी तोप करदे थिय्ये, तिन्हा जो उस टोळ कने ठोकर लमी जे ठोकर दिंदा। 28 जिय्यां कि पवित्र सास्त्र बोलदा, "दिख्खो मैं सिंय्योन बिच इक पत्थर रखणा लगेया जिस कने ठोकर लगदी अत्ते इक टोळ जे अपराध करान्दी। अपण से जे उस पर विस्वास करदा तिस जो कदी निराश नी होणा।" 29 ओ मेरे भाइयां, मैं

चाहन्दा अत्ते में उन्हा सब ताई परमेश्वर कने प्राथना करदा कि उन्हेरा उद्धार हो,

### इस्त्राएल रा घट विस्वास

30 किजोकि मैं गवाई दिंदा कि उन्हा बिच परमेश्वर ताई जोश है। अपण से ज्ञान पर नी टिके रा है, 31 किजोकि से उस धार्मिकता जो नी जाणदे थिये जे परमेश्वर का मिलदी अत्ते से अपणी ई धार्मिकता री स्थापना करणे री कोसिस करदे रेह इधेरे ताई तिन्हा ने परमेश्वर री धार्मिकता जो नी अपनाया। 32 मसीह ने नियमा जो खत्म कित्तेया ताकि हर कोई जे विस्वास करदा, परमेश्वर ताई धार्मिक हो। 33 धार्मिकता रे बारे जे नियम मिले, मूसा ने लिखखे हिन, "जे नियमां री धार्मिकता पर चलगा, तिस ने उसेरी वजह कने जिंदे रेह्ला।"

10 अपण विस्वास का मिलणे वाळी धार्मिकता रे बारे सास्त्र एह बोलदा, "तू अपणे का मत पुच्छ, 'स्वर्ग बिच कुण जांगा?' " (मतलब, "मसीह जो धरती बिच लियाणे ताई।") 2 "या, "थले पताल बिच कुण जांगा?" (मतलब, "मसीह जो मरे रेयां बिच का जिंदा करी के ऊपर लियाणे ताई।") 3 सास्त्र एह बोलदा, "वचन तेरे का, तेरे मूहा अत्ते तेरे मन बिच है।" मतलब विस्वास रा से वचन जिसेरा प्रचार असी करदे हिन। 4 कि जे तू अपणे मूह का बोलगा, "यीशु मसीह प्रभु है" अत्ते तू अपणे मन बिच एह विस्वास करे कि परमेश्वर ने उस जो मरे रेयां बिच का जिंदा कित्तेया ता तेरा उद्धार होई जाणा।

### सारेयां ताई छुटकारा

5 किजोकि धार्मिकता ताई मरने का विस्वास कित्तेया जांदा अत्ते अपणे मूह का उसेरे विस्वास जो मनणे कने उद्धार हुन्दा। 6 सास्त्र बोलदा, "जे कोई उस बिच विस्वास करदा तिस जो निराश नी होणा पैदा।" 7 एह इधेरे ताई है कि यहूदियां अत्ते गैर यहूदियां बिच कोई भेद नी हो किजोकि सब दा प्रभु ता इक ई है। अत्ते उसेरी दया उन्हा सब ताई है, जे उसेरा नाम लिंदे हिन, अम्परपार है। 8 "हर इक जे प्रभु रा नां लिंदा, तिस जो उद्धार मिलणा।" 9 अपण से जे तिस पर विस्वास नी करदे, तिस ने तिसेरा नां कित्यां लैणा? अत्ते से जिन्हा ने उसेरे बारे सुणेया ई नी, उस पर विस्वास कित्यां करणा? अत्ते फिरी भला जा ताई कोई उन्हा जो वचन सुनाणे वाळा नी हो, तिन्हा कित्यां सुणना? 10 अत्ते सिक्सा दैणे वाळा सिक्सा कुते का दे जां ताई तिन्हा जो भेजेया नी हो? जित्यां कि शास्त्र बिच बोलेया है: शुभ-बसेख लियाणे वाळे रे पैर किन्ने छैळ हिन।" 11 अपण सब ने शुभ-बसेख जो अपनाया नी। यशायाह बोलदा, "ओ प्रभु, उस शुभ-बसेख जो कुन्ने अपनाया?" 12 इधेरे ताई वचन जो सुणने कने विस्वास हुन्दा अत्ते वचन तां सुणेया जांदा जां कोई मसीह रे बारे सिक्सा दिंदा। 13 अपण में बोलदा, कै उन्हा ने म्हारे वचन जो नी सुणेया?" सुणेया ता है। शास्त्र बोलदा, "उन्हेरी अवाज पूरी धरती पर फैली गई अत्ते उन्हेरे वचन दुनिया रे इक कुणे का दुजे का कुणे तक पुञ्जी गया" 14 अपण में पुछदा, "कै इस्त्राएली नी समझदे थिये?" मूसा बोलदा; पैले में तुसा मल्लुआं रे मन बिच इदेय मल्लु रे जरिये जे असलियत बिच कोई जाति है नी, जलन पैदा करणी। मैं नासमझ जाति रे जरिये तुसा जो गुस्सा दुआणा। 15 फिरी यशायाह हिम्मत करी के बोलदा; मिंजो उन्हा मल्लुआं ने पाई लेया जे मिंजो नी तोपेया करदे थिये। मैं उन्हेरे ताई सामणे आई गया जे मिंजो पूछदे बी नी थिये।" 16 अपण परमेश्वर ने इस्त्राएलियां रे बारे बिच बोलेया, "मैं हर रोज हुकम नी मनणे वाळे अत्ते जे मेरे खिलाफ हिन तिन्हेरे अग्रे हन्थ फलाई रखखे।" 17 इधेरे ताई मैं बोलदा, कै परमेश्वर ने अपणी प्रजा जो छडी दित्तेया ? बिल्कुल बी नी! मैं बी ता इस्त्राएली मल्लु है; ते अब्राहम रे वंस ते बिन्यामीन रे गोत्तर बिच का है। 18 परमेश्वर ने अपणी तिस प्रजा जो नी त्यागोया, जिस जो तिन्हा ने पैले का ई जाणी लेरा है। कै तुसां जो पता नी है कि पवित्र सास्त्र एलियाह रे बारे अन्तर कै दस्दा, कि से इस्त्राएल रे खलाफ परमेश्वर रे छन्दे करदा ? 19 है प्रभु जी, तिन्हा ने तुसां रे भविष्यवक्तां जो मारी दित्तेरा है, अत्ते तुम्हारी बेदियां जो ढाहई दित्तेयाह; ते मैं ई कल्ला बचेरा है, ते से मेरी जान लैणे ताई मिन्जो बी तोपेया करदे हिन्।" 20 अपण परमेश्वर का तिस जो कै जवाब मिलेया ? "मैं अपु ताई सत्त हज़ार मरदां जो छड्डी

रखखेरा है, जिन्हा ने बाअल रे अग्रे जाह्नू नी टेके।" 21 बिल्कुल इहाँ ई इस बेले बी, दया कने चुणेरे किछ मल्लु रेहई गेरे हिन् ।

### इस्त्राएल पर परमेश्वर री दया

11 अगर ऐ अनुग्रह कने होएरा है, ता फिरी कम्मां कने नी; नी ता अनुग्रह फिरी अनुग्रह नी रेह्या। 2 इधेरे ताई नतीजा कै होया ? ऐ कि इस्त्राएली जिसेरी तोप्पा अन्तर थिये, से तिन्हा जो नी मिलेया; अपण चुणेरे मल्लुआं जो मिलेया, ते बाकी मल्लुआं जो ठोकर लगगी। 3 जदेह्या कि लिखखेरा है, "परमे ने तिन्हा जो अज़ रे दिन ताई घणी निन्दर अन्तर पाई रखखेरा है, ते इदेहई हाखियां दितीं जेहडी दिखी नि सकन अत्ते इदेह कन्न, जे सुणी ना सकन।" 4 ते दाऊद बोलदा, "तिन्हेरी रोटी तिन्हा ताई जाल्ला ते फां, अत्ते ठोकर ते सजा री वज़ा होई जाओ। 5 तिन्हेरी हाखियां पर न्हारा छाई जाओ ताकी से दिखखी ना सकन, ते तू हमेसा तिन्हेरी पिट्टी जो झुकाई रख।" 6 इधेरे ताई मैं बोलदा कै तिन्हा ने इधेरे ताई ठोकर खाई कि छुडकी पैन ? कदी बी नी! अपण तिन्हेरे छुडकणे री वजह कने होरसी जाती जो उद्धार मिलेया, कि इधेरी तिन्हा जो फुकाण होई जाओ। 7 इधेरे ताई अगर तिन्हेरा छुडकणा दुनिया ताई धन ते तिन्हेरा घाट्टा होरसी जाती ताई दोलत री वजह बणेया, ता तिन्हेरी भरपूरी कने कै किछ नी होणा। 8 मैं तुसा होरसी जाती जो एह गलां बोलदा। जां मैं होरसी जाती ताई प्रेरित है, ता मैं अपणी सेवा री बड़ाई करदा, 9 ताकी कुस्की तरीके कने मैं अपणे कुटुम्बियां अन्तर फुकाण पैदा करवाई करी तिन्हा बिच का केई जहेयां रा उद्धार करवां। 10 किजो कि जाँ तिन्हेरा त्यागी दित्तेया जाणा दुनिया रे मिलाप री वजह बणेया, ता कै तिन्हेरा ग्रैह कित्तेया जाणा मरी गेरेयां बिच का जिन्दे होई जाणे रे बराबर नी होणा ? 11 जाँ भेट रा पैला पेड़ा पवित्र ठेहेया, ता पूरा गुन्नेरा आटा बी पवित्र है; ते जां जड़ पवित्र ठेही, ता डाळ बी इदेहई हिन् । 12 पर अगर किछ डाळियां भन्नी दित्ती गेईयां, ते तू बणे रा जैतून होई करी तिन्हा अन्तर साट्टेया गया, ते जैतून री जड़ रे चिफले-पन रा हिस्सेदार होया,

### अन्यजातियां † रा छुटकारा : कलम लागे रा उदारण

13 ता डाळां पर घमण्ड मत करदा; ते अगर तू घमण्ड करो ता ऐ जाणी रख कि तैं जड़ा जो नी अपण जड़ ने तिजो सम्भालेरा है। 14 फिरी तैं बोलगा, "डाळ इधेरे ताई भन्ने गे कि मैं साट्टेया जां।" 15 ठीक है, से ता भरोसा नी होणे री वजह कने भन्नेया गेईयां, अपण तू भरोसे कने बणी रेहन्दा इधेरे ताई घमण्डी मत हो, अपण डर रखखेया कर, 16 किजोकी जां परमेश्वर ने इन्हा असली डाळां जो नी छड्डेया ता तिजो बी नी छड्डणा। 17 इधेरे ताई परमेश्वर री किरपा ते सख्ती जो दिखख! जेहडे छुडकी पे तिन्हा पर सख्ती, अपण तेर पर किरपा, अगर तू तन्हा अन्तर बणी रेह्यो, नी ता तू बी कटि दित्तेया जाणा। 18 से बी अगर भरोसे अन्तर नी रह्यो, ता साट्टे जाणे; किजोकी परमेश्वर तिन्हा जो फिरी साट्टी सकदे। 19 किजोकी अगर तू तिस जैतून का, जेहडा अपणे स्वभाव का जंगली है, कट्टेया गया ते स्वभाव रे खलाफ खरे जैतून अन्तर साट्टेया गया, ता ऐ जे स्वभाविक डाळ हिन, अपणे ई जैतून अन्तर किजो नी साट्टे जान्ने। 20 ओ भ्याळो, कुदखी इहाँ ना हो कि तुसी अपु जो समझदार समझी लेन; इधेरे ताई मैं नी चाहन्दा कि तुसी इस राज का अनजाण रेह्यो कि जां ताई अन्यजातियां पूरी तराह कने दाखिल नि होई जान, तां ताई इस्त्राएल रा इक हिस्सा इदेह्या ई सख्त रहैला है। 21 ते इस तरीके कने सारे इस्त्राएल ने उद्धार पाई लैणा। जिह्यां कि लिखखेरा है, "छुडणे वाळे ने सियोन का आणा, ते तिनि ए अभग्ती जो याकूब का दूर करणा; 22 ते तिन्हा कने मेरी ऐ ई वाचा होणी, जे मैं तिन्हेरे पापा जो दूर करी दैणा।" 23 खुसखबरी जो ध्यान अन्तर रखखी करी ता तुसां ताई से परमेश्वर रे दुस्मण हिन्, अपण चुणी लिच्ते जाणे री गल्ल जो ध्यान अन्तर रखखी करी से बब्ब-दाहेयां री वजह कने प्यारे हिन्। 24 किजो की परमेश्वर रे वरदान ते तिन्हेरी बुलाहट कदी टळी नी सकदी।

### सारे इस्त्राएल रा छुटकारा

25 किजोकी जिह्याँ तुसा पैले परमेश्वर रा हुकम नी मन्नेया, अपण अब्बे तिन्हेरे हुकम नी मनणे री वजह कने तुसां पर रैह्य होया; 26 तिह्याँ ई तिन्हा ने बी अवे हुकम नी मन्नेया, कि तुसां पर जे रैह्य हुन्दा इस कने तिन्हा पर बी रैह्य होई जाओ। 27 किजो कि परमेश्वर ने सबनी जह्येयाँ जो हुकम नी मनणे रे इल्जाम वाळा कैदी बणाई करी रखेया, ताकि से सब जह्येयाँ पर रैह्य करन। 28 आहा! परमेश्वर रा धन ते बुद्धी अते ज्ञान कितणे ई गम्भीर हिन् ! तिन्हेरे विचार कुदेह अथाह, ते तिन्हेरे रस्ते कुदेह अगम हिन् ! 29 “प्रभू जी री बुद्धी जो कुण जाणी सकेया ? या तिन्हेरा मन्त्री कुण बणी सकेया ? 30 या कुणिए पैले तिन्हा जो किछ दित्तेरा है जिसेरा बदला तिस दैणे वाळे जो दित्तेया जाओ ?” 31 किजो कि तिन्हेरे ई पास्से का ते तिन्हेरे ई जरिए, ते तिन्हा ताई सब किछ है। तिन्हेरी महिमा जुगां-जुगां ताई हुन्दी रेह्यो : आमीन। 32 इधेरे ताई ओ भ्याळो, मैं तुसां जो परमेश्वर रे रैह्य री याद दुआई करी तुम्हारे छन्दे करदा कि अपणे जिस्मां जो जिन्दा, ते पवित्र अते परमेश्वर जो खरा लगणे वाळा बलीदान करी चढाओ। इह ई तुसां री आत्मिक सेवा है।

### परमेश्वर री स्तुति

33 इस दुनिया साहई मत बणो; पर तुसां रे मन रे नोए होई जाणे कने तुसां रा चाल-चलन बी बदली जाओ, जिस कने तुसी परमेश्वर री भली, ते खरी लगणे वाळी, ते सिद्ध मरजी जो तजुरबे कने जाणदे रेह्यो। 34 किजो कि मैं तिस अनुग्रह री वजह कने जेहड़ा मिन्जो मिलेरा है, तुसां बिच का हर इक जो बोलदा कि जिदेह्या समझणा चाहिन्दा तिस का बधी करी कोई बी अपु जो नी समझो; अपण जिह्याँ परमेश्वर ने हर इक जह्ये जो भरोस्सा नाप रे साहब कने बंडी दित्तेरा है, तदेह्या ई अकल कने अपु जो समझो। 35 किजो कि जिह्याँ म्हारे इक जिस्म अन्दर मते सारे अंग हिन्, ते तिन्हा सबनी अंगां रा इक जदेह्या कम्म नी है; 36 तिह्याँ ई असी जेहडे मते हिन्, मसीह अन्दर इक जिस्म होई करी अपु अन्दर इक-दुजे रे अंग हिन्।

### परमेश्वर री सेवा करणे री जिन्दगी

12 जदकि तिस अनुग्रह रे साहब कने जेहड़ा असा जो दित्तेया गेरा है, असां जो बखरे बखरे वरदान मिले रे हिन्, ता जिस जो भविस्वयाणी करणे रा वरदान मिलेरा होए, से भरोस्से रे मुताबिक भविस्वयाणी करो; 2 अगर सेवा करणे रा दान मिलेरा हो, ता सेवा अन्दर लगी रेह्यो; अगर कोई सखाणे वाळा हो ता सखाणे अन्दर लगी रेह्यो; 3 जेहड़ा उपदेसक हो से उपदेस दैणे अन्दर लगी रेह्यो; दान दैणे वाळा खुले मन कने दान देया करो; जेहड़ा अगुवाई करो, से जोस कने करो; जेहड़ा रैह्य करो, से खूसी कने करो। 4 प्यार अन्दर कोई खोट ना हो; बुराई कने नफरत करो; भला करणे अन्दर लगी रेह्यो। 5 भाई-चारे रे प्यार कने इक-दुजे कने लगाव रख्यो; अपु-मिते इक इजत करणे अन्दर इक-दुजे का बधदे चलो। 6 कोसिस करणे अन्दर अबसेट मत करो; आत्मिक उन्माद कने भरीत्तेरे रेह्यो; प्रभू जी री सेवा करदे रेह्यो। 7 आस अन्दर खुस रेह्यो; कहळा अन्दर स्थिर रेह्यो; प्राथना अन्दर लगातार लगी रेह्यो। 8 पवित्र महुआं ताई जे किछ बी जरूरी हो, तिस अन्दर तिन्हेरी मदद करो; पहुनाई करणे अन्दर लगी रेह्यो। 9 जेहडे तुसां जो तंग करदे तिन्हा जो असीस देयो; असीस देयो स्याप मत देयो। 10 खुसियाँ मनाणे वाळ्येयाँ कने खुसी मनाओ, ते रोणे वाळ्येयाँ कने रोओ। 11 अपु-मिते इक जदेह्या मन रख्यो; घमण्ड मत करो, अपण दीन महुआं कने साथ रख्यो; अपणी नजरं अन्दर समझदार मत बणो। 12 बुराई रे बदले अन्दर कुस्की कने बुराई मत करो; जेहड़ी गल्लां सबनी महुआं सामणे भली होन्, तिन्हेरा फिकर करेया करो। 13 जिच्ते ताई होई सको, तुसी भरसक सबनी महुआं कने मेल-मलाप रख्यो। 14 ओ प्यारेयो, बद मत लिन्दे, अपण परमेश्वर री लैह जो मोक्का देयो, किजोकी लिखेरा है, “बदला लैणा मेरा कम्म है, प्रभू बोलदे बदला मैं ई दैणा।” 15 अपण “अगर तेरा बैरी भुख्खा हो ता तिस जो रीटी खुआ, अगर तिस जो त्रेह लगेरी हो ता पाणी पुआ; किजो कि इह्याँ करणे कने तैं तिसेरे सरा पर अगी रे अंगारेयाँ रा ढेर लाई रखगा।” 16 बुराई का मत

हारो, अपण भलाई कने बुराई जो जीत्ती लियो। 17 हर इक महु सासन करणे वाळे अधिकारियाँ रे अधीन रेह्यो, किजो कि कोई बी इदेह्या हक नी है जेहड़ा परमेश्वर रे पास्से का नी हो; ते जे अधिकार हिन् से परमेश्वर रे ठैहराए रे हिन्। 18 इधेरे ताई जेहड़ा बी कुस्की जो दित्तेरे हक रे खलाफ हुगां, से परमेश्वर री विधि रे खलाफ जान्दा, ते खलाफ जाणे वाळे जो सझा मिलणी है। 19 किजो कि हाकिम खरे कम्म ताई नी अपण, बुरे कम्म ताई डर लगणे री वजह हुन्दा; इधेरे ताई अगर तू हाकिम का डरे बगैर रैह्य चाहन्दा, ता खरा कम्म कर, ते तिसेरे पास्से का तेरी तारीफ होणी; 20 किजो कि से तेरी भलाई ताई परमेश्वर रा दास है। अपण अगर तू बुराई करो, ता डर, किजो कि तिनिए तलवार इह्याँ नी है लित्तेरी है; ते से परमेश्वर रा दास है कि तिन्हेरी लैह रे साहब कने बुरे कम्म करणे वाळे जो सझा देयो। 21 इधेरे ताई कुस्की रे हेठ रैह्य ना सिरफ तिस लैह रे डरा ताई जरूरी है, अपण विवेक बी ऐ ई गवाहई दिन्दा।

### राज्य ताई फर्ज

13 इधेरे ताई चुन्नी बी देया करो किजो कि सासन करणे वाळे परमेश्वर रे दास हिन् ते हमेसा इस्सी कम्म अन्दर लगी रैहन्दे। 2 इधेरे ताई हर इक जह्ये रा हक चुकाया करो; जिस जो चुन्नी चाहिन्दी, तिस जो चुन्नी देया करो; जिस जो चुर्णी चाहिन्दा, तिस जो महसूल देयो; जिसका डरणा चाहिन्दा, तिस का डरो; जिसेरी इजत करणा चाहिन्दी, तिसेरी इजत करेया करो। 3 अपु-मिते दाह-प्यार कने रैह्ये जो छड्डी करी होर कुस्की गल्ल अन्दर कुस्की रे दैणदार मत बणो; किजो कि जेहड़ा दुजे कने प्यार रखदा, तिनिए ई व्यवस्था पूरी किच्ती। 4 किजो कि ऐ कि “व्याभिचार नी करणा, खून नी करणा, चोरी नी करणी, लालच नी करणा,” ते इन्हा जो छड्डी करी होर कोई बी हुकम हो ता इन्हा सबनी गल्लां रा निचोड इस गल्ल अन्दर है, “अपणे पड़ोसी कने अपु बराबर प्यार रख।” 5 प्यार पड़ोसी री कोई बुराई नी करदा, इधेरे ताई प्यार करणा नियमा जो पूरा करणे रे बराबर है। 6 वक्त जो पछियाणी करी इह्याँ ई करो, इधेरे ताई कि अवे तुसां ताई निन्दर का जागी जाणे रा वक्त आई गेरा है; किजो कि जिस बेले असां ने भरोस्सा कित्तेया थिया, तिस बेले रे साहब कने असां रा उद्धार नेडे ई है। 7 बडी रात होई गेरी है, ते भ्याग होणे वाळी है; इधेरे ताई असा जो न्ह्यारे रे कम्मां जो छड्डी करी रोसनी रे हथियार बहनी लैणा चहिन्दे।

### इक-दुए ताई फर्ज

8 जिह्याँ दिन अन्दर खरा जचदा, तिह्याँ ई असी सीढी चल चलन, ना की लीला-क्रीडा अते पियकडपन अन्दर, ना व्याभिचार ते लुच्चे बणी करी, ते ना लड़ाई ते हिरस अन्दर। 9 बल्कि प्रभू यीशू मसीह जी जो अपनाई लेयो ते अपणी सरीर री मर्जी जो पूरा करने अन्दर मत लगी रेयो। 10 जेहड़ा विसवास करणे अन्दर कमजोर है, तिस जो अपणी संगती अन्दर लेई लेयो, अपण तिसेरी शक् पर विवाद करणे ताई नी। 11 इक जो भरोसा है कि सब किछ खाणा ठीक है, अपण जेहड़ा भरोस्से अन्दर कमजोर है से साग-पत्ते ई खान्दा। 12 खाणे वाळा नी-खाणे वाळे जो तुछ ना समझो, ते नी-खाणे वाळा खाणे वाळे पर इल्जाम ना लाओ; किजो कि परमेश्वर ने तिस जो अपणाएरा है। 13 तू कुण हुन्दा दुजे रे नोकर पर इल्जाम लाणे वाळा ? तिसेरा टिकी रैह्य या ढहई जाणा तिसेरे मालक कने ई जुडेरा है; अपण तिस जो ता टिकेरा ई रैह्ये दित्तेया जाणा है, किजो कि प्रभू तिस जो टिकाई करी रखवी सकदे। 14 कोई ता इक दिन जो दुजे का बधी करी मनदा, ते कोई सबनी दिनां जो इक बराबर मनदा। हर इक जह्ये अपणे मनां अन्दर निश्चय करी लेयो।

### अपणे भ्याळ पर इल्जाम मत लाओ

14 जेहड़ा कुस्की दिन जो मनदा, से प्रभू ताई मनदा। जेहड़ा खान्दा से प्रभू ताई खान्दा, किजो की से परमेश्वर रा सुकर करदा, ते जेहड़ा नी खान्दा, से प्रभू ताई नी खान्दा ते परमेश्वर रा सुकर करदा। 2 किजो कि असा बिच का ना ता कोई अपणे ताई जीन्दा अते ना कोई अपणे ताई मरदा। 3 अगर असी जीन्दे हिन्, ता प्रभू ताई जीन्दे हिन्; ते अगर मरी जान्दे, ता

प्रभू ताई मरदे; इधेरे ताई असी चाहे जीन नया मरन, असी प्रभू रे ई हिन। 4 किजो कि मसीह इधेरे ताई ई मरे अते जिन्दे बी होई गे कि से मरी गेरे ते जिन्दे दोन्ना रे प्रभू होन्। 5 तू अपणे ब्याळ पर इल्जाम किजो लगान्दा ? या तू फिरी किजो अपणे भ्याळ जो तुछ छ समझदा ? असी जितणे बी हिन, सबनां ने ई परमेश्वर रे न्याय-सिंहासन रे सामणे खड़े होणा है। 6 किजोकी लिखखेरा है, “प्रभू बोलदे, मेरे प्राण री कसम कि हर इक जहन्नु मेरे सामणे झुकणा है, ते हर इक जीभभ ने परमेश्वर जो मनी लेणा।” 7 इधेरे ताई असा बिच का हर इक ने परमेश्वर जो अपणा-अपणा लेख्खा देणा है। 8 इधेरे ताई अगे का असी इक-दुए पर इल्जाम ना लगान, अपण तुसी ऐ पक्का सोची लेयो कि कोई अपणे भाई रे सामणे ठेस या ठोकर खाणे री वजह नी रखवो। 9 मिन्जो पता है ते प्रभू यीशु अन्दर मिन्जो पक्का होई गेरा है कि कोई चीज अपणे आप ई भिष्टी नी हुन्दी, अपण जेहड़ा तिस जो भिष्टा समझदा तिस ताई से भिष्टी है। 10 अगर तेरा भ्याळ तेरी रोटी री वजह कने उदास हुन्दा, ता फिरी तू प्यार री रीति कने नी चलदा; जिस ताई मसीह ने अपणी जान दिती, तिस जो तू अपणी रोटी री वजह कने खतम मत करां। 11 इधेरे ताई तुसां ताई जे भला है तिसेरी निन्दा नी होणा चहिन्दी। 12 किजो कि परमेश्वर रा राज खाणा-पीणा नी है, अपण धरम ते मेल-मलाप ते से अनन्द है जेहड़ा पवित्र आत्मा कने हुन्दा।

### अपणे भ्याळ री बर्बादी री वजह मत बणो

13 जेहड़ा कोई इस तरीके कने मसीह री सेवा करदा, से परमेश्वर जो खरा लगदा ते महुआँ अन्दर ग्रहण करणे जोगा हुन्दा। 14 इधेरे ताई असी उन्हा गलां अन्दर लगी रहै जिन्हा कने मेल-मलाप ते इक-दुजे रा सुधार हो। 15 खाणे ताई पर रा कम्म मत बगाडां। सब किछ सुधध ता है, अपण तिस महु ताई बुरा है जिस जो तिसेरी रोटी कने ठोकर लगदी। 16 भला ता ऐ है कि तू मांस ना खाओ ते नां ई दाख रा रास्स पीयो, नां होर किछ इदेह्या करो जिस कने तेरा भ्याळ जो ठोकर लागो। 17 तेरा जे भरोसा हो, तिस जो परमेश्वर रे सामणे अपणे ई मनां अन्दर रख। से धन्न है जेहड़ा तिस गल अन्दर, जिस जो से खरा समझदा, अपु जो गुनेहगार नी मनदा। 18 अपण जेहड़ा सक करी के खान्दा, से सझा रे लायक होई गेया, किजो की से भरोस्से कने नी खान्दा; ते जे किछ भरोसे कने नी हो, से पाप हुन्दा। 19 इधेरे ताई असा ताकतवरां जो चहिन्दा कि कमजोरां री कमजोरियाँ जो सैह, ना कि अपणे आप जो खुस्स करन। 20 असां बिच का हर इक जह्ना अपणे पड़ोसी जो तिसेरी भलाई ताई खुस्स करो कि तिसेरी तरकी होई सको। 21 किजो कि मसीह जी ने अपणे आप जो खुस्स नी कित्तेया, अपण जिह्याँ लिखखेरा है: “तेरी बुराई करणे वाळ्यो री बुराई मेरे पर आई पेई।” 22 जितणी गलां पैल्ले री लिखखेया गेरी हिन, से म्हारी ई सिक्सा ताई लिखखी गेरियाँ हिन कि असी सबर ते पवित्र सास्त्र रे प्रोत्साहन कने आस रखन। 23 सबर ते सान्ती दैणे वाळा परमेश्वर तुसां जो ऐ वरदान देयो कि मसीह यीशु जी रे साहब कने अपु-मिते इक मन रेह्यो।

### दुजेयां जो बधाओ

15 ताकि तुसी इक मन ते इक सुर अन्दर म्हारे प्रभू यीशु मसीह रे पिता परमेश्वर री बड़ाई करो। 2 इधेरे ताई जिह्याँ मसीह ने परमेश्वर री महिमा ताई तुसा जो ग्रहण कित्तेरा है, तिह्याँ ई तुसी बी इक-दुए जो अपणाई लियो। 3 इधेरे ताई मैं बोलदा कि जेहड़ी-जेहड़ी प्रतिज्ञा बब्ब-दाद्रेयाँ जो दिती गेरी थियाँ तिन्हा जो पक्का करणे ताई मसीह जी, परमेश्वर री सचाई रा सबूत दैणे ताई, खतना कित्तेरे महुआँ रा नोकर बणे; 4 अते होरसी जाती बी रहै री वजह कने परमेश्वर री स्तुती करन; जिह्याँ कि लिखखेरा है, “इधेरे ताई मैं बखरी-बखरी जात रे महुआँ अन्दर तेरा सुकर करणा, ते तेरे नां रे भजन गाणे।” 5 फिरी बोल्हेरा है कि, “ओ बखरी-बखरी जात रे महुआँ, परमेश्वर री प्रजा कने खुसियाँ मनाओ, 6 ते फिरी, “ओ बखरी-बखरी जात रे महुआँ, प्रभू री स्तुती करो; अते ओ परदेसां अन्दर रहै वाळे महुआँ, परमेश्वर जो साराहो।”

### सारेयां ताई सुसमाचार

7 ते फिरी यशयाह बोलदा, “यिंशे री इक जड़ सामणे आणी, ते होरसी जाती रा शसक होणे ताई इक जह्ने ने उठणा, तिस पर होरसी जाती री आस होणी।” 8 परमेश्वर जेहड़े कि आस रे दाता हिन तुसा जो भरोसा करणे अन्दर हर किस्म रे आनन्द ते सान्ति कने भरपूर करो, कि पवित्र आत्मा री समर्थ कने तुम्हारी आस बधदी जाओ। 9 ओ मेरे भ्याळो, मैं अपु तुम्हारे बारे अन्दर पक्का जणदा कि तुसी बी अपु ई भलाई केन भरित्तेरे ते ईश्वरीय ज्ञान कने भरपूर हिन, ते इक दुजे जो चिताई सकदे। 10 तां बी मैं कुदखी कुदखी याद दुआणे ताई तुसा जो बड़ी हिम्मत करी के लिखखेया। ऐ तिस दया री वजह कने होया जेहड़ा परमेश्वर ने मिन्जो दित्तेरा है, 11 कि मैं होरसी जाती ताई मसीह यीशु जी रा दास होई करी परमेश्वर रे शुभ-भसेख री सेवा याजक साहई करा, जिस कने होरसी जातियां रा मनो चढाया जाणा, पवित्र आत्मा का पवित्र बणी करी मन्त्री लिच्तेया जाणा। 12 इधेरे ताई उन्हा गलां रे बारे अन्दर जेहड़ी परमेश्वर कने जुड़ेरी हिन, मैं मसिह यीशु अन्दर बड़ाई करी सकदा। 13 किजो कि तिन्हा गलां जो छडुडी करी मेरे अन्दर होर कुस्की गल जो बोलणे री हिम्मत नी है, जे मसीह ने होरसी जातियां री गुलामी ताई वचन, ते करम,

### हिम्मत कने लिखणे री वजह

14 ते निसानियाँ ते अनोखे कम्मां री ताक कने, ते पवित्र आत्मा री समर्थ कने मेरे ई जरिए कित्ते; होर ता होर, मैं यरुशलम का लेई करी चौन्नी पास्से इल्लुरिकुम ताई मसीह री खुसखबरी रा पूरा-पूरा प्रचार कित्तेया। 15 अपण मेरे मन री चाहत ऐ है कि जित्ते-जित्ते मसीह रा नां नी लेच्तेया गेया, तित्ते ई खुसखबरी सुणां इह्याँ नी हो कि दुजे री नीय्यां पर घर बणां। 16 पर जेह्या लिखखेरा है तिदेह्या ई हो, “जिन्हा जो तिसेरी खुसखबरी नी पुजेरी है, तिन्हा ने ई दिखणा ते जिन्हा ने नी सुणेया तिन्हा ई समझणा।” 17 इधेरे ताई मैं तुसां का आणे का घड़ी-घड़ी रुकी रेह्या। 18 अपण अवे इन्हा देसां अन्दर मेरे कम्मां ताई होर जगह नी रेहई, ते मते साल्लां का मिन्जो तुसां का आणे रे मर्जी है। 19 इधेरे ताई जिस बेल्ले मैं स्पेन जो जाहन्गा ता तुसा का हुन्दे आन्गा, किजो की मिन्जो आस है कि तिस सफर अन्दर तुसा कने मेरा मिलणा होई जाणा, ते जां तुसा कने रेहई करी मेरा मन जरा भरीह जाहन्गा ता तुसी मिन्जो थोड़ी दूर ताई अगे पुजाई दे। 20 अपण अब्बे ता मैं पवित्र महुआँ री सेवा करणे ताई यरुशलम जो चलेरा है। 21 किजो की मकिदुनिया ते अखया रे महुआँ जो एह खरा लगोया कि यरुशलम रे पवित्र महुआँ अन्दर गरीबां ताई किछ चन्दा कठेरेया जाओ।

### रोम बिच सफर करणे रा पौलुस री योजना

22 तिन्हा जो खरा ता लगोया, अपण से तिन्हेरे दैणदार बी हिन, किजो कि अगर होरसी जाती रे महु तिन्हेरी आत्मिक गलां अन्दर सामिल होए, ता तिन्हा ताई बी जरूरी है कि सरीरिक गलां अन्दर तिन्हेरी सेवा करन। 23 इधेरे ताई मैं ऐ कम्म पूरा करी के ते तिन्हा जो एह चन्दा पकड़ाई करी तुसा का बी रेहई करी स्पेन जो जाणा। 24 ते मिन्जो पता है कि जां मैं तुसा का आणा, ता मसीह जी री पूरी आसीस कने आणा। 25 ओ भ्याळो, म्हारे प्रभू यीशु मसीह रे अते पवित्र आत्मा रे प्यार री याद दुआई करी मैं तुम्हारे छन्दे करदा कि, मेरे ताई परमेश्वर का प्राथना करणे अन्दर मेरे कने मिली करी लगी रेह्यो, 26 कि मैं यहूदिया रे भरोसा नी करणे वाळ्यो का बची रेह्याँ, ते मेरी से सेवा जेहड़ी यरुशलम ताई है, पवित्र महुआँ जो खरी लगो; 27 ते मैं परमेश्वर री मर्जी कने तुसाका अनन्द कने आई करी तुसा कने अराम करां। 28 सान्ति रे परमेश्वर तुसा सबनी कन्ने रहै। आमीन। 29 मैं तुसां फीबे री जे जेहड़ी म्हारी भैहू है कने किखिया री कलीसिया सेवा करणे वाळी है छंदे, करदा। 30 तुसां पवित्र महु जो चाएदा कि, तिस जो प्रभू बिच अपणाई लियो ते जिस गल अन्दर तिस जो तुसां कने कोई कम हो, तुसी उस गल अन्दर तिसेरी मदद करो; किजो कि से मते सारेयां दी बल्कि मेरे उपर बी उपकार करणे वाळी होये रि है। 31 प्रिस्का अकिवला जेहड़े कि प्रभू यीशु जी अंदर

मेरे कने कम करणे वाळे हिन् तिन्हा जो नमस्कार ! <sup>32</sup> तिन्हा ने मेरी जान तिक्कर अपणा सिर तक देई रखखेरा रा है ते मैं इ नी पर होरसी जाती री कलीसियाएं बी तिन्हा रा धन्यवाद करदी हिन् । <sup>33</sup> उन्हा कलीसिया जो भी नमस्कार जेडे तीन्हा दे घर अंदर हिन् ! मेरे प्रिय इपैनिंतुस जेहडा यशु जी ताई आसिया रा पहला फल है नमस्कार ।

### व्यक्तिगत अभिवादन

**16** मरियम जी जो जिन्हा ने तुम्हारे तिक्कर बड्डी भारी मेन्थ है कितेरी तिन्हा जो नमस्कार । <sup>2</sup> अन्दुनिकुस और उनियास जो जेहडा हमार पडोसी है, कने मेरे सोगी कैद बी होए है, ते प्रेरिता अंदर नामी है, कने मेरे पहले जीतणे मसीह हुए तिन्हा जो नमस्ते ! <sup>3</sup> अम्पलियातुस जेहडा मसीह अंदर मेरा बडा प्रिय है नमस्ते <sup>4</sup> उरबानुस जेहडा मसीह अंदर मेरा साथी है, कने मेरे प्रिय एस्तखुस जो नमस्ते ! <sup>5</sup> अपिल्लेस मसीह अंदर खरा निकळया तिन्हा जो नमस्ते । अरिस्तुबुलुस दे घराने जो नमस्ते ! <sup>6</sup> मेरे रिशतेदार हेरोदियोन जो नमस्ते । नरकिस्सुस दे घराने जो जेहडे प्रभू यशु मसीह जी अंदर हिन्, तिन्हा जो नमस्ते ! <sup>7</sup> त्रुफेना कने त्रुफोसा जे प्रभू बिच मिन्थ करदी हिन् तिन्हा जो नमस्ते प्यारी परसिस जो जिने प्रभू बिच बडी मिन्थ किक्ती तिन्हा जो नमस्ते ! <sup>8</sup> रुफुस जो जेहडा प्रभू यशु जी अन्दर चुणीत्तरा है ते तिन्हा री माता जो बी जेहडी मेरी बी मता हिन् दोना जो नमस्ते ! <sup>9</sup> असुकितुस कने फिलगोन हिर्मास पुत्रबास कने हिर्मेस ते तिन्हा कने होरसी भाईयां जो नमस्ते ! <sup>10</sup> फिलुलुगुस कने युलिया कने नेर्युस ते तिसेरी भैण कने उलुम्पास रे कने सारे पवित्र महुआं जो नमस्ते ! <sup>11</sup> आपस बिच बडी दाह कने इक दुजे जो नमस्ते करो तुसां जो यीशु जी री सारी कलीसियां रे पासे का नमस्कार ! <sup>12</sup> अवे भाइयो मैं तुसां कने बिनति करदा जेहडी शिक्षा तुम्हारे जो उलटी लगदी तुसी उनका अलग होइ जाओ जिसकने तुसा जो ठोकर लगदी कने तुम्हा रे बीचस फुट पैन्दी तिन्हा का दुर होई जाओ ! <sup>13</sup> किजो कि ऐसे मणु प्रभु यशु जि रि सेवा निन करदे से ता अपणे पेट तिक्कर सेवा करदे हिन् से अपणे पेट तिक्कर मिट्टी मिट्टी गला करी के भोळे भाळे मणु जो भैकान्दे ! <sup>14</sup> तुम्हारी हुक्मां जो मनणे री चर्चा सारे लोका बिच फैली गेरी है इधरे ताई मैं बडी खुसी महसूस करदा; पर मैं ए

चान्दा कि तुसी भलाई तिक्कर अकली वाळे ते बुराई तिक्कर भोळे बणी रयो ! <sup>15</sup> शान्ति रा परमेश्वर बडी जळदी शैतान जो तुम्हीरे पैरा हेठे पीणे वाळा है <sup>1</sup> हमारे प्रभु यशु मसीह जी रा अनुग्रह तुम्हा रे पुर हुन्दा रे ! <sup>16</sup> मेरे साथी तीमुथियुस कने मेरे रिशतेदार लूकियुस कने यासोन कने सोसिपत्रुस दा कने मेरे कने रेणे रा तुसां जो नमस्कार !

### आखरी सलाह

<sup>17</sup> मैं पत्री लिखणे वळा तिरतियुस तुम्हातरे जो प्रभू जी अन्दर नमस्कार ! <sup>18</sup> ग्युस जे हमारी कलिसिया रि देख रेख करने वळा है तिसरी तरफ का तुसा जो नमस्कार ! <sup>19</sup> अवे तुसा जो मेरे शुभ-भसेख मतलव कि यशु जी रा शूभ सन्देश जेहडा तुम्हामरे जो पक्का करी सकदा, तिस भेद रे प्रकास रे अनुसार जे हमेसा का छिपी रया ! <sup>20</sup> पर अवे प्रकट होई के हमेसा रे परमेश्वर री हुक्मा का भविष्यद्वक्ता रे जरिये बताया रा है कि विसवास कने सारे आज्ञा मनणे वाळे होई जाओ ! <sup>21</sup> इक्को इक्क सारेयां का जादा समझदार परमेश्वर जो यीशु मसीह जी रे जरिये, बडाई हमेसा-हमेसा मिलदी रया! आमीन । <sup>22</sup> असा रे भाई सोस्थिनिस अत्ते पौलुस री तरफ का जिस जो परमेश्वर ने अपणी मर्जी रे साहब कने यीशु जी रा प्रेरित बनणे ताई सहे रा है। <sup>23</sup> परमेश्वर री उस कलीसिया रे नां जे कुरिन्थुस बिच है: जे यीशु मसीह बिच पवित्र किक्ते गे, जिन्हा जो परमेश्वर ने पवित्र महु बनणे ताई तिसरे कने ई चुणे रा हे। जे हर कुत्ते असा रा अत्ते तिन्हेरे प्रभु यीशु मसीह रा नां लिंदे रेहन्दे हिन। <sup>24</sup> इरास्तुस जेहडा नगर रा लखणीयारा है, तिसेरे भ्याळ क्वारतुस रा तुसां जो नमस्ते।

### परमेश्वर री स्तुति

<sup>25</sup> म्हारे परम पिता री तरफ का अत्ते म्हारे प्रभु यीशु मसीह री तरफ का तुसा सबनी जो तिन्हेरी मैहर अत्ते शान्ति मिल्ले। <sup>26</sup> मैं तुम्हारे ताई अपणे परमेश्वर री उस दया ताई जे यीशु मसीह बिच तुम्हारे पर होई है, परमेश्वर रा रोज सुकर करदा, <sup>27</sup> कि तुसी मसीह बिच हर गल्ल बिच मतलब सारे वचन अत्ते सारे ज्ञान बिच अमीर किक्ते गे हिन,

# 1 कुरुन्थियों

## अभिवादन

1 मसीह रे बारे असा ने जे गवाई दित्ती है से तुम्हारे बीच साबित हो, 2 इत्ते तक कि तुम्हारे बिच कोई वरदान री कमी नी है, अत्ते तुसी म्हारे प्रभु यीशु रे आणे री भाळ करदे रेहन्दे। 3 तिन्हा तुसा जो आखिर ताई मजबूत बी करणा, कि तुसी असा रे प्रभु यीशु मसीह रे रोजे बिल्कुल बेकसुर होन।

### मसीह बिच आशीषां

4 परमेश्वर विस्वास रे लायक है, जिस ने तुसा जो अपणे पुत्र प्रभु यीशु मसीह री संगति बिच सद्धे रा है। 5 अवे ओ मेरे भाइयों, मैं म्हारे प्रभु यीशु मसीह रे नाँ कने तुम्हारे कने बिनती करदा कि तुसा सब इक ई गल्ल बोल्लो, अते तुम्हारे बिच कोई मतभेद नी हो, अपण तुम्हारे मन अते सोच-बिचार बिच इक जुटता हो। 6 किजोकि ओ मेरे भाइयों, खलोए रे टब्बर ने मिंजो तुम्हारे बारे दसेया कि तुसा बिच लड़ाई-झगड़े होया करदे हिन। 7 मैं एह बोलेया करदा है कि तुसा बिच का कोई बोलदा, "मैं पौलुस रा है," ते कोई, "अपुल्लोस रा है," "कोई कैफा रा है," अत्ते कोई बोलदा मसीह रा है। 8 कै मसीह बटीह गया? कै पौलुस तुसा ताई सूळी पर चढाया गया? या तुसा जो पौलुस रे नां रा बपतिस्मा मिलेया? 9 मैं परमेश्वर रे ना रा सुकर करदा कि मैं क्रिस्पुस अते गयुस जो छड्डी तुसा बिच का कुसकी जो बपतिस्मा नी दित्तेया,

### कलीसिया बिच फूट होणा

10 कि कोई महु एह नी बोलें कि मिंजो तेरे नाँ रा बपतिस्मा मिलेया। 11 मैं स्तिफनास रे टब्बर जो बी बपतिस्मा दित्तेया थिय्या, इन्हा जो छड्डी करी, मैं नी जाणदा कि मैं होर कुसकी जो बपतिस्मा दित्तेया। 12 किजोकि मसीह ने मिंजो बपतिस्मा दैणे ताई नी, अपण शुभ-बसेख सुनाणे जो भेजे रा है, अते एह बी गल्लां रे ज्ञान रे साहब कने नी, इहय्यां ना हो कि मसीह री सूळी पर चढाया जाणा बेकार होई जाये। 13 किजोकि सूळी रा बसेख नास होणे वाळे ताई बेवकूफी है, अपण असा उद्धार पाणे वाळे ताई परमेश्वर री सक्ति है। 14 किजोकि लिखखे रा है, "मैं ज्ञानियां रे ज्ञान जो नास करणा, अते समझदारां री समझ जो घटिया करी दैणा।" 15 कुते है ज्ञानी? कुते है सास्त्री? अत्ते इस जुग रा कहळा पाणे वाळा कुते है? कै परमेश्वर ने दुनियां रे ज्ञानियां जो मूर्ख नी ठहराया? 16 इधेरे ताई किजोकि जां परमेश्वर रे ज्ञान रे साहब कने दुनियां ने अपणे ज्ञान कने परमेश्वर जो नी जाणेया ता परमेश्वर जो एह खरा लगेया कि इस प्रचार री बेवकूफी रे जरिये विस्वास करणे वाळ्यां जो उद्धार दें। 17 यहूदी ता निसानी तोपदे, अते यूनानी ज्ञान री तोप बिच हिन।

### मसीह परमेश्वर रा ज्ञान ते ताकत है

18 अपण असा ता तिस सूळी पर चढाये मसीह रा प्रचार करदे हिन, जे यहूदियां ताई खिलाफ होणे री वजह है, अते होर जातियां ताई निरी बेवकूफी है। 19 अपण जे सद्धे गेरे हिन, चाये से यहूदी हो या यूनानी, मसीह परमेश्वर री सक्ति अते परमेश्वर रा ज्ञान है। 20 किजोकि परमेश्वर री बेवकूफी महुआं रे ज्ञान का जादा ज्ञानवान है, अते परमेश्वर री कमजोरी महुआं री ताकत का

जादा ताकतवर है। 21 ओ भाइयों, अपणे सद्दाये जाणे पर ता सोचो कि सरीर रे साहब कने तुम्हारे बिच का ना ता बडे ज्ञानवान, ना बडे सक्तिसाली, अते ना ई बडे खास महु सद्धे गे हिन। 22 अपण परमेश्वर ने दुनियां रे बेवकूफां जो चुणी लेरा है कि ज्ञान वाळ्यां जो बेइज्जत करी सकन, अते परमेश्वर ने दुनियां रे कमजोरां जो चुणी लेया कि ताकतवरां जो बेइज्जत करी सकन। 23 अते परमेश्वर ने दुनियां का तिन्हा जो ई चुणेया जे नीच थिय्ये, जिन्हा कने महु नफरत करदे थिय्ये होर किच्छ बी नी। परमेश्वर ने इन्हा जो चुणेया ताकि दुनियां जिन्हा जो किच्छ समझदी, तिन्हा जो से खत्म करी सके। 24 ताकि परमेश्वर रे सामणे कोई बी महु घमण्ड ना करी पान। 25 अपण उसेरी ई वजह कने तुसा यीशु मसीह बिच हिन, जे म्हारे ताई परमेश्वर री तरफ का ज्ञान ठेहरया मतलब, धर्म, पवित्रता, अत्ते छुटकारा। 26 जिहय्यां कि शास्त्र बिच लिखखे रा है, जे घमण्ड करन से प्रभु बिच अपणी जगह रा घमण्ड करन। 27 ओ भाइयों, जां मैं परमेश्वर री गवाई दिंदे तुम्हारे का आया थिय्या, ता खरे सुवचन या अपणी समझ कने नी आया थिय्या। 28 किजोकि मैं एह ठाणी लेरा थिय्या, कि मैं तुसा रे बीच यीशु मसीह, मतलब सूळी पर चढाये मसीह जो छड्डी होर कोई गल्ल जो नी जाणा। 29 अते मैं अपणी कमजोरी अते डर कने, अत्ते बड़ा कंमदे-कंमदे तुसा कने रेह्या। 30 अते मेरे वचन ते मेरे प्रचार बिच महु री समझ री लुभाणे वाळी गल्लां नी हिन, अपण आत्मा अते प्रभु री सक्ति रा प्रमाण है। 31 इधेरे ताई कि तुम्हारा विसवास महु रे ज्ञान पर नी, अपण परमेश्वर री सक्ति पर टिके रा हो।

### कृतिसित मसीह रे बारे बसेख

2 फिरी बी असी समझदार महुआं रे बिच असा ज्ञान री गल्लां सुणान्दे हिन, अपण एह ज्ञान इस दुनियां रा नी है अते ना ई इस जुग रे उन्हा राज करणे वाळ्यां रा ज्ञान है जे नास होणे वाळे हिन। 2 अपण असी परमेश्वर रा से गुप्त ज्ञान, जो भेद रे तरिके कने दसदे, जिस जो परमेश्वर ने अनादि काल का असा री महिमा ताई ठाणेया थिय्या। 3 जिस ज्ञान जो इस जुग रे राज करणे वाळ्यां बिच का कुसकी ने नी समझेया: जे से समझी गेरे हून्दे ता महिमा रे प्रभु जो सूळी पर नी चढान्दे। 4 अपण जिहय्यां लिखखे रा है, "जिन्हा गल्लां जो हाख्खी ने नी दिखखेया अते कन्न ने नी सुणेया, अत्ते जे गल्लां महुआं री समझ बिच नी आई, उन्हा जो ई परमेश्वर ने अपणे प्यार करणे वाळ्यां ताई त्यार कित्तेया। 5 अपण परमेश्वर ने तिन्हा जो अपणी आत्मा रे जरिये असा पर जाहिर कित्तेया, किजोकि आत्मा सब गल्लां जो, बल्कि परमेश्वर री गैहराई री गल्लां जो बी जाँचदा।

### परमेश्वर रा ज्ञान

6 इदेया कुण है जे दूजे महु री मन री गल्ल जाणदा, सिरफ महु री आत्मा, जे उस बिच है? तिय्या ई परमेश्वर री गल्लां बी कोई नी जाणदा, सिरफ परमेश्वर रा आत्मा। 7 अपण असा जो दुनियां री आत्मा नी, अपण से आत्मा मिली, जे परमेश्वर री तरफ का है, ताकि असी तिन्हा गल्लां जो जाणी सकन, जे परमेश्वर ने असा जो दित्ती हिन। 8 जिन्हा जो असी महुआं री समझ का

सखाई री गल्लाँ बिच नी, अपण आत्मा री सखाई री गल्लाँ बिच, आत्मिक गल्लाँ आत्मिक गल्लाँ कने मिलाई करी सुणान्दे हिन। 9 अपण इक अविस्वासी महु परमेश्वर री आत्मा री गल्लाँ जो नी अपनादा, किजोकि से गल्लाँ तिसेरी नजरा बिच बेवकूफी री गल्लाँ हिन अते ना ई से तिन्हा जो समझी सकदे किजोकि तिन्हेरी परख आत्मिक तरिके कने हुन्दी। 10 आत्मिक महु सब किच्छ जांचदा-परखदा, अपण से खुद कुसकी महु रे जरिये नी जांचेया जांदा।

11 किजोकि प्रभु रा मन कुत्रे जाणया, कि तिन्हा जो सखाण? अपण असा का मसीह रा मन है। 12 ओ भाइयों, मैं तुम्हारे कने तिय्यां गल्ल नी करी सकेया, जिय्यां आत्मिक महुआं कने करदा। अपण इसेरे उलट मिंजो तुम्हारे गल्ल करनी पेई जिय्यां संसारिक महुआं कने किती जांदा। मतलब उन्हा कने जे मसीह बिच हल्ले बचे हिन। 13 मैं तुम्हारे जो दूध पियाया, रोटी नी खुआई; किजोकि तुसी उस जो खाई नी सकदे थिय्ये, बल्कि अबे बी नी खाई सकदे। 14 किजोकि हल्ले ताई तुसी संसारिक हिन। जबकि तुम्हारे बिच हिरस अत्ते कहळा है, ता के तुसी संसारिक नी हिन? अत्ते के तुसी संसारिक महुआं साहई बरताव नी करदे? 15 किजोकि जां इक बोलदा, "मैं पौलुस रा है, " अते दूजा, "मैं अपुल्लोस रा है, " ता के तुम्हारा बोल-चाल संसारिक महुआं साहई नी है? 16 अपुल्लोस के है? अते पौलुस के है? सिरफ सेवा करणे वाळे, जिन्हेरे जरिये तुसा ने विस्वास किन्तेया, असा सब ने सेहई कम्म किन्तेया जे प्रभु ने म्हारे जो दिन्तेया।

### कलीसिया बिच गुटबर्दी करणे पर भतसर्ना

3 मैं बीह बाया, अपुल्लोस ने सींचेया, अपण परमेश्वर ने बद्धाया। 2 इधेरे ताई ना ता लगाणे वाळा किच्छ है, अते ना ई सींचणे वाळा, अपण परमेश्वर जे बद्धाणे वाळा सेहई सब किच्छ है। 3 बाणे वाळा अते सींचणे वाळा दोनो बराबर हिन, अपण हर इक जो अपणी ई मेहनत रे साहब कने इनाम मिलणा। 4 किजोकि असी परमेश्वर कने कम्म करणे वाळे हिन, तुसा परमेश्वर रे खेत्र अते परमेश्वर रा मन्दर हिन। 5 परमेश्वर री उस दया रे साहब कने जे मेरे पर होई है, मैं इक समझदार राजमिस्त्री रे साहई नीय्यां पाई, अपण तिस पर कम्म ता होर ई करेया करदा है। अपण हर इक जो ध्यान रखणा चहिंदा की से तिस पर कम्म कदेया करेया करदा है। 6 किजोकि जे नीय्यां पाये री है से खुद यीशु मसीह ई हिन अते तिस पर कोई होर नीय्यां पाई ई नी सकदा। 7 अते जे कोई तिस नीय्यां पर सुन्ना- चाँदी या किमती पत्थर, लकड़ी या घा-फू बी लगान। 8 ता हर इक रा कम्म साफ तरिके कने जाहिर होई जाणा। किजोकि तिस रोज ने उस जो दुस्सी देणा; किजोकि तिस रोज ने अग कने आणा, अत्ते तिस अग ने ई महुआं रे कम्मां जो परखणा कि कदेया है। 9 जिसेरा कम्म उस नीय्यां पर बणेरा टिकी रहन्ना, तिस जो इनाम मिलणा। 10 अत्ते जे कुसेरा कम्म तिस अग बिच राख होई जान्गा ता तिस जो नुकसान उठाणा पैणा, अपण फिरी बी तिन्हेरे तिह्य्यां ई बची जाणा जिह्य्यां कोई अग लगे रे घर का बची करी निकळदा। 11 के तुसा नी जाणदे, तुसी परमेश्वर रा मन्दर हिन अते परमेश्वर रा आत्मा तुम्हारे बिच वास करदा। 12 जे कोई परमेश्वर रे मन्दर जो नुकसान दिंदा ता परमेश्वर ने तिस जो खत्म करी देणा, किजोकि परमेश्वर रा मन्दर पवित्र है। अते से तुसी हिन। 13 कोई अपु जो धोखा ना दें, जे तुसा बिच का जे इस जुग बिच अपू जो ज्ञानि समझन, ता से बेवकूफ बणन, ताकि से वाक्केई समझदार बणी जाओ। 14 किजोकि परमेश्वर री नजर बिच संसारिक ज्ञान बेवकूफी है। जिह्य्यां कि सास्त्र बिच लिख्खे रा है, "सेहई(परमेश्वर) है जे ज्ञानिय्यां जो तिन्हेरी चलाकी बिच फसाई दिंदा, " 15 अते एह बी, "प्रभु ज्ञानियां रे सोच-विचारां जो जाणदा, कि से फजूल हिन।" 16 इधेरे ताई महुआं बिच कोई घमण्ड ना करन, किजोकि सब किच्छ तुम्हारा है, 17 चाये पौलुस हो या अपुल्लोस या कैफा, चाये दुनियां हो या जीण या मरण, चाये अज्र री गल्लां हो या आणे वाळी एह सब किच्छ तुम्हारा है, 18 अत्ते तुसी मसीह रे हिन, अते मसीह परमेश्वर रा है। 19 महु असा जो मसीह रे सेवक अते परमेश्वर रे भेदां रे भण्डारी समझन। 20 अत्ते फिरी एह भेद जिन्हेरे हवाले किन्ते हिन, उन्हा ताई जरूरी है कि से विस्वास रे लायक हो। 21 अपण मेरी नजरा बिच एह बड़ी छोटी गल्ल है कि तुसी या महुआं री कोई अदालत मेरा न्याय करन। सच ता एह है कि मैं खुद अपणा

न्याय नी करदा। 22 किजोकि मेरा मन साफ है, फिरी बी मैं बेकसुर नी है, किजोकि मेरा न्याय करणे वाळा मेरा प्रभु है। 23 इधेरे ताई, पैहे ई कुसकी गल्ल रा न्याय मत करेया करो, बल्कि जां ताई प्रभु नी आंदा तां ताई रूकी रेहो, किजोकि तिस ने उन्हा गल्लां जो जे न्हारे बिच छुपी री हिन लौ बिच लियाणा, अते महुआं रे मकसदां जो सामणे करणा। तां हर इक महु री तारीफ परमेश्वर री तरफ का होणी।

### मसीह रे प्रेरित

4 ओ भाइयों, मैं इन्हा गल्लां बिच तुसां ताई अते अपुल्लोस री चर्चा उदारण रे तरिके पर किती है, इधेरे ताई कि तुसी असा का एह सीखो कि जे लिख्खे रा है तिस का अगे मत बढ़ी जांदा, अते इक री तरफ होईकरी दूजे रे खलाफ होईकरी घमण्ड मत करदे। 2 कुण बोलदा कि तू दूजे का जादा खरा है? तेरे का अपना कै है? जे तिजो दिन्तेया ई नी गया? अत्ते जां तिजो सब किच्छ कुसकी का मिलेया है ता फिरी घमण्ड किजो करदा जिय्यां तिजो मिलेया ई नी? 3 तुसी महु सोचदे कि जिस कुसकी चीज री जरूरत थी, अवे सब किच्छ तुम्हारे का है। तुसी सोचदे हिन अवे तुसी अमीर होई गेरे हिन। तुसी म्हारे बगेर ई राजे बणी बैठे हिन। कितना खरा हुन्दा कि तुसी वाक्केई राजे हुन्दे ताकि असी बी तुम्हारे कने राज करदे। 4 किजोकि मिंजो इय्यां लगदा कि परमेश्वर ने असा जो प्रेरितां जो सबनियां का आखिरी रखेया है, उन्हा महुआं साहई जिन्हा जो मौत रा हुक्म मिली गेरा है, किजोकि असी पूरी दुनियां, स्वर्गदूतां अत्ते महुआं ताई तमाशा बणी गेरे हिन। 5 असी मसीह ताई बेवकूफ हिन, अपण तुसा मसीह बिच समझदार हिन, असी कमजोर हिन, अपण तुसी ताकतवर हिन, तुसा जो इज्जत मिलदी, अपण म्हारी इज्जत ई नी हुन्दी। 6 असी इस बेले ताई भूखे-प्यासे अते फटे-पुराणे चिथडे बिच हिन। अते लत्ता-मुक्रे खांदा हिन ते बे-घर हिन। 7 अपणे हत्थां कने मेहनत-मजदुरी करदे हिन। जां म्हारे जो बुरा-भला बोलदे ता असी तिन्हा जो असीस दिंदा। से असा जो तंग करदे। अते असी तिन्हेरी सैहन्दे। 8 जां असी बदनाम हुन्दे, तां बी असी मीठा बोलदे। असी अज्र ताई दुनियां रे मैल अते कूड़े-कचरे रे बराबर हिन। 9 मैं तुसा जो शर्मिन्दा करणे ताई एह गल्लां नी है लिखदा, अपण अपणे प्यारे बच्चे समझी करी समझांदा है। 10 किजोकि जे मसीह बिच तुसा जो सखाणे वाळे दस हजार बी हुन्दे, अपण तुम्हारे पिता ता केई नी हुन्दे। किजोकि मसीह यीशु बिच शुभ-बसेख रे जरिये मैं तुसां रा पिता बणेया। 11 इधेरे ताई मेरी तुम्हारे कने बिनती है कि मेरे साहई तुसां रा चाल-चलन हो। 12 इधेरे ताई मैं तीमुथियुस जो जे प्रभु बिच मेरा प्यारा अते विस्वास लायक पुत्र है, तुम्हारे का तिस जो भेजेया। तिन्हेरे तुसा जो मसीह बिच मेरा चाल-चलन चेता करणा, जिह्य्यां कि मैं हर जगह, हर इक कलीसिया जो सिक्सा दिंदा। 13 किच्छ महु घमण्ड कने फूली गेरे हिन, जिह्य्यां अवे मैं तुम्हारे का कदी आणा ई नी।

### चेतावनी

14 अपण जे प्रभु री मर्जी होई ता मैं तुसा का जरूर आंगा, अते घमण्डियां री गल्लां जो नी, अपण तिन्हेरी सक्ति जो जाणी लिंगा। 15 किजोकि परमेश्वर रा राज्य गल्लां बिच नी, अपण सक्ति बिच टिके रा है। 16 तुसी कै चाहन्दे? कै मैं डंडा लेईकरी तुम्हारे का आं, या प्यार अते नम्रता री आत्मा कने? 17 इत्ते तक सुनणे जो आया, तुसा बिच व्यभिचार हुन्दा, बल्कि इदेया व्यभिचार ता होर जातियां रे लोकां बिच बी नी हुन्दा कि इक महु अपणे प्यो री माँ जो रखदा। 18 अपण तुसी घमण्ड कने फूली गेरे हिन, अपण तुम्हारे जो इसेरे बजाये दुखी होणा चहिंदा थिय्या, जे कोई इदेया कम्म करदा तुम्हारे जो उस जो अपणे बीच का बाहर कड्डी देणा चहिंदा थिय्या। 19 मैं जे सरीरिक रूप बिच तुम्हारे का नी है, अपण आत्मिक रूप कने तुम्हारे बीच ई है। अत्ते मन्त्रो तुम्हारे बिच रेहई करी जिनिये बुरे कम्म किन्ते हिन, तिसेरे खलाफ अपना एह फैसला देई दिन्तेया कि, 20 जां तुसी मेरे कने म्हारे प्रभु यीशु मसीह रे नाँ बिच मेरी आत्मा अत्ते म्हारे प्रभु यीशु मसीह री सक्ति कने इकट्टे हुन्गे, 21 ता इदेय महु जो उसेरे सरीर जो नास होणे ताई सैतान रे हवाले किन्तेया जाये, ताकि उसेरी आत्मा रा प्रभु यीशु रे दिनां बिच उद्धार होई सके।



## कलीसिया बिच गलत गल्लां

5 तुम्हारा घमण्ड करणा खरा नी। कै तुसा नी जाणदे कि जरा करी तराक पूरे गुन्ने रे आट्टे जो तराक करी दिदा? 2 पुराणी तराक जो कड्डी करी अपु जो सुच्चा करो कि नौआ गुन्ने रा आट्टा बणी जाओ। किजोकि तुसी ता बिना तराक वाळी फसह री रोटी साहई हिन। म्हारे जो पवित्र करणे ताँई मसीह जो छैलू रे रूप बिच बलि चढाई दित्तैया थिय्या। 3 इधेरे ताँई आओ असा अपणा फसह रा त्हावर बुराई अते पाप रे बगेर पुराणी तराक कने बणी री रोटी कने नी, अपण ईमानदारी अते सच्चाई री तराक कने बणी री रोटी कने मनादे। 4 मैं अपणी चिट्टियां बिच तुसा जो लिख्खेया कि व्यभिचारियां री संगति मत करदे। 5 एह नी कि तुसा बिल्कुल ई इस दुनियां रे व्यभिचारियां, लालचियां, ठगां या मूर्ति पूजणे वालेयां कने संगति ना रख्खो, इस साहब कने ता तुसा जो इस दुनियां का ई निकळी जाणा पैणा। 6 अपण मैं तुम्हारे जो लिख्खेया, से एह है कि कुसकी इदेय मळु कने कोई रिशता मत रख्खो जे अपु जो मसीही भाई बोली करी बी, व्यभिचारी, लालची, मूर्ति पूजा करणे वाळा, गाळी दैणेवाळा, पियक्कड, या इक ठग हो। इदेय मळु री संगति मत करदे बल्कि इदेयां कने रोटी बी मत खान्दे। 7 जे मळु बाहरलै हिन, कलीसिया रे नी हिन, उन्हेरा न्याय करणे कने भला मेरा कै कम्म? कै तुसी जे कलीसिया बिच हिन उन्हेरा न्याय नी करदे? 8 बाहर वालेयां रा न्याय ता परमेश्वर करदा। अपण तुसी इदेय बुरे कम्म करणे वालेयां जो अपणे बिच का कड्डी देयो। 9 कै तुसां बिच का कुस्की जो हिम्मत है कि जां कुस्की दुजे कने लडाई हो, ता फँसले ताँई अधरमियां का जाओ ते पवि मळुआं का ना जाओ? 10 कै तुसा जो पता नी है कि पवित्तर मळुआं ने दुनिया रा न्याय करणा है? इधेरे ताँई जदकि तुसा दुनिया रा न्याय करणा है, ता कै तुसी हल्की का हल्की लडाई रा न्याय करणे जोगे नी हिन्? 11 कै तुसां जो पता नी है कि असां ने स्वर्गदूतां रा न्याय करणा है? ता कै दुनियावी गल्लां रा फँसला नी करन? 12 अगर तुसां दुनियावी गल्लां रा फँसला करणा हो, ता कै तिन्हा जो ई बठाणा जिन्हा जो कलीसिया अन्दर किछ बी नी समझेया जान्दा? 13 मैं तुसा जो शर्मादां करणे ताँई एह बोलदा। कै सच्ची तुसा बिच का इक बी समझदार नी मिलदा, जेहड़ा अपणे भ्याळां रा फँसला करी सको

## मसीहि लोकां बिच मुकदमे होणा

6 तुसा अन्दर भ्याळा भ्याळा रे बिच मुकदमा हुन्दा, ते से बी भरोसा नी करणे वालेयां रे सामणे। 2 अपण तुसा अन्दर असली गलती ता एह है कि तुसी अपु-मिते मुकदमा करदे। बेन्याई किजो नी सैहन्दे? अपणा नुकसान किजो नी सैहन्दे? 3 अपण तुसी ता अपु ई बेन्याई करदे ते नुकसान पुजान्दे, ते से बी भ्याळां जो 4 कै तुसा जो पता नी है कि बेन्याई करणे वाले मळुआं ने परमेश्वर रे राज्य रे वारिस नी होणा है? धोखे अन्दर मत रेहो; ना रन्डिवाजी ना मूरतीयां री पूजा करणे वाले, ना परस्त्रीगामी, ना लुच्चे, ना पुरुषगामी, 5 ना चोरी करणे वाले, ना लालची, ना सराब्बा पीणे वाले, ना गाळां दैणे वाले, ना अन्धेर करणे वाले परमेश्वर रे राज्य रे वारिस होणे हिन्। 6 ते तुसां बिच का कितणे ई इदेह थिये, अपण तुसी प्रभू यीशु मसीह जी रे नां कने ते म्हारे परमेश्वर रे आत्मा कने धुआए गे अते पवित्र होए अते धरमी ठैहे। 7 सब चीज्रां मेरे ताँई खरी ता हिन्, अपण फाएदे री नी हिन्; सब चीज्रां मेरे ताँई खरी हिन्, अपण मैं कुस्की गल्ल रे हेठ नी होणा। 8 रोटी पेटा ताँई, ते पेट रोटी ताँई है, अपण परमेश्वर ने इस जो ते उस जो दोन्नां जो मुकाई दैणा है। अपण सरीर व्याभिचार ताँई नी है, अपण प्रभू जी ताँई है, अते प्रभू जी सरीर ताँई हिन्। 9 परमेश्वर जी ने अपणी समर्थ कने प्रभू जी जो जिन्दा कित्तैया, ते तिन्हा ने असा जो बी जिन्दे करणा है। 10 कै तुसां जो पता नी है कि तुसा रा सरीर मसीह रे अन्ग हिन्? ता कै मैं मसीह रे अन्गां जो लेई करी तिन्हा जो वैश्या रे अन्ग बणा? इह्यां कदि बी नी ही सकदा। 11 कै तुसां जो पता नी है कि जेहड़ा कोई वैश्या कने संगती करदा, से तिस कने इक तन होई जान्दा? किजो कि लिख्खेरा है: "तिन्हा दोन्नां ने इक तन होणा।"

## सरीर परमेश्वर री महिमा ताँई

12 ते जेहड़ा प्रभू जी संगती अन्दर रैहन्दा, से तिन्हा कने इक आत्मा होई जान्दा। 13 व्याभिचार का बची रेहो। जितणे बी होर पाप मळु करदा से सरीरि का बाह हिन, अपण व्याभिचार करणे वाळा अपणे ई सरीर रे खलाफ पाप करदा। 14 कै तुसां जो पता नी है कि तुसा रा सरीर पवित्र आत्मा रा देहा है, जेहड़ा तुसां अन्दर वास करदा ते तुसां जो परमेश्वर रे पास्से का मिलेरा है; ते तुसी अपणे नी हिन्? 15 किजो कि तुसा री कीमत चुकाया गेरी है, इधेरे ताँई अपणे सरीर कने परमेश्वर री महिमा करो। 16 तिन्हा गला रे बारे बिच जेहडी तुसां लिख्खी री है, कि मडद जनानी जो ना छुओ। 17 अपण व्यभिचार रे डर कने हर इक मडद री लाडी, ते हर इक जनानी रा लाडा हो। 18 लाडा अपणी लाडी रा हक्क पूरा करो, ते तिह्य्यां ई लाडी बी अपणे लाडे रा। 19 लाडी जो अपणे जिस्म पर हकक नी अपण तिसरे लाडे रा हक्क है, तिह्य्यां ई लाडे जो बी अपणे जिस्म पर हक्क नी, अपण लाडी जो है। 20 तुसां इक दूजे का बखरे होई करी मत रेहो, अपण सिरफ किच्छ बेले ताँई आपसी सम्पति कने कि प्राथना ताँई छुट्टी मिलन, ते फिरी इकट्टे रेहो, कुदखी ईह्य्यां ना हो, कि तुसां रे असंयम री वजह कने सैतान तुसा जो परखो।

## ब्याह कने जुडे रे सवाल

7 अपण मैं तुसां जो बोलदा, से अनुमति है ना कि हुक्म। 2 मैं ऐ चांहदा, कि जियां मैं है, तियां ई सब मळु हो, अपण हर इक जो परमेश्वर रे पास्से का खास वरदान मिले रा है, कुसकी जो कुसकी तरह रा, ते कुसकी जो कुसकी होर तरह रा। 3 अपण मैं जिन्हेरा ब्याह नी हो रा है ते विधवा रे बारे बिच बोलदा, किजो कि तिन्हेरे ताँई इदेया ई रैह्ला खरा है, जदेया मैं है। 4 अपण जे से संयम नी करी संकन, ता ब्याह करी लेंन, किजो कि ब्याह करणा कामतुर रेह्ले का भला है। 5 जिन्हेरा ब्याह होई गेरा है, तिन्हा जो मैं नी, बल्कि प्रभु हुक्म दिदे, कि लाडी अपणे लाडे का अलग ना हो। 6 (अते जे बखरे होई बी जाये ता बगेर दूज्जा ब्याह कित्ते रे रेह, या अपणे लाडे कने फिरी का मेल करी लेंन) ते ना लाडा अपणी लाडी जो छडो। 7 दूज्जेयां कने प्रभु नी, अपण मैं ई बोलदा, जे कुसकी भाई री लाडी प्रभु पर विसवास नी करदी हो, अते अपणे लाडे कने रैह्ले बिच कने खुस हो, ता से तिस जो ना छडन। 8 अते जिस लाडी रा लाडा प्रभु पर विसवास नी करदा हो ता, अते तिसरे कने रैह्ले कने खुस हो ता, से लाडे जो नी छडन। 9 किजो कि इदेया लाडा जे विसवास नी करदा हो, से लाडी री वजह कने पवित्र ठहरदा, अते इदेयी लाडी जे विसवास नी करदी हो, लाडे री वजह कने पवित्र ठहरदी, नी ता तुसा रे लडकेवाळे असुच्चे हुन्दे, अपण अबे ता पवित्र हिन्। 10 अपण जे मडद विसवास नी करदा, जे से अलग होई जान, ता बखरा होणे देयो, इदेयी हालत बिच कोई भाई या भैण बन्धन बिच नी, अपण परमेश्वर ने असां जो मेल मिलाप ताँई सद्देरा है 11 किजो कि ओ जनानी, तू कै जाणदी, कि तू अपणे लाडे रा उद्धार कराई सकदी? अते ओ लाडे, तू कै जाणदा, कि तू अपणी लाडी रा उद्धार कराई सकदा? 12 अते जदेया प्रभु ने हर इक जो बन्डेरा है, अते परमेश्वर ने हर इक जो सद्देरा है, तियां ई से चलन, अते मैं बी सब कलीसिया जो ऐई बोलदा। 13 जिसेरा खतना होये रा हो तिस जो सद्देरा हो, से जिन्हेरा खतना नी होये रा हो तिस साई ना बणो, जिसेरा खतना नी होये रा हो, से खतना नी कराये। 14 ना खतना किच्छ है, अते जिन्हेरा खतना नी होये रा है से बी अपण परमेश्वर रे हुक्मां जो मनणे वाळा ई सब किच्छ है। 15 हर इक मळु जिस हालत बिच सद्दे गेरा है, तिस्सी बिच रेह। 16 जे तू दास री हालत बिच सद्दे गेरा है ता फिकर मत कर, अपण जे तू आजाद होई सकदा, ता इदेया ई कम्म कर।

## परमेश्वर री बुलाहट रे हसाब कने चलो

17 किजो कि जे दास री हालत बिच सद्दे गेरा है, से प्रभु रे जरिये आजाद कित्ते गेरा है, अते तियां ई जे आजाद री हालत बिच सद्दे गेरा है, से मसीह रा दास है। 18 तुसी कीमत देई करी खरीदी लेरे हिन्। 19 ओ भाइयां, जे कोई जिस बी हालत बिच सद्दे गेरा हो, से तिस बिच ई परमेश्वर कने रेह।

20 कुंआरियां रे बारे बिच प्रभु का कोई बी हुकम मिंजो नी मिलेया, अपण विसवास रे लायक होणे ताई जदेयी दया प्रभु ने मेरे पर किती है, तिसेरे ई साहब कने दलासा दिंदा। 21 इधेरे ताई मेरी समझ कने इयां खरा है, कि अज कल कळेस री वजह कने मल्लु जदेया है तदेया ई रेहू। 22 जे तेरी लाडी है, ता तिस का बखरा होणे री कोसिस मत कर, अते जे तेरी लाडी नी है, ता लाडी री तलाश मत कर। 23 अपण जे तू ब्याह बी करगा, ता पाप नी, अते जे कुंआरी ब्याई जान ता कोई पाप नी, अपण इदेयां जो सरीरिक दुख होणा, अते में बचाणा चाहन्दा। 24 ओ भाइयों, मैं ऐ बोलदा, कि बेला घट कित्तेया गया है, इधेरे ताई चहिंदा कि जिन्हेरी लाडी हो, से इदेया हो मन्ना कि तिसेरी लाडी नी है।

### बगैर ब्याते री जनानिआं ते विधवा

25 अते रोणे वाळे इदेय हो, मन्ना रुन्दे नी हो, अते खुस होणे वाळे इदेय हो, मन्ना कि खुस नी हिन्, अते खरीदणे वाळे इदेय हो, कि मन्ना तिन्हेरे का किच्छ बी नी है। 26 अते इस दुनियां बिच बरतणे वाळे इदेय हो, कि से इस दुनियां रे नी होई जान, किजोकि इस दुनियां रे तरिके अते बरताव बदलिन्दे रेहन्दे। 27 इधेरे ताई मैं चाहन्दा, कि तुसा जो फिकर नी हो, बगैर ब्याह रे मडद प्रभु री गल्लां री फिकर करदा रेहन्दा, कि प्रभु जो किह्य्यां खुस करन्। 28 अपण ब्याहा मल्लु दुनियां री गल्लां री फिकर बिच रेहन्दा, कि अपणी लाडी जो कियां खुस रखन। 29 ब्याहे अते बगैर ब्याहे बिच बी भेद है, कुंआरी प्रभु री फिकर बिच रेहन्दी है, कि से आत्मा अते जिस्म दोनो का पवित्र हो, अपण ब्याही दुनियां री फिकर बिच रेहन्दी, कि अपणे लाड़े जो कियां खुस रखन। 30 एह गल्ल तुसा रे फायदे ताई बोलदा, ना कि तुसा जो फसाणे ताई, बल्कि इधेरे ताई कि जदेया सोहता है, तिह्य्यां ई कित्तेया जाये, कि तुसा इक मन होई करी प्रभु री सेवा बिच लगी रेहो। 31 अते जे कोई ऐ समझे, कि से अपणी युवा होई गेरी कुंआरी प्यारी ताई खरा नी करेया करदा है, जिसेरी जवानी ढळी चले री है, अते तिसेरी कामभावना तेज हो, ता जिह्य्यां चाये, तिह्य्यां ई करे, इस बिच पाप नी है, से तिन्हेरा ब्याह होणे दे। 32 अपण जिन्ने मन बिच ठाणी लेरा है, अते तिस जो जरुरत नी हो, बल्कि अपणी मर्जी पूरी करणे बिच हक रखदा हो, अते अपणे मन बिच ऐ गल्ल ठाणी लिचे री हो, कि मैं अपणी कंआरी कुडी जो बिन ब्याही रखणा से खरा करदा। 33 इधेरे ताई जे अपणी कुडी रा ब्याह कराई दिंदा, से खरा करदा, अते जे नी ब्याहन्दा, से बी खरा करदा। 34 जां ताई कुसकी जनानी रा लाडा जिंदा है, तां ताई से तिस कने बन्धितेरी है, अपण जां तिसेरा लाडा मरी जाये, फिरी से जिस कने चाये ब्याह करी सकदी, अपण सिरफ प्रभु बिच। 35 अपण जदेयी है, जे तदेयी ई रेहू, ता मेरा ख्याल बिच से होर बी खरा है, अते मैं समझदा, कि परमेश्वर रा आत्मा मेरे पर बी है। 36 अवे मूरतियाँ रे सामणे बली चढाएरी चीजां रे बारे अन्दर - असां जो पता है कि असा सबनी जल्लेयां का ज्ञान है। ज्ञान घमण्ड जो पैदा करदा, अपण प्यार कने तरक्की हुन्दी। 37 अगर कोई समझो कि मैं किछ जाणदा, ता जदेह्या जाणना चाहिन्दा तदेह्या हल्ले ताई नी जाणदा। 38 अपण अगर कोई परमेश्वर कने प्यार करदा, ता परमेश्वर तिस जो पछियाणदे। 39 इधेरे ताई मूरतियाँ रे सामणे बली कित्तेरी चीजां रे बारे अन्दर - असा जो पता है कि मूरती इस दुनिया अन्दर कोई चीज नी है, ते इक जो छड्डी करी होर कोई परमेश्वर नी है। 40 हालांकि अम्बरा अन्दर अते धरती पर मते सारे भगवान हिन् - जिह्यां कि मते सारे भगवान ते मते सारे प्रभु हिन् -

### मूर्तियां जो चढाये रा भोजन

8 तां बी असां ताई ता इक ई परमेश्वर हिन : मतलब कि पिता, जिन्हेरे पाससे का सब चीजां हिन, ते असी तिन्हेरे ई ताई हिन। ते इक ई प्रभु हिन, मतलब कि यीशु मसीह जिन्हेरे जरिए सारी चीजां होइयाँ, ते असी बी तिन्हेरे ई जरिए हिन्। 2 अपण सबनां का ज्ञान नी है, अपण किछ ता हल्ले ताई मूरती जो किछ समझणे री वजाह कने तिन्हा सामणे बली कित्तेरी चीज जो किछ समझी करी खान्दे, ते तिन्हेरा मन कमजोर होणे री वजाह कने असुध होई जान्दा। 3 रोटी असा जो परमेश्वर रे नेडे नी करदी। अगर असी नी खान

ता म्हारा कोई नुकसान नी है, ते अगर खाई लेन ता इसेरा कोई फाएदा बी नी है। 4 अपण चुकन्ने रेहो! इह्यां ना हो कि तुसां री ऐ आजादी कुदखी कमजोरां ताई ठोकर री वजह बणी जाओ। 5 किजोकि अगर कोई तेरे साई ज्ञानी मल्लु जो मूरती वाळे देहे अन्दर रोटी खान्दा दिख्खो ते से भरोसे अन्दर कमजोर हो, ता के तिसेरे मन अन्दर मूरती रे अगे चढाएरी चीज जो खाणे री हिम्मत नी पैदा होई जाणी। 6 इस तरीके कने तेरे ज्ञान री वजह कने तिस कमजोर भाई ने, जिस ताई मसीह ने अपणी जान दिती, नष्ट होई जाणा। 7 इयां भ्याळां रे खलाफ गुनाह करणे कने ते तिन्हेरे कमजोर मन जो ठोकर पुजाणे कने, तुसी मसीह रे खलाफ गुनाह करदे। 8 इस वजह कने अगर रोटी खाणा मेरे भ्याळ जो ठोकर खुआओ, ता मैं कदी कुस्की बी तरीके कने मांस नी खाणा, इह्यां ना हो कि मैं अपणे भ्याळ ताई ठोकर री वजाह बणी जां। 9 कै मैं अजाद नी है ? कै मैं प्रेरित नी है? कै मैं यीशु जी जो जेहडे म्हारे प्रभु हिन्, नी दिख्खेरा है? कै तुसी प्रभु अन्दर मेरे बणाएरे नी हिन् ? 10 अगर मैं दुजेर्यां ताई प्रेरित नी है, तां बी तुसा ताई ता है; किजो कि तुसी प्रभु अन्दर मेरी प्रेरिताई पर इक छाप्पा हिन्। 11 जेहडे मिन्जो परखदे, तिन्हा ताई ऐ ई मेरा जवाब है। 12 क्या असां जो आर्थिक मदद रा कोई हक नी है ? 13 कै असां जो ऐ अधिकार नी है, कि कुस्की मसीही भैण कने ब्याह करी के तिस जो अपणे कन्ने रखन, जिदेह्या बाकी प्रेरित ते प्रभु जी रे भ्याळ अते कैफा करदे ?

### प्रेरित रे हक ते जिम्मेदारियां

9 या सिरफ मिन्जो ते बरनबास जो ई हक नी है कि कमाण छड्डी देन। 2 कुण कदि अपणी गिरह का खाई करी सपाही रा कम्म करदा ? कुण दाख रा बाग लाई करी तिसेरा फळ नी खान्दा ? कुण भेडुआं री दिख-रिख करी के तिन्हेरा दुध नी पीन्दा ? 3 कै मैं ऐ गल्लां मल्लुआं रे साहबे ई बोलेया करदा है ? 4 कै व्यवस्था बी ऐ ई नी बोलदी ? किजो कि मूसा री व्यवस्था अन्दर लिख्खेरा है, "दाँवते बेल्ले चलदे दाँद रा मुँह मत बह्खे।" कै परमेश्वर सिरफ दाँदां री ई फिकर करदे ? 5 या से खास करी असा ताई बोलदे। हाँ, एह असां ताई ई लिख्खा गेरा है, किजोकी एह जरूरी है कि जोतणे वाळा आस कने जोतो अते दाँवने वाळा भागी होणे री आस कने दाँवनी करो। 6 इधेरे ताई जदकि असा तुसां ताई आत्मिक चीजां बाइयाँ, ता कै एह कोई बड्डी गल्ल है कि तुम्हारी सरीरी चीजां री फसल कटन। 7 जां दुजेर्यां रा तुसां पर एह हक है, ता कै म्हारा इसका जादा नी होणा? अपण असा इस अधिकार रा फाएदा नी चुक्रेया; अपण सब किछ सैहन्दे ताकि म्हारी वजाह कने मसीह री खुसखबरी अन्दर कोई रुकावट ना हो। 8 कै तुसां जो पता नी है कि जेहडे देहे अन्दर सेवा करदे, से देहे बिच का खान्दे; ते जेहडे वेदी री सेवा करदे, से वेदी कने हेस्सेदार हुन्दे ? 9 इयां ई प्रभु जी ने बी ठेहाएरा है कि जेहडे मल्लु खुसखबरी सुणांदे, तिन्हेरी रोजी-रोटी रा गुजारा खुसखबरी कने हो। 10 अपण मैं इन्हा बिच का कोई बी गल्ल कम्मा नी अन्दी, ते मैं एह गल्लां इधेरे ताई नी लिख्खीयाँ कि मेरे ताई एह सब कित्तेया जाओ, किजोकी इसका ता मेरा मरणा ई खरा है कि कोई मेरे घमण्ड जो फजूल ठेहाओ। 11 अगर मैं खुसखबरी सुणां, ता मेरे ताई किछ बी घमण्ड री गल्ल नी है; किजो की ऐ ता मेरे ताई जरूरी है। अगर मैं खेसखबरी ना सुणां, ता मेरे पर हाय! 12 किजो की अगर ऐ मैं अपणी मरजी कने करदा ता मजदूरी मिन्जो मिलदी, ते अगर अपणी मरजी कने नी करदा तां बी भण्डारीपन मिन्जो सौंपेया गेरा है। 13 ता मेरी कुण जल्ली मजदूरी है ? एह कि खुसखबरी सुणांणे अन्दर मैं मसीह जी री खुसखबरी मुफ्त अन्दर करी देयाँ, होर ता होर खेसखबरी अन्दर जे मेरा हक है तिस जो बी मैं पूरी तराह कने कम्मा नी अणा। 14 किजो कि सबका जादा अजाद होणे रे बावजूद बी मैं अपु जो सबनी रा नोकर बणाई दिचेरा है ताकि जादा मल्लुआँ जो छिक्की सकां। 15 मैं यहूदियाँ ताई यहूदी बणेया ताकि यहूदियाँ जो छिक्की अणां। जेहडे मल्लु व्यवस्था रे अधीन हिन् तिन्हा ताई मैं व्यवस्था रे अधीन नी होणे रे बावजूद बी व्यवस्था रे अधीन बणेया कि तिन्हा जो, जेहडे व्यवस्था रे अधीन हिन, छिक्की अणां। 16 व्यवस्थाहीनां ताई मैं - जे परमेश्वर री व्यवस्था का हीन नी अपण मसीह री व्यवस्था रे अधीन है - व्यवस्थाहीन जल्ल बणेया कि व्यवस्थाहीनां जो

छिक्की अणां। 17 मैं कमजोरां ताई कमजोर जह्ना बणेया कि कमजोरां जो छिक्की अणां। मैं सबनी महुआं ताई सब किछ बणेया कि कुस्की-ना-कुस्की तरीके कने केई जह्नेयां रा उद्धार करां। 18 मैं ऐ सब किछ खुसखबरी ताई करदा कि होरनां कने इसेरा भागी होई जां। 19 तुसां जो पता नी है कि दौड़ अन्दर ता सब जह्ने दौड़दे, अपण ईनाम सिरफ इक जह्ना ई लेई जान्दा ? तुसी तिह्नां ई दौड़ो कि जीती जाओ। 20 हर इक लड़ाका सबनी किस्मे रा सबर करदा; से ता इक मुरझाणे वाळे मुकट जो लैणे ताई ऐ सब किछ करदे, अपण असी ता तिस मुकट ताई करदे जिनि ए कदि मुरझाणा नी है। 21 इधेरे ताई मैं ता इह्नां ई दौड़दा, अपण मेरा इक लक्ष है; मैं बी इह्नां ई मुक्रेयां कने लड़दा, अपण तिस साई नी जेह्दा ब्यार जो कुटदा-कुटदा लड़दा। 22 अपण मैं अपणे सरीर जो मारदा-कुटदा ते काबू अन्दर अणदा, इह्नां ना हो कि होरनां जो प्रचार करी के मैं अप्पु ई कुस्की तरीके कने निकम्मा ठैह्ना। 23 ओ भ्याळो, मैं नी चाहन्दा कि तुसी इस गल्ल का अनजाण रहेहो कि असां रे सारे बब्ब-दाद्रे बदळ रे हेठ थिये, ते सारे जह्ने समुन्दर रे बिच का पार होई गे;

### मसीह दौड़

24 ते सबनी जह्नेयां ने बदळ अन्दर ते समुन्दर अन्दर, मूसा रा बपतिस्मा लिता; 25 ते सबनी जह्नेयां ने इक्को ई आत्मिक रोटी खाई; 26 ते सबनां ने इक्को ई आत्मिक पाणी पितेया, किजो की से तिस आत्मिक सप्पड़ा का पीन्दे थिये जेह्दा तिन्हेरे कन्ने-कन्ने चलदा थिया, ते से सप्पड़ मसीह जी थिये। 27 अपण परमेश्वर तिन्हा बिच का मते जह्नेयां का खुस्स नी होए, इधेरे ताई से बणा अन्दर ई मरी गे।

### इस्त्राएल रे ईतीहास रे जरिये चेतावनी

10 एह गल्लां असां ताई द्रिष्टांत ठैहरीयां, कि जिह्नां तिन्हा लालच कितेया, तिह्नां असी बुरी चीज्जां रा लालच ना करन; 2 ते ना तुसी मूरतीयां री पूजा करणे वाळे बणो, जिह्नां कि तिन्हा बिच का मते जह्ने बणी गे थिये, जिह्नां लिखेरा है, "महु खाणा-पीणा बट्टे ते खेलणा-उटकणा खड़िते।" 3 ते ना असी व्याभिचार करन, जिह्नां तिन्हा बिच का मते जह्नेयां ने कितेया; ते इक दिन अन्दर त्रेई झार जह्ने मरी गे। 4 ते ना असा जो प्रभू जी जो परखणा चाहिन्दा, जिह्नां तिन्हा बिच का मते जह्नेयां ने कितेया, ते कीड़ेयां ने तिन्हा जो मारी रखेया। 5 ते ना तुसी कुडकुड़ाओ, जिह्नां कि तिन्हा बिच का मते जह्ने कुडकुड़ाए थिये ते मारी रखणे वाळे रे हथ्थे मरी गे थिये। 6 अपण ऐ सब गल्लां, जेह्दी तिन्हा पर पेइयां, द्रिष्टांत साहई थियां; ते से म्हारी चेतावनी ताई जेह्दे दुनिया रे आखरी बेले अन्दर रहन्दे, लिखेया गेरीयां हिन्। 7 इधेरे ताई जेह्दा दावा करदा, "मैं पक्का है," से चुकन्ना रहेहो कि कुदखी छुडकी ना पेयो। 8 तुसी कुस्की इदेहई परख अन्दर नी पे, जेह्दी महुआं रे सैके का बाहर है। परमेश्वर सचे हिन् ते तिन्हा ने तुसां जो सैके री ताकत का बधी करी कुस्की परख अन्दर नी पैणा दैणा है, अपण परख समेत तिन्हा ने तिस का निकळणे रा रस्ता बी कड़णा कि तुसी सैहई सको। 9 इधेरे ताई, ओ मेरे प्यारेयो, मूरतियां री पूजा करणे का बची रहेहो। 10 मैं तुसां जो समझदार मन्त्री करी बोलदा : जे मैं बोलदा, तिस जो तुसी परखी करी दिखवो। 11 से धन्यावाद रा कटोरा, जिस पर असी धन्यावाद करदे; कै मसीह जी रे खून री सहभागिता नी है ? 12 इधेरे ताई कि इक्कोई रोटी है ता असी बी जेह्दे मते हिन्, इक सरीर हिन् : किजोकी असी सब जह्ने तिस्सोई इक रोटी अन्दर सामिल हुन्दे। 13 जेह्दे सरीर का इस्त्राएली हिन्, तिन्हा जो दिखवो : कै बली जो खाणे वाळे वेदी रे सहभागी नी हिन्

### मूर्ती पूजा रे खलाफ चेतावनी

14 फिरी मैं कै बोलदा ? कै ए कि मूरती पर चढ़ाएरी बली किछ है, या मूरती किछ है ? 15 ना, अपण ऐ कि होरसी जाती जे बलीयां दिन्दे; से परमेश्वर ताई नी अपण बुरी आत्मां ताई दिन्दे ते मैं नी चाहन्दा कि तुसी बुरी आत्मां रे सहभागी होन् । 16 तुसी प्रभू जी रे कटोरे ते बुरी आत्मां रे कटोरे, दोन्नां बिच का नी पी सकदे। तुसी प्रभू जी री मेज ते बुरी आत्मां रे मेज, दोन्नां रे हिसे नी होई सकदे। 17 कै असी प्रभू जी जो लैह चढ़ान्दे? कै असी तिन्हा का जादा

ताकतवर हिन् ? 18 सारी चीज्जां मेरे ताई खरी ता हिन्, अपण से सब फाएदे री नी हिन् : सब चीज्जां मेरे ताई खरी ता हिन्, अपण इन्हा सब चीज्जां कने उन्नती नी हुन्दी। 19 कोई सिरफ अपणे ई भला नी, अपण दुजे रे भले जो बी तोप्पो। 20 जे किछ बी कसाईयां री दुकाना पर बिकदा, से खाओ ते सबर री वजाह कने किछ बी मत पुछछो। 21 "किजोकी धरती ते तिस अन्दर जे किछ है सब प्रभू जी री है।" 22 अगर भरोसा नी करणे वाळेयां बिच का कोई तुसा जो घरे सट्टो, ते तुसी जाणा चाहो, ता जे किछ बी तुसा रे सामणे रखेया जाओ से खाओ; ते सबर री वजाह कने किछ मत पुछछो।

### सब किछ परमेश्वर री महिमा ताई

23 अपण अगर कोई तुसा जो बोल्हो, "ऐ ता मूरती जो बली चढ़ाएरी चीज है," ता तिस्स बोलणे वाळे री वजाह कने ते सबर री वजाह कने मत खाओ। 24 मेरा मतलब तेरा सबर नी है, अपण तिस दुजे महु रा है। भला, मेरी आजादी दुजे री सोच कने किजो परखी जाओ ? 25 अगर मैं धन्यावाद करी के साइझी हुन्दा, ता जिस पर मैं धन्यावाद करदा तिसेरी वजाह कने मेरी बदनामी किजो हुन्दी ? 26 इधेरे ताई तुसी चाए खाओ, चाए पियो, चाए जे किछ करो, सब किछ परमेश्वर री बड़ाई ताई करो। 27 तुसी ना यहूदियां, ना यूनानियां, अते ना परमेश्वर री कलीसिया ताई ठोकर री वजाह बणो। 28 जिह्नां मैं बी सबनी गल्लां अन्दर सबनां जो खुस करदा, ते अपना नी अपण मते जह्नेयां रा फाएदा तोपदा कि से उद्धार पान। 29 तुसी मेरे साई चाल चलो जियां मैं मसीह जी साई चाल चलदा। 30 ओ मेरे भाईयो, मैं तुसां री तारिफ करदा की तुसी सब गल्लां बिच मेरे जो याद रखदे, ते जे परंपरा मैं तुसां जो दिति री है तिसजो तुसि मनदे। 31 अपण मैं चांदा की तुसी ए जाणी लेयो की हर इक्क आदमी रा सिर मसीह ते जनानी रा सिर आदमी है कने मसीह रा सिर परमेश्वर 32 जे आदमी सिर ढकी करी प्रार्थना ते भविष्यवाणी करदा से अपणे सिर री बेज्जती करदा। 33 अपण जे जनानी सिर बगैर ढके प्रार्थना या भविष्यवाणी करदी से अपणे सिर री बेज्जती करदी, किजोकी से गंजी होणे रे बराबर है।

11 जे जनानी सिर ना ढके ता बाळ बी कटाई लेय, जे जनानी ताई बाळ कटाणा या गंजी होणा शरम री गल्ल है ता से सिर ढके।

### आराधना बिच सिर ढकणा

2 हाँ आदमी जो अपना सिर ढकणा ठीक नी, किजोकी से परमेश्वर रा स्वरूप ते इज्जत है, अपना जनानी आदमी री इज्जत है। 3 किजोकी आदमी जनानी का नी होया अपण जनानी आदमी का होई, ते आदमी जनानी ताई नी बणाया गया अपण जनानी आदमी ताई बणाई गई। 4 अत्ते मडद जनानी ताई नी बणाया गया, अपण जनानी मडद ताई बणाई गई ए। 5 इस ताई स्वर्गदुतां री वजह कने जनानी जो ए इ सही है की हक्क जो अपणे सिर पर रखे। 6 तां बी प्रभू बिच जनानी बिना आदमी रे है न ई आदमी बिना जनानी रे। 7 किजोकी जियां जनानी आदमी का है तियां ई आदमी जनानी का है, अपण सारी चिजां परमेश्वर का हिन्। 8 अवे तुसी अप्पु ई सोचो क्या जनानी जो बगैर सिर ढके रे परमेश्वर का प्रार्थना करना सोभा दिदा? 9 क्या आम तौर पर तुसी नी जाणदे की आदमी लबे बाळ रखे ता तिसेरे ताई बेज्जती री गल्ल है। 10 अपण जे जनानी लबे बाळ रखे तां तिसेरे ताई ए सोभा री गल्ल है, किजोकी बाळ तिसजो औढ़नी ताई दिते गे रे हिन्। 11 अपण जे कोई बहस करणा चाए तां ए जाणी लेय की ए ना हमारे पाससे का है ना परमेश्वर पाससे का कलिसिया री कोई इदेइ रीत है। 12 अपण ए हुक्म दैणे जो मैं तुसां री तारिफ नी करदा इस ताई कि तुसां रे कठिणे री वजह कने भलाई नी अपण नुक्सान हुंदा। 13 किजोकी पैले ता मैं ए सुणदा कि जां तुसी कलीसिया बिच कठिदें ता तुसां बिच फूट पैई री हुदीं ते मैं इस पर थोडा-मता भरोसा बी करदा। 14 किजोकी गुटबन्दी बी तुसां बिच जरूर होणी, इस ताई जे लोक तुसां बिच खरे हिन् से सामणे आई जाण। 15 अते तुसी जे इक्क जगह कठिदें ए प्रभू-भोज ताई नी कठिदें, 16 किजोकी खाणे रे वेले इक्क दुए का पैले ई अपनी रोडि खाई लिदां, इस तरिके कने कोई ता भुक्खा रेई जांदा ते कोई मतवाला होई जादा।

### प्रभु भोज रे बारे बिच

17 क्या खाणे-पीणे ताई तुसां रे घर नी हिन? या परमेश्वर री कलिसेया जो तुसी बेकार समजदे, ते जिन्हा का नी है है तिन्हा जो तसी शर्मिदां करदे? तां मै तुसां जो क्या बोलां? क्या इस गल्ल ताई मै तूसां री तारिफ करां? नी, मै तारिफ नी करदा। 18 किजोकि ए गल्ल मेरे जो परमेश्वर का मेरे जो मिलि ते मै तुसां जो पुजाई दित्ति की यीशु मसीह जी ने जिस रात्ति से पकड़वाए गे थिये रोष्ट्रि लित्ति, 19 ते धनवाद करी के तोड़ी ते बोलेया, ए मेरा सरीर है जे तुसां ताई है मेरी याद बिच इयां ई करेया करो। 20 इयां ई तिन्हा ने बियारी रे पिछ्छे कटोरा बी लित्ता ते बोलेया ए कटोरा मेरे खुन रा नोया वादा है, जां कदी बी पियो तां मेरी याद बिच इयां ई करेया करो। 21 किजोकी जा कदी तुसी इस रोष्ट्रि बिच का खादें या इस कटोरे बिच का पिन्दे तां प्रभू री मौत जो जां तिकर से ना आण प्रचार करदे। 22 ;इस ताई जे कोई गलत तरिके कने प्रभू री रोष्ट्रि खाए य तिन्हेरे कटोरे बिच का पिए से प्रभू रे सरीर ते खुन रा गुन्हेगार ठैहरणा। 23 इस ताई म्हणु अपणे आप जो परखी लेय ते इस तरिके कने इस रोष्ट्रि बिच का खाए ते इसी कटोरे बिच का पिए। 24 किजोकी जे खादें-पिदें वेले प्रभू रे सरीर जो ना पैहचाणे से इस खाणे ते पिणे कने अपणे उप्पर सजा लेइ आदां, 25 इसी वजह कने तुसां बिच मते कमजोर ते बमार हिन ते मते सारे सोई बी गे रे हिन। 26 जे असी अप्पु जो परखी लिदें तां असी सजा नी पादें। 27 अपण प्रभू असां जो सजा देई करी असां री ताडना करदे इस ताई की असी दनिया कने गुन्हेगार ना ठैहरण। 28 इस ताई हे मेरे भाईयो, जां तुसी खाणे ताई कठिंदे तां इक्क दुए ताई रुकेया करो। 29 जे कोई भूखा हो ता अपणे घरे खाई लेया करे जिस कने तुसां रा कठीणा सजा री वजह ना बणे। बाकि गल्लां जो मै आई करी ठीक करी दिगां। 30 हे भाईयो, मै नी चादां की तुसी आत्मिक वरदानां रे बारे बिच अनजाण रेयो। 31 तुसी जाणदे की तुसी होरनी जातियां बिच का थिये, तां गूंगी मुर्तियां रे पिछ्छे जियां चलाए जादें थिये तियां ई चलदे थिये। 32 इस ताई मै तुसां जो चितौणी देया करदा है, की जे कोई परमेश्वर रे आत्मा री अगुवाई कने बोल्या करदा है, से नी बोलदा की यीशु जी स्नापित हिन; ते ना ई कोई पवित्र-आत्मा रे बगैर बोळि सकदा कि यीशु जी प्रभू हिन। 33 वरदान तां मते तरिके रे हिन, अपण आत्मा इक्क ई है; 34 ते सेवा बी मती तरिके रे हिन, अपण प्रभू इक्क ई है;

### आत्मिक वरदान

12 ते असरदार कम्म तां बडे तरिके रे हिन, अपण परमेश्वर इक्क ई है, जे सारेयां बिच हर तरिके रा असर पैदा करदे। 2 अपण सारेयां जो फेदा पुजाणे ताई हर इक्क जौ आत्मा री रोसनी दित्ति जांदी। 3 किजोकी इक्क जो आत्मा रे जरिए समज री गल्लां दित्ति जादीं, ते दुए जो तिसी आत्मा रे जरिए जानकारी री गल्लां। 4 कुसकी जो तिसी आत्मा कने भरोसा, ते कुसकी जो तिसी आत्मा कने ठीक करणे रा वरदान दित्तेया जांदा। 5 फिरी कुसकी जो ताकत रे कम्म करणे री सक्ती, ते कुसकी जो भविष्यवाणी रा, ते कुसकी जो आत्मा री परख, ते कुसकी जो मते तरिके री भासा बोलणे रा, ते कुसकी जो भासा रा मतलब दसणे रा। 6 अपण ए सारे असरदार कम्म से इ इक्क आत्मा करांदा, ते जिसजो जे चांदा तिसजो से बंडी दिंदा। 7 किजोकी जिस तरिके कने सरीर ता इक्क है अपण तिसेरे अंग मते सारे हिन, अपण तिस इक्क क सरीर रे सारे अंग मते सारे होणे पर बी इक्क ई सरीर है; तिसी तरिके कने मसीह बी है। 8 किजोकी असी सारेयां ने चाए यहूदी हो युनानी, चाए गुलाम हो या आजाद, इक्क ई आत्मा रे जरिए इक्क सरीर होणे ताई बपतिस्मा लित्ता, ते असी सारेयां जो इक्क इ आत्मा पुआइ गेईइ। 9 इस ताई की सरीर बिच इक्क इ अंग नी अपण मते सारे हिन। 10 जे हाथ्य बोले मै पैर नी इस ताई सरीर रा नी है, "तां क्या से इस वजह कने सरीर रा नी है? 11 ते अगर कात्र बोले, "मै हाख्ख नी इस ताई सरीर रा नी है, "तां क्या से इस वजह कने सरीर रा नी है?"

### सरीर इक्क : पर अंग अनेक

12 जे सारा सरीर हाख्ख इ हुदां तां सुनणा कुते हुंदा? जे सारा सरीर कात्र इ हुदीं तां सुघंणा कुते हुंदा? 13 अपण हकीकत बिच परमेश्वर ने सारे अंगा जो

इक्क-इक्क करी के अपणी मर्जी कने सरीर बिच रख्खेया। 14 जे अगर से सारे इक्क इ अंग हुंदे, तां सरीर कुते हुंदा? 15 अपण सारे अंग मते सारे ता हिन अपण सरीर इक्क इ है। 16 हाख्ख हाथ्य जो नी बोळि सकदी, "मेरे जो तेरी जरुरत नी है, ते ना सिर पैर जो बोळि सकदा, "मेरे जो तेरी जरुरत नी है।" 17 जियां सरीर रे से अंग जे बाकियां का कमजोर हिन, बडे जादा जरुरी हिन; 18 ते सरीर रे तिन्हा अंगा जो जिन्हा जो असी इज्जत रे जोगे नी समजदे तिन्हा इ जो असी जादा इज्जत बी दिंदे; ते असां रे घट सोभा वाळे अंग होर बी जादा सोभा दैणे वाळे होई जांदे, 19 फिरी बी असां रे सोभा दैणे वाळे अंगा जो इसेरी जरुरत नी है। अपण परमेश्वर ने सरीर जो इदेया बणाया की की अंग जो इज्जत री कमी थी तिसजो इ जादा इज्जत मिले। 20 ताकी सरीर बिच फूट ना पेय, अपण इक्क अंग दुए री बराबर फिकर करे। 21 इस ताई जां इक्क अंग जो दुख हुंदा तां सारे अंग तिस कने दुख उठांदे; ते जां इक्क अंग री तारिफ हुदीं तां सारे अंग तिस कने खुसी मणांदे। 22 इस तरिके तुसी सारे मिली करी मसीह रा इक्क सरीर हिन, ते तिन्हेरे बखरे-बखरे अंग हिन; 23 ते परमेश्वर ने कलिसेया बिच अलग-अलग लोक लाए रे हिन; पैले चेले, दुए भविष्यदक्ता, त्रिए सखाणे वाळे, फिरी ताकत रे कम्म करणे वाळे, फिरी ठीक करणे वाळे, ते उपकार करणे वाळे, ते इन्तजाम करणे वाळे, ते मती भासा बोलणे वाळे। 24 क्या सारे चेले हिन? क्या सारे भविष्यदक्ता हिन, क्या सारे सखाणे वाळे हिन? क्या सारे ताकत रे कम्म करणे वाळे हिन? 25 क्या सारेयां जो ठीक करणे रा वरदान मिले रा है? क्या सारे बखरी-बखरी भासा बोलदे? 26 क्या सारे बखरी-बखरी भासा रा मतलब दसदे? तुसी बड्डे का बड्डे वरदान री धून बिच रेयो। अपण मै तुसजो सब का बदिया रस्ता दसदा। 27 जे मै म्हणुआं ते स्वर्गदुतां री बोलियां बोलां ते प्यार ना करां तां मै ठणठणादां पित्तल ते झणझणादीं झाजं है। 28 ते जे मै भविष्यवाणी करी सकां ते सारें राज ते हर तरिके री गल्ल जो समजी सकां ते मेरे जो इत्ते तिकर भरोसा हो की मै पहाडां जो हटाई सकदा अपण प्यार ना करां तां मै किछ बी नी 29 जे मै अपणी सारी सम्पति गरिब्यां जो खुआई देयां ते अपणा सीर फुकणे ताई देइ देयां अपण प्यार ना रख्खां तां मेरे जो कोई फेदा नी। 30 प्यार सबर रख्खा ते रहमदिल है, प्यार नफरत नी करदा, प्यार अपणी बडाई नी करदा ते फुलदा नी। 31 से गलत चाल नी चलदा, से अपणी भलाई नी चाहदां, गुस्सा नी करदा, बुरा नी मनदा।

### प्यार सबका अच्छा रस्ता

13 गलत गल्ल कने खुस नी हुदां, अपण सच कने खुस हुदां। 2 से सब गल्लां सेइ लिन्दा, सारी गल्लां री प्रतिती करदा, सारी गल्लां री उम्मीद रख्खा, सारी गल्लां बिच सबर करदा। 3 प्यार कदी टलदा नी, भविष्यवाणी हो तां मुकी जाणी, भासा हो तां जादीं रैहणी, ज्ञान हो ता मिटी जाणा। 4 किजोकी असां रा ज्ञान अधुरा है, ते असां री भविष्यवाणी अधुरी है, 5 अपण जां सर्वसिध ने ईणा तां अधुरापन मिटी जाणा। 6; जां मै बच्चा थिया तां मै बच्चेयां साई बोलदा थिया, बच्चेयां साई मन थिया ते बच्चेयां साई समज थी अपण जां बड्डा होई गया तां बच्चेयां वाळी गल्लां छड्डि दित्ति। 7 अब्बे असां जो दर्पण बिच धुधळा जदेया दिसदा अपण तिस वेले आमणे-सामणे दिखगे, इस वेले मेरा ज्ञान अधुरा है अपण तिस वेले इदेइ पुरे तरिके कने पेहचाणा जिय्यां मै पेहचाणेया गया है। 8 अपण अवे भरोसा, उम्मीद ते प्यार ए तिन्ने टिकाउ हिन अपण इन्हा बिच सबका बड्डा प्यार है। 9 प्यार रे पिछ्छे चलो ते आत्मिक वरदानां री धून बिच रेयो, खास तौर पर ए की भविष्यवाणी करो। 10 किजोकी जे अन्य भाषा बिच गल्लां करदा से परमेश्वर कने गल्लां करदा इस ताई की तिसेरी गल्लां कोई नी समजदा किजोकी से राज री गल्लां आत्मा बिच होई करी बोलदा। 11 अपण जे भविष्यवाणी करदा से म्हणुआं कने उन्नति ते उपदेश ते साति री गल्लां बोलदा। 12 जे अन्य भाषा बिच गल्लां करद से अपणी ई उन्नति करदा अपण जे भविष्यवाणी करदा से कलिसेया री उन्नति करदा। 13 मै चाहदां की तुसी अन्य-भाषा बिच गल्लां करो अपण इसका जादा ए चाहदां की भविष्यवाणी करो किजोकी अन्या-भाषा बोलणे वाळा कलिसेया री उन्नति ताई मतलब ना समजाए तां भविष्यवाणी करणे वाळा तिसका बधी करी है।

### भविष्यवाणी ते अन्य-अन्य भाषा

**14** इस ताई हे भाईयो जे मै तुसां का आई करी अन्य-भाषा बिच गलां करां ते प्रकाश या ज्ञान या उपदेश री गलां तुसां कने ना बोलां तां मेरे का फिरी तुसजो क्या फैदा। 2 इसी तरिके कने बगैर जान वाळी चिजां बि जिन्हा बिच का अवाज निकळदी जिय्यां बाँसुरी या बीन,अगर तिन्हेरे अवाज बिच कोई फर्क ना हो जे फुकेया या बजाया जादां किय्यां पेहचाणा जाणा? 3 जे तुहरी री अवाज साफ ना हो तां कुण लड़ाई ताई तयारी करणा? 4 तिय्यां ई तुसी बी जे जिब्ब का साफ-साफ गल्ल ना करो तां जे किछ बोलेया जादें से किय्यां समजेया जाणा?तुसी तां हवा कने गलां करणे वाले ठैहरणे। 5 दुनिया बिच किन्नि ई तरिके री भाषा किजो ना हो अपण तिन्हा बिच का कोई बी बिना मतलब री नी होणी। 6 तिय्यां ई जे मै कुसकी भाषा र मलब ना समजां तां बोलणे वाले री नजर बिच परदेसी लगणा ते बोळणे वाला मेरी नजर बिच परदेसी ठैहरणा। 7 इसी ताई तुसी बी जां आत्मिक वरदानां री धुन बिच हो तां कोसीस करो की तुसां री वरदानां री उन्नति कने कलिसीया री बी उन्नति हो। 8 इस ताई जे अन्य भाषा बोले से प्रार्थना करे की उसेरा मतलब बी समझाई सके। 9 इस ताई जे मै अन्य-भाषा बिच प्रार्थना करां तां मेरी आत्मा प्रार्थना करदी अपणी मेरी समझ कम्म नी करदी। 10 अते क्या करण चाएदा? मै आत्मा कने प्रार्थना करणा ते समझ कने बी प्रार्थना करणा,मै आत्मा कने बी गागां ते समज कने बी गागां। 11 नी तां जे तु आत्मा कने ई धन्यवाद करणा तां अज्ञानी तेरे धन्यवाद पर किय्यां आमीन करणा?किजोकी से ता नी जाणदा की तु क्या बोलदा। 12 तू तां खरे तरिके कने धनवाद करदा अपण दुए रा फैदा नी हुदां। 13 मै अपणे परमेश्वर र धनवाद करदा की मै तुसी सारेयां का बद्दिह करी अन्यभाषा बोलदा। 14 अपण कलिसीया बिच अन्यभाषा रे दस हजार गलां बोलणे का बी जादा मेरे जो ए मेरे खरा लगदा की दुए जो सखाणे ताई समजदारी री पाँज ई गलां बोलां। 15 हे भाईयो,तुसी समज बिच बचे ना बणो,बुराई बिच ता बचे ई रेयो अपण समज बिच समजदार बणो 16 व्यवस्था बिच लिखे रा है की प्रभु बोलदे की मै अनजान भाषा बोळणे वालेयां रे जरिए ते दुए मुँह रे जरिए इन्हा लोकां कने गल्ल करणी तां बी तिन्हा ने मेरी नी सुनणी। 17 इस ताई अन्यभाषा विश्वासियां ताई नी अपण अविश्वासियां ताई इक्क निसानि है।ते भविष्यवाणी अविश्वासियां ताई नी अपण विश्वासियां ताई निसानि है। 18 अते जे कलिसीया इक्क जगह कठि री हो ते सारे रे सारे अन्यभाषा बोलण ते बार वाले या अविश्वासी अन्दर आई जाण तां क्या तुसां जो पागल नी बोलगे? 19 अपण जे सारे ई भविष्यवाणी करणा लगी पेय ते कोई बार वाले या अविश्वासी अन्दर आई जाण ते सारेयां ने तिसजो दोषी ठेहराई दिगें ते परखि लिगें। 20 ते तिसेरी मन री गलां सामणे आई जाणी ते तां तिनिए मुँह रे भारे पेड़ करी परमेश्वर जो प्रणाम करणा ते मन्नि लिगां की सच बिच परमेश्वर तुसां रे बिच है। 21 इस ताई क्या करणा चाएदा,जां तुसी कठिदें तां हर इक्क रे मन बिच भजन या उपदेश या अन्यभाषा या रौसनी या अन्यभाषा रा मतलब दसणा हुदां,सारा किछ आत्मिक उन्नति ताई होणा चाएदा। 22 जे अन्यभाषा बिच गलां करणी हो तां दो या मते होण तां तिन जणे बारी-बारी बोलण ते इक्क जणा मतलब समजाए। 23 अपण जे समजाणे वाला ना हो तां अन्यभाषा बोळणे वालां कलिसीया बिच चुप रेय,ते अपण मन बिच परमेश्वर कने गलां करे। 24 भविष्यवाणी बिच दो या त्रै बोलण ते बाकि तिन्हेरी गलां जो परखण। 25 अपण जे दुए पर जे बैठे रा है कोई इक्षरीय प्रकाश हो तां पैहला चुप होइ जाए।

### उपासना बिच अनुशासन

26 किजोकी तुसी सारे इक्क-इक्क करी के भविष्यवाणी करी सकदे ताकी सारे सिखण ते सारे शार्ती पाण। 27 ते भविष्यवाणी री आत्मा भविष्यवाणी रे बस बिच है, 28 किजोकी परमेश्वर गड़बड़ी रा नी अपण शार्ती रा परमेश्वर है, जिय्यां पवित्र लोकां री सारी कलिसीयां बिच है। 29 जनानियां कलिसीयां री सगंती बिच चुप रहै किजोकी तिन्हा जो गलां करणे री हुक्म नी है अपण अधीन रहै, रा हुक्म है जिय्यां की व्यवस्था बिच लिखे रा बी है। 30 जे अगर से किछ सिखणा चाहू तां अपणे घरे अपणे लाड़ेयां का पुच्छे किजोकी

जनानियां रा कलिसीयां बिच बोलणा समे री गल्ल है। 31 क्या परमेश्वर रा वचन तुसां का निकळे रा है या तुसी तिकर ई पुजे रा है? 32 जे कोई म्हणु अपणे आप जो भविष्यवाणी या आत्मिक म्हणु समजे तां ए जाणी लेय की जे गलां मै तुसां जो लिखदा से प्रभू रे हुक्म है। 33 अपण जे कोई ए ना मन्ने तां तिसजो बी मन्नां। 34 अते हे भाईयो भविष्यवाणी करणे री धून बिच रेयो,अन्यभाषा बोळणे का मना करो। 35 अपण सारी गलां शार्ती कने ते सलीके कने किति जाए। 36 ओ भाईयो,अवे मै तुसां जो से इ खुसखबरी सुनदां जे पैले सुणाई बैठे रा है,जिसजो तुसी मन्नेया बी थिया ते जि सविच तुसी मजबूत बी हिन। 37 तिसेरे इ वजह कने तुसां रा छुटाकरा बी हुदां,जे तिस खुसखबरी जो जे मै तुसां जो सुणाया थिया,याद रखदे;नी ता तुसां रा भरोसा करणा बेकार होया। 38 इसी वजह कने सबका पैले मै तुसां जो से इ गल्ल पुजाई दिती,जे मेरे जो पुजि थी कि पवित्रशास्त्र रे वचन रे हसाब कने यीशु मसीह जी असां रे पापां ताई मरी गे, 39 ते दब्बे गे,ते पवित्रशास्त्र ए हसाब कने तिजे दिन जिन्दे बी होइ गे, 40 ते कैफा जो तां बारेयां जो बी दिस्से,

### मसीह रा दोबारा जिन्दा होई जाणा

**15** फिरी स पाँज सौ का बी जादा भाईयां जो बी कड़े इ दिसे,जिन्हा बिच का मते जणे हल्ले तिकर जिन्दे हिन,अपण किछ सोई गे। 2 फिरी से याकब जो दिस्से तां फिरी सारे प्रेरितां जो दिसे। 3 सारेयां रे बाद मेरे जो दिसे,जे मन्नां आद्रे दिनां रा जम्मे रा है। 4 किजोकी मै प्रेरितां बिच सारेयां छोटा है,बल्कि प्रेरित केहलाणे रे जोगे बी नी, किजोकी मै परमेश्वर री कलिसीया जो तगं किन्तेया थिया। 5 अपण मै जे किछ बी है,परमेश्वर रे अनुग्रह कने इ है।तिन्हेरा अनुग्रह जे मेरे पर होया,से बेकार नी होया;अपण मै तिन्हा सारेयां का बधी करी मेहनत बी किती : तां बी ए मेरे पास्से का नी होया अपण परमेश्वर रे अनुग्रह कने जे मेरे पर थिया। 6 ईधेरे ताई चाए मै हो ते चाए से होण,असी ए इ प्रचार करदे,ते इसी पर तुसि भरोसा बी किता। 7 ईधेरे ताई कि जां मसीह रा ए प्रचार किता जादां कि से मरे रे लोकां बिच का जिन्दे होइ गे,तां तुसां बिच का किन्ने कियां बोलदे कि मरे रे लोकां रा जिन्दा होणा है इ नी? 8 जे मरे रे लोकां रा जिन्दा होणा है इ नी,तां मसीह बी इन्दा नी होये; 9 ते जे मसीह नी जिन्दे होए तां असां रा प्रचार करणा बी बेकार है ते तुसां रा भरोसा बी बेकार है। 10 बल्कि असी परमेश्वर रे झुट्टे गुआह ठैहरे; किजोकी असां ने परमेश्वर रे बारे बिच ए गुआई दिती कि तिन्हा ने मसीह जो जिन्दा करी दिता हालांकि जिन्दा नी किता,जे मरे रे लोक जिन्दा नी हुदें। 11 ते जे मुदें जिन्दा नी हुदें तां मसीह बी जिन्दा नी होए।

### असां रा दोबारा जिन्दा होई जाणा

12 ते मसीह जिन्दे नी होए,तां तुसां रा भरोसा बेकार है, ते तुसी हल्ले तिकरआपणे पापां बिच फसे रे हिन। 13 बल्कि जे मसीह बिच सोइ गे रे हिन,से बी खतम इ होये। 14 जे असी सिर्फ इसी जिन्दगी बिच मसीह का उम्मीद रखदे तां फिरी असी सारे लोकां का अभागे हिन। 15 अपण सचमुच मसीह मुदेंयां बिच का जिन्दा होइ गे रे हिन,ते जे सोइ गे रे हिन तिन्हा बिच से पैले फल होए। 16 किजोकी जां म्हणु रे जरिए मौत आई तां म्हणु रे इ जरिये फिरी जिन्दा होणा बी आया। 17 ते जियां आदम बिच सारे रदे,तियां इ मसीह बिच सारे जिन्दे किन्ते जाणे, 18 अपण हर इक्क अपणी-अपणी बारी कने : पैला फल मसीह,फिरी मसीह पर आणे पर तिन्हेरे लोक। 19 ईसेरे बाद सब खतम होणा। तिस वेले तिन्हा ने सारी ताकतां ते सारे हक ते ताकत जो मुकाइ करी राज जो परेश्वर पीता रे हत्थां सौपिं देणा। 20 किजोकी जां तिकर ने अपणे दुस्मणा जो अपणे पैरां हेठ ना लेइ आण तां तिकर तिन्हेरा राज करणा जरूरी है। 21 सारेयां आखरी दुस्मन जे मुकाया जाणा से मौत है। 22 किजोकी परमेश्वर ने सारा किछ तिन्हेरे पैरां हेठ करी रखे रा है,"अपण जां से बोलदे कि सारा किछ तिन्हेरे पैरां हेठ करी दिन्ते गे रा है तां साफ है कि जिनिये सारा किछ तिन्हेरे थल्ले करी दिता से अपु अलग रेया। 23 ते जां सारा किछ तिन्हेरे थल्ले होइ जाणा,तां पुत्त ने अपु बी तिन्हेरे थल्ले होइ जाणा,जिनिये सारा किछ तिन्हेरे थल्ले करी दिता ताकी सारे बिच परमेश्वर इ सब किछ हो। 24 नी तां जे लोक मरे रे लोकां तिकर बपतिस्मा लिदें,तिन्हा ने क्या करणा? जे मुदें जिन्दे

इ नी हुदें तां फिरी किजो तिन्हरे ताई बपतिस्मा लिदें? 25 ते असी बी किजो हर वेले खतरे बिच पेइ रहन्दे? 26 ओ भाईयो, मेरे जो तिस घमंड री कसम जे असां रे मसीह यीशु बिच मै तुसां रे बारे बिच करदा कि मै हर रोज मरदा। 27 जे मै म्हणुआं रे तौर-तरिके पर इफिसुस मे जगली जानवर कने लडेया तां मेरे जो क्या पैदा होया? जे मेरे रे लोक जिन्दे नी कित्ते जाण, "तां आओ खान्दे-पिन्दे, किजोकी कल तां मरी इ जाणा।" 28 धोखा मत खान्दे, "बुरी सगंत खरे चरित्र जो खराब करी दिदीं।" 29 धर्म ताई जागी हो ते पाप मत करो; किजोकी किछ इदेय हिन जे परमेश्वर जो नी जाणदे। मै तुसां जो सरमसार करणे ताई ए बोलदा। 30 अवे कोइ ए बोलगा, "मुदें कुस तरिके कने जिन्दे होइ जान्दे, ते कदेय सरीर कने आन्दे?" 31 हे नासमज! जे किछ तु बोदां, जां तिकर से ना मरे, जिन्दा नी कित्ता जादां। 32 ते जे तु बोदां, ए से सरीर नी जे पैदा होणे वाळी है, अपण सिर्फ दाणा इ है, चाए गहू रा या चाए कुसकी होर अनाज दा। 33 अपण परमेश्वर अपणी मर्जी रे हसाब कने तिसजो देइ दिदां, ते हर इक बी जो तिसेरा खास सरीर। 34 सारे सरीर इक जदेय नी : म्हणुआम रा सरीर किछ होर है, जानवरा रा सरीर किछ होर है; पछिया रा सरीर किछ होर है; मच्छियां रा सरीर किछ होर है।

### फिरी जिन्दे होणे वाळा सरीर

35 स्वर्गिय सरीर है ते किछ दिनां रहणे वाळा सरीर बी है। अपण स्वर्गिय सरीर बखरे रूप रे हुदें ते किछ दिनां तिकर रहणे वाळे सरीर किछ होर। 36 सूरज किछ होर किस्म रा है ते चाँद रा किछ होर ते तारे किछ होर (किजोकी इक तारा दुए तारे का बखरा है।) 37 मरे रे लोकां रा जिन्दा होण किछ इदेया इ है। सरीर मरणे वाळे हाल बिच बोया जादां ते कदी ना मुकणे वाळे रूप बिच जिन्दा हुदां। 38 से अनादर कने बोयां जादां ते महीमा कने जिन्दा होइ जादां; कमजोरी कने बोया जादां, ते ताकत कने जिन्दा होइ जादां। 39 दुनयावी सरीर बोया जादाम ते आत्मिक सरीर जिन्दा हुदां : हालांकि दुनियावी सरीर है तां आत्मिक सरीर बी है। 40 इदेया बी लिखे रा बी है, कि "पैला म्हणु, मतलब आदम जिन्दा म्हणु बणेया, ते आखरी आदम, जिन्दगी दैणे वाळी आत्मा बणेया। 41 अपण पैले आत्मिक नी थिया अपण दुनियावी थिया, इसेरे बाद आत्मिक होया। 42 पैला म्हणु धरती का, मतलब कि मिट्टी रा थिया; दुआ म्हणु स्वर्गिय है। 43 जियां कि से मिट्टी रा थिया, तियां इ से बी हिन जे मिट्टी रे हिन; ते जियां से स्वर्गिय हिन तियां इ से बी हिन जे स्वर्गिय हिन। 44 ते जियां असां ने तिसेरा रूप लिचेया जे मिट्टी रा थिया तियां इ तिस स्वर्गिय रा रूप बी लैणा। 45 ओ भाईयो, मै ए बोलदा कि माँस ते खून परमेश्वर रे राज रे हकदार नी होइ सकदे ते ना मुकणे वाळा कदी ना मुकणे वाळे रा हकदार होइ सकदा। 46 दिखखो, मै तुसां कने राज दी लादां : असी सारेया ने नी सोणा, अपण सारेयां ने बदली जाणा। 47 ते ए इक पल बिच, पलक झपकादें इ आखरी तुहरी फुकदे इ होइ जाणा। किजोकी तुहरी फुकी जाणी ते मुदें कदी ना मुकणे वाळे रूप बिच चुकि लिचे जाणे ते असां ने बदली जाणा। 48 किजोकी जरूरी है कि ए खतम होणे वाळा सरीर कदी ना मुकणे वाळे रूप जो पाइ ले, ते ए मरणे वाळा सरीर अमरता जो पाई ले। 49 ते जां इस मुकणे वाळे ने कदी ना मुकणे वाळा रूप लेइ लैणा ते इस मरणे वाळे ने अमरता जो पाइ लैणा तां से वचन जे लिखे रा है पुरा होइ जाणा : "जय ने मौत जो निगळी लिचेया। 50 हे मौत, तेरी जीत कुते गी? हे मौत, तेरा डकं कुते रेया?" 51 मौत रा डकं पाप है, ते पाप री ताकत व्यवस्था है। 52 अपण परमेश्वर रा धनवाद हो, जे असां रे प्रभु यीशु मसीह जी रे जरिये असां जो जितादें। 53 ईधरे ताई हे मेरे प्यारे भाइयो, मजबूत ते अटल रेयो, ते प्रभु रे कम्मां बिच हमेसा बद्धे रेयो, किजोकी ए जाणदे हिन कि तुसां री मेहनत प्रभु बिच बेकार नी है। 54 अबे मै उस चन्दे रे बारे बिच र जेहडा पवित्र मणुआ तिकर लिच्यो जान्दा जेहडा हुकम मै गलातिया री कलीसिया जो दितेरा तुसां भी तिन्हा सेई करो ! 55 हफते दे पहले दिन अन्दहर तुसी कमाइ

का किछ बचाइ लिओ चन्दे रे तिकर ताकि मेरे आणे तक चन्दा नी लेणा पे ! 56 ते अबे मै आणा, ते तुसी जिन्हा महुआ जो चान्ने तिन्हा जो मै चिठी पाई करी भेजी दिगां कि तुसां तुमहरा दान अरुश्वेम अंदर पूजाई दैन ! 57 अगर मेरा आणा हुआ, ता तिन्हा ने मेरे कने ही जाणा ! 58 मै मकिदुनिया होइ कने तुसां का आणा किजो की मै मकिदुनिया रसते हि जणा है !

### भरोसा करणे वाळेया ताई दान

16 पर होइ सगदा कि मै तुम्हारे का बेह्यां टन्डी रा मोसम मै तुम्हारे का कटा, तिस का बाद मै जित्ते मिन्जो जाणा हो उत्ते तुसी मिन्जो पुजाई आन! 2 किजो कि मे अबे तुसां कने रसते अन्दर नी मिलणा चान्दा मिन्जो यह उम्मिद है, कि अगर प्रभु जी ने चाया ता किछ वक्त तिकर मै तुसां कने रह्ला । 3 पर मै पेन्तिकुस्त तक इफिसुस अंदर इ रह्ला ! 4 किजो कि मेरे तिकर उते बड़ा बदीया रस्ता खुलेरा है, कने उते मेरे विरोधी बड़े सारे हिन् !

### पौलुस री यात्रा रा कार्यकर्म

5 अगर तिमथियुस आइ जाओ ता दिखखो कि से तुसां रे पासे निडर रैओ, किजो कि से मेरे सेई परमेश्वर रा कम करणे वाळा है । 6 इस तिकर कोई बी तीस जो कोई घटिया मत समझो, पर ठिक ठाक मेरे का पुजाई देयो मै तीस जो भाळदा है कि से होरसी भाईया कने मेरे का आई जाए । 7 ते भाई अपुल्लोस कने मे बडी भारी मिन्नत किती कि ओ होरसी भाईयां कने तुसां का आयें पर तिन्हा ने अवे आणे री कोई इच्छा नि किती टाइम दिखी कने तिन्ही आइ जाणा ! 8 जागदे रियो विश्वोस बिच पक्के होइ जाओ पुरुषार्थ करो तकड़े होइ जाओ ! 9 जेहडा किछ बी तुसी करदे हिन से प्यार कने करो ॥ 10 हे भाइयो तुसां स्तिफनास रे घराने जो जाणदे अखया रा पहला फळ है कने से पवित्र लोकां दी सेवा करने तिकर हमेशा तैयार रिन्दे ! 11 इधरे तिकर मै तुसां करे मिन्नत करदा कि ऐसे मणुआ दे अधिन रिओ जेड़े इस कम अन्दसर मेन्नत करदे कने साथ दिन्दे ! 12 मै स्तिफनास कने फूरतुनातुस अखइकुस दे अणे कने खुश है किजो कि तिन्ही ने तुम्हारी हर इक कमी पुरि कित्तेरी है !

### आखरी हुकम ते अभिवादन

13 तिन्हा ने मेरी ते तुम्हासरी आत्मो जो चेन दितेरा इन्हा जो मन्णा चाऐदा ! 14 आसिया री कलीसिया दी तरफ का तुसा जो नम्सिकार अकिवला कने प्रिसका दा कने तिन्हा दि घर दी कलीसिया दा मता सरा नम्स कार ! 15 सारे भाईया जो नम्सिकार पवित्र चुम्बन कने इक दुजे जो नम्साकार करो ! 16 मिन्जो पौलुस जो अपणे हथ कने लिखेरा नमस्ते जे कोई परमेश्वर कने प्यार नी करदा से लागती है ! 17 हमारे प्रभु यीशु जी आणे वाळे हिन् ! 18 प्रभु यीशु जी रा अनुग्रह तुसां पर हुन्दा रे ! 19 मेरा प्यार मसीह यीशु जी बिच तुसां सबनी कने हो ! आमीन ॥ 20 पौलुस री तरफ का जे परमेश्वर री मर्जी कने मसीह यीशु जी रा प्रेरित है, अते भाई तीमुथियुसरी तरफ का परमेश्वर री उस कलीसिया रे नां जो जे कुरिन्थुस बिच है, अते सारे अखाया रे सब पवित्र महुआं रे नां जो। 21 म्हारे स्वर्ग बिच रहे वाळे पिता परमेश्वर अते प्रभु यीशु मसीह री तरफ का दया अते सान्ति मिलदी रेह्। 22 म्हारे प्रभु यीशु मसीह रे परमेश्वर, अते पिता रा सुकर करदे, जे दया रा पिता है, अते सारी सान्ति रा परमेश्वर है। 23 से म्हारी हर मुसिबत पर म्हारे जो सान्ति दिंदे, ताकि असी बी तिन्हा जो जे मुसीबत बिच हिन, तिथ्यां ई सान्ति देई सकन, जिय्यां परमेश्वर ने म्हारे जो दिती है । 24 किजोकि जिह्य्यां मसीह रे दुख बिच असा साझी हिन, तिह्य्यां ई मसीह रे जरिये असा री खुसी बी तुसा ताई उमडेया करदी है।

## 2 कुरुन्धियों

### अभिवादन

1 जे म्हारे जो तकलिफां मिलदी, ता से तुम्हारी खुसी अते उद्धार ताई है। अते जे तुम्हारे जो सान्ति मिलदी, ता एह तुम्हारी खुसी ताई है, एह मुसिबतां जिन्हा जो असी बी सैया करदे हिन तुम्हारे जो सबर कने सैह्ने बिच मदत करदी। 2 तुम्हारे ताई असा जो पूरी आस है, किजोकि असी जाणदे कि जिह्य्यां तुसी म्हारे दुखा बिच साझी हुन्दे, तिह्य्यां ई म्हारी खुसी बिच बी तुसी साझी हिन।

### परमेश्वर रा धनवाद करणा

3 ओ मेरे भाइयों, असी एह चांहदे कि तुसी म्हारी उन्हा मुसिबतां रे बारे जाणो, जे असा जो एशिया पर झेलणा पेई। तित्ते असी, म्हारे सैह्ने सक्ति का केई जादा बोझ रे थल्ले असी दब्बी गे थिय्ये। इत्ते तक कि असा री बचणे री बी कोई उमेद नी रेहई थी। 4 हाँ, असा ने एह समझी लेया थिय्या कि म्हारे जो मरणे रा हुक्म मिली गेया ताकि असी अपणे पर होर जादा भरोसा नी करी के तिस परमेश्वर पर भरोसा करन जे मरे रेयां जो बी जिंदा करी सकदा। 5 तिन्हा ने असा जो इस भयंकर मौत का बचाया अते अबे जे हालात हिन तिन्हा पर बी असा जो बचान्दे रह्ले। असा री आस तिन्हा पर ई टिके री है। तिस ने ई म्हारे जो अग्रे बी बचाणा। 6 जे तुसी बी प्राथना करी के म्हारा साथ दिंगे ता तिस कने म्हारी तरफ का बड़े म्हुआं री प्रार्थना रे जरिये उस दया ताई जे म्हारे पर होई, सुकर करी सकगे। 7 म्हारे जो इधेरा घमण्ड है कि असा एह गल्ल बड़े साफ मन कने बोलया करदे हिन कि असा ने इस दुनियां कने मिली करी खास कर तुसा कने परमेश्वर री दया रे मुताबिक बरताव कित्तेया। असा ने बड़ी पवित्रता अते सच्चाई कने बरताव कित्तेया जे परमेश्वर री दया कने मिलेया ना कि दुनियावी ज्ञान कने। 8 जे तुसी पढदे अत्ते समझदे हिन तिस जो छड्डी होर किच्छ नी लिखखदे, अत्ते में आसा करदा कि तुसी इस गल्ल जो पूरी तरह कने समझी लैणा। 9 जिय्यां तुम्हारे बिच किन्नेया ने मन्नी लेया कि असी तुम्हारे घमण्ड री वजह हिन; तिय्यां तुसी बी प्रभु रे आणे वाळे दिन म्हारे ताई घमण्ड री वजह होणा। 10 अते इस्सी विस्वास री वजह कने में पैल्ले तुम्हारे का आणी री ठाणी कि तुम्हारे जो दोबारा असीस रा फायदा मिली सको। 11 अते में एह सोचेया कि तुम्हारे का होईकरी मकिदुनियां जो जां, अते फिरी मकिदुनियां का तुम्हारे आं, अत्ते तुसी मिंजो यहूदियां रे अद्धे रस्ते तक छडडी आओ।

### पौलुस री यात्रा बिच बदलाव

12 जां में एह तरिका सोचेया थिय्या, ता मिंजो कोई झिझक नी थी। या में जे तरिका सोचदा ता कै तिस जो संसारिक तरिके कने सोचदा कि इक ई बेल्ले "हाँ, हाँ" बी बोलदा रेह्यां अत्ते "नाँ, नाँ" बी करदा रेह्या। 13 परमेश्वर सच्चा गवाह है कि तुम्हारे ताई जे म्हारा वचन है तिस बिच इकट्टे "हाँ" अत्ते "ना" नी है। 14 किजोकि तुम्हारे रे बीच परमेश्वर रे पुत्र यीशु मसीह रा असा ने, मतलब सिलवानुस, तिमुथियुस, अते में प्रचार कित्तेया, तिस बिच हाँ अते ना दोनो इकट्टे नी थी, बल्कि हाँ थी। 15 किजोकि परमेश्वर ने जितणे वादे कित्ते हिन, से सब यीशु बिच "हाँ" बणी जांदे। इधेरे ताई असा उसेरे जरिये जे

"आमीन" बी बोलदे, से परमेश्वर री महिमा ताई ई हुन्दा। 16 अवे जे तुम्हारे कने म्हारे जो मसीह बिच मजबूत करदा, अते जिन्ने म्हारा अभिषेक कित्तेया है से परमेश्वर है, 17 जिन्ने म्हारे पर छाप बी लगाई अते पवित्र आत्मा जो अमानत बिच म्हारे मन बिच दित्तेया। 18 अपण में परमेश्वर जो गवाह करदा कि मैं दूझी बरी कुरिन्थुस बिच इधेरे ताई नी आया कि तुम्हारे जो दुख-तकलिफां का बचाँ। 19 एह गल्ल नी है कि असी तुम्हारे विस्वास पर काबू पाणा चाहन्दे। बल्कि तुम्हारी खुसी बिच तुम्हारे कने कम्म करणे वाळे हिन किजोकि तुसी विस्वास मजबूत हिन। 20 इधेरे ताई में एह ठाणी लित्तेया थिय्या कि तुम्हारे जो फिरी दुख दैणे तुम्हारे का नी आँ। 21 किजोकि जे में तुम्हारे जो दुखी कराँ, ता मिंजो सुखी कुन्ने करणा? सिवाये तुम्हारे जिन्हा जो में दुखी कित्तेया? 22 अते ऐई गल्ल में तुम्हारे जो लिखखी कि जाँ में तुम्हारे का आँ जिन्हा का मिंजो खुसी मिलणी चहिंदी, उन्हा का मिंजो दुख मिलो। किजोकि तुसी सब पर मेरा एह विस्वास रेह्या कि मेरी खुसी बिच ई तुसी सब खुस हिन। 23 किजोकि तुम्हारे जो में दुखी मन का अत्ते तकलीफ बिच रोई-रोई करी एह लिखखेया अपण तुम्हारे जो दुखी करणे ताई नी, बल्कि इधेरे ताई कि तुसी उस प्यार जो जाणी सको, जे खास कर तुम्हारे ताई है। 24 अपण जे बढाई-चढाई करी नी बोलाँ ताँ थोड़ा-बोहत तुसा सबनियां जो बी दित्तेया है।

2 इदेय जणे ताई तुम्हारे समाज ने जे सजा दित्ती है, सेहई सही है।

2 इसेरे उलट तुसी उस जो माफ करी दो अत्ते तिस जो दिलासा दो, कुदखी इय्यां ना हो कि से दुख बिच ई डूबी जाओ 3 इधेरे ताई मेरी तुम्हारे कने बिनती है कि तुसी उसेरे ताई अपणे प्यार जो साबित करो। 4 में तुम्हारे जो इस मकसद कने लिखखेया, कि तुम्हारे जो परखी लेयां कि तुसी सब गल्लां जो मनणे ताई त्यार हिन की नी।

### अपराधी जो माफ करणा

5 अपण जिस जो तुसी कुसकी गल्ल ताई माफ करदे तिस जो में बी माफ करदा अत्ते जे किच्छ में माफ करदा (जे माफ कित्तेया है) ता से मसीह री मौजूदगी बिच तुम्हारे ताई ई कित्तेया है। 6 कि सैतान म्हारे का कोई फायदा नी उठाई सको। किजोकि असी तिसेरी चालाँ का पखले नी हिन। 7 जाँ में मसीह रा शुभ-बसेख सुनाणे त्राआस आया, अत्ते प्रभु ने जाँ मेरे ताई दुआर खोलेया, 8 ता अपणे भाई तितुस जो तित्ते नी दिखखेया ता मेरा मन बड़ा बैचन होई गेया। इधेरे ताई में तित्ते का आई गेया ते मकिदुनियाँ जो चली गेया। 9 अपण परमेश्वर रा सुकर करदा, जे मसीह बिच हमेसा म्हारे जो जीत रे अभियान बिच लेई फिरदे, अत्ते अपणे ज्ञान री मीठी मुस्क जो हर जगह फैलान्दे हिन। 10 किजोकि उन्हेरे ताई, जे अबे उद्धार रे रस्ते बिच हिन, अत्ते उन्हेरे ताई बी जे बिनास रे रस्ते बिच हिन, परमेश्वर ताई मसीह री मुस्क हिन। 11 अपण उन्हेरे ताई जे बिनास रे रस्ते बिच हिन, एह मौत री इदेयी गंदी मुस्क है, जे मौत री तरफ लेई जाँदी, अपण उन्हेरे ताई जे उद्धार रे रस्ते बिच बद्धेया करदे हिन, एह जिदगी री इदेयी मुस्क है, जे जिदगी रे तरफ अग्रसर करदी। भला इन्हा गल्लाँ जो करणे रे लायक कुण है?

## त्रोआस बिच पौलुस रा व्याकुल होणा

12 असी ता उन्हा केई महुआँ साहई हिन, जे परमेश्वर रे वचन बिच हेराफेरी करदे हिन, अपण असी मन री सच्चाई कने परमेश्वर री तरफ का अत्ते परमेश्वर री मौजूदगी जाणी करी मसीह बिच बोलदे हिन। 13 कै असी फिरी अपणी बड्याई करणे लगे? या होर महुआँ साहई कै असा जो बी सफारस री चिट्ठियां तुसा का लेंगे या तुम्हारे जो दैणे री जरूरत है?

## मसीह बिच जीत री खुसी मनाणा

14 म्हारी चिट्ठी ता तुसा ई हिन, जे म्हारे मन बिच लिख्खे रा है अते तिस जो सब महु जाणदे अते पढ़दे हिन, 15 अत्ते तुसी बी ता इय्योँ ई जाहिर करदे कि तुसी मसीह री चिट्ठी हिन। जे म्हारी सेवा रा नतिजा है। जिस जो स्याई कने नी अपण जिंदे परमेश्वर री आत्मा कने लिख्खे रा है। जिस जो पत्थर री पट्टियां पर नी बल्कि महु रे मन री पट्टी पर लिख्खेया गेरा है। 16 अत्ते मसीह रे जरिये, परमेश्वर पर असा जो इदेया ई भरोसा है। 17 एह नी कि असी अपु इसेरे लायक हिन कि एह समझे कि असी खुद किच्छ करी सकदे, अपण म्हारी काबिलियत परमेश्वर री तरफ का है,

## नौए वादे रे सेवक

3 जिस ने असा जो नौई वाचा रे सेवक होणे रे लायक बनाया, शब्दों री वाचा नी अपण आत्मा री, किजोकि शब्द मारदा, अपण आत्मा जिंदा करदा। 2 अपण जे मौत री एह वाचा जिसेरे शब्द पत्थर री पट्टियां बिच गढ़े रे हिन उन्हा बिच इतणा तेज थिय्या कि इस्त्राएल रे महु मूसा रे उस तेजस्वी मूँह जो इकटक नी दिख्खी पाये। अत्ते फिरी बी उसेरा से तेज घट होई गया। 3 ता फिरी आत्मा री वाचा होर जादा तेजस्वी किजो नी हूणी? 4 किजोकि जां कसुरवार ठहराणे वाळी वाचा तेजस्वी है, ता धर्मी ठहराणे वाळी वाचा होर बी जादा तेजस्वी किजो नी होणी? 5 अते जे तेजोमय था, अवे तिस तेज रे सामणे जे तिस का बद्धी करी तेजस्वी थिय्या, बगेर तेजोमय होई गया, 6 किजोकि जां से जे घटदा जाया करदा थिय्या तेजोमय थिय्या, ता से जे मजबूत है होर बी जादा तेजोमय किजो नी होणा? 7 ह्यारी इस्सी उमेद री वजह कने असी बड़ी हिम्मत कने बोलदे 8 अते असी मूसा साहई नी, जे अपणे मूँह पर परदा पाई रखदा थिय्या ताकि इस्त्राएल रे महु उस घटणे वाळी चीज रे अंत जो नी दिखन। 9 अपण तिन्हेरी बुद्धि मोटी होई गई, किजोकि अज्र ताँई जाँ से तिस पुराणी वाचा जो पढ़दे हिन, ता सेहई परदा तिन्हा पर बगेर हटाये रे पेई रेहन्दा। किजोकि से पर्दा बस मसीह रे जरिये ई हटाया जांदा। 10 अज्र तक जां जां मूसा रा सास्त्र पढ़ेया जांदा ता पढ़ने वाळे रे मन पर से पर्दा पेई रेहन्दा; 11 अपण जां कुसकी रा मन प्रभु री तरफ मुडदा ता से पर्दा हटाई दित्तेया जांदा। 12 प्रभु ता आत्मा हिन, अते जिंते कुते प्रभु रा आत्मा है तिंते आज्ञादी है। 13 अपण असी अवे अपणे खुले मूँह कने, प्रभु रे तेज मन्ना सीसे बिच दिखदे, प्रभु मतलब आत्मा रे जरिये उस्सी तेज रे रूप बिच थोड़ा-थोड़ा करी के बदलिंदे जाँदे हिन। 14 इधेरे ताँई जाँ म्हारे पर इदेयी दया होई कि असा जो एह सेवा मिली, असी निराश नी हुन्दे। 15 अपण असा ने सर्म रे गुप्त कम्मा जो छड्डी दित्तेया, अते न चलाकी कने चलदे, अते ना परमेश्वर रे वचन बिच मिलावट करदे, अपण सच्चाई जो सामणे रख्खी करी, परमेश्वर रे सामणे हर इक महु री समझदारी कने अपू जो तारिफ रे लायक ठहरान्दे। 16 अपण जे असा रे शुभ-बसेख पर पर्दा पेरा है, ता एह पर्दा उन्हेरे ताँई पेया जे बिनास रे गत्त बिच जाया करदे हिन। 17 उन्हा अविस्वासियां ताँई, जिन्हेरी समझ जो इस दुनियां रे ईश्वर ने अहन्ना करी दिते रा है, ताकि से मसीह जे परमेश्वर रा रूप हिन, मतलब मसीह रे तेजोमय शुभ-बसेख री ज्योति जो नी दिख्खी सकन। 18 किजोकि असी ता अपणा नी अपण मसीह यीशु रा प्रचार करदे हिन कि से प्रभु हिन, अते अपणे बारे बिच एह बोलदे, कि असी यीशु जी री वजाह कने तुसा रे सेवक हिन।

## मिट्टी रे भाडेंया बिच धन

4 किजोकि परमेश्वर जिन्हा ने बोल्या, “न्हारे बिच का जोत चमकणी, ” सेहई है जे म्हारे दिला बिच चमकी है ताकि परमेश्वर री महिमा रे ज्ञान री जोत मिली सकन। 2 अपण म्हारे जदेय मिट्टी रे भाडेंया बिच, एह धन इधेरे ताँई रख्खे रा है कि इस सक्ति री कदी खत्म नी होणे वाळी महानता म्हारी तरफ का नी बल्कि परमेश्वर री तरफ का हो। 3 असी चाँ पास्से का मुसिबताँ भोगदे, अपण असी पैरा हेठ नी आये(पैरो तले रौंदे नही गये)। असी घबराये रे हिन, अपण निरास नी हिन। 4 तंग ता कित्ते जान्दे, अपण निछावर नी कित्ते जाँदे, झुकाये ता जाँदे, अपण नास नी होये हिन। 5 असी यीशु जी री मौत जो अपणे अपणे सरीर बिच हमेसा लेई फिरदे कि यीशु जी री जिंदगी बी असा रे सरीर बिच साफ तरिके कने जाहिर हो। 6 किजोकि असी जिंदे जी हमेसा यीशु जी री वजाह कने मौत रे हवाले कित्ते जाँदे हिन कि यीशु जी री जिंदगी बी म्हारे नासवान सरीर बिच जाहिर हो। 7 इधेरे ताँई मौत असा पर असर पांदी अत्ते जिंदगी तुम्हारे बिच। 8 लिख्खे रा है, “मैं विस्वास कित्तेया, इधेरे ताँई मैं बोलेया।” इधेरे ताँई कि विस्वास री सेहई आत्मा म्हारे बिच है; असी बी विस्वास करदे अत्ते इधेरे ताँई बोलदे, 9 अते एह जाणदे हिन कि जिन्ने प्रभु यीशु जी जो जिंदा कित्तेया, तिस ने ई म्हारे जो बी यीशु जी कने जिंदा करणा, अत्ते म्हारे जो बी तुम्हारे सामणे मौजूद करणा। 10 किजोकि सब चीजाँ तुम्हारे ताँई हिन कि दया जे जादा का जादा महुआँ बिच फैलदी जाया करदी है, परमेश्वर री महिमा ताँई सुकर बी बढ़ान। 11 इधेरे ताँई असी निराश नी हुन्दे, फिरी बी म्हारा बाहरला मनुष्यत्व नास बी होई जांदा, तां बी असा रा अन्दरला मनुष्यत्व दिन व दिन नौआ हुन्दा जांदा। 12 किजोकि असा थोड़ी हाण री थोड़ी जदेयी मुसिबताँ असा ताँई बड़ी ई जरूरी अते अनन्त जिंदगी महिमा जो पैदा करदा जांदा। 13 अते असा ता दिख्खी री चीजां जो नी अपण अणदिख्खी चीजां जो दिखदे रेहन्दे, किजोकि दिख्खी री चीजां थोड़े ई रोज री हिन, अपण अण दिख्खी चीजां हमेसा बणी रेहन्दी। 14 किजोकी असी जाणदे की जां असां रा धरती रा डेरे जदेया घर गिराया जाणा,तां असां जो परमेश्वर रे पास्से का इक्क इदेया घर मिळणा जे हथथां रा बणे रा नी अपण हमेशा तीकर रैहणे वाळा है। 15 इस बिच ता असी किल्हदे ते बड़ी तमन्ना रखदे की अपणे स्वर्गीय घर जो पाई लैण 16 कि पाणे कने नगं ना पाई जाण। 17 ते असी इस डेरे बिच रैहन्दे होए बोजे कने किल्हदे रैहन्दे, किजोकी असी उतारणा नी अपण होर पाणा चादें, ताकी से जे इक्क दिन मरणे वाळा है जिन्दगी बिच डुब्बि जाए। 18 जिन्हा ने असां जो इस गल्ल ताँई तयार कित्ते रा है से परमेश्वर है, जिन्हा ने असां जो बयाने बिच आत्मा बी दिते रा है।

## असां रा स्वर्गीय घर

5 अते असी हमेसा हिम्मत बनाई रखदे ते ए जाणदे की जां तीकर असी सरीर बिच रैहन्दे, तां तीकर प्रभु का अलग हिन। 2 किजोकी असी सकल जो दिख्खि करी नी अपण भरोसे कने चलदे। 3 इस ताँई असी हिम्मत बनाई रखदे, ते सरीर का अलग होई करी प्रभु कने रैहणा होर बी खरा समजदे। 4 इस ताँई असां रे मन री खुसी ए है की चाए कन्ने रैहण या चाए बखरे रैहण, अपण असी तिन्हा जो पसंद आदें रैहण। 5 किजोकी जरूरी है असां सारेयां रा हाल मसीह रे सामणे खुली जाए, की हर इक्क म्हुणु अपणे भले-बुरें कम्मां रा बदला जे तिन्हा ने सरीर रे जरिए कित्ते होण पाए। 6 इस ताँई परमेश्वर रा डर मन्नि करी असी लोकां जो समजादें; अपण परमेश्वर पर असां रा हाल प्रकट है, ते मेरे जो ए उम्मीद है की तूसां री अंतर-आत्मा पर बी होया होणा। 7 असी फिरी बी अपणी बडाई तुसां आगे नी करदे, अपण असी तुसां जो असां रे बारे बिच घंमड करणे रा मौका दिदें, तुसी तिन्हा जो जवाब देई सको, जे मन पर नी अपण दिखावटी गल्लां पर घंमड करदे। 8 जे असी बेसूध हिन ता सिर्फ परमेश्वर ताँई, ते अगर होस बिच हिन तं तुसां ताँई। 9 किजोकी मसीह रा प्यार असां जो मजबूर करी दिंदा; इस ताँई की असी ए समजदे की जां इक्क सारेयां ताँई मरेया तां सारे मरी गे। 10 ते से इस ताँई



सारेयां ताई मरेया कि जे जिन्दे हिन से आगे जो अपणे ताई ना जीण अपण उस ताई जे तिन्हेरे ताई मरेया ते फिरी जिन्दा होई गेया।

### परमेश्वर कने मेल मिलाप

11 अते अवे असी कुसकी होर जो सरीर रे हसाब कने नी समजगे। हालांकि असां ने बी मसीह जो सरीर रे हसाब कने समजेया, तां बी अब्बे का असी तिन्हा जो इदेया नौ जाणगे। 12 इस ताई मसीह बिच है तां नोइ रचना है: पूराणी गल्लां बिती गेई; दिख्खो, सारी गल्लां नोई होइ गे री हिन। 13 ए सारी गल्लां परमेश्वर रे पास्से का है, जिन्हा ने मसीह रे जरीए असां र मेल-मिलाप करी दित्ता, ते मेल-मिलाप री सेवा असां जो सौंप्पि दित्ती। 14 मतलब परमेश्वर ने मसीह बिच होइ करी अपणे कने दुनिया रा मेलमिलाप करी लित्ता, ते तिन्हेरे गलतियां रा इल्जाम तिन्हेरे पर नी लाया, ते तिन्हा ने मेल मिलाप रा वचन असां जो सोपि दित्तेया। 15 इस ताई, असी मसीह रे राजदूत हिन; मन्त्रों परमेश्वर असां रे जरिए मिन्नत करेया करदा है। असी मसीह रे पास्से का मिन्नत करेया करदे हन की मेल-मिलाप करी लेयो।

### मसीह बिच नौई रचना

16 जे पाप का अनजाण थिये, तिन्हा इ जो उन्हा ने पाप ठैहराया की असी तिन्हा बिच होई करी परमेश्वर री धार्मिकता बणी जाण। 17 असी जे परमेश्वर जी रे सहकर्मी हिन, ए बी समजादें की तिन्हेरा अनुग्रह जे तुसां पर है तिसजो बेकार मत जाणा देयो। 18 किजोकी से ता बोलदे की अपणी खुसी रे वेल्हे मै तेरी सुणी लित्ति ते छुटकारे वाळे दिन मै तेरी मदद कित्ति, दिख्खो अब्बे से खुसी रा वेला है, दिख्खो अब्बे से छुटकारे रा दिन है। 19 असी कुसकी गल्ल बिच ठोक्कर खाणे रा कोई बी मोक्का नी दिदें, ताकी असां री सेवा पर कोई इल्जाम नी आये। 20 अपण हर गल्ल का परमेश्वर रे सेवकां साईं अपणी खरी गल्लां जो सामणे लादें, बडे सबर कने, दुखां का कने ते गरिबि का मुसीबतां का, 21 कौड़े खाणे का, कैद होणे का, हंगामेयां का, मेहनत कने, जागदे रैहणे का, उपवास करणे कने,

6 पवित्रता कने, ज्ञान कने, सबर कने रहम कने, पवित्र-आत्मा कने, 2 सच्चे प्यार कने, सच्चाई री गल्लां कने, परमेश्वर री ताकत कने, धार्मिकता रे हथयारां कने जे दाइणे-बाएं हत्थां बिच हिन, 3 इज्जत ते बेइज्जती कने, खरे नां कने ते बदनामि कने। हालांकि भडवालेयां साईं लगदे अपण तां बी सच्चे हिन। 4 अनजान लोक्कां साईं हिन तां बी मसहूर हिन; मरणे वाळेयां साईं हिन अपण फिरी बी जिन्दे हिन; मार खाणे वाळेयां साईं हिन फिरि बी जान का नी जान्दे; 5 दुखी रैह्के वाळेयां साईं हिन अपण फिरी खुसी मणादें; गरिब्यां साईं हिन अपण मतेयां जो अमीर बणाई दिदें, इदेय हिन जिय्यां असां का किछ बी नी है अपण फिरी बी सब किछ रखदे। 6; हे कुरुन्धियों, असी तुसां कने खुळी करी गल्लां कित्ति री हिन, असां रा दिल तुसां पास्से खुळे रा है। 7 तुसां ताई असां रे दिल बिच कोई बी सरम नी अपण तुसा रे ई दिल बिच सरम है। 8 अपण अपणे रे बच्चे समजी करी मै तुसां जो बोलदा की तुसी बी तिसेरे बदले बिच अपण दिल खोलि देयो। 9 अविश्वासियां साईं असमान जुए बिच ना जुत्तो किजोकी धार्मिकता ते अर्धम रा क्या मेल-जोल रौसनी या न्याहरे री क्या संगती 10 ते मसीह जी रा लियाल कने क्या लगाव या विश्वासी कने अविश्वासी रा क्या नात्ता? 11 ते मुर्तियां कने परमेश्वर रे देहरे रा क्या रिस्ता? किजोकी असी तां जिन्दे परमेश्वर रे देहरे हिन, जिय्यां परमेश्वर ने बोले रा है की मै तिन्हा बिच बसणा ते तिन्हा बिच चलण-फिरणा, मै तिन्हेरा परमेश्वर होण ते से मेरे लोक होणे। 12 इस ताई परमेश्वर बोलदा की तिन्हा बिच का निकळो ते बखरे रेयो ते बुरी चिजां जो छुओ तां मै तुसां जो अपनाणा। 13 ते मै तुसां रा प्यो होण ते तुसी मेरे बच्चे-बच्चियां होणे, ए सर्वशक्तिमान प्रभू परमेश्वर रा वचन है।

### असमान जुए बिच मत जुत्तो

14 अते हे प्यारेयो, जां असजो ए वादा मिल्ले रा हिन, तां आओ असी अप्पु जो सरीर ते आत्मा री सारी गन्दगी का साफ करण ते परमेश्वर रा दर रखदे होए पवित्रता जो साबत करण। 15 असां जो अपणे दि बिच जगह देयो, असी

ना कुसकी कने नाईसांफी कित्ति ते ना कुसकी जो ठग्गेया। 16 मै तुसां जो गलत ठेहाणे ताई ए नी बोलदा किजोकी मै पैहल्ले ई बोल्लि चुक्के रा है की तुसी असां रे दिलां बिच इय्यां बसी गे रे हिन कि असी तुसां कने मरणे जीणे ताई तैयार हिन। 17 मै तुस कने बडी हिम्मत कने बोलदा कि मेरे जो तुसां पर बड़ा गर्व है, मै शार्ती कने भरी गे रा है, अपणे सारे दुख बिच मै खुसी कने भरी रैहन्दा। 18 किजोकी जां असी मकिदुनिया बिच आए थिये तां बी असां रे सरीर जो चैन नी मिल्लेया अपण असी चारो पास्से का दूख पादें थिये, बार लड़ाइयां थी ते अन्दर डौणी गल्लां थी।

7 तां बी छोड्रेयां जो शार्ती दैणे वाळे परमेश्वर ने तीतुस रे आणे कने असां जो शार्ती दित्ति।

### पौलुस रा आनदं

2 ते ना सिर्फ तिसेरे आणे कने अपण तिसेरी तिस शार्ती कने बी जे तिसजो तुसां पास्से का मिळी री थी तिसने तुसां री लालसा, तुसां रे दुख ते मेरे ताई तुसां री धून री खबर मेरे जो सुणाया जिस कने मेरे जो होर बी खुसी होइ। 3 किजोकी हालांकि मै अपणी चिड्ढि कने तुसां जो दुखी कित्ता अपण तिस कने पछतादां नी जिय्यां की पैहल्ले पछतादां था, किजोकी मै दिख्खदा की तिस चिड्ढि कने तुसां जो दुख ता होया अपण से थोड़ी देर ताई ई थिया। 4 अवे मै खुस है अपण इस ताई नी तुस जो दुख होया अपण इस ताई की तुसी तिस दुख री वजह कने अपण मन फिराया किजोकी तुसां रा दुख परमेश्वर री इच्छा रे अनुसार थिया की असां रे पास्से का तुसां जो कुसकी गल्ल बिच नुक्सान न पुज्जे। 5 किजोकी परमेश्वर री भक्ति रा दुख इदेया मन फिराणा पैदा करदा जिसेरा परिणाम छुटकारा है, फिरी तिसका पछताणा नी पैदां अपण दुनियाबी दुख मौत पैदा करदा। 6 अते दिख्खो इसी गल्ल कने तुसां जो परमेश्वर री भक्ति रा दुख होया, तुसां बिच किन्ना जोश ते हाजिर-जवाबी ते जलन ते डर ते लालसा ते धून ते ददं दैणे रा विचार पैदा होया, तुसां ने हर तरिके कने ए साबत करी दस्सेया है की तुसी गल्ल बिच मासूम हो। 7 फिरी मै जे तुसां जो लिख्खेया थिया से ना तां तिसेरे वजह कने लिख्खेया जिन्नि ए नाईसांफी कित्ति ते ना तिसेरे वजह कने जिस पर नाईसांफी होई अपण इस ताई की जे जोश तुसां रा असां ताई है से परमेश्वर रे सामणे तुसां रे सामणे आई जाए। 8 इस ताई असां जो शार्ती मिल्लि, असां री इस शार्ती कने तीतुस री खुसी री वजह कने होर बी खुसी होइ, किजोकी तिसेरा मन तुसां री वजह कने होर बी हरा-भरा होइ गे रा है। 9 किजोकी अगर मै तिसेरे सामणे तुसां रे बारे बिच किछ घमंड दिखाया तां शर्मिदां नी होया, अपण जिय्यां असी सारी गल्लां तुसां रे सामणे सच-सच बोल्लि दित्ति थी तिय्यां ई असां रा घमंड दसणा तीतुस रे सामणे सच निकळेया। 10 जां तिसजो तुसी सारेयां रे हुक्म मनणे री आदत री याद आदीं की किय्यां तुसी तिस कने डरदे ते कमदं होये तिस कने मुलाकात कित्ति तां तिसेरा प्यार तुसां ताई होर बी बहिध जादां। 11 मै खुस है किजोकी मेरे जो हर गल्ल बिच तुसां पर भरोसा है। 12 अवे ओ भाइयो, असी तुसां जो परमेश्वर रे तिस अनुग्रह री खबर दिदें जे मकिदुनिया री कलिसिया पर होए रा है। 13 कि दुख रे बड्ढि परिक्षा बिच तिन्हेरे बड्ढि खुसी ते भारी कगांलपन बिच तिन्हेरी उदारता होर बी बधी गी। 14 तिन्हेरे बारे बिच मेरी ए गुआई है कि तिन्हा ने अपणी ताकत भर बल्कि ताकत का बी बार, मन कने दित्ता। 15 ते इस दान बिच ते पवित्र लोक्कां री सेवा बिच हिस्से दार होणे रे अनुग्रह रे बारे बिच असां का घड़ी-घड़ी बडी मिन्नत कित्ती, 16 ते जियां असी उम्मीद कित्ते री थी तियां इ नी अपण तिन्हा ने प्रभू जो फिरी परमेश्वर री इच्छा कने असां जो बी अपणे आप जो देइ दित्ता।

### खुले दिल कने दान दैणा

8 ईधेरे ताई असां ने तीतुस जो समजाया कि जियां तिनिये पैल्ले सुरू कित्तेया थिया तियां इ तुसां रे बिच मझाटे इस दान रे कम्म जो पुरा बी करी ले। 2 ईधेरे ताई जियां तुसी हर गल्ल बिच मतलब भरोसे, वचन, ज्ञान ते हर तरिके री मेहनत बिच, ते तिस प्यार बिच जे असां कने रखदे बधदे जादें, तियां इ इस दान रे कम्म बिच बी बधदे जाओ। 3 मै हुक्म रे तोर पर तां नी, अपण दुजेयां रे उत्साह कने तुसां रे प्यार री सच्चाई जो परखणे ताई

बोलदा। 4 तुसी असां रे प्रभु यीशु मसीह जी रा अनुग्रह जाणदे कि से धनी होइ करी बी तुसां ताई कंगाल बणी गे, ताकी तिन्हेरे कंगाल होइ जाणे कने तुसी धनी होइ जाओ। 5 इस गल्ल पर मेरी सलाह ए इ है: ए तुसां ताई खरा है ज इक्क साल का ना ता ना सिर्फ इस कम्म जो करणे बिच इ, अपण इस गल्ल रे चाहणे बिच बी पैले बणे थिये, 6 ईधेरे ताई अवे ए कम्म पुरा करो कि जियां इच्छा करणे बिच तुसी तयार थिये, तियां अपणी-अपणी कमाई रे हसाब कने पुरा बी करो। 7 किजोकी जे मन री तयारी हो ता दान तिसरे हसाब कने ग्रहण बी हुदां जे तिसरे का है, ना कि तिसरे हसाब कने जे तिसरे का नी। 8 ए नी कि दुजेयां जो चैन ते तुसां जो दुख मिले, 9 अपण बराबरी री सोच रे हसाब कने इस वेले तुसां रे जादा का तिन्हेरे कमी बिच कम्म आए, ताकी तिन्हेरी जादा होणा बी तुसां री कमी बिच कम्म आए ते बराबरी होइ जाए। 10 जियां कि लिखे रे है, "जिनिये मता बटोरेया तिसेरा किछ जादा नी निकळेया, ते जिनिये घट बटोरेया तिसजो किछ घट नी निकळेया।" 11 परमेश्वर रा धनवाद हो, जिन्हा ने तुसां ताई से इ हिम्मत तीतुस रे मन बिच पाई दिते रा है 12 कि तिसने असां रा समजाणा मन्नि लिचेया बल्कि बडा हिम्मत वाळा होइ करी से अपणी मर्जी कने तुसां का गे रा है। 13 असां ने तिस कने तिस भाई जो बी भेजे रा है जिसेरा नां शुभ-भसेख रे बारे बिच सारी कलिसेया बिच फैले रा है; 14 ते इन्ना इ नी, अपण से कलिसेया रे जरिये देहराया बी गया कि इस दान रे कम्म ताई असां कने जाए। असी ए सेवा ईधेरे करदे कि प्रभु री महीमा ते असां रे मन री तयारी सामणे आई जाए। 15 असी इस गल्ल बिच चौकने रहन्दे कि इस उदारता रे कम्म रे बारे बिच जिसेरी सेवा असी करदे, कोइ असां पर इल्जाम ना लाई पाए।

### तितुस ते तिसरे कने कम्म करणे वाळे

16 किजोकी जे गल्लां सिर्फ प्रभु इ रे ई सामणे नी, अपण लोकां रे सामणे बी भली हिन असी तिन्हेरी चितां करदे। 17 असां ने तिसरे कने अपणे भाई जो बी भेजे रा है, जिसजो असां ने घडी-घडी परखी करी बडी गल्लां बिच हिम्मत वाळा पाया; अपण अवे तुसां पर तिसजो बडा भरोसा है, इस वजह कने से अवे होर बी जादा हिम्मत वाळा है। 18 जे कोइ तीतुस रे बारे बिच पुच्छे, तां से मेरा साथी ते तुसां ताई मेरे कने कम्म करणे वाळा है ते जे असां रे भाईयां रे बारे बिच पुच्छे, तां से कलिसेया रे भेजे रे ते मसीह री महीमा हिन। 19 अते अपणा प्यार ते असां रा से घमंड जे तुसां रे बारे बिच है कलिसेयां रे सामणे तिन्हेरे जो साबित करी के दिखओ। 20 अवे तिस सेवा रे बारे अन्दर जेहडी पवित्र महुआं ताई किती जान्दी, मिन्जो तुसा ताई लिखणे री जरूरत नी है। 21 किजो कि मैं तुसा रे मने री तियारी जो जाणदा, जिसेरी वजह कने मैं तुसा रे बारे अन्दर मकिदुनिया रे रहैले वाळेयां रे सामणे घमण्ड दसदा कि अखया रे महु इक साले रे तयार होएरे हिन, ते तुसा रे जोस ने होर बी मते जहेयां जो उभारे रा है। 22 अपण मैं अपणे भ्याळां जो इधेरे ताई भेजेरा है कि असां ने जेहडा घमण्ड तुसा रे बारे अन्दर दस्सेया, से इस गल्ल अन्दर बेकार ना ठेहन; अपण जिह्यां मैं बोल्लेया तियां ई तुसी तयार रेह्यो, 23 इदेह्या ना हो कि अगर कोइ मकिदुनिया रा रहैले वाळा मेरे कने आओ ते से दिखको कि तुसी तयार ई नी हिन, ता होई सकदा कि इस भरोस्से री वजह कने असी (इह्यां नी बोल्लेया कि तुसी) खजळ होन। 24 इधेरे ताई मैं भ्याळां का छन्दे करणा जरूरी समझेया कि से पैले का ई तुसा का जान, ते तुसा री उदारता रा फळ जिसेरे बारे अन्दर पैले का वचन दितेया गेरा थिया, तयार करी रखन कि ऐ दबाव कने नी अपण उदारता रे फळ सेहई तयार होन।

### होर मसीह लोकां ताई मदद

9 अपण गल्ल ऐसी है : कि जिने घट्ट बाणा, तिनिए घट्ट ई कटणा है; ते जेहडा जादा बांदा, तिनिए मता बढणा। 2 हर इक महु जदेह्या से अपणे मनां अन्दर पक्का करी लेयो तदेह्या ई दान करो; नां ता कुडी-कुडी करी ते नां ई कुस्की दबाव री वजह कने से दान करो, किजोकी परमेश्वर खूसी कने दान दैणे वाळेयां कने प्यार करदे हिन। 3 परमेश्वर हर किस्म रा अनुग्रह तुसां जो मता सारा देई सकदे जिस कने हर गल्ल अन्दर ते हर बेले, सब किछ, जिसेरी तुसां जो जरूरत हो, तुसां का रेह्यो; ते हर इक भले कम्म ताई तुसा

का मता किछ हो। 4 जिह्यां लिखेरा है, कि "तिनिए खलारेया, तिनिए कंगालां जो दान दितेया, तिसेरा धरम हमेसा बणी रहैला।" 5 इधेरे ताई जेहडा बाणे वाळे जो बी ते खाणे ताई रोटी दिन्दा, तिनिए तुसा जो बी दैणे, ते तिन्हा जो फलवंत करणा; ते तुसा रे धरम रे फळां जो बधाणा।

### दान कियां दैणा चाएदा

6 तुसी हर गल्ल अन्दर सबनी किस्मे री उदारता ताई जेहडी असां रे जरिए परमेश्वर रा सुकर करवान्दियां, अमीर किते जाणे। 7 किजोकी इस सेवा जो पूरा करणे कने ना सिर्फ पवित्र महुआं री जरूरतां पूरियां हुन्दिआं, अपण महुआं रे पाससे का परमेश्वर रा बी बडा सुकर कितेया जान्दा। 8 किजो कि इस सेवा जो प्रमाण मन्नी करी से परमेश्वर री महिमा प्रकट करदे कि तुसी मसीह री खुसखबरी जो मन्नी करी तिन्हेरे अधीन रहैदे, ते तिन्हेरी ते हर सबनां री मदद करणे अन्दर उदारता दस्दे रहैदे। 9 ते से तुसा ताई प्राथना करदे; ते इधेरे ताई कि तुसां पर परमेश्वर रा बडा ई जादा अनुग्रह है, तुसा री लालसा करदे रहैन्दे। 10 परमेश्वर रा, तिन्हा रे तिस दान ताई जिसेरे बारे अन्दर दस्सेया नी जाई सकदा, सुकर हो। 11 मैं सेई पौलुस जेहडा तुसा सामणे दीन है अपण पिठ पिचे तुसा पाससे हिम्मत करदा, तुसां जो मसीह जी री नमरता ते नरम स्वभाव री वजह कने समझान्दा। 12 मैं निम्ता होई करी ऐ चाहत रखदा कि तुसा सामणे मिन्जो निडर होई करी हिम्मत करणी ना पेयो, जदेह्या मैं किछ महुआं पर जेहडे असा जो सरीर रे साबे चलाणे वाळा समझदे, हिम्मत दसणे री सोचदा। 13 किजो कि हालांकि असी सरीर अन्दर हण्डे-फिरदे, तां बी सरीर रे साबे नी लडीन्दे। 14 किजो कि असा री लडाई रे हथियार सरीरी नी हिन, अपण गढ़ेयां जो दाहई दैणे ताई परमेश्वर रे जरिए समर्थी हिन। 15 इधेरे ताई असी ख्यालां रा अते हे इक उची गल्ल रा, जेहडी परमेश्वर री पैहचाण रे खलाफ उठदी, विरोध करदे; ते हर इक भावना जो कैद करी के मसीह जी रा हुकम मनणे वाळा बणाई दिन्दे।

### पौलुस रा हक

10 ते तयार रहैन्दे कि जां तुसा रा हुकमां जो मनणा पूरा होई जाओ, ता हर इक किस्मे रे हुकम जो नी मनणे ताई सझा देन। 2 तुसी तिन्हा ई गल्लां जो दिखको, जेहडी हाखियां रे सामणे हिन। अगर कुस्की जो अपु पर एह भरोस्सा हो कि मैं मसीह जी रा है, ता से ऐ बी जाणी लेयो कि जदेह्या से मसीह जी रा है तदेह ई असी बी हिन। 3 किजो कि अगर मैं तिस हक रे बारे अन्दर होर बी घमण्ड दस्सां, जेहडा प्रभु जी ने तुसा रे बगाडने ताई नी अपण बनाणे ताई असां जो दितेरा है, ता सरमिन्दा नी हुन्गा। 4 इयां मैं इधेरे ताई बोलदा कि पत्रियां रे जरिए तुसा जो डराणे वाळा नी ठेहां। 5 किजो कि से बोलदे "तिसेरी पत्रियां ता गैही ते असरदार हिन; अपण जिस बेले से सामणे हुन्दा, ता से सरीर का कमजोर ते वक्तव्य अन्दर घाट्ट लगदा।" 6 जेहडा ऐ बोलदा, से ऐ समझ रखको कि जिह्यां पिडी पिचे पत्रियां अन्दर असां रे वचन हिन, तिह्यां ई तुसां सामणे असां रे कम्म बी होणे। 7 किजो कि असां जो ऐ हिम्मत नी है कि असी अपु जो तिन्हा बिच का किछ इदेह जहेयां कने गिणन या तिन्हा कने अपु जो मिलान, जेहडे अपणी तारीफ अप्पु करदे, ते अपणे आप जो अपु-मिते नाप्पि-तोली करी इक-दुजे कने मिलाई करी बेवकूफ ठेहदे। 8 असां ता सीमा का बाह घमण्ड कदी बी नी करणा, अपण तिस्सी सीमा तक जेहडी परमेश्वर ने असां ताई ठेहाई दितेरी है, ते तिस अन्दर तुसी बी आई गेरे हिन, ते तिस्सी साबे घमण्ड बी करणा। 9 किजो कि असी अपणी सीमा का बाह अपु जो बधाणा नी चाहन्दे, जिह्यां कि तुसां तक नी पुजणे री हालत अन्दर हुन्दा, अपण मसीह जी री खुसखबरी सुणान्दे तुसा ताई पुजी बैठेरे हिन। 10 असी सीमां का बाह दुजेयां री मेहत पर घमण्ड नी करदे, अपण असा जो उम्मीद है कि जिह्यां-जिह्यां तुसा रा भरोस्सा बधदा जाणा तिह्यां-तिह्यां असी अपणी सीमा रे साबे तुसां री वजाह कने होर बी बधदे जाणा, 11 ताकि असी तुसा री सीमा का अगे बधी करी खुसखबरी सुणांन, ते एह नी कि असी दुजेयां री सीमा रे अन्दर बणे-बणाए कम्मां पर घमण्ड करन। 12 अपण जेहडा घमण्ड करो, से प्रभु जी पर ई घमण्ड करो। 13 किजो कि जेहडा अपणी बडाई करदा से नी, पर जिसेरी बडाई प्रभु जी

करदे, से ई ग्रहण कित्तेया जान्दा। 14 अगर तुसी मेरी थोड़ी करी बेवकूफी सहई लिन्दे ता कितणी खरी गल्ल होणी थी; हाँ, मेरी सेहई बी लेयो। 15 किजो कि मैं तुसा रे बारे अन्दर ईश्वरीय धुन लाई रखवा, इधेरे ताई कि मैं इक्क ई मल्लु कने तुसा री गल्ल लगाएरी है कि तुसां जो पवित्र कुआंरी साहई मसीह जी जो सोंपी देयाँ। 16 अपण मैं डरदा कि जिह्याँ कीडे ने अपणी चलाकी कने हव्वा जो बैटकाया, तिह्याँ ई तुसा रे मन तिस सिधाई ते पवित्रता कने जेहडी मसीह जी कने होणी चाहिदी, कुदखी भ्रष्ट नी कित्ते जान। 17 अगर कोई तुसा का आई करी कुस्की दुजे यीशु जी रा प्रचार करो, जिसेरा प्रचार असां ने नी कित्तेया; या कोई होर आत्मा तुसां जो मिले, जेहडा पैले नी मिलेया थिया; या होर कोई खुसखबरी सुणाओ जिस जो तुसां ने पैले नी मन्नेया थिया, ता तुसी तिस जो सेहई लिन्दे। 18 मैं ता समझदा कि मैं कुस्की गल्ल अन्दर बड्डे का बड्डे प्रेरितां का घट्ट नी है।

### पौलुस ते झूठे प्रेरित

11 अगर मैं वक्तव्य अन्दर अनाड़ी है, तां बी ज्ञान अन्दर नी है। असा ने इस जो हर गल्ल अन्दर हर तरहा कने तुसा ताई जाहिर कित्तेरा है। 2 कै इस अन्दर मैं किछ पाप कित्तेया कि मैं परमेश्वर री खुसखबरी तुसा जो सेंट-मेंत अन्दर सुणाया; ते अपु जो निहट्टा कित्तेया कि तुसी उच्चे होई जाओ ? 3 मैं होरनी कलीसियाँ जो लुट्टेया, मतलब कि मैं तिन्हा का मजदूरी लिच्छी ताकि तुसा री सेवा करी सकां। 4 ते जिस बेले मैं तुसा कने थिया ते मिन्जो घाट्टा होया, ता मैं कुस्की पर भार नी पाया, किजो कि भ्याळां ने मकिदुनिया का आई करी मेरे घाट्टे जो पूरा कित्तेया; ते मैं हर गल्ल अन्दर अपु जो तुसा पर भार बनणे का रोक्केया, ते रोक्की रहै। 5 अगर मसीह जी री सच्चाई मेरे अन्दर है ता अखया देस अन्दर कुस्की ने मिन्जो इस घमण्ड कने नी रोकणा। 6 किजो ? कै इधेरे ताई कि मैं तुसा कने प्यार नी रखदा? परमेश्वर एह जाणदे कि मैं प्यार रखदा। 7 अपण जे मैं करदा, सेई करदे रहै कि जेहडे मल्लु दाँव तोपदे तिन्हा जो मैं दाँव पाणा नां देयाँ, ताकि जिस गल्ल अन्दर से घमण्ड करदे, तिस अन्दर से असां साहई ठैहण। 8 किजो कि इदेह मल्लु झूठे प्रेरित, ते ठगी कने कम्म करणे वाळे, ते मसीह जी रा रूप लेई लैणे वाळे हिन्। 9 ऐ किछ हैरान होणे वाळी गल्ल नी है किजोकी सैहतान अप्पु बी ज्योतिर्मय स्वर्गदूत रा रूप धारण करदा। 10 इधेरे ताई अगर तिसेरे सेवा करणे वाळे बी धरम रे सेवकां साहई रूप लेई लैन, ता कोई बड्डी गल्ल नी है, अपण तिन्हेरा अन्त तिन्हेरे कम्मां रे साहबे होणा। 11 मैं फिरी बोलदा कि, कोई मिन्जो बेवकूफ मत समझो; नी ता बेवकूफ ई समझी करी मेरी सेहई लेयो, ताकि थोडा जल्ला मैं बी घमण्ड करी सकां। 12 इस बेधडक घमण्ड अन्दर जे किछ मैं बोलदा, से प्रभू जी रे हुक्म रे साबे नी है अपण मन्ने बेवकूफी कने ई बोलदा। 13 जदकि, मते मल्लु सररी रे साबे घमण्ड करदे, ता मैं घमण्ड करणा। 14 तुसी ता समझदा होई करी खूसी कने बेवकूफां री सेहई लिन्दे। 15 किजो कि जां तुसा जो कोई नोकर बणाई लिन्दा, या खाई जान्दा, या फसाई लिन्दा, या अपु जो बड्डा बणान्दा, या तुसा रे मुह पर चान्ड मारदा, ता तुसी सेहई लिन्दे।

### प्रेरित रे रूप बिच पौलुस री मुसिबतां झेलणा

16 मेरे बोलणे रा मतलब बेजती करणा ई है, मन्ने असी इस ताई कमजोर ई थिये। अपण जिस गल्ल अन्दर कोई हिम्मत करदा - मैं बेवकूफी कने बोलदा - ता मैं बी हिम्मत करदा। 17 कै सेहई इब्रानी हिन् ? मैं बी है। कै सेहई इस्त्राएली हिन् ? मैं बी है। कै सेहई अब्राहम रे वंस रे हिन् ? मैं बी है। 18 कै सेहई मसीह जी री सेवा करणे वाळे हिन् - मैं पागलां साहई बोलदा - मैं तिन्हा का बधि करी है! जादा मैहत्त करणे अन्दर; घडी-घडी कैद होणे अन्दर; कोडे खाणे अन्दर; घडी-घडी मरणे रे जोखिमां अन्दर। 19 पंज बरी मैं यहूदियाँ रे हथथा का उन्ताळी-उन्ताळी कोडे खाए। 20 त्रै बरी मैं बेंता खाइयाँ; इक बरी मेर पर पथराव कित्तेया गया; त्रै बरी झाज, जिन्हा पर मैं चढेया थिया, टुटी गे; इक रात-दिन मैं समुन्दर अन्दर कढेया। 21 मैं घडी-घडी यात्रा अन्दर; दरिया रे जोखिमां अन्दर; डाकुआं रे जोखिमां अन्दर; अपणी जात वाळे मल्लुआं रे जोखिमां अन्दर; होरसी जातियाँ रे जोखिमां अन्दर; सैहां रे

जोखिमां अन्दर; बणां रे जोखिमां अन्दर; अमुन्दर रे जोखिमां अन्दर; झूठे भ्याळां रे बिच जोखिमां अन्दर रेह्या। 22 मैहत्त ते दुख अन्दर; घडी-घडी जागदे रहै अन्दर; भुख-प्यास अन्दर; घडी-घडी व्रत रखणे अन्दर; सरदी अन्दर; उघाडे रहै अन्दर; 23 ते होर गल्लां जो छड्डी करी जिन्हेरा जिकर मैं नी करदा, सबनी कलीसियाँ री चरचा रोज मिन्जो दबान्दी। 24 कुसेरी कमजोरी कने मैं कमजोर नी हुन्दा ? कुसेरे टोकर खाणे कने मेरा जी नी धेखदा ? 25 अगर घमण्ड करणा जरूरी है, ता मैं अपणी कमजोरियाँ री गल्लां पर घमण्ड करणा। 26 प्रभू यीशु जी रे परमेश्वर ते पिता जेहडे हमेसा धन्न हिन् , जाणदे कि मैं झूठ नी बोलदा। 27 दमिश्क अन्दर अरितास राजे रे पाससे का जेहडा हाकिम थिया, तिनिए मिन्जो पकड़णे जो दमिश्कियाँ रे सैह पर पैहा बठाई रखेरा थिया, 28 ते मिन्जो टोकरे अन्दर खिड़की रस्ते का सैहपनाह पर का उतारेया गया, ते तिसेरे हथथा का बची निकळेया। 29 हालांकि घमण्ड करणा मेरे ताई खरा नी है तां बी करणा पैन्दा; इधेरे ताई मैं प्रभू जी रे दित्तेरे दरसनां ते प्रकासनां रे बारे अन्दर बोलणा। 30 मैं मसीह अन्दर इक मल्लु जो जाणदा; चोदा साल होए कि पता नी सररी समेत, कि कै पता बगैर-सररी रे, परमेश्वर जो पता है; इदेह्या मल्लु त्रीये स्वर्गां ताई चुक्की लिच्छेया। 31 मैं इदेह मल्लु जो जाणदा पता नी सररी समेत, कै पता बगैर-सररी रे परमेश्वर ई जाणदे हिन् 32 कि स्वर्गलोक जो चुक्की लिच्छेया गया, ते इदेहई गल्लां सुणियाँ जेहडी बोलणे वाळी नी हिन्; ते जिन्हा जो मुहआं पर अनणा मल्लुआं ताई खरा नी है। 33 इदेह मल्लु पर ता मैं घमण्ड करणा, अपण अपु पर अपणी कमजोरियाँ जो छड्डी करी, अपणे बारे अन्दर घमण्ड नी करणा।

### पौलुस रा दिव्य दर्शन ते कमजोरी

12 किजो कि अगर मैं घमण्ड करणा चाँहू बी ता बेवकूफी नी होणी, किजो कि मैं ता सच्च बोलणा; फिरी बी रुकी जान्दा, इह्याँ ना हो कि जदेह्या कोई मिन्जो दिखदा या मेरे का सुणदा, मिन्जो तिस का बधि करी समझो। 2 इधेरे ताई कि मैं प्रकासनां रे मते होणे री वजह कने फुली नी जाँ, मेरे सररी अन्दर इक कंडा चुभाया गया, मतलब कि सैहतान रा इक दूत कि से मिन्जो मुक्के मारो ताकी मैं फुली नी जाँ। 3 इसेरे बारे अन्दर मैं प्रभू जी का त्रै बरी छन्दे कित्ते कि मेरे का ऐ दूर होई जाओ। 4 अपण तिन्हा ने मिन्जो बोलेया, "मेरा अनुग्रह तेरे ताई बडा है; किजो कि मेरी समर्थ कमजोरी अन्दर सिद्ध हुन्दी।" इधेरे ताई मैं बडी खूसी कने अपणी कमजोरियाँ पर घमण्ड करणा कि मसीह जी री समर्थ मेरे पर छां करदी रेह्यो। 5 इधेरे ताई मैं मसीह जी ताई कमजोरियाँ अन्दर, ते निन्दा होणे अन्दर, ते दरिद्रता अन्दर, ते उपद्रवां अन्दर अते बुरे बेले अन्दर खुस्स है; किजोकी जिस बेले मैं कमजोर हुन्दा, तां ई ताकतवर हुन्दा। 6 मैं बेवकूफ ता बणेया, अपण तुसा ने ई मिन्जो एह करणे पर मजबूर कित्तेया। तुसा जो ता मेरी तारीफ करणी चाहिन्दी थी, किजोकी हालांकि मैं किछ बी नी है, तां बी तिन्हा बड्डे का बड्डे प्रेरितां का कुस्की गल्ल अन्दर घट्ट नी है। 7 प्रेरित रे लक्षण बी तुसा रे बिच सबनी तरीके रे सबर समेत चिन्हां ते अनोखे कम्मां ते समर्थ रे कम्मां कने दस्सेया गे। 8 तुसी कुण जल्ला गल्ल अन्दर दुज्जी कलीसिया का घट्ट थिये, सिरफ इस अन्दर ई कि मैं तुसा पर अपणा भार नी पाया। मेरी इस बेन्याई जो माफ करी देयो। 9 दिखखो, मैं तिज्जी बरी तुसां का आणे जो तयार है, ते मैं तुसा पर कोई भार नी रखणा, किजो कि मिन्जो तुसा री जाएदात नी अपण तुसी चाहिन्दी। किजो कि बच्चेयाँ जो अपणे अम्मां-बब्बां ताई पैसे नी कठेरणा चाहिन्दी, अपण अम्मां-बाबबेयाँ जो बच्चेयाँ ताई। 10 मैं तुसां री आत्मां ताई बडी खूसी कने खरच करणा, अपण अप्पु बी खरच होई जाणा। कै जितणा बधि करी मैं तुसां कने प्यार रखदा, तितणा ई घट्ट करी तुसा मेरे कने प्यार रखणा ?

### कुरुन्धियों ताई पौलुस री चिन्ता

11 इह्याँ होई सकदा कि मैं तुसा पर बोझ ना पाया हो, अपण चलाक्की कने तुसां जो धोखडा देई करी फसाई लिच्छेया! 12 भला, जिन्हा जो मैं तुसां का भेजेया, कै तिन्हा बिच का कुस्की रे जरिए मैं छळ करी के तुसा का किछ लेई लिच्छेया ? 13 मैं तीतुस जो समझाई करी तिसेरे कने तिस भ्याळ जो भेजेया, ता कै तीतुस ने छळ करी के तुसां का किछ लिच्छेया ? कै असी इक्क ई आत्मा

रे चलाणे पर नी चलन ? कै इक्क ई लीक पर नी चले ? 14 तुसी हल्ले ताई समझदे होणे कि असी तुसां सामणे हटि करी जवाब देया करदे हिन। असी ता परमेश्वर जो हाजर जाणी करी मसीह अन्दर बोलदे, अते ओ प्यारेयो, सारी गल्लां तुसां री उन्नती ताई ई बोलदे। 15 किजो कि मिन्जो डर है, कुदखी इह्याँ ना हो कि मैं आई करी जदेह्या चाहन्दा, तदेह्या ई तुसा जो नी पाँ; ते मिन्जो बी जदेह्या तुसी नी चाहन्दे तदेह्या ई पाओ; ते तुसा अन्दर लड़ाई, हिरस, लैह, वरोध, जळस, चुगली, घमण्ड ते बखेड़े होन; 16 ते कुदखी इह्याँ ना हो कि मेरे परमेश्वर मेरे दुबारा तुसा का ईणे पर मेरे पर दबाव पान ते मिन्जो मते जह्येयाँ ताई फिरी सोक करणा पेयो, जिन्हा ने पैल्ले पाप कित्तेया थिया ते गन्दे कम्म ते व्याभिचार ते लुचपन कने, जेहड़ा तिन्हा ने कित्तेया, मन नी फेरेया। 17 अवे तिजी वारी मैं तुसा का लग्गे रा आणा दो या तिन मणुआ सामणे गल हुणी ! 18 जियां कि मैं दुजी बरी तुसां कने थिया वैसे हीअवे दुर रिन्दे हुए जिन्हा मणुआ ने कने सबनी लोका जो बोलदा की मैं अवे जे आण ता तिन्हा जो माफ नी करना ! 19 किजो कि तुसा ता इस गला दा सबुत चान्दे कि प्रभू यीशू मसीह जी मेरे अन्दर बोलदे जेडा तुम्हारे तिकर कमजोर निरे पर ताकतवर है ! 20 प्रभू यीशू जी कमजोरी दे कारण क्रूस पर ता चढाए गये पर परमपिता परमेश्वर दी ताकत कने से जिन्दो हिन होएरे ! अवे असि भी कमजोर ता हिन पर परमेश्वर दी ताकत कने दुवारे जिणा ! 21 तुसा अपने आप जो परखो कि तुसी विश्वास बिच हिन की निन ! क्या तुसी अपने वारे बिच नि जाणदे कि तुसी प्रभू यीशू जी दा विश्वास करदे कि नि अगर तुम्हा रे जो इतणा पता नि लगदा ता तुसी जाच णे अन्द र निकम्मेव हिन !

### आखरी चेतावनी

13 मेरी तुसा कने आस हे कि तुसी जाणी लेन कि असि निकम्मेप निन ! 2 असि परमेश्वर कने यह प्राथना करदे कि तुसी कोइ बुराइ नि

करन इधेरे तिकर नि कि असि खरे दिसन तुसी भलाई करो चाहे असा जो निकम्मे हि मनण ! 3 पर असी सत्य दे विरोध अन्दरन कुछ भी नि करी सकदे पर सच तिकर हि असी सब कुछ करि सगदे ! 4 पर जिस वक्त असी कमजोर हिन ते तुसी ताकतवर हिन ता हम्मादरे जो बडी खुशी है इसका इलावा असी प्राथना भी करदे कि तुसी इसका जादा सिद् बणी जान ! 5 इस कारण मैं तुसा दी पिठ पिच्छे यह लिखदा कि मैं तिस अधिकार जेडा कि प्रभू जी ने मिन्जो अधिकार बिगाडने तिकर नि पर बणाने तिकर है दितेरा मिन्जो बडि सखति कने पेश आणा पेणा ! 6 मेरे भाईओ खुश रिओ सिद् बणदे जाओ सबर रखो इक हि मन रखो मिली जुली कने रिओ ! प्याअर करने वाल ते शान्ति देणे दाता तुसा कने है ! 7 इक दुजे जो बडे प्यार कने नम्साकार करो जियां पवित्र मणु करदे ! 8 सब पवित्तर महु तुसां जो नमस्ते बोलदे। 9 प्रभु यीशु जी रा अनुग्रह कने परमेश्वर जी रा प्या र और पवित्र आत्मो दि सहभागिता तुसा सबनी कने हुन्दीय रेह्यो। 10 पौलुस री तरफ का, जे ना ता महुआं री तरफ का, अते ना कुसकी इक महु रे जरिये, बल्कि यीशु मसीह अत्ते परमेश्वर रे जरिये, जिन्हा ने यीशु मसीह जो मरे रेयां बिच का फिरी जिंदा करी दित्तेया, बसेख दैणे वाळा दूत है।

### अभिवादन

11 अते मेरे कने जे भाई हिन, उन्हा सबनां री तरफ का गलातियां री सबनी कलीसिया रे नां; 12 असां रे पिता परमेश्वर, अते प्रभु यीशु मसीह री तरफ का तुसा जो दया अते सान्ति मिल्लो। 13 जिन्हा म्हारे पापां ताई अपु जो देई दित्तेया, ताकि असा जो पापी दुनिया का, जिस बिच असी रेह्या करदे हिन, से छुटकारा दुआई सको। 14 तिन्हेरी जै-जै कार हमेसा-हमेसा ताई हुन्दी रेह्। आमीन।

# गलातियों

## अभीवादन

1 मिंजो हरानी हुन्दी! कि तुसी महु इतणी जल्दी उस परमेश्वर का मूँह फेरी करी, जिस ने तुसा जो मसीह री दया रे जरिये सद्देया थिय्या, कुसकी होर ई शुभ-बसेख री तरफ जाया करदे ने। 2 कोई दूजा शुभ-बसेख ता असलियत बिच है ई नी, अपण किच्छ इदेय महु हिन जे तुसां जो भटकाया करदे हिन अत्ते मसीह रे शुभ-बसेख बिच हेर-फेर री कोसिस करेया करदे हिन। 3 अपण चाये असा हो या कोई स्वर्गदूत, जे कोई असा रे सुणाये रे शुभ-बसेख का अलग शुभ-बसेख सुणान्दा ता से नरक री सजा भुगते। 4 जिह्य्यां असी पैल्ले बोली बेट्टे रे हिन, तिह्य्यां अबे बी बोलदा कि चाये असा हो या कोई स्वर्गदूत जे शुभ-बसेख तुसां मन्ने रा है, तिस का अलग सुणान्दा ता से नरक री सजा भुगते। 5 कै इस कने तुसां जो लगदा कि मैं महुआं रा समर्थन चाहन्दा? या एह कि मिंजो परमेश्वर रा समर्थन मिल्ले? या मैं महुआं जो खुस करणे री कोसिस करेया करदा है? जे मैं महुआं जो खुस करेया करदा हुन्दा ता मसीह रा दास नी हुन्दा।

### कोई दुआ सुसमाचार नी है।

6 ओ भाइयों, मैं तुसा जो जताणा चाहन्दा कि से शुभ बसेख जिसेरी सिक्सा मैं तुसा जो दित्ती है, 7 से कोई महुआं का मिल्ले रा शुभ-बसेख नी है अत्ते ना कुसकी महु ने मिंजो इसेरी सिक्सा दित्ती, अपण यीशु मसीह रे जरिये मेरे का आया है। 8 यहूदी धर्म बिच जे पैल्ले मेरा चाल-चलन थिय्या, उस जो तुसी सुणी बेट्टे रे हिन कि मैं परमेश्वर री कलीसिया जो बड़ा तंग अत्ते तिन्हा जो खत्म करणे री कोसिस करदा रेहन्दा थिय्या। 9 अत्ते अपणे ई जाति वाळेयां का जे मेरे ई बराबर थिये यहूदी मत बिच अग्रे थिय्या किजोकि मेरे पूरखां का जे रीति रवाज मिले थिये, तिन्हा बिच मैं बड़ा जोशीला थिय्या। 10 अपण परमेश्वर ने, मेरे पैदा होणे का पैल्ले ई मिंजो चुणेया अत्ते अत्ते अपणी दया बिच मिंजो सद्देया,

### पौलुस कियां प्रेरित बणेया

11 ताकि से मिंजो अपणे पुत्र रा ज्ञान कराई देयो अत्ते मैं होर जाति रे लोकां रे बीच शुभ-बसेख रा प्रचार करां। ते मैं ना कुसकी महु का कोई सलाह लेई। 12 अत्ते ना मैं उन्हा लोकां का यरुशलम गया जे मेरे का पैल्ले बसेख दैणे वाळे दूत बणे थिये। बल्कि मैं अरब देस जो चली गया, अत्ते फिरी तिन्हे का दमिशक देस जो हटी आया। 13 फिरी त्रै सालां बाद मैं पतरस जो मिलणे ताई यरुशलम जो गया, अत्ते पन्दां रोजां ताई तिन्हा का रेह्या। 14 अपण प्रभु रे भ्याळ याकूब जो छडी होर कोई प्रभु रे दूत कने नी मिल्लेया। 15 परमेश्वर मेरा गवाह है कि जे किच्छ मैं तुसां जो लिखदा तिस बिच किच्छ बी झूठ नी है। 16 इसेरे बाद मैं सीरिया अत्ते किलिकिया रे इलाकेयां जो गया। 17 अपण यहूदिया रे मसीही जो मनणे वाळी कलीसीया ने मिंजो कदी दिख्खे रा नी थिय्या। 18 अपण तिन्हा एह सुणेया थिय्या जे पैल्ले असा जो तंग करदा थिय्या सेहई अवे उसी मत रा, जिस जो से खत्म करी दैणा चाहन्दा थिय्या, प्रचार करदा, 19 अत्ते तिन्हा वजाह कने से परमेश्वर री जै-जै कार करणा लग्गे। 20 चौदाह सालां बाद मैं बरनबास कने यरुशलम जो गया अत्ते तितुस

जो बी अपणे कने लेई गया। 21 अत्ते परमेश्वर रे दर्शन रे मुताबिक मैं तिन्हे गया। अत्ते जे शुभ-बसेख मैं होर जाति रे लोकां बिच प्रचार करदा थिय्या, उस्सी जो मैं इक घरेलू सभा रे बिच अलग जाईकरी कलीसिया रे प्रधानां जो सुणाया, जे अपु जो बड़ा समझदे थिये, ताकि जे कम्म पिछले रोजे किन्हे थिये, या जिस जो मैं करेया करदा है, से बेकार नी चली जाये। 22 अपण तितुस जे मेरे कने थिय्या यूनानी होणे पर भी तिस कने खतना करणे ताई जबरदस्ती नी किन्ती गई। 23 अत्ते एह तिन्हा झूठे भाइयां री वजह कने होया, जे चोरी कने घुसडी आये थिये कि म्हारी उस आजादी जो जे यीशु मसीह बिच असा जो मिली है, भेद लेइकरी असा जो गुलाम बनाण। 24 अपण असा तिन्हेरी आज्ञाकारिता रे अग्रे जानु नी टेके ताकि से सच्चाई जे शुभ-बसेख बिच है तुम्हारे अन्दर बणी रहे।

### होर प्रेरितां रा पौलुस जो मनणा

2 अपण मन्ने-तन्ने महुआं का मिंजो किच्छ नी मिल्लेया (जे जदेय बी थिये, मिंजो इस कने कोई फरक नी पैदा। बगेर कोई भेदभाव रे सब महु परमेश्वर रे सामणे इक जदेय हिन।) तिन्हा इजतदार लोकां का मिंजो या मेरे शुभ-बसेख जो कोई फायदा नी होया। 2 अपण इन्हा प्रधानां ने दिख्खेया कि परमेश्वर ने मिंजो तदेया ई इक खास कम्म मेरे हवाळे किन्हेया है जदेया पतरस जो परमेश्वर ने यहूदियां जो शुभ-बसेख सुणाणे रा कम्म दिन्हेया थिय्या। अपण परमेश्वर ने होर जाति रे लोकां जो शुभ-बसेख सुणाणे रा कम्म मिंजो दिन्हेया। 3 परमेश्वर ने पतरस जो इक बसेख दैणे वाळे दूत रे रूप बिच कम्म करणे री सक्ति दिन्ती थी। पतरस जिन्हेरा खतना होये रा थिय्या तिन्हा ताई इक बसेख दैणे वाळा दूत है। परमेश्वर ने मिंजो बी इक बसेख दैणे वाळे दूत रे रूप बिच कम्म करणे री सक्ति दिन्ती है। अपण मैं उन्हा महुआं ताई बसेख दैणे वाळा दूत है जे जे होर जाति रे हिन। 4 अत्ते इस तरिके तिन्हा ने मेरे पर परमेश्वर री दया जो समझी लेया अत्ते जिन्हा जो कलीसिया रे खम्बे समझेया जांदा याकूब, कैफा, यहून्ना ने बरनबास ते मेरे कने खतना होये रे अत्ते होर जाति रे लोकां रे बिच कम्म करणे ताई हत्थ मिलाई लिन्हेया। 5 तिन्हा ने असा कने बस ऐई बोलेया कि असी गरिबां रा ध्यान रखन। अत्ते मैं इस्सी कम्म जो करणे ताई अपु बी कोसिस करदा रेहन्दा थिय्या। 6 अपण जां पतरस आन्तकिया आया ता मैं तिसरे सामणे तिसरे खिलाफ बोलेया, किजोकि से गलत थिय्या। 7 किजोकि याकूब रे भेजे रे किच्छ महुआं रे इत्ते पुजणे का पैल्ले से होर जाति रे लोकां कने खांदा थिय्या। अपण तिन्हा महुआं रे आणे का बाद तिस ने होर जाति रे लोकां का अपणा हत्थ हटाई लेया अत्ते अपु अलग होई गया। तिस ने उन्हा महुआं रे उर कने इदेया किन्हेया किजोकि से चाहन्दे थिये कि होर जाति रे महुआं रा बी खतना होणा चहिंदा। 8 दूजे यहूदियां ने बी इस दिखावे बिच उसेरा साथ दिन्हेया। इत्ते तक कि इस वजह कने बरनबास बी भटकी गया। 9 मैं जां एह दिख्खेया कि से महु शुभ-बसेख री सच्चाई रे साहब कने नी चलया करदे हिन ता मैं सब रे सामणे पतरस जो बोलेया, जां तू यहूदी होई करी बी होर जाति रे लोकां साहई जिंदगी जिंदा, ता फिरी होर जाति रे लोकां कने तू यहूदियां साहई

जीणे ताईं किजो जबरदस्ती करया करदा है? 10 असा ता पैदा हुन्दे का ई यहुदी हिन, म्हारा पापी गैरयहुदियां कने कोई रिश्ता नी है।

### पौलुस रा पतरस रा विरोध करणा

11 फिरी बी असी एह जाणदे हिन कि नियम रे कम्मां कने नी बल्कि यीशु मसीह पर विस्वास करणे कने भले अत्ते नेक हुन्दे। असा ने इधेरे ताईं यीशु मसीह पर विस्वास कित्तेया ताकि असी इस वजह कने भले अत्ते नेक हौन, ना कि नियम जो मनणे कने। किजोकि उस जो मनणे कने कोई बी मल्लु भला ते नेक नी हुन्दा। 12 अपण जे असी यीशु मसीह बिच धर्मी बनणा चाहन्दे हिन, जे अपु ई पापी निकलण, ता कै मसीह पाप रा नौकर है? बिल्कुल नी! 13 जे मैं जिस जो छड्डी बँधे रा है, तिस्सी तरिके कने फिरी सिक्सा देणा लगी पेया ता मैं हुक्म तोड़ने वाळा कसुरवार बणी जाणा। 14 किजोकि नियमां रे जरिये मैं नियमां ताईं मरी गया ताकि परमेश्वर ताईं फिरी जी सकां।

### भरोसा करणे कने धर्मी होणा

15 मैं यीशु मसीह कने सुळी पर चढाया गया, अते अवे मैं जिंदा नी रेया, अपण मसीह मेरे बिच जिंदा हिन, अते मैं सरीर बिच अवे जे जिंदा है ता सिर्फ तिस विसवास कने जिंदा है, जे परमेश्वर रे पुत्र पर है, जिन्हा ने मेरे कने प्यार कित्तेया, अते मेरे ताईं अपु जो देई दित्तेया। 16 मैं परमेश्वर री दया जो बेकार नी है करेया करदा, किजोकि जे नियमां रे जरिये धार्मिकता हुन्दी, ता मसीह रा मरणा बेकार थिय्या। 17 ओ बेफकुफ गलातियों, कुनिये तुसां जो भरमाई लिंते रा है। तुसां री हाक्खि रे सामणे तां मन्त्रों यीशु जी जो क्रुस पर दिखाया गया। 18 मैं तुसां का सिर्फ ए जानणा चाहदां की तुसी आत्मा जो व्यवस्था रे कम्मां का या विश्वास रे कम्मां का हासिल कित्ते रा है? 19 क्या तुसां री अक्ल पर इना परदा पेई गेरा है कि तुसी आत्मा रे तरिके कने सुरु ता कित्ता अपण तुसी इस जो सरीर रे कम्मा कने खत्म करणा? 20 क्या तुसी इतणा भारी तकलीफ बिना मतलब बिच ई भोगी? अपण अवे बेकार बिच नी। 21 जेडे परमेश्वर ने, तुसां जो आत्मा, कने अनोखे-अनोखे कम्म करणे रे दान दित्ते सेह तुसां जो व्यवस्था रे कम्म करणे कने मिल्ले या फिरी जेहड़ा तुसी सुणेया तिस पर विस्वास करणे कने मिल्ले?

### व्यवस्था या विस्वास

3 अब्राहम ने ता परमेश्वर पर भरोसा कित्तेया ते से तिसेरे ताईं धार्मिकता गिणेआ गया। 2 अते ए जाणी लेयो की जे विश्वास करणे वाले हिन, से ई अब्राहम रे बच्चे हिन। 3 ते पवित्रशास्त्र ने पैल्ले का ई ए जाणी करी की परमेश्वर ने अन्यजातियां जो विश्वास कने धर्मी ठेहराणा, पैल्ले का ई अब्राहम जो ए शुभ-भसेख सुणाई दित्ता की तेरे जरिये सारी जातियां ने आशीष पाणी। 4 इस ताईं जे विश्वास करणे वाले हिन से अब्राहम कने आशीष पादें। 5 इस ताईं जिन्ने लोक व्यवस्था रे कम्मां पर भरोसा रखदे, तिन्हा सारेयां पर शाप है। 6 अपण ए गल्ल दिसदी है की परमेश्वर रे मुहागगर कोई बी व्यवस्था जो मन्त्री करी धर्मी नी मन्त्रेया जादां, किजोकी धर्मी मल्लु विश्वास कने ई जिन्दा रैल्ला। 7 अपण व्यवस्था रा विश्वास कने कोई लेण-देणा नी है किजोकी जे तिन्हा जो मनगा, तिन्हा ने तिस कने ई जिन्दे रैहणा। 8 मसीह ने जे असां ताईं शाप बणेया, असां जो खरिदी करी असां जो व्यवस्था रे पाप का अजाद कित्तेया, किजोकी लिख्खे रा है "किजोकी लिख्खे रा है जे कोइ लक्कड़ पर टगेंया जादा से शापित है।" 9 ए इस ताईं होया की अब्राहम री आशीष मसीह यीशु जी बिच अन्यजाति तिकर पुजे, ते असी विश्वास रे जरिये तिस आत्मा जो पाई जाण जिसेरे ताईं वादा कित्ते रा गया है। 10 हे भाइयों, मैं ए म्हणुआं रीती पर बोलदा, म्हणुआं री कसमां बी जे पक्कि होइ जादी, तिसजो ना ता कोइ टाळदा ते ना ई तिस बिच किछ बधादां। 11 अते वादे अब्राहम जो ते तिसेरे वशं जो दित्ते गे रे हिन। से ए नी बोलदा "वशां जो", जिय्यां मते जणेया रे बारे बिच बोलेया जादां, अपण इक्क रे बारे बिच "तेरे वशं जो" ते से मसीह है। 12 अपण मैं ए बोलदा की : जे वादा परमेश्वर ने पैल्ले का ई पक्का कित्तेया था, तिसजो व्यवस्था चार सौ ति सालां रे बाद आई करी टाळी नी सकदी थी कि वादा बेकार ठेहरे। 13 किजोकी जे विरासत व्यवस्था का मिळी री है ता

फिरी वादे का नी, अपण परमेश्वर ने अब्राहम जो वादे रे जरिए देइ दित्ती री है। 14 तां फिरी व्यवस्था किजो दित्ती गी? से नियम टुटणे री वजह कने बाद बिच दित्ती गी की तिस वशं रे आणे तिकर रेय, जिसजो वादा दित्तेया गया; ते से स्वर्गदुतां रे जरिये इक्क बिचौल्ले रे हत्थां ठेहराई गी।

### व्यवस्था ते वाचा

15 बिचौल्ला ता इक्क रा नी हुदां, अपण परमेश्वर इक्क ई है। 16 तां क्या व्यवस्था परमेश्वर रे वादेयां रे खलाफ है? बिल्कुल बी नी! किजोकी जे एसी व्यवस्था दित्ती जाई सकदी जे जिन्दगी देइ सकदी तां सचमुच धार्मिकता व्यवस्था का ई हुदी। 17 अपण पवित्रशास्त्र ने सारेयां जो पाप रे हेठ करी दित्ता, ताकी से वादा जिसेरा आधार यीशु मसीह जी पर विश्वास करणा है, विश्वास करणे वालेयां पर पुरा होइ जाए। 18 अपण विश्वास रे आणे का पैल्ले व्यवस्था रे हेठ असां री रखवाळी हुदिं थी, ते तिस विश्वास रे आणे तिकर जे सामणे आणे वाळा थिया, असी तिसेरे इ बन्धन बिच रैहण। 19 इधेरे ताईं व्यवस्था मसीह तिकर पुजाणे ताईं असां री गुरु हुईकी असी विश्वास कने धर्मी होण। 20 अपण जा विश्वास आई गया, तां अवे असी गुरु रे हेठ ना रैहण।

### व्यवस्था रा मकसद

21 किजोकी अवे तुसी सारे तिस विश्वास रे जरिये जे मसीह यीशु जी पर है, परमेश्वर रे बच्चे हिन। 22 ते तुसां बिच का जिन्नेयां ने मसीह यीशु जी रा बपतिसमा लिंते रा है तिन्हा ने मसीह जो पाई लिंते रा है। 23 अवे ना कोई यहुदी रेया ना ई यूनानी, ना कोई दास ना ई अजाद, ना नर ना ई औरत, किजोकी तुसी सारे मसीह बिच इक्क हिन। 24 ते जे तुसी मसीह रे हिन तां अब्राहम रे वशं ते वादे रे हसाब कने वारिस बी हिन। 25 मैं ए बोलदा की वारिस जां तिकर बच्चा है तां तिकर तिस बिच ते नौकरां बिच कोइ फरक नी है। 26 अपण प्यो रे ठेहराए रे वेले तिकर सम्भालणे वाले ते इंतजाम करणे वालेयां रे बस बिच रैहन्दा। 27 तिय्यां ई असी बी, जां बच्चे थिये, तां दुनिया री सुरुआती शिक्षा रे बस बिच होइ करी नौकर बणे रे थिये। 28 अपण जां वेला पूरा होइ गया, तां परमेश्वर ने अपणे पुत्र जो भेजेया जे इक्क जनानि का पैदा होए, ते व्यवस्था रे हेठ पैदा होए, 29 ताकी व्यवस्था रे हेठ जे लोक्क हिन तिन्हेरी कीमत चुकाई करी तिन्हेरे जो छुड़ाई ले, ते असां जो गोद लिंते रे होणे रा पद मिले।

4 ते तुसी जे पुत्र हिन, इधेरे ताईं परमेश्वर ने अपणे पुत्र री आत्मा जो, जे "हे अब्बा हे पिता बोलिकरी पुकारदा", असां रे दिल बिच भेजे रा है। 2 इधेरे ताईं तु आवे नौकर नी अपण पुत्र है, ते जां पुत्र होया, तां परमेश्वर रे जरिये वारिस बी होया। 3 पैल्ले ता तुसी परमेश्वर जो जाणी करी तिन्हेरे दास थिये जे स्वभाव कने परमेश्वर नी, 4 पर अवे जे तुसी परमेश्वर जो परहचाणी लिंतेया अपण परमेश्वर ने तुसां जो पेहचाणा, ते तिन्हा कमजोर ते निकम्मी सुरु री शिक्षा रे पाससे किजो फिरदे। 5 तुसी दिनां ते महिने ते नियत वेलेयां जो ते सालां जो मनदे, 6 मैं तुसां रे बारे बिच डरदा की इदेया ना हो कि जे मेहनत मैं तुसां ताईं कित्ति से बेकार ना जाओ। 7 ओ भाइयों मैं तुसां का मित्रत करदा की तुसी मेरे सांही होइ जाओ, किजोकी मैं बी तुसां सांही होइ गे रा है, तुसी मेरा किछ बिगाड़े रा नी है।

### गलातियां रे बारे बिच पौलुस री चिंतां

8 तुसी जाणदे की पैल्ले-पैल्ले मैं सरीर री कमजोरी री वजह कने तुसां जो शुभ-भसेख सुणाया, 9 ते तुसी सरीरी हालत जो जे तुसां री परिक्षा री वजह थी बेकार नी समजेया ना ई तिसका नफरत कित्ती ते परमेश्वर रे दूत बल्कि अप्पु मेरे जो मसीह सांही अपणाया, 10 तां फिरी तुसां री खुसी मनाणा कुते गया? मैं तुसां रा गुआह है की जे होइ सकदा तां अपनी हाक्खि बी कडि करी मेरे जो देइ दिदें, 11 तां क्या तुसां कने सच बोलणे री वजह कने मैं तुसां रा दुस्मण बणी गे रा है? 12 से तुसां जो दोस्त ता बनाणा चाहदें अपण खरी नियत कने नी, अपण तुसां जो बखरा करणा चाहदें। 13 तुसी तिन्हा ई जो दोस्त बनाई लेयो अपण ए बी खरा है की खरी गल्लां बिच हर वेले दोस्त बनाणे री कोसीस कित्ती जाए, ना सिर्फ तिसी वेले जां मैं तुसां कने रैहन्दा।

14 ओ मेरे बच्चेयों, जां तिकर तुसां बिच मसीह रा रूप ना बणी जाए, तां तिकर मैं तुसां ताई दुपराणी जदेया दर्द सैहदां। 15 खरा ता ए ई हुदा की अवे मैं तुसां का आई करी होर ई तरिके कने बोलां किजोकी तुसां रे बारे बिच अवे मैं उलझन बिच है। 16 तुसी जे व्यवस्था रे हेठ होणा चाहदें मेरे जो दुस्सो, क्या तुसी व्यवस्था री नी सुणदे? 17 ए लिखखे रा है की अब्राहम रे दो पुत्तर होए, इक्क नौकराणी का ते अजाद जनानी का। 18 अपण जे नौकराणी का होया, से सरीरी रीती पर कने पैदा होया; ते जे अजाद जनानी का पैदा होया से वादे रे मुताबक पैदा होया। 19 इन्हा गलां बिच इक्क उदारण है : ए जनानियां मन्नो दो वादे हिन, इक्क ता सीने पहाड़ री जिसका सिर्फ गुलाम ई पैदा हुदें; ते से हाजिरा है। 20 ते हाजिरा मन्नो अरब रा सीने पहाड़ है, ते नौया यरुशलेम तिसरे बराबर है, किजोकी से अपणे बच्चेयां समेत गुलामी बिच है।

### सारा ते हाजिरा रा उपनाण

21 अपण उप्पर री यरुशलेम अजाद है, ते से असां री माता है। 22 किजोकी लिखखे रा है, "ओ ओत्तर जनानी, तु जे बच्चे नी पैदा करदी, खुसी मणा; तू जिसजो पीडां नी हुदी, गळा खोलि करी जय जयकार कर, किजोकी जे छडि दित्ती गी थी तिसरे बच्चे सुहागिन का बी जादा हिन। 23 "ओ भाईयो, असी इसहाक साहई वादे कित्ते रे बच्चे हिन। 24 ते जिय्यां तिस वेल्ले सरीर रे हिसाब कने जम्मे रा आत्मा रे हिसाब कने जम्मे रे जो परेसान करदा थिया, तियां ई अब्बे बी हुदां। 25 अपण पवित्रशास्त्र क्या बोलदा? "नौकराणी ते तिसरे निके जो कडि दे किजोकी नौकराणी रा पुत्तर अजाद जनानी रे बच्चे कने वारिस नी होणा। 26 इस ताई ओ भाईयो, असी नौकराणी रे नी अपण अजाद जनानि रे पुत्तर हिन। 27 मसीह जी ने आजादी ताई असा जो मुक्त कित्तेरा है; इधेरे ताई तिस अन्दर ई बणी रेह्यो, ते तुसी दुवारा गुलामी रे जुगळ अन्दर मत फसदे। 28 दिखख, मैं पौलुस तुसां जो बोलदा कि अगर तुसी खतना करांगे, ता मसीह का तुसां जो कोई फाएदा नी होणा। 29 फिरी बी मैं हर इक खतना कारणे वाळे जो बोली दिन्दा कि तिस जो सारी व्यवस्था मनणा पैणी है। 30 तुसी जेहडे कि व्यवस्था री वजह कने धरमी साबित होणा चाहन्दे, मसीह का बखरे होई गेरे हिन अते अनुग्रह का छुडकी पेरे हिन। 31 किजो कि आत्मा री वजह कने असी भरोसे कने, आस कित्तेरी धार्मिकता री भाळ रखदे।

### अजादी जो बचाई करी रखो

5 मसीह यीशु जी अन्दर नां खतना ते नां बगैर-खतने रा कोई कम्म है, अपण सिरफ भरोस्सा, जेहडा प्यार री वजह कने ही हुन्दा तिस रा इ असर है। 2 तुसी ता ठीक-ठाक दौडेया करदे थिये। अवे कुनिए तुसां जो रोक्की दित्तेया कि सच्च जो मत मन्नो। 3 इदेहई सीख तुसां रे सदणे वाळे रे पाससे का नी है। 4 थोडा जह्का खमीर सारे गुहरे आटे जो खमीरा बणाई दिन्दा। 5 मैं प्रभू जी पर तुसां रे बारे अन्दर भरोस्सा रखदा कि तुसा रा कोई दुजा ख्याल नी होणा; अपण जेहडा तुसा जो घबराई दिन्दा, से कोई बी किजो नी होए, तिस जो सझा मिलणी है। 6 अपण ओ भ्याळो, अगर मैं अब्बे ताई खतना रा प्रचार करदा, ता किजो हल्ले ताई बी मिन्जो तंग कित्तेया जान्दा ? फिरी ता क्रूस री ठोकर जान्दी रेहई। 7 भला हुन्दा कि जेहडे तुसां जो सहई रस्ते का भटकान्दे, से अपणा अन्ग ई कटि रखदे। 8 ओ भ्याळो, तुसा जो अजाद होणे ताई सद्देया गेरा है; अपण इह्यां नां हो कि ए आजादी सरीरिक कम्मां ताई मोक्का बणो, अपण प्यार कने इक-दुजे रे सेवादर बणो। 9 किजो कि सारी व्यवस्था इस इक्कोई गल्ल अन्दर पूरी होई जान्दी, "तू अपणे पड़ोसी कने अपणे सेई प्यार रख।" 10 अगर तुसी इक-दुजे जो दन्दा कने खाणा ते फाडी रखणा चाहन्दे, ता चुकत्रे रेह्यो कि तुसी कुदखी इक-दुजे रा बेडा-गरक नां करी छडन। 11 पर मैं बोलदा, आत्मा रे हसाब कने चलो ता तुसा सरीर री लालसा जो कुसी बी रीत कने पूरा नी करणा। 12 किजो कि सरीर आत्मा रे खलाफ ते आत्मा सरीर रे खलाफ लालसा करदा ते ए इक-दुजे रे दुसमण हिन, इधेरे ताई कि जे तुसी करणा चाह से नी करी सकन। 13 ते जे तुसी आत्मा रे चलाए चलदे ता व्यवस्था रे अधीन नी रेह। 14 सरीर रे कम्म ता साह्यणे ई हिन, मतलब कि व्याभिचार, गन्दे कम्म, लुच्चापन, 15 मूरतियां री

पूजा करणा, जादू-टोणा करणा, दुस्मणी रखणा, लड़ीणा, हिरस, लैह, दुजे रे खलाफ सोच, फूट पाणा, धरम का हटि करी हरकतां करणा,

### पवित्रात्मा रे जरिये चलणा

16 ड्राह, मतवाले होई जाणा, लीला-क्रीडा अते इन्हा साहई होर-होर कम्म हिन, इन्हेरे बारे अन्दर मैं तुसां कने पैल्ले ई बोली दिन्दा जिह्यां कि पैल्ले बी बोली बैठेरा है, कि इदेह-दे कम्म करणे वाळे परमेश्वर रे राज रे वारिस नी होणे हिन। 17 अपण आत्मा रा फळ प्यार, आनन्द, सान्ति, सबर, किरपा, नेकी, भरोस्सा, है 18 ते किरपा, भलाई, भरोसा, ते नरम दिल, ते अपु पर काबू रखणा, इदेय-इदेय कम्मां रे खलाफ कोई बी व्यवस्था नी है। 19 अते जेहडे मसीह यीशु जी रे हिन, तिन्हा ने सरीर जो तिसरी लालसां ते मरजियां समेत क्रूस पर चढाई दित्तेरा है। 20 अगर असी आत्मा रे जरिए जीन्दे हिन, ता आत्मा रे हसाब कने चलन बी। 21 असी घमण्डी होई करी नां इक-दुजे जो छडन, अते नां इक-दुजे कने विरोध करन। 22 ओ भ्याळो, अगर कोई महु कुस्की गुनाह अन्दर कपडीह बी जाओ ता तुसी, जेहडे कि आत्मिक हिन, नमरता कने इदेह जो सम्भाळो, ते अपणी बी चौकसी रख्यो कि तुसी बी परख अन्दर नी पैन। 23 तुसी इक-दुजे रा भार चुक्को, ते इस तरीके कने मसीह जी रे निय जो पूरा करो। 24 किजो कि अगर कोई किछ नी होणे पर बी अपु जो किछ समझदा, ता से अपु जो धोख्खा दिन्दा। 25 अपण हर इक जह्का अपणे ई कम्मां रो परखी लेयो, ते फिरी दुजे रे बारे अन्दर नी अपण ता अपणे ई बारे अन्दर तिस जो घमण्ड करणे रा मोक्का मिलणा। 26 किजो कि हर इक महु ने अपणा ई बोझा चुकणा।

### इक्क दुए री मदद करो

6 जेहडा वचन री सीक्सा लिन्दे, से सबनी खरी चीजा अन्दर सखाणे वाळे रा हिस्सेदार बणो। 2 धोखे मत खाओ; परमेश्वर जो मजाक अन्दर नी उडाय जान्दा, किजो कि महु जे किछ बी बान्दा तिनि ए से ई बडणा है। 3 किजो कि जेहडा अपणे सरीर ताई बान्दा, तिनि ए सरीर रे जरिए विनास री फसल बडुणी; ते जेहडा आत्मा ताई बान्दा, तिनि ए आत्मा रे जरिए हमेसा री जीन्दगी वाळी फसल बडणी है। 4 असा जो नेक कम्म करणे अन्दर हिम्मत नी छडणा चाहिन्दी, किजो कि अगर असी दिल्ले नां होन ता असा सहई बेल्ले पर फसल बडुणी। 5 इधेरे ताई जित्ते तक बी मोक्का मिल्लो असा जो सबनां कने भलाई करणा चाहिन्दी, खास कर भरोस्सा करणे वाळे भ्याळां कने। 6 दिखखो, मैं किह्यां बडु-बडु अक्षरां अन्दर तुसां जो अपणे हथ्यां कने लिखखेरा है। 7 जेहडे महु सरीरी दखावा चाहन्दे से ई तुसा पर खतना करवाणे ताई जोर पान्दे, सिरफ ईधेरे ताई कि से मसीह जी रे क्रूस री वजह कने तन्ना नां कित्ते जान। 8 किजो कि खतना कारणे वाळे अप्पु ता व्यवस्था पर नी चलदे, अपण तुसां रा खतना इधेरे ताई करणा चाहन्दे कि तुसा रे सरीर री हालत पर घमण्ड करन। 9 अपण इह्यां नां हो कि मैं होरसी कुस्की गल्ल रा घमण्ड करां, सिरफ असां रे प्रभू यीशु जी रे क्रूस रा, जिसेरे जरिए दुनिया मेरी नजरां अन्दर अते मैं दुनिया री नजरां अन्दर क्रूस पर चढाया गेरा है। 10 किजो कि नां खतना अते नां ई खतने-बगैर किछ है, अपण नोई सृष्टि।

### आखरी चेतावनी ते अभिवादन

11 जितणे जह्क्यां ने इस नियम पर चलणा तिन्हा पर, ते परमेश्वर रे इस्त्राएल पर सान्ति अते रेह्य हुन्दी रेह्यो। 12 अब्बे का बाद कोई मिन्जो दुख ना देयो, किजो कि मैं यीशु जी रे दागा जो अपणे सरीर अन्दर लित्तेरे फिरदा। 13 ओ भ्याळो, म्हारे प्रभू यीशु मसीह जी रा अनुग्रह तुसां री आत्मा रे कत्रे रेह्यो। आमीन। 14 पौलुस री तरफ का, जे परमेश्वर री मर्जी कने यीशु मसीह रा इक बसेख देणे वाळा दूत है, इफिसुस रे रैह्ले वाळे रे उन पवित्र महुआं जो अत्ते यीशु मसीहबिच विस्वास करणे वाळे रे नां; 15 तुसां जो म्हारे परम पिता परमेश्वर अत्ते यीशु मसीह री तरफ का दया अत्ते सांति मिलदी रेह। 16 म्हारे प्रभू यीशु मसीह रे पिता परमेश्वर धन्न हिन। उन्हा ने असा जो यीशु मसीह रे रूप बिच स्वर्ग री जगह बिच हर तरह री असीस दित्ती है। 17 दुनिया री रचना

का पैल्ले ई परमेश्वर ने असा जो मसीह बिच चुणी लेया, ताकि म्हारे ताई जे  
प्यार है उस बिच असी उसेरे सामणे बेकसुर अत्ते पवित्र होंन। 18 अत्ते उस्सी

वजह कने उन्हा ने यीशु मसीह रे जरिये असां जो अपणे बच्चेयां रे रूप बिच  
अपनाणे ताई चुणेया। ऐई उन्हेरी मर्जी थी अत्ते इरादा बी था।



# ईफीसियों

1 उन्हा ने एह इधेरे ताई कित्तेया कि से अपनी दया री महिमा री बड़याई करी सके जिस जो कि उन्हा ने असा जो, जे उसेरे प्यारे पुत्र मौजूद हिन मुफ्त बिच दित्तेया। 2 असा जो, उस बिच, उसेरे खून रे जरिये छुटकारा, मतलब असा रे पापां री माफी, उसेरी दया रे धन रे हिसाब कने मिली है,

## मसीह बिच आत्मिक आशिषां

3 जे उस ने पूरे ज्ञान अत्ते समझ कने असा पर बड़ी जादा किती है। 4 उस ने अपनी मर्जी रा भेद उस इरादे रे हिसाब कने असा जो दस्सेया जिस जो कि उस ने अपू बिच ई ठाणी लेया थिय्या। 5 परमेश्वर री एह योजना थी कि सही बेला आणे पर स्वर्ग री अत्ते धरती री सब चीजां जो मसीह बिच इकठ्ठा करन। 6 सब गलां योजना अत्ते परमेश्वर रे फैसले रे हिसाब कने किती जांदी। अत्ते परमेश्वर ने अपनी मर्जी री वजह कने ई असा जो मसीह बिच पवित्र होणे ताई चुणेया है। एह उसेरे हिसाब कने ई होया जिस जो परमेश्वर ने सुरु का ई ठाणी लेया थिय्या। 7 ताकि असी उसेरी महिमा री बड़याई री वजह बणी सकन, असी, यानी जिन्हा ने अपनी सारी उमेद मसीह पर रखे री है। 8 जां तुसी उस सच रा बसेख सुणेया जे म्हारे उद्धार रा शुभ-बसेख थिय्या, अत्ते जिस मसीह पर तुसी विस्वास कित्तेया थिय्या, ता जिस पवित्र आत्मा रा वचन दित्तेया थिय्या, मसीह रे जरिये उसेरी छाप परमेश्वर ने तुसां पर बी लगाई। 9 से आत्मा म्हारी उत्तराधिकार रे हिस्से री जमानत रे रूप बिच तिस बेले ताई असा जो देई दित्तेया गया, जां ताई से असा जो, जे तिसेरे अपने हिन, पूरी तरह कने छुटकारा नी देई दिंदा। इसेरी वजह कने महुआं ने उसेरी महिमा री बड़याई करणी। 10 इधेरे ताई जां का मैं प्रभु यीशु बिच तुम्हारे विस्वास अत्ते सब पवित्र महुआं ताई तुम्हारे प्यार रे बारे सुणेया है, 11 मैं तुम्हारे ताई परमेश्वर रा सुकर लगातार करेया करदा है। अपनी प्रार्थना बिच मैं हमेसा तुसां जो याद रखदा। 12 मैं प्रार्थना करदा कि म्हारे प्रभु यीशु मसीह रा परमेश्वर तुसा जो सही गलत री समझ अत्ते दर्शन री इदेयी सक्ति दे जिस कने तुसी उस महिमावान परम पिता जो जाणी सको। 13 मेरी बिनती है कि तुम्हारे मन री हाखियां खुली जाये अत्ते तुसी लौ रा दर्शन करी सको ताकि तुसा जो पता लगी जाओ कि उमेद कै है जिसेरे ताई तुसा जो सद्देया है। अत्ते पवित्र लोकां बिच उसेरी विरासत री महिमा रा धन कदेया है। 14 अत्ते असा विस्वासियां ताई उसेरी सक्ति कितणी महान है। इस सक्ति रा असर उस कम्म रे हिसाब कने है,

## पौलुस री प्रार्थना

15 जे उस ने मसीह बिच कित्तेया ताकि उस जो मरे रेयां बिच का फिरी जिंदा करी के स्वर्ग री जगह बिच अपने सीद्धे पाससे, 16 हर तरह री प्रधानता, सब हक, सक्तियां, ते प्रभुत्ता रे, अत्ते हर इक नां रे ऊपर जे ना सिर्फ इस जुग बिच, अपण आणे वाळे हर जुग बिच लित्तेया जाणा, बिठाया। 17 परमेश्वर ने सब किच्छ मसीह रे पैरा हेठ करी दित्तेया अत्ते उस जो हर चीजां पर शिरोमणि बणाया ते कलीसिया जो देई दित्तेया, 18 कलीसिया मसीह रा सरीर है, अत्ते उसेरी ई परिपूर्णता है, जे सब किच्छ पूरा करदा है। 19 इक बेला थिय्या जां तुसा गुनाह बिच पाप री वजह कने मरे रे थिय्ये, उस ने तुसां जो बी जिंदा कित्तेया, 20 जिन्हा बिच तुसी पैले, दुनियां रे बुरे रस्ते पर चलदे अत्ते उस आत्मा रे साहब कने चलदे थिय्ये जे इस धरती रे ऊपर री आत्मिक सक्तियां रा मालक है। सेई मालक अवे उन्हा महुआं बिच कम्म

करेया करदी है जे परमेश्वर रा हुकमां जो नी मनदे। 21 इक बेले असी बी उन्हेरे बिच जिंदा थिय्ये, ते सरीरिक अत्ते मन री जरूरतां जो पूरा करदे थिय्ये अत्ते दुनियां रे होर लोकां साहई परमेश्वर रे कोप रे साझी थिय्ये। 22 अपण परमेश्वर ने जे दया रे धनी हिन। अपने उस महान प्यार री वजह कने जे उन्हा ने असा कने कित्तेया, 23 जां असी गुनाह री वजह कने मरे रे थिय्ये, मसीह कने असा जो बी जिंदगी दित्ती(परमेश्वर री दया कने ई तुम्हारा उद्धार होया है।)

## मौत का जिन्दगी रे पाससे

2 अत्ते किजोकि असी यीशु मसीह बिच हिन इधेरे ताई परमेश्वर ने असा जो मसीह कने ई फिरी जिंदा कित्तेया अत्ते कने ई स्वर्ग रे सिंहासन बठाया। 2 ताकि आणे वाळे हर जुग बिच से अपनी उस दया कने जे मसीह यीशु बिच असा पर है अपने बड़े जादा धन जो दिखानां। 3 परमेश्वर री दया कने अत्ते विस्वास री वजह कने तुम्हारा उद्धार होया है। एह तुम्हारी तरफ का नी मिलेया, बल्कि एह ता परमेश्वर रा वरदान है। 4 एह म्हारे कम्मां रा नतिजा नी है कि म्हारे जो इस पर फकर हो। 5 किजोकि परमेश्वर ने म्हारी कारीगिरी किती है। उस ने यीशु मसीह बिच म्हारे जो इधेरे ताई बणाया कि असी नेक कम्म करन जिन्हा जो परमेश्वर ने पैले ई त्यार इधेरे ताई कित्तेया कि असी उन्हा जो करन। 6 इधेरे ताई याद रखवो, जे अपने सरीर बिच लोकां रे हत्थां का कित्ते गे खतने री वजह कने अपू जो "खतनेवाळे" बोलदे हिन, होरसी जाति रे रूप बिच जम्मे तुसी लोकां जो "बगेर खतना वाळे" बोलदे थिय्ये। 7 उस बेले तुसी बगेर मसीह रे थिय्ये, तुसी इस्त्राएल री बरादरी का बाहर थिय्ये। परमेश्वर ने अपने भक्तां जो जे वचन दित्ते थिय्ये उन्हा पर निर्भर वाचा का पखले थिय्ये। 8 अपने अवे तुसां जो, जे कदी परमेश्वर का बड़े दुर थिय्ये मसीह रे बलिदान री वजह कने यीशु मसीह बिच परमेश्वर का लियाया गया है। 9 यहूदी अत्ते गैर यहूदी इक-दूय्ये कने नफरत करदे थिय्ये अत्ते बखरे होई गे थिय्ये। ठीक इय्यां जिय्यां तिन्हेरे बिच कान्द खड़ी हो। अपने मसीह ने खुद अपने सरीर रा बलिदान देई करी नफरत री उस कान्द जो ढाहई दित्तेया। 10 उसने इदेयां तां कित्तेया जां अपने पूरे नियमां अत्ते विधिया जो खत्म कित्तेया। उसने एह इधेरे ताई कित्तेया कि से अपने बिच इन्हा दोनां जो ई इक बिच मिलाई सकन। अत्ते इस तरिके मेल कराई दें। सूळी पर अपनी मौत रे जरिये उस ने उस नफरत रा खात्मा करी दित्तेया। अत्ते उन्हा जो परमेश्वर कने उस इक सरीर बिच मिलाई दित्तेया।

## मसीह बिच इक होणा

11 अत्ते सूळी पर अपनी मौत रे जरिये नफरत रा खात्मा करी के दोनां जो इक जिस्म बणाई करी परमेश्वर कने फिरी मिलाई दें। 12 उसने आई करी जे परमेश्वर का दूर थिय्ये अत्ते जे तिस का थिय्ये, उन्हा जो सांति रा शुभ-बसेख सुणाया। 13 किजोकि उसेरे ई जरिये इक ई आत्मा का परम पिता ताई असा दोनां री पौहच होई। 14 इधेरे ताई तुसी अबे पखले नी रेह अत्ते ना ई पराये। अपने अवे तुसी पवित्र महुआं रे साझी विदेशी ते परमेश्वर रे टब्बर रे होई गेरे हिन। 15 तुसी इक इदेया भवन हिन जे बसेख दैणे वाळे दूत अत्ते भविश्यवाणी करणे वाळेया री निय्यां पर खडितेरा है। अत्ते खुद यीशु मसीह तिसेरा जरूरी कुणे रा पत्थर है। 16 जिस बिच सारी कारीगिरी इकठ्ठे मिली करी प्रभु बिच इक पवित्र मन्दिर बणान्दी जांदी। 17 जिस बिच तुसी बी आत्मा रे जरिये परमेश्वर रे रेके ताई इकठ्ठे बणाये जाया करदे हिन। 18 इधेरे

ताई में पौलुस जेहड़ा तुसां होरसी जाती ताई मसीह यीशु जी रा कैदी है - 19 अगर तुसा परमेश्वर रे तिस अनुग्रह रे प्रबन्ध री खुसखबरी सुणेरी हो, जेहड़ी तुसां ताई मिन्जो दित्तेया गया, 20 मतलब ऐ कि से भेद मेरे पर प्रकासन रे जरिए प्रकट होया, जिहाँ मैं पैले ई छोटा करी लिख्खी बैठेरा है, 21 जिस जो पढ़ी करी तुसी जाणी सकदे कि मैं मसीह जी रा से भेद कितणा करी समझदा। 22 जेहड़ा होरसी बेलेयाँ अन्दर मल्लुआं री ओलाह्यां जो इहाँ नी दस्सेया गया थिया, जदेह्या कि आत्मा रे जरिए अवे तिन्हेरे पवित्र प्रेरिताँ अते भविस्वाणी करणे वाळेर्याँ पर जाहिर कित्तेया गेरा है।

### गैर यहुदियां बिच पौलुस री सेवा

3 मतलब ऐ है कि मसीह यीशु जी अन्दर खुसखबरी रे जरिए होरसी जात वाळे मल्लु मीरास अन्दर साझी, ते इक्क ई सरीर रे ते प्रतिज्ञा रे हेस्से-दार हिन्। 2 मैं परमेश्वर रे अनुग्रह रे तिस दान रे साबबे, जेहड़ा तिसेरी सामर्थ रे असर रे साबबे मिन्जो दित्तेया गेरा है, तिस खुसखबरी रा सेवादार बणेया। 3 मेरे पर जेहड़ा कि सबनी पवित्र मल्लुआं अन्दर हल्के का बी हल्का है, एह अनुग्रह होया कि मैं होरसी जातियाँ जो मसीह जी रे अगम्य धन री खुसखबरी सुणां, 4 ते सबनां पर ऐ गल्ल जाहिर करां कि तिस भेद रा प्रबन्ध के है, जे सबनां जो बनाणे वाळे परमेश्वर अन्दर सुरू का ई लुके रा थिया। 5 ताकि अवे कलीसिया रे जरिए, परमेश्वर रा नेक-बनेका ज्ञान तिन्हा प्रधानां अते अधिकारियाँ पर जेहड़े स्वर्गीय जघा अन्दर हिन्, प्रकट कित्तेया जाओ। 6 तिस सनातन मरजी रे साबबे जेहड़ी तिन्हा असां रे प्रभू मसीह यीशु जी अन्दर किन्ती थी। 7 जिस अन्दर असा जो तिन्हा पर भरोस्सा करणे कने हिम्मत ते भरोस्से कने परमेश्वर रे नेड़े आणे रा हक्क है। 8 इधेरे ताई मैं छन्दे करदा कि जेहड़ी कदवा तुसां ताई मिन्जो होया करदे हिन्, तिन्हेरी वजह कने हिम्मत मत छड्डो, किजो कि तिन्हा अन्दर तुसां री महिमा है। 9 मैं इधेरे ई ताई तिस पिता रे सामणे घुटेने टेकदा, 10 जिस कने स्वर्ग ते धरती पर, हर इक घरात्रे ना नां रख्खेया जान्दा, 11 कि से अपणी महिमा रे धन रे साबबे तुसां जो एह दान देयो कि तुसी तिसेरी आत्मा कने अपणे अन्दरले मनुष्यत्व अनदर समर्थ पाई करी ताकतवर हुन्दे जाओ; 12 ते भरोस्से कने मसीह तुसां रे मनां अन्दर बसन कि तुसी प्यार अन्दर जड़ पकड़ी करी ते नेव पाई करी, 13 सबनी पवित्र मल्लुआं रे समेत खरा करी समझणे री ताकत हासिल करन कि तिसेरी चौड़ाई, ते लम्बाई, ते उंचाई, ते डुगाई कितणी है,

### मसीह रा प्यार

14 ते मसीह जी रे तिस प्यार जो जाणी सको जेहड़ा ज्ञान का परे है कि तुसी परमेश्वर री सारी भरपूरी ताई परिपूर्ण होई जाओ। 15 अवे जे इदेह्या समर्थ है कि असा री विनती ते समझ का बी कितणा ई जादा कम्म करी सकदा, तिस समर्थ रे साबबे जेहड़ी असां अन्दर कम्म करदी, 16 कलीसिया अन्दर ते मसीह यीशु जी अन्दर तिसेरी महिमा पीढ़ी का पीढ़ी तिक्कर जुगां-जुगां भर हुन्दी रेह्यो। आमीन। 17 इधेरे ताई मैं जेहड़ा प्रभू अन्दर कैदी है तुसां का छन्दे करदा कि जिस बुलाहट कने तुसी सद्दे गेरे थिये, तिस जोमी चाल चलो, 18 मतलब कि, सारी दीनता ते निम्मते होई के, ते सबर करी के प्यार कने इक-दुजे री सैहई लेयो; 19 ते मेल रे बन्धन अन्दर आत्मा री एकता रखणे री कोसिस करो। 20 इक्क ई सरीर है, ते इक्क ई आत्मा है; जिहाँ तुसा जो जेहड़े सद्देया गेरे थिये, अपणे सद्दे जाणे कने इक्क ई उम्मिद है। 21 इक्क ई प्रभू जी हिन्, इक्क ई भरोस्सा है, इक्क ई बपतिस्मा है,

### मसीह रे सरी बिच इक्क बनणा

4 ते सबनां रे इक्क ई परमेश्वर ते पिता हिन्, जेहड़े सबनां रे उप्पर ते सबनां रे मन्झाट्टे ते सबनां रे अन्दर हिन्। 2 अपण असां बिच का हर इक जो मसीह जी रे दान रे नाप रे साबबे अनुग्रह मिलेरा है। 3 इधेरे ताई से बोलदा : "से उच्ची जगह पर चढ़ेया ते कैदियाँ जो बहन्नी लिन्तेया गया, ते मल्लुआं जो दान दित्ते गे।" 4 तिसेरे चढ़णे कने, होर कै मिलदा, सिरफ ऐ ई कि से धरती री हेठली जगह पर उतरदा बी थिया। 5 ते जेहड़ा उतरी गया एह सेई है जेहड़ा सारे अम्बरा का उप्पर चढ़ी बी गया कि सब किछ परिपूर्ण

करो। 6 तिन्हा थोड़े जहेयाँ जो प्रेरित ठेह्राई करी, ते थोड़े जहेयाँ जो भविस्ववाणी करणे वाळे ठेह्राई करी, ते थोड़े जहेयाँ जो खुसखबरी सुणाणे वाळे ठेह्राई करी, ते थोड़ेयाँ जो दिख-रिख करणे वाळे ते उपदेस दैणे वाळे ठेह्राई करी देई दित्तेया, 7 जिस कने पवित्र मल्लु सिद्ध होई जान ते सेवा रा कम्म कित्तेया जाओ ते मसीह जी रे सरीर री उन्नती होई सको, 8 जाँ ताई कि असी सारे रे सारे भरोस्से ते परमेश्वर रे पुत्र री पैहचाण अन्दर इक नी होई जान, ते इक सिद्ध मल्लु नी बणी जान ते मसीह जी री पूरी डील-डौल ताई नी बधि जान। 9 ताकि असी अगे का बच्चे नी रहै जेहड़े मल्लुआं री टग-विद्धा ते चलाक्की कने, तिन्हेरे वैह्य री कोसिसां रे ते उपदेस रे हर इक झोंके कने उटकाए ते वरे-परे घुमाए जान। 10 अपण प्यार अन्दर सच्चाई कने चली करी सबनी गल्लां अन्दर तिस अन्दर जेहड़ा सर है, मतलब कि मसीह जी अन्दर बधदे जान, 11 जिस कने सारा सरीर, हर इक जोड़ री मदद कने किट्टे मिलि करी ते किट्टे गठि करी, तिस असर रे साबबे जेहड़ा हर इक अंग रे ठीक-ठीक कम्म करणे रे जरिए तिस अन्दर हुन्दा, अपु जो बधान्दी कि से प्यार अन्दर उन्नती करदी जाओ। 12 इधेरे ताई मैं ऐ बोलदा ते प्रभू अन्दर आग्रह करदा कि जिहाँ होरसी जाती रे मल्लु अपणे मने री अनर्थ रीत पर चलदे, तुसी अज्र का बाद फिरी इहाँ मत चलो। 13 किजो कि तुन्हेरी बुधि अगे न्हारा होई गेरा है, ते तिस अज्ञानता री वजह कने जेहड़ी तिन्हा अन्दर है ते सख्त मनां रे होणे री वजह कने से परमेश्वर री जिन्दगी का बखरे कित्तेया गेरे हिन्; 14 ते से सुन्न होई करी लुचे कम्मा अन्दर लगी रे रे हिन् कि हर किस्मे रे गन्दे कम्म लालच कने करन। 15 अपण तुसां ने मसीह जी री इदेहई सिक्सा नी है लिन्तेरी। 16 अपण तुसां ने सच्ची तिन्हेरी ई सुणी ते, जदेह्या यीशु जी रे बारे अन्दर सच्ची गल्ल है, तिस अन्दर ई सखाए बी गे

### मसीह बिच नौया जीवन

17 कि तुसी पिछले चाल-चलन रे पुराणे मनुष्यत्व जो जेहड़ा भटकाणे वाळी मरजियाँ रे साबबे भ्रष्ट हुन्दा जान्दा, उतारी रख्खो 18 ते अपणे मन रे आत्मिक स्वभाव अन्दर नोए बणदे जाओ, 19 ते नोए मणुआई जो पाई लेयो जेहड़ा परमेश्वर रे अनुरूप सच्च री धार्मिकता ते पवित्रता अन्दर बणाया गेरा है। 20 इधेरे ताई झूठ बोलणा छड्डी करी सब जहे अपणे पड़ोसी कने सच्च बोलेया करो, किजो कि असी अपु-मिते इक-दुजे रे अंग हिन्। 21 लैह ता करो, अपण पाप मत करो; सूरज डुबणे ताई तुसा रा गुस्सा बी खतम होई गेरी होणा चाहिन्दी, 22 ते नां ई सैह्तान जो मोक्का देयो। 23 चोरी करणे वाळा फिरी चोरी नां करो, अपण नेक कम्म करणे अन्दर अपणे हथ्यां कने मैह्लत करेया करो, इधेरे ताई कि जिस जो जरूरत हो तिस जो दैणे ताई तिसका किछ होए। 24 कोई गन्दी गल्ल तुसा रे मुहआं का नां निकळो, अपण जरूरत रे साबबे सेहई निकळो जेहड़ी उन्नती ताई सबका बधिकरी हो, ताकि तिस कने सुनणे वाळेर्याँ पर अनुग्रह होए। 25 परमेश्वर रे पवित्र आत्मा जो दुख मत दियो, जिस कने तुसा पर छुटकारे वाळे दिन ताई छाप दित्तेया गेरी है। 26 सबनी किस्मे री कडवाहट, ते प्रकोप ते लैह, ते कदवा, ते निन्दा, सारे बैर-भाव समेत तुसा का दूर कित्ते जान। 27 इक-दुजे पर रहै दिल अते करुणामय होओ, ते जिहाँ परमेश्वर ने मसीह जी अन्दर तुसा रे गुनाह माफ कित्ते, तिहाँ ई तुसी बी इक-दुजे रे गुनाह माफ करो। 28 इस ताई खरे बच्चेयां सांई परमेश्वर रे पिच्चे-पिच्चे चलो, 29 ते प्यार बिच चलो जिय्यां मसीह ने बी तुसां कने प्यार कित्ता, ते असां ताई अप्पु जो सुखदाई खुसबू ताई परमेश्वर रे सामणे चढ़ाई दिता। 30 जिय्यां पवित्र लोक्यां ताई सही है, तिय्यां तुसां बिच व्यभिचार ते कुसकी तरिके रे बुरे कम्म या लालच री गल्ल-बात बी ना हो; 31 ते ना बेसर्मी, ना बेफकुफी री गल्लां, ना मजाक री; किजोकी ए गल्लां खरी नी लगदी, बल्कि धनवाद ई सुणेया जाए। 32 किजोकी तुसी ए जाणदे की कुसकी व्यभीचारी या खराब म्हणु या लालची म्हणु जे मुर्तीपूजा रे बराबर है मसीह ते परमेश्वर रे राज बिच मिरास नी।

### रौसनी री सतां बणो

5 कोई तुसां जो बेकार री गल्लां बिच धोखा ना देय, किजोकी इन्हा ई गल्लां री वजह कने परमेश्वर रा गुस्सा आज्ञा ना मनणे वाळेर्यां पर

भड़कदा। 2 इस ताई तुसी तिन्हरे सहभागी मत बणो। 3 किजोकी तुसी पैले न्याहरे थिये अपण अवे परमेश्वर बिच रौसनी हिन, अते रौसनी री औलाद साई चलो 4 (किजोकी रौसनी रा फल सारी तरिके री भलाई, ते धार्मिकता, ते सच है)। 5 ते ए परखो की परमेश्वर जो क्या पसंद आदां। 6 न्याहरे रे हारे रे कम्मां बिच सहभागी मत बणो, बल्की तिन्हा पर तान्ना मारों। 7 किजोकी तिन्हा रे लुके रे कम्मां री गल्लां बी सर्म री गल्ल है। 8 अपण जिन्नि गल्लां पर तान्ना मारेयां जादां से सारे रौसनी पर प्रगट हुदें, किजोकी जे सारा किछ प्रगट करदा से रौसनी है। 9 इस वजह कने से बोलदा "हे सोणे वाळे, जाग ते मुर्दयां बिच का जी उठ तां मसीह री रौसनी तुसां पर चमकणी। 10 इस ताई ध्यान कने दिख्खो की कदेइ चाल चलदे: बेफकुफां साई नी अपण समजदारां साई चलो। 11 मोक्के जो बहुमुल्य समजो, किजोकी दिन बुरे हिन। 12 इस ताई बेफकुफ मत बणो, अपण ध्यान कने समजो की परमेश्वर री क्या मर्जी है। 13 दाखरस कने मतवाले मत बणो अपण आत्मा कने भरदे जाओ, 14 ते आपस बिच भजन ते स्तुतीगान ते आत्मिक गीत गाया करो, ते अपणे-अपणे मनां बिच परमेश्वर रे सामणे गादें ते किर्तन करदे रेयो। 15 ते हमेसा सारी गल्लां ताई असां रे प्रभू यीशु मसीह रे नां कने परमेश्वर पिता रा धनवाद रेयो। 16 मसीह रे डर कने इक्क-दुए रे नेडे रेयो, 17 हे लाड़ियों अपणे-अपणे लाड़ेयां रे इदेय थल्ले रेयो जिय्यां प्रभू रेयो। 18 किजोकी लाड़ा लाड़ी रा सिर है जिय्यां मसीह कलिसीया रा सिर है ते अप्पु ई सरीर रा छुटकारा करदा। 19 अपण जिय्यां कलिसीया मसिह रे थल्ले तिय्यां ई लाड़ीया बी हर गल्ल बिच अपणे अपणे लाड़ेयां रे थल्ले रैह्ल। 20 ओ लाड़ेयां, अपणी-अपणी लाड़ियां कने प्यार रखो जिय्यां मसीह ने बी कलिसीया कने प्यार करी के अप्पु जो तिस ताई देई दिता। 21 की तिसजो वचन रे जरिए जल रे सनान कने साफ करी के पवित्र बणाए,

### पती ते पत्नि

22 ते तिसजो इक्क इदेइ तेजस्वी कलिसीया बणाई करी अपणे नेडे खड़ा करे जिस बिच ना कलंक ना झुड़ि ना कोई इदेइ गल्ल हो बल्कि पवित्र ते बेकसुर हो। 23 इसी तरिके कने खरा है की लाड़ा अपणी लाड़ी कने अपणे सरीर साई प्यार करे। जे अपणी लाड़ी कने प्यार रखदा, से अप्पु कने प्यार करदा, 24 किजोकी कुसकी ने कदी अपणे सरीर कने नफरत नी किति बल्की तिसेरा पालन-पौषण करदा, जिय्यां मसीह बी कलिसीय कने करदा। 25 इस ताई की असी तिन्हरे सरीर रे अंग हिन। 26 "इस ताई म्हणु अपणे माँ-प्यो जो छड्डी करी अपणी लाड़ी कने मिळा रैहन्गा, ते से दोन्नो इक्क तन हुगें। 27 ए राज ता बड्डा है, अपण मै इत्ते मसीह ते कलिसीया रे बारे बिच बोलदा। 28 अपण तुसी बिच का हर इक्क अपणी लाड़ी कने अपणे साई प्यार रख्खे, ते लाड़ी बी अपणे लाड़ा रा डर मन्ने। 29 ओ बच्चेयां, परमेश्वर बिच अपणे माँ-प्यो रे आज्ञाकारी बणों, किजोकी ए खरा है; 30 अपणे माँ ते प्यो रा आदर कर(ए पैल्ला हुक्म है जिस कने वादा बी है) 31 की तेरा भला हो, ते तू धरती पर मते दिनां ताई जिन्दा रेयो।; 32 ओ बच्चे वाळेयां, अपणे बच्चेयां जो रीस ना दुआओ, अपण परमेश्वर री शिक्षा ते चितौणी दिदें होए तिन्हेरा पालन-पौषण करों। 33 हे नौकरों, जे लोक इस दुनिया बिच तुसां रे मालक हिन, अपणे मन रे सिद्धेपन कने उरदे ते कबंदे होए जिय्यां मसीह री तिय्यां ई तिन्हेरा हुक्म मन्नों।

### माँ-प्यो ते बच्चे

6 म्हणुआं जो खुस करणे वाळेयां साई दसणे ताई सेवा मत करो, अपण मसीह रे दास रे साई मन कने परमेश्वर री मर्जी पर चलो, 2 ते तिस सेवा जो म्हणुआं री नी अपण परमेश्वर री जाणी करी सच्चे दिल कने करो। 3 किजोकी तुसी जाणदे की जे कोई जदेया कम्म करणा चाए नौकर हो या अजाद, प्रभू का तिय्यां ई पाणा। 4 हे मालकों, तुसी बी धमकियां देणा छड्डी करी तिन्हरे कने तैसा ई बतावि करो; किजोकी तुसी जाणदे की तिन्हेरा ते तुसां रा स्वामी सर्वग बिच है, ते से कुसकी रा पक्ष नी करदा।

### मालक ते नौकर

5 इस ताई प्रभू बिच ते तिन्हेरी सक्ति रे असर बिच ताकतवर बणो। 6 परमेश्वर रे सारे हथियार बन्नि लेयो की तुसी सैतान री चालां सामणे खड़ी सको। 7 किजोकी असां ई ए लड़ाई खून ते मासं कने नी है अपण प्रधानां कने, ते अधिकारियां कने ते इस ससांर रे न्याहरे रे हाकमां कने ते तिस दुष्टता री आत्मिक सेना कने है जे आसमान बिच है। 8 इस ताई परमेश्वर रे सारे हथियार बन्नि लेयो की तुसी बुरे दिनां बिच सामणा करी सको, ते सारा किछ पुरा करी के टिके रेइ सको। 9 इस ताई सच कने अपणी कमर बन्नि करी, ते धार्मिकता री झिलम पाई करी,

### आत्मिक लड़ाई रे हत्यार

10 ते पैरां बिच मेल रे शुभ-भसेख रे तैयारी रे जुत्ते पाई करी, 11 ते इन्हा सारेयां कने भरोसे री ढाल लेइ करी टिकी रेयो जिस कने तुसी तिस दुष्ट रे सारे बखदे होए तीरां जो बुझाई सको। 12 ते छुटकारे रा टोप, ते आत्मा री तलवार जे परमेश्वर रा वचन है, लेइ लो। 13 हर वेले ते हर तरिके कने आत्मा बिच प्रार्थना, ते विनती करदे रेयो ते इस ताई जागदे रेयो की सारे पवित्र लोक्का ताई लगातार ताई विनती करेया करो। 14 ते मेरे ताई बी की मेरे जो बोलने से वेले इदेया प्रबल वचन दिता जाए की मै हिम्मत कने शुभ-भसेख रा राज दस्सी सकां, 15 जिस ताई मै जंजीर कने जकड़े रा राजदूत है ते ए बी की मै तिसेरे बारे बिच जदेया मेरे जो चाएदा हिम्मत कने बोल्लां। 16 तुखिकुस, जे प्यारा भाई ते प्रभू बिच भरोसे जोग्गा सेवक है, तुसां जो सारी गल्लां दसगा की तुसी बी मेरी हालत जाणों की मै किय्यां रैह्दा, 17 तिसजो मै तुसां का इस ताई भेजे रा है की तुसी असां री हालत जो जाणो ते से तुसां रे मनां जो सातिं देयो। 18 परमेश्वर पिता ते प्रभु मसीह जी रे पाससे का भाईयां जो सातीं ते भरोसे कने प्यार मिले। 19 जे असां रे प्रभु यीशु मसीह कने सच्चा प्यार करदे, तिन्हा सारेयां पर दया हुंदी रेयो। 20 मसीह यीशु जी रे दास पौलुस ते तीमुथियुस रे पाससे का, सबनी पवित्र मल्लुआं रे नां जेह्दे मसीह यीशु जी अन्दर होई करी फिलिप्पी अन्दर रैह्न्दे, अध्यक्षां ते सेवक समेत।

### आखरी अभिवादन

21 म्हारे पिता परमेश्वर ते प्रभू यीशु मसीह जी रे पाससे का तुसां जो अनुग्रह ते सान्ति मिलदी रेह्यो। 22 मैं जिस-जिस बेले बी तुसां जो याद करदा, तां-तां अपणे परमेश्वर रा सुकर करदा; 23 ते जाँ बी कदी तुसां सबनां ताई प्राथना करदा, ता हमेसा खुसी कने प्राथना करदा। 24 इधरे ताई कि तुसी पैहल्ले दिन का लेई करी अज्र ताई खुसखबरी जो फलाणे अन्दर मेरे कने रहे।

## फिलीप्पियों

1 मिन्जो इस गल्ल रा भरोस्सा है कि जिनी है तुसां अन्दर भला कम्म सुरु कित्तेरा है, तिनी है ई तिस जो यीशु मसीह जी रे दिन ताई पूरा करणा । 2 ठीक होणा कि मैं तुसा सबनी ताई इदेहई सोच रखखां, किजो कि तुसी मेरे मनां अन्दर आई बसेरे हिन्, ते मेरी कैद अन्दर ते खुसखबरी ताई जवाब ते सबूत दैणे अन्दर तुसी सारे मेरे कने अनुग्रह अन्दर हिस्सेदार हिन्

### पौलुस री प्रार्थना ते धनवाद

3 इस अन्दर परमेश्वर मेरे गवाह हिन् कि मैं मसीह यीशु जी साहई दाह करी के तुसां सबनी जल्लेयाँ री चाह करदा रेह्याँ । 4 मैं ऐ प्रार्थना करदा कि तुसां रा प्यार ज्ञान ते हर तरिके रे सबर समेत होर बी बधदा जाओ, 5 इत्ते ताई कि तुसी खरी रा खरी गल्लां जो खरी जाणी करी, ते मसीह जी आणे रे दिन ताई सच्चे बणी रेह्यो, ते ठोकर मत खान्दे; 6 ते तिस धार्मिकता रे फळा कने जेहडे यीशु मसीह जी रे जरिए हुन्दे, भरपूर हुन्दे जाओ जिस कने परमेश्वर री महिमा अते स्तुति हुन्दी रेह्यो । 7 ओ मेरे भाईयो मैं चाहन्दा कि तुसां जो ऐ पता लगी जाओ कि मेरे कने जेहडा होएरा है, तिस कने खुसखबरी री ई बढोतरी होएरी है । 8 इत्ते तक कि राजे रे राजभवन री सारी पलटन ते बाकी सबनी मल्लुआं अन्दर पता लगी गेया कि मैं मसीह जी ताई कैद है; 9 ते प्रभू अन्दर जेहडे भ्याळ हिन्, तिन्हा बिच रा जादातर मेरे कैद होणे री वजह कने, हिम्मत बहन्ती करी परमेश्वर रा वचन बेधडक सुनाणे री होर बी हिम्मत करदे । 10 किछ ता डाह ते लडाई री वजह कने मसीह जी रा प्रचार करदे ते किछ खरे मना कने । 11 केई जल्ले ता ऐ जाणी करी कि मैं खुसखबरी ताई जवाब दैणे ताई ठैहाया गेरा है, प्यार कने परचार करदे ।

### पौलुस री कैद कने सुसमाचार रा बधना

12 ते केई जल्ले ता सीधाई कने नी अपण खलाफ होई करी मसीह जी री कथा सुणान्दे, ऐ सोची करी कि मेरी कैद अन्दर मेरे ताई कहळा पैदा करन । 13 ता कै होया ? सिरफ ऐ ई कि हर तरह कने, चाहए भात्रे कने चाहए सच्चाई कने, मसीह जी री कथा सुणाई जान्दी, ते मैं इधेरे ताई खुस है अते खुस रेह्ला बी है । 14 किजो कि मिन्जो पता है कि तुसां री प्रार्थना रे जरिए, ते यीशु मसीह जी री आत्मा रे दान रे जरिए, इसेरा बदला मेरा उद्धार होणा । 15 मैं ता ऐ ई दिल का लालसा ते आस रखदा कि मैं कुस्की गल्ल अन्दर सरमिन्दा नां होआं, अपण जिह्याँ मेरी प्रबल हिम्मत री वजह कने मसीह जी री बडाई मेरे जिस्म रे जरिए हमेसा हुन्दी आएरी है, तिह्याँ ई अवे बी हो, चाहए मैं जीन्दा रेह्याँ या मरी जां । 16 किजो कि मेरे ताई जीन्दे रेह्ला मसीह है, ते मरी जाणा फाएदा है । 17 पर अगर सरीर अन्दर जीन्दे रेह्ला ई मेरे कम्म ताई फाएदेमन्द है ता मैं नी जाणदा कि कुस जो चुणां । 18 किजो कि मैं दोन्नां रे मन्झाट्टे अधर अन्दर लटके रा है; मरजी ता बोलदी कि कूच करी के मसीह जी रा जाई रेह्याँ, किजो कि ऐ बडा ई खरा है,

### जिनदा रेहणा मसीह है

19 अपण सरीर अन्दर रेह्ला तुसा री वजह कने होर बी जरूरी है । 20 इधेरे ताई कि मिन्जो इसेरा भरोस्सा है ताई ता मिन्जो पता है कि मैं जीन्दे रेह्ला है, अपण तुसा सबनी जल्लेयाँ रे कन्ने रेह्ला जिस कने तुसी भरोस्से अन्दर पक्के हुन्दे जाओ ते तिस अन्दर खुस्स रेह्यो । 21 ते जेहडा घमण्ड तुसी मेरे बारे अन्दर करदे, से मेरे फिरी तुसां का ईणे री वजह कने मसीह यीशु जी अन्दर जादा बधि जाओ । 22 सिरफ इतणा करो कि तुसा रा चाल-चलन मसीह जी

री खुसखबरी रे जोगा होए कि चाहए मैं तुसां जो आई करी दिखखां, चाहए नी बी ईय्याँ, तुसां रे बारे अन्दर एह ई सुणां कि तुसी इक ई आत्मा अन्दर पक्के हिन्, ते इक मन होई करी खुसखबरी रे भरोस्से ताई मैहत्त करदे रेहन्दे, 23 ते कुस्की बी गल्ल अन्दर दुस्मणां का डरदे नी । ऐ तिन्हा ताई विनाश री साफ-सुथरी निसानी है, अपण तुसां ताई उद्धार री अते एह परमेश्वर रे पास्से का है । 24 किजो कि मसीह जी री वजह कने तुसा पर ऐ अनुग्रह होया कि नां सिरफ तिन्हा पर भरोस्सा करो अपण तिन्हा ताई दुख बी सेह्यो; 25 ते तुसां जो तदेहई ई मैहत्त करणा पैणी, जदेहई तुसा ने मिन्जो करदे दिखखेरा है, ते अब्बे बी सुणदे कि मैं तिह्याँ ई करदा । 26 ते प्रभु यीशु बिच कुछ सान्ति, कने प्यार ते होसला आत्मा रा मिलण ते कुछ करुणा कने दया है । 27 ते मेरी खुशी पुरी करो इक मन रियो इको इ प्यार ते इको इ चित इको इ मनसा रखो । 28 विरोध या झुटी बडाई तिकर किछ मत करो पर दीनता कने इक दुजे जो अपणे का खरा समझो । 29 हर बन्दे जो अपणे वारे अन्दर इ नी पर दुसरे रे वारे अन्दर बी सोचणा चाएदा । 30 जिदेया प्रभु यीशु जी रा स्वभाव थिया तदेह्या तुसां रा बी स्वभाव हो ।

### मसीह री निमतापन ते महानता

2 ते प्रभु यीशु बिच कुछ सान्ति, कने प्यार ते होसला आत्मा रा मिलण ते कुछ करुणा कने दया है । 2 ते मेरी खुशी पुरी करो इक मन रियो इको इ प्यार ते इको इ चित इको इ मनसा रखो । 3 विरोध या झुटी बडाई तिकर किछ मत करो पर दीनता कने इक दुजे जो अपणे का खरा समझो । 4 हर बन्दे जो अपणे वारे अन्दर इ नी पर दुसरे रे वारे अन्दर बी सोचणा चाएदा । 5 जदेया प्रभु यीशु मसीह रा स्वभाव थिया तदेया तुसां रा बी हो । 6 जिसने परमेश्वर दा रुप होई के बी तिन्हा ने परमेश्वर दे समान अपणे आप जो नी समझेया ते कने तिस जो अपणे का रखणे री चीज नी समझी । 7 पर अपणे आप जो शून्य करी लितेया कने तिन्हा ने दास रा रुप धारण करी लिया ते आम मणु सिई बणी गे । 8 ते मणु रे रुप बिच प्रकट होई के अपणे आप जो दीन कित्तेया इतणे तिवकर कि से इतणी गल मनणे वाळे रे तिन्हा ने क्रूस री मोत जो बी सांई लई । 9 इसेरे कारण परमेश्वर ने तिन्हा जो सबनी का बड्डा समझेया कने तिन्हा जो से ना दितेया जेडा सबनी ना का अच्छा है, ते जेडे स्वर्ग अन्दर हिन्, धरती पर ते का हेठे से सारे जणे प्रभु यीशु जी रे अगे झुकण । 10 ते जेडे स्वर्ग अन्दर हिन्, धरती पर ते का हेठे से सारे जणी प्रभु यीशु जी रे अगे झुकन । 11 ते पिता परमेश्वर री महिमा तिकर सारे जणे ये मनी लैण कि प्रभु यीशु जी ही प्रभु हिन् । संसार बीच लोई सई चमको

### दुनिया बिच रौसनी सांई चमको

12 इधेरे ताई मेरे प्यारेओ जियां तुसां पैल्ले का इ गल्ल मन्दे आए तिये इ अवे बी ना कि मेरे कने रेणे कने इ नि पर मेरे का दूर रहणे पर बी डरदे ते कमदे होए अपणे दया रा कम पुरा करदे जाओ । 13 किजो कि परमेश्वर ने इ अपणी मर्जी कने तुसां रे मन बिच ऐ गल पाई कि तुसां री इच्छा ते कम करणे रा प्रभाव पाया । 14 सारे कम बगैर कुडकुडाए बिना कुसी विवाद रे करो । 15 ताकी तुसां निर्दोष भोळे होई के, टेडे ते नी मनणे वाळे लोकाँ बिच परमेश्वर रे निष्कलंक बच्चे बणी रियो जिन्हेरे बीच तुसां जिन्दगी रा बचन लई के लोई सई नजरी आन्दे । 16 ते जिस वक्त प्रभु यीशु जी रोज आण ता मेरे का घमण्ड रा कारण हो की मेरा दौडणा ते मेहन्त करणा ईयाँ नी गया । 17 अगर मिन्जो तुसां रे विश्वास रुपी बलिदान तिकर अपणा खून देणा पे ता बी मैं खुशी है, ते

कने में तुसा सबनी कने खुशी मनादा । 18 ते तुसां बी खुशी रियो ते मेरे कने खुशी मनाओ । तीमुथियुस कने इपफ्रुदितुस

### तिमुथियुस ते इपफ्रुदितुस

19 मिन्जो आसा है कि मैं तिमुथियुस जो तोळे इ तुसां का भेजां ताकी तुसां रा हाल चाल जाणी के मिन्जो शान्ती मिले । 20 किजो की मेरे का ऐसे स्भाव रा कोइ नी है कि से खरे मन कने तुसां री चिन्ता करे । 21 किजो की सारे जण अपणे लालच री खोज बिच हिन ना की प्रभु यीशु री । 22 तिस जो ता तुसां सबनी जण ने जाणी लेया कि जियां पुज बाबे कने करदा तियें तिस ने सुसमाचार फैलाणे अन्दर मेरे कने मेहनत किती है । 23 इधरे ताई जियां इ मिन्जो पता लगगां कि मेरी अवे क्या हालत है उसी वक्त मैं तसियो तोळे भेजी दिगां । 24 ते मिन्जो प्रभु जी अन्दर भरोसा है कि मैं अपु बी तोळे आणा । 25 पर मैं इपफ्रुदितुस जेडा मेरा भाई ते कने कम करणे वाळ ते लडने वाळा ते तुसा जो खबर देणे वाळा , मेरी सेवा करणे वाळा से मैं तुसां का भेजणा जरूरी समझेया । 26 किजो की तिन्हेरा मन तुसां सबनी कने लगी रे रा ए इस कारण से बेचैन थिया किजो कि तुसां सबनी ने मेरी बीमारी रा हाल जाणेया था । 27 पक्का से मरने वाळा था पर तिस जो परमेश्वर ने बचाई लेया ते मिन्जो बी की 28 इधरे ताई मैं तिस जो भेजणे री तोळ किती कि तुसां खुस हो जाओ ते मेरा दुख बी घटी जाओ । 29 इधरे तिकर तुसा उसकने बडी खुशी कने मिलणा ते ऐसे मणु रा आदर करेया करणा । 30 किजो कि से यीशु जी रे कम तिकर अपणे प्राण जो खतरे बिच पाई के मरणे वाळ इ था ताकी जेडी कमी सेवा अनदर तुसा रे पासे का हुई तिस जो पुरा करी सको ।

### सच्चि धार्मिकता

3 जोश रे बारे जे बोला ता मैं कलीसिया जो तंग करणे वाळा, नियम रे कम्म रे साहब कने बेकसुर थिय्या । 2 अपण तां जे मेरा फायदा थिय्या, अज्र उस्सी जो ई मसीह बिच अपणा नुकसान समझदा । 3 इस का बड्डी गल्ल एह कि मैं अपणे प्रभु यीशु जी रे ज्ञान री महानता री वजह कने सब गल्लां जो घटिया समझदा थिय्या । उसरे ताई मैं सब किच्छ छड्डी दितेया अत्ते मैं सब जो नफरत रे लायक चीज समझणे लगेया ताकि मिंजो मसीह मिली जाओ । 4 अत्ते मसीह बिच ई मिंजो तोपेया जाये, मेरी धार्मिकता री वजह कने नी जे नियमां पर टिकी री है, बल्कि उस धार्मिकता कने जे मसीह पर विश्वास करणे री वजह कने परमेश्वर का मिलदी अत्ते जिसेरा अधार विश्वास है । 5 मैं मसीह जो जानणा चाहन्दा अत्ते उस सक्ति जो महसूस करणा चाहन्दा जिस कने उन्हेरा पुनरुत्थान होया थिया । मैं उमेरी मुसिबतां रा साझी होणा चाहन्दा । अत्ते उस्सी रूप जो पाणा चाहन्दा जिस जो उसने अपणे मरणे जरिये पाया थिय्या । 6 इस आस कने कि मैं इस तरिके कने मरे रेयां बिच का जिंदा होई जां ते पुनरुत्थान मिली जाओ । 7 एह मतलब नी है कि मिंजो मिली गया या मैं पूरा सही है । अपण मैं उस मंजिल जो पाणे ताई लगातार कोसिस करेया करदा है जिसेरे ताई यीशु मसीह ने मिंजो पकड़ेया है । 8 ओ मेरे भाइयों, मेरी एह सोचदा कि मिंजो से मिली गया है, अपण गल्ल है कि जे गल्लां पिच्छे रेहई गेई, तिन्हा जो भूली करी उस उस मंजिल री तरफ पुजणे ताई लडदा रहन्दा । 9 उस मंजिल ताई लगातार कोसिस करदा कि से ईनाम मिंजो मिलो जिस ताई परमेश्वर ने यीशु मसीह बिच ऊपर सदेया है । 10 ताकि उन्हा महुआं रा, जे असां बिच का पूरे सही महु बणी गे हिन, ऐई सोच रखन, अपण जे तुसी कुसकी गल्ल जो कुसकी हौर ई तरिके कने सोचदे हिन ता तुम्हारे ताई उस जो परमेश्वर ने साफ तरिके कने दस्सी दैणा । 11 जिस सच्च तक असी पुज्जी गेरे हिन, असां जो उस्सी पर चलदे रेह्ला चहिंदा ।

### निसाने रे पास्से दौड़णा

12 ओ मेरे भाइयों, तुसी सब मेरे जदेया चाल-चलन रखवो । जे उदारण असां ने तुम्हारे सामणे रखवेया है, तिसरे साहब कने जे जिंदे, तिन्हा पर ध्यान देयो । 13 किजो कि इदेय बी महु हिन जिन्हेरे बारे मैं तुसां जो घडी-घडी दस्सेया अत्ते अवे बी रौई-रौई करी तुम्हारे जो दस्सदा कि तिन्हेरा जीण इदेया है कि से मसीह री सूळी रे दुश्मण हिन । 14 उन्हेरा अंत बिनाश है ।

उन्हेरा पेट ई परमेश्वर है । अत्ते जिस पर उन्हा जो शर्म आणी चहिंदी, उस पर से फकर करदे । तिन्हा जो सिरफ दुनियां री चीजां री फिकर है । 15 अपण म्हारी जन्मभूमि ता स्वर्ग बिच है । तित्ते का ई असी अपणे प्रभु यीशु मसीह रे आणे री भाळ करेया करदे हिन । 16 अपणी उस सक्ति कने जिस कने सब चीजां जो से अपणे वस बिच करी सकदा, असा रे कमजोर सरीर जो बदली करी अपणे महिममय सरीर साहई बणाई दैणा । 17 इधरे ताई, ओ मेरे भाइयों, जिन्हा बिच मेरा दिल लगी रहन्दा जे मेरी खुशी ते मुकट हिन, ओ प्यारे भाइयों प्रभु बिच इसी तरिके कने टिके रेयो । 18 मैं यूओदिया जो बी समझादां ते सुन्तुखे जो बी, कि से प्रभु बिच इक्क मन रेया । 19 ओ सच्चे साथी, मैं तेरे का मिन्नत करदा कि तू तिन्हा जानानियां री मदद कर, किजो की तिन्हा ने मेरे कने शुभ-भसेख जो फलाणे बिच क्लेमंस ते मेरे हौर साथियां कने मेहनत किती जिन्हेरे नां जिन्दगी री कताब बिच लिखवे रे हिन । 20 प्रभु बिच हमेसा खुस रेयो, "मैं फिरी बोलदा खुस रेयो । 21 तुसां री कोमलता लोकां रे सामणे आये । प्रभु नेडे है ।

4 कुसकी बी गल्ल री फिकर मत करो, अपण हर इक्क गल्ल बिच तुसां री जरूरतां री गल्लां प्रार्थना ते मिन्नतां कने परमेश्वर रे सामणे ले आये जाये ।

### व्यावहारिक निर्देश

2 तां परमेश्वर री सार्ती जे सारी समझ का परे है, तुसां रे दिल ते तुसां री गल्लां जो मसीह यीशु जी बिच सभाली करी रखणा । 3 इधरे ताई ओ भाइयों, जे जे गल्लां सच हिन ते जे गल्लां इज्जत दैणे ताई हिन ते जे गल्लां ठीक हिन, ते जे गल्लां पवित्र हिन, ते जे गल्लां सोछि हिन, ते जे जे गल्लां मन जो भाणे वाळी हिन, मतलब जे बी खरी आदत ते तारीफ लायक गल्लां हिन, तिन्हेरे पर मन लाया करो । 4 जे गल्लां तुसी मेरे का सिख्खी ते मन्नी ते सुणी, ते मेरे बिच दिख्खी तिन्हेरे जो ई मन्नेया करो तां परमेश्वर जे सान्ति रा सोत्ता है, ने तुसां कने रहणा । 5 मैं प्रभु बिच बडा खुस है, कि अवे इन्ने दिनां बाद तुसां जो मेरे बारे बिच फिरी होणा लगे री है, पक्का इ तुसां जो पैले बी इसेरा ध्यान थिया अपण तुसां जो इसेरा मोक्का नी मिलेया । 6 ए नी कि मैं अपणी घाटे री वजह कने इय्यां बोलेया करदा है, किजो कि मैं सिख्खे रा है कि जिस हाल बिच मैं है तिस बिच इ खुस रेयां । 7 मैं छोटा होणा बी जाणदा ते बधणा बी जाणदा, हर इक्क गल्ल ते सारी गल्लां बिच रजणा, भुक्खा रहणा ते घटणा बधणा सिक्खे रा है । 8 जे मिन्जो ताकत दिदें तिस बिच मैं सब किछ करी सकदा । 9 तां बी तुसां ने खरा कित्तेया कि मेरे दुख बिच मेरे कने सामिल होए ।

### दान ताई धनवाद

10 ओ फिलीप्पियों तुसी अप्पु ई जाणदे कि शुभ-भसेख री सुरुआत बिच जां मैं मकिदुनिया का निकळेया तां तुसां जो छड्डी करी कुसकी हौर मडंली ने लैणे-दैणे बिच मेरी मदद नी किती । 11 इसी तरिके कने जां मैं थिस्लुनिके बिच थिया तां बी तुसां ने मेरे घाटे जो पुरा करणे ताई इक्क बारी क्या अपण दो बारी किछ भेजेया थिया । 12 ए नी कि मैं दान चाहदां अपण मैं एदेया फळ चाहदां जे तुसां रे फेदे तिकर बदधा जाए । 13 किजोकी मेरे जो से सारी चिजां मिली गी, मेरे का जरूरत री हर चीज है किजो कि इपफ्रुदितुस रे हत्था का भेजि री सारी चिजां मेरे जो मिली गे री हिन, इक्क ग्रहण करणे जोग । 14 मेरा परमेश्वर बी जे अपणे तिस धन रे हसाब कने महीमा कने मसीह यीशु जी बिच है, तुसां री हर जरूरत जो पुरा करणा । 15 असां रे परमेश्वर ते पिता री महीमा हमेसा-हमेसा तिकर हुदीं रेय, आमीन ! 16 हर इक्क पवित्र म्हुणु जे मसीह बिच है, नमस्कार करो, जे भाई मेरे कने तुसां जो नमस्कार बोलदे । 17 सारे पवित्र लोक, खास तौर पर जे कैसर रे घराने रे हिन तुसां जो नमस्कार बोलदे हिन । 18 असां रे प्रभु यीशु मसीह रा अनुग्रह तुसां री आत्मा कने हुदां रेह । 19 मेरा परमेश्वर बी जे अपणे तिस धन रे हसाब कने महीमा कने मसीह यीशु जी बिच है, तुसां री हर जरूरत जो पुरा करणा । 20 असां रे परमेश्वर ते पिता री महीमा हमेसा-हमेसा तिकर हुदीं रेय, आमीन ! 21 हर इक्क पवित्र म्हुणु जे मसीह बिच है, नमस्कार करो, जे भाई मेरे कने तुसां जो नमस्कार बोलदे । 22 सारे पवित्र

लोक, खास तौर पर जे कैसर रे घराने रे हिन तुसां जो नमस्कार बोलदे हिन।  
23 असां रे प्रभु यीशु मसीह रा अनुग्रह तुसां री आत्मा कने हुदां रेह।

# कुलुस्सियों

## अभिवादन

1 जेहड़ा तुसां का पुज्जरा है, ते जदेह्या दुनिया अन्दर बी फळ अणदा ते बधदा जान्दा, तिह्यां ई जीस रोज़ा का तुसां तिस जो सुणेया ते सच्चाई कने परमेश्वर रे अनुग्रह जो पछियाणेयाणेरा है, तुसां अन्दर बी इदेह्या ई करदा। 2 तिसेरी ई सिक्सा तुसां ने असां रे प्यारे सैहकरमी इफ़्प्रास का पाएरी है, जेहड़ा असां ताई मसीह जी रा भरोस्सेमन्द दास है।

## धनवाद री प्रार्थना

3 तिनि ए ई तुसां रे प्यार जो जेहड़ा कि आत्मा अन्दर है, असां पर जाहिर कित्तेया। 4 इधरे ताई जीस रोज़े रा एह सुणेरा है, असी बी तुसां ताई एह प्रार्थना ते विनती करणा नी छडदे कि तुसी सारे आत्मिक ज्ञान ते समझ समेत परमेश्वर री मरजी री पछियाण अन्दर परिपूर्ण होई जाओ, 5 ताकि तुसां रा चाल-चलन प्रभु जी रे लायक होए, ते से हर तरहा कने खूस होन, ते तुसां अन्दर हर किस्मे रे भले कम्मां रा फळ लग्गो, ते तुसी परमेश्वर री पछियाण अन्दर बधदे जान, 6 तिन्हेरी महिमा री ताकत रे मुताबक हर किस्मे री समर्थ कने बलवन्त हुन्दे जाओ, इत्ते ताई कि आनन्द कने हर किस्म कने धीरज अते सैह्ने री ताकत दस्सी सको, 7 ते पिता रा सुकर करदे रेह्यो, जीन्हा ने असां जो इस जोग्गा बणाया कि जोत अन्दर पवित्तर महुआं कने मीरास अन्दर सैहभागी होन। 8 तिन्हा ने ई असां जो निह्यारे रे बस का छुड़ाई करी अपणे प्यारे प्रभु जी रे राज्य अन्दर प्रवेस कराया, 9 जीस अन्दर असां जो छुटकारा मतलब कि पाप्मां री माफी मिलदी। 10 से ता नी लिब्वणे वाळे परमेश्वर रा रूप ते सारी सृष्टी अन्दर पहिलौठे हिन। 11 किजोकी तिन्हा अन्दर ई सबनी चीज्जां री सृष्टी होई, स्वर्ग री होन या ता धरती री, दिख्खेरी होन या अणदिख्खी, कै सिंहासन, कै मालकी, कै प्रधानता, कै हक्क, सारी चीज्जां तिन्हेरे ई जरिए ते तिन्हेरे ई ताई बणाइयां गेइयां। 12 सेह ई सबनी चीज्जां अन्दर पैल्ले हिन, ते सब चीज्जां तिन्हा अन्दर ई टिकी रैहिन्यो। 13 सेहई सरीर, मतलब कि कलीसिया रा सर हिन; सेहई सुरु हिन, ते मरी गेरेयां बिच का जीन्दे होई जाणे वाळ्ळ्यां बिच का पहिलौठा कि सबनी गल्लां अन्दर सेहई प्रधान ठैहन। 14 किजोकी पिता री खूसी इस अन्दर ई है कि तिस अन्दर सारी परिपूर्णता वास करो,

## मसीह री श्रेष्ठता ते तिन्हेरे कम्म

15 ते तिन्हेरे क्रूस पर बहाया गेरे खून रे जरिए मेलमलाप करी के, सबनी चीज्जां रा तिसेरे ई जरिए तिस कने मेल करी ले, चाहे से धरती वाळी होन या स्वर्गा वाळी। 16 तुसी जेहड़े पैल्ले कड्डेरे थिये ते बुरे कम्मां री वजाह कने मन का दुस्मण थिये; 17 तिनि ए अवे तिसेरी सरीरी जीस्म अन्दर मौत रे जरिए तुसां रा बी मेल करी लेया ताकि तुसां जो अपणे सामणे पवित्ते अते बगैर कुस्की कलंक रे, ते बेगुनाह बणाई करी हाजर करे। 18 अगर तुसी भरोस्से री नीय्या पर पक्के बणी रेह्यो ते तिस खूसखबरी री उम्मीद जो जीस जो तुसां ने सुणेरा है ना छडन, जीसेरा परचार अम्बरे रे हेठ री सारी सृष्टी अन्दर कित्तेया गया, ते जीसेरा में, पौलुस, दास बणेया। 19 अवे मैं तिन्हा दुखां री वजाह कने आनन्द करदा, जे तुसां ताई उठान्दा ते मसीह जी रे कलेशां री घटी तिन्हेरे सरीर ताई, मतलब कि कलीसिया ताई, अपणे सरीर अन्दर पूरी करदा; 20 जीसेरा मैं परमेश्वर रे तिस इंतजाम रे मुताबक दास बणेया जेहड़ा तुसां ताई मिन्जो सौंपेया गया, ताकि मैं परमेश्वर रे वचन जो पूरा-पूरा परचार

करां। 21 मतलब कि तिस भेद जो जेहड़ा समयां ते पीढ़ियां का गुप्त रेह्या, अपण अवे तिन्हेरे पवित्तर महुआं पर जाहिर होया। 22 जीन्हा पर परमेश्वर ने जाहिर करणा चाह्या कि तिन्हा जो पता लग्गो कि अन्यजातियां अन्दर तिस भेद री महिमा रा मुल्ल कै है, ते से एह है कि मसीह जेहड़े कि महिमा री आस हिन तुसां अन्दर रैहन्दे। 23 जीसेरा परचार करी के असी हर इक महु जो चेतावनी दिन्दे ते सारे ज्ञान कने हर महु जो सखान्दे, कि असी हर इक महु जो मसीह जी अन्दर सिद्ध करी के हाजर करन।

## कलीसिया रा सेवक - पौलुस

24 इधरे ई ताई मैं तिसेरी तिस ताकत रे मुताबक जेहड़ी मेरे अन्दर समर्थ कने असर पान्दी, तन मन लाई करी मैहत्त बी करदा। 25 मैं चाहदां की तुसी जाणी लेयो की तुसां रे ते तिन्हेरे ताई जे लोदिकीया बिच हिन, ते तिन्हा सारेयां ताई जीन्हा ने मेरा सरिरी मोह नी दिख्खेया, मैं कदेइ मैहत्त करदा, 26 ताकी तिन्हेरे मन बिच सांती हो ते से प्यार कने अप्पु बिच कड्डे रैहण, ते से पूरी समज रा सारा धन हासल करण ते परमेश्वर पिता रे राज जो मतलब मसीह जो पहचाणी जाण। 27 जीस बिच समज ते ज्ञान रे सारे भडार लूके रे हिन। 28 ए मैं इस ताई बोलदा की कोई म्हणु तुसां जो लालच वाळी गल्लां कने धोखा ना दे। 29 हालांकी मैं सरीर रे भाव कने तुसां का दूर है, तां बी आत्मिक तौर पर तुसां रे नेडे है। ते तुसां रे मजबुत जीन्दगी जो ते तुसां रे भरोसे री जे मसीह बिच है मजबूती दिख्खिकरी खूस हुदां।

2 अते जीय्यां तुसी मसीह यीशु जी जो प्रभु करी के अपणाई लिक्ते रा है, तियां ई तिन्हा बिच चलदे रेयो। 2 ते तिसी बिच चलदे ते जड पकडदे ते बधदे जाओ; ते जीय्यां तुसी सखाए गे तियां ई भरोसे बिच मजबुत हुदें जाओ ते जादा का जादा धनवाद करदे रेयो। 3 सावधान रेयो की कोई तुसां जो अपणी गल्लां ते बेल्हे धोखे रे जरिए अपणा शकार ना बणाई लेयो, जे म्हणुआं री परंपरा ते दुनिया री सुरुआती शिक्षा रे हसाब कने ता है, अपण मसीह रे हसाब कने नी। 4 किजोकी तिस बिच ईश्वरत्व री सारी परिपूर्णता हमेसा बसदी, 5 ते तुसी तिस बिच ई भरपूर होई गे रे हिन जे सारी प्रधानता ते अधिकार रा शिरोमणी है।

## मसीह बिच जिन्दगी री भरपुरी

6 तिसी बिच तुसां रा इदेया खतना होए रा है जे हथ्थ कने नी हुदां मतलब की मसीह रा खतना, जीस कने सरिरी जीस्म उतारी दित्तेया जादा, 7 ते तिसी कने बपतिस्मा बिच गाडे गे ते तिसी बिच परमेश्वर री ताकत पर भरोसा करी के, जीनि ए तिन्हा जो मुदेंयां बिच का जीन्दा कित्तेया, तिसेरे कने जीन्दे बी होई गे, 8 तिनि ए तुसां जो बी, जे अपणे अपराधां ते अपणे सरीर री बगैर खतने री हालत बिच मुदें थिये, तिसेरे कने जीन्दे, ते असां रे सारे अपराधां जो माफ कित्तेया, 9 ते विधियां रा से लेख जे असां रे नां पर ते असां रे खलाफ थिया मिटाई रख्खेया ते तिसजो क्रूस पर मेख्खवां कने जड़ी करी सामणे का हटाई दित्ते रा है। 10 ते तिनि ए प्रधानता ते अधिकारां जो उप्पर का उतारी करी तिन्हेरा खुल्लखुल्ला तमासा बणाया ते क्रूस रे जरिए तिन्हेरे पर जयजयकार री अवाज सुणाई। 11 इस ताई खाणे-पीणे या पर्व या नौए चाँद, या सब्ते रे बारे बिच तुसां रा कोई फैसला ना करे। 12 किजोकी ए सब आणे वाळी सारी गल्लां री परछाई है, अपण खास चिजां मसीह री हिन। 13 कोई म्हणु छोटपन ते स्वर्गदुतां री पूजा कराई के तुसां जो दौड़ रे परिणाम का परे ना रख्खे। इदेया म्हणु दिख्खि री गल्लां बिच लगेया रैहदा ते अपणी सरिरी समज पर बेल्हे ई

फुलदा, 14 ते तिस शिरोमणी जो पकड़े नी रहैन्दा जीस कने सारा सरीर जोड़ ते पट्टे रे जरिए पालन-पोषण हासल करी के ते कट्टे होई करी, परमेश्वर रे पास्से का बदधा जादी, 15 जां की तुसी मसीह रे कन्ने दुनिया री सुरुआती शिक्षा कने मरि गे हिन, तां फिरी किजो तिन्हरे साईं जे दुइया रे हिन जीन्दगी बितांदे? तुसी इदेइ विधियां रे बस बिच किजो रहन्दे 16 कि ए मत छुदें, 'तिसजो मत चखदे', ते 'तिसजो हथ्य मत लादें'? 17 (ए सारी गल्लां कम्म बिच लादें-लादें खत्म होई जाणी) किजोकी ए म्हणुआं रे हुक्म ते शिक्षा रे हसाब कने है। 18 इन्हा विधियां बिच अपणी मर्जी रे हसाब कने झूठी भक्ति री रिती, ते छोटापन, ते सरिरी उठक-बैठक रे हसाब कने ज्ञान रा ना ता है अपण सरिरी लालच जो रोकणे बिच इन्हेरे का कोई बी पैदा नी हुदां। 19 जे तुसां प्रभु यीशु मसीह कने जीन्दे कित्ते गे ता तुसी स्वर्ग री चिजां री तोपा अन्दर रिओ कने जीत्ते मसीह जी हिन से परमेश्वर रे सजे हथ हिन बैठे रे।

### मसीह कने जीणा ते मरणा

20 धरती री चिजाँ पर नि पर स्वर्ग री चिजाँ पर ध्यान दियो। 21 किजो कि तुसां ता मरी चुके रे हिन तुसां री जीन्दगी मसीह यन कि परमेश्वर अन्दर छिपे री है। 22 जीस वक्त मसीह जेडा हमारा जीण है तिन्हा प्रकट हुणा ता तुसी बी सेरी महिमा बिच प्रकट हो जाणा। 23 इधेरे तिकर तुसी तिन्हा अंगां जो मारी दियो जेडे इस धरती पर हिन, जीयां कि रन्डी बाजी गन्दगी बुरी सोच, बुरा लालच जेडी मूर्ती पूजा रे बराबर है।

3 इन्हा वजह कने ही परमेश्वर रा प्रकोप गल नी मने वाळे पर पैन्दा। 2 ता तुसी बी जीस वेले बुराई अन्दर थिये ता तुसी बी ऐसी इ जीन्दगी जीन्दे थे। 3 कने तुसी बि इन्हा सारी गला जो जैसे कि गुसा रोष दुशमणी बैर भाव निन्दा मुँह कने गाळी देणी ऐ सारी चिजाँ छडी दियो। 4 इक दुजे कने झूठ मत बोला किजो कि तुसां पुराणा जीणा छडी दित्तेरा है।

### पुराणी जिन्दगी ते नौई जिन्दगी

5 कने नोए मणु रे चोळे जो पाई लित्तेरा है जेडा अपणे बणाणे वाळे रे रूप बिच ज्ञान पाणे तिकर नो बणदा जान्दा। 6 उस अन्दर ना ता यूनानी ना स्कूती ना नोकर ना अजाद ना खतना ना खतने रे बगैर पर केवल प्रभु यीशु जी जेडे सब कुछ ते सबनी अन्दर हिन। 7 इधेरे ताईं जीयां तुसां जो परमेश्वर ने चुणी लित्तेरा होन तिधरे ताईं तुसां प्यार, निमियाइ, भलाई, कने सहनशीलता ते करुणा धारण करी लियो। 8 अगर तुसां का कुसी पर इलजाम लागे री कोई बजह हो ता तुसी इक दुजे री सई लियो, इक दुसरे रे अपराध माफ करी दियो जीयां की प्रभु ने बी तुसां रे अपराध माफ कित्ते तुसां बी करो। 9 इन्हा सबनी का ऊपर प्यार है सेरा पटका तुसी बन्धी लियो। 10 प्रभु यीशु जी री शान्ति जीस ताईं तुसां सदे रे हिन इक सरीर बिच होई के तुसां रे दिल बिच राज करे ते तुसां तिस गल रा हमेसा शुक्र करदे रियो। 11 प्रभु यीशु जी रे बचन जो अपणे दिल बिच मता सारा बसणे दियो ते सिद्ध ज्ञान सई इक दुजे जो सिखाओ कने खबरदार करदे रियो ते अपणे अपणे मन बिच दीन होई के आत्मा बिच परमेश्वर तिकर तारीफ रे गीत ते आत्मिक गीत गान्दे रियो। 12 बचन बिच या कम अन्दर जे बी करो से प्रभु यीशु जी रे ना कने करो ते तिस कने पिता परमेश्वर रा धन्यावाद करदे रियो। 13 ओ लाडियो तुसां जीयां प्रभु अन्दर र ठीक है तियां अपणे लाडे रे अधीन रियो। 14 ओ लाडियो तुसी बी अपणी लाडी कने प्यार कने रीयो तिन्हा कने कठोरता कने मत रियो। 15 है बच्चो तुसां सारी गल्ला अन्दर अपणे माता पिता री गल्ल मनो किजो कि प्रभु इसी गल्ल बिच खूस हुन्दा। 16 ते माँ बब सुणो तुसी बी अपणे बच्चे जो तंग मत करो ऐसा न हो कि तिन्हा रा होसला टुटी जाए। 17 ते नोकरी करणे वाळे सुणो तुसी अपणे जेडे सरीर रे अनुसार मालिक हिन तिन्हा री सारी गल्ला अन्दर हुक्म मनो जीयां मणु जो खूस करदे तियां नी पर सिद्ध मन कने ते प्रभु जी रे डर कने।

### नोए जिन्दगी रे पारिवारिक नियम

18 जेडा किछ तुसां करदे से तन मन कने करो से ये समझी कने कि तुसी मणु तिकर नि पर प्रभु रे ताईं हिन करदे। 19 किजो कि तुसी सब जाणदे कि

प्रभु यीशु जी अन्दर तुसां जो मिरास मिलणी की तुसी प्रभु री सेवा हिन करदे। 20 किजो कि जेडा बुरा करदा तिस जो बुराई रा फळ मिलणा तित्ते कुसी रा बी पक्षपात नि हुणा। 21 ओ मालको, तुसी अपणे-अपणे नौकरां कने न्याय अत्ते सहई-सहई बरताव करो, ऐ समझी करी कि स्वर्ग बिच तुम्हारा बी कोई मालक है। 22 प्रार्थना बिच हमेसा लगी रह्यो, अत्ते जां तुसी प्रार्थना करो ता हमेसा परमेश्वर रा सुकर करदे रह्यो। 23 कने ई म्हारे ताईं बी प्रार्थना करो कि परमेश्वर म्हारे ताईं वचन सुनाणे रा इदेया रस्ता खोली दे कि असी मसीह री छिप्पी री गल्लां रा प्रचार करी सकन किजो कि इस्सी वजह कने मैं जेन्ना बिच है। 24 प्रार्थना करो कि मैं इदेयी सफाई कने दस्सी सकां, जीय्या मिंजो करणा बी चहिंदा। 25 बाहर वाळ्यां कने सही तरिके कने बरताव करो। हर मौके रा पूरा-पूरा इस्तेमाल करो।

4 तुम्हारा बोलणा हमेसा दया कने अत्ते नरम हो ताकि तुसी जाणी जाओ कि कुसकी महु जो किय्यां जवाब देणा है।

### किछ व्यवहारिक सलाह

2 म्हारा प्यारा भाई तुखिकुस जे इक विस्वासी सेवा करणे वाळा अत्ते प्रभु बिच मेरा साथी है, मेरी सब गल्लां तिस ने तुसां जो दस्सी देंगी। 3 मैं उस जो तुम्हारे का इधेरे ताईं भेजेया करदा है कि तुम्हारे जो म्हारे हालचाल रा पता लगी जाओ अत्ते से तुम्हारे मन जो सांति दे। 4 मैं अपणे विस्वासी अत्ते प्यारे भाई उनेसिमुस जो बी तिस कने भेजेया करदा है जे तुम्हारे बिच का इक है। तिस ने, जे इत्ते होया करदा है तुम्हारे जो दस्सी देंगा। 5 अरिस्तरखूस जे मेरे कने जेन्ना बिच है अत्ते बरनबास रे भाई मरकुस री तरफ का तुसां जो नमस्ते, (तिसेरे रे बारे तुसां जो बोली दित्तेया गया है कि जां से तुसा का आये ता तिसेरा स्वागत करेयो,) 6 अत्ते यीशु बी जीस जो कि यूस्तुस बी बोलदे, तुसां जो तिसेरी बी नमस्ते। यहूदी विस्वासियां बिच बस ऐई है जे परमेश्वर रे राज्य ताईं मेरे कने कम्म करेया करदे हिन अत्ते मेरे मन री सांति री वजह हिन।

### आखरी अभिवादन

7 इपफ्रास री बी तुम्हारे जो नमस्ते। से तुम्हारे बिच का ई इक अत्ते यीशु मसीह री सेवा करणे वाळा है। से हमेसा बडी लगन कने तुम्हारे ताईं प्रार्थना करदा रेहन्दा, ताकि तुसी पूरे सही होई करी विस्वास बिच परमेश्वर री मर्जी बिच मजबूत रह्यो। 8 मैं तिसेरा गवाह है कि तिस जो लौदीकिया अत्ते हियरापुलिस रे रेळे वाळ्यां री बडी फिकर है। 9 प्यारे वैद लूका अत्ते देमास री बी तुसां जो नमस्ते। 10 उन्हा भाइयां जो जे लौदीकिया बिच हिन, नुमफास अत्ते उस कलीसिया जो जे उसेरे घरे है नमस्ते बोलेयां। 11 अत्ते दिखखो, जां इस चिटठी जो तुसी पढी लिंगे ता इस जो लौदीकिया री कलीसिया बिच पढेयो, अत्ते लौदीकिया का जे मेरे ताईं चिट्ठी आये ता तुसी बी तिस जो पढी लेयो। 12 अखिप्पुस जो बोलणा, "जे सेवा प्रभु ने तेरे हवाले किन्ती है से तिस जो ध्यान कने पूरा करेयां। 13 मैं, पौलुस, ए नमस्ते अपणे हत्थां कने लिखखेया करदा है। मेरी संगळां जो चेत्ता रखखेयो। परमेश्वर री दया तुसां पर हून्दी रेह। 14 पौलुस, सिलावनुस अत्ते तिमथियुस रे पास्से का थिस्सलुनीकियो री कलीसिया जो, जे पिता परमेश्वर अत्ते प्रभु यीशु मसीह बिच है: तुसां जो दया अत्ते सांति मिले। 15 असी हमेसा तुसां ताईं परमेश्वर रा सुकर करदे। ते प्रार्थना बिच तुसां जो याद रखदे। 16 प्रार्थना करदे बेन्ने असी तुम्हारे उन्हा कम्मा जो याद करदे, जे फळ है, विस्वास रा, प्यार का पैदा होये री कडी मैहनत रा, अत्ते म्हारे प्रभु यीशु मसीह बिच तुम्हारी आस का पैदा होई हिम्मत रा असां जो हमेसा ध्यान लगी रेहन्दा। 17 परमेश्वर रे प्यारे अत्ते म्हारे भाइयो, असा जाणदे कि तुसी उसेरे चुणे गेरे हिन। 18 किजो कि म्हारी खूसखबरी तुसा का ना सिरफ शब्दा बिच, अपण पवित्र आत्मा री सक्ति अत्ते गैहरी श्रद्धा कने पूजेया। तुसी जाणदे कि जां असी तुम्हारे कने थिये, ता कदेयी जींदगी जींदे थिये।



# 1 थिस्सलुनीकियों

## अभिवादन

1 अत्ते बड़ी मुसिबतां रे बीच तुसां ने पवित्र आत्मा का मिलणे वाळी खुसी कने शुभ बसेख जो अपनाया ते प्रभु अत्ते म्हारी चाल चलणे लगे।

### थिस्सलुनीकियों रा भरोसा

2 इधेरे ताई तुसी मैसिडोनिया अत्ते अखाया ताई आर्दश बणी गे। 3 किजो कि तुम्हारे इत्ते का परमेश्वर रे बसेख री जे धूम मची से ना सिरफ मैसिडोनिया अत्ते अखाया बिच बल्कि परमेश्वर बिच तुम्हारा विस्वास हर कुते मन्नेया गया ते म्हारे जो होर किच्छ बोलणे री जरूरत नी है। 4 से खुद म्हारे बारे दस्सदे हिन् कि तुसां ने म्हारा कदेया स्वागत किच्तेया अत्ते तुसा मूर्तियां जो छड्डी करी जिंदे परमेश्वर रे पास्से किय्यां मुडे थिये ताकि तुसा जिंदे अत्ते सच्चे परमेश्वर री सेवा करी सको, 5 अत्ते स्वर्ग का उन्हेरे पुत्र मतलब यीशु जी रे आणे री भाळ करो, जिस जो उन्हा ने मरे रेयां बिच का जिंदा किच्तेया। अत्ते सेहई परमेश्वर रे आणे वाळे कोप का असां जो बचान्दे। 6 हे भाईयो, तुसी अप्पु ई जाणदे की असां रा तुसां का ईणा बेकार नी होया, 7 बल्कि तुसी अप्पु ई जाणदे की पैले फिलिप्पि बिच दुख उठाणे ते तकलीफ सहणे पर बी असां रे परमेश्वर ने असां जो इदेइ हिम्मत दित्ति, की असी परमेश्वर रा शुभ-भसेख भारी विरोध रे हुदें होए बी तुसां जो सुनाण। 8 किजो कि असां रा उपदेस ना बैह्य कने है ते ना गदंगी कने, ते ना छल कने है; 9 अपण जिय्यां परमेश्वर ने असां जो इस जोगे ठैहराई करी शुभ-भसेख दिच्तेया, असी तैसा ई बखान करदे, ते इस बुच म्हणुआं जो नी, अपण परमेश्वर जो, जे असां रे दिल जो जाचंदे खुस करदे। 10 किजो कि तुसी जाणदे की असी ना ता चापलुसी री गलां करया करदे थिये ते ना लालच ताई बहाने करदे थिये परमेश्वर ग्वाह है;

### पौलुस रा प्रचार रा कम्म

2 ते हालांकी असी मसीह जी रे प्रेरित होणे रे वजह कने तुस पर बोझ पाई सकदे थिये तां बी असी म्हणुआं का आदर नी चाहंदे थिये, ते ना तुस का, ना होर कुसकी का। 2 अपण जिय्यां माँ अपणे बच्चेयां रा पालण-पौषण करदी, तिय्यां ई असी बी तुसां मझाटे रेइ करी कौमलता दिखाई; 3 ते तिय्यां ई असी तुसां री चाहत करदे होए, ना सिर्फ परमेश्वर रा शुभ-भसेख पर अपणी-अपणी जान बी तुसजो दैणे ताई तैयार थिये, इस ताई किजो कि तुसी असां रे प्यारे होइ गे रे थिये। 4 किजो कि, हे भाईयो, तुसी असां री मेहत्त ते दुख जो याद रखदे; असां ने इस ताई रात-दिन कम्म कार करी के तुसां बिच परमेश्वर रा शुभ-भसेख प्रचार किच्ता की तुसां बिच का कुसकी पर भार ना हो। 5; तुसी अप्पु ई ग्वाह हिन्, ते परमेश्वर बी ग्वाह है की तुसी विष्वासियां रे मझाटे असां रा बताव कदेया पवित्र ते धार्मिक ते बेकसूर रेया। 6 तुसी जाणदे की जिय्यां पिता अपणे बच्चेयां कने बताव करदा तिय्यां ई असी बी तुसां बिच हर इक्क जो उपदेस दिदें, ते साति दिदें, ते समझादें थिये, 7 कि तुसां रा चाल-चलन परमेश्वर रे जोग्गा हो, जे तुसां जो अपणे राज ते महीमा बिच सददा। 8 इस ताई असी बी परमेश्वर र धनवाद लगातार करदे की जां असां रे जरिए

परमेश्वर रे शुभ-भसेख रा वचन तुसां का पुजेया, तां तुसी तिसजो म्हणुयां रा नी अपण परमेश्वर रा वचन समजी करी (ते सचमुच ए इदेया ई है) अपणाया ते ओ तुसी भरोसा करणे वाळेयां बिच जे भरोसा रखदे, असरदार है। 9 इस ताई तुसी, हे भाईयो, परमेश्वर रे तिन्हा कलिसीयां री जदेइ चाल चलणा लगे जे यहूदिया बिच मसीह यीशु जी बिच हिन् किजो कि तुसी बी अपणे लोकां कने तैसा ई दुख पाया जदेया तिन्हा ने यहूदियां का पाया, 10 जिन्हा ने प्रभु यीशु जी ते भविष्याद्वक्ता जो बी मारी रखेया ते असां जो तगं किच्तेया ते परमेश्वर तिन्हा का खुस नी ते से सारे म्हणुआं रा विरोध करदे, 11 ते से होर लोकां का तिन्हेरे छुटकारे ताई गलां करणे का असां जो रोकदे की हमेसा अपणे पाप्यां रा घडा भरदे रैह्य; अपण तिन्हा पर परमेश्वर रा डरावणा गुस्सा आई पुजे रा है, 12 हे भाईयो, जां असी थोड़ी देर ताई, मन बिच नी अपण सामणे-सामणे, तुसका का बखरे होइ गे रे थिये, तां असी बड़ी चाहत कने तुसां रा मुँह दिखणे ताई होर बी जादा मेहत्त किच्ति। 13 इस ताई असां ने (मतलब की मै पौलुस ने) इक्क बारी नी अपण दो आरी तुसां का ईणा चाहएया। अपण सैतान ने असां जो रोकि रखेया। 14 भला असां री उम्मीद या खुसी या बड़ाइ रा ताज क्या है? क्या असां रे प्रभु यीशु जी रे सामणे तिन्हेरे आणे रे वेळे तुसी ई नी होणा? 15 असां री बड़ाइ ते खुसी तुसी ई हिन्। 16 इधेरे ताई जां असा का होर नी रेहई होया, ता असा ने कले ई एथेन्स बिच रैह्ये री सोची लेई।

### कलीसिया कने मिलणे रे इच्छा

17 अते असा ने अपणे भाई अत्ते परमेश्वर रे शुभ-भसेख रे प्रचार बिच अपणे साथी तीमुथियुस जो मजबूत करणे अत्ते तुसां रे विसवास रे बारे बिच तुसा जो समझाणे ताई तुम्हारे का भेजी दिच्तेया 18 ताकि इन्हा मुसीबतां का कोई घबराये नी। किजोकि तुसा ता जाणदे हिन् कि असी मुसिबतां ताई मजबूत किच्ते गे हिन्। 19 किजोकि पैहे बी जां असी तुसा का थिये, तुसा जो बोली दिच्तेया थिय्या कि असा पर मुसिबतां आणी, अत्ते एह होया बी करदा है। तुसी एह ता जाणदे ए हिन्। 20 इधेरे ताई जां मेरे का होर नी टिकी होया, ता मै तुम्हारा हाल-चाल जानणे ताई तीमुथियुस जो भेजी दिच्तेया, किजोकि मिंजो डर थिय्या कि परखणे वाळे ने तुसा जो परखेया हो अत्ते म्हारी मैहनत बेकार होई गई हो।

### तिमुथियुस रा भेजेया जाणा

3 तुम्हारे का तीमुथियुस अबे-अबे असा का इत्ते पुजेया, अत्ते तिस ने असा जो तुम्हारे विस्वास ते प्यार रा खरा बसेख दिच्तेया। अत्ते तिस ने असा जो दस्सेया कि तुसा जो म्हारी बड़ी याद आन्दी अत्ते तुसी बी असा कने मिलणे जो तरसी गेरे हिन्। 2 इस वजह कने, ओ भाईयो, असा रे सारे दुख अत्ते तकलिफां बिच बी तुम्हारे विस्वास री वजह कने तुसां ताई असा जो सांति मिली। 3 जे तुसी मजबूत ते टिकी रेहन्गे ता असी सच्ची जिंदा हिन्। 4 तुसा ताई असा जो जे खुसी मिली है, तिधेरे ताई परमेश्वर रा सुकर किय्यां करन। 5 परमेश्वर रे सामणे असी रात-दिन प्राथना करदे कि तुसां कने मिलन, अते तुसां रे विसवास बिच जे कमी रेहई गेरी है तिस जो पूरा करन।

### तिमुथियुस रे जरिये खबर मिलणा

6 असा रे परम पिता परमेश्वर अत्ते म्हारे प्रभु यीशु तुसा का आणे ताँई रस्ता दिखान। 7 अत्ते प्रभु करे कि तुसी इक दूये ताँई सब महुआँ ताँई प्यार बिच तरक्की करदे अत्ते बद्धदे जाओ, 8 अत्ते इस तरिके कने से तुम्हारे मन जो मजबूत करन, ताकि जां म्हारे प्रभु यीशु अपणे सब पवित्र महुआँ कने आन, ता से म्हारे परमेश्वर अत्ते परम पिता परमेश्वर रे सामणे पवित्र अत्ते बेकसुर हों। 9 हे भाईयो असां तुसां कने मिन्नत करदे कने प्रभु यीशु जि अन्दर तुसां जो समझान्दे जियां कि तुसी हमारे का खरी चाल चलणा सिखेया कने प्रभु जो खुस करणा सिखेया, जियाम तुसी चलदे बी हिन तियें होर बी बढी जाओ। 10 किजो कि तुसां सब जाणदे कि असां प्रभु यीशु जि अन्दर कुण जिणी गल मनणे जो बोलेया। 11 किजो की परमेश्वर री ये मर्जी हे कि तुसां रंडवाजी का बच्चो कने पवित्र बणो। 12 कने तुसी हर इक पवित्रता अन्दर अपणी लाडी जो प्राप्त करना जाणे कने आदर कने। 13 कने ये कम कुसी लालच कने नी ना उन जातियां सई जेडी प्रभु यीशु जो नि जाणदी।

### जिन्दगी जे परमेश्वर जो खुस करे

4 कि इन्हा गल्ला अन्दर कोई बी अपणे भाई जो ना उगे ते ना को बुरी चाल चले किजो कि प्रभु इन्हा सारी गल्ला रा पलटा लेणे वाळा है जिन्हा रे बारे बिच असा तुसां जो पहले इ खबरदार कित्तेया है। 2 किजो की परमेश्वर ने असां जो अपवित्र होणे तिकर नि पर पवित्र होणे तिकर है सदे रा। 3 इधरे तिकर जेडा इस गल जो जेडा तुच्छ समझदा से प्रभु जो बी तुच्छ समझदा जेडा अपणा पवित्र आत्मा तुसां जो दिन्दा। 4 पर भाईचारे तिकर ये जरूरी नि कि मैम तुसां जो इस बारे अन्दर किछ लिखा पर तुसां अपणे आप इ प्यार करणा परमेश्वर का है सिखेरा। 5 तुसी मकिदुनिया रे सारे भाईयां कने ऐसा इ करदे पर तुसी होर बि इस अन्दर बध दे जाओ। 6 ते तियें इ जियां असां तुसां जो बोलेरा है कि चुप चाप रैणा अपणा कम काज करणा ते अपणे हथा कने कमणे री कोसीस करणी। 7 कि तुसी बाहर वाळे कने अच्छी तरह कने बताव करो, ते तसां जो कुसी बी चिज रा घाटा नी हो। 8 है भाईयो असां नि चान्दे कि तिन्हा रे बारे बिच सोन्दे रेओ बिना अकल दे रिओ ऐसा ना हो की तुसा दुख करदे रिओ जिन्हा का कोई उमेद नी है। 9 ते असां विस्वास करदे कि प्रभु यीशु मरे रे का जी उठे रा है। ते जेडे प्रभु यीशु अन्दर सोई गेरे हिन् तिन्हा जो वी अपणे कने लई आणे वाळा है। 10 किजो कि असां जेडे प्रभु जी रे बचन रे अनुसार हिन् तुसा कने बोलदे कि असा जेडे जिन्दे हिन् से सुत्ते रे का कदी बी अगे नी बधणा। 11 किजो कि प्रभु अपु इ स्वर्ग का उतरणा ते तिस वक्त ललकार हुणी ते प्रधान दुत रा सबद सुणीणा कने परमेश्वर री तुरही फूकी जाणी ते जेडे मसीह अन्दर पहले मरे रे हिन् तिन्हा बने पहले जि उठणा। 12 इस तिकर असां जिन्दे ते बची रैणा ते बदळा बिच चुकी जाणे ते हवा बिच प्रभु कने मिलणा इस रिती कने असा हमेसा तिकर प्रभु यीशु जि कने रैणा।

### यीशु जी रा दोबारा आणा

13 इन्हा गल्ला कने इक दूजे जो तसल्लि दिन्दे रिओ। 14 अपण ओ भ्याळो, इसेरी कोइ जरूरत नी है कि बेलेयाँ ते कालां रे बारे अन्दर तुसा का किछ लिखेया जाओ। 15 किजो कि तुसी अपु ठीक जाणदे कि जिह्याँ रात्ती चोर आन्दा, तिह्याँ ई प्रभु जी रा दिन आणे वाळा है। 16 जां महु बोलदे होणे, "ठीक है, ते कोई डार नी है," ता तिन्हा पर इक-दम्म ई विनास आई पैणा, जिस तरीके कने दुपराणी जनानी पर पीडां आई पैदियाँ; ते तिन्हा ने कुस्की

बी तरीके कने नी बची सकणा है। 17 अपण ओ भ्याळो, तुसी ता न्हारे अन्दर नी हिन् कि से रोज तुसां पर चोर साहई आई पेयो। 18 किजो की तुसी सारे जोत रे बच्चे ते दिन रे बच्चे हिन्; असी नां रात रे हिन्, ते नां ई न्हारे रे।

### यीशु जी रे दोबारा आणे पर तयार रैहणा

5 इधरे ताँई असी दुज्जेयाँ साहई सोन्दे इ ना रैह, अपण जागदे ते चुकत्रे रैह। 2 किजो की जेहडे सोन्दे से रात्ती ई सोन्दे, ते जेहडे मतवाले हुन्दे, से रात्ती ई मतवाले हुन्दे। 3 अपण असी जेहडे दिन रे हिन्, भरोस्से ते प्यार री झिलम पाई करी ते उद्धार रा टोप पाई करी चुकत्रे रैह। 4 किजो कि परमेश्वर ने असां जो लैह करणे ताँई नी, अपण इधरे ताँई ठैहारा है कि असी अपणे प्रभु यीशु मसीह जी रे जरिए उद्धार हासल करन। 5 से असां ताँई इस वजह कने मरे कि असी चाहे जागदे होन या सुत्ते होन, सब जह्ले मिली करी तिन्हा कने ई जीन। 6 इधरे ताँई इक-दुज्जे जो सान्ती देयो ते इक-दुज्जे री उन्नती री वजह बणो, जदेह्या कि तुसी करदे बी। 7 ओ भ्याळो, असी तुम्हारे छन्दे करदे कि जेहडे तुसा बिच मैहत्त करदे, ते प्रभ अन्दर तुसां रे अगुवे हिन्, ते तुसां जो सिक्सा दिन्दे, तिन्हेरी इज्जत करो। 8 ते तिन्हेरे कम्म री वजह कने प्यार कने तिन्हा जो बडी ई इज्जत रे लायक समझो। अपु-मिते मेलमलाप कने रेहो। 9 ओ भ्याळो, असी तुसां जो समझान्दे कि जेहडे ठीक चाल नी चलदे तिन्हा जो समझाओ, डरपोका जो हिम्मत देयो, कमजोरां जो सम्भालो, सबनी ताँई सैहसीलता दरस्सो। 10 चुकत्रे होई जाओ! कोई कुस्की कने बुराई रे बदले अन्दर बुराई ना करो; अपण हमेसा खराई करणे पर ततपर रेहो, अपु-मिते ते सबनी कने बी भलाई री ई चेष्टा करो। 11 हमेसा खुस रेहो।

### कलीसिया जो उपदेश

12 लगातार प्रार्थना अन्दर इ लगी रेहो। 13 हर गल्ल अन्दर सुकर करो; किजो कि तुसां ताँई मसीह यीशु जी अन्दर परमेश्वर री ऐ ई मर्जी है। 14 आत्मा जो मत बुझाओ। 15 भविष्यवाणियाँ जो छोटी गल्ल मत समझो। 16 सबनी गल्लां जो परखो; ते जेहडी खरी है, तिस जो पकडी रखखो। 17 हर तरिके री बुराई का बची रेहो। 18 सान्ति रे परमेश्वर अपु ई पूरी रीत कने पवित्र करन; ते तुसां री आत्मा ते प्राण ते सरीर असां रे प्रभु यीशु मसीह जी रे ईणे ताँई पूरे-पूरे ते निरदोस बची रैह। 19 तुसा रा सदणे वाळा सच्चा है, ते तिन्हा ने इह्याँ ई करणा। 20 ओ भ्याळो, असां ताँई प्रार्थना करो। 21 सबनी भ्याळां जो पवित्र चुम्बन कने नमस्ते करो। 22 में तुसां जो प्रभु जी री कसम दिन्दा कि ऐ पतरी सबनी भ्याळां जो पढाई करी सुणाई जाओ।

### आशिवाद्

23 असां रे प्रभु यीशु मसीह जी रा दया तुसां पर हुन्दी रेहो। 24 पौलुस, सिलवानुस अत्ते तीमुथियुस रे पाससे का थिस्सलुनीकियों री कलीसिया रे नां; जे असा रे पिता परमेश्वर अत्ते प्रभु यीशु मसीह बिच मौजूद हिन्; 25 असा रे पिता परमेश्वर अत्ते प्रभु यीशु मसीह रे पाससे का दया अत्ते सान्ति मिलदी रेह। 26 ओ भाइयो, तुसां ताँई असा जो हमेसा परमेश्वर रा सुकर करणा चहिंदा, अत्ते एह ठीक बी है। किजोकि तुसी बडे अच्छे तरिके कने विसवास अत्ते आपसी प्यार बिच बडेया करदे हिन्। 27 इधरे ताँई परमेश्वर री कलीसिया बिच असी खुद तुसा पर गर्व करदे। जितणी मुसिबतां अत्ते दुख तुसा सैहन्दे तिन्हा सब कने तुसा रा सवर अत्ते विसवास सामणे आन्दा। 28 एह परमेश्वर रे सच्चे न्याय रा साफ इशारा है कि तुसाँ परमेश्वर रे राज्य बिच जाणे रे लायक बनणा। तुसी अबे तिसरे ताँई ता दुख भोगेया करदे हिन्।

## 2 थिस्सलुनीकियों

~ अभिवादन

1 किजोकि परमेश्वर ताँई एह न्याय है कि जे तुसां जो दुख दिंदे, तिन्हा जो बी बदले बिच दुख मिलन। 2 अते तुसां दुख भोगणे वाळ्यां जो असाँ कने उस बेले अराम मिलन जाँ प्रभु ने अपने सक्तिसाली स्वर्गदूताँ कने, धधकती अग बिच स्वर्ग का आणा।

### ईसाफं रा दिन

3 अते जे परमेश्वर जो नी जाणदे अते जे असा रे प्रभु यीशु जी रे शुभ-बसेख जो नी मनदे तिन्हा जो सजा दित्ती जाणी। 4 तिन्हा जो हमेसा ताँई विनाश री सजा दित्ती जाणी। अते तिन्हा जो प्रभु अत्ते तिन्हेरी महिमा री सक्ति रे सामणे का दूर करी दित्तेया जाणा। 5 इदेया ताँ होणा जाँ तिन्हा ने अपने पवित्र महुआँ बिच महिमा पाणे अते उन्हा सब बिच जिन्हा ने विसवास कित्तेया, हरानी करणे री वजह होणे ताँई आणा, किजोकि तुसा ने असा री गवाई पर विसवास कित्तेया। 6 इस्सी मकसद कने असी हमेसा तुम्हारे ताँई प्राथना करदे कि असा रे परमेश्वर तुसा जो अपनी बुलाहट रे लायक समझन, अते भलाई री हर इक मर्जी जो, अत्ते विसवास रे हर इक कम्म जो सक्ति कने पूरा करन। 7 जिस कने कि म्हारा परमेश्वर अत्ते प्रभु यीशु मसीह री दया रे साहब कने असां रे प्रभु यीशु जी रे नां जो तुसा रे जरिये आदर मिल्लो, अत्ते तुसाँ जो उस बिच। 8 हे भाईयो, अवे असी अपने प्रभु यीशु मसीह जी रे आणे, और तिन्हेरे का अपने कठिणे रे बारे बिच तुसाँ का मिन्नत करदे हिन् । 9 कि कुसकी आत्मा, या वचन, या पत्तरी रे जरिए जे की मन्नाँ असां रे पास्से का होए समजी करी की प्रभु रा दिन आई गे रा हो, तुसां रा मन चानचक्रे ई डगमगाई ना जाए ते तुसी ना घबराई जाओ। 10 कुसकी तरिके कने कुसकि रे बहकावे बिच मत आदे, किजोकी से दिन नी आणा जाँ तिकर धर्म रा त्याग ना होइ जाए, ते से पाप रा म्हणु मतलब की विनाश रा पुत्र सामणे ना आई जाए। 11 जे विरोध करदा, ते इक्क जो जे इश्वर या पुज्य कहलादां, अपु जो बड्डा ठेहरादां, इत्ते तिकर परमेश्वर रे देहरे बिच जाई करी बेई करी अपु जो इश्वर ठेहरादां। 12 क्या तुसां जो चेत्ता नी है की जाँ मै तुसां का थिया, तां तुसां कने ए गलां करेया करदा था।

### पाप रा म्हणु मतलब विनाश रा पुत्र

2 तुसी तिस चीज जो जाणदे, जे तिसजो अबे रोकेया करदा है की से अपने हि समय पर पुरा हो। 2 किजो कि अधर्म रा राज हले बी काम्म करदा जाया करदा है, अपण हले इक्क रोकणे वाळा है ते जाँ तिकर से दूर ना होइ जाए, रोके रखणा। 3 तां से अधर्मी सामणे आणा, जिसजो प्रभु यीशु मसीह जी ने अपने मुँह री फुक कने मारि रखणा, ते अपने आगमन रे तेज कने फुकि रखणा। 4 तिस अधर्मी रा आणा सतान रे काम्म रे हसाब कने हर तरिके री झुटि ताकत, ते निसानियां, ते हरान करणे वाळे काम्म कने, 5 ते खतम होणे वाळ्यां ताँई अधर्म रे हर तरिके रे धोखे कने होणा; किजो कि तिन्हा ने सचाई कने प्यार कित्ता जि कने तिन्हेरा छुटकारा हुदां। 6 इसी तरिके कने परमेश्वर तिन्हेरे जो इक्क भटकाई दैणे वाळी ताकत जो भेजण की से झुट जो मन्ने, 7 ते जिन्ने लोक सचाई जो नी मनदे, बल्कि अधर्म कने खुस हुदें, से सारे

सजा पाणा! 8 हे भाईयो, ते प्रभु रे प्यारे लोकॉं, ए चाएदा की असी तुसां रे बारे बिच हमेसा परमेश्वर रा धनवाद करदे रहण, किजो की परमेश्वर ने तुसां जो सुरुआत का चुणी लिक्ता की आत्मा रे जरिए पवित्र बणी करी, ते सचाई जो मन्त्रिकरी छुटकारा पाओ 9 जिसेरे ताँई तिन्हा ने तुसां जो असां री खुसखबरि रे जरिए सद्देया, की तुसी असां रे प्रभु यीशु मसीह जी री महीमा जो पाओ। 10 इधेरे ताँई हे भाईयो टिके रेयो ते जे जे गलां तुसी चाए वचन या चिट्ठि रे जरिए असां का सिखी री हिन, तिन्हा जो पकड़े रेयो। 11 असां रे प्रभु यीशु मसीह अपु ई, ते असां रे पिता परमेश्वर, जिन्हा ने असां कने प्यार रखेया ते अनुग्रह कने हमेसा री सार्ती ते सबका बढिया उम्मीद दित्ती री है, 12 तुसां रे मन बिच सान्ति दे ते तुसां जो हर इक्क खरे काम्म ते वचन बिच मजबूत करे।

### मजबूत बणे रेयो

13 आखिर अन्दर, ओ भ्याळो, असां ताँई प्रार्थना करेया करो कि प्रभु जी रा वचन इदेह्या तोळे फैले ते महिमा पाए, जदेह्या तुसा बिच होया, 14 ते असी देरे ते बुरे महुआँ का बची रहै किजो की हर इक अन्दर भरोस्सा नी है। 15 अपण प्रभु जी सचे हिन् ; तिन्हा ने तुसा जो द्रिदता कने पक्का करणा ते तिस दुष्ट का बचाई रखणा। 16 असा जो प्रभु जी अन्दर तुसां पर भरोस्सा है कि जेहडे-जेहडे हुकम असी तुसा जो दिन्दे, तिन्हा जो तुसी मन्दे, ते तुसां तिन्हा जो अगे बि मनदे रहै। 17 परमेश्वर रे प्यार ते मसीह जी रे सबर रे पास्से प्रभु जी तुसां रे मनां री अगुवाहई करन।

### प्रार्थना करणे री मिन्नत

3 ओ भ्याळो, असी तुसां जो अपने प्रभु यीशु मसीह जी रे नां कने हुकम दिन्दे कि तुसी हर इक इदेह भाई का बखरे रेह्यो जेहडा गलत चाल चलदा ते जेहडी सिक्सा तिनिए असां का पाएरी है तिसेरे साबे नी करदा। 2 किजो की तुसां जो अप्पु पता है कि कुस तरीके कने असां साहई चाल चलणी चाहिन्दी, किजो की असा तुसा रे बच अन्दर गलत चाल नी चली, 3 ते कुस्की री रोटी मुफ्त अन्दर नी खाई; अपण मैहन्त ते दुख सैहइ करी रात-दिन काम्म-धन्दा करदे थिये ताकि असां रा तुसां बिच का कुस्की पर बी भार ना पेयो। 4 ऐ नी है कि असां जो हक नी है, अपण इधेरे ताँई कि अपु जो तुसा ताँई अदरस ठैहान कि तुसी असा साहई चाल चलो। 5 किजो की जाँ असी तुसां का थिये, तां बी एह हुकम तुसां जो दिन्दे थिये कि अगर कोई कम्म करणा नी चाहो ता तिस जो रोटी बी नां मिल्लो।

### कम्म करणे री जिम्मदारी

6 असी सुणदे कि किछ महु तुसां रे बिच अन्दर गलत चाल चलदे, ते किछ कम्म नी करदे अपण दुजेयां रे कम्मां अन्दर हथ्य पान्दे रहन्दे। 7 इदेह्याँ जो असी प्रभु यीशु मसीह जी अन्दर हुकम दिन्दे ते समझान्दे कि चुप-चाप कम्म करी के अपनी ई रोटी खाया करो। 8 तुसी, ओ भ्याळो, भला करणे अन्दर हिम्मत मत हारो। 9 अगर कोई म्हारी इस पत्री री गल्ल जो नी मन्ने ता तिस पर नजर रख्यो, ते तिसेरी संगती मत करो, जिस कने तिस जो आओ।

10 तां बी तिस जो दुस्मण मत समझो, अपण भ्याळ समझी करी सावधान करो । 11 अवे प्रभु जी जेहडे सान्ती रे सोते हिन अप्पु ई तुसा जो हमेसा ते हर तरह री सान्ती देन। प्रभु जी तुसां सबनां रे कन्ने रहैह। 12 मैं, पौलुस, अपणे हथ केन नमस्ते लिखदा। हर पत्तरी अन्दर मेरी ऐ ई निसानी है; मैं इह्याँ ई लिखदा। 13 असां रे प्रभु यीशु मसीह जी रा अनुग्रह तुसा सबनां पर हुन्दा रेहयो। 14 पौलुस रे पास्से का, जे असा रे उद्धार करणे वाले परमेश्वर अत्ते म्हारी उमेद यीशु मसीह रे हुकम कने यीशु जी रा बसेख दैणे वाळा दूत (प्रेरित) है, 15 तिमथियुस जो जे विस्वास बिच मेरा सच्चा पुत्र है। पिता परमेश्वर अते असा रे प्रभु यीशु मसीह रे पास्से का मैहर, दया, अते सान्ति मिले।

### आखरी नमस्कार

16 मकिदुनिया जांदे बेल्ले में तिजो इफिसुस बिच रुकणे ताई बोलेया थिय्या, मैं फिरी उस्सी गल्ल जो दोहराणा लगेया। ताकि तू तिच्चे किच्छ महुआं जो झूठी सिक्सा दैणे का, 17 झूठी कहाणियां अते लम्बी वंशावलियां पर जे सिरफ लड़ाई-झगड़े जो बढ़ान्दी, अत्ते परमेश्वर री उस योजना जो पूरा नी होणे दिंदी, जे विस्वास पर टिके री है, रोकी सके। 18 इस गल्ल रा मतलब एह है कि साफ मन, सही-गलत री समझ अत्ते सच्चे विस्वास का प्यार पैदा हो।

# 1 तीमुथियुस

## अभिवादन

1 किच्छ महु ता इन्हा गल्लां का भटकी गेरे हिन अत्ते बेकार रे झमले बिच फस्सी गेरे हिन। 2 से नियमां रे विधान रे गुरू ता बनणा चाहन्दे, अपण जे किच्छ से बोलेया करदे हिन या जिन्हा गल्लां पर से जोर देया करदे हिन, तिन्हा जो सैह तक नी समझी पाया करदे हिन।

### झूठे शिक्षकां रे खलाफ भविष्यवाणी

3 अवे असी एह जाणदे हिन कि जे कोई नियमां रे विधान रा सही तरिके कने इस्तेमाल करदा, ता नियम खरे हिन। 4 इस सच्चाई जो जाणी करी कि नियम भले अत्ते नेक लोकां ताई नी बल्कि उद्वण्डां, पापियां, भिद्वेयां, माँ-प्यो जो मारणे वाळे, अत्ते खून करणे वाळे, 5 ब्याहतेरी जनानी कने रिश्ता रखणे वाळे, बगेर ब्याहतेरी जनानी कने सारीरिक रिश्ता बनाणा, महुआं जो बेचणे वाळे, झूठे, अते झूठी कसम खाणे वाळे, अत्ते इन्हेरे अलावा जे खरी सिक्सा रे खिलाफ हिन तिन्हा ताई है। 6 ऐई सिक्सा परम धन्य परमेश्वर री महान-महिमा रे शुभ-बसेख रे साहब कने है अत्ते तिस जो मेरे हवाले कित्तेया है। 7 मैं, म्हारे प्रभु यीशु मसीह रा सुकर करदा। मिंजो उन्हा ने ई सक्ति दित्ती। तिन्हा ने मिंजो विस्वास रे लायक समझी करी अपणी सेवा पर लाया। 8 बल्कि मैं पैले ता उन्हेरी बुराई करणे वाळा, तंग करणे वाळा अत्ते बेरही कने कम्म करणे वाळा महु थिय्या, अपण फिरी बी मेरे पर दया होई, किजोकि मैं एह सब विस्वास नी करणे री नासमझी री वजह कने करदा थिय्या। 9 अते प्रभु री दया मेरे पर बड़ी होई, अत्ते कने से विस्वास अत्ते प्यार बी जे यीशु मसीह बिच है। 10 एह गल्ल सच्च अते हर तरह कने मनणे रे लायक है कि यीशु मसीह पापियां रा उद्वार करणे ताई इस धरती पर आये, अत्ते उन्हा बिच का मैं सब का बड्डा पापी है। 11 इधरे ताई ता मेरे पर दया किती गेई कि यीशु मसीह मिंजो सब का बड्डे पापी बिच अपणा पूरा सवर दिखान, कि जे महु तिन्हा पर अमरता ताई विस्वास करणे तिन्हा ताई मैं आदर्श बणू।

### अनुग्रह ताई धनवाद

12 अवे जुगा-जुग रा राजा-मतलब कदी खत्म नी हूणे वाळा अणदिख्खे इको-इक परमेश्वर रा आदर अते महिमा हमेसा ताई हुन्दी रेहू। आमीन॥ 13 ओ मेरे पुत्र तीमुथियुस, भविष्यवाणी करणे वाळे रे वचनां रे साहब कने बडे पैले का ई तेरे बारे बिच जे भविष्यवाणी होई गेई थी, मैं तिजो एह हुकम दिंदा, ताकि तू तिन्हा रे साहब कने, 14 विस्वास अते सही-गलत री समझ कने नेकी री लड़ाई लड़ी सकन। किच्छ इदेय हिन जिन्हेरी सही-गलत जो समझणे री समझ अत्ते विस्वास खत्म होई गेरा है। 15 इन्हा बिच का हुमिनयुस अते सिकन्दर हिन, जिन्हा जो मैं सैतान रे हवाले करी दित्तेया ताकि तिन्हा जो परमेश्वर री बुराई नी करणे रा पाठ सिखाया जाये। 16 सबका पैले मैं एह सिक्सा दिंदा कि मिन्तां, प्रार्थना, दरख्वास, अत्ते सुकर सब महुआं ताई कित्ते जान। 17 खास करी राजे अत्ते सब ऊँचे पद वाळे अधिकारियां ताई, ताकि असी चैन अत्ते सांति कने, पूरी श्रद्धा अत्ते परमेश्वर रे अगे इज्जत कने पूरी जिंदगी जी सकन। 18 एह म्हारे उद्वारकर्ता परमेश्वर जो अच्छा लगदा अत्ते खरा बी है। 19 से एह चाहन्दे हिन कि सब महुआं रा

उद्वार हो, अते सच्च जो जाणे। 20 किजोकि परमेश्वर इक ई है अते परमेश्वर अत्ते महुआं रे बीच इक ई जरिया है, मतलब यीशु मसीह, जे महु है।

### अराधना रे बारे बिच सलाह दैणा

2 जिन्हा ने अपु जो सब री फिरौती री रकम ताई देई दित्तेया है, अत्ते इसेरी गवाई सहई बेले पर दित्ती। 2 मैं सच्च बोलदा, झूठ नी बोलदा, मिंजो इसेरी गवाई रा प्रचार करणे, बसेख दैणे वाळा दूत अत्ते होर जाति रे लोकां ताई विस्वास अत्ते सच्चाई री सिक्सा दैणे ताई चुणेया गेरा है। 3 इधरे ताई मैं चाहन्दा कि हर जगह मडद, बगेर गुस्सा अते मन-मुटाव रे, पवित्र हत्थां जो चुकी करी प्रार्थना करन। 4 तिहय्यां ई जनानियां का बी मैं चाहन्दा कि से बी हया अत्ते सीद्ध-सादे सही कपडेया कने अपू जो त्यार करन। से बाळ बणाणे या सूत्रे, मोतियां या किमती कपडेयां कने नी, 5 बल्कि अपू जो खरे कम्मां कने त्यार करन एह तिन्हा जनानियां जो शोबा दिंदा जे अपू जो परमेश्वर री भक्तिणी बोलदी हिन। 6 हर इक जनानी जो चुपचाप अत्ते पूरी आज्ञाकारिता कने सिक्सा जो सिखणा चहिंदा। 7 मैं एह नी चाहन्दा कि जनानी मडद जो सिखाये पढाये या तिस पर राज करन। बल्कि तिस जो ता चुपचाप रैह्ला चहिंदा। 8 किजोकि आदम पैले बणाया गेया थिय्या अत्ते तिसेरे बाद हव्वा जो। 9 आदम बहकावे बिच नी आया, अपण जनानी बहकाई बिच आईकरी कसुरवार होई। 10 अपण जनानियां, जे से सवर कने विस्वास, प्यार ते पवित्रता बिच बणी रेहू ता बच्चा जमणे रे जरिये तिस जो उद्वार मिलणा। 11 ऐ गल्ल सच्च है कि जेहडा अध्यक्ष बनणा चाहन्दा, से भले कम्म री चाहत करदा है। 12 ऐ जरूरी है कि अध्यक्ष बेगुनाह, ते इक्क ई जनानी रा लाड़ा, संयमी, सुसील, सभ्य, मैह्वान-नवाजी करणे वाळा, ते सखाणे अन्दर निपुण हो। 13 पियक्कड़ या मार-कुट्ट करणे वाळा ना होनु; अपण नरम हो, ते नां लड़ाका, ते नां ई पैसे रा लालची हो। 14 अपणे घरे रा अच्छा इंतजाम करदा हो, ते अपणे बाल-बच्चेयां जो सारी गम्भीरता कने अधीन रखदा हो। 15 जां कोई अपणे घरे रा ई इंतजाम करणा नी जाणदा हो, ता परमेश्वर री कलीसिया री दिख-रिख किह्यां करणा ?

### कलीसिया बिच अध्यक्ष (बिशप)

3 फिरी ऐ कि से नोआ चेला नां हो, इह्यां नां हो कि घमण्ड करी के सैह्तान साहई सजा भुगतो। 2 ते बाह्या वाळ्यो अन्दर बी तिसेरा मना तन्ना हो, इह्यां नां हो कि निन्दित होई करी सैह्तान रे फां अन्दर फसी जाओ। 3 तिह्यां ई दासां जो बी गम्भीर होणा चाहिन्दा, दुर्गं, पियक्कड़ ते नीच कमाई रे लालची नां होन; 4 अपण भरोस्से रे भेद जो सुध विवेक कने सम्भाळी करी रखन। 5 ते ऐ बी पैले परखे जान, तां अगर बेगुनाह निकळन ता दास रा कम्म करनु। 6 इह्यां ई जनानियां जो बी गम्भीर होणा चहिन्दा; इल्जाम लाणे वाळ्यो नां होन, अपण सचेत होन अते सबनी गल्लां अन्दर भरोस्से जोगी होनु। 7 सेवक इक्क ई जनानी रे लाडे होन ते निके-निकेयां अते अपणे घरां रा खरा इन्तजाम करणा जाणदे होनु।

## कलीसिया बिच सेवक (डीकन)

8 किजो की जेहड़े दास रा कम्म खरी रीत कने करी सकदे, से अपु ताई खरी पदवी ते तिस भरोस्से अन्दर जेहड़ा मसीह यीशु जी पर है, बड़ी हिम्मत पाई लिन्दे। 9 में तेरे का जल्दी ईणे री आस रखणे पर बी ऐ गल्लां तिजो इधेरे ताई लिखदा, 10 कि अगर मेरे ईणे अन्दर देर हो, ता तू जाणी लेयो कि परमेश्वर रे घराने अन्दर जे जीन्दे परमेश्वर री कलीसिया है ते जेहड़ा सच रा खम्बा ते नीं है, कुदेह्या बरताव करणा चहिन्दा। 11 इस अन्दर कोइ सक नी है कि भगती रा भेद गम्भीर है, मतलब कि, से जेहड़ा सरीर अन्दर प्रकट होया, आत्मा अन्दर धरमी ठैहैया, स्वर्गदूतां जो लिब्बैया, होरसी जाती अन्दर तिसेरा प्रचार होया, जगत अन्दर तिस पर भरोस्सा कित्तेया गया, ते महिमा अन्दर उप्पर चुकेया गया। 12 अपण आत्मा साफ साफ बोलदा कि ईणे वाळे बेलेयाँ अन्दर कितणे मल्लु भटकाणे वाळी आत्मां ते बुरी आत्मां री सिक्सां पर मन लाई करी विस्वास बैहकी जाणे हिन्। 13 ऐ तिन्हा झूठे मल्लुआं रे कपट री वजह कने होणा, जिन्हेरा सबर मनो फुकीदि लोहए कने दाग्योया गेरा है।

## महान रहस्य

14 जिन्हा ने बियाह करणे का रोकणा, ते खाणे वाळी किछ चिज्जां का परहेज करणे ताई हुक्म दैणा, जिन्हा जो परमेश्वर ने इधेरे ताई सृजेया कि विस्वासी ते सच जो पछियानणे वाळे तिन्हा जो सुकर करी के खान। 15 किजो कि परमेश्वर री बणाई गेरी हर इक चीज खरी है, ते कोई बी चीज नकारणे जोगी नी है; अपण ऐ कि सुकर करी के खाई जाओ, 16 किजो की परमेश्वर रे वचन ते प्रार्थना रे जरिए सुद्ध होई जान्दी।

## झूठे शिक्षक

4 अगर तू भ्याळां जो इन्हा गल्लां री सुधी दुआन्दा रैहणा, ता तैं मसीह यीशु जी रा खरा दास ठैहणा; ते भरोस्से ते तिस खरे उपदेस री गल्लां कने, जेहड़ी तू मनदा आएरा है, तेरा पालन-पोसण हुन्दा रैहणा। 2 अपण असुद्ध ते बुड्डियाँ साहई री काहियाँ का बखरा रैह; ते भक्ति री साधना कर। 3 किजो कि सरीर री साधना कने घट्ट फाएदा हुन्दा, अपण भती सबनी गल्लां ताई फाएदेमन्द है, किजो कि इस बेले रे ते ईणे वाळी जिन्दगी री बी प्रतिज्ञा इसेरे ई ताई है। 4 ऐ गल्ल सच ते हर तरहा कने मनणे जोगी है। 5 किजो की असी मैहत्त ते यत्न इधेरे ई ताई करदे कि असा री आस तिस जीन्दे परमेश्वर पर है, जेहड़े सबनी मल्लुआं रा ते निज करी के विस्वासियाँ रा उद्धार करणे वाळा है।

## मसीह यीशु जी रा अच्छा सेवक

6 इन्हा गल्लां रा हुक्म दे ते सरखान्दा रैह। 7 कोई तेरी जुआत्री जो तुछ्छ ना जानण; अपण वचन, ते चाल-चलन, ते प्यार, ते भरोस्सा, ते पवित्रता अन्दर विस्वासियाँ ताई नमूना बणी जा। 8 जां ताई मैं नी आं, तां ताई पढन ते उपदेस दैणे अते सखाणे अन्दर लौलीन रैह। 9 तिस वरदान रे प्रति जेहड़ा तेरे अन्दर है, ते भविष्यवाणी रे जरिए बजुर्गा रे हथ्थ रखदे बेले तिजो मिलेया थिया, बेफिकर मत रैह। 10 इन्हा गल्लां जो सोचदा रैह ते इन्हा अन्दर ई अपणा ध्यान लाई रख, ताकि तेरी उन्नती सबनां पर जाहिर हो। 11 अपणी ते अपणे उपदेस री चौकसी रख। इन्हा गल्लां पर पक्का रैह, किजो कि अगर इह्याँ करदा रैहन्गा ता तैं अपणे ते अपणे सुनणे वाळेयाँ ताई बी उद्धार री वजह होणा। 12 कुसकी बुड्डे जो ना बक,अपण तिसजो प्यो समजी करी समजाई दे,ते जवानां जो भाई समजी करी; 13 बुड्डि जनानियां जो माँ समजी करी ते जवान औरतां जो पुरी पवित्रता कने भैण समजी करी समजाई दे। 14 तिन्हा विधवा जनानियां रा,जे सच बिच विधवा हिन,इज्जत कर। 15 जे कुसकी विधवा रे बच्चे या नाती-पोते होण तां से पैले अपणे इ घराने कने भक्ति रा बताव करण,ते अपणे माँ-प्यो जो तिन्हेरा हक दैणा सिखण किजो की ए परमेश्वर जो पसद आदां। 16 जे सच बिच विधवा है,ते तिसेरा कोइ नी,से परमेश्वर पर उम्मीद रखदी,ते रात-दिन मिन्नत ते प्रार्थना बिच लौईन रैहन्दी।

## विश्वासियां ताई जिम्मेदारियां

5 अपण जे भोग-विलास बिच पेइ गी,से जिन्दे जी मरी गे री हिन्। 2 इन्हा गल्लां रा बी हुक्म देया कर ताकी से बेगुनाह रैहण। 3 अपण जे कोइ अपणेया री ते खास करी अपणे घराने री फिकर ना करे,तां से भरोसे का मुकरी गे रा है ते अविस्वासी का बी बूरा बणी गे रा है। 4 तिसी विधवा रा नां लिखखेया जाए जे साठ साल का घट ना हो,ते इक्क इ लाड़े री लाड़ी रेइ हो। 5 ते खरे कम्मां बिच खरे नां वाळी रेइ हो,जिनिये बच्चेयां रा पालन-पोषण कित्ते रा हो; मेहमानां री सेवा कित्ते री हो पवित्र लोकां रे पैर धोए रे हो,दुखियां री मदद कित्ती री हो ते हर इक्क भले कम्म बिच मन लाया हो। 6 अपण जवान विधवां रे नां मत लिखदे,किजोकी जां से मसीह रा विरोध करी के सुख-विलास बिच पेइ जादीं तां ब्याह करण न चाहंदि, 7 ते दोसी ठेहरदी, किजो कि तिन्हा ने अपणे पैले भरोसे जो छड्डि दिते रा है। 8 ईसेरे कने इ से घरे-घरे फिरी करी आलसी होणा सिखी जादीं,ते सिर्फ नी पर बक-बक करदी रैहन्दी ते दुजेयां रे कम्मां बिच हत्थ बी पादीं ते गलत गल्लां बोलदी। 9 ईधेरे ताई मैं ए चाहदां की जवान विधवा ब्याह करण,ते बच्चे पैदा करे ते घर-बार सम्भाळे ते कुसकी विरोधी जो बदनाम करणे रा मोक्कां ना दे। 10 किजो कि किछ ता बेहकी करी सैतान रे पिच्छे होइ चुकी री हिन्। 11 जे कुसकी भरोसे करणे वाळी रे इत्ते विधवां होण,ते से इ तिन्हेरी मदद करे कि कलिसीया पर भार ना हो,ताकी से तिन्हेरी मदद करी सकण जे सच बिच विधवा हिन। 12 जे मुखिया खरा इतंजाम करदे खास करी के से जे वचन सुनाणे ते सखाणे बिच मेहनत करदे,दो गुणा इज्जत रे जोगे समजे जाण। 13 किजो कि पवित्रशास्त्र बोलदा,“जोतणे वाळे बैल रा मुँह मत बनदे,”किजोकी“मजदूर अपणी मजदूरी रा हकदार है।” 14 कोइ इल्जाम कुसकी मुखिया पर लाया जाए ता बिना दो या त्रै गुआइ दैणे वाळेयां रे तिसजो ना सुन। 15 पाप करणे वाळे जो सारेयां रे सामणे समजाई दे,ताकी होर लोक बी डरण। 16 परमेश्वर,ते मसीह यीशु ते चुणे रे स्रगदुतां जो सामणे समजी करी मैं तेरे जो चेतावणी दिदां की तु मन खोलि करी इन्हा गल्लां जो मन्नेया कर,ते कोइ कम्म पक्षपात कने मत कर। 17 कुसकी पर तोळे हत्थ मत रखदा,ते दुजेयां रे पापा बिच हिस्से मत लिदां; अपु जो पवित्र बणाई रख। 18 भविष्य बिच सिर्फ पाणी पिणे वाळा इ आदमी है अपण अपणे पेट रे ते बार बार बमार होणे री वजह कने दाखरस बी कम्म बिच लाया कर। 19 किछ लोकां रे पाप सामणे आइ जादें ते ईसांफ ताई पैले का पुजी जादें अपण किछ रे पिच्छे का आदें। 20 तियां इ भले कम्म बी सामणे आदें; ते जे इदेय नी हुदें,से बी लुकी नी सकदे। 21 जिन्ने गुलामी रे जुए रे थल्ले हिन,से अपणे-अपणे माळक जो इज्जत रे जोगे समजे,ताकी परमेश्वर रे नां ते उपदेस री बेज्जती ना हो। 22 जिन्हेरे माळक विस्वासी हिन् तिन्हा जो से भाई होणे रे वजह कने बेकार ना समजे,बल्कि तिन्हेरी होर बी सेवा करण किजोकी इस कने पैदा लैणे वाळे विस्वासी ते प्यार करणे वाळे हिन,इन्हा गल्लां रा उपदेस करेया कर ते समजादां रेय। 23 जे कोइ होर तरिके रा उपदेस दिदां ते खरी गल्लां जो,मतलब असां रे प्रभू यीशु मसीह जी री गल्लां जो ते तिस उपदेस जो नी मनदा जे भक्ति रे हसाब कने है, 24 तां से घमंडी होइ गया,ते किछ नी जाणदा बल्कि तिसजो बैहस ते समजां री बेहसबाजी करणे री बमारी है जिस कने डाह,झगड़े ते बेज्जती री गल्लां,ते बुरे-बुरे शक, 25 ते तिन्हा लोकां बिच बेकार रे झगड़े पैदा हुदें जिन्हेरी समज बगडी गे री है ते से सच का बी हटी गे रे हिन जे समजदे की भक्ति कमाई रा तरिक्या है।

6 अपण सतांश कने भक्ति बड्डि कमाई है। 2 किजोकी ना असी दुनिया बिच लेइ करी आए रे हिन ते ना लेइ जाई सकदे।

## झूठी शिक्षा ते धन रा लालच

3 जे असां का खाणे ते लागे जो हो तां इन्हा बिच इ खुस रैहणा चाएदा। 4 अपण जे धनी होणा चाहदें से एसी परिक्षा ते फदें ते बड़ी सारी बेकार ते नुक्सानदेह लालचां बिच फसी जादें,जे म्हणुआं जो बिगाडी दिदीं ते खातमे रे समुंदर बिच डुबाई दिदीं। 5 किजोकी रुपया रा लालच हर तरिके री बुराईयां री जड़ है,जिसजो पाणे री कोसीस करदे-करदे मते जणेया ने विस्स्वास का

भटकी करी अपु जो मते तरिके रे दुखां का जख्मी करी लिक्ते रा है। 6 अपण हे परमेश्वर रे म्हणु तु इन्हा गल्लां का न्हस,ते धर्म,भक्ति,विस्वास,प्यार,धीरज ते नम्रता रा पिच्छा कर। 7 विस्वास री खरी कुस्ति लड ते तिस हमेसा री जिन्दगी जो हासिल करी ले जिसेरे ताई तु सद्येया गया ते मते सारे गुआइ दैणे वाळे रे सामणे खरा मन्नेया थिया। 8 मै तेरे जो परमेश्वर जो,जे सारेयां जो जिन्दा रखदे,ते मसीह यीशु जी जो गुआह समजी करी के जिन्हा ने पिन्तुयुस पिलातुस रे सामणे खरा मन्नेया,ए हुकम दिदां 9 कि तु असां रे मसीह प्रभु यीशु जी जे आणे तिकर इस गल्ल जो बेगुनाह ते साफ रख 10 जिसजो तिनिये ठीक वेले पर दखाणा जे सबका जादा खरा ते इक्क ओ इक्क अधिपती ते राज्ञेयां रे राजा,प्रभुआं रे प्रभु हिन् ,

### तिमुथियुस जो खास सलाह

11 ते अमरता सिर्फ तिन्हेरी इ है ते से अगम्य रौसनी बिच रहन्दे ते ना तिन्हा जो कुसकी म्हणुने दिख्खेया ते ना कदी दिखी सकदा।तिन्हेरे प्रतिष्ठा ते राज हमेसा-हमेसा तिकर रहणा।आमीन। 12 इस दुनिया रे अमीर लोक्कां जो हुकम दे कि से घमंडी ना होण ते चंचल धन पर उम्मीद ना रखण अपण

परमेश्वर पर जे असां रे सुख ताई सारा किछ मते जादा दिदें। 13 से भलाई करण,ते भले कम्मां बिच धनी बनण,ते उदार ते मदद दैणे बिच हमेसा तयार रहण, 14 ते आगे ताई इक्क खरी नीं पाइ रख्खे कि सच्ची जिन्दगी जो बस बिच री लेण। 15 हे तिमथियुस,इस धरोहर री रखवालि कर,ते जिस ज्ञान जो ज्ञान बोलणा इ भूल है तिसरे गन्दे बकवाद ते विरोध री गल्लां का परे रेह। 16 किन्ने इस ज्ञान जो मन्नि करी भरोसे का भटकी गे रे हिन्।तुसां पर अनुग्रह हुदां रेह। 17 पौलुस रे पास्से का जे परमेश्वर री मर्जी कने यीशु मसीह रा बसेख दैणे वाळा दूत है, मतलब उस जिंदगी रे वायदे रे साहब कने जे यीशु मसीह बिच है, 18 प्यारे पुत्र तीमुथियुस रे नां पिता परमेश्वर अते असा रे प्रभु यीशु मसीह रे पास्से का तिजो मैहर, दया अते सान्ति मिले। 19 मैं अपनी प्रार्थना बिच रात-दिन लगातार तिजो याद करदा ते परमेश्वर रा सुकर करदा, जिस परमेश्वर री सेवा मै अपणे पित्रां रे तरिके कने सही ते गलत री समझ कने करदा। 20 अते तेरे आँसुआँ जो याद करी-करी के मेरी बड़ी मर्जी हून्दी कि तेरे कने मिलौं अत्ते मेरी खुसी रा ठिकाणा ना रेह। 21 मैं तेरे सच्चे विस्वास जो बी याद करदा, जे पैले तेरी नानी लोइस, अते तेरी माँ यूनिके बिच थिय्या, अते मिंजो पक्का विस्वास है कि से तेरे बिच बी है।

## 2 Timothy

### अभिवादन

1 इधरे ताई में तिजो याद दिलाया करदा है कि परमेश्वर रे उस वरदान री ज्वाला जो जलाई रखख जे तिजो ताँ मिल्लेया थिय्या जाँ तेरे पर में हत्थ रखखेया थिय्या। 2 किजोकि परमेश्वर ने असा जो जे आत्मा दित्ती है, से असा जो कायर नी बणान्दी बल्कि असा जो प्यार, सवर अत्ते सक्ति कने भरी दिंदी।

### धनवाद ते प्रोतसाहन

3 इधरे ताई तू म्हारे प्रभु री गवाई दैणे का, ना मेरे का, जे उसेरा कैदी है, हिचक मत, बल्कि परमेश्वर ने जे सक्ति तिजो दित्ते री है, उस ताई शुभ-बसेख ताई मुसिबतां झेलने बिच मेरा साथ दे। 4 उस्सी ने म्हारी रक्षा कित्ती है अत्ते पवित्र जिंदगी ताई असा जो सद्देया है, अत्ते एह असा रे कम्मा रे साहब कने नी, बल्कि अपणे ई मकसद अत्ते दया रे साहब कने जे यीशु मसीह बिच शुरू का ई म्हारे पर होई, 5 अपण अवे असा रे उद्धारकर्ता यीशु मसीह रे सामणे आणे रे जरिये पता लगगेया, जिस ने मौत जो खत्म कित्तेया अत्ते शुभ-बसेख रे जरिये जिंदगी अत्ते हमेसा री जिंदगी जो प्रकाशित कित्तेया। 6 इस्सी शुभ-बसेख जो फैलाणे ताई मिंजो इक प्रचारक, बसेख दैणे वाळा दूत अत्ते इक गुरू रे रूप बिच चुणेया गेरा है। 7 अत्ते ऐई वजह है मैं एह सब दुख भोगदा, फिरी बी मैं शर्मन्दा नी किजोकि जिस पर मैं विस्वास कित्तेया है, मैं उस जो जाणदा अत्ते मैं एह मंदा कि उन्ने जे मेरे हवाले कित्तेया है, से उसेरी रक्षा करणे बिच उस दिन ताई (फुटनोट- मतलब वह दिन जब यीशु मसीह सब लोगो का न्याय करने के लिये आएका और अपने साथ रहने के लिये ले जायेगा।) सक्तिसाली है। 8 जे खरे वचन तू मेरे का सुणे, तिन्हा जो उस विस्वास अत्ते प्यार बिच, जे यीशु मसीह बिच है, अपणा आदर्श बणाई रखख। 9 पवित्र आत्मा रे जरिये, जे असा बिच बसे रा है, उस कीमती गल्ल जो संभाळी रखख जिस जो तेरे हवाले कित्तेया गेरा है। 10 जिय्याँ कि तू जाणदा से सब जे एशिया बिच हिन, मिंजो छड्डी गेरे हिन, फुगिलुस अत्ते हिरमुगिनेस उन्ही बिच का हिन। 11 उनेसिफुरुस रे टब्बर बिच प्रभु दया करन, किजोकि तिन्हा ने बत्तेरे मौकेयां पर मिंजो सुख दित्तेया, अत्ते तिस ने मेरे जेला रेके कने बेजत महसुस नी कित्तेया। 12 बल्कि जाँ से रोम बिच आया थिय्या, ता बड़ी कोसिसा रे बाद मेरे कने मिल्लेया थिय्या। 13 प्रभु करन कि उस रोज तिस जो प्रभु री दया मिल्लो- अत्ते जे- जे सेवा तिस ने इफिसुस बिच कित्ती हिन, तिन्हा जो तू खरे तरिके कने जाणदा। 14 इधरे ताई ओ मेरे पुत्र, तू तिस अनुग्रह कने जेहड़ा यीशु मसीह अन्दर है, ताकतवर होई जा। 15 ते जेहड़ी गल्लां तैं मेरे का मते गवाहां रे सामणे सुणेरी हिन, तिन्हा जो विस्वासी मल्लुआं जो सोंपी दे; जेहडे होरनां जो बी सखाणे रे लायक होन। 16 मसीह यीशु रे खरे योद्धा साई मेरे कने दुख सैह। 17 जिस बेल्ले कोई योद्धा लड़ाई पर जान्दा, ता इधरे ताई कि अपणे भरती करणे वाळे जो खुस करो, अपु जो दुनियावी कम्मां अन्दर नी फसांदा। 18 फिरी अखाड़े अन्दर लड़णे वाळा अगर विधि रे साबबे ना लड़ो, ता तिस जो मुकट नी मिलदा।

### मसीह यीशु जी रा वफादार सिपाई

2 जेहड़ा गृहस्थ मैहन्त करदा, फळ रा हेस्सा पैल्ले तिस जो मिलणा चाहिन्दा। 2 जे मैं बोलदा, तिस पर ध्यान दे ते प्रभु ने तिजो सबनी गल्लां अन्दर समझ दैणी। 3 यीशु मसीह जो याद रख, जेहड़ा दाऊद रे वंस का होया, ते मरी गेरेयाँ बिच का जीन्दा होई गया; ते एह मेरी जरिए लिखखेरी खुसखबरी रे साबबे है। 4 जिसेरे ताई मैं बुरे कम करणे वाळेयाँ साई दुख सैह करदा, होर ता होर, कैद बी है; अपण परमेश्वर रा वचन कैद नी है। 5 इस वझा कने मैं चुणेरे मल्लुआं ताई सब किछ सैहन्दा, कि से बी तिस उद्धार जो जेहड़ा मसीह यीशु अन्दर है, अनन्त महिमा समेत हासिल करन। 6 एह गल सच्च है कि अगर असी तिस कने मरी गेरे हिन ता तिस कने जीन्दे बी होणा है। 7 अगर असी सबर कने सैह करदे रैहन्ने, ता तिस कने राज बी करगे: अगर असी तिसेरा इनकार करगे ता तिनिए बी असां रा इनकार करणा। 8 अगर असी भरोसा नी करणे वाळे बी होन ता बी से भरोसे जोग्गा बणी रैहन्दा, किजोकी से अपु अपणा इनकार नी करी सकदा। 9 इन्हा गल्लां री सुध तिन्हा जो दुआ, ते प्रभु रे सामणे चिताई दे, कि सब्दां पर तरक-बितरक मत करेया करो, जिस कने कोई फाएदा नी हुन्दा; अपण सुनणे वाळे बिगडी जान्दे। 10 अपु जो परमेश्वर जो ग्रैह्ण होणे रे लाएक ते इदेह्या कम करणे वाळा ठैहाणे री कोसिस कर, जेहड़ा सरमिन्दा ना होए, ते जेहड़ा सच्चाई रे वचन जो सही रीती कने कम्मा अणदा होए। 11 अपण असुध अपवाद का बची रेह्याँ; किजोकी इदेह मल्लुआं ने होर बी जादा अभन्ति अन्दर बधदे जाणा। 12 ते तिन्हेरा वचन सडेर जखम साई फैलदा जाणा; हुमिनयुस ते फिलेतुस तिन्हा बिच का ई हिन। 13 जेहड़ा एह बोली करी कि, पुनरुत्थान होई गेरा है, सच्चाई का भटकी गेरे हिन, ते कितणेयाँ रे भरोसे जो उलटा-पुलटा करी दिन्दे।

### बदिया कारीगर

14 ताँ बी परमेश्वर री पक्की नीं बणी रैहन्दी, ते तिस पर एह छाप्पा लगेरा है, कि प्रभु अपणेयाँ जो पछियाणदे; ते जेहड़ा कोई प्रभु रा नां लिन्दा, से अधरम का बची रेहो। 15 बड़डे घरा अन्दर नां सिरफ सोन्ने-चान्दी रे ई, अपण काठ रे मिट्टी रे भान्डे बी हुन्दे; कोई-कोई इज्जत अत्ते कोई-कोई बेइज्जती ताई। 16 अगर कोई अपु जो इन्हा कने सुध करणा, ता से इज्जत रा भान्डा, ते पवित्र ठैहाणा; ते मालक रे कम्मा ईणा, ते हर नेक कम ताई तियार रैह्ला। 17 जुआन्नी री मरजियाँ का न्हस्स; ते जेहडे सुध मन कने प्रभु रा नां लिन्दे, तिन्हा कने धरम, ते भरोसा, ते प्यार अत्ते मेल-मलाप रा पिच्छा कर। 18 अपण बेवकूफी ते अविद्या रे विवादां का बखरे रैह; किजोकी तिजो पता है कि तिन्हा कर्न लड़ाइयाँ हुन्दियाँ। 19 अत्ते प्रभु रे दास जो लड़ाका नी होणा चाहिन्दा, अपण सबनां कने नरम अत्ते सिक्सा अन्दर निपुण, ते सैहसील होणा चाहिन्दा। 20 ते जेहडे विरोध करणे वाळे हिन, तिन्हा जो निम्ता होई करी समझाओ, के पता परमेश्वर तिन्हा जो मन बदलणे री सोच देई देन, कि से बी सच्चाई जो पछियाणी जान। 21 ते इसेरे जरिए तिसेरी मरजी पूरी करणे ताई सचेत होई करी सैहतान रे फंदे का छुटि जाओ। 22 पर ए याद रख कि आखर रे दिनां



अन्दर मुस्कल बेल्ले ईणे। 23 किजो कि मल्लु मतलबी, लालची, डींगा मारणे वाळे, घमण्डी, निन्दा करणे वाळे, मां-प्यो रा हुक्म टाळणे वाळे, कृतघ्न, अपवित्र है, 24 बेरैहा, माफ नी करणे वाळे, इल्जाम लागे वाळे, बेसबरे, सख, भले रे दुस्मण, 25 धोखेवाज, ढीठ, घमण्डी, ते परमेश्वर रे नी अपण सुखविलास रे ई चाळे वाळे होणे। 26 तिन्हा ने भक्ति रा भेस ता पाएरा होणा, अपण तिसेरी ताकत जो नी मनणा; इदेह्याँ का दूर रेह्।

### आखरी दिनां बिच अधर्म

3 इन्हा बिच का ई से मल्लु हिन् जेहडे घरां अन्दर दबे पैरां कने घुसडी आन्दे, ते तिन्हा कमजोर जनानियाँ जो वस अन्दर करी लिन्दे जेहडी पापां कने दबित्तेरी ते हर तराह् री मरजियाँ रे बस अन्दर हिन्, 2 ते हमेसा सिखदी ता रैहिन्याँ अपण सच्च री पछियाण ताई कदी बी नी पुजदियाँ। 3 जिह्याँ यन्त्रेस ते यन्त्रेस ने मूसा रा वरोध कित्तेया थिया, तिह्याँ ई ऐ बी सच्च रा वरोध करदे; एह् इदेह् मल्लु हिन्, जिन्हेरी बुद्धी भ्रस्ट होई गेरी है ते से भरोस्से रे बारे अन्दर रोहळे होई गेरे हिन्। 4 अपण से इस का अग्गे नी बधी सकदे, किजो की जिह्याँ तिन्हेरी अज्ञानता सबनी मल्लुआं पर जाहिर होई गेरी थी, तिह्याँ ई इन्हेरी बी होई जाणी। 5 अपण तें उपदेस, चालचलन, मनसा, भरोस्सा, सैहसीलता, प्यार, सबर, ते तंग कित्ते जाणे, ते दुख सैह् अन्दर मेरा साथ दित्तेया; 6 ते इदेह् दुखां अन्दर बी जे अंताकिया ते इकुनियुम ते लुस्त्रा अन्दर मेरे पर पेरे थिये, ते होर दुखां अन्दर बी जेहडे में चुक्करे हिन्; अपण प्रभु जी ने मिन्जो तिन्हा सबनी का छुड़ाई लिक्तेया। 7 अपण जितणे मसीह यीशु जी अन्दर भक्ति कने जीन्दगी जीणा चाहदे से सारे तंग कित्ते जाणे; 8 पर बुरे ते बैहकाणे वाळे धोखा दिन्दे-दिन्दे ते धोखा खान्दे-खान्दे, बिगडदे चली जाणा। 9 अपण तू तिन्हा गल्लां पर जेहडी तें सिखखेरी हिन् ते भरोस्सा कित्तेरा है, ऐ जाणी करी पक्का बणी रैह् कि तें तिन्हा जो कुन्हा मल्लुआं का सिखखेरा है,

### तिमुथियुस जो खास निर्देश

10 ते बचपन का पवित्र सास्त्र जो तू जाणदा, जेहडा तिजो मसीह जी पर भरोस्सा करणे कने उद्धार हासल करणे ताई अक्कल-मन्द बनाई सकदा। 11 सारा रा सारा पवित्र-सास्त्र परमेश्वर री प्रेरणा कने रचेया गेरा है ते उपदेस, ते समझाणे, ते सुधारणे, ते धरम री सिक्सा ताई फाएदेमन्द है, 12 तां कि परमेश्वर रा जन सिद्ध बणो, ते हर इक भले कम्म ताई तत्पर होई जाओ। 13 अपण आत्मा साफ साफ बोदा कि ईणे वाळे बेल्लेयाँ अन्दर कितणे मल्लु भटकाणे वाळी आत्मां ते बुरी आत्मां री सिक्सां पर मन लाई करी भरोस्से कने बैहकी जाणे हिन्। 14 ऐ तिन्हा झूठे मल्लुआं रे कपट री वजाह् कने होणा, जिन्हेरा सबर मन्त्रो फुकींदे लोहए कने दाग्गेया गेरा है। 15 जिन्हा ने बियाह् करणे का रोकणा, ते खाणे वाळी किछ चिज्जां का परहेज करणे ताई हुक्म दैणा, जिन्हा जो परमेश्वर ने इधेरे तांइ सृजेया कि विस्वासी ते सच्च जो पछियानणे वाळे तिन्हा जो सुकर करी के खान। 16 किजो कि परमेश्वर री सृजी गरी हर इक चीज खरी है, ते कोई बी चीज नकारणे जोगी नी है; अपण एह् कि सुकर करी के खाई जाओ 17 किजो कि परमेश्वर रे वचन ते प्राथना रे जरिए सुद्ध होई जान्दी।

4 जे तू भ्याळां जो इन्हा गल्लां री सुधी दुआन्दा रैहगा, ता तें मसीह यीशु जी रा खरा दास ठैहणा; ते भरोस्से ते तिस खरे उपदेस री गल्लां कने, जेहडी तू मनदा आएरा है, तेरा पालन-पोसण हुन्दा रैह्ला। 2 मै खरी कुस्ति लडी बैठे रा है, मै अपणी दौड परी करी लिक्ती री है, मै भरोसे री रखवाळी कित्ते री है। 3 भविष्य बिच मेरे ताई धर्म रा से मूकूट रखखे रा है, जिसजो प्रभु, जे धर्मी ते ईसांफ करणे वाळा है, ने मेरे जो तिस दिन दैणा, ते मेरे जो इ नी अपण तिन्हा सारेयां जो बी जो तिन्हेरे वापिस आणे जो खरा समजदे। 4 मेरे का तौळे आणे री कोसीस कर। 5 किजो कि देमास ने इस दुनिया जो प्यार मन्नि करी मेरे जो छड्डी दित्ते रा है ते थिस्सलुनिके जो चली गे रा है। क्रैसकेसं गलातिया जो ते तीतुस दरमतिया जो चली गे रा है। 6 सिर्फ लूका मेरे कने है, मरकुस जो लेइ करी चली आ; किजो कि सेवा ताई से मेरे बडे कम्म रा है। 7 तुखिकुस जो मै इफिसुस जो भेजे रा है। 8 जे बागा मै त्रोआस बिच करपुस रे इत्ते छड्डी आए रा है, जां तू आए ते तिसजो ते कताबां खास करी कर चमडे पर लिखखे री चिठियां लेइ आए।

### व्यतिगत सदेश

9 सिकदंर ठिठेरे ने मेरे कने बडी बुराईयां कित्ते री हिन्; प्रभु ने तिसजो तिसेरे कम्मां रे हसाब कने बदला दैणा। 10 तू बी तिसका सावधान रे, किजोकी तिसने असां री गल्लां रा बडा विरोध कित्ते रा है। 11 पैले बार मेरे बचाव बिच कुसकी ने मेरा साथ नी दिता बल्कि सारेयां ने मेरे जो छड्डी दित्ते रा थिया, भला हो कि इसेरा तिन्हेरे जो लेखा ना दैणा पे! 12 अपण प्रभु मेरे मदद करणे वाळे रेय ते मेरे जो ताकत दिक्ती, तां कि मेरे जरिये पुरा पुरा प्रचार हो ते सारे अन्यजातिय ए सुणी ले। मै शेर रे मुँह का छुड़ाया गया। 13 ते प्रभु ने मेरे जो हर इक्क बुरे कम्मां का छुड़ाणा, ते अपणे स्वर्गिय राज बिच ठीकठाक पुजाणा। तिन्हेरी इ महीमा हमेसा-हमेसा तिकर हुदीं रे। आमीन। 14 प्रिसका ते अक्विला जो उनेसिफुरुस रे घराने जो नमस्कार। 15 इरासतुस, कुरुन्थियुस बिच रेइ गया, ते त्रुफिमस जो मै मिलेतुस बिच बमार छड्डी रा है। 16 सर्दियां का पैले आणे री कोसीस कर। युबुलुस, ते पूदंस, ते लिनुस ते क्लोदिया ते सारे भाइयां रा तेरे जो नमस्कार। 17 प्रभु तेरी आत्मा कने रेय। तुसां पर अनुग्रह हुदा रेह्। 18 पौलुस री तरफ का, जे परमेश्वर रे चुणे रे लोकां रे विस्वास अत्ते सच्चाई रे उस ज्ञान ताई भक्ति रे हिसाब कने परमेश्वर रा भक्त ते यीशु मसीह रा बसेख दैणे वाळा दूत है-

### आखरी अभिवादन

19 एह् मै इधेरे ताई बोलेया करदा है कि परमेश्वर रे चुणे रे मल्लुआं जो जे हमेसा री जिंदगी री उस आस बिच हिन् जिसेरा वादा परमेश्वर ने, जे कदी झूठ नी बोलदे, अनादि काल का कित्तेया है, 20 अपणे अवे सही बेल्ले परमेश्वर ने अपणे ई वचन जो उस प्रचार रे जरिये सामणे लियाया है, जे म्हारे उद्धारकर्ता परमेश्वर रे हुक्म रे हिसाब कने मेरे हवाले कित्तेया गया है। 21 म्हारे बराबर विस्वास बिच मेरे सच्चे पुत्र तीतुस जो, म्हारे परम-पिता परमेश्वर अत्ते उद्धारकर्ता यीशु मसीह री तरफ का दया अत्ते सांति मिले। 22 मै क्रेते बिच तिजो इधेरे ताई छडडेया थिय्या कि तित्ते जे बाकी रेहई गेरा है, तिस जो ठीक-ठाक करी दे अते मेरे हुक् रे हिसाब कने हर सैहर बिच सियाणे मल्लुआं जो चुण।

# तीतुस

## अभिवादन

1 तिन्हा जो ताई चुणेया जे से बेकसुर हो। अत्ते इक ई लाडी वाले होणे चहिंदे। तिन्हेरे बच्चे विस्वासी होणे चहिंदे अत्ते बेलगाम अत्ते बागी ना हो। 2 किजो कि धार्मिक गल्लां सिखाणे वाले परमेश्वर रा कम्म करणे ताई बेकसुर होणा चहिंदा; से ना ता जिद्दी, चिडचिडा, अत्ते ना शराब पीणे वाळा हो, ना मार-कुटाई करणे वाळा, अत्ते ना ई गलत कम्मां री कमाई रा लालची हो, 3 अपण परोणे री इज्जत सत्कार करणे वाळा हो, भलाई चाळे वाळा हो, समझदार, सही-गलत री समझ हो, भक्त अत्ते अपणे पर तिस जो काबू हो। 4 से उस विस्वास करणे लायक वचन पर मजबूत रेह जिसेरी उस जो सिक्सा मिले री है, ताकि से विरोध करणे वालेयां रा मूंह बंद करी सके।

### क्रेते बित तितुस रा कम्म

5 एह इधरे ताई जरूरी है किजोकि बड़े मल्लू खिलाफ होई करी बेकार री गल्लां बणाई करी दूजेयां जो भटकाई दिंदे। मैं खास कर तिन्हा जो बोलेया करदा है जिन्हेरा खतना होई गेरा है। 6 तिन्हेरा मूंह ता बंद ई कित्तेया जाणा चहिंदा। किजो कि जे गल्लां नी सिखाणे वाळी हिन्, तिन्हा जो सिखाई करी घर रे घर तोडी दिंदे, किजो कि से गलत रस्तेयां पर चली करी पैसे कमाणे ताई इदेया करदे हिन्। 7 इक क्रेते रे रेहे वाले ने अपणे मल्लूआं रे बारे खुद बोलेया, “क्रेते रे मल्लू हमेसा झूठ बोलदे, से जंगली जानवर हिन, आलसी ते भूखाना हिन्।” 8 एह गल्ल सच है, इधरे ताई तिन्हा जो खरा करी समझा ताकि तिन्हेरा विस्वास पक्का होई जाये। 9 अत्ते से यहूदियां री पुराणी कहाणियां पर अत्ते उन्हा मल्लूआं रे हुक्मां पर, जे सच्चाई का भटकी गेरे हिन, कोई ध्यान मत दो। 10 सुचे मल्लूआं ताई सब चीजा सुची हिन्, अपण भिड्ठा अत्ते जिन्हा बिच विस्वास नी है, उन्हा ताई किच्छ बी सुचा नी है, बल्कि उन्हेरी अक्कल अत्ते सही-गलत री समझ दोनो भिड्ठी हिन्। 11 से परमेश्वर जो जानणे रा दावा करदे। अपण तिन्हेरे कम्म दिखांदे कि से तिस जो जाणदे ई नी। से नफरत करणे अत्ते हुक्मां जो तोडने वाले हिन् अत्ते कुसी बी खरे कम्म करणे रे लायक नी हिन्। 12 अपण तू इदेहई गल्लां बोलेया कर जेहडी खरी सिक्सा जोगी होन्। 13 मतलब कि बुड्डे मल्लू सचेत ते गम्भीर ते सबर वाले होन्, ते तिन्हेरा भरोस्सा ते प्यार ते सबर पक्का हो। 14 इहाँ ई बुहड्डी जनानियाँ रा चाल-चलन खरे मल्लूआं साहई हो; से इल्जाम लागे वाळी ते पियकड नां होन्, अपण खरी गल्लां सखाणे वाळी होन्। 15 ताकि से जुआन जनानियाँ जो सचेत करदी रेह कि अपणे लाडे ते निके-निकेयाँ कने प्यार रखन; 16 ते सबर वाळी, पतिव्रता, ते घरे रा कमकाज करणे वाळी, भली, ते अपणे-अपणे लाडे रे अधीन रेहे वाळियाँ होन्, ताकि परमेश्वर रे वचन री नीन्दा नां हो।

### आचरण ताई शिक्षा

2 इहाँ ई जुआन मुंडेयाँ जो बी समझाया कर कि से सबर वाले होन्। 2 सबनी गल्लां अन्दर अपु जो खरे कम्मां रा नमूना बणान। तेरे उपदेस अन्दर सफाई, ते गम्भीरता, 3 ते इदेहई खराई पाई जाओ कि कोई तिस जो बुरा नां बोली सको, जिस कने दुस्मण असा पर कोई इल्जाम लागे रा मोक्का

नी पाई करी सरमिन्दा होन्। 4 नोकरां जो समझा कि अपणे-अपणे मालक रे अधीन रेह, ते सबनी गल्लां अन्दर तिन्हा जो खुस रखन, ते हटी कोई जवाब ना देन; 5 चोरी चलाक्की नां करन, अपण हर तरिके कने पूरे विस्वासी निकळन कि से सब गल्लां अन्दर असा रे उद्धार करणे वाले परमेश्वर रे उपदेस री सोभा बधान। 6 किजो कि परमेश्वर री दया साहाणे है, जेहडा सबनी मल्लूआं रे उद्धार री वजह है, 7 ते असां जो खबरदार करदा कि असी अभक्ति ते दुनियावी चाहत का मन फेरी करी इस जुग अन्दर सबर ते धरम ते भक्ति कने जीन्दगी जीन; 8 ते तिस धन्न आस री मतलब कि अपणे महान परमेश्वर ते उद्धार करणे वाले यीशु मसीह जी री महिमा जाहिर होणे री भाळ करदे रेह। 9 जिनि एपु जो असा ताई देई दित्तेया कि असां जो हर तरहा रे अधरम का छुड़ाई लेयो, ते सुद्ध करी के अपणे ताई इक इदेहई जात बणाई लेयो जेहडी भले-भले कम्मां अन्दर सरगरम हो। 10 पूरे हक्क कने ऐ गल्लां बोल, ते समझान्दा ते सिखान्दा रेह। कोई तिजो हल्का नां समझो। 11 लोक्कां जो समझा की हाकमां ते अधिकारियां रे निहटे रेह, ते तिन्हेरे हुक्मां जो मनण, ते हर इक्क म्हणु हर खरे कम्म करणे ताई हर वेले तयार रेया। 12 कुसकी जो बदनाम ना करण, लडाके ना बनण; अपण नरम सभाव रे होण, ते सारे लोक्कां कने बडी नरमी कने रेहण। 13 किजो कि असी बी पैहले नासमज, गल्ल ना मनणे वाले, ते भरम बिच पे रे ते हर तरिके री इच्छा ते सुख वलास री गुलामी बिच थिये, ते नफरत करणे, ते खुन्दक खाणे बिच जिन्दगी गुजारदे थिये, ते गन्दे थिये, ते इक्क दुए कने दुस्मणी रखदे थिये। 14 अपण जां असां रे छुड़ाणे वाले परमेश्वर री किरपा ते प्यार म्हणुआं रे सामणे आया। 15 तां तिन्हा ने असां रा छुटकारा कित्तेया; ते ए धर्म रे कम्मां री वजह कने नि होया, जे असां कित्ते, अपण अपणी दया रे मुताबक नौये जिन्दगी रे स्नान, ते पवित्रात्मा रे नौये बणाणे रे जरिए असां जो होया।

### मसीहि चालचलन

3 जिसजो तिन्हाने असां रे छुड़ाणे वाले यीशु मसीह रे जरिए असां पर बधि-चढ़ी करी असां ताई कित्ता। 2 जिस कने असी तिन्हेरी दया कने धर्मी होई करी हमेसा री जिन्दगी रे वारस होन्। 3 ए गल्ल सच है, ते मैं ए चाहदां की तुसी इन्हा गल्ला रे बारे बिच डटी करी बोले इस ताई जिन्हा ने परमेश्वर पर भरोसा कित्तेया, ते खरे खरे कम्मां बिच लगे रेहणे रा ध्यान रखन्। ए गल्लां खरी ते म्हणुआं रे फेदे री हिन्। 4 अपण नासमझी री बैहसबाजि, ते वशांवली, ते ब्रोहद, ते झगडेयां का जे व्यवस्था रे बारे बिच हिन्, बची रेहो; किजो कि से नाकामयाब ते फजूल हिन्। 5 कुसकी पखण्डि जो इक्क-दो बारी समजाई करी तिसका अलग रे, 6 ए सोचि करी की इदेया म्हणु भटकी गे रा है, ते अपणे आप जो गलत ठेहराई करी पाप करदा रेहन्दा। 7 जां मैं तुसां का अर्तिमास ते तुखिकस जो भेजां तां मेरे का निकुपुलिस आणे री कोसीस करे किजोकी मैं तिते ई सर्दियां कटणे रा फैसला कित्ते रा है। 8 जेनास व्यवस्थापक ते अप्पुलोस जो कोसीस करी के अगे पुजाई देयो, ते दिखखो की तिसजो कुसकी चीज रा घाट्टा ना हो। 9 अपणे लोक बी जरूरतां जो पुरा करणे ताई खरे कम्मां बिच लगी रेहणा सिखण ताकी नाकामयाब ना रेहण। 10 मेरे सारे साथियां रा तिजो नमस्कार। जे भरोसे री

वजह कने असां कने प्यार रखदे, तिन्हा जो नमस्कार। तुसां पर अनुग्रह हुदां रेह्यो। <sup>11</sup> पोलुस रे पासे का जे प्रभु यीशु जी रा कैदी है, ते भाई तिमथियुस रे पासे का म्हारे साथी फिलेमोन ।

#### व्यक्तिगत निर्देश ते अभिवादन

<sup>12</sup> ते भैण अफियुस कने म्हारे साथी योद्ध अरखिप्पुस कने फिलेमोन रे घरे री कलीसिया रे ना। <sup>13</sup> म्हरे पिता परमेश्वर कने प्रभु यीशु मसीह जी रे

पासे का दया ते सान्ति मिलदी रे । <sup>14</sup> में तेरे तिस प्यार कने विसवास री गल सुणी करी, जे सारे पवित्र लोकां पर ते कने प्रभु यीशु जी पर है । <sup>15</sup> में हमेसा परमेश्वर जी रा धन्यवाद करदा रैन्दा; ते अपणी प्रार्थना बिच बी चेता करदा रैन्दा ।

# फिलेमोन

## अभिवादन

1 कि तेरा विसवास अन्दर हिसेदार होणा तुसा री सारी भलाई री पहिचाण प्रभु यीशु जी ताई असरदार हो । 2 किजो कि भाई जी मिन्जो तुसां रे प्यार कने बड़ी खुशी ते सान्ति मिलदी , कि तुम्हारे कने पवित्र मल्लुआ रे मन हरे भरे होई गे । 3 इधेरे ताई मिन्जो मसीह जी अन्दर हिम्मत ता है, कि जेड़ी गल ठिक है तिसेरा हुक्म तिजो देयां ।

### फिलेमोन रा प्यार ते भरोसा

4 तां बी मिन्जो पोलुस जो जे अबे प्रभु यीशु जी ताई कैदी आ, ये होर बी खरा लगेया कि प्यार कने मिन्नत करां । 5 मै अपने बच्चे उनेसिमस ताई जे मेरे का कैद अन्दर जम्मेया तेरे कने मिन्नत करदा । 6 से ता पैहले कुसी कम रा नी थिया, पर अवे से मेरे ते तेरे दोनो ताई बडे कम रा है । 7 तिसी जो मतलब जे मेरे दिले रा टुकड़ा ए , मै तेरे का तिस जो हटाई दिता ए ।

### उनेसिमस ताई निवेदन

8 तिस जो मै अपने का रखणा चान्दा था कि तरे पासे का इस कैद अन्दर जे समाचार रि वजह कने मेरी सेवा करो । 9 पर मै तेरी मर्जी रे बगैर किछ बी नी करना चाया किजो कि तेरी ये कृपा दबाब कने नी पर खुसी कने हो । 10 किजो कि क्या पता से इस वजह कने थोड़े वक्त ताई इधरे ताई तेरे का अलग होए रे होण हो कि से हमेसा ताई तेरे इ नेडे रेयां 11 पर अबे नौकर सेई नी, पर दास का बी बधी कने मतलब की भाई रे समान रिह जे सरीर अन्दर बी ते खास करी के प्रभु अन्दर मेरा प्यारा हो । 12 जे अगर तु मिन्जो अपने कने कम करणे वाळा समझदा ता, तिस जो इयां ग्रहण कर जियां कि मिन्जो । 13 ते अगर तिस ने किछ तेरा नुकसान कित्तेरा है, या सेरे ना पर किछ बी उधार आन्दा ता से मेरे ना पर लिखी ले । 14 मै पोलुस अपने हथ कने

लिखदा कि, मै अपु इ तिस जो भरी दिगां ; इसेरी बोलणे री कोई जरूरत नियो कि मेरा कर्ज जे तेरे पर है से तु इ है । 15 हे भाई मिन्जो ये खुसी प्रभु बिच तेरी तरफ का मिले : मसीह जी बिच मेरे मन जो हरा भरा करी दे । 16 मै तेरे हुक्म मनणे पर भरोसा करी के, तिजो लिखदा कने जाणदा बी, कि जे किछ मै तिजो बोलदा तु इस का बधी करी के करदा है । 17 ते ये बी है कि मेरे उतरणे री जगह बी तैयार रख; मिन्जो उमेद है कि तुसाम री प्रार्थना री वजह कने मै तुसां का आई जाणा । 18 इपफ्रास जे मसीह यीशु जी अन्दर मेरे कने कैद है । 19 ते मरकुस कने अरिस्तर्खुस देमास, लुका जे मेरे कने कम करणे वाळे हिन् इन्हा रा तिजो नमस्कार । 20 म्हारे प्रभु यीशु जी अनुग्रह तुम्हारी आत्मा पर हुन्दा रे आमिन । " 21 पैले का ई परमेश्वर ने भविष्यवाणी करणे वाळ्यां रे जरिये बब-दाद्रेयां कने घड़ी-घड़ी ते हर तरह री गल्लां करी के । 22 इन्हा आखिर रोजां बिच म्हारे कने अपने पुत्र रे जरिये गल कित्ती है, जिस जो तिन्हा ने सारी चीजां रा वारस रखेया अत्ते तिसेरे ई जरिये उन्हा ने पूरी दुनिया जो रचेया बी ।

### आखरी अभिवादन

23 से तिन्हेरी महिमा री लौ, अते तिन्हेरे तत्व री छाप है, अते सब चीजां जो अपनी सक्ति रे वचना कने संभाळदे हिन। सब जो पापां का छुटकारा देई करी से उस महामहिन रे सजे पास्से बेई गया। 24 इस तरिके से स्वर्गदूतां का उतणा ई भला बणी गया जितणा कि तिन्हेरे नां का से नां भला है जितणा तिन्हा ने उन्हा का बडे पद रा वारस होईकरी पाया है। 25 किजो कि परमेश्वर ने स्वर्गदूतां बिच का कधाड़ी कुसकी जो एह बोलेया, "तू मेरे पुत्र है, अज तू मेरे का पैदा होया ? अते फिरी एह, "मै तिसेरा पिता होणा, अते से मेरा पुत्र होणा ?"

# इब्रानियों

## परमेश्वर रा वचन, पुत्र रे जरिये

1 अते जां से अपणे जेठे निक्के जो दुनियां बिच भेजदे हिन् ता बोलदे हिन्, परमेश्वर रे सब स्वर्गदूत तिस जो झुकी करी नमस्ते करन। 2 अत्ते स्वर्गदूतां रे बारे बिच से बोलदे हिन्, "तिन्हा ने अपणे स्वर्गदूतां जो हवा बणाया, अते अपणे सेवकां जो अग्ग री लपटां बणाया।" 3 अपण अपणे पुत्र रे बारे बिच से बोलदे हिन्, "ओ परमेश्वर तेरा सिंहासन हमेसा- हमेसा ताई रा है, अत्ते तुम्हारे राज्य रा राजदण्ड न्याय रा राजदण्ड है। 4 तुसी ने धार्मिकता कने प्यार अते अधर्म कने नफरत किन्ती। इस वजह कने परमेश्वर, तेरे परमेश्वर ने तिजो चुणी लेया, अते उस आदर री खुसी दिन्ती है। तिजो तेरे साथियां का बढीकरी दिन्तेया।

### परमेश्वर रे पुत्र री श्रेष्ठता

5 अते "ओ प्रभु जी, सुरुआत बिच ई तुसी ने धरती री नीय्यां पाई अते अम्बर तुम्हारे हत्थां री कारीगरी है। 6 तिन्हा ता खत्म होई जाणा, अपण तुसी ने बणी रेह्ला, अते तिन्हा कपडेयां साहई पुराणे होई जाणा। 7 अते तुसा ने तिन्हा जो चादर साहई लपेटणा, अते तिन्हा कपडेयां साहई बदली जाणा। अपण तुसी सेहई हिन् अते तुसा रे बेले रा अंत नी होणा।" 8 अते स्वर्गदूतां बिच का तिन्हा जो कथाडी बोलेया, "जाँ ताँई मैं तेरे दुसमणा जो तेरे पैरा हेठ री चौकी नी बणाई दिंदा, तू मेरे सजे प्रासे बैह ?" 9 के से सब, उद्धार पाणे वाळेयां ताई सेवा करणे ताई भेजी गेई आत्मां नी हिन् ? 10 इधरे ताई, म्हारे जो चहिंदा कि जे किच्छ असां ने सुणेया, तिस पर होर गहराई कने ध्यान दें, इह्य्यां ना हो कि असी तिस का भटकी जाओ। 11 किजो कि जे एह वचन स्वर्गदूतां रे जरिये बोलेया गया मजबूत सिद्ध होया, अते हर इक अपराध अते हुकम नी मनणे रा ठीक ठीक बदला मिलेया, 12 ता असी इदेय बडे उद्धार जो नजरंदाज करी के किह्य्यां बची सकदे? जिसेरी चर्चा पैले का ई प्रभु रे जरिये होई, अते जिन्हा ने सुणेया थिय्या, तिन्हा ने म्हारे ताँई पुष्टि किन्ती। 13 अते कने ई परमेश्वर ने निसानियां, हरान करणे वाळे चमत्कार अते अण-दिख्खे कम्मा अते अपणी मर्जी रे साहब कने पवित्र आत्मा रे वरदानां रे जरिये इसेरी गवाई दिन्ती। 14 तिन्हा ने तिस आणे वाळे जुग जो जिसेरी चर्चा असां करेया करदे हिन्, स्वर्गदूतां रे नीचे किन्तेया।

### महान छुटकारा

2 बल्कि कुसकी ने एह गवाई दिन्ती है, "महू कै है कि तू तिस जो याद करदा ? या महू कै है, कि तू उसेरी फिकर करदा ? 2 तुसां स्वर्गदूत का उस जो थोड़े ई बेले जो थोड़ा घट किन्तेया। तुसां तिस पर महिमा अते आदर रा मुकुट रखेया ते तिस जो अपणे हत्थां रे कम्मा पर हक दिन्तेया। 3 तुसां सब किच्छ तिन्हेरे पैरा हेठ करी दिन्तेया।" इधरे ताँई सब किच्छ तिन्हेरे नीचे करी के, तिस ने किच्छ बी नी रखेया, जे तिन्हेरे नीचे ना हो। अपण हले ताँई सब किच्छ तिन्हेरे नीचे नी दिख्खदे। 4 अपण असी एह दिखदे कि से यीशु जी जो जिन्हा जो थोड़े बेले ताँई स्वर्गदूतां रे नीचे करी दिन्तेया थिय्य किजो कि उस ने मौत री मुसबित झेली थी। ताकि परमेश्वर री दया री वजह कने से हर इक महू ताँई मौत रा स्वाद चखन।

### असां रा छुड़ाणे वाळा

5 किजो कि जिसेरे ताँई अत्ते जिसेरे जरिये सब किच्छ है, उसेरे ताँई एह सही थिय्या कि बडे सारे पुत्रां जो महिमा बिच लियाणे ताँई उन्हेरे उद्धार रे कर्ता जो मुसबितां झलणे रे जरिये बेकसुर करन्। 6 किजो कि पवित्र करणे वाळा अते पवित्र होणे वाळे सब इक ई परिवार रे हिन्, इस्सी वजह कने से तिन्हा जो भाई बोलणे बिच नी शर्मिन्दा। 7 तिन्हा ने बोलेया, "मैं अपणे भाइयां बिच तेरा नां प्रचार करणा, सभा रे बिच मैं तेरे नां री बड्याई करणी। 8 अते फिरी, "मैं तिस पर अपणा विस्वास रखणा।" अते एह बी, "दिख्ख, मैं अते एह बचे बी जे परमेश्वर ने मिंजो दिन्ते हिन्।" 9 इधरे ताँई जां बचे मांस अते खून रे साझी थिय्ये, इधरे ताँई से बी उन्हेरी मानवता बिच साझी होई गया ताकि अपणी मौत रे जरिये से तिस जो मतलब सैतान जो खत्म करी सकन जिसेरे का मारणे री सक्ति है। 10 अते जितणे मौत रे डर रे मारे जिंदगी भर गुलामी बिच फसे रे थिय्ये, तिन्हा जो छुड़ाई लेंन। 11 किजोकि एह ता पक्का है कि से स्वर्गदूतां जो नी बल्कि अब्राहम रे खानदान जो संभाळदे हिन्। 12 इधरे ताँई उस जां हर तरह कने भाइयां साहई बणाया ताकि से परमेश्वर री सेवा बिच दरदयाळू अत्ते विस्वास रे लायक सबका बड्डा परोहट बणी सके। अत्ते महूआं जो उन्हेरे पापां री माफी दुआणे ताँई बलि देई सकन। 13 जबकि तिस ने खुद परख री हालत बिच दुख भोगेया, ता से तिन्हेरी बी मदद करी सकदे, जिन्हेरी परख हुन्दी। 14 इधरे ताँई मेरे पवित्तर भाइयां, तुसा जे स्वर्गीय बुलावे बिच साझी हिन्, अपणा ध्यान यीशु जी पर रखो जिस जो असी प्रेरित अत्ते सबका बड्डा परोहट मनदे हिन्। 15 जिह्य्यां परमेश्वर रे पूरे टब्बर बिच मूसा विस्वास रे लायक थिय्या, तिह्य्यां ई यीशु जी बी, जिन्हे तिस जो चुणे रा थिय्या तिस परमेश्वर रे अगे विस्वास लायक थिय्ये। 16 किजो कि से मूसा का बढी करी महिमा रे लायक समझे गे हिन्, जितणा कि घर बनाणे वाळा खुद घर का बढी करी आदर पांदा। 17 किजो कि हर घर रा कोई ना कोई घर बनाणे वाळा हुन्दा, अपण जिस ने सब किच्छ बणाया से परमेश्वर है। 18 मूसा ता तिन्हेरे पूरे टब्बर बिच सेवक साहई विस्वास रे लायक थिय्या, से उन्हा गल्ला रा गवाह थिय्या जे भविष्य बिच परमेश्वर रे जरिये बोली जाणी थी।

### यीशु जी मुसा का श्रेष्ठ

3 अपण परमेश्वर रे घराने बिच इक मसीह विस्वास करणे रे लायक है जे असी अपणी अत्ते उस उमेद बिस्वास जो बणाई दिंदे हिन् ता असी ई उसेरा टब्बर हिन्। 2 इधरे ताँई जिह्य्यां पवित्र आत्मा बोलदा, जे अज्र तुसी उसेरी अवाज सुणो, 3 ता अपणे मन जो इदेय सख्त मत करो, जिह्य्यां बण बिच परख रे दिनां बणा बिच तिन्हा ने मिंजो गुस्सा दुआई करी किन्तेया थिय्या। 4 जिते तुसां रे पित्रां ने मिंजो जाँचेया परखेया अते चाळी सालां ताँई मेरे कम्म दिख्खे। 5 इस वजह कने मैं तिस बेले रे महूआं का नराज थिय्या, अते फिरी मैं बोलेया थिय्या, 'इन्हेरे मन हमेसा भटकदे रेहन्दे हिन्, अते

इन्हा ने मेरे रस्ते जो नी पछाणेया। 6 तां मैं गुस्से बिच आईकरी कसम खाई, 'तिन्हा मेरे अराम बिच शामिल नी होणा।' 1

### भरोसा ना करणे वालेयां ताई चेतावनी

7 ओ भाईयो, दिखदे रेह्यो कि तुम्हारे मन बिच पाप अत्ते अविस्वासी नी हो जे तुम्हारे जो जिदे परमेश्वर का दूर नी करी दो। 8 जाँ ताई अज़र रा रोज बोलेया जांदा, तुसी दिन व दिन इक दूज़े री हिम्मत जो बद्धान्दे रेयो, कुदखी इय्यां ना हो कि तुम्हारे बिच का कोई पाप रे धोखे बिच पेईकरी जड़ नी बणी जाओ। 9 जे असी आखिरी तक हठी होई करी अपणे सुरु रे विस्वास जो पकड़ी रखदे ता असी मसीह रे साझी बणी जाँदे हिन्, जे असा अपणे पैन्हे भरोसे पर आखिर ताई दृढ़ता कने मजबूत रेह। 10 जिह्य्यां कि बोलेया गया है, "जे अज़र तुसी उसेरी अवाज सुणो, ता अपणे मना जो सख्त मत करो, जिह्य्यां कि गुस्सा दुआणे रे बेल्हे कित्तेया थिय्या।" 11 भला से कुण थिय्ये जिन्हा ने सुणेया अत्ते बगावत कित्ती? कै से, सेहई नी थिय्ये जिन्हा जो मूसा ने मिस्त्र का बचाई करी निकाळेया थिय्या? 12 से चाळी सालां ताई कुसका गुस्सा रेह्या ? कै उन्हा पर जिन्हा ने पाप कित्तेया थिय्या अत्ते तिन्हेरी लासां बजर जगह बिच पेरी थी ? 13 तिन्हा ने कुस कने कसम खाई कि तुसां मेरे अराम बिच नी आई पाणा ? कै उन्हा कने जिन्हा ने हुकम नी मन्नेया ? 14 इधेरे ताई असी दिखदे हिन् कि अविस्वास री वजह कने से नी जाई सके। 15 इधेरे ताई जां कि उसेरे अराम बिच जाणे रा वादा हल्ले ताई बणे रा है ता म्हारे जो सावधान रेह्ला चहिंदा, इह्य्यां ना हो कि पता लगे कि तुसां बिच का कोई रेहई जाओ। 16 किजोकि असा जो तिन्हेरे ई साहई शुभ-बसेख री सिक्सा दिती गेरी है, अपण जे वचन तिन्हा ने सुणेया से तिन्हेरे ताई फजुल थिय्या। किजोकि तिन्हा ने जां सुणेया ता इस जो विस्वास कने नी अपनाया। 17 अत्ते असा जिन्हा ने विस्वास कित्तेया, तिस अराम बिच जाई सकदे, जिह्य्यां कि प्रभु ने बोल्या है, "जिय्यां कि मैं अपणे गुस्से बिच कसम खाई, से मेरे अराम बिच नी आई पाणे।" जा दुनियां री सुरुआत बिच तिन्हेरा कम्म होई गेरा थिय्या। 18 किजो कि उस ने सतमें रोज रे बारे बिच कुदखी इय्यां सास्त्र बिच लिखे रा है, "परमेश्वर ने सतमें रोजे अपणे सब कम्मां का अराम कित्तेया," 19 अत्ते फिरी एह बी बोलेया: "से मेरे अराम बिच नी आई पाणे।"

### परमेश्वर रे लोकां रा अराम

4 जबकि किच्छ मल्लुआं जो इस बिच जाणा ई है, अत्ते जिन्हा ने पैन्हे उसेरा शुभ-बसेख सुणेया थिय्या, से हुकम नी मनणे री वजह कने नी जाई सके, 2 इधेरे ताई से फिरी इक रोज मतलब "अज़र रा रोज" पक्का कित्तेया। जिय्यां कि पैन्हे बोलेया थिय्या, किच्छ सालां बाद दाऊद रे जरिये परमेश्वर ने उस रोज रे बारे सास्त्र बिच बोलेया थिय्या, "जे अज़र तुसी उसेरी अवाज सुणो, ता अपणे मन सख्त सख्त मत करो।" 3 किजो कि जे यहोशु तिन्हा जो अराम दित्तेया हुन्दा, ता से इसेरे बाद आणे वाळे कुसकी होर रोज री चर्चा नी करदा। 4 इधेरे ताई परमेश्वर रे मल्लुआं ताई सब्त् रा अराम बचे रा है। 5 किजो कि जे कोई बी परमेश्वर रे अराम बिच चली गेरा है, से बी अपणे कम्मां का बसां करी बैठे रा है जिय्या कि परमेश्वर ने कित्तेया है 6 इधेरे ताई असी बी तिस अराम बिच जाणे ताई हर कोसिस करन, ताकि उन्हा साहई हुकम नी मन्नी करी तिन्हेरा बिनाश होई जाओ। 7 किजो कि परमेश्वर रा वचन जिंदा है, असरदार अत्ते कुसकी बी दोधारी तलवार का पैना है। से आत्मा अत्ते प्राण, जोड़ां अत्ते चर्बी, दोनां रे वारपार छेदी रखदा अत्ते मना री इच्छा अत्ते विचारा जो परखदा है। 8 जिस जो असी लेखा-जोखा दैणा है, उसेरी नजर का किच्छ बी लुके रा नी है। उसेरी अख्खां रे सामणे सब किच्छ खुला अत्ते नंगा है। 9 इधेरे ताई किजो कि परमेश्वर रा पुत्र यीशु जी इक इदेय महान सबका बड्डे परोहत्त हिन्, जे स्वर्गा बिच का होई करी गे हिन् ता असा जो अपणे अंगीकार जो मजबूती कने पकड़ी रखणा चहिंदा। 10 किजो कि असां का जे बड्डा परोहत्त है, से इदेया नी जे म्हारी कमजोरी बिच असा कने दुखी नी हो, बल्कि से सब गल्लां बिच असां साहई परखे ता गे, तां बी से पाप रे बगेर निकळे। 11 इधेरे ताई आओ असी भरोसे कने दया पाणे ताई परमेश्वर रे

सिंहासन रे पास्से बढन ताकि जरूरत पैणे पर असां री मदद ताई असी दया अत्ते मैहर जो पाई सकन। 12 किजो की हर इक बड्डा परोहत्त मल्लुआं बिच का लित्तेया जान्दा, ते मल्लुआं ई ताई तिन्हा गल्लां रे बारे अन्दर जेहडी परमेश्वर कने संबन्ध रखदि, ठैहाया जान्दा कि भेंट ते पाप बली चढाया करन। 13 ते से अज्ञानां ते भुले भटकेयां रे कने नरमी कने व्यवहार करी सकदा, इधेरे ताई कि से अप्पु बी कमजोरी कने घिरे रा है।

### बड्डा महायाजक

14 ते इधेरे ताई तिस जो चाहिदा कि जिह्यां मल्लुआं ताई, तिह्यां ई अपु ताई बी पाप-बली चढाया करन। 15 ते ऐ इज़त री पदवी कोई अप्पु नी लिन्दा, जां ताई कि हारून साहई परमेश्वर रे पास्से का ठैहाया जाओ। 16 तिह्यां ई मसीह जी ने बी बड्डा परोहत्त बनणे री बडाई अपण आप नी लित्ती, अपण तिस जो तिसी ने दिती, जिनिए तिन्हा जो बोलेया थिया, कि तू मेरा पुत्र है, अज़र मैं ई तिजो पैदा कराएरा है।

5 से दुज़ी जगह अन्दर बी बोलदा, तू मलिकिसिदक री रीत पर हमेसा ताई पुरोहत्त है। 2 तिनिए अपणे सरीर अन्दर रैह्ले रे रोजां अन्दर उच्ची अवाज अन्दर हक्का मारी मारी करी, ते आंसू रुहदाई रुहदाई करी तिस कने जेहडा तिस जो मोत का बचाई सकदा थिया, प्राथनां ते छन्दे कीत्ते ते भती री वजह कने तिसेरी सुणाई होई। 3 ते पुत्र होणे पर बी, तिन्हा ने दुख चुक्की-चुक्की करी हुकम मनणा सिखखेया। 4 ते सिद्ध बणी करी, अपणे सबनी हुकम मनणे वालेयां ताई सदा काल रे उद्धार री वजाह होई गया। 5 ते तिस जो प रे पास्से का मलिकिसिदक री रीत पर बड्डे परोहत्त री उपाधी मिली। 6 इस बारे अन्दर असां जो मती सारी गल्लां बोलणे जो हिन्, जिन्हेरा समझणा बी मुस्कल है; इधेरे ताई कि तुसी उच्चा सुनणा लगेरे हिन्। 7 बेल्हे रे साब्वे ता तुसा जो गुरु होई जाणा चाहिन्दा थिया, तां बी कै एह जरूरी है, कि कोई तुसां जो परमेश्वर रे वचनां री आदी सिक्सा दुबारा सखाओ ? ते इदेह होई गेरे हिन् कि, तुसां जो अनाज रे बदले अन्दर हल्ले ताई बी दुध ई चाहिन्दा। 8 किजो की दुध पीणे वाळे बच्चे जो ता धरम रे वचन री पछियाण नी हुन्दी, किजोकी से बच्चे हिन्। 9 अपण अनाज सियाणेयां रे ताई है, जन्हेरे ज्ञानेन्द्रीय अभ्यास करदे-करदे, भले बुरे अन्दर फरक करणे ताई पक्के होई गेरे हिन्। 10 इधेरे ताई आओ मसीह जी री सिक्सा री सुरु री गल्लां जो छड्डी करी, असी पूरा सही होणे री तरफ बधदे जान, ते मरे रे कम्मां का मन फेरणे ते परमेश्वर पर भरोस्सा रखवो।

### विश्वास का भटकी जाणे वालेयां रा अजांम

11 ते बपतिस्मे ते हथ्य रखणे, ते मरी गेरयां रे जीन्दे होई उठणे, ते आखरी न्याय री सिक्सा साहई नीं, दुबारा का नी पान। 12 ते जे परमेश्वर चाह्ल, ता असा ऐ ई करणा। 13 किजो की जिन्हा ने इक बरी जोत पाएरी है, जेहडे स्वर्गीय वरदान रा स्वाद चखी रखखेरे हिन्, ते पवित्र आत्मा रे भागी होई बैठेरे हिन्। 14 ते परमेश्वर रे उत्तम वचन रा ते ईणे वाळे जुगे री समर्था रा स्वाद चखी बैठेरे हिन्।

6 अगर से भटकी जान; ता तिन्हा जो मन बदलणे ताई फिरी नोआ बनाणा मुस्किल है; किजोकी से परमेश्वर रे पुत्र जो अपणे ताई फिरी क्रूस पर चढान्दे ते प्रकट अन्दर। तिस पर कलंक लगान्दे। 2 किजो कि जेहडी धरती बरखेया रे पाणी जो जेहडा तिस पर घड़ी घड़ी पैन्दा, पी पीकरी जिन्हा मल्लुआं ताई से -बाई जान्दियां, तिन्हेरे कम्म रा साग-पत्ते उगान्दी, से परमेश्वर का असीस पान्दे। 3 जे से झिल्लां ते ऊंटकारे उगान्दियां, ता नकम्मी ते स्रापित होणे पर है, ते तिसेरा अंत फुकेया जाणा है। 4 अपण ओ प्यारेयो, हालांकि असी ऐ गल्लां बोलदे तां बी तुसां रे बारे अन्दर असी इस का खरा ते उद्धार वाळी गल्लां रा भरोस्सा करदे। 5 किजो कि परमेश्वर अन्याय करणे वाळा नी है, कि तुसा रे कम्म, ते प्यार जो भुली जाओ, जे तुसां ने तिन्हेरे नां ताई इस रीत कने दस्सेया, कि पवित्र मल्लुआं री सेवा री, ते बलेया करदे हिन्। 6 अपण सी बडा चाहन्दे, कि तुसां बिच का हर इक जह्ला आखर बेल्हे ताई पूरी आस ताई इह्यां ई कोसिस करदा रेह। 7 ताकि तुसी आलसी नां होई जान; अपण तिन्हेरा अनुसरण करो, जेहडे भरोस्से ते सबर

रे जरिए प्रतिज्ञां रे वारिस हुन्दे। 8 ते परमेश्वर ने इब्राहीम जो प्रतिज्ञा दिन्दे बेल्ले जद कि कसम खाणे ताई कुस्की जो अपु का बड़ड़ा नी पाया, ता अपणी ई कसम खाई करी बोलेया, 9 कि मैं सच्ची अन्दर ई तिजो बड़ी जादा असीस दैणी, ते तेरी ओलादां जो बधान्दे जाणा। 10 ते इस रीत कने तिनि ए सबर करी के प्रतिज्ञा कित्तेरी गल्ल हासिल किती। 11 मल्लु ता अपणे का कुस्की बड़ड़े री कसम खाया करदे हिन् ते तिन्हेरे हर इक विवाद रा फँसला कसम कने पक्का हुन्दा। 12 इधेरे ताई जां परमेश्वर ने प्रतिज्ञां रे वारसां पर होर बी साफ रीत कने जाहिर करणा चाह्या, कि तिसेरी मनसा बदली नी सकदी ता कसम जो बिच अन्दर अन्देया।

### परमेश्वर री ना टलणे वाळा वादा

13 ताकि दो नी बदलणे वाळी गल्लां रे जरिए जिन्हेरे बारे अन्दर परमेश्वर रा झूठा होणा नामुमिकन है, असां री हिम्मत मजबूत होई जाओ, जे सरण लैणे ताई इधेरे ताई दौडे रे हिन्, कि तिस आस जो हासिल करन, जे सामणे रखेरी है। 14 से उमेद असां रे प्राण ताई इदेह्या लंगर है जे इक जगह पर टिके रा ते मजबूत है, ते परदे रे अन्दरा ताई पुजदा। 15 जिन्ते यीशु जी मलिकिसिदक री रीत पर हमेसा ताई रा बड़ड़ा पुरोहत बणी करी, असा ताई अगुए री रीत पर सामणे आएरा है। 16 अवे ऐ मलिकिसिदक शालेम रा राजा, ते परम प्रधान परमेश्वर रा पुरोहत, हमेसा पुरोहत बणी रहन्दा; जां इब्राहीम राजेयां जो मारी करी हटेया करदा थिया, ता इनि ए तिस कने मिली करी तिस जो असीस दिती। 17 इस जो ई इब्राहीम ने सबनी चीजां रा दसमां हेस्सा बी दिता; एह पैले अपणे नां रे मतलब रे साहब कने, धरम रा राजा अते फिरी शालेम मतलब सान्ति रा राजा है। 18 जिसेरा नां प्यो, नां अम्मा, नां वंसावली है, जिसेरे नां दिनां री सुरुआत है, ते नां जिन्दगी रा अंत है; अपण परमेश्वर रे पुत्र रे। 19 अवे इस पर ध्यान करो कि से कुदेह्या महान थिया जिस जो कुलपती इब्राहीम ने खरे का खरे लुट्टे रे माल रा दसमां हेस्सा दितेया। 20 लेवी रे बच्चेयां बिच का जेहडे याजक री पदवी हासल करदे, तिन्हा जो हुक्म मिलेरा है कि मल्लुआं, मतलब कि अपणे भ्याळां का चाहू ए से इब्राहीम रे ई सरीर का किजो नी जम्मेरे होन, व्यवस्था रे साबे दसमां हेस्सा लेन।

### मलिकिसिदक याजक

7 अपण इनि ए, जेहडी तिन्हेरी वंस रा बी नी थिया, इब्राहीम का दसमां हेस्सा लिन्तेया ते जिस जो वायदे मिल्ले थिये, तिस जो असीस दिती। 2 ते तिस अन्दर सक्र नी है कि हल्का बड्डे का जादा असीस हासल करदा। 3 ते इत्ते ता मरणे जो होए रे मल्लु दसमां हेस्सा लिन्दे अपण तिन्ते से ई लिन्दे, जिसेरी गवाहई दिती जान्दी, कि से जिंदा है। 4 ता असी ऐ बी बोली सकदे कि, लेवी ने बी, जेहडा दसमां हेस्सा लिन्दा, इब्राहीम रे जरिए दसमां हेस्सा दितेया। 5 किजोकी जिस बेल्ले मलिकिसिदक तिसेरे प्यो कने मिलेया, तिस बेल्ले ऐ अपणे प्यो रे सरीर अन्दर थिया। 6 ते जे लेवीय पुरोहत री पदवी रे जरिए सिद्धी होई सकदी, (जिसेरे साहे कने मल्लुआं जो व्यवस्था मिल्ली थी) ता फिरी कै जरूरत थी कि दुज्जा याजक मलिकिसिदक री रीत पर खड़ा होए, ते हारून री रीत रा नी बोलेया जाओ। 7 किजो कि जां पुरोहत री पदवी बदली जान्दी ता, व्यवस्था रा बदलेया जाणा बी जरूरी है। 8 किजो कि जिसेरे बारे अन्दर ऐ गल्लां बोलीयां जान्दियां कि, से दुज्जे गोत्तर रा है, जिस बिच का कुस्की ने बेदी री सेवा नी किती। 9 ता जाहिर है कि, असा रा प्रभु यहूदा रे गोत्र बिच का पैदा होएरा है ते इस गोत्तर रे बारे अन्दर मूसा ने पुरोहत पदवी री किछ बी चरचा नी किती। 10 ते जां मलिकिसिदक रे साहई इक होर इदेह्या पुरोहत पैदा होणे वाळा थिया।

### मलिकिसिदक साई दुआ याजक

11 जेहडा सरीरी हुक्म री व्यवस्था रे साहबे नी, अपण नास नी होणे वाळी जिन्दगी री समर्थ रे साबे चुणेया जाओ ता असां रा दावा होर बी साफ तरीके कने जाहिर होई गया। 12 किजो कि तिसेरे बारे अन्दर ऐ गवाहई दिती गेरी है कि तू मलिकिसिदक रे तरिके कने जुगा-जुगा ताई पुरोहत है।

13 निदान, पैला हुक्म कमजोर ते बगैर कुस्की फळ रे होणे री वजह कने गाएब होई गई। 14 (इधेरे ताई कि व्यवस्था ने कुस्की गल्ल पुरा सही नी किता) ते तिसेरी जगह पर इक इदेहई उत्तम आस रखखी गई जिसेरे जरिए असी परमेश्वर रे नेडे जाई सकदे।

15 ते इधेरे ताई कि मसीह जी रा चुणेया जाणा बगैर कसम रे नी होया। 16 (किजो कि से ता बगैर कसमे पुरोहत ठैहाए गे अपण ऐ कसम कने तिसेरे पाससे का चुणेया गया जिनि ए तिसेरे बारे अन्दर बोलेया कि, प्रभु जी ने कसम खाई ते तिनि ए तिस का फिरी नी पछताणा, कि तू जुगा-जुगा ताई पुरोहत है।) 17 इह्यां यीशु जी खरे इक वाहदे गवाह बणी गया।

18 से ता बडे सारे पुरोहत बणदे आए, इसेरी वजह ए थिया कि मौत तिन्हा जो रह्ना नी दिन्दी थी। 19 अपण ऐ जुगा-जुगा ताई रहन्दा; इधेरे ताई तिसेरी पुरोहता री पदवी नी मुकणे वाळी है। 20 इधेरे ताई जेहडे तिसेरे जरिए परमेश्वर का आन्दे, से तिन्हेरा पूरा पूर छुठकारा करणे अन्दर सक्ति साली हिन्, किजोकी से तिन्हेरे ताई से बचोला बणने ताई हमेसा जीन्दा है। 21 ता इदेह्या ई बड़ड़ा पुरोहत असा जोग्या थिया, जेहडा पवित्र ते निस्कपट ते साफ ते पापियां का बखरा ते स्वर्ग का बी उच्चा किन्तेया गेरा हो।

22 ते तिन्हा बड़ड़े पुरोहतां रे साहई तिस जो जरूरत नी है कि रोज ई पैले अपण पाप्पा ते फिरी मल्लुआं रे पाप्पां ताई बलीयां चढाओ; किजोकी तिनि ए अपणे आप जो बली चढाई करी तिस जो इक्कोई बरी निपटाई दितेया। 23 किजोकि नियम ता कमजोर मल्लुआं जो बड्डा पुरोहत चुणदे, अपण उस कसम रे वायदे जो नियम रे बाद खाया गया, उस पुत्र जो चुणेया जे हमेसा-हमेसा ताई पुरा सही किन्तेया गया। 24 अब्बे ता असी गल्लां करेया करदे हिन्, तिन्हा बिच का सबनी का बड़ड़ी गल्ल ऐ है कि, असा रा इदेह्या बड़ड़ा पुरोहत है, जेहडा स्वर्गा पर महामहिमन रे सिंहासन रे सज्जे परसे जाई बैठेरा है। 25 ते पवित्र जगह ते तिस सच्चे तम्बू रा सेवक होया, जिस जो कुस्की मल्लु ने नी, अपण प्रभु ने खंडेरा थिया। 26 किजो कि हर इक बड़ड़ा पुरोहत भेंट ते बली चढाणे ताई ठैहाया जान्दा, इधेरे ताई जरूरी है कि इसका बी किछ चढाणे जो हो। 27 ते अगर धरती पर हुन्दा ता कदी पुरोहत नी हुन्दा, इधेरे ताई कि व्यवस्था रे मुताबिक भेंट चढाणे वाळे ता हिन्, 28 जेहडा स्वर्ग अन्दर री चीजां रे रूप साहई ते प्रतिबिम्ब री सेवा करदे, जिह्यां जां मूसा तम्बू बनाणे वाळा थिया, ता तिस जो एह खबरदारी मिल्ली, कि दिख्ख, जेहडा नमूना तिजो पाहडा पर दस्सेया गया थिया, तिसेरे मुताबिक सब किछ बणाए।

### यीशु जी असां रे महायाजक

8 अपण तिस जो तिसेरी सेवकाई का बधी करी मिली, किजो कि से होर बी उत्तम वाचा रा मध्यस्थ ठैहेया, जेहडी होर प्रतिज्ञां रे साहे बहन्नी गेरी है। 2 किजो कि अगर से पैली वाचा बेगुनाह हुन्दी, ता दुज्जी ताई मोक्का नी तोप्पेया जाणा थिया। 3 अपण से तिन्हा पर इल्जाम लाई करी बोलदा, कि प्रभु बोलदे कि दिख्खो, से रोज आया करदे हिन् कि मैं इस्त्राएल रे घराने कन्ने ते यहूदा रे घराने रे कन्ने, नोई वाचा बहणी है। 4 ऐ तिस वाचा रे साहई नी होणी, जेहडी मैं तिन्हेरे बब्ब-दादेयां रे कन्ने तिस बेल्ले बहन्नी थी, जां मैं तिन्हेरा हथ्थ कपडी करी तिन्हा जो मिस्त्र देस का कड़डी अन्देया थिया किजोकी से मेरी वाचा पर पक्के नी रेह, ते मैं तिन्हेरी सुधि नी लेई; प्रभु ऐ ई बोलदे। 5 फिरी प्रभु जी बोलदे कि, जेहडी वाचा मैं तिन्हा रोजा का बाद इस्त्राएल रे घराने कने बहणी है, से ऐ है कि, मैं अपणी व्यवस्था जो तिन्हेरे मनां अन्दर पाणा, ते तिस जो तिन्हेरे दिल पर लिखणा, ते मैं तिन्हेरा परमेश्वर ठैहणा, ते तिन्हा ने मेरे मल्लु ठैहणा। 6 ते हर इक अपणे देस वाळेयां जो ते अपणे भ्याळ जो ऐ सिक्सा नी दैणी कि, तू प्रभु जो पछियाण किजो कि हल्के का बड़ड़े ताई सबनां ने मिन्जो जाणी लेणा। 7 किजो कि मैं तिन्हेरे अधरम रे बारे अन्दर रह्नादिल होणा, ते तिन्हेरे पाप्प जो फिरी याद नी करणा। 8 नोई वाचा होई रे होई जाणे कने तिनि ए पैली वाचा जो पुराणा ठैहाया, ते जेहडी चीज पुराणी ते जीर्ण होई जान्दी तिसेरा मिटि जाणा जरूरी हुन्दा। 9 तिस पैले वादे बिच बी सेवा रे नियम थिये, ते इदेया पवित्र जगह थी जे इस दुनिया रा थिया। 10 किजो कि इक्क तम्बू बनाया गया, पैले तम्बू बिच दिया ते मेज, ते चढाई री रोतियां थी; ते से पवित्र जगह केहलादी। 11 दुआ, परदे रे पिच्चे से

तम्बु थिया,ते तिस जो अत्ति जगह बोलदे थिये।<sup>12</sup> तिस बिच सोन्ने री धुपदानि,ते चारो पास्से सोन्ना चढाए रा वादे रा सन्दूक ते तिस बिच मन्ना कने भरे रा सोन्ने रा बरतन ते हारून रा डडां जिसेरे बिच फूल-फळ आई गे रे थिये ते वादे री पट्टियां थी।<sup>13</sup> तिसेरे पराल्ले दोनों रौसनी रे भरे रे करुब थिये,जे मन फिराणे वाळे रे ढकणे पर छौ कित्ते रे थिये; इन्हरे बारे बिच इक्क-इक्क करी के दसणे रा हल्ले वेल्ना नी है।

### पार्थिव तम्बु बिच सेवा

9 ए चिजां इस तरिकके कने तयार कित्ते रि गे री थी। तिस पैल्ले तम्बु बिच याजक हर वेल्ने आई करी<sup>2</sup> ते दुए बिच सिर्फ महायाजक साल बिच सिर्फ इक्क ई बारी जादां,ते बगैर खून लित्ते रे नी जादां;जिसजो से अपणे ताई तेल लोकां री गलतियां ताई चढादा।<sup>3</sup> इस कने पवित्र आत्मा ए इ दसदे कि जां तिकर पैल्ला तम्बु खडित्ते रा है तां तिकर पवित्र जगह रा रस्ता सामणे नी आया।<sup>4</sup> ए तम्बु आणे वाळे वेल्ने ताई इक्क उदारण है; जिस बिच इदेय चढावे ते बलिदान चढाये जादें,जि कने अराधना करणे वाळ्यां रे विवेक साबित नी होइ सकदे।<sup>5</sup> किजो कि से सिर्फ काणे पिणे री चिजां ते अलग-अलग तरिके री नहाणे रे तरिके रे हसाब कने सरिरी नियम हिन् जो सुधार रे वेल्ने तिकर ताई लागु कित्ते गे रे हिन्।<sup>6</sup> अपण जां मसीह आणे वाळी खरी-खरी चिजां रा महायाजक होई करी आए, तां तिन्हा ने होर बी बड्डे ते सिद्ध तम्बु का होइ करी जे हत्थां रा बणाए रा नी अपण इस दुनिया रा बी नी है।<sup>7</sup> ते बछडे ते बकरे रे खून रे जरिये नी अपण अपणे इ खून कने, इक्क ई बार बिच पवित्र जगह बिच गे ते हमेसा रा छुटकारा हासिल कित्ता।<sup>8</sup> किजो कि जां बकरे ते बैलां रा खून ते कलौर री राख रा अपवित्र लोकां पर चिडकेया जाणा सरिरी री शुधता ताई तिन्हेरे जो पवित्र करदा,<sup>9</sup> तां मसीह रा खून जिन्हा ने अप्पु जो तिस पुराणी आत्मा रे जरिये परमेश्वर रे सामणे बेगुनाह होइ करी चढाया,तुसां रे विवेक जो मरे रे कम्मां का किजो नी शुध करणा ताकी तुसी जिन्दे परमेश्वर री सेवा करो।<sup>10</sup> इसी वजह कने से नौए वादे रे बिचौल्ले दिन, ताकी तिन्हरी मौत रे जरिए जो पैल्ले वादे रे वेल्ने बिच अपराधां का छुटकरा पाणे ताई होइ री है सदे रे लोक वादे रे मुताबक हमेसा री मिरास जो हासिल करण।

### मसीह रे खून री ताकत

11 किजो कि जित्ते वादा कित्ता गे रा है तित्ते वादा करणे वाळे री मौत जो समजी लैणा बी जरुरी है।<sup>12</sup> किजो कि इदेया वादा मरणे पर पक्का हुदां,ते जां तिकर वादा करणे वाळा जिन्दा रहन्दा तां तिकर वादा कम्म रा नी हुदां।<sup>13</sup> इधेरे ताई पैल्ला वादा बी बगैर खून रे नी बन्नि गी।<sup>14</sup> किजो कि जां मूसा सारे लोकां जो व्यवस्था री हर इक्क हुक्म सुणाई बैठेया तां तिसने बकरेयां ते बचडेयां रा खून लेइ करी,पाणी ते लाल ऊन ते जुफा कने,तिस कताब पर ते सारे लोकां पर छिडकी दित्ता।<sup>15</sup> ते बोल्हेया,"ए तिस वादे रा खून है,जिसेरा हुक्म परमेश्वर ने तुसां ताई दित्ते रा है।<sup>16</sup> ते इसी तरिके कने तिसने तम्बु ते सेवा रे सारे समान पर खून छिडकेया।<sup>17</sup> सच ता ए है की व्यवस्था रे हसाब कने जादातर सारी चिजां खून रे जरिये शुध कित्ती जादीं,ते बगैर खून बहाए पाप री माफि नी है।<sup>18</sup> इधेरे ताई जरुरी है की स्वर्ग री चिजां साई इन्हा कुरबानियां रे जरिये शुध कित्ते जाण,अपण स्वर्ग री चिजां अप्पु इन्हेरे खरे कुरबानियां रे जरिये शुध कित्ती जादीं।<sup>19</sup> किजो कि मसीह ने तिस हन्थ रे बणाए रे पवित्र जगह बिच,जे सच्चे पवित्र जगह रा नमुना है,अन्दर नी गे पर स्वर्ग ई बिच गे ताकी असां ताई अवे परमेश्वर रे सामणे दिसे।<sup>20</sup> ए नी की से अप्पु जो घडी-घडी चढाण अपण जियां कि महायाजक हर साल दुए रा खून लेइ करी पवित्र जगह बिच जादां,<sup>21</sup> नी तां दुनिया री सुरुआत का लेइ करी तिन्हेरे जो घडी-घडी दुख चुकणा पैदां; अपण अवे यूग रे आखर बिच से इक्क ई बारी सामणे आए,ताकी अपणे ई बलिदान रे जरिए पाप जो दूर करी दे।<sup>22</sup> ते जियां म्हणु ताई इक्क बारी मरणा ते तिसेरे बाद ईसांफ रा हाणा पक्का है,

### मसीह रे बलिदान रे जरिये पाप का माफी

23 तियां ई मसीह बी मते जणेया रे पाप जो चुक्कि लैणे ताई इक्क बारी कुरबान होए;ते जे लोक तिन्हेरे जो तोपदे तिन्हेरे छुटकारे ताई दुइ बारी बगैर चुक्के रे दिसणा।<sup>24</sup> किजो कि व्यवस्था,जिस बिच आणे वाळी खरी चिजां री परछाई है अपण तिन्हेरा असली रूप नी ईधेरे ताई तिन्हा इक्क ई तरिके री कुरबानिया री वजह कने जे हर साल बिना छड्डे रे पाए जादें, नेडे आणे वाळ्यां जो कदी बी सिध नी करी सकदी।<sup>25</sup> नी तां तिन्हेरा चढाणा बंद किजो नी होइ जादां? ईधेरे ताई जां सेवा करणे वाळे इक्क ई बारी बिच शुध होई जादें तां फिरी तिन्हेरा विवेक तिन्हेरे जो पापी नी ठेहरादां।<sup>26</sup> अपण तिन्हेरे जरिये हर साल पापां जो याद कित्तेया जादां।<sup>27</sup> किजो कि ए अनहोना कि बैलां ते बकरेयां रा खून पापां जो दूर करे।<sup>28</sup> इधेरे ताई से दुनिया बिच आन्दे वेल्ने बोलदे,"चढावे ते कुरबानियां तुसी नी चाहई,अपण मेरे ताई इक्क सरिरी तयार कित्ता।

### सिध बलिदान

10 होमबलियां ते पापबलियां का तुसी खुस नी होए।<sup>2</sup> तां मै बोल्हेया,"दिख्खो,मै आई गे रा है,पवित्रशास्त्र बिच मेरे बारे बिच लिख्खे रा है,ताकी हे परमेश्वर, तुसां री मर्जी पुरी करां।"<sup>3</sup> उप्पर ता से बोलदे,"ना तुसी बलिदान ना चढावे ते होमबलियां ते पापबलियां जो चापेया ते ना तिसका खुस होए।" हालांकि ए कुरबानियां ता व्यवस्ता रे हसाब कने चढाए जादें।<sup>4</sup> फिरी ए बी बोलदे,"दिख्खो,मै आई गे रा है ताकी तुसां री मर्जी पुरी करां,अते से पैल्ले जो चुक्कि दिदें ताकी दुए जो चुणी लैन्।<sup>5</sup> तिसी मर्जी कने असी यीशु मसीह जी रे सरिरे रे इक्क ई बा बलिदान चढाए जाणे रे जरिये पवित्र कित्ते गे रे हिन्।<sup>6</sup> हर इक्क याजक ता खडी करी हर दिन सेवा करदा,ते इक्क ई तरिके रे बलिदान जो जे पापां जो कदी बी दूर नी करी सकदे बार बार चढादें।<sup>7</sup> अपण ए म्हणु ता पापां रे बदले इक्क ई बलिदान हमेसा ताई चढाई करी परमेश्वर रे सज्जे पास्से जाई बैठे।<sup>8</sup> ते तिसी वेल्ने का इसजो तोपेया करदा है की तिन्हेरे बैरी तिन्हेरे पैरां रे थल्ले री पीढी बणी जाण।<sup>9</sup> किजो कि तिन्हा ने इक्क ई चढावे रे जरिये तिन्हा जो पवित्र कित्ते जादें हमेसा ताई सिध करी दित्ते रा है।<sup>10</sup> ते पवित्र आत्मा बी असां जो ए ई गुआई दिदें;किजो कि तिन्हा ने पैल्ले बोल्हेया थिया,<sup>11</sup> "प्रभू बोलदे कि जे वादा मै तिन्हा दिनां रे बाद तिन्हेरे कने करणा से ए है कि मै अपणे नियमां जो तिन्हेरे दिलां पर लिखणा ते मै तिन्हेरे विवेक बिच पाणा।"<sup>12</sup> फिरी से ए बोलदे,"मै तिन्हेरे पापां जो ते तिन्हेरे अधर्म रे कम्मां जो फिरी कदी याद नी करणा।"<sup>13</sup> ते जां इन्हेरी माफी होइ गे री है तां फिरी पाप रा बलिदान नी रेया।<sup>14</sup> इधेरे ताई ओ भाइयां,जां असां जो यीशु जी रे खून रे जरिये तिस नौए ते जन्दे रस्ते का पवित्र जगह बिच जाणे री हिम्मत होइ गे री है,<sup>15</sup> जे तिन्हा ने परदे मतलब अपणे सरिरे बिच का होई करी,असां ताई अभिषेक कित्ते रा है,<sup>16</sup> ते इस ताई कि असां रा इदेया महान महायाजक है, जे परमेश्वर रे घरे रे अधिकारी हिन्,<sup>17</sup> तां आओ,असी सच्चे मन ते पुरे भरोसे कने ते विवेक रे दोस जो दूर करणे ताई दिल पर छिडकाव लेइ करी ते सरिरे जो साफ पाणी कने धुलवाई करी परमेश्वर रे नेडे जाण।<sup>18</sup> आओ असी अपणी उम्मीद रे अगीकार जो मजबूती कने पकडी रहण किजोकी जिनिये वादा कित्ते रा है से सच्चा है;

### परमेश्वर रे नेडे जाओ

19 ते प्यार,ते भले कम्मां बिच उकसाणे ताई असी इक्क दुए री फिकर करेया करण।<sup>20</sup> ते इक्क-दुए कने कठिणा ना छड्डे जियां की किन्नयां री रीती पर है, अपण इक्क-दुए जो समजादें रहण; ते जियां-जियां तिस दिन जो नेडे आदें दिखो तियां-तियां होर बी जादा ए करेया करो।<sup>21</sup> किजोकी सच्चाई री पेहचान पाणे रे बाद जे असी जाणी करी पाप करदे रहण,तां फिरी पापां ताई होइ कोइ बलिदान बाकी नी।<sup>22</sup> हां, ज़ोणी सजा री भाळ ते आग रा फुकिणा बाकी है जिसने विरोधियां जो फुकि दैणा।<sup>23</sup> जां मूसा री व्यवस्था रा ना मनणे वाळा दो या त्रै लोकां री गुआई पर बगैरे कुसकी रहम रे मारी रख्खेया जादां<sup>24</sup> तां सोचि लेयो से होर बी किन्ने भारी सजा रे जोगे होणा,जिनिये



परमेश्वर रे पुत्र जो पैरां कन्ने रोदेया ते वादे रे खून जो जिसेरे जरिये से पवित्र ठेहराया गया थिया अपवित्र समजेया,ते अनुग्रह रे आत्मा री बेज्जति किन्ती। 25 किजोकी असी तिन्हा जो जाणदे,जिनिये बोल्लया,"बदला लैणा मेरा कम्म है मै इ बदला देणा।" ते फिरी ए,कि "प्रभू ने अपणे लोक्यां रा ईसांफ करणा। 26 जिन्दे परमेश्वर रे हत्था बिच पैणा डोणी गल्ल है। 27 अपण तिन्हा पिछले दिनां जो याद करो,जिन्हा बिच तुसी रोसनी पाई करी दुखां रे बडी लडाई टिके रेय। 28 कदी-कदी तां इयां कि तुसी बेज्जति सैहद-सैहदं तमासा बणे ते कदी इयां कि तुसी तिन्हेरे हिस्सेदार होए जिन्हेरी बुरी हालत किन्ती जादी। 29 किजोकी तुसी कैदियां रे दुख बिच बी दुखी होए,ते अपणी जायदाद बी खुसी कने लुटणा दिन्ती;ए जाणी करी कि तुसां का इक्क होर बी बदिया ते हमेसा रहणे वाळी दौलत है। 30 ईधेरे तांई अपणी हिम्मत ना छडो किजोकी तिन्हेरा फळ बड्डा है। 31 किजोकी तुसाम जो सबर रखणा जरुरी है, ताकी परमेश्वर री मर्जी जो पुरा करी के तुसी वादे रा फळ पाओ। 32 "किजोकी अवे बडा ई घट वक्त रेड् गे रा है जां की इणे वाळे ने इणा ते बडी देर नी करणी। 33 अपण मेरे धर्मी म्हणु ने भरोसे कने जिन्दा रहणा,ते जे से पिच्चे हटी जाए तां मेरा मन तिसका खुस नी होणा।" 34 अपण असी हटणे वाळे नी कि मुकी जाण अपण भरोसा करणे वाळे हिन कि जिन्दगी जो बचाण। 35 अवे भरोसा उम्मीद कित्ते री चिजां रा पक्का होणा,ते अनदिखि गल्लां रा सबूत है। 36 किजो कि इसेरे ई बारे बिच मुखिया री खरी गुआई दिन्ती गी। 37 भरोसा कने ई असी जाणी जादे कि सारी दुनिया रा बणाया जाणा परमेश्वर रे सब्द रे जरिए इ होइ री है। अपण ए नी कि जे किछ दिखणे बिच आदां से दिखखे री,से दिखखे री चिजां कने बणे रा हो। 38 भरोसे कने ई हाबिल ने कैन का बदिया बलिदान परमेश्वर तांई चढाया ते तिसरे इ जरिए तिसरे धर्मी होणे री गुआई बी दिन्ती गी किजो कि परमेश्वर ने तिसरे चढावे रे बारे बिच गुआई दिन्ती;ते तिसरे इ जरिये से मरणे पर बी हल्ले तिकर गल्लां करवा। 39 भरोसे कने इ हनोक चुकि लिता गेया की मौत जो ना दिखखे,ते तिसेरा पता नी मिल्लेया किजो कि परमेश्वर ने तिसजो चुकि लिता रा थिया ते तिसरे चुक्के जाणे का पैल्ले तिसरे ए गुआई दिन्ती गी थी कि तिसने परमेश्वर जो खुस कित्ते रा थिया।

### विश्वास रे उदारण

**11** ते भरोसे रे बगैर तिसजो खुस करणा नामुमकिन है;कजो कि परमेश्वर का आणे वाळे जो भरोसा करणा चाएदा की से है ते अपणे तोपणे वाळे जो फळ दिदें। 2 भरोसे कने इ नूह ने तिन्हा गल्लां रे बारे बिच जे तिस वेले दिसदी नी थी,चेतौणी पाई करी भक्ति कने अपणे घरे रे बचा तांई जहाज बणाया,ते तिसरे जरिये तिनिये दुनिया जो दोसी ठेहराया;ते तिस धर्म रे वारिस बणे जे भरोसे कने हुदां। 3 भरोसे कने इ अब्राहम जां सद्देया गेया तां गल्ल मन्त्री करी इदेइ जगह जो चली गेया जिसजो मिरास बिच लैणे वाला थिया; ते ए नी जाणदा था कि मै कुते जाया करदा है,तां बी निकळी गेया। 4 भरोसे कने ई तिसने वादे कित्ते रे देस बिच,पराए देस बिच परदेसी सांई रेई कर इसहाक ते याकूब समेत,जे तिसरे कने तिसी वादे रे वारिस थिये तम्बू बिच रेय। 5 किजो कि तिस पक्के नगर नेव जो तोपदा ऋथ जिसेरा बनाणे वाळा परमेश्वर है। 6 भरोसे कने सारा ने अपु बुड्डी होणे पर बी बचा पैदा करणे री ताकत पाई, किजो कि तिसने वादा करणे वाळे जो सच्चा जाणेया थिया। 7 इसेरे वजह कने इक्क ई म्हणु का,जे मरेयां सांई थिया आसमान रे तारेयां ते समुद्र रे रेत जिन्ने अनगीनत वशं पैदा होए। 8 ए सब भरोसे री ई हालत बिच मरे ते तिन्हा ना वादा कित्ते री चिजां नी पाई अपण तिन्हा जो दूर का दिखि करी खुस होए ते मन्नि लेया कि असी धरती पर परदेसी ते बाहरी हिन। 9 जे इदेइ गल्लां करदे से साबित करदे की स्वदेस री खोज बिच हिन। 10 ते जिस देस का से निकळी आए रे थिये जे तिसेरा ध्यान करदे तां तिन्हा जो हटी जाणे रा मोक्का थिया। 11 अपण से सबका बदिया मतलब स्वर्गीय देस रे चाहे वाळे हिन; ईधेरे तांई परमेश्वर तिन्हेरा परमेश्वर केहलाणे बिच नी लजादे किजो की तिन्हा ने तिन्हेरे तांई इक्क सेहर तयार कित्ते रा है, 12 भरोसे कने ई अब्राहम ने,परखे जाणे से वेले पर बी इसहाक जो बलिदान चढाया ते जिसने वादेयां जो सच मन्नेया थिया 13 ते जिस कने ए बोल्लेया गेया थिया,"इसहाक का तेरा वशं चलणा," से इ

अपणे इकलौते जो चढाणे लगी पेया। 14 किजो की तिस ने मन्नि लेया,कि परमेश्वर ताकतवर है कि तिसजो मरेयां बिच का जिन्दा करे: अते तिन्हा बिच का उदारण रे तौर पर से तिसजो फिरी मिल्लेया। 15 भरोसे कने ई इसहाक ने याकूब ते एसाव जो आणे वाळी गल्लां रे बारे बिच आशीष दिन्ती। 16 भरोसे कने ई याकूब ने मरदे वेले युसूफ रे दोनो पुत्रां बिच का इक्क-इक्क जो आशीष दिन्ती,ते अपणे डडें रे सीरे पर सहारा लेई करी प्रणाम किता।

17 भरोसे कने ई युसूफ ने,जां से मरणे वाळा थिया तां इस्राएल रे बच्चे रे निकळी जाणे री गल्ल लाई,ते अपणे हड्डियां रे बारे बिच हुक्म दितां। 18 भरोसे कने इ मूसा रे माँ-प्यो ने तिसजो, पैदा होणे रे बाद त्रै महिने तिकर लुकाई रखखेया,किजोकी तिन्हा ने दिखखेया कि मुडां सुन्दर है ते से राजे रे हुकम का नी डरे। 19 भरोसे कने ई मूसा ने समजदार हाई करी फिरोन री कुडी रा पुत्र होणे का इन्कार कित्तेया। 20 ईधेरे तांई कि तिसजो पाप बिच थोडे दिन रे सुख भोगणे का परमेश्वर रे लोक्यां कने दुख भोगणा जादा खरा लगेया। 21 तिसने मसीह री वजह कने बेइज्जत होणे जो मिस्र रे भंडार का बड्डी जायदाद समजेया, किजोकी तिसेरी अख्खां फळ पाणे रे पास्से लगे रे थी। 22 भरोसे कने ई राजे रे गुस्से का नी डरी करी तिसने मिस्र जो छड्डि दिता किजोकी से अनदिखखे जो मन्ने दिखदे होए मजबूत रेया।

23 भरोसे कने ई तिसने फसह ते खून छिडकने रे नियम मन्ने,कि पैल्ले मुडेंया जो खतम करणे वाळा इस्राएलिया पर हत्थ ना पाए। 24 भरोसे कने से लाल समुद्र का पार इय्यां उतरी गे जिय्यां सुकि जमीन का;ते जां मिस्रियां ने तिय्यां ई करणा चाएया तां सारे डुबि करी मरी गे। 25 भरोसे कने ई यरिहो री सैरपनाह जां से सात्त रोजां तांई तिसरे चक्कर लाई बैठे,तां से पेइ गी। 26 भरोसे कने राहाब वैश्या हुकम ना मनणे वाळेयां कने खतम नी हुइ,ईधेरे तांई कि तिसने जासुसां जो अराम कने रखखेआ थिया। 27 अवे होर क्या बोल्लां ?किजो कि व नी रेया की गिदोन रा,ते बाराक,ते शिमशोन रा,ते इफताह रा,ते दाऊद ते शमुएल रा, ते भविष्यदक्तां रा जिकर करां। 28 तिन्हा ने भरोसे रे ई जरिये राज जित्ते; धर्म रे कम्म कित्ते; वादे कित्ते रे चिजां किन्ती; शेरं रे मुँह बंद कित्ते;

29 आग्नी री लपटां जो ठडां किता;तलवार री धार का बची निकळे,कमजोरी बिच ताकतवर होए,लडाई बिच बहादुर निकळे;परदेसियां री फौजां जो मारि न्हसाया। 30 जनानियां ने अपणे मरे रे म्हणुआं जो फिरी जिन्दा पाया, किन्ने तां मार खादे-खादे मरी गे ते छुटकारा नी चाएया,ईधेरे तांई कि सबका बदिया जी उठणा रे भागी बनण। 31 मते तां मजाक उडआए जाणे ते कौडे खाने बल्कि बन्ने जाणे,ते कैद बिच पैणे रे जरिए परखे गे।

32 बट्टे मारे गे;आरे का चीरे गे,तिन्हेरी परिक्षा किन्ती गी,तलवार कने मारे गे,से कमांली बिच,ते दुख बिच,ते दुख भोगदे भोगदे,बेड्डां ते बकरियां री खाल्लां पाई करी इत्ते-उत्ते मारे-मारे फिरे; 33 ते जंगला,ते पहाडों,ते गुफा बिच,ते धरती री दरारां बिच,भटकदे फिरे।दुनिया तिन्हेरे जोगि नी थी। 34 भरोसे इ रे जरिये इन्हा सारे रे बारे बिच खरी गुआई दिन्ती गी तां बी तिन्हा जो वादा कित्ते री चिजां ना मिली। 35 किजो कि परमेश्वर ने असां तांई पैल्ले का इक्क सबका खरी ठेहराई,कि से असां रे बगैर सिधता जो ना पुजे। 36 ईधेरे वजह कने जां गुआह रा इक्क इदेया बड्डा दल असां जो घरे रा है,तां आओ,ह इक्क रोकणे वाळी चीज,ते उलझाणे वाळे पाप जो दूर करी के,से दौड जिस बिच असां जो दौडणा है,सबर कने दौडिये। 37 ते विस्वास रे कर्ता ते सिद्ध करणे वाळे यीशु जी जो तकदे रये;जिन्हा ने तिस खुसि जो जे तिन्हेरे आग्नी थी,सरम री किछ चिन्ता कित्ते बगैर,कूस रा दुख सैह कित्तेया,ते परमेश्वर रे सिहांसन सज्जे पास्से जाई बैठे।

38 ईधेरे तांई तिन्हेरे पर ध्यान करो,जिन्हा ने अपणे खलाफ विरोधियां रा इन्हा बैहसबाजी करणा सेहई लिता कि तुसी निरास होइ करी हिम्मत ना छड्डि देयो।

39 तुसां ने पाप कने लडदे होए ति कने इदेइ लडाई नी किन्ती,की तुसां रा खून निकळेया हो। 40 ते तुसी तिस उपदेस जो जे तुसां जो जे तुसां जो मुडेंया साहई दिन्तेया जादा,भीली गे रे हिन,कि ओ मेरे मुडें,कि परमेश्वर री ताडणा वाळी गल्ल जो छोटा मत समज,ते जां से तेरे जो बके तां हिम्मत ना छड्डे।

### परमेश्वर पिता रा सजा दैणा

12 किजो कि प्रभु जिस कने प्यार करदा, तिसेरी ताड़णा बी करदा, ते जिसजो पुत्तर बणाई लिदां, तिसजो कोड़े बी लादां" 2 तुसी दुख जो ताड़णा समजी करी सेई लेयो; परमेश्वर तुसां जो पुत्तर समजी करी तुसां कने बताव करदे। से कुण पुत्तर है जिसेरी ताड़णा प्यो नी करदा? 3 जे से ताड़णा जिसेरे हिस्सेदार सारे हुदें, तुसां री नी होइ तां तुसी पुत्र नी अपण व्यभिचार री औलाद होए। 4 फिरी जां असां रे सरिरि प्यो बी असां री ताड़णा करदे थे ते असां ने तिन्हेरा आदर कित्तेया, तां क्या आत्मां रे पिता रे होर बी नेडे ना रैहू जिस कने असी जिन्दे रये। 5 से तां अपणी समज रे हसाब कने थोड़े दिनां तिकर ताड़णा करदे ते, अपण से ता असां रे फायदे तांई करदे कि असी बी तिन्हेरे पवित्रता रे हिस्सेदार होइ जाण 6 अब्बे ता हर तरिके री ताड़णा खुसी री नी, अपण दुख री गल्ल समजी जादीं; तां बी जे तिसजो सैहदें-सैहदें पक्के होइ गे रे हिन, बाद बिच तिन्हा जो चैन कने धार्मुकता रा फळ मिलदा। 7 इधेरे तांई दिह्ले हत्थां ते ते कमजोर गोड्डेयां जो सिद्धा करो, 8 ते अपणे पैरां तांई सिद्धा रस्ता बणाओ कि लट्टा भटकी ना जाओ अपण भला-चगां होइ जाए। 9 सारेयां कने मेल-मिलाप रखो, ते तिस पवित्रता रे खोजी होइ जाओ जिसेरे बगैर कुसकी ने कदी बी परमेश्वर जो नी दिखणा। 10 ध्यान कने दिखदे रेयो, कुते इयां ना हो की होई परमेश्वर ए अनुग्रह का अछुता रेइ जाओ, या कोई कड़वी जड़ निकळी करी तकलीफ दे ते तिसेरी वजह का मते लोक खराब होइ जाण। 11 इयां ना हो की कोई म्हणु व्यभिचारी, या एसाव साहई अधर्मी हो जिनिये इक्क बारी री रोटे रे बदले अपणे पैले मुडें होणे रे औहदे जो बेची दिता।

### उपदेश ते चेतावणी

12 तुसी जाणदे कि बाद बिच जां तिनिये आसीस पाणी चाहई तां निकम्मा समजेया गेया, ते अतरु बहाई-बहाई- करी तोपणे पर बी मन फिराणे रा मोक्का तिसजो ना मिलेया। 13 तुसी तां तिस पहाड़ का जे छुए जा सकदा थिया ते आग कने सौसन थिया ते काली घटा, ते न्याहरा, ते आंधी रे नेडे, 14 ते तुरही री अवाज, ते बोलणे वाले रे इदेइ अवाज रे नेडे नी आये, जिसेरे सुनणे वालेयां ने मिन्नत किती की अवे असां का होर गल्लां ना किती जाए। 15 किजो कि से तिस हुकम जो ना सेइ सके: "जे कोइ जानवर बी पहाड़ जो छुए तां तिस पर बट्टे मारे जाए।" 16 ते से दरसन इदेया डोणा थिया की मूसा ने बोलेया, "मै बड़ा डरदा ते कबंदा।" 17 अपण तुसी सिन्धोन रे पहाड़ रे नेडे ते जिन्दे परमेश्वर रे नगर, स्वर्गीय यरुशलम रे नेडे ते लख्खां स्वर्गदुतां 18 ते तिन्हा पैले मुडेंया री आम सभा ते कलिसीया, जिन्हेरे नां स्वर्ग बिच लिख्खे रे हिन ते सारेयां रे न्यायी परमेश्वर का, ते सिद्ध कित्ते रे धर्मियां री आत्मा, 19 ते नौए वादे रे बिचौले यीशु जी ते छिड़काव रे तिस खून रे नेडे आये रे हिन, जे हाबिल रे खून का खरी गल्लां बोलदा। 20 सावधान रेयो, ते तिस बोलणे वाले का मुँह ना फेरो, किजोकी से लोक जां धरती रे चेतावणी दैणे वाले का मुँह मोड़ीकरी ना बची सके, तां असी स्वर्ग का चेतावणी दैणे वाले का मुँह मोड़ीकरी कित्यां बची सकगे? 21 तिस वेले तां तिन्हेरी अवाज ने धरती जो हिलाई दित्तेया ते अवे तिन्हा ने अवे ए वादा कित्ते रा है की, "इक्क बारी फिरी मै ना सिर्फ धरती जो अपण आसमान जो बी हिलाई दैणा।" 22 ते ए गल्ल इक्क बारी फिरी इस गल्ल जो साबित करदा कीजे चिजां हिलाई जादीं से बणाई री चिजां होणे री वजह कने टळी जाणी; ताकि जे चिजां हिलाई नी जादीं से अटल रेय। 23 ईदेरे तांई असी राज जो पाई करी जे हिलणे रा नी अपण टिकणे वाली हो, होर भक्ति, ते डर कने परमेश्वर री इदेइ अराधना करण जिस कने से खुस हुदें; 24 किजो कि असां रा परमेश्वर फुकणे वाली अगग है।" 25 भाई चारे रे रा प्यार बणी रे। 26 प्रोणे री इज्जत करणा मत भुल्लो किजो की जाणे अनजाणे बिच कई लोका ने स्वर्ग रे दुता रा आदर सत्कार कित्ते रा है।

27 कैदी कने ऐसे पेस आओ कि तिन्हा जो लगे कि जियां तुसी बी तिन्हा कने कैद हिन ते जिन्हा कने बुरा बताव करदे तिन्हा री ऐसी सुधी लियो कि तिन्हा रा बि सरिर है। 28 व्या तुसां सारे अन्दर आदर री गल्ल समझी जाये ते व्या रे बिछाण बिच कुसी तरह रा पाप नी होणा चाएदा किजो की प्रमेसवर ने रंडीबाजा र ते जिन्हा ने होरसी री लाडी कने सम्बध रखेरा तिन्हा रा न्या करणा। 29 तुम्हारे जो कुसी बी चिज रा लालच नि हो ते तुसां का जे है तुसी तिस अन्दर इ खुस रियो किजो कि प्रभु अप्पु बोलदे कि मै तुसां जो ना ता कदी छडणा ते ना कदी त्यागणा।

### मसीही जिन्दगी जीणे रे निर्देश

13 इधेरे तांई असी निडर होई के बोलदे, प्रभु मेरा सहायक है मल्लू मेरा क्या करी सकदा। 2 ते जेहडे तुम्हारे अगुवे हिन् तिन्हा दा तुसी चेता रखो जिन्हे तुसां जो वचन सुणाया तिन्हा दे चाल चलण जो दिखी कने तिन्हा रा विसवास करो। 3 प्रभु यीशु मसीह जी अज कल ते हमेसा इको देया है। 4 होरसी होरसी उपदेस कने धोखा मत खाओ जाओ किजो मन रा अनुग्रह का पक्का रैणा ठीक है तिन्हा खाणे वाली चीजा कने मतलब रखणे वाले जो कोइ बी फायेदा नी होया। 5 असां री इक ऐसी वेदी है जिस पर खाणे रा तिन्हा जो कोई अधिकार निए जेडी तम्बू री सेवा करदे। 6 किजो की जिन्हा पसुआं रा खून महायाजक पाप बली तिकर वेदी पर लेइ जान्दा तिन्हा रा सररीर छावनी का बाहर फुकदे हिन। 7 इसी कारण प्रभु यीशु मसीह जी ने अपणे मणुआ तिकर फातक का बाहर दुख चक्के या। 8 इधेरे तिकर आओ असा बी सेरी निन्दा अपणे पुर चुक्की के छावणी का बाहर तिस का चली जान। 9 किजो कीन हमारा इत्ते कोइ नगर नी पर असा आणे वाले नगर री खोज बिच हिन्। 10 इस तिकर असा तिस जो इधेरे बजह कने स्तुति रुपी बलिदान तिन्हा होटा रा जडे सेरे ना जो मन्नी लिन्दे। 11 भलाई करना ते कुसी रे तिकर अपणा आप बी देणे जो त्यार रैणे रा बलिदान हमेसा प्रमेसवर जो पसन्द है। 12 अपणे अगुवे गल्ल मनो तिन्हा रे अधिन रियो से तिन्हा सइ जागदे रिन्दे जिन्हा जो तुसां रे प्राण रा लेखा देणा पैणा ते ये कम बडी खुसी कने करो ना कि ठंडी सास लेइ के किजो की ऐसी हालत अन्दर तुसां जो कुछ बी फायेदा नि होणा। 13 इस तिकर असा तांई प्राथना करदे रियो कि असां रा विवेक साफ है ते कने असी सारी गल्ला अन्दर खरी चाल चलणा चान्दे हिन्। 14 प्राथना तिकर मै तुसा जो होर समझान्दा है कि मै तुसां का तोळे आई सका। 15 अवे असां रा सान्ती दाता परमेसवर जेडा हमारे प्रभु यीशु मसीह जे भैडा रा महान रखवाला है हमेसा तांई खून रे गुण कने मरे होये जो जियाई कने लई आये रा है। 16 तुसां हर इक गल्ल अन्दर सिद्ध करो जिस कने तुसी सेरी हर इक मर्जी पुरी करो कने जेडा किछ चाये दा प्रभु यीशु जि अन्दर पुरा करो। तिसेरी हि महिमा हमेसा तिकर हुन्दी रे। आमीन। 17 मेरे भाई यो तुसां उपदेस री गल्ल सई लिओ किजो कि मै इस बारे बिच बडी अच्छी तरह लिखेरा है। 18 तुसां जो ये पत्ता है कि तीमथियुस हमारा भाई पिछे छुटी गेरा है अगर से तोळे आया ता मै तुसा कने मिलागां 19 अपणे सारे अगुवे जो नम्सकार ते कने सार पवित्र लोका जो नम्सकार, इटलीवाळे तुसां जो नम्सकार बोलदे 20 तुसां सारे कने दया हुन्दी रे। आमीन 21 परमेश्वर रे ते प्रभु यीशु मसीह जी रे दास याकूब रे पास्से का तिन्हा बारा गोत्तरां जो जेहडे तितर-बितर होई करी रैहन्दे, तिन्हा नमस्ते। 22 ओ मेरे भ्याळो, जां तुसी नेक बनेक्की परखां रे बिच पेयो, ता इस जो बडे अनंद री गल समझो। 23 ता इस जो पुरे आनन्द री गल्ल समझो, ऐ जाणी करी कि तुसा रे भरोस्से रे परखे जाणे कने सबर पैदा हुन्दा। 24 पर सबर जो अपणा पूरा कम्म करणा देयो, कि तुसी पूरे ते सिद्ध होई जाओ, ते तुसा अन्दर कुस्की गल्ल री कमी ना रेह्यो। 25 अपण तुस बिच का कुस्की जो अकल रा घाड़ा हो, ता परमेश्वर का मन्गो, जेहडा बगैर उलाहना दित्तेरे सबनां जो उदार होई करी दिन्दा; ते तिस जो दिती जाणी।

# याकूब

## अभिवादन

1 अपण भरोस्से कने मंगेयो, ते किछ सक मत करदे; किजोकी सक करणे वाळा समुंदर री लैह रे साहई है जेहडी ब्यारी कने रुहडदी ते उटकदी।

### भरोसा ते समजदारीगरीबी ते अमीरी

2 इदेह्या महु ऐ ना समझो कि मिन्जो प्रभु का किछ मिलगा। 3 से महु दोगला है ते अपणी सारी गल्लां अन्दर चलाक है। 4 दीन भ्याळ अपणी उच्ची पदवी पर घमण्ड करो। 5 ते अमीर महु अपणी नीच दसा पर; किजोकी तिनिए घा रे फुल्ल साहई जान्दे रैह्ला है। 6 किजोकी सूरज निकळदे ई तेज घुप्प पैदी ते घा जो सुकाई दिन्दी, ते तिसेरा फुल्ल झडी जान्दा, ते तिसेरी सोभा जान्दी रैहन्दी; तिह्याँ ई अमीर महु ने बी अपणे रस्ते पर चलदे-चलदे मिट्टी अन्दर मिली जाणा है। 7 धन्न है से महु, जेहडा परख अन्दर पक्का रैहन्दा; किजोकी तिनिए खरा निकळी करी जीन्दगी रा मुकुट हासिल करणा है, जिसेरी प्रतिज्ञा प्रभु जी ने अपणे प्यार करणे वाळैयाँ जो कितेरी है। 8 जां कुस्की री परख हो ता से ऐ ना बोलो कि मेरी परख परमेश्वर रे पाससे का होया करदी है; किजोकी नां ता बुरी गल्लां कने परमेश्वर री परख होई सकदी, ते नां से कुस्की री परख अपु करदा।

### परख ते लालच होणा

9 पर हर इक महु अपणी ई मरजियाँ बिच खिची करी ते फस्सी करी परख अन्दर पैन्दा। 10 फिरी मरजी दुपराणी होई करी पाप जो पैदा करदी ते जां पाप बधी जान्दा ता मौत जो पैदा करदा। 11 ओ मेरे प्यारे भ्याळो, धोखा मत खाओ। 12 किजोकी हर इक खरा वरदान ते हर इक खरा दान उप्पर का ई है, ते जोत रे पिता रे पाससे का मिलदा, जिस अन्दर नां ता कोई बदलाव होई सकदा, ते नां अदल-बदल री वजह कने तिस पर छों पैन्दी। 13 तिनिए अपणी ई मरजी कने असा जो सच्च रे वचन कने पैदा कितेया, ताकि असी तिसेरी बणाएरी चीज्रा बिच का इक तरीके रे पैल्ले फळ होन। 14 ओ मेरे भ्याळो, ऐ गल्ल तुसी जाणी लियो; इधेरे ताई हर इक महु सुनणे ताई त्यार ते बोलणे अन्दर सबर वाळा ते लैह अन्दर मड्डा हो। 15 किजोकी महु री गुसा परमेश्वर रे धरमा रा निरवाह नी करी सकदी। 16 इधेरे ताई सारी गन्दगी ते बैर भावना री बढोतरी जो दूर करी के, तिस वचन जो नमरता कने ग्रेह करी लेयो, जेहडा मन अन्दर बाया गेया ते जहडा तुसा रे प्रराणां रा उद्धार करी सकदा। 17 अपण वचनां पर चलणे वाळे बणो, ते सिरफ सुनणे वाळे ई नी जेहडे अपणे आप जो धोखा दिन्दे। 18 किजोकी जेहडा कोई वचनां जो सुनणे वाळा हो, ते तिस पर चलणे वाळा नी हो, ता से तिस महु रे साहई है जेहडा अपणा स्वाभाविक मुंह सीस्से अन्दर दिखदा

### सुनणा ते करणा

19 इधेरे ताई कि से अपणे आप जो दिखी करी चली जान्दा, त तिस्सी बेले इ भुली जान्दा कि मैं कदेह्या था। 20 अपण जेहडा महु आजादी री सिध व्यवस्था पर ध्यान करदा रैहन्दा, तिनिए अपणे कम्म अन्दर इधेरे ताई

असीस पाणी कि सुणी करी नी, अपण तदेह्या ई कम्म करदा। 21 अगर कोई अपु जो भगत समझो, ते अपणी जिभ पर लगाम नां देयो, अपण अपणे दिल जो धोखा देयो, ता तिसेरी भती फजूल है। 22 म्हारे रे परमेश्वर ते पिता रे नेडे सुध ते निरमल भती ऐ है कि, अनाथ बच्चेयाँ ते विधवा जनानियाँ रे कलेश अन्दर तिन्हेरी सुधि लेन, ते अपु जो दुनिया का निस्कलंक रखन। 23 ओ मेरे भ्याळो, म्हारे महिमा कने भरे रे प्रभु यीशु मसीह रा भरोसा तुसां अन्दर भेद-भाव समेत नां हो। 24 किजोकी अगर इक मरद सोन्ने रे छल्ले ते सोल्ले कपडे पाएरे तुसा री सभा अन्दर आए ते इक कंगाल बी मैल्ले-कुचैल्ले कपडे पाई करी आओ, 25 ते तुसी तिस छैळ कपडे वाळे रा मुंह दिखी करी बोलन कि तू उते खरी जगाह जाई करी बैह; ते तिस कंगाल जो बोलन कि, तू इत्ते खडी रैह, या मेरे पैरां री पीढी का बैह। 26 ता कै तुसा ने अपु अन्दर भेद-भाव नी कितेया ते बुरे विचार कने इन्साफ करणे वाळे नी ठैहे? 27 ओ मेरे भ्यालो सुणो; कै परमेश्वर ने इस दुनिया रे कंगालां जो नी चुणेया कि भरोस्से अन्दर धरमी ते, तिस राज रे अधिकारी होन, जिसेरी प्रतिज्ञा तिनिए उन्हा कने कितेरी है जेहडे तिस कने प्यार करदे ?

### ऊँच-नीच रे खलाफ चेतावनी

2 पर तुसा ने तिस कंगाल री बेजती किती: कै अमीर महु तुसां पर जुल्म नी करदे ते कै से ई तुसा जो कचैहीयाँ अन्दर घसीट्टी घसीट्टी करी नी लैई जान्दे ? 2 कै ऐ से ई नी हिन, जेहडे मसीह रे तिस उत्तम नां री बेजती जिसेरे तुसी हिन् ? 3 तां बी अगर तुसी पवित्र सास्त्र रे इस वचन रे मुताबिक, कि तू अपणे पड़ोसी कने अपणे बराबर प्यार रख, सच्ची ई तिस राज्य व्यस्था जो पूरी करदे, ता ठिक करदे। 4 अपण अगर तुसी भेद-भाव करदे, ता पाप करदे; ते व्यस्था तुसा जो पाप्पी ठैहन्दी। 5 किजोकी जेहडा कोई सारी व्यस्था रा पालन करदा अपण इको ई गल्ल अन्दर चुकी जाओ ता से सबनी गल्लां अनदर गुनेहगार ठैहैया। 6 इधेरे ताई कि जिनिऐ ऐ बोलेया कि तू व्याभिचार मत करदा, तिनिए ई एह बी बोलेया कि तू खून मत मरदा, इधेरे ताई अगर तैं व्याभिचार ता नी कित्ता, अपण खून कित्ता, तां बी तू व्यवस्था जो तोड़णे वाळा ठैहैया। 7 तुसी तिन्हा महुआं रे साहई वचन बोलो, ते कम्म बी करो, जिन्हेरा न्याय आजादी री व्यस्था रे मुताबक होणा। 8 किजोकी जिनिऐ रैह्ला नी कित्ता, तिसेरा न्याय बगैर रैह्ला रे होणा है: रैह्ला न्याय पर जीत हासिल करी लिन्दी। 9 ओ मेरे भ्याळो, अगर कोई बोलो कि मिन्जो भरोस्सा है अपण से करम नी करदा हो, ता तिस कने कै फाएदा ? कै इदेह्या भरोस्सा कदी तिसेरा उद्धार करी सकदा ? 10 जे कोई भाई या भैण नंगे होन, ते तिन्हा जो रोज ई रोटी रा घाट्टा हो, 11 ते तुसा बिच का कोई तिन्हा जो बोलो, ठिक ठाक रैओ खरा करी खाई लेयो, तुसी गरम रेहो ते तूत रेहो; अपण जेहडी चीज्रा सरीर ताई जरूरी हिन से तिन्हा जो नां देयो, ता कै फाएदा ? 12 तिह्याँ ई भरोस्सा बी, अगर करम समेत नां हो ता, अपणे स्वभाव अन्दर मरे रा है। 13 अपण कोई बोली सकदा कि तिजो भरोस्सा है ते में करम करदा: तू अपणा भरोस्सा मिन्जो करम बगैर ता दस्स; ते में अपणा भरोसा अपणे करमां रे जरिए तिजो दसगा।

### विश्वास ते कम्म

14 तिज्जो भरोस्सा है कि इक्क ई परमेश्वर है: तू खरा करदा: बुरी आत्मां बी मनदियाँ ते कमदी रहिन्दियाँ। 15 अपण ओ निकम्मे मल्लु, कै तिज्जो ए बी पता नी है कि करम बगैर भरोस्सा करणा फजूल है। 16 जां असा रे पिता अब्राहीम ने अपणे पुत्तर इस्हाक जो बेदी पर चढ़ाया, ता कै से करमां कने धरमी नी ठैहाया गया थिया ? 17 अपण तँ दिखी लिच्छेया कि भरोसे ने तिन्हेरे करमां कने मिली करी असर पाएरा है ते करमां कने भरोस्सा सिध होएरा है। 18 ते पवित्र सास्त्र रा ए वचन पूरा होया कि इब्राहीम ने भरोस्से री प्रतीती किन्ती, ते एह तिसेरे ताई धरम गिणैया गया, ते से परमेश्वर रा मित्तर मन्नेया गया । 19 इयां तुसां ने दिख्खी लेया कि मल्लु सिरफ भरोस्से कने ई नी अपण करमां कने बी धरमी ठैहदा। 20 तिह्याँ ई राहाब वैश्या बी जां तिसा दूतां जो अपणे घरे उतारेया, ते दुज्जे रस्ते का विदा किच्छेया, ता कै से करमां कने धरमी नी ठैही ? 21 अपण, जिह्याँ देह आत्मा रे बगैर मरे री है तिह्याँई भरोस्सा बी करम रे बगैर मरे रा ई है। 22 ओ मेरे भाइयाँ, तुसां बिच का बडे जणेया जो गुरु बनणे री इच्छा नी रखणी चहिंदी। तुसी जाणदे ई हिन कि असा गुरुआं रा बड़ी सख्ती कने न्याय होणा। 23 मैं इधेरे ताई तुसां जो समझाया करदा है कि असा का बड़ी सारी भूल हुन्दी रहन्दी। जे कोई बोलणे बिच कोई चूक ना करो ता से पूरा सही मल्लु है ते से अपू जो पूरा काबू बी करी सकदा। 24 जे असी अपणे काबू बिच करणे ताई घोड़े रे मूह पर लगाम लगांन ता असी तिस जो पूरा काबू बी करी सकदे। 25 या पाणी वाळे जहाजा रा उदारण बी लेई सकदे। चाये से कितणे बी बड्डे हुन्दे अत्ते तेज ब्यार कने चलदे, अपण इक हल्की जदेयी पतवार कने तिस जो चलाणे वाळा तिस पर काबू पाई करी जित्ते कुत्ते लेई सकदा। 26 इय्यां ई जिब्भ, जे सररी रा इक छोटा हिस्सा है, बड्डी-बड्डी डीगा मारदी। अवे जरा सोचो इक जरा करी चिगारी पूरे बण जो फूकी सकदी।

### जिब जो बस बिच रखणा

3 हाँ, जिब्भ इक चिगारी है। एह बुराई री इक पूरी दुनिया है। एह जिब्भ म्हारे सररी रे हिस्सेयां बिच का इक इदेया हिस्सा है, जे पूर सररी जो भ्रष्ट करदा अत्ते म्हारी पूरी जिंदगी बिच अगग लगाई दिंदी। एह जिब्भ नरक री अगग कने बख्खी रहन्दी। 2 दिख्खो, हर तरह रे जंगली जानवर, चिड्डु-पखेरू, रेंगणे वाळे जीव-जन्तु, जलचर मल्लु रे वस बिच हिन। 3 अपण जिब्भ जो कोई वस बिच नी करी सकदा। एह जान लैणे वाळे जैहर कने भरितेरी है जे कदी चैन कने नी रहन्दी। 4 असी इस्सी कने अपणे प्रभु अत्ते परमेश्वर री बड्याई करदे अत्ते इस्सी कने मल्लुआं जो जे परमेश्वर रे रूप बिच बणाये गे हिन, कोसदे बी हिन। 5 इक ई मूह का असीस ते श्राप दोनों निकळदे हिन, मेरे भाइयाँ, इदेया ता नी होणा चहिंद। 6 नाळू रे इक ई मूह का भला कै मीड्डा ते खारा दो तरह रा पाणी निकळी सकदा। 7 मेरे भाइयाँ, कै अंजीर रे बूट्टे पर जैतून या अंगूर री बेलां पर कदी अंजीर लगदे हिन? बिल्कुल नी। अत्ते ना खारे पाणी रे नाळू का कदी मिड्डा पाणी निकळी सकदा। 8 भला तुसां बिच, ज्ञानी ते समझदार कुण है, जे है, उस जो अपणे कम्म दिखाणे चहिंदे कि उसेरे कम्म उस निम्तेपन कने किच्छे गे हिन जे ज्ञान कने जुड़े हिन। 9 अपण तुम्हारे मन बिच बड़ा हिरस अत्ते लालच है, ता अपणे ज्ञान रा ढोलमत पिट्टो। इय्यां करी के तुसी सच्च पर पर्दा पाई करी झुठ बोलेया करदे हिन। 10 इदेया “ज्ञान” ता ऊपर मतलब स्वर्ग का, नी मिलदा, बल्कि से ता संसारिक है। आत्मिक नी है बल्कि सैतान रा है। 11 जित्ते हिरस अत्ते लालच हुन्दा, तित्ते बखेड़े ते हर तरह री बुराई बी हुन्दी। 12 अपण स्वर्ग का आणे वाळा ज्ञान सब का पैल्ले ता पवित्र हुन्दा, फिरी मिलनसार, भद्र, विचारशील, दया कने भरितेरा अत्ते खरे फळ कने लदितेरा, मजबूत अत्ते बगेर भेद-भाव रे ते सच्चा बी हुन्दा।

### स्वर्गीय ज्ञान

13 मेल-मिलाप करणे वाळे तिस बीज जो जिसेरा फळ धार्मिकता है मेल-मिलाप कने बांदे हिन। 14 तुसां बिच लड़ाईया ते झगड़े कुत्ते जा आई गे? क्या

तिन्हा सुख-विलासा का नी जे तुसां रे अगां बिच लड़दे-भिड़दे रहन्दे? 15 तुसी इच्छा रखदे, ते तुसां जो मिलदा नी;इधेरे ताई तुसि खून करदे।तुसी ड़ाह करदे,अपण कुछ हासिल नी करी पादें;तां तुसी लड़दे ते झगड़दे। तुसां जो इस ताई नी मिलदा की तुसि मगंदे नी। 16 तुसी मगंदे अपण मिलदा नी,इसी ताई किजोकी बुरी नीत कने मगंदे,ताकी अपणे खाणे-पीणे बिच उड़ाई देयो। 17 हे रडियो,क्या तुसी नी जाणदी कि दुनिया कने दोस्ती करणा परमेश्वर कने दुस्मणी करणा है? अते जे दुनिया रा दोस्त होणा चाहदां,से अपणे आप जो परमेश्वर रा दुस्मण बणादां। 18 क्या तुसी ए समजदे की पवित्रशास्त्र बेकार ई बोलदा,“जिस आत्मा जो तिन्हा ने असां रे अन्दर असाए रा है,क्या से ईदेइ इच्छा रखदा की जिसेरा फळ ड़ाह करणा हो”?

### ससां कने दोस्ती

4 से ता होर बी अनुग्रह दिदां; इसी वजह कने ए लिख्खे रा है, “परमेश्वर घमडियाँ रा विरोध करदा अपण दिन म्हणुआं पर अनुग्रह करदा।” 2 ईधेरे ताई परमेश्वर रे अधीन होई जा;ते सतान रा सामणा करो, तिनिये तुसां रे सामणे का न्हसि जाणा। 3 परमेश्वर रे नेड़े आओ तां तिन्हा ने बी तुसां रे नेड़े आणा। हे पापियाँ,अपणे हत्थ साफ करो; ते हे दुचित्ते लोक्कां अपणे दिल जो पवित्र करो। 4 दुखी हो,ते शोक करो,ते रोओ। तुसां री हँसी शोक बिच ते तुसां रा आनंद करणा उदासी बिच बदली जाए। 5 प्रभु रे सामणे छोटे बणो तां तिन्हा ने तुसां जो शिरोमणी बनाणा। 6 हे भाइयाँ, इक्क दुए री बदनामी मत करेया करो।जे अपणे भाई री बदनामी करदा या भाई पर इल्जाम लादां, से व्यवस्था री बदनामि करदा ते व्यवस्था पर इल्जाम लादां,ते तू व्यवस्था पर चलणे वाळा नी अपण तिस पर हाकम ठेहरेया। 7 व्यवस्था दैणे वाळा ते तिसेरा हाकम इक्क ई है,जे बचाणे ते खतम करणे दे जोग्गा है। अपण तु कुण है जे अपणे पड़ोसी पर इल्जाम लादां। 8 तुसि जे ए बोलदे,“आज्र या कल असी कुसकी होर सैहर बिच जाई करी तित्ते इक्क साल बिताणा, ते कम्म करी के फेदा कमाणा।” 9 ते ए नी जाणदे की कल क्या होणा। सुणी ता लेयो, तुसां री जिन्दगी है ई क्या? तुसी ता भाप सांई हिन जे थोड़ी देर दिसदी ते फिरी गायब होई जादी। 10 ईधेरे उलट तुसां जो ए करणा चाएदा,जे प्रभु चाहें तां असी जिन्दे रहणा ते ए या ओ काम्म बी करणा।”

### भाइयां पर इल्जाम लाणा

11 अपण अवे तुसी अपणे डिगां मारणे पर घमडं करदे; ईदेया घमडं बुरा हुदां। 12 ईधेरे ताईइ जे कोइ भलाई करणा जाणदा ते नी करदा, तिसेरे ताई ए पाप है।

### घमण्ड रे खलाफ चेतावनी

13 हे अमीरों सुणी तां लेयो,तुसी अपणे आणे वाळे दुखां पर लेरां मारी मारी करी रोओ। 14 तुसां रा धन बिगड़ी गे रा हैते तुसां रे कपडेया जो किड़े खाई गे रे हिन। 15 ते तुसां रे सोन्ने-चाँदी पर काई लगी गे री है;ते तिस काई ने तुसां पर गुआई दैणी,ते आग सांई तुसां रा माँस खाई जाणा। तुसी आखरी युग बिच धन कठेरे रा है। 16 दिख्खो जिन्हा मजदुरां ने तुसां रे खेतर कट्टे रे हिन,तिन्हेरे से मजदुरी जे तुसी धोखा देई करी रखी लिच्छी,चिडां मारेया करदी है,ते लवने वाळेयां री दोहाई सेना रे प्रभु रे कन्नां तिकर पुजि गे री है। 17 तुसी धरती पर मजे-मस्ति बिच ई लगी रेय ते बड़ा ई सुख भोगेया;तुसी इस वध रे दिन ताई अपणे दिल रा पालन पोषण करी के तिसजो मोटा-ताजा बणाया।

### धनवान म्हणुआं जो चेतावनी

5 तुसी धर्मी जो दोषी बणाई करी मारी रख्खेया, से तुसां रा सामणा नी करदा। 2 इधेरे ताई हे भाइयाँ,प्रभु रे आणे तिकर सबर रखो।दिख्खो,किसान धरती री किमती फसल री उम्मीद रखि करी पैल्ले ते आखरी बरखा तिकर सबर रखदा। 3 तुसी बी सबर रखो,ते अपणे दिल जो मजबूत करो,किजोकी प्रभु रा आणा नेड़े है। 4 हे भाइयाँ, इक्क दुज्जे पर इल्जाम मत लाओ,ताकी तुसी गलत ना ठैहरो;दिख्खो हाकम दरवाजे पर खडिते रा

है। 5 हे भाईयों जिन्हा भविष्यद्दक्ता ने प्रभू रे नां कने गल्लां किच्ची, तिन्हैरे दुख उठाणे ते सबर रखणे रा इक्क आर्दश समजो। 6 दिख्खो, असी सबर रखणे वाळ्यां जो धन बोलदे। तुसी अय्यूब रे सबर रखणे रे बारे बिच ता सुणे रा ई है, ते प्रभू रे पास्से का जे तिसेरा फळ होया से तुसी जाणी लिच्चे रा है, जिस कने प्रभू री हद का जादा दया ते करुणा सामणे आदीं।

### दुख बिच सबर रखणा

7 अपण हे मेरे भाईयों, सबका खरी गल्ल ए है कि कसम नी खाणी, न स्वर्ग री, ना धरती री, ते ना ई कुसकी होर चीज दी; अपण तुसां री गल्ल हाँ री हाँ ते ना री ना हो, की तुसि सजा रे जोगे ना ठैहरो। 8 जे तुसां बिच कोइ दुखी है ता प्रार्थना करे। या खुस है ता भजन गाए। 9 तुसां बिच कोइ बमार है ता कलिसीया रे बड्डेयां जो सद्धो, ते से प्रभू रे नां कने तिस पर तेळ मळी करी तिसेरे ताई प्रार्थना करण, 10 ते भरोसे री प्रार्थना कने बमार ने बची जाणा ते प्रभू ने तिसजो उठाई करी खड़ा करणा; ते जे उसने पाप किच्चे रे होण तां से बी माफ होइ जाणे। 11 ईधेरे ताई तुसि अपु बिच इक्क-दुए रे सामणे अपणे-अपणे पापां जो मन्नि लेयो, ते इक्क-दुए ताई प्रार्थना करो, जिस कने खरे होइ जाओ : धर्मी म्हणु री प्रार्थना रे असर कने सब कुछ होइ सकदा। 12 एलिय्याह बी ता असां सांहुई दुख-सुख भोगि म्हणु थिया; ते तिसने

गिड़गिड़ाई करी प्रार्थना की बरखा ना हो; ते साड्डे त्रै साल्लां तिकर बरखा नी होई।

### प्रार्थना री ताकत

13 फिरी तिनिए प्रार्थना किच्ची, ते आसमान का बरखा होइ, ते जमीन फलवतं होइ। 14 हे मेरे भाईयों, जे तुसां बिच का कोइ सच्चाई रे रस्ते का भटकी जाए ते कोइ तिसजो फेरी जाए, 15 तां से ए जाणी लेय कि जे कोई कुसकी भटके रे पापि जो फेरी जाए, से इक्क जिन्दगी जो मौत का बचागां ते मते सारे पापां पर परदा पागां। 16 ईधेरे ताई तुसि अपु बिच इक्क-दुए रे सामणे अपणे-अपणे पापां जो मन्नि लेयो, ते इक्क-दुए ताई प्रार्थना करो, जिस कने खरे होइ जाओ : धर्मी म्हणु री प्रार्थना रे असर कने सब कुछ होइ सकदा। 17 एलिय्याह बी ता असां सांहुई दुख-सुख भोगि म्हणु थिया; ते तिसने गिड़गिड़ाई करी प्रार्थना की बरखा ना हो; ते साड्डे त्रै साल्लां तिकर बरखा नी होई। 18 फिरी तिनिए प्रार्थना किच्ची, ते आसमान का बरखा होइ, ते जमीन फलवतं होइ। 19 हे मेरे भाईयों, जे तुसां बिच का कोइ सच्चाई रे रस्ते का भटकी जाए ते कोइ तिसजो फेरी जाए, 20 तां से ए जाणी लेय कि जे कोई कुसकी भटके रे पापि जो फेरी जाए, से इक्क जिन्दगी जो मौत का बचागां ते मते सारे पापां पर परदा पागां।

# 1 पतरस

## अभिवादन

1 तिस पर तुसी बड़े खुस्स हिन। हालांकि अब्बे तुसां जो थोड़ी देर ताई नेक-बनेकी परखां अन्दर पेई करी दुखी होणा बड़ा जरूरी है। 2 ताकि तुसां रा परखेरा भरोस्सा जेहड़ा अग्गी अन्दर परखेरे सोत्रे का बी जादा कीमती है, तिस जो जां यीशु मसीह ने प्रकट होणा तां परमेश्वर का तारीफ, महिमा ते इज्जत हासिल हो।

### इक जिर्दी उम्मीद

3 तिस कने तुसी बगैर दिखखेरे प्यार करदे, ते अवे ता तिस पर बगैर दिखखेरे बी भरोस्सा करी के इदेह आनन्दित ते मगन हुन्दे, जेहड़ा दसणे का बाह ते महिमा कने भरित्तेरा है। 4 ते अपणे भरोस्से रा प्रतिफळ, मतलब कि आत्मां रा उद्धार हासिल करदे। 5 इस ई उद्धार रे बारे अन्दर तिन्हा भविष्यवाणी करणे वाळ्यो ने बड़ी तोप-ताप ते जांच-पड़ताल किन्ती, जिन्हा ने तिस अनुग्रह रे बारे अन्दर, जेहड़ा तुसां पर होणे जो थिया, भविष्यवाणी किन्ती थी। 6 तिन्हा ने इस गल्ल री तोप किन्ती कि मसीह रा आत्मा, जेहड़ा तिन्हा अन्दर थिया, ते पैल्ले का ई मसीह रे दुखां रे पाससे तिन्हेरे बाद होणे वाळी महिमा री गवाहई दिन्दा थिया, से कुण जळे ते कुदेह बेले रे पाससे इसारा करदा थिया। 7 तिन्हा पर एह जाहिर किन्ता गया कि, से अपणी नी अपण तुसां री सेवा ताई एह गल्लां बोलेया करदे थिये, जिन्हेरी खबर अवे तुसां जो तिन्हेरे जरिए मिलेया जिन्हा ने पवित्तर आत्मा रे जरिए, जेहड़ा स्वर्ग का भेजेया गया: तुसां जो खुसखबीरी सुगाई, ते इन्हा गल्लां जो स्वर्गदूत बी ध्यान कने सुनणा चाहन्दे। 8 धेरे ताई अपणी-अपणी अकल री कमर बहनी करी, ते सचेत होई करी तिस अनुग्रह री पूरी आस रखखो, जेहड़ा यीशु मसीह रे प्रकट होणे रे बेले तुसां जो मिलणे वाळा है। 9 ते हुकम मनणे वाळे बचेयां साहई अपणी अज्ञानता रे बेले री पुराणी मरजियां साहई मत बणो। 10 अपण जदेह्या तुसां रा सदणे वाळा पवित्तर है, तिह्यां ई तुसी बी अपणे सारे चाल-चलन अन्दर पवित्तर बणो। 11 किजोकी लिखखेरा है, कि पवित्तर बणो, किजोकी मैं पवित्तर है। 12 ते जद कि तुसी, ओ पिता, बोली करी तिसका प्राथना करदे, जेहड़ा बगैर भेद-भाव रे हर इक रे कम्म रे साबे न्याय करदा, ता अपणे परदेसी होणे रा बेला डरा कने बिताओ।

### पवित्तर जिन्दगी जीणे री बुलाहट

13 किजोकी तुसां जो पता है कि तुसां रा रोहळा चाल-चलन जेहड़ा बब-दाद्वेयां का चलेया आया करदा है, तिस का तुसां रा छुटकारा चांदी, सोत्रे मतलब कि नास होणे वाळी चीजां कने नी होया। 14 अपण बेगुनाह ते बगैर कुस्की कलंक रे छैलू मतलब कि यीशु रे बहुमुल्य खून रे जरिए होया। 15 तिसेरा ज्ञान ता दुनिया रे बनणे का पैल्ले का ई जाणेया गेरा थिया, अपण अवे इस आखरी जुग अन्दर तुसां ताई प्रकट होया। 16 जेहड़े तिसेरे जरिए परमेश्वर पर भरोस्सा करदे, जिनिए तिस जो मरी गेरेयां रे बिच का जीन्दा कित्तेया, ते महिमा दिती; कि तुसां रा भरोस्सा ते आस परमेश्वर पर हो। 17 इधेरे ताई जद कि तुसां ने भाईचारे री निस्कपट प्रीती रे निम्मित सच रे मनणे कने अपणे मनां जो पवित्तर कित्तेरा है, ता तन-मन लाई करी इक-दुजे

कने जादा प्यार रखो। 18 किजोकी तुसां ने नासमान नी अपण नास नी होणे वाळे बी कने परमेश्वर रे जीवते अते हमेसा ठैहणे वाळे वचन रे जरिए नोआ जनम पाएरा है। 19 इजोकी हर इक प्राणी घा रे साहई है, ते तिसेरी सारी सोभा घा रे फुल्ल साहई है; घा सुक्की जान्दा, ते फुल्ल झड़ी जान्दा। 20 अपण प्रभु रा वचन जुग-जुग ताई पक्का रहै; ते एह ई खुसखबरी रा वचन है जेहड़ा तुसां जो सुणाया गेरा थिया। 21 इधेरे ताई हर तरीके रा बैर-भाव ते छळ ते कपट ते डाह ते बदनाम्मी जो दूर करी के, 22 नोए जम्मेरे बचे रे साहई साफ आत्मिक दुध री लालसा करो, ताकि तिसेरे जरिए उद्धार पाणे ताई बधदे जाओ। 23 अगर तुसां ने प्रभु री किरपा रा स्वाद चखी लिन्तेरा है। 24 तिसेरे नेडे आई करी, जिस जो मल्लुआं ने ता रोहळा ठैहाया, अपण परमेश्वर रे नेडे चुणेरा ते बड़ा कीमती जीन्दा बट्टा है। 25 तुसी बी अप्पु जीन्दे बट्टेयां रे साहई आत्मिक घर बणदे जान्दे, इस कने पुरोहतां रा पवित्तर समाज बणी करी, इदेह आत्मिक बलिदान चढाओ, जेहड़े यीशु मसीह रे जरिए परमेश्वर जो ग्रैह हो।

### जिन्दा पत्थर ते पवित्र प्रजा

2 इधेरे ताई पवित्तर सास्तर अन्दर बी आएरा है कि, दिखखो मैं सिय्योन अन्दर सिरे रा चुणेरा ते बड़ा कीमती बट्टा धरदा; ते जेहड़ा कोई तिस पर भरोस्सा करगा, तिनिए कुस्की बी रीत कने खजळ नी होणा। 2 इधेरे ताई तुसां ताई, जेहड़े भरोस्सा करदे, से ता बड़ा कीमती है, अपण जेहड़े भरोस्सा नी करदे तिन्हा ताई जिस बट्टे जो राज मिस्त्रियां ने रोहळा ठैहाया थिया, से ई कोणे रा सिरा होई गया। 3 ते ठेस लगणे रा बट्टा, ठोकर खाणे री चट्टान होई गेरा है; किजोकी से ता वचन जो नी मनी करी ठोकर खान्दे, ते इधेरे ई ताई से ठैहाए बी गे थिये। 4 अपण तुसी इक चुणेरा वंस ते राज-पदवी-अधिकारी, पुरोहतां रा समाज, ते पवित्तर मल्लु, ते परमेश्वर री अपणी प्रजा हिन, इधेरे ताई कि जिनिए तुसां जो न्हायारे बिच का अपणी अद्भुत जोत अन्दर सट्टेरा है, तिसेरे गुण प्रगट करो। 5 तुसी पैल्ले ता किछ बी नी थिये, अपण अवे परमेश्वर री प्रजा हिन; तुसां पर रहै नी होया थिया अपण अवे तुसां पर रहै होएरा है। 6 ओ प्यारेयो, मैं तुसां का छन्दे करदा कि तुसी अपु जो परदेसी ते यात्री समझी करी तिन्हा दुनियावी मरजियां का जेहड़ी आत्मा कने लड़ाई करदीयां, बची करी रेहो। 7 अन्यजातियां अन्दर तुसां रा चाल-चलन भला हो; इधेरे ताई कि जिन्हा जिन्हा गल्लां अन्दर से तुसां जो कुकरमी समझी करी बदनाम करदे, से तुसां रे भले कम्मां जो दिखखी करी; तिन्हेरी ई नजाह कने कृपा-दृस्टि वाळे रोजे परमेश्वर री महिमा करन। 8 प्रभु ताई मल्लुआं रे ठैहाए गेरे हर इक प्रबन्ध रे अधीन रेहो, राजे रे इधेरे ताई कि से सबनी पर प्रधान है। 9 ते राज्यपालां रे, किजोकी से कुकरमियां जो सजा दैणे खरा करणे वाळ्यो री तारीफ करणे ताई भेजे गेरे हिन। 10 किजोकी परमेश्वर री मरजी एह है कि तुसी भले कम्म करणे कने निरबुधि मल्लुआं री अज्ञानता री गल्लां जो बन्द करी देयो।

### मसीहि जिम्मेदारी

11 ते अपु जो आजाद मन्नो अपण अपणी इस आजादी जो बुराई ताई आड मत बणाओ, अपण अपु जो परमेश्वर रे सेवक समझी करी चलो। 12 सबनी री इज्जत करो, भ्याळां कने प्यार रखखो, परमेश्वर का डरो, राजे री इज्जत करो।

### परमेश्वर रे दास

13 ओ सेवा करणे वाळ्यो, हर तरीक्रे रे डरा समेत अपणे मालकां रे अधीन रेह्यो, नां सिरफ भले ते नमर मालकां रे ई अपण कुटिलां रे बी। 14 किजोकी अगर कोई परमेश्वर रा विचार करी के बेन्याई कने दुख सैहन्दा सैहन्दा कहळा सैह करदा, ता एह सुहावना है। 15 किजोकी अगर तुसां ने गुनाह करी के मुक्के खाए ते सबर कित्ता, ता तिस अन्दर कुण बड्डी गल्ल है? अपण अगर भला कम्म करी के दुख सैहन्दे ते सबर करदे, ता एह परमेश्वर जो खरा लगदा। 16 ते तुसी इधरे ई ताई सद्दे बी गेरे हिन किजोकी मसीह बी तुसां ताई दुख उठाई करी, तुसां जो इक आदरस देई गेरा है, कि तुसी बी तिसेरे चिन्हा पर चलन। 17 नां ता तिनिए पाप कित्तेया, नां तिसेरे मुंह का छळ वाळी कोई गल्ल निकळी।

### मसीह असां रे आदर्श

18 से गाळ सुणी करी गाळ नी दिन्दा थिया, ते दुख चुक्की करी कुस्की जो बी धमकी नी दिन्दा थिया, अपण अपु जो सच्चे न्यायी रे हथ्या सौपी दिन्दा थिया। 19 से अप्पू ई असां रे पापां जो अपणे सरीर पर लिक्तेरे सूळी पर चढी गया जिस कने असी पापां ताई मरी करी धार्मिकता ताई जीन्दगी बितान; तिसेरे ई मार खाणे कने तुसी खरे होए। 20 किजोकी तुसी पैले भटकी गेरे भैड्डां रे साहई थिये, अपण अवे अपणे प्राणां रे रखवाले ते अध्यक्ष का फिरी आई गेरे हिन। 21 ओ लाडीयो, तुसी बी अपने लाडेयां रे नेडे रेयो, इधरे ताई कि जे इन्हा बिच का कोई इदेय हो जे वचन जो ना मनदे होण, 22 तां से बी तुसां रे इज्जत भरे पवित्र चालचलन जो दिख्खी करी बगैर वचन रे अपणी अपणी लाडेयां कने खिची जाण। 23 तुसां रे सिगांर दिखावटी ना हो, मतलब कि बाल गुदंगा, ते सोत्रे रे गेहणे, या बखरे-बखरे तरिक्रे रे कपडे पाणे, 24 बल्कि तुसां रा लुके रा अन्दरुनी इन्सानियत, नम्रता ते मन री दीनता री कदी ना खतम होणे वाळी सजवाट कने सजी रेय, किजोकी परमेश्वर री नजर बिच इसेरा मोल बडा है। 25 पैले जमाने बिच पवित्र जनानियां बी जे परमेश्वर पर उमेद रखदी थी, अपणे आप जो इस्सी तरिक्रे कने सजादीं ते अपणे-अपणे लाडेया रे अधीन रहन्दी थी।

### पती ते पत्नि

3 पतजियां सारा अब्राहम री हुकम रे थल्ले रहन्दि ते तिसजो स्वामी बोलदी थी। इसी तरिक्रे कने तुसी बी जे भलाई करो ते कुसकी तरिक्रे रे डर का ना डरो, तां तिसेरे कुडियां समजी जागीं। 2 तियां इ ओ लाडेयो, तुसी बी समजदारी कने लाडियां कने जिन्दगी बिताओ, ते औरतां जो कमजोर साथी समजी करी तिन्हेरा आदर करो ए समजी करी कि असी दोन्नों जिन्दगी रे वरदान रे वारिस हिन, जिस कने तुसां री प्रार्थना रुकी ना जाण। 3 अते सारे रे सारे इक्क मन ते करुणा कने भरी करी ते भाईचारे वाळा प्यार रखणे वाळे ते दाह करणे वाळे, ते नम्र बनण। 4 बुराई रे बदले बुराई मत करो ते ना गाळ रे बदले गाळ देयो; अपण इसेरे उलट आशीर्वाद इ देयो, किजोकी तुसी आसीस रे वारिस होणे ताई सद्दे गे ए हिन। 5 किजोकी “जे कोई जिन्दगी री मर्जी रखदा ते खरे दिन दिखणा चाहदां, से अपणि जिब्व जो बुराई का ते अपणे ओड्डां जो छळ रि गल्लां का रोक्कि रखे। 6 से बुराई रा साथ छड्डे ते भलाई इ करण; से मेल-मिलाप जो तोपण, ते तिसेरी कोसिस बिच लगी रहण। 7 किजोकी प्रभू री हक्कां धर्मीयां पर लगी रहन्दी, ते तिन्हेरे कात्र तिन्हेरे मित्रत पाससे लगी रहन्दे; अपण प्रभू बुराई करणे वाळ्यो का परे रहन्दे।”

### भलाई करणे री वजह कने सताया जाणा

8 जे तुसी भलाई करणे ताई हमेसा तयार रेयो तां तुसां री बुराई करणे वाळा फिरी कुण है? 9 जे तुसी धर्म री वजह कने दुख बी चुक्को तां धन हिन; अपण लोकां रे डराणे का मत डरो, ते ना घबराओ 10 अपणमसीह जो प्रभू जो समजि करी अपणे अपणे मन बिच पवित्र समजो। जे कोइ तुसां जो तुसां री उम्मीद रे बारे बिच किछ पुच्छे, तिसजो जवाब देंने ताई हमेसा तयार रेयो, अपण नम्रता ते इज्जत कने। 11 ते विवेक बी साफ रखखो, इधरे ताई कि जिन्हा गल्लां रे बारे बिच तुसां री बदनामी हुदीं तिन्हेरे बारे बिच से जे मसीह बिच तुसां रे खरे चाल-चलन री बेज्जती करदे, सरमसार होण। 12 किजोकी जे परमेश्वर री ए इ मर्जी हो कि तुसी भलाई करणे री वजह कने दुख चुक्को तां ए बुराई करणे री वजह कने दुख झेलने का जादा खरा है। 13 इधरे ताई कि मसीह ने बी, मतलब अधर्मियां ताई धर्मीं ने, पापां री वजह कने इक्क बारी दुख झेल्लेया, ताकी असां जो परमेश्वर का पुजाए; से सरिरी रुप बिच ता मारे गे, अपण आत्मा रे तौर पर जिन्दे कित्ते गे। 14 तिसी बिच उन्हा ने जाई करी कैदी आत्मां जो बी प्रचार कित्ता, 15 जिन्हा ने तिस बिक्ते रे समय बिच हुकम नी मन्नेया, जां परमेश्वर ने नूह रे दिनां बिच सबर बणाई रुके रेय ते से जहाज बणेया करदा थिया, जिसेरे बिच बेइ करी थोडे लोक मतलब कि आठ जणे पाणि का बची गे। 16 तिसी पाणी रा उदारण बी, मतलब बपतिस्मा, यीशु मसी जी रे जिन्दे होइ जाणे रे जरिये अवे तुसां जो बचादां; इस कने सरीर रे मैल जो दूर करणे रा मतलब नी है, अपण साफ विवेक कने परमेश्वर रे बस बिच होई जाणे रा मतलब है। 17 से स्वर्ग बिच जाई करी परमेश्वर रे सज्जे पाससे जाइ करी बेइ गे ते स्वर्गदूत ते अधिकारी ते ताकत वाळे लोक तिन्हेरे थल्ले कित्ते गे रे हिन। 18 इधरे ताई जां कि मसीह ने सरीर बिच होईकरी दुख उठाया ता तुसा बी उस्सी इच्छा जो अपनाई करी हथियार अपनाई लेयो किजोकि जिस ने सरीर बिच दुख उठाया, से पाप का छुटी गया। 19 ताकि आणे वाळे बल्ले बिच अपणी बचे री सरीरिक जिंदगी मल्लुआं री इच्छा रे साहब कने नी बल्कि परमेश्वर री मर्जी रे साहब कने जीओ। 20 किजोकि बिक्ते कल रा बेला तुसा ने जे विषय-भोग, कामुकता, पियक्कडपन, रंगरलियां, मद्यपान-गोष्ठियां, अते नफरत करणे रे लायक मूर्ती पूजा करणे बिच गंवाई करी होरसी जाति रे लोकां रे साहब कने कम्म कित्ते हिन, सेहई बडा है। 21 अवे जाँ तुसी इस नफरत रे लायक रह्क-सैह्क बिच उन्हेरा साथ नी दिंदे ता से हरान हुन्दे। से तुम्हारी बुराई करदे हिन। 22 उन्हा जो जे अबे जिंदे या मरी गेरे हिन, अपणे बरताव रा लेखा-जोखा उस मसीह जो दैणा पैणा जे तिन्हेरा न्याय करणे वाळा है।

### बदले री जिन्दगी

4 इधरे ताई उन्हा विस्वासियां जो जे मरी गेरे हिन शुभ-बसेख सुणाया गेया कि सरीरिक रुप बिच चाये तिन्हेरा न्याय मल्लुआं रे साहब कने हो अपण आत्मिक रुप बिच से परमेश्वर रे साहब कने जिंदा रेहू 2 सब गल्लां रा अंत झट हुणे वाळा है, इधरे ताई समझदार बणो अत्ते अपणे पर काबू रखखो ताकि तुसा जो प्राथना करणे बिच मदत मिलो। 3 अते सब का बड्डी गल्ल एह है कि इक-दूजे ताई प्यार रखखो, किजोकि प्यार अणगिणत पापां जो ढक्की दिंदा। 4 बगेर बुडबुडाये रे इक दूजे री खात्तर-दारी करो। 5 जिस जो जे वरदान मिले रा है, से तिस जो परमेश्वर रे अलग-अलग तरिक्रे री दया रे भले भण्डारियां साहई इक-दूजे री सेवा बिच लगान। 6 जे कोई बी सिक्सा देयो, से इय्यां दे कि मन्नो परमेश्वर रा ई वचन है। जे कोई सेवा करन, ता उस सक्ति कने करन जे परमेश्वर दिंदे हिन, जिस कने सब गल्लां बिच यीशु मसीह रे जरिये, परमेश्वर री महिमा हो। महिमा अते हक हमेसा हमेसा ताई तिन्हेरा ई है। आमीन

### परमेश्वर रे भले भण्डारी

7 ओ प्यारे दोस्तो, जे दुख रे रुप बिच अग तुसा जो परखणे ताई तुसा बिच भडकी है, इस कने एह समझी करी हरान मत हो कि अनोखी गल्लां तुसा पर बिक्तेया करदी है 8 बल्कि खुस होई जाओ कि तुसी मसीह रे दुखां बिच साझी हिन, ताकि जाँ उसेरी महिमा सामणे आये ता तुसा बी खुस अत्ते मग्न

होई सको।<sup>9</sup> जे मसीह रे नां री वजह कने तुसां री बेजती किती जांदी ता तुसी धन्न हिन, किजोकि महिमा री आत्मा, जे परमेश्वर रा आत्मा है, तुसां बिच रहन्दा।<sup>10</sup> तुसां बिच का कोई जान लैणे वाळा, चोर, या बुरे कम्म करणे वाळे होणे, या दुज्येयां रे कम्म बिच रुकावट पाणे वाळा बणी करी दुख ना पांन।<sup>11</sup> अपण जे से मसीही होणे रे नाते दुख पांन, ता से अपणी बेजती ना समझो, बल्कि अपणे इस नां तांई तांई परमेश्वर री महिमा करो।

### मसीह रे दुखां बिच शामिल होणा

<sup>12</sup> किजोकि से बेला आई गेरा है, कि पैह्ले परमेश्वर रे टब्बर का ई न्याय री सुरूआत हो, अत्ते जे एह म्हारे का ई सुरू हुन्दा ता जिन्हा ने परमेश्वर रे शुभ-बसेख जो नी मन्नेया तिन्हेरा नतिजा कै हुन्ना? <sup>13</sup> अते जे इक धर्मी मल्लु जो ई उद्धार मिलणा मुस्किल है ता भक्ति नी करणे अते पापियां री कै हालत होणी? <sup>14</sup> इधेरे तांई से बी जिन्हा जो परमेश्वर री मर्जी रे साहब कने दुख मिलदा है, उन्हा जो सही कम्म करदे अपणे अपणे प्राणां जो विसवास रे लायक दुनिया री कारीगिरी करणे वाळे रे हवाले करी दैणा चहिंदा। <sup>15</sup> तुसां बिच जे पुराणे हिन मै तिन्हा साई पुराणा ते मसीह रे दुखां रा ग्वाह ते सामणे आणी वाळी महिमा बिचच सहभागी होई तिन्हा जो ए समजादां, <sup>16</sup> की परमेश्वर रे तिस झुडं री जे तुसां बिच है रखवालि करो ते ए दबाव कने नी अपण परमेश्वर री मर्जी रे मुताबक खुसी कने ते नीच कमाई तांई नी अपण मन लाई करी। <sup>17</sup> जे लोक तुसां जो दित्ते गे रे हिन तिन्हा पर हक्क मत जमाओ ते तिन्हा आदर्श बणो <sup>18</sup> जां सबका बड्डा रखवाले ने सामणे ईणा तां तुसां जो महीमा रा मुकूट दित्तेया जाणा जे मुझाणे वाळा नी है। <sup>19</sup> इसि तरिके कने नोजवाणों तुसी बी पुराणेयां रे नेडे रेयो नी तां तुसि सारेयां इक्क-दुए री सेवा तांई दीनता कने तैयार रेयो।

### प्राचीन ते नोए मुडेंया जो सदेश दैणा

**5** इस तांई परमेश्वर ताकतवर हत्थां रे थल्ले हलिमियत कने रेयो,जिस कने से तुसां जो ठीक वक्त पर बधाए।<sup>2</sup> अपणी सारी चिन्ता तिन्हा पर

ई पाइ देयो किजोकी तिन्हा जो तुसां रा ध्यान है।<sup>3</sup> चौकन्ने रेयो ते जागदे रेयो;किजोकी तुसां रा दुस्मण सतान इस मौक्रे री तोप बिच रहन्दा की कुसजो फाडी खाए।<sup>4</sup> भरोसे बिच मजबूत होइ करी,ते ए जाणी करी तिसेरा सामना करो कि तुसां रे भाई जे इस दुनिया बिच हिन इसि तरिके कने दुख भोगेया करदे हिन।<sup>5</sup> अवे परमेश्वर जे सारी मेहरबानयां रा दैणे वाळा है ,जिन्हा ने तुसां जो मसीह बिच अपणी हमेसा री महीमा तांई सदेया,तुसां रे थोड़ी देर दुख भोगणे रे बाद अप्पु ई तुसां जो सिद्ध ते स्थिर ते ताकतवर करणा।<sup>6</sup> तिन्हेरा ई साम्राज्य हमेसा हमेसा तांई रेय। आमीन ।<sup>7</sup> मै सिलवानुस रे हत्थां,जिसजो मै भरोसेमदं भाई समजदा, थोडे बिच ई तुसां जो लिखि करी समझाया,ते ए ग्वाई दित्ति कि परमेश्वर रा सच्चा अनुग्रही ए इ है,इसि बिच टिके रेयो <sup>8</sup> जे बेबिलोन बिच तुसां सांई चुणे रे लोक हिन,से ते मेरा मुडां मरकुस तुसां जो नमस्कार बोलदे हिन।<sup>9</sup> प्यार रे चुमबन कने इक्क-दुए जो नमस्कार करो। तुसां सारेयां जो,जे मसीह बिच हिन,सान्ति मिलदी रेय ।<sup>10</sup> शमौन पतरस रे पास्से का जेहड़ा यीशु मसीह रा प्रेरित ते दास है, तिन्हा मल्लुआं रे नां जिन्हा ने असा रे परमेश्वर ते उद्धार करणे वाळे यीशु मसीह री धार्मिकता कने असा साहई बहुमुल्य भरोस्सा हासिल कित्तेया।<sup>11</sup> परमेश्वर रे ते असा रे प्रभु यीशु मसीह पछियाण रे जरिए अनुग्रह ते सान्ती तुसां अन्दर बडी भारी कने जादा होई जाओ।

### आखरी अभिवादन

<sup>12</sup> किजोकी तिसेरे ईश्वरीय समर्थ ने सब किछ जेहड़ा जीन्दगी ते भग्ती कने जुडेरा है, असा जो तिसेरी ई पछियाण रे जरिए दित्तेरा है, जिनिए असा जो अपणी ई महिमा ते सदगुण रे साबे सदेरा है।<sup>13</sup> जिन्हेरे जरिए तिनिए असा जो बहुमुल्य ते बडी ई बड्डी प्रतिज्ञां दित्तेरी हिन; ताकि इन्हेरे जरिए तुसी तिस सडाहट का फुटि करी जेहडी दुनिया अन्दर बुरी मरजियाँ कने हुन्दियाँ, ईश्वरीय स्वभाव रे समभागी होई जाओ।<sup>14</sup> ते इधेरे ई तांई तुसी सबनी तरीके री कोसिस करी के,ते अपणे भरोस्से पर सद-गुण अते सदगुण पर समझ,



## 2 पतरस

### अभिवादन

1 ते समझ पर सबर ते सबर पर धीरज अते धीरज पर भक्ति, 2 ते भक्ति पर भाई-चारे री प्रीती, ते भाई-चारे री प्रीती पर प्यार बधान्दे जाओ।

### ईश्वरीय बुलाहट ते चुनाव

3 किजोग्तीगर ऐ गल्लां तुसा अन्दर ई रह्हे ते बधदी जान, ता तुसां जो असां रे प्रभु यीशु मसीह री पछियाण अन्दर रोहले ते बगैर फळे रे नी होणा दैणा। 4 ते जिस अन्दर एह गल्लां नी हिन्, से अहन्ना है, ते तिस जो धुंदला लिब्दा, ते अपणे पिछली जीन्दगी रे पापां का धोई करी सुद्ध होणा भुली बेट्टेरा है। 5 इधेरे ताई ओ भ्याळो, अपणे सट्टे जाणे ते चुणी लिक्ते जाणे जो सिद्ध करणे री खरे तरीक्रे कने कोसिस करदे जाओ, किजोकी अगर इह्याँ करगे ता, कदी बी ठोकर नी खान्ने। 6 अपण इस तरिक्रे कने तुसी असा रे प्रभु ते उद्धार करणे वाळे, यीशु मसीह रे अनन्त राज्य अन्दर बडी इज्जत कने जाई सकगे। 7 इधेरे ताई अगर तुसी इन्हा गल्लां जो जाणदे, ते सच्च रा वचन तुसा जो मिलेरा है, तिस अन्दर बणी रह्हे, तां बी मैं तुसां जो इन्हा गल्लां री सुधि दुआणे ताई हमेसा त्यार रह्हा। 8 ते मैं ऐ अपने ताई खरा समझदा कि जां ताई मैं इस डेरे अन्दर है, तां ताई तुसां जो सुधि दुआई करी उभारदे रेह्याँ। 9 किजोकी ऐ जाणदा कि मसीह रे वचन रे साब्बे मेरे डेरे रा दाहई दिक्ते जाणे रा बेला तोळे ई आणे वाळा है। 10 इधेरे ताई मैं इदेहई कोसिस करणी कि मेरे चली जाणे का बाद तुसी इन्हा सब गल्लां जो हमेसा याद करी सकन। 11 किजोकी जां असां ने तुसा जो अपणे प्रभु यीशु मसीह री समर्थ री, ते इणे री खबर दिक्ती थी, ता से चलाक्री कने बणाएरी काह्लियाँ रा अनुसरण नी किक्तेया थिया, अपण असा ने अप्पु ई तिसेरे प्रताप जो दिख्खेया थिया।

### पतरस रा आखरी समय

12 कि तिनिए परमेश्वर का इज्जत ते महिमा पाई, जां तिस प्रतापमय महिमा बिच का एह अवाज आई कि, "एह मेरा प्यारा पुत्तर है, जिस का मैं खुस्स है।" 13 ते जां असी तिसेरे कने पवित्र पाहडा पर थिये, ता स्वर्ग का ऐ ई अवाज इन्दी सुणी थी। 14 ते असा का जेहडे भविस्वाणी करणे वाळ्योँ रे वचन हिन्, इस घटना कने पक्के ठैहे, ते तुसी ऐ खरा करदे कि जे ऐ समझी करी तिस पर ध्यान करदे कि, से इक दीय्या है, जेहडा न्हारी जगाह अन्दर तां ताई लौ दिन्दे रह्हे, जां ताई कि पौ नी फटो, ते भौर रा तारा तुसा रे दिलां अन्दर नी चमकी उठदा। 15 अपण पैल्ले एह जाणी लेयो कि पवित्र सास्त्र री कोई बी भविस्ववाणी कुस्की री अपणी ई सोच रे साब्बे पूरी नी हुन्दी।

### मसीह री महिमा रे गुआह

16 किजोकी कोई बी भविस्ववाणी महु री मरजी कने कदी बी नी होई, अपण भत महु पवित्र आत्मा रे जरिए उभारे जाई करी परमेश्वर रे पास्से का बोलदे थिये। 17 जिस तरिक्रे कने तिन्हा लोक्कां बिच झुट्टे भविस्ववाणी करणे वाळे थिये, तिसी तरिक्रे तुसां बिच बी झुट्टे उपदेस दैणे वाळे होणे, जे खतम करणे वाळे नाटक री सुरुआत लुकी लुकी करी करगे, ते तिस स्वामी रा जिसने तिन्हा जो खरिदी लिक्ते रा है इन्कार करगे, ते अपु जो तौळे खातमे

बिच पाई दैणा। 18 मते जणेया ने तिन्हेरे साई गलत गल्लां करणी, जिसेरे वजह कने सच्चाई रे रस्ते री बेजती किक्ती जाणी। 19 तिन्हा ने लालच ताई गल्लां बणाई करी तुसां जो अपणे फेदे री वजह बनाणा, ते जे सजा रा हुकम तिन्हा पर पैल्ले का होइ चुकी री है तिसेरे इणे बिच जरा बी देर नी, ते तिन्हेरी तबाई कदी झमाई नी लिदीं। 20 किजोकी जां परमेश्वर ने तिन्हा स्वर्गदुतां जो जिन्हा ने पाप किक्ता नी छड्डेया, अपण नरक बिच पाई करी न्याहरे बिच पाई दिता ताकी ईसांफ रे दिन तिकर कैदी रहण; 21 ते पुराणे जमाने री दुनिया जो बी ना छड्डेया बल्कि भक्ति का हटे री दुनिया पर पाणी री बडी बड्डि मुसीबत भेजि, अपण धर्म री गल्ल सुनाणे वाळे नूह समेत आठ लोक्कां जो बचाई लिक्तेया;

### झूठे शिक्षक

2 ते सदोम ते अमोरा रे सैहरां जो तबाई री इक्क इदेइ सजा दिक्ती कि तिन्हा जो फुकि करी राख बिच मिळाई रख्खेया ताकी से आणे वाळे भक्ति का हटे रे लोक्कां री सीख ताई इक्क मिसाल बनण, 2 ते धर्मी लूत जो जे अधर्मियां रे बुरे चाल-चलन का बडा दुखी थिया छुटकारा दिक्तेया। 3 (किजोकी से धर्मी तिन्हेरे बिच रह्हे होए ते तिन्हेरे गलत कम्मां जो दिख्खि-दिख्खि करी ते सुणी-सुणी करी, हर रोज अपणे सच्चे मन जो दुखी करदा करदा था)। 4 तां प्रभु भक्तां जो परिक्षा बिच का कड्डि लैणा ते अधर्मियां जो ईसांफ रे दिन तिकर सजा री हालत बिच रखणा बी जाणदा, 5 खास तौर पर तिन्हा जो जे खराब इच्छा रे पिच्चे सरीर रे हसाब कने चलदे ते प्रभूता जो बेकार समजदे। से ढीट, ते जिद्धि, त उच्चे पद वाळ्योँ जो बूरा भला बोलने का नी डरदे, 6 तां बी स्वर्गदूत जे सक्ति ते ताकत बिच तिन्हा का बड्डे हिन, प्रभू रे सामणे तिन्हा जो भला-बूरा बोलि करी तिन्हा पर इल्जाम नी लादे, 7 अपण ए लोक नासमज जानवरां साई इ हिन, जे पकडे जाणे ते खतम होणे ताई पैदा होए रे हिन; ते जिन्हा गल्लां जो जाणदे इ नी तिन्हेरे बारे बिच दुज्योँ जो बूरा-भला बोलदे, तिन्हा ने अपणी सडआहट बिच अपु इ सडी जाणा। 8 दुज्येया रा बूरा करणे रे बदले तिन्हेरा इ बुरा होणा। तिन्हा जो दिन, दोपेहर मजे-मस्ति करणा खरा लगदा। ए कलक ते इल्जाम है जां से तुसां कने खादें-पिन्दे ते अपणे पास्से का प्यार कने खाई-पी करी मजे-मस्ति करदे। 9 तिन्हेरी हक्खां बिच व्यभिचार बसे रा है ते से पाप किक्ते बगैर रुकी नी सकदे, से चंचल मन वाळ्योँ जो फुसलाई लिन्दे, तिन्हेरे मन जो लालच करणे री आदत होइ गी री है; से शाप री बच्चे हिन। 10 से सिद्धे रस्ते जो छड्डि करी भटकी गे रे हिन, ते बोअर रे पुत्तर बिलाम रे रस्ते पर चली पे रे हिन जिनिजे अधर्म री मजदुरी जो पसंद किक्तेया; 11 अपण तिसेरे अपराध रे बारे बिच ताना दिक्तेया गया इक्ते तिकर की इक्क बेजुबान गधी ने म्हणुआं री बोल्लि बिच तिस भविष्वाद्दता जो तिसेरे बावलेपन का रोक्केया। 12 ए लोक सुक्के कुँए ते आँधी रे उड़ाए रे बद्दल हिन; तिन्हेरे ताई हमेसा रा न्याहरा ठेहराया गे रा है। 13 से बेकार बिच घमंड री गल्लां करी करी के लुचपन रे कम्मां रे जरिये तिन्हा लोक्कां जो सरिरी लालच बिच फसाई लिन्दे जे भटके बिच का हल्ले निकळेया इ करदे हिन। 14 से तिन्हा जो अजाद करणे री कसम तां खान्दे अपण अप्पु इ सडाहट रे गुलाम हिन, किजोकी जे इन्सान जिस का हारी गे रा है, से तिसेरा गुलाम बणी

जादां। 15 जां से प्रभु ते छुड़ाणेवाळे यीशु मसीह जी री पेहचान रे जरिये दुनिया री बखरी-बखरी बुराईयां का बची निकळे,तां फफिरी तिन्हा बिच फसी करी हारी गे तां फिरी तिन्हेरी पिचली हालत पैलि का बी बुरी होइ गे री है। 16 किजोकी धर्म रे रस्ते रा ना जानणा इ तिन्हेरे तांई इसका भला हुदां कि तिसजो जाणी करी,तिस पवित्र हुकम का फीरी जादें जे तिन्हेरे जो दित्ती गेइ थी। 17 तिन्हा पर ए कहावत ठीक बैहन्दि कि,कुत्ता अपणी छाटं रे पास्से ते नुहाई री सुअरणी चिक्कड़ा बिच हटी जादीं। 18 ओ मेरे प्यारे दोस्तों, अवे एह दूझी चीठी है जे मैं तुम्हारे जो लिखेया करदा है। इन्हा दोनां चिट्ठियां बिच उन्हा गल्लां जो चेता दुआई करी मैं तुम्हारे सुच्चे मन जो जगाणे री कोसिस किती है। 19 ताकि तुसी उन्हा गल्लां जो जे पवित्र भविष्यवाणी करणे वाळेयां ने पैले का ई बोली हिन, अत्ते म्हारे प्रभु ते उद्धार करणे वाळे रे हुकम जो चेता करो जे तुसां जो तुम्हारे बसेख देणे वाळे दूतां रे जरिये दित्तेया गया थिय्या। 20 सब का पैले तुसां जो एह जाणी लैणा चहिदा कि आखिरी दिनां बिच मजाक उड़ाणे वाळेया ने आणा जिन्हा अपणी ई बुरी इच्छा रे साहब कने चलणा। 21 अत्ते तिन्हा बोलणा, "कै होया तिसेरे फिरी आणे रे वादे रा? किजोकि म्हारे पुरखज ता चली बस्से। अपण जां का दुनियां बणी है, हल्ले तांई सब किच्छ तिय्यां रा तिय्यां चली आया करदा है।" 22 अपण जां से इदेया बोलदे ता से एह भूली जादे कि परमेश्वर रे वचन का ई अम्बर जुगा का लेईकरी अबे तांई है अत्ते दुनियां पाणी कने बणी ते पाणी बिच टिकी री है,

### प्रभु रे आणे रा दिन

3 अत्ते इस्सी कने उस जुग री दुनियां सुनामी कने खत्म होई गेई। 2 अपण अज एह अम्बर ते धरती उस्सी वचन री वजह कने भस्म होणे तांई हिन, अत्ते एह अधर्मी मल्लुआं रे न्याय अत्ते नाश होणे रे दिन तांई इय्यां ई रहे। 3 अपण प्यारे दोस्तों, इस इक गल्ल जो मत भूलो: प्रभु तांई इक रोज हजार साल रे बराबर है ते हजार साल इक दिन जदेया है। 4 प्रभु अपणे वायदे जो पूरा करणे तांई बड़ी हाण नी लगान्दा। जिय्यां कि किच्छ मल्लु सोचदे हिन। बल्कि से म्हारे तांई सवर रखदे किजोकि से कुसकी बी मल्लु जो खत्म नी होणा दैणा चाहन्दे। बल्कि से चाहन्दे कि सब अपणे पापां का तौबा करी लेंन। 5 अपण प्रभु रा दिन चुप चाणे चोर साहई आणा। उस रोज इक डरोणी अवाज होणी ते अम्बर ने गायब होई जाणा ते अम्बरां रे पिंड अग बिच फूकी करी खत्म होई जाणे अत्ते धरती ते तिस पर कित्ते रे कम्म फूकी करी भस्म होई जाणे। 6 किजोकि एह सब चीजां इस्सी तरिके कने ई खत्म होणी हिन ता तुसी सोचो तुम्हारे जो पवित्र जिंदगी जीणे बिच ते भक्ति बिच कदेया होणा

चहिदा? 7 तुम्हारे जो परमेश्वर रे आणे वाळे दिन री भाळ करणी चहिदी अत्ते उस रोज जो जल्दी लियाणे री कोसिस करणी चहिदी। उस दिन अम्बर अग री लपटा कने फूकी करी खत्म होई जाणा ते अम्बरां रे पिंड उस सेक कने घूळी जाणे। 8 अपण असी परमेश्वर रे वचन रे साहब कने इक नौये अम्बर ते धरती री भाळ करेया करदे हिन जिस बिच धार्मिकता वास करदी। 9 इधेरे तांई मेरे प्यारे दोस्तों, किजोकि तुसी इन्हा गल्लां री भाळ करेया करदे हिन, पूरी कोसिस करो कि तुसी सांति कने प्रभु री नजर बिच बेदाग ते बेकसुर निकळो, 10 म्हारे प्रभु रे सवर जो उद्धार समझो। जिय्यां कि म्हारे प्यारे भाई पौलुस ने परमेश्वर का मिली री सही-गलत री समझ कने तुम्हारे जो लिखेया थिय्या। 11 अपणी होर सब चिट्ठियां साहई उस चिट्ठी बिच उसने इन्हा गल्लां रे बारे बिच बोले रा है। उन्हा चिट्ठियां बिच किच्छ गल्लां इदेयी हिन जिन्हा जो समझाणा मुस्किल है अनपढ़ ते चंचल मल्लु उन्हेरे मतलब जो तोड़ी मरोड़ी करी, जिय्यां कि से पवित्तर सास्त्र री होर गल्लां कने बी करदे, ईय्यां करी के से अपणे ई पैरां बिच कुल्हाड़ी मारे या करदे हिन। 12 इधेरे तांई मेरे प्यारे दोस्तों, किजोकि एह गल्लां तुम्हारे जो पैले का ई पता हिन इधेरे तांई सावधान रेयो ताकि तुसा अधर्मियां रे भर्म बिच पेई करी अपणी अटलता जो हत्थ का ई ना खोई देयो। 13 अपण म्हारे प्रभु या असा रे उद्धार करणे वाळे यीशु मसीह री दया ते ज्ञान बिच तुसी अगे बद्धे जाओ। अबे अत्ते हमेसा हमेसा तांई उसेरी महिमा हुन्दी रेह। आमीन।

### जागदे ते तयार रेयो

14 एह दुनियां री सुरुआत का थिय्या, असा ने इस जो सुणेया है, अपणी हाख्खी कने दिखेया है, बल्कि बड़े ध्यान कने दिखेया है, अत्ते इस जो अपणे हत्थां कने छुत्तेया है असी उस वचन रे बारे दस्सेया करदे हिन जे जिंदगी है। 15 उस्सी जिंदगी रा ज्ञान असा जो कराया गया है। असा ने उस जो दिखेया। असा उसेरे गवाह हिन। अत्ते अवे असी तुसा जो उस्सी हमेसा री जिंदगी रा बसेख दिंदे हिन, जे पिता कने थिय्या अत्ते असा पर व्यक्त होया। 16 असा ने उस जो दिखेया अत्ते सुणेया है। अवे तुसा जो बी उसेरी सिकसा देया करदे हिन ताकि तुसी बी म्हारे कने साझी होई जाओ। म्हारा एह सांझा परम पिता परमेश्वर अत्ते उन्हेरे पुत्र यीशु मसीह कने है। 17 असी इन्हा गल्ला जो तुम्हारे तांई इधेरे तांई लिखेया करदे हिन ताकि म्हारी खुसी पूरी होई जाओ। 18 असा ने यीशु मसीह का जे शुभ-बसेख सुणेया है, से एह है, अत्ते इस जो ई असा तुसा जो सुणाया करदे हिन: परमेश्वर लौ है ते उस बिच जरा बी न्यहारा नी है।

# 1 यूहन्ना

## जिन्दगी रा वचन

1 जे असी एह बोलन कि असी उसेरे साझी हिन ते पाप रे न्यहारे बिच अपणी जिंदगी जिंदे ता असी झूठ बोलेया करदे हिन ते सच रे रस्ते पर नी चलेया करदे हिन। 2 अपण जे असी लौ बिच अग्रे बद्धगे किजोकि लौ ई परमेश्वर है ता असी विस्वासी रे रूप बिच इक दूजे रे साझी हिन। अत्ते परमेश्वर रे पुत्र यीशु मसीह रा खून असा जो सब पापां का सुच्चा करी दिंदा। 3 जे असी बोलन कि असा बिच कोई पाप नी है ता असी खुद जो धोखा देया करदे हिन अत्ते असा बिच सच्चाई नी है। 4 जे असी अपणे पापां जो मन्नी लिंदे ता म्हारे पापां जो माफ करणे विस्वास रे लायक ते नेक है। अत्ते से सब पापां का असा जो सुच्चा बी करदा।

### रौसनी बिच चलणा

5 जे असी बोलदे कि म्हारे बिच पाप नी है ता असा परमेश्वर जो झूठा बणान्दे अत्ते उसेरा वचन असा बिच नी है। 6 ओ मेरे पुत्रों, ए मैं तुसां ओ इस ताई लिखेया करदा है कि तुसी पाप ना करो;ते जे कोइ पाप करे, तां पिता का असां रा इक्क मदद करणे वाला है,मतलब धर्मी यीशु मसीह। 7 ते सेई असां रे पापां रा मनणा है, ते सिर्फ असां ताई इ नी अपन सारी दुनिया रे लोकां ताई बी। 8 जे असी तिन्हेरी गलां जो मनगे,तां इस कने असी जाणी लैणा की असी तिन्हा जो जाणी गे रे हिन। 9 जे कोइ ए बोलदा कि मैं इन्हा जो जाणी गे रे है,ते तिन्हेरी गलां जो नी मनदा,तां से झुटा है,ते तिसरे इच किछ बी सच नी है; 10 अपण जे कोइ तिन्हेरे हसाब कने चले,तिस बिच हकिकत बिच परमेश्वर रा प्यार साबित होए रा है। इसी कने असी जाणदे कि असी तिन्हेरे बिच हिन :

### मसीह असां रे महयाजक

2 जे कोइ ए बोलदा की मैं तिन्हा बिच बणी रहन्दा,तिसजो चाएदा कि तियां इ चले जियां चलदे ते। 2 ओ प्यारेयो,मैं तुसां जो कोइ नोआ हुकम नी लिखदा,अपण से इ पुराणा हुकम जे सुरुआत का तुसां जो मिले रा है; ए पुराणा हुकम स वचन है जिसजो तुसां ने सुणे रा है। 3 फिरी बी मैं तुसां जो नोआ हुकम लिखदा, ते ए तिस बिच ते तुसां बिच सच्चि ठेहरदी; किजोकी न्याहरा मिटदा जादां ते सच्चाई री रौसनी अवे चमकणा लगी पे री है। 4 जे कोइ ए बोलदा कि मैं रौसनी बिच है ते अपणे भाई कने दुस्मणी रखदा, से हल्ले तिकर न्याहरे बिच इ है। 5 जे कोइ अपणे भाई कने प्यार रखदा से रौसनी बिच रहन्दा,ते ठोकर नी खाई सकदा। 6 अपण जे कोइ अपणे भाईकने दुस्मणी रखदा से न्याहरे बिच है ते न्याहरे बिच चलदा,ते नी जाणदा कि कुते जाया करदा है,किजोकी न्याहरे ने तिसेरी हक्खां बंद करी रखी री हिन।

### नौई आज्ञा

7 ओ बच्चेयो, मैं तुसां जो ईधेरे ताई लिखदा की तिन्हेरे नां कने तुआं रे पाप माफ होए रे हिन। 8 हे बुजुर्गो, मैं तुसां जो ईधेरे ताई लिखदा कि जे सुरुआत का है तिसजो तुसी जाणदे। हे जवानों मैं तुसां ओ ईधेरे ताई लिखदा कि

तुसां ने तिस दुस्त पर जीत हासिल कित्ते री है। हे मुडेंयो, मैं तुसां जो ईधेरे ताई लिखेया कि तुसी पीता जो जाणी गे रे हिन। 9 ओ बुजुर्गो, मैं तुसां जो ईधेरे ताई लिखेया कि जे सुरुआत का है तुसी तिसजो जाणी गे रे हिन,हे जवानों मैं तुसां जो ईधेरे ताई लिखे र है कि तुसी ताकतवर हिन ते परमेश्वर रा वचन तुसां बिच बणी रहन्दा,ते तुसि तिस दुस्त पर जीत हासिल कित्ते री है। 10 तुसी ना ता दुनिया का ते ना ता दुनिया री चिजा कने प्यार रखो,जे कोइ दुनिया कने प्यार रखदा तां तिस बिच पीता रा प्यार नी है। 11 किजोकी जे किछ दुनिया बिच है,मतलब सरीर रा इच्छा,ते हक्खां इच्छा ते अपणी कमाई पर घमंड,से पीता रे पाससे का नी अपण दुनिया रे इ पाससे का है। 12 दुनिया ते तिसेरी इच्छां दोन्नों मिटदे चलदे,अपण जे परमेश्वर री इच्छा पर चलदे से हमेसा बणी रहणा। 13 हे मुडेंयो,ए आखरी समय है ते जियां तुसी सुणे रा है कि मसीह रा विरोधी आणे वाला है,तिसेरे हसाब कने अब्बे बी मते सारे मसीह रा विरोध करणे वाळे खड़ी गे रे हिन; इस कने असी जाणदे कि ए आखरी समय है। 14 से निकळे रे असी बिच का इ हिन,अपण असां बिच रे थिये नी; किजोकी जे से असां बिच का हुदें तां असां कने रहन्दे; अपण निकळी ईधेरे ताई गे की ए साबित हो कि से सारे असां बिच का नी हिन।

### दुनिय कने प्यार ना रखो

15 अपण तुसां रा ता तस पवित्र का अभीषेक हो रा है,ते तुसी सारा किछ जाणदे। 16 मैं तुसां जो ईधेरे ताई लिखेया कि तुसी सच्चाई नी जाणदे,अपण ईधेरे ताई कि तिस जो जाणदे,ईधेरे ताई कि कोई झूठ,सच रे पाससे का नी। 17 झूठा कुण है? सिर्फ से जे यीशु जी रे मसीह होणे का इन्कार करदा; ते मसीह रा विरोधी से इ है,जे पीता रा ते पुत्तर रा इन्कार करदा।

### मसीह-विरोधी

18 जे कोइ पुत्तर रा इन्कार करदा तिस का पीता बी नी: जे पुत्तर जो मन्नि लिदां तिस का पीता बी है। 19 जे किछ तुसी सुरुआत का सुणे रा है, से इ तुसां बिच बणे रा रेय;जे तुसी सुरुआत का सुणे रा है जे से तुसां बिच बणे रा रेय तां तुसी बी पुत्तर बिच ते पीता बिच बणे रहन्गे। 20 ए जिसेरी तिन्हा ने असां कने वादा किता से हमेसा री जिन्दगी है। 21 मैं ए गलां तुसां जो तिन्हेरे बारे बिचलिखे रे हिन जे तुसां जो भटकारे; 22 अपण तुसां रा से अभीषेक जे तिन्हेरे पाससे का कित्तेया गया, तुसां बिच बणे रे रहन्दा; ते तुसां जो इसेरी जरूरत नी कोइ तुसा जो सखाए, बल्कि जियां से अभीषेक जे तिन्हेरे पाससे का कित्तेया गया तुसां जो सारी गलां सखादां,ते ए सच्चा है झुट्टा नी;ते जियां तिन्हा ने तुसां जो सखाए रा है तिया इ तुसी तिस बणी रहन्दे। 23 अत्ते ओ बच्चेयो,तिस बिच बणे रे रेयो कि जां से आए तां असां जो हिम्मत रेय,ते असी तिन्हेरे आणे पर तिन्हेरे सामणे सर्मसार ना होण। 24 जे तुसी जाणदे,कि से धर्मी हिन तां ए बी जाणदे कि जे कोइ धर्म रा कम्म करदा से तिन्हा का जम्मेया रा है। 25 दिखो परम पिता ने असां कने कितणा प्यार कित्तेया! ताकि असा जो परमेश्वर रे निके-निके बोलेया जाई सके अत्ते वाक्केई असी हिन बी। ईधेरे ताई दुनिया वाळे असां जो नी जाणदे किजोकी तिन्हा ने मसीह जो नी

जाणया। 26 ओ मेरे प्यारे दोस्तों, अवे असी परमेश्वर री औलाद हिन, अपण कल जो कै हून्गे, एह हल्ले हल्ले ताँई व्यक्त नी होया। अपण असी एह जाणदे कि जाँ उस न आणा ता सी बी उसेरे ई साहूई होई जाणा किजोकि जदेय से हिन, उस जो असा तदेया ई दिखणा। 27 हर कोई जे तिस पर इदेयी आस रखदा, से अपु जो तिय्यां ई पवित्तर करदा, जिय्यां मसीह पवित्तर है।

### परमेश्वर री सतांन

28 जे कोई पाप करदा, से परमेश्वर रे नियम जो तोड़दा किजोकि नियम जो तोड़ना ई पाप है। 29 तुसां जो ता पता है कि मसीह मल्लुआं रे पापां जो लैणे ताई आया। अत्ते एह बी, कि उस बिच कोई पाप नी है।

3 जे कोई मसीह बिच बणी रहैन्दा, से पाप नी करदा ते हर कोई जे पाप करदा, तिस ने ना उस जो दिखेया अत्ते ना जाणया। 2 ओ प्यारे बच्चो, तुम्हारे कने कोई धोखा ना होई जाओ। जे नेक कम्म करदा, से धर्मी है। 3 जे कोई पाप करदा, से सैतान री तरफ का है किजोकी सैतान सुरु का ई पाप करदा आया है। इधेरे ताँई परमेश्वर रा पुत्तर आया कि से सैतान रे कम्मां जो खत्म करन। 4 जे परमेश्वर री औलाद हिन, से पाप नी करदा; किजोकी तिसेरा बीज उस बिच बणी रहैन्दा। इधेरे ताँई से पाप नी करी सकदा, किजोकी से परमेश्वर री औलाद है। 5 परमेश्वर री औलाद कुण है? अत्ते सैतान रे बच्चे कण हिन? तुसी तिन्हा जो इस तरिके कने जाणी सकदे; हर से मल्लु जे नेक कम्म नी करदा अत्ते अपणे भ्याळ कने प्यार नी करदा, से परमेश्वर रा नी है। 6 एह सिक्सा तुसी सुरु का ई सुणी है कि असा जो इक-दूये कने प्यार कने रहैन्दा चहिंदा। 7 असा जो कैन साहूई नी बणना जे उस बुराई का थिय्या, अत्ते जिनि ए अपणे भ्याळ जो मारी रखेया। तिस ने अपणे भ्याळ जो भला किजो मारेया? तिस ने इधेरे ताँई इदेया किस्तेया कि तिसेरे कम्म बुरे थिय्ये अत्ते तिसेरे भ्याळ रे कम्म नेक थिय्ये। 8 ओ मेरे भाइयों, जे दुनिया वाळे तुसां कने नफरत करदे, ता हैरान मत हुन्दे। 9 असा जो पता है कि असी मौत रे पार होई करी जिदगी बिच आई गे हिन किजोकि असी अपणे भाइयां कने प्यार करदे हिन। जे प्यार नी करदा, से मौत बिच मौजूद है। 10 हरेक मल्लु जे अपणे भ्याळ का नफरत करदा, से खूनी है, अत्ते तुसी जाणदे ई कि कोई खूनी अपणी धन दौलत रे रूप बिच हमेसा री जिदगी जो नी रखदा।

### इक-दुए कने प्यार रखो

11 मसीह ने असां ताँई अपणी जिदगी देई दित्ती। अत्ते इस्सी का असी जाणी सकदे कि प्यार कै है? असां जो बी अपणे भ्याळां ताँई अपणी जान दैणी चहिंदी। 12 अपण जिस का इस दुनिया री धन-दौलत है अत्ते से अपणे भ्याळ जो जरूरत रे बेले तिस पर तरस नी करदा, उस बिच परमेश्वर रा प्यार है एह किय्यां बोली सकदे? 13 ओ प्यारे बच्चों, असां रा प्यार सिरफ वचन अत्ते गल्लां तक ई नी रहैन्दा चहिंदा बल्कि से कम्म रे जरिये अत्ते सच्चा होणा चहिंदा। 14 इस्सी कने असा ने जाणना कि असी सच्चाई रे हिन अत्ते असी परमेश्वर रे सामणे उन्हा गल्लां जो अपणी सही-गलत री समझ कने मनवाई सकदे। 15 जिन्हा गल्लां ताँई असा रा मन असा जो कसुरवार दसदा ता से एह इधेरे ताँई हुन्दा कि परमेश्वर असां रे मनां का बड़ड़ा है अत्ते से सब किच्छ जाणदा। 16 ओ प्यारे बच्चों, जे कोई गलत कम्म करदे बेले असां रा मन असां जो कसुरवार नी दसदा ता परमेश्वर रे सामणे असा रा विस्वास बणी रहैन्दा। 17 अत्ते जे किच्छ उसका मंगदे, से असां जो तिस का मिलदा। किजोकी असी तिसेरे हुकमां जो मनदे अत्ते सेहूई करदे, जे तिस जो खरा लगदा। 18 तिसेरा हुकम एह है कि असी तिसेरे पुत्तर यीशु मसीह रे नां पर विस्वास करन अत्ते जिय्यां कि तिन्हा हुकम दित्तेया है कि असी इक-दूये कने प्यार कने रहैन्दा।

### परमेश्वर रे नेडे हिम्मत

19 जे उसेरे हुकमां जो मनदा, से उस्सी बिच बणी रहैन्दा। ते उस बिच परमेश्वर रा वास रहैन्दा। ते इस तरिके, उस आत्मा रे जरिये जिस जो परमेश्वर ने असा जो दित्तेया है, असी एह जाणदे कि म्हारे अन्दर परमेश्वर रहैन्दा। 20 ओ प्यारे भाइयों, हर इक आत्मा रा भरोसा मत करो; अपण

आत्मां जो परखो कि से परमेश्वर रे पाससे का हिन् का नी; किजोकी मते सारे झुठी भविष्यवाणी करणे वाळे दुनिया अन्दर खड़े होई गेरे हिन्। 21 परमेश्वर रा आत्मा तुसी इस तरिके कने पहचयाणी सकदे, कि जेहडी कोई आत्मा मन्नी लिन्दी, कि यीशु मसीह सरीर अन्दर होई करी आएरा है, से परमेश्वर रे पाससे का है। 22 ते जेहडी कोई आत्मा यीशु जो नी मन्दी, से परमेश्वर रे पाससे का नी है; ते से ई ता मसीह रे विरोधी री आत्मा है; जिसेरी चरचा तुसी सुणी बैट्टेरे हिन् कि, से ईणे वाळा है ते से अब्बे बी दुनिया अन्दर है। 23 ओ निके-निकेयो, तुसी परमेश्वर रे हिन्, ते तुसा तिन्हा पर जीत हासिल किस्तेरी है; किजोकी जेहड़ा तुसा अन्दर है, से तिस का जेहड़ा दुनिया अन्दर है, तिस का बड़ड़ा है। 24 से दुनिया रे हिन, इधेरे ताँई से दुनियावायी गल्लां बोलदे, ते दुनिया तिन्हेरी सुणदी।

### आत्मा जो परखो

4 असी परमेश्वर रे हिन्: जेहड़ा परमेश्वर जो जाणदा, से असा री सुणदा, जेहड़ा परमेश्वर जो नी जाणदा, से असां री नी सुणदा; इह्याँ ई असी सच्च री आत्मा ते वैह्य रे आत्मा जो पछियाणी लिन्दे। 2 ओ प्यारेयो, असी अपु-मिते प्यार रखन; किजोकी प्यार परमेश्वर रे पाससे का है, ते जेहड़ा कोई प्यार करदा, से परमेश्वर का जम्मेरा है, ते परमेश्वर जो जाणदा। 3 जेहड़ा प्यार नी रखदा, से परमेश्वर जो नी जाणदा, किजोकी परमेश्वर प्यार है। 4 जेहड़ा प्यार परमेश्वर असां कने करदा, से इस कने जाहिर होया कि परमेश्वर ने अपणे इक्को ई इक्क निके जो दुनिया अन्दर भेजेरा है कि असी तिसेरे जरिए जीन्दगी हासिल करन। 5 प्यार इस अन्दर नी है कि असा ने परमेश्वर कने प्यार किता; अपण इस अन्दर है कि तिनि ए असा कने प्यार किता; ते असा रे पापां री माफी ताँई अपणे पुत्तर जो भेजेया। 6 ओ प्यारे भाइयों, जां परमेश्वर ने असा कने इदेया प्यार किस्तेया, ता असा जो बी अपु-मिते प्यार रखणा चाहिन्दा।

### परमेश्वर प्यार है

7 परमेश्वर जो कदि कुनि ए बी नी दिखेया; अगर असी अपु-मिते प्यार रखन ता, परमेश्वर असा अन्दर बणी रहैन्दा, ते तिसेरा प्यार असा अन्दर सिद्ध होई गेरा है। 8 इसकने ई असी जाणदे कि असी तिस अन्दर बणी रहैन्दे, ते से असां अन्दर; किजोकी तिनि ए अपणी आत्मा बिच का असां जो दित्तेरा है। 9 ते असां ने दिखेयी बी लिता ते गवाहूई दिन्दे कि पिता ने पुत्तर जो दुनिया रा उद्धार करणे वाळा करी के भेजेरा है। 10 जेहड़ा कोई ऐ मन्नी लिन्दा कि यीशु परमेश्वर रा पुत्र है; परमेश्वर तिस अन्दर बणी रहैन्दा ते से परमेश्वर अन्दर। 11 ते जे प्यार परमेश्वर असा कने रखदा, तिस जो असी जाणी गे ते असा जो तिसेरी भरोसा है; परमेश्वर प्यार है, जेहड़ा प्यार अन्दर बणी रहैन्दा, से परमेश्वर अन्दर बणी रहैन्दा; ते परमेश्वर तिस अन्दर बणी रहैन्दा। 12 इस कने ई प्यार असा अन्दर सिद्ध होएरा है कि असा जो न्याय वाळे रोजे हिम्मत हो; किजोकी जदेहा से है, तदेह ई दुनिया अन्दर असी बी हिन्। 13 प्यार अन्दर डर नी हुन्दा, पर सिद्ध प्यार डर जो दूर करी दिन्दा, किजोकी डरा कने कस्ट हुन्दा, ते जेहड़ा डरदा, से प्यार अन्दर सिद्ध नी होया। 14 असी इधेरे ताँई प्यार करदे कि पैले तिनि ए असा कने प्यार किता। 15 अगर कोई बोले कि, मैं परमेश्वर कने प्यार रखदा; ते अपणे भ्याळ कने दुम्मणी रखे, ता से झूठा है; किजोकी जेहड़ा अपणे भ्याळ कने जिस जो तिनि ए दिखेया है, प्यार नी रखदा ता से परमेश्वर कने बी, जिस जो तीनि ए नी दिखेया, प्यार नी रखी सकदा। 16 ते तिस का असा जो एह हुकम मिलेरा है कि जेहड़ा कोई अपणे परमेश्वर कने प्यार रखदा, से अपणे भ्याळ कने बी प्यार रखे। 17 जिसेरा ऐ भरोसा है कि यीशु ई मसीह है, से परमेश्वर का पैदा होएरा है ते जेहड़ा कोई पैदा करणे वाळे कने प्यार रखदा, से तिस कने बी प्यार रखदा जेहड़ा तिस कने पैदा होएरा है। 18 जां असी परमेश्वर कने प्यार रखदे, ते तिसेरे हुकमां जो मनदे, ता इस का ई असी जाणदे कि परमेश्वर री ओलाहां कने प्यार रखदे। 19 ते परमेश्वर रा प्यार ऐ है कि असी तिसेरे हुकमां जो मनण; ते तिसेरे हुकम मुस्कल नी हिन्। 20 किजोकी जे किच्छ परमेश्वर का पैदा होए रा है, से दुनिया पर जीत हासल करदा ते से जीत जिस

कने दुनिया पर जीत मिलदी, से म्हारा रा भरोस्सा है। 21 दुनिया पर जीत हासिल करणे वाळा कुण है ? सिरफ सेह ई जिसेरा भरोस्सा है कि यीशु, परमेश्वर रा पुत्र है।

### दुनिया पर जीत हासिल करणा

5 ऐ सेह ई है जेहड़ा पाणी ते खून कने आया थिया; मतलब कि यीशु मसीह; से नां सिरफ पाणी रे जरिए अपण, पाणी ते खून, दोन्नां रे जरिए आया थिया। 2 ते जेहड़ा गवाहई दिन्दा, से आत्मा है; किजोकी आत्मा सच्च है। 3 ते गवाहई दैणे वाळे तिन हिन, आत्मा ते पाणी, ते खून; ते त्रै ई इक ई गल्ल पर सम्मत हिन। 4 जां असी मल्लुआं री गवाहई मन्नी लिन्दे ता, परमेश्वर री गवाहई तिस का बधि करी है; ते परमेश्वर री गवाहई ऐ है कि, तिनिए अपणे पुत्र रे बारे अन्दर गवाहई दित्तेरी है। 5 जे परमेश्वर रे पुत्र पर भरोस्सा करदा, से अपणे अन्दर ई गवाहई रखदा; जिनिए परमेश्वर जो भरोसा नी कित्ता, तिनिए तिस जो झूठा ठैह्याया; किजोकी तिनिए तिस गवाहई पर भरोसा नी कित्तेया, जेहड़ी परमेश्वर ने अपणे पुत्र रे बारे अन्दर दित्तेरी है।

### यीशु मसीह रे बारे बिच गुआई

6 ते से गवाहई एह है कि परमेश्वर ने असां जो अनन्त जीन्दगी दित्तेरी है ते एह जीन्दगी तिसेरे पुत्र अन्दर है। 7 जिसका पुत्र है, तिसेरे का जीन्दगी है; ते जिस का परमेश्वर रा पुत्र नी है, तिस का जीन्दगी बी नी है। 8 में तुसा जो, जेहड़े परमेश्वर रे पुत्र रे नां पर भरोस्सा करदे, इधेरे ताई लिखेरा है कि तुसी जानण कि अनन्त जीन्दगी तुसा रा है। 9 ते असा जो तिसेरे सामणे जे हिम्मत हुन्दी, से ऐ है कि, अगर असी किछ तिसेरी मरजी रे साबे मंगदे ता, असा री सुणदा। 10 ते जां असी जाणदे कि, जे किछ असी मंगदे हिन से म्हारी री सुणदा, ता ऐ बी जाणदे कि जे किछ बी असां तिस का मंगेया, से मिलेया बी। 11 जे कोई अपणे भ्याळ जो किछ इदेह्या पाप करदे दिखवो,

जिसेरा फळ मौत नी हो, ता छन्दे करो ते, परमेश्वर तिस जो तिन्हा ताई, जिन्हा ने इदेह्या पाप कित्तेरा है जिसेरा फळ मौत नी हो जिन्दगी दिन्हा पाप ऐसा, बी हुन्दा जिसेरा मोत है इसेरे बारे अन्दर में छन्दे करणे ताई नी बोलदा। 12 सबनी तरह रा अधरम ता पाप है, अपण इदेह्या पाप बी है, जिसेरा फळ मौत नी है।

### हमेसा री जिन्दगी

13 असा जो पता है कि जेहड़ा कोई परमेश्वर का पैदा होए रा है, से पाप नी करदा; जेहड़ा परमेश्वर का पैदा होया, तिसजो से बचाई रखदा: ते से दुस्त तिस जो छुहई नी सकदा। 14 असा जो पता है कि असी परमेश्वर कने हिन ते सारी दुनिया तिस दुस्त रे वश अन्दर पेरी है। 15 ते ऐ बी जाणदे कि परमेश्वर रा पुत्र आई गेरा है ते तनिए असा जो समझ दित्तेरी है कि, असी तिस सच्च जो पछियानण, ते असी तिस अन्दर जेहड़ा सच्च है, मतलब कि तिसेरे पुत्र यीशु मसीह अन्दर रहन्दे: सच्चा परमेश्वर ते हमेसा री जीन्दगी ऐ ई है। 16 ओ निके-निकेयो, अपु जो मूरतियाँ का बचाई कने सखवो। 17 इस बुजुर्ग री तरफ का तिस जनानी जो जिस जो परमेश्वर ने चुणेया है अत्ते तिन्हेरे बच्चयां जो जिन्हा कने में उस सच्चाई री वजह कने प्यार करदा। सिरफ में ई तुसां कने प्यार नी करदा, बल्कि से बी करदे जे सच्च जो जाणी गे हिन। 18 एह उस्सी सच्च री वजह कने होया जे असा रे बिच है अत्ते जे हमेसा-हमेसा असा कने रेह्ला। 19 परम पिता परमेश्वर री तरफ का उन्हेरी मैह, दया अत्ते सांति हमेसा असा कने रेह्ली अत्ते परम पिता परमेश्वर रे पुत्र यीशु मसीह जी री तरफ का सच्च अत्ते प्यार असा बिच बणी रेह्ला। 20 तुम्हारी मुन्डे-कुड़ियां जो उस सच्च रे हिसाब कने जिंदगी जिंदे दिखखी करी जिसेरा हुकम असा जो परम पिता परमेश्वर का मिलेया, में बड़ा खुस होया। 21 अत्ते अवे ओ जनानिये, में तिजो कोई नोआ हुकम नी बल्कि सेहई हुकम लिखेया करदा है जे असा जो सुरु का ई मिलेया है कि असा जो दूये कने प्यार करणा चहिंदा

## 2 यूहन्ना

### अभिवादन

1 प्यार मतलब ऐई है कि असी तिसरे हुकमां पर चलन; एह सेहई हुकम है जे तुसां ने सुरु का सुणे रा है, जिस पर तुसां जो चलणा चहिन्दा।  
 2 दुनियां बिच बड़े जणे भटकाणे वाळे हिन। इदेया मल्लु जे एह नी मनदा हो कि धरती बिच यीशु मसीह आया, से धोखेबाज, अत्ते मसीह दुश्मण है।  
 3 अपणा ध्यान रखवो, ताकि तुसी उस जो गुआई ना देयो जिस ताई असी बड़ी मैहत किती है, बल्कि तुसा जो ता अपणा ईनाम लैणा है।

### सच्चाई ते प्यार

4 जे कोई बड़ा अगे निकळी जांदा अत्ते मसीह री सिक्सा बिच टिकी नी रेहन्दा, तिस का परमेश्वर नी है, जे कोई उसेरी सिक्सा बिच बणी रेहन्दा, परम पिता अत्ते पुत्र दोनों तिस का हिन। 5 जे कोई तुसा का आये अत्ते ऐई सिक्सा नी देयो, ता तिस जो घरे आणे मत देयो, अत्ते ना ई नमस्ते करो; 6 किजोकि जे इदेय मल्लु जो नमस्ते करदा, से तिसरे बुरे कम्मां रा साझी है। 7 मिंजो बड़ी गल्लां तुम्हारे जो लिखणी हिन, अपण कागज ते स्याई कने लिखणा नी चाहन्दा, अपण मिंजो आस है कि मैं तुम्हारे का आई करी

आमणे-सामणे गल्लां करणी, ताकि म्हारा चा पूरा होई जाओ। 8 तेरी भैणे रे बच्चे तिजो नमस्ते बोलदे हिन। (फुटनोट:- यहाँ 'बहन, का मतलब उस स्थानिय कलीसिया से है, जहाँ से यहून्ना ने चिट्ठी लिखी है, और 'बच्चो, का मतलब उस कलीसिया के सदस्य जो अपना नमस्कार भेज रहे हैं।)

### आखरी अभिवादन

9 इस यहून्ना रे पाससे का: प्यारे दोस्त ग्युस रे नां, जिस कने उस सच्चाई री वजह कने प्यार करदा। 10 ओ मेरे प्यारे दोस्त, मेरी प्राथना है कि जिह्याँ तू आत्मिक तरिके कने तरक्की करेया करदा है, तिह्याँ ई तू सबनी गल्लां अन्दर तरक्की अत्ते ते भला-चंगा रेयो। 11 किजोकी मैं बड़ा खुस होया जां भाइयाँ ने तेरे उस सच्च री गवाई दिती, जिस पर तू वाक्केई चलदा। 12 मेरे ताँई इस का जादा होर कोई खूसी री गल्ल नी है कि मैं सुणां कि मेरे बच्चे सच्च रे रस्ते चलेया करदे हिन।

13 ओ मेरे प्यारे दोस्त, जे किच्छ तू भाइयाँ ताँई करेया करदा है, तिस जो विस्वास कने करदे रेह, जबकि से मल्लु तेरे ताँई पखलै हिन;

## 3 यूहन्ना

### अभिवादन

1 जे प्यार तू तिन्हा पर दिखाया है, तिन्हा ने कलीसिया रे सामणे उसेरी गवाई दित्ती है, जे तू उन्हा जो उस तरिके कने भेजगा जिस तरिके परमेश्वर रे लोकाँ ताँई सही है ता अच्छा होणा। 2 किजोकी से मसीह री सेवा करणे ताँई सफर पर निकळी पेरे हिन अत्ते तिन्हा होर जाति रे लोकाँ का कोई मदत नी लिच्छी है। 3 इधेरे ताँई असी विस्वासियां जो इदेय मळुआँ री मदत करणी चहिंदी ताकि असी बी सच्च बिच साझी होई सको। 4 इक चिट्ठी में कलीसिया जो बी लिख्खी थी अपण दियुत्रिफेस जे उन्हेरा मन्त्री बनणा चाहन्दा है।

### गयुस री तारीफ

5 से जे किच्छ असा जो बोलदा, तिस जो उन्ने मनणा नी। इस्सी वजह कने जे में आँगा ता दसगा कि से कै करेया करदा है। से म्हारे खिलाफ झूठी-झूठी गल्लां बोली करी इल्जाम लगांदा अत्ते इन्हा ई गल्लां कने से खुस नी है। से ना म्हारे भाइयां जो अपनादा बल्कि जे अपनाणा चाहन्दे हिन तिन्हा जो बी अपनाणे का मन्हा करी दिंदा अत्ते कलीसिया का निकाळी दिंदा। 6 ओ प्यारे दोस्त, बुराई रे नी, अपण खराई रे आदर्श बणो! जे भलाई करदा से परमेश्वर रा है, अपण जे बुराई करदा तिस ने परमेश्वर जो नी दिख्खेया। 7 देमेत्रियुस रे बारे अन्दर हर कुसकी ने गवाई दित्ती है, इत्ते तक कि खुद सच्च ने बी। असा ने बी तिसेरे बारे गवाई दित्ती है। अत्ते तू जाणदा कि म्हारी गवाई सच्च है 8 में तिज्जो बड़ा किच्छ लिखणा ता चाहन्दा थिया; अपण स्याही ते कलम कने से सब किच्छ नी लिखणा चाहन्दा।

### दियुत्रिफेस ते दिमेत्रियुस

9 बल्कि मिजो ता आस है कि में तेरे कने जल्दी ई मिलणा। ताँ असा आमणे-सामणे गल्ल-बात करी सकणा; तिज्जो सांति मिल्लो। तिज्जो तेरे सब दोस्तां रा नमस्ते। तिच्चे हर इक दोस्त जो नाँ लेई करी नमस्ते बोली देयाँ। 10 यहूदा रे पासे का जेड़ा प्रभु यीशु जी रा दास ते याकूब रा भाई है तिन्हा सद्दे रे नां जे पिता परमेश्वर बिच, प्यारे अते प्रभु यीशु मसीह ताँई सुरकसित हिन। 11 दया ते सान्ति प्यार तुसां जो मता मता मिलदा रेह्। 12 ओ प्यारे भाईयो, जां में तुसा जो उस उद्धार रे वारे बिच लिखणे री बड़ी कोसीस करेया करदा थिय्या, जिस बिच असी सब साझी हिन् ता में तुसा जो ऐ समझाणा जरूरी समझेया कि तिस प्यार रे बारे बिच समझां कि जेड़ा असा जो इको इ बारी दित्तेरा है।

### आखरी अभिवादन

13 किजो कि कितणे इ मणु असां बिच आई मिले रे हिन् जिन्हा ताँई सजा तिकर पुराणे बेले का ई लिख्खे रा है ये मळु भक्तहीन हिन् से म्हारे परमेश्वर प्रभु यीशु जी री दया जो लुचपण अन्दर बदली दिन्दे ते म्हारे इको इ परमेश्वर प्रभु यीशु रा इन्कार करदे हिन्। 14 तुसी इन्हा सारी गला जो समझी गेरे हिन्, 15 फिरी बी में तुसां जो इन्हा गला रा चेता दुवान्दा प्रभु जी ने इक कुल जो मिस्त्र देस का छुड़ाणे का बाद विसवास ना करणे वाळे जो नास करी दित्ता।

# यहूदा

## अभिवादन

1 फिरी तिन्हा सर्वाङ्गता जो जिन्हा अपणे औंधे जो नि समभाळी सके ते अपणी खास जगह जो छडी दिन्ता उन्हा ने तिन्हा जो भयंकर सजा देणे जो अन्धकार बिच जेडा हमेसा तिक्कर है बन्ही करी रखे रा है । 2 जिस तरिके कने तिन्हा ने सदोम ते अमोरा जो ते आस पासे रे सैहर जो जेडे सदोम ते अमोरा सेई व्यभिचारी थे होई गेरे तेराये सरीर रे पिछे थे लगी गेरे अग री हमेसा री सजा बिच पेई के इक उदारण होए ।

## झूठे शिक्षक

3 उसी तरिके कने जेडे स्पणे दिखणे कने अपणे सरीर जो असुध करदे ते बडे अधिकारी जो भला बुरा बोलदे । 4 अपण सबनी का बडे स्वर्गदूत मीकाईल ने जिस वक्त मूसा री लाहस रे बारे बिच गल बात था करदा ता तिन्नी बी तिस जो भला बुरा बोलणे री हिम्मत नि कित्ति पर ऐ बोलेया प्रभु तिजो झिड़के । 5 अपण ऐ मल्लु जिन्हा गला जो नी जाणदे तिन्हा जो भला बुरा बोलदे ते जिन्हा गला जो जे बे परवाह पसुवां सेई स्वभाव का ई जाणदे ते अपु जो नास करदे हिन् । 6 तिन्हा पर हाए , किजो कि तिन्हा ने कैन साई चाल चली ते मजदुरी तिक्कर बिलाम सेई भ्रष्ट होई गे ते कोरह सेई विरोध करी के नास होए । 7 अपण तुसां री प्रेम सभा बिच खान्दे पिन्दे समुद्र बिच टोळ सिरखे हिन् ते बेधड़क अपणा ई पेट भरणे वाळे हिन् रखवाले हिन् से बिना पाणी रे बदळ हिन् तिन्हा जो हवा उड़ाई लेई जान्दी पतझड रे निसफळ बुटे हिन् जेडे दो बारी मरी चुके रे जे जड का इ उखड़ी गेरे । 8 ऐ समुद्र रे प्रचण्ड छलाहरे हिन् जेडी अपणी इज्जत री झग उछाळदे ते ऐ लडखड़ाणे वाळे तारे हिन् जिन्हेरे तिक्कर हमेसा तांई अन्धेरा रखेरा है 9 हनोक ने बी जेडा आदम री सतमी पीढी का थिय्या तिन्नी ऐ भविष्यवाणी कित्ति कि दिखो प्रभु अपणे लखा पवित्र मल्लुआं कने करदा ऐ । 10 कि सबनां रा न्याय करे ते सबनी भगतीहीनां जो तिन्हेरे अभगती रे सबनी कम्मा रे बारे अन्दर, जे भगतीहीन पापियाँ ने तिसेरे खलाफ बोलेरी हिन्, गुनेह्गार ठैहाए । 11 ये ता असंतुष्ट, कुड़कड़ाणे वाळे अपणी मर्जी कने कम करणे वाळे ते अपणे मुँ कने घमण्ड री गला करणे वाळे ते अपणे फायेदे तिक्कर मुँ दिख्खी करी बडाई करदे हिन् । 12 अपण हे प्यारे ओ इन्हा गला जो याद रखो जे असां रे प्रभु यीशु जी प्रेरीत पैले इ बोली चुकरे हिन् । 13 से तुसां कने बोलेया करदे थिये कि पिछले दिना

बिच ऐसे लोक होणे जेडे अपणे अर्धम रे कम जो पुरा करणे तांई अपणी मर्जी कने चलणा । 14 ऐ से मल्लु हिन् जेडे सरीरी मल्लु हिन् जिन्हा बिच आत्मा नि है । 15 अपण भाईयो तुसी अपणे अती पवित्र विसवास बिच तरक्की करदे होये ते प्राथना करदे होये । 16 अपणे आप जो परमेसवर रे प्यार बिच बणाई रखो ते हमेसा री जिन्दगी तिक्कर म्हारे प्रभु यीशु जी री दया री भाळ करदे रियो ।

## चेतावनी ते उपदेश

17 उन्हा पर जिन्हा जो शक् है दया करो । 18 कने बडे जणेया जो अग बिच पेई के कड्डी लेयो, ते मत्तेयां पर डर कने दया करो तिन्हा कपड़ेया कने बी नफरत करो जेडे सरीर री बजह कने कलंकित है । 19 अवे जे तुसां जो टोकर खाणे का बचाई सकदा ते अपणी महिमा री भरपूरी रे सामणे खुसी कने वेकसूर खड़ा करी सकदा । 20 तिस इको ई परमेश्वर असां रे मुक्ति दाता री महिमा पराक्रम कने हक् म्हारे प्रभु यीशु जी का हमेसा तिक्कर अबे बी हमेसा-हमेसा हुन्दी रेह आमीन । 21 एह यीशु मसीह रा प्रकाशितवाक्य है जे उस जो परमेश्वर रे जरिये इधेरे तांई दित्तेया गया कि जे गल्लां जल्दी ई होणे वाळी हिन्, तिन्हा जो अपणे भक्तां जो दस्सी दित्तेया जाये, अते तिन्हा ने अपणे स्वर्गदूत जो भेजी करी तिन्सेरे जरिये अपणे भक्त यहूना जो दस्सेया । 22 यहूना ने जे किच्छ दिखवेया थिय्या, उसेरे बारे दस्सेया । एह से सच्च है जिस जो यीशु मसीह ने उस जो दस्सेया थिय्या । एह से बसेख है जे परमेश्वर री तरफ का है । 23 से धन्न हिन् से जे परमेश्वर रे इस प्रकाशितवाक्य जो पढदा है अते जे गल्लां इस बिच लिख्खी री हिन्, तिस पर चलदे हिन् । किजोकि मुसिबत री घड़ी नेडे है ।

## आशीर्वाद

24 यहूना री तरफ का आसिया री सत्त कलीसिया रे नां, परमेश्वर री तरफ का जे अज्र है, जे हमेसा-हमेसा तांई थिय्या अते जे आणे वाळा है, उन्हा सत्त कलीसिया रे तरफ का जे उसेरे सिंहासन रे सामणे हिन् । 25 अते यीशु मसीह रे पास्से का, जे विसवास रे लायक गवाई अते मरे रेयां बिच का पैला जिंदा होणे वाळा, अते धरती रे राजेयां रा बी राजा है, तुसा जो दया अते सान्ति मिलदी रेह, जे असा कने प्यार करदा, अते जिस ने अपणे खून रे जरिये असा जो पाप का छुड़ाया है ।



# प्रकाशित वाक्य

## त कलीसियां रे बारे बिच

1 अते असा जो इक राज्य अते अपणे पिता परमेश्वर री सेवा ताँई परोहत बी बणाई दित्तेया, उसेरी महिमा अते पराक्रम हमेसा-हमेसा ताँई रेह। आमीन। 2 दिखो, तिन्हा ने बदळो कने आणा, अते हर इक हाख्खी ने तिन्हा जो दिखणा, बल्कि जिन्हा ने उस जो बेधेया थिय्या, तिन्हा बी दिखणा, अते धरती रे सारे महुआं ने तिन्हेरी वजह कने हिक्क पिटणी। हाँ। आमीन। 3 प्रभु परमेश्वर से जे हिन, अते जे थिय्ये, अते जे आणे वाळा है, अते जे सब का सक्तिसाली हिन, ऐ बोलदे कि मैं ई अल्फा अते ओमेगा है। 4 मैं यहूना जे तुसा रा भाई है, अते यीशु जी रे क्लेश, अते राज्य अते सबर बिच तुसा रा साझी है, परमेश्वर रे वचन, अते यीशु जी री गवाई री वजह कने पतमुस टापू बिच का थिय्या। 5 मैं प्रभु रे रोज आत्मा बिच आई गया अते मैं अपणे पिच्छे तुरही साहई तेज अवाज सुणी। 6 से ऐ बोलेया करदी थी, जे किच्छ तू दिख्खेया करदा है, तिस जो इस कताब बिच लिख्खदा जा अते फिरी उस जो इफिसुस, स्मुरना, पिरगमुन, थुआतीरा, सरदीस, फिलेदिलफिया, अते लौदिकिया सत्तो कलीसिया बिच भेजी दे। 7 फिरी ऐ दिखणे ताँई कि ऐ अवाज कुसेरी है जे मेरे कने बोलेया करदी है, मैं मुडेया। अते जां मैं मुडेया। अते जां मैं मुडेया ता मैं सुन्ने री सत्त दीवटां दिख्खी। 8 अते तिन्हा दीवटां रे बीच मैं इक महु जो दिख्खेया जे "महु रे पुत्तर" साहई कोई मडद थिय्या। तिस ने अपणे पैरां ताँई लम्बां चोगा पाये रा थिय्या। अते उसेरी छाती पर सुनैही पटुका बहन्ने रा थिय्या।

### यूहना जो मसीह रा दर्शन

9 तिसरे सिर अते बाळ चिट्टी ऊन साहई चमकेया करदे थिय्ये, अते तिन्हेरी हाख्खियां अग री लपटा साहई थी। 10 अते तिन्हेरे पैर सबका बद्धिया पीत्तळ साहई थिय्ये जे मन्ना भट्टी बिच तपाये गेरे हो, अते तिन्हेरी अवाज बडे सारे पाणी री धारा साहई थी। 11 अते तिन्हा ने अपणे सज्जे हत्थ पर सत्त तारे लिक्ते रे थिय्ये अते तिन्हेरे मूंह का चोखी दोधारी तलवार बाहर निकळेया करदी थी, अते तिन्हेरा मूंह इदेया चमकेया करदा थिय्या, जदेया सूरज कड़ाके री धूप रे बेले चमकदा। 12 मैं जां उस जो दिखेया, ता तिन्हेरे पैरां पर मुर्देया साहई पेई गया, अते तिन्हा ने मेरे पर अपणा सज्जा हत्थ रखी करी एह बोलेया, कि डर मत, मैं पैहे बी है अते आखिरी बी मैं ही है। 13 अते मैं सेहई है, जे जिंदा है। मैं मरी गया थिय्या, अपण अवे दिख, मैं हमेसा-हमेसा ताँई जिंदा है। अते मौत अते अधोलोक री चाबियां मेरे का ई हिन। 14 इधेरे ताँई जे किच्छ तू दिख्खेया, जे गलां होया करदी हिन, अते जे होणे वाळी हिन, तिन्हा सबनी जो लिखदा जा। 15 ऐ जे सत्त तारे हिन जिन्हा जो तू मेरे सज्जे हत्थ पर दिखेया है, अते ऐ जे सत्त सुन्ने री दीवटां हिन, इन्हेरे भेद रा मतलब है, से तारे सत्तो कलीसियां रे दूत हिन, अते से सत्त दीवट सत्त कलीसिया हिन। 16 इफिसुस री कलीसिया रे दूत जो एह लिखी भेज, से जे सत्त तारे अपणे सज्जे हत्थ पर लेई करी, अते सुन्ने रे सत्त दीये रे बिच हंडेया-फिरेया करदा है, से एह बोलदा है; 17 मैं तेरे कम्मां, मेहनत अते तेरे सबर जो जाणदा, अते एह बी कि तू बुरे महुआं री बरदाश नी करी सकदा, अते जे अपणे आप जो प्रेरित बोलदे हिन अपण है नी, तिन्हा जो तू परखेया अते से झूठे निकळेया। 18 तेरे बिच सबर है अते तू मेरे नाँ री वजह कने दुख उठान्दे-

उठान्दे थकेया नी। 19 अपण मिंजो तेरे खलाफ एह बोलणा है कि तू पैहे साहई दाह पीड छड्डी दिक्ती है। 20 इधेरे ताँई तू चेता कर कि तू कुते कमजोर होया थिय्या, अते अपणे मन जो बदल अते पैहे साहई कम्म कर, जे तू अपणा मन नी बदलणा, ता मैं तेरे का आई करी तेरे दीपदान जो तिस जगह का हटाई देणा।

### ईफिसुस जो बसेख

2 अपण तेरे पर एह गल्ल ता है कि तू नीकुलियों रे कम्मां का नफरत करदा जिन्हा कने मैं बी नफरत करदा। 2 जिसेरे कन्न हो, से सुणी लेंन कि आत्म कलीसिया कने कै बोलदा है। जे जीत हासिल करगा, मैं तिस जो तिस जिंदगी रे बूट्टे बिच का जे परमेश्वर रे स्वर्ग बिच है, फल खाणे देंगे। 3 स्मुरना री कलीसिया रे दूत जो एह लिखी भेज, जे पैले अते आखिर है, जे मरी गया थिय्या, अते अवे जिंदा होई गेरा है, से एह बोलदा है: 4 मैं तेरी दुख-तकलिफाँ अते गरिबी जो जाणदा, (अपण तू अमीर है); जे अपू जो यहूदी बोलदे हिन, हांलाकि से यहूदी नी हिन, तिन्हा ने जे तुम्हारी बुराई किक्ती है, मैं उस जो बी जाणदा, बल्कि से भक्तां रा इक इदेया जमधट है जे सैतान कने जुडे रा है। 5 जे दुख-तकलिफाँ तिज्जो झेलणे पैणी तिन्हा का मत डर। किजोकि दिख्ख, सैतान तुसा बिच का किन्ने जणेया जो जेलां बिच पाणे ताँई तयार है ताकि तुसा परखे जान, अते तुसा जो दस्स रोज ताँई दुख-तकलिफाँ सैहणी पैणियाँ। भले ई तिज्जो जान देंगे पेयो अपण सच्चा बणी रहेयां, मैं तिज्जो हमेसा री जिंदगी रा मुकुट देंगा। 6 जिसेरे कन्न हो से सुणी लेंन कि आत्मा कलीसिया कने कै बोलदा है। जे जीत हासिल करगा, तिस जो दूज्जी मौत कने कोई नुक्सान नी होणा। 7 "पिरगमुन री कलीसिया रे दूत जो एह लिखी भेज, जिसका पैनी दोधारी तलवार है, से एह बोलदा है:

### स्मुरना जो बसेख

8 मैं एह जाणदा कि तू तिक्ते रेहन्दा जिक्ते सैतान रा सिंहासन है। तू मेरे नां जो पकड़ी रख्खे रा है, अते मेरे पर विसवास करणे का उन्हा दिनाँ बिच बी पिच्छे नी हटेया जिन्हा बिच मेरा विसवास रे लायक गवाह अन्तिपास, तुसा बिच तिस जगह मारेया गया जिक्ते सैतान रेहन्दा। 9 अपण मिंजो तेरे खलाफ किच्छ गलां बोलणी हिन, किजोकि तेरे उक्ते किच्छ इदेय महु हिन, जे बिलाम री सिक्सा जो मनदे हिन, जिस ने बालाक जो सिखाया थिय्या कि से इस्त्राएल रे महुआँ जो मूर्तियाँ जो चढ़ाये री रोटी अते व्यभिचार करणे ताँई तिन्हा जो बढ़ावा देंन। 10 तिह्य्यां ई तेरे इक्ते कितणे इदेय हिन, जे नीकुलियों री सिक्सा जो मनदे हिन। 11 इधेरे ताँई तौबा करी लै, नी ता मैं तेरे का जल्दी ई आईकरी, अपणे मूंह री तलवार कने तिन्हा कने लड़ाई लडणी।

### पिरगमुन जो बसेख

12 जिसेरे कन्न हॉन से सुणी लेंन कि आत्मा कलीसिया कने कै बोलदा है। जे जीत हासिल करगा मैं तिस जो (स्वर्ग बिच लुक्के रा) मन्ना देंगा, अते तिस

जो इक चिट्ठा पत्थर बी दैणा, अते तिस पत्थर पर इक नां बी लिखे रा होणा। जिस जो से मिल्ला तिस जो उसेरे अलावा होर कोई बी जाणी नी सकदा।  
13 “थुआतीरा री कलीसिया रे दूत जो एह लिखी भेज, परमेश्वर रा पुत्र जिसेरी अख्खां भहकदी अग साहई हिन, अते जिसेरे पैर चमकदे पीतळ साहई हिन, एह बोलदा है: 14 तेरे कम्मां जो, प्यार, विसवास, सेवा अते सबर जो जाणदा, अते एह बी कि तेरे पिछले कम्म पैह्ले का बद्धी करी हिन। 15 मिंजो तेरे खलाफ एह बोलणा है कि तू उस जनानी इजेबेल जो अपने बिच रेह्ला दिंदा जे अपू जो भविष्यवाणी करणे वाळी बोलदी है, अते मेरे भक्तां जो व्यभिचार करणे, मूर्तां रे अग्रे चढ़ाई री चीजां जो खाणा सिखान्दी अत्ते भटकाया करदी है। 16 मैं तिस जो तौबा करणे रा मौका दित्तेया, अपण से अपने व्यभिचार का तौबा करणा नी चाहन्दी।

17 दिख, मैं तिस जो बमारी री हालत बिच पांदा, अते जे तिस कने व्यभिचार करदे हिन जे से बी तिसेरे साहई अपने कम्मां का तौबा नी करदे ता उन्हा जो बड़ी मुसिबतां बिच पाई दैणा।

### थुआतिरा जो बसेख

18 अते मैं तिसेरे बच्चेयां जो महामारी कने मारी दैणा, अते तां सब कलीसिया जो पता लगी जाणा कि मन अते बुद्धि जो परखणे वाळा मैं ई है, अते मैं तुसा बिच का हर इक जो उसेरे कम्मां रे साहब कने दैणा। 19 अपण मैं थुआतीरा रे बाकी बचे रे महुआं कने बोलदा जे इस सीख पर नी चलदे अते जिय्यां कि से बोलदे हिन कि सैतान री गैहरी गल्लां जो जाणदे हिन, हांलाकि नी जाणदे, मिंजो तुसा पर होर जादा भार नी पाणा है। 20 फिरी बी जे किच्छ तुसा का है, तिस पर मेरे आणे तक चलदे रेह्यो। 21 जे जीत हासिल करणा अते जे मेरे कम्मां जो आखिरी तक करदा रेहन्गा, मैं तिस जो जाति जाति रे महुआं पर हक दैणा। 22 तिस ने लोहे रा राजदण्ड लेई करी तिन्हा पर राज करणा, तिस ने उन्हा जो मिट्टी रे भांडे साहई चूरा-चूरा करी दैणा। तिय्यां ई मिंजो बी अपने पिता का हक्क मिलेया है। 23 अते मैं भी उस महु जो भ्यागा रा तारा दैणा। 24 जिसेरे कन्न हॉन, से सुणी लेंन कि आत्मा कलीसिया कने कै बोलदा है। 25 सरदीस री कलीसिया रे दूत जो लिख, जिस का परमेश्वर री सत्त आत्मां अते सत्त तारे हिन, से एह बोलदा: मैं तेरे कम्मां जो जाणदा, कि तिजो जिंदा ता बोलदे, अपण है मरे रा। 26 जागदे रेयो, अते उन्हा चीजां जो जे बची री हिन, अते जे मिटणे जो हिन, मजबूत कर, किजोकि मैं तेरे कुसकी बी कम्म जो अपने परमेश्वर री नजर बिच पूरा नी हुन्दे दिखेया। 27 इधेरे ताई चेता कर कि तिजो कदेयी सिक्सा मिली अत्ते सुणी थी- उस पर चल अत्ते तौबा कर। इधेरे ताई अते जे तू जागदा नी रेह्या ता, मैं चोर साहई आणा अते तिजो पता बी नी लगणा कि मैं कुस घड़ी तेरे पर आई पैणा। 28 अपण सरदीस बिच तेरे इत्ते किच्छ इदेय महु हिन, जिन्हा ने अपने कपड़े भिडे नी कित्ते हिन। तिन्हा चिट्टे कपड़े पाई करी मेरे कने हडणा-फिरणा, किजोकि से इस लायक हिन। 29 जे जीत हासिल करन, तिस जो इसी तरिके कने चिट्टे कपड़े पुआणे। मैं तिसेरा नां जिंदगी री कताब बिच का नी कटणा, बल्कि तिसेरा नां अपने पिता अते तिन्हेरे स्वर्गदूत रे सामणे मन्त्री लैणा।

### सरदिस जो बसेख

3 जिसेरे कन्न हॉन, से सुणी लेंन कि आत्मा कलीसिया कने कै बोलदा है। 2 “फिलेदिलाफिया री कलीसिया रे दूत जो एह लिख, जे पवित्र अते सच्चा है, अते जिसका दाऊद री चाबियां हिन जे इदेय दुआर खोलदा जिस कोई बंद नी करी सकदा, अत्ते बंद करदा ता खोली नी सकदा- से एह बोलदा: 3 “मैं तेरे कम्मां जो जाणदा। दिख, मैं तेरे ताई इक दुआर खोली रखे रा है, जिस जो कोई बंद नी करी सकदा। मैं जाणदा कि तेरी सक्ति थोड़ी जणी है, फिरी बी तू मेरे वचना रा पालन कित्तेया अते मेरे नां जो नकारेया नी। 4 सुणो किच्छ इदेय हिन जे सैतान री मण्डळी रे हिन अत्ते जे यहूदी नी हुन्दे बी रे उन्हा सभा वाळेयां जो तेरे वस बिच करी अपू जो यहूदी बोलदे हिन, जे सिरफ झूठे हिन, मैं तिन्हा जो मजबूर करी के तुसा रे पैरां हेठ करी दैणा अत्ते एह मन्त्रे पर जबूर करी दैणा कि मैं तुसा कने प्यार कित्तेया। 5 इधेरे ताई कि तू मेरे सबर रे वचनां पर चलेया है। बदले बिच मैं बी उस

परखिणे रे बेल्हे तुम्हारी रक्षा करणी जे इस धरती बिच रेह्ले वाळेयां जो परखणे ताई पूरी धरती पर आणे वाळा है। 6 मैं जल्दी आणे वाळा है, जे किच्छ तेरे का है, तिस जो पकड़ी रख, कि कोई तेरे मुकुट जो खोई नी लेंन।

### फिलदिलफिया जो बसेख

7 जे जीत हासिल करन उस जो मैं परमेश्वर रे मन्दिर बिच इक खंभा बणाणा। तिस ने तित्ते का कदी बाहर नी निकळणा, अते मैं अपने परमेश्वर रे नां, अते अपने परमेश्वर रे सैहर मतलब नौये यरुशलेम रा नां, जे मेरे परमेश्वर री तरफ का स्वर्ग बिच उतरणे वाळा है, अते अपना नौआं नाम बी तिस पर लिखणा। 8 जिसेरे कन्न हॉन, से सुणी लेंन कि आत्मा कलीसिया कने कै बोलदा है। 9 “लौदीकिया री कलीसिया रे दूत जो एह लिख: जे आमीन, विसवास रे लायक अते सच्चा गवाह है, अते परमेश्वर री दुनियां रा राजा है, से एह बोलदा है, 10 मैं तेरे कम्मां जो जाणदा कि तू ना ता ठंडा है ना गर्म। खरा हुन्दा कि तू ठंडा या गर्म हुन्दा। 11 इधेरे ताई कि कोसा है, ना ठंडा है अत्ते ना गर्म, मैं तिजो अपने मूहू का गूलणें जो है। 12 तू जे बोलदा कि मैं अमीर होई गेरा है, अते मिंजो कोई चीज री जरूरत नी है। अपण एह नी जाणदा कि तू अभागा, घटिया, कंगाल, अन्हा अते नंगा है। 13 इधेरे ताई मैं तिजो तसल्ली दिंदा कि तू अग बिच सुच्चा कित्ते रा सुन्ना मेरे का खरीदी ले ताकि तू अमीर होई जाये, अते चिट्टे कपड़े लेई ले ताकि कपड़े पाई करी तिजो अपने नंगेपन री शर्मिन्दगी नी हो, अते अपनी अख्खां बिच लगाणे ताई सुर्मा लेई ले ताकि तू दिखखी सकन।

### लौदीकिया जो बसेख

14 उन्हा सबनी जो जिन्हा कने मैं प्यार करदा, उन्हा सब जो झिड़कदा अत्ते सुधारदा बी। इधेरे ताई पूरी कोसिस, अते तौबा करी लै। 15 सुण, मैं दुआर पर खड़ी करी दुआर खटखटान्दा है, जे कोई मेरी अवाज सुणी करी दुआर खोलदा, ता मैं तिसेरे कने अन्दर जाईकरी तिसेरे कने रोटी खाणी अते तिन्हे मेरे कने। 16 जे जीत हासिल करणा मैं तिस जो अपने कने सिंहासन पर बैठाणा, जिह्य्यां मैं बी जीत पाई करी अपने पिता कने तिन्हेरे सिंहासन पर बेई गेया। 17 जिसेरे कन्न हॉन, से सुणी लेंन कि आत्मा कलीसियां कने कै बोलदा है। 18 इन्हा गल्लां का बाद मैं दिखखेया की, स्वर्ग रा दुआर खुल्ले रा थिय्या। अते सेहई अवाज जिस जो मैं पैल्ले सुणेया थिय्या, तुरही रे सुर बिच मेरे कने बोलेया करदी थी, “इत्ते ई ऊपर आई जा। मैं तिजो से दिखाणा जिसेरा आणे वाळे बेल्हे बिच होणा पक्का है।” 19 फिरी मैं झट ई आत्मा बिच आई गेया। अते मैं दिखखेया कि मेरे सामने स्वर्ग रा सिंहासन है, अते तिस सिंहासन पर कोई बैठे रा थिय्या। 20 अते जे तिस पर बैठे रा थिय्या, से यशब अते मानिक साहई लिब्बेया करदा थिय्या। अते तिस सिंहासन रे चौं पास्से इक इन्द्रधनुष थिय्या जे पन्ने साहई चमकेया करदा थिय्या। 21 तिस सिंहासन रे चौं पास्से होर चौबी सिंहासन थिय्ये जिन्हा पर चौबी प्राचिन बैठे रे थिय्ये। उन्हा ने चिट्टे कपड़े पाये रे थिय्ये, अते तिन्हेरे सरां पर सुन्ने रे मुकुट थिय्ये। 22 सिंहासन पर बिजळी लश्केया, गडगडाहट, अत्ते बदळां री गडगडाहट होया करदी थी, अते सिंहासन रे सामणे अग री सत्त मशालां बळेया करदी थी, एह परमेश्वर री सत्त आत्मां हिन।

### स्वर्ग बिच अराधना

4 अते तिस सिंहासन रे सामणे पारदर्शी सिस्से साहई मन्त्रो सिस्से रा समुन्द्र थिय्या, अते सिंहासन रे सामणे अते सिंहासन रे चौं पास्से चार प्राणी थिय्ये, जिन्हेरे अग्रे पिच्छे हाखिख्यां ई हाखिख्यां थी। 2 पैल्ला प्राणी मिरग साहई थिय्या, अते दुज्जे प्राणी रा मूहू दांद साहई थिय्या, तिज्जे प्राणी रा मूहू महु साहई थिय्या, अते चौथे प्राणी रा मूहू उडदे गरुड साहई थिय्या। 3 इन्हा चारो प्राणियां रे छै छै परं थिय्ये। तिन्हेरे चौं पास्से, अते अन्दर बी हाखिख्यां ई हाखिख्यां थी, अते रात दिन बगेर अराम कित्ते रे एह बोलदे रेहन्दे थिय्ये, “सबका सक्तिसाली परमेश्वर पवित्र है, पवित्र है, पवित्र है, जे थिय्या, जे है अते जे आणे वाळा है। 4 अते जां से जिंदे प्राणी तिसेरी जे सिंहासन पर बैठे रा है, अते जे हमेसा-हमेसा ताई जिंदा है, महिमा अते

आदर ते सुकर करेया करदे थिये ता, 5 चौबी प्राचीन उसेरे पैरां पेई करी, तिस जो जे हमेसा-हमेसा ताई जिंदा रेह्ने वाळे री अराधना करणा लग्गे, से सिंहासन रे सामणे अपणे मुकुट पाई करी बोलदे हिन। 6 “ओ म्हारे प्रभु अते परमेश्वर! तुसा ई महिमा, आदर, अते सक्ति रे लायक हिन, किजोकि तुसा ने सब चीजां जो रचेया, अते उन्हेरा वजूद अत्ते उन्हेरी रचना तुसा री ई मर्जी कने होई है। 7 फिरी मैं दिख्खेया कि जे सिंहासन पर बैठे रा थिय्या, तिन्हेरे सज्जे हत्थ बिच इक कताब दिख्खी, जे अन्दरलै अते बाहरलै पास्से का लिख्खितेरी थी, अते से सत्त मौहर लगाई करी बंद कित्ते री थी। 8 फिरी मैं इक सक्तिसाली स्वर्गदूत जो दिख्खेया, जे ऊच्ची अवाज बिच एह प्रचार करेया करदा थिय्या कि इस कताब जो खोलणे अते इसेरी सत्त मौहरे तोडने रे लायक कुण है? 9 अपण स्वर्ग बिच या धरती बिच या पताल बिच कोई बी इदेया नी थिय्या जे इस कताब जो खोलणे अत्ते पढ़ने रे लायक हो। 10 अते मैं जोर जोरे रोणे लगेया, किजोकि तिस कताब रे खोलणे, या तिस जो पढ़ने वाळा कोई नी मिलेया थिय्या। 11 तां उन्हा प्राचीना बिच का इक ने मिंजो बोलेया, मत रोआँ, दिख्ख, यहूदा रे गौत्र रा से शेर, जे दाऊद रे खानदान रा है, इस कताब जो खोलणे अते इसेरी सत्त मौहरां तोडने ताई विजयी होया है।

### मुहर लग्गे री कताब ते मेमना

5 फिरी मैं तिस सिंहासन अते उन्हा चारो प्राणी अते तिन्हा पुरखा रे मझाटे इक बलि कित्ते रे छैलू जो खड़ा दिख्खेया, तिसेरे सत्त सींग अते सत्त हाख्खियां थी, एह परमेश्वर री सत्त आत्मां हिन, जिन्हा जो पूरी दुनियां बिच भेजेया थिय्या। 2 फिरी से आया अत्ते जे सिंहासन पर बैठे रा थिय्या, तिसेरे सज्जे हत्थ का से कताब लेई लिक्ती। 3 जां तिस ने कताब लेई लिक्ती ता से चारो प्राणी अते चौबी प्राचीन तिस छैलू रे सामणे पेई गे, अते हरेक रे हत्थां बिच बीणा अते धूप कने भरितेरे सुन्ने रे डोन्ने थिय्ये, जे पवित्र महुआं री प्राथना थी। 4 से इक नौआ गाणा गाणे लगे, तू इस कताब जो लैणे, अते तिन्हेरी मौहरे खोलणे रे लायक है, किजोकि तू बलि होईकरी अपणे खून कने हर इक कुल, भाषा, महुआं ते जातियां बिच का परमेश्वर ताई महुआं जो खरीदी लिक्तेया। 5 अते उन्हा जो असा रे परमेश्वर ताई इक राज्य अते परोहत्त बणाया अते तिन्हा दुनिया पर राज करणा। 6 फिरी मैं दिख्खेया, ता तिस सिंहासन, प्राणियां, प्राचीनां रे चौं पास्से बडे सारे स्वर्गदूतां री अवाज सुणी, जिन्हेरी गिनती लख्खां करोडां बिच थी। 7 अते से ऊँची अवाज बिच बोलया करदे थिय्ये, “बलि होये रा छैलू ई ताकत, धन, ज्ञान, सक्ति, आदर, महिमा, सुकर रे लायक है। 8 फिरी मैं सब रची री चीजां जो जे स्वर्ग बिच, धरती बिच, पताल बिच अते समुन्द्र बिच है, सारी कारीगरी-हाँ, उस सारे ब्रह्माण्ड रे हर इक प्राणी जो एह बोलदे सुणेया, जे सिंहासन पर बैठे रा है, तिन्हेरा अते छैलू रा सुकर, अते आदर, ते महिमा, अते राज्य, हमेसा- हमेसा ताँई रेह्। 9 अते चारो प्राणियां ने “आमीन” बोलेया, अते प्राचीनां हत्थ जोडी करी अराधना किक्ती। 10 जां मैं दिख्खेया कि छैलू ने उन्हा सत्त मौहरां बिच का इक जो खोल्लेया, तां मैं उन्हा चार प्राणियां बिच का इक जो बदळ री गडगडाहट साहई अवाज बिच बोलदे सुणेया, “आ!” 11 मैं दिख्खेया कि मेरे सामणे इक चीट्टा घोड़ा थिय्या। ते घोडे रे सवार ने तीर-कमाण लिक्ते रा थिय्या। उस जो जीत रा मुकुट दिक्तेया गया अत्ते से विजय पाई करी बाहर निकळेया ताकि होर बी विजय पाई सके। 12 जां तिस छैलू दूजी मौहर खोली ता मैं दूजे प्राणी जो एह बोलदे सुणेया, “आ!” 13 फिरी इक होर घोड़ा निकळेया, जे लाल रंग रा थिय्या, तिसेरे सवार जो एह हक दिक्तेया गेरा थिय्या, कि धरती पर मेल-मिलाप नी हो, ताकि महु इक-दूजे रा खून करण, अते तिस जो इक बड्डी तलवार दिक्ती गेई। 14 अते जां तिस ने तिज्जी मौहर खोली, ता मैं तिज्जे प्राणी जो एह बोलदे सुणेया, “आ!” अते मैं दिख्खेया की, इक काळा घोड़ा थिय्या अत्ते तिसेरे सवार रे हत्थे इक तरकडी थी।

### सात्त मुसरां रा खोल्लेया जाणा

6 अते मैं तिन्हा चारो प्राणी रे बीच का मन्त्रो इक अवाज जो एह बोलदे सुणेया, “इक दीनार( फुटनोट:-इक चाँदी रा सिक्का, लगभग इक रोज

री मजदुरी) री किलो भर कणक अते इक दीनार रे त्रे किलो भर जो, अपण तेल ते दाख-रस रा नुक्सान मत करदा। 2 अते जां छैलू ने चौथी मौहर खोली ता मैं चौथे प्राणी जो एह बोलदे सुणेया, “आ!” 3 अते मैं दिख्खेया की, इक हल्के पिळे रंग रा घोड़ा थिय्या, अते तिसेरे सवार रा नां “मौत” थिय्या, अते अधोलोक तिसेरे पिच्छे-पिच्छे चलेया करदा थिय्या। तिस जो धरती रे चौथे हिस्से बिच एह हक दिक्तेया गेरा थिय्या कि तलवार कने, अकाल कने, महामारी कने, ते धरती रे जंगली जानवरां रे जरिये महुआं जो मारी देंन। 4 अते जां तिस ने पंजवी मौहर खोली, ता मैं वेदी रे थल्ले उन्हेरी आत्मां जो दिख्खेया जे परमेश्वर रे वचन री वजह कने अते तिसेरी गवाई री वजह कने ने जे तिन्हा ने दिक्ती थी, मारे गे थिय्ये। 5 से जोरे सणे हक्क देई करी बोलेया करदे थिय्ये, “ओ पवित्र अत्ते सच्चे प्रभु, तुसां कथाडी ताई न्याय नी करणा? ते धरती बिच रेह्ने वाळ्यां का असा रे खून रा बदला कथाडी ताई नी लैणा? 6 अते तिन्हा बिच का हर इक जो चिट्टा कपड़ा दिक्तेया गया, ते तिन्हा जो बोलेया गया, “होर थोडी हाण ताई अराम करो, जां ताई कि तुसा रे साथी सेवक अत्ते भाइयां री, जिन्हेरी तुसां साहई मौत होणे वाळी है, तिन्हेरी बी गिनती पूरी नी होई जांदी। 7 जां तिस ने छठी मौहर खोली ता मैं दिख्खेया कि इक बड़ा बड्डी हिलण होया, ते बाळ कने बणे रे कम्बळ साहई सूरज काळा अते पूरा चाँद खून साहई लाल होई गया। 8 ते अम्बर रे तारे धरती पर इट्ठ्यां पे जिट्ठ्यां इक बड्डी हनेरी का हिलीकरी अंजीर रे बूट्टे का कच्चे फळ झडदे। 9 अम्बर फटी करी इक मुडे रे कागज साहई सुकडी करी लपटी गेरा थिय्या, अत्ते सब पहाड अत्ते टापू अपणी जगह का पेई गे थिय्ये। 10 तां धरती रे राजे, प्रधान, सेनापति, अमीर महु, सक्तिसाली महु, हर इक दास, ते हर इक अजाद महु, पहाड़ा री खो बिच, ते फाट्टियां पर लुकी जायो। 11 ते पहाडां अते फाट्टियां जो बोलणा लगे, “असा पर आई पेयो, अते असा जो तिन्हेरी नजर का जे सिंहासन पर बैठे रे हिन, अते छैलू रे प्रकोप का लुकाई लेयो। 12 किजोकि तिन्हेरे प्रकोप रा भंयकर दिन आई गया है, अत्ते कुण है जे इस जो झेली सकदा? 13 इसेरे बाद मैं धरती रे चारो कुणे पर चार स्वर्गदूत खडे दिख्खे, जे धरती री चौं हवा जो पकडे रे थिय्ये ताकि धरती, या समुन्द्र, या कुसकी बूट्टे पर हवा नी चले। 14 फिरी मैं इक होर स्वर्गदूत जो जिदे परमेश्वर री मौहर लिक्ते रे पूर्व पास्से का आंदे दिख्खेया, तिस ने उन्हा चारो स्वर्गदूतां जो, जिन्हा जो धरती अते समुन्द्र जो नुक्सान करणे रा हक दिक्ते रा थिय्या, जोरे सणे बोलेया, 15 “जां ताई असा अपणे परमेश्वर रे भक्तां रे मत्थे पर मौहर नी लगाई दिंदे, तां ताई धरती, समुन्द्र अते बूट्टेयां जो नुक्सान मत पूजांदे। 16 फिरी जिन्हा महुआं पर मौहर लगाई गेरी थी मैं उन्हा महुआं री गिणती सुणी। से इस्त्राएल री औलाद रे सब गौत्रां बिच का इक लाख चुरताळी हजार पर मौहर दिक्ती गेरी थी। 17 यहूदा रे गौत्र बिच का बारह हजार पर दिक्ती गेरी है, रुबेन रे गौत्र बिच का बारह हजार जो, गाद रे गौत्र बिच का बारह हजार जो।

### इस्त्राएल रे इक लाख चुरताळी हजार लोक

7 आशेर रे गौत्र बिच का बारह हजार जो, नमाली रे गौत्र का बारह हजार जो, मनशिशह रे गौत्र बिच का बारह हजार जो। 2 शमौन रे गौत्र बिच का बारह हजार जो, लेवी रे गौत्र बिच का बारह हजार जो, इस्साकार रे गौत्र बिच का बारह हजार जो, 3 जबूलून रे गौत्र बिच का बारह हजार जो, यूसुफ रे गौत्र बिच का बारह हजार जो अते बिन्यामीन रे गौत्र बिच का बारह हजार जो मौहर दिक्ती गेरी है। 4 इसेरे बाद मैं दिख्खेया की, हर इक जाति, अते कुल, बखरी बखरी भाषा रे महु री इक बडी बड्डी भीड़, जिस जो कोई गिणी नी सकदा थिय्या चिट्टे कपडे पाये रे, अते अपणे हत्थां बिच खजूर री डाळियां लेई करी सिंहासन अते छैलू रे सामणे खडतेरी थी, 5 अते बड्डी ऊच्ची अवाज बिच हक्कां लांदी बोलेया करदी थी, सिंहासन पर बैठे रे म्हारे परमेश्वर छैलू का ई उद्धार है। 6 अते सारे स्वर्गदूत, बुजुर्ग अते चारो प्राणी सिंहासन रे चौं पास्से खडितेरे थिय्ये, फिरी से सिंहासन रे सामणे मूंह रे भारे पेई करी अते एह बोली करी परमेश्वर री अराधना किक्ती, 7 “आमीन। असा रे परमेश्वर री बड्याई, महिमा, ज्ञान, सुकर, आदर, जोर ते सक्ति हमेसा-हमेसा ताई हुन्दी

रेह। आमीन।” 8 इसेरे बाद बुजुर्गा बिच का इक ने मिंजो पुच्छेया, “एह चिट्टे कपड़े पाये रे कुण हिन, अते कुते का आये रे हिन?”

### इक बड्डि भीड़

9 मैं तिस जो जवाब दित्तेया, “ओ मेरे प्रभु, तुसा ई जाणदे हिन।” तिस ने मिंजो बोलेया, “एह से हिन, जे उस बड्डे क्लेस बिच का निकली कर आये रे हिन, इन्हा ने अपणे-अपणे कपड़े छैलू रे खून बिच धोई करी चिट्टे कित्ते हिन। 10 इसी वजह कने एह परमेश्वर रे सिंहासन रे सामणे हिन अते उसेरे मन्दिर बिच रात दिन उसेरी सेवा करदे हिन, अते जे सिंहासन पर बैठे रे हिन तिन्हे तिन्हेरे अन्दर रेहई करी उन्हेरी रक्षा करणी। 11 तिन्हा फिरी कदी भूखे प्यासे नी होणा, सूरज ने उन्हेरा किच्छ बिगाडी नी सकणा, अते ना ई तिन्हा कड़ाके री धूप बिच तपिणा। 12 किजोकि छैलू जे सिंहासन रे मझाटे है, तिस ने उन्हेरी रखवाली करणी। तिस ने उन्हा जो जिंदगी दैणे वाळे पाणी रे नाळू का लेई जाणा अते परमेश्वर ने उन्हेरी अखड़ां का सब आँसू पूंजी दैणे।” 13 जां तिस ने सतमी मौहर खोली, ता स्वर्ग बिच थोड़ी हाण सन्नाटा होई गया। 14 ते मैं सत्तां स्वर्गदूतां जो जे परमेश्वर रे मुहागर रेहन्दे हिन, दिख्खेया, ते तिन्हा जो सत्त तुहरियां दित्ती गई। 15 फिरी इक होर स्वर्गदूत सुन्ने रा धूपदान लेईकरी आया, ते वेदी रे नेडे आई खड़ा होया, अते तिस जो बड़ा सारा धूप दित्तेया गया, कि सब पवित्र महुआं री प्राथना कने तिस सोने री वेदी पर जे सिंहासन रे सामणे है चढान। 16 ते तिस धूप रा धूआं पवित्र महुआं री प्राथना समेत स्वर्गदूत रे हत्थां का परमेश्वर रे सामणे पूज्जी गया। 17 ते स्वर्गदूत ने धूपदान लेईकरी तिस बिच वेदी री अग्न भरी, ते धरती बिच पाई दित्ती, ते गड़गड़ाहट ते अवाजां ते बिजलियां ते हिलण होणे लगे।

### सतमी मुहर ते सोन्ने रा धूपदान

8 तां से सत्तां स्वर्गदूत जिन्हेरे का से सत्त तुहरियां थी, फूकणे ताई त्यार होये। 2 पैह्ले स्वर्गदूत ने तुहरी बजाई, ते खून कने मिले रे ओले ते अग्न पैदा होई, ते धरती पर पाई दित्ती गई, ते धरती रा इक तिहाई फूकी गया, ते सब हरी घा बी फूकी गया। 3 ते दूजे स्वर्गदूत ने तुहरी बजाई, ता मन्ना अग्न साहई फूकिन्दा इक बड्डा पहाड़ समुन्द्र बिच पाई दित्तेया, ते समुन्द्र रा इक तिहाई हिस्सा खून बणी गया। 4 ते समुन्द्र री इक तिहाई बणाई री चीजां, मरी गई, ते इक तिहाई जहाज खत्म होई गे। 5 ते तिजे स्वर्गदूत ने तुहरी बजाई, ते इक बड्डा तारा जे मशाल साहई बलेया करदा थिय्या, स्वर्ग का टूट्टेया, ते द्रयां रे इक तिहाई पर, ते पाणी रे स्रोतां पर आई पेया।

### ~ सात्त तुहरियां

6 अते तिस तारे ना नागदौना है, अते इक तिहाई पाणी नागदौना साहई कोड़ा होई गया अते बडे सारे महु तिस पाणी रे कोड़े होई जाणे कने मरी गे। 7 ते चौथे स्वर्गदूत ने तुहरी फूकी, अते सूरज रा इक तिहाई, अते चाँद रा इक तिहाई ते तारेया रे इक तिहाई पर मुसीबत आई, इत्ते तक कि तिन्हेरे इक तिहाई हिस्से बिच न्यहारा होई गया, अते दिन रे इक तिहाई बिच लौ नी रेहई, अते तिहय्यां राती बिच बी नी। 8 अते जां मैं फिरी दिखेया, ता अम्बर रे बीच इक उकाब जो उड़दे ते जोरे सणे बोलदे ऐ सुणेया, कि तिन्हा त्रै स्वर्गदूतां री तुहरी री अवाज री वजह कने जिन्हेरा बजणा हल्ले बचे रा है, धरती रे रेह्ले वाळेयां पर हाय! हाय! हाय! 9 अते जां पंजमे स्वर्गदूत ने तुहरी बजाई, ता मैं स्वर्ग का धरती पर तारा पैदा दिखेया, अते तिस जो अथाह कुण्ड री कुँजी दित्ती गई। 10 तिस न अथाह कुंड जो खोलेया, अते कुण्ड बिच का भट्टी साहई धुआं निकलेया, अते कुण्ड रे धुएं कने सूरज अते हवा न्यहारी होई गई। 11 अते तिस धुएं बिच का धरती पर टिड्डियां निकली, अते तिन्हा जो धरती रे बिच्छु साहई ताक्त दित्ती गई। 12 ते तिन्हा जो बोलेया गया, कि ना धरती री घा जो, ना कुसकी हरियाली जो, ना कुसकी बूट्टे जो नुकसान करदे, सिर्फ उन्हा महुआं जो जिन्हेरे मथे पर परमेश्वर री मौहर नी है। 13 अते उन्हा जो मारी रखणे रा नी, अपण पंज महीने ताई महुआं जो दुख दैणे रा हक दित्तेया गया, ते पीड़ इदेयी थी, जिहय्यां बिच्छू रे डंक मारणे कने महुआं जो हुन्दी।

9 उन्हा दिनां बिच महुआं ने मौत जो तोपणा, अते नी मिलणी, अते मरणे री इच्छा करणी, अते मौत ने तिन्हा का नहसणा। 2 तिन्हा से टिड्डियां लड़ाई करणे ताई त्यार कित्ते रे घोड़े जैसी थिय्यां, अते तिन्हेरे सरां पर मन्ना सुन्ने रे मुकुट थिय्ये, ते तिन्हेरे महु महुआं साहई थिय्ये। 3 ते तिन्हेरे बाळ जनानियां साहई, अते दांद शेर साहई थिय्ये। 4 तिन्हा ने लोहे साहई झिलम पाई री थी, अते तिन्हेरे पंखा का अवाज इदेयी थी जिहय्यां रथ अते मते सारे घोड़े जे लड़ाई बिच दौड़दे होन्। 5 अते तिन्हेरी चूमट बिच्छुआं साहई थी, अते तिन्हा बिच डंक थिय्ये, अते तिन्हा जो पंज महीने ताई महुआं जो दुख दैणे री ताक्त मिली थी, से तिन्हेरी ई चूमट बिच थी। 6 अथाह कुण्ड रा दूत तिन्हा पर राजा थिय्या, तिसेरा नां इब्रानी बिच अबदोन, अते यूनानी बिच अपूलयोन है। 7 पैह्ले मुसीबत बिती गई, दिख्खो अवे इन्हेरे बाद दो मुसीबत होर होणे वाळी हिन। 8 अते जां छठे स्वर्गदूत ने तुहरी बजाई ता जे सुन्ने री वेदी परमेश्वर रे सामणे है, तिसेरे सीगा बिच का ऐ अवाज सुणी। 9 मन्ना कोई छठे स्वर्गदूत कने जिसेरे का तुहरी थी बोलेया करदा थिय्या, कि उन्हा चार स्वर्गदूत जो जे बड्डे द्रया फुरात रे कन्ने बन्ने रे हिन, खोली दे। 10 ते से चारो दूत खोली दित्ते गे जे उस बेले, अते दिन, ते महीने, अते साल ताई महुआं री इक तिहाई जो मारी रखणे ताई त्यार कित्ते गे थिय्ये। 11 तिन्हेरे फौजां रे सवार री गिणती बीह करोड़ थी, मैं तिन्हेरे गिणती सुणी। 12 मिंजो इस दर्शन बिच घोड़े अते तिन्हेरे इदेय सवार लिब्बे, जिन्हेरी झिलमे अग्न, अते धूम्रकान्त, ते गन्धक साहई थी, अते तिन्हा घोड़ेयां रे सिर शेर रे सिरां साहई थिय्ये, अते तिन्हेरे मूहा का अग्न, अते धुआं ते गन्धक निकळदा थिय्या। 13 इन्हा तिन्ना माह मारियां मतलब अग्न, धुआं अते गन्धक जे तिन्हेरे मूह का निकळदी थी, महुआं री इक तिहाई मारी दित्ती गई। 14 किजोकि उन्हा घोड़ेयां री ताक्त तिन्हेरे मूह, अते तिन्हेरी चूमटां बिच थी, इधेरे ताई तिन्हेरी चुमटां किडेयां साहई थी, अते तिन्हा चूमटा रे सिर बी थिय्ये, अते इन्हा कने ई से पीड़ा दिंदे थिय्ये। 15 बाकी महुआं ने जे उन्हा बिमारियां कने नी मरे थिय्ये, अपणे हत्थां रे कम्मा का तौबा नी कित्ती, कि बुरी आत्मां, अते सुन्ने चाँदी अते पीतळ, अते पत्थरां, ते काठ री मूर्तियां री पूजा ना करण, जे ना दिखी, ना सुणी, ना चली सकदी हिन। 16 ते जे खून, टोना, व्यभिचार, चोरियां, उन्हा ने कित्ती थी, तिन्हा का तौबा नी कित्ती। 17 फिरी मैं इक होर तकड़े स्वर्गदूत जो बदळ रा ढकणा लेई करी स्वर्ग का उतरदे दिख्खेया, तिसेरे सर इन्द्रधनुष थिय्या, अते तिसेरा मूह सूरज साहई अते तिसेरे पैर अग्न रे खम्भे साहई थिय्ये। 18 ते तिसेरे हत्थां हल्की जदेयी खुले री कताब थी, तिस ने अपना सिधा पैर समुन्द्र पर, अते खब्बा पैर धरती पर रखेया। 19 ते अदेय जोरे सणे लैर मारी, जिहय्यां शेर गुरजदा, जां तिस ने लैर मारी ता गरजन् री सत्त अवाजां सुणिती। 20 अते जां सत्तां गरजन् री अवाजां सुणिई गई, ता मैं लिखणे जो थिय्या, पर मैं स्वर्ग का ऐ अवाज सुणी, कि जे गल्लां गरजन् री उन्हा सत्त अवाजां का सुणी है, तिन्हा जो गुप्त रख, अते मत लिख। 21 ते जिस स्वर्गदूत जो मैं समुन्द्र अते धरती पर खड़ा दिखेया थिय्या, तिस ने अपना सिधा हत्थ स्वर्ग पाससे चुकेया।

### स्वर्गदूत ते इक छोटी कताब

10 जे युगानुयुग जिंदा हिन, अते जिस ने स्वर्ग जो अते जे किच्छ तिस बिच है, अते धरती जो अते जे किच्छ तिस बिच है, अते समुन्द्र जो अते जे किच्छ तिस बिच है बणाया तिसेरी कसम खाईकरी बोलेया, अवे ता होर हाण नी होणी। 2 बल्कि सतमें स्वर्गदूत री अवाज होणे रे दिनां बिच जां से तुहरी फूकणे जो होणी, ता परमेश्वर रा गुप्त मनोरथ उस खुसखबर री साहब कने जे तिन्हा ने अपणे भक्तां भविष्यवाणी करणे वाळे जो दित्तेया पूरा होणा। 3 जिस अवाज करणे वाळे जो मैं स्वर्ग बिच बोलदे सुणेया थिय्या, से फिरी मेरे कने गल्लां करणे लगेया; कि जा, जे स्वर्गदूत समुन्द्र ते धरती पर खड़ा है, तिसेरे हत्थां बिच का खुलेरे री कताब लेई ले। 4 मैं स्वर्गदूत का जाईकरी बोलेया, ऐ हल्की कताब मिंजो दे, तिस ने मिंजो बोलेया ले इस जो खाई जा, अते इन्ने तेरा पेट कोड़ा ता करणा, अपण तेरे मूह बिच मखीर साहई मीठठा लगणा। 5 ते से हल्की कताब उस स्वर्गदूत रे हत्थां का लेई करी खाई गया पर से खाई के, ता मेरा पेट कोड़ा होई गया। 6 तां मिंजो ऐ

बोलेया गया, कि तिज्जो बड़े महुआं, अते होर जातियां रे महुआं, अते भाषा, ते राज्ञ्यां पर, फिरी भविष्यवाणी करणी पैणी। 7 फिरी मिजो नापणे ताई इक नळू दित्तेया गया, ते कुसकी ने बोलेया, उठ, परमेश्वर रे देहरे अते वेदी, अते उस बिच भजन करणे वाळ्यां जो नापी ले। 8 ते देहरे रे बाहर रा अंगण छुडी दे, तिस जो मत नाप, किजोकि से होर जाति जो दित्तेया गया है, ते तिन्हा ने पवित्र सैहर जो बताळी महीने ताई बरवाद करी देणा। 9 अते मैं अपणे दो गवाह जो ऐ हक दैणा, टाट लेई करी इक हजार दो सौ साठु रोजां ताई भविष्यवाणी करण। 10 ऐ से ई जैतून रे दो बूट्टे अते दो दीवट हिन् जे धरती रे प्रभु रे सामणे खडे रेहन्दे हिन्। 11 ते जे कोई तिन्हा जो नुकसान दैणा चाहन्दा है, ता तिन्हेरे मूह का अग्न निकळी करी तिन्हेरे बैरियां जो राख करदी है, अते जे कोई तिन्हा जो नुकसान दैणा चाहन्दा, ता पक्का इस तरिके कने मारी दित्तेया जाणा।

### दो गुआह

11 इन्हा जो हक है, कि अम्बर जो बंद करण, कि उन्हेरी भविष्यवाणी रे दिनां बिच मेह नी पेयो, अते तिन्हा जो सब पाणी पर हक है, कि तिस खून बनान, ते जां चाह तां तां धरती पर हर तरिके री मुसीबत लांन। 2 जां से अपणी गवाई देई बैन्ने, ता से जानवर जिन्ने अथाह कुण्ड बिच का निकलणा, तिस कने लडी करी तिस का जीती जाणा ते तिस जो मारी रखणा। 3 तिन्हेरी लास तिस बड्डे सैहर बिच पेई रेह्ली, जिस जो आत्मिक तरिके कने सदोम अते मिसर बोलेया जांदा, जिन्ने तिन्हेरा प्रभु बी सूली पर चढाया गया थिय्या। 4 ते सब महुआं, कुलां, भाषा, अते जातियां बिच का महु ने तिन्हेरी लासां जो साड्डे त्रै रोज ताई दिखदे रेह्ला, अते तिन्हेरी लासां जो कन्न बिच रखणे नी दैणा। 5 धरती बिच रेह्ले वाळ्यां ने तिन्हेरे मरणे कने खुस अते मग्न होई जाणा, अते तिन्हा इक दूजे जो भेंटा भेजणी, किजोकि इन्हा दोनां भविष्यवाणी करणे वाळ्यां ने धरती बिच रेह्ले वाळ्यां जो तंग कित्तेया थिय्या। 6 पर साड्डे त्रै रोजां बाद परमेश्वर रे पाससे का जिंदगी री सांस ने तिन्हा पर पँठ करणी, अते तिन्हा अपणे पैरा रे भरे खडे होई जाणा। अते तिन्हा जो दिखणे वाळ्यां जो बड़ा डर होई गया। 7 तां तिन्हा जो स्वर्ग क इक बडी बड्डी अवाज सुणिती, कि इत्ते ऊपर आओ, ऐ सुणी करी से बदल बि बेईकरी अपणे बैरियां जो दिखदे-दिखदे स्वर्ग बिच चढी गे। 8 फिरी तिस बेले इक बड़ा बड्डी हिलण होया, ते सैहर दसमां हिस्सा छुडकी पेया, ते तिस हिलण कने सत्त हजार महु मरी गे, ते बाकी बचे रे डरी गे, ते स्वर्ग रे परमेश्वर री महिमा किन्ती। 9 दूजी मुसीबत बीती गई, दिखखो, तिज्जो मुसीबत जल्दी आणे वाळे है। 10 जां सत्तमै स्वर्गदूत ने तुहरी बजाई, ता स्वर्ग बिच इस बारे बड्डी बड्डी अवाजां होणे लगी कि दुनियां रा राज्य असा रे प्रभु रा, अते तिन्हेरे मसीह रा होई गया। 11 ते तिन्ने हमेसा ताई राज्य करणा, अते चौबी प्राचीन जे परमेश्वर रे सामणे अपणे अपणे सिंहासन पर बैठे रे थिय्ये, मूह रे भारे पेई करी परमेश्वर जो नमस्कार करी के। 12 ऐ बोलणा लगे, कि ओ सबका सक्तिसाली प्रभु परमेश्वर, जे हिन्, अते जे थिय्ये, असा तुसां रा सुकर करदे, कि तुसा ने अपणी बडी बड्डी ताकत जो कम्म बिच लियाई करी राज्य कित्तेया है। 13 ते होर जातियां ने गुस्सा कित्तेया, ते तुसा रा प्रकोप आई पेया, अते से बेला आई रेया, कि मरे रेयां रा न्याय कित्तेया जाये, अते तुसा रे भक्त भविष्यवाणी करणे वाळे अते पवित्र महुआं जो अते उन्हा हल्के बड्डेयां जो जे तुसां रा डर मनदे, बदला दित्तेया जान, अते धरती जो बिगाडने वाळ्यां जो खत्म कित्ते जान। 14 ते परमेश्वर रा देहरा जे स्वर्ग बिच है, तिस जो खोलेया, अते तिन्हेरे देहरे बिच तिन्हेरी वाचा रा सन्दूक लिब्बेया, अते बिजळियां अते अवाजां ते गडगडाहट अते हिलण होये अते बडे बडे ओळे पे।

### सतमी तुसरी

15 फिरी स्वर्ग बिच इक बड्डी नसानी नजर आई, मतलब इक जनानी जिन्ने सूरज जो ओढे रा थिय्या, ते चाँद तिसरे पैरा थल्ले थिय्या, ते सिर पर बारह तारेया रा मुकुट थिय्या। 16 से दुपराणी होई, ते लैरा मारदी थी, किजोकि जमणे री पीड तिस जो होया करदी थी, अते से बच्चा जमणे री पीड बिच थी। 17 ते इक होर नसानी स्वर्ग बिच लिब्बी, अते दिखो, इक बड़ा बड्डी लाल

अजगर थिय्या जिसेरे सत्त सिर अते दस्स सिंग थिय्ये, ते सिरां पर सत्त राज मुकुट थिय्ये। 18 तिसेरी चूमट ने अम्बर रे तारेयां री इक तिहाई जो खीन्नी करी धरती बिच पाई दित्तेया, अते से अजगर तिस जनानी रे सामणे जे जच्चा थी, खड़ा होया, कि जां से बच्चा जमगी ता से तिसेरे बच्चे जो निगळी जाये। 19 ते तिस ने इक मुन्डा जमेया जे लोहे रा दण्ड लिन्ते रे, सब जातिया पर राज्य करणे जो थिय्या, ते तिसेरा बच्चा इकाइक परमेश्वर का, अते तिन्हेरे सिंहासन का चुक्री करी पुजाई दित्तेया।

### इक जनानी ते इक अजगर

12 ते से जनानी उस बणा जो नस्सी गई, जिन्ने परमेश्वर रे पाससे का तिसेरे ताई इक जगह तयार किन्ती गेरी थी, कि तिन्ने से इक हजार दो सौ साठु रोजां ताई पाळी जाये। 2 फिरी स्वर्ग बिच लडाई होई, मीकाईल अते तिसेरे स्वर्गदूत अजगर कने लडने ताई निकळे, ते अजगर अते तिसेरे दूत तिस कने लडे। 3 अपण प्रबल नी होये, ते स्वर्ग बिच तिन्हेरे ताई कोई जगह नी रेहई। 4 तां बड्डी अजगर मतलब सेहई पुराणा कीडा, जिस जो इबलीस अते सैतान बोलदे, अते सारी दुनियां जो भटकाणे वाळा, धरती बिच सुडी दित्तेया गया, अते तिसेरे दूत बी तिस कने सुडी दित्ते गे। 5 फिरी में स्वर्ग का इक बडी बड्डी अवाज आंदी सुणी, कि अवे असा रे परमेश्वर रा उद्धार, ताक, राज्य, अते तिन्हेरे मसीह रा हक सामणे आया है, किजोकि असा रे भाइयां इल्जाम लगाणे वाळा, जे रात दिन असा रे परमेश्वर रे सामणे तिन्हा पर इल्जाम लगान्दा थिय्या, सुडी दित्तेया गया। 6 ते से छेलू रे खून री वजह कने, अते अपणी गवाई रे वचन री वजह कने, तिस पर जयवन्त होये, अते तिन्हा ने अपणे प्राणां जो प्यारे नी जाणी के, इत्ते तक की मौत बी सेहई लेई। 7 इस वजह कने, ओ स्वर्गो, अते तिन्हा बिच रेह्ले वाळे मगन हो, ओ धरती, समुन्द्र, तुसा पर हाय! किजोकि सैतान बडे गुस्से कने तुसा का उत्तरी, किजोकि जाणदा, कि तिसेरा थोडा इ वक्त बचे रा है। 8 जां अजगर ने दिखेया, कि धरती बिच सुडी दित्तेया गया, ता उस जनानी जो जिन्ने मुन्डा जमेया थिय्या, तंग कित्तेया। 9 पर तिस जनानी जो उकाब रे दो पंख दित्ते गे, कि कीडे रे सामणे का उडी करी बणा बिच तिस जगह पूजी जाये, जिन्ने से इक हाण, अते बेलेयां, अते अद्धे बेले ताई पाळी जाये। 10 ते कीडे ने तिस जनानी रे पिच्छे अपणे मूह कने द्रया साहई पाणी रूळायया, ताकि तिस जो द्रया कने रूळई देंन। 11 पर धरती ने तिस जनानी री मदद किन्ती, अते अपणा मूह खोली करी तिस द्रया जो जे अजगर ने अपणे मुंह का रूळायया थिय्या, पी लिन्तेया। 12 तां अजगर तिस जनानी का गुस्सा होया, अते तिसेरी बचे री औलाद का जे परमेश्वर रे हुक्मा जो मनदे, ते यीशु जी री गवाई दैणे पर मजबूत हिन्, लडने जो गया। ते से समुन्द्र रे बालू पर जाई खड़ा होया। 13 तां मैं इक जानवर जो समुन्द्र बिच क निकळदे दिखेया, जिसेरे दस्स सींग अते सत्त सिर थिय्ये, अते तिसेरे सिरां पर परमेश्वर रे बेजती रे नां लिखे रे थिय्ये। 14 जे जानवर मै दिखेया, से चीते साहई थिय्या, अते तिसेरे पैर रीख साहई थिय्ये, अते मूह शेर साहई, अते उस अजगर ने अपणी सक्ति, ते अपणा सिंहासन, अते बड़ा हक, तिस देई दित्तेया। 15 ते मैं तिसेरे सिरां बिच का इक पर इदेया भारी जख्म दिखेया, मन्त्रो से मारणे पर है, फिरी तिसेरा जान लैणे वाळा जख्म ठीक होई गया, ते धरती रे महु तिस जानवर रे पिच्छे पिच्छे हैरान होई चले। 16 ते तिन्हा ने अजगर री पूजा किन्ती, किजोकि तिस ने जानवर जो अपणा हक देई दित्तेया थिय्या, अते ऐ बोली करी जानवर री पूजा किन्ती, कि इस जानवर रे बराबर कुण है ? 17 कुण उस कने लडी सकदा ? ते बडी बड्डी गल्ला करणे अते बेजती करणे ताई तिस जो इक मूह दित्तेया गया, 18 ते तिस जो बताळी महीने ताई कम्म करणे रा हक दित्तेया गया।

### दो जानवर

13 तिस ने परमेश्वर री बेजती करणे ताई मूह खोलेया, कि तिन्हेरे नां अते तिन्हेरे तम्बू मतलब स्वर्ग रे रेह्ले वाळे री बेजती करण। 2 तिस जो ऐ हक दित्तेया गया, कि पवित्र महुआं कने लडन, ते तिन्हा पर जीत पाये, अते तिस जो हर इक कुल, महु, भाषा, अते जाति पर हक दित्तेया गया।

3 धरती रे से सब रहे वाळे जिन्हेरे नां उस छैलू री कताब बिच नी लिखे गे, जे दुनियां री सुरुआत रे बेले का मारे रे हिन, तिस जानवर पूजा करणे ।  
 4 जिसेरे कन्न होनु से सुणी लेंन। 5 जिस जो कैद बिच पैणा है, तिन्ने कैद बिच पैणा, जिन्ने तलवार कने मारणा, जरूरी है कि से तलवार कने मारेया जाणा, पवित्र महुआं रा सबर अते विसवास इस्सी बिच है। 6 फिरी मैं इक जानवर जो धरती का निकळदे दिखेया, तिस छैलू साहई दो सींग थिये, ते से अजगर साहई बोलदा थिय्या। 7 अते ऐ उस पैहे जानवर रा सारा हक तिसेरे सामणे लियांन्दा थिय्या, ते धरती, अते तिस बिच रहे वाळेयां का उस पैहे जानवर री जिसेरा जान कडने वाळा खरा होई गया थिय्या, पूजा करान्दा थिय्या। 8 से बड्डी बड्डी नसानियां दिखान्दा थिय्या, इत्ते तक कि महुआं रे सामणे स्वर्ग का धरती बिच अग बरसाई दिंदा थिय्या। 9 तिन्हा नसानियां री वजह कने जिन्हा जो उस जानवर रे सामणे दिखणे रा हक तिस जो दितेया गया थिय्या, से धरती बिच रहे वाळे जो इस तरिके कने भटकान्दा थिय्या, कि धरती रहे वाळेयां जो बोलदा थिय्या, कि जिस जानवर री तलवार लगी री थी, से जी गया, तिसेरी मूर्ती बणाओ। 10 तिस जो उस जानवर री मूर्ती बिच जान पाणे रा हक दितेया गया, कि जानवर मूर्ति बोलणे लगी पे, अते जितणे महु उस जानवर री मूर्ति री पूजा नी करणे, तिन्हा जो मारी देंन। 11 तिस ने छोट, बड्डी, अमीर, कंगाल, आजाद, भक्त सबनी रे सजे हत्थ या तिन्हेरे मत्थे पर इक इक छाप कराई दिन्ती। 12 कि उस जो छड्डी जिस पर छाप मतलब उस जानवर रा नां, या तिसेरे नां रा अंक हो, अते कोई लेन देन ना करी सके। 13 ज्ञान इस्सी बिच है, जिस जो समझ हो, से इस जानवर रा अंक जोडी लेंन, किजोकि महु रा अंक है, ते तिसेरा अंक छै सौ छियाहट है। 14 फिरी मैं दिखेया, ते दिखो, से छैलू सिय्योन पहाड पर खडितेरा है। ते तिसेरे कने इक लाख चुरताळी हजार जणे हिन जिन्हेरे मत्थे पर तिसेरा अते तिन्हेरे पिता रा ना लिखे रा है। 15 ते स्वर्ग का मिंजो इक इदेयी अवाज सुणित्ती, जे पाणी री मती सारी धारा अते बड्डी गडगडाहट साहई अवाज थी, अते जे अवाज मैं सुणी, से इदेयी थी, मन्ना बौंसरी बजाणे वाळा बौंसरी बजान्दा हो। 16 से सिहासन रे सामणे अते चारो प्राणी अते प्राचीनां रे सामणे मन्नाम ऐ नौआं गाणा गाया करदे थिये, ते उन्हा इक लाख चुरताळी हजार जणेया जो छड्डी करी जे खरीदी लिन्ते रे गेरे थिये कोई से गाणा नी सीखी सकदा थिय्या। 17 ऐ से है, जे जानानियां कने असुचे नी होये, अपण कुँआरे हिन, एह सेहई हिन, कि जित्ते कुते छैलू जांदा, से तिसेरे पिच्छे चली पुन्दे, एह ता परमेश्वर री निमित्त पैहे फल होणे तांई महुआं बिच का खरीदी लिन्ते गेरे हिन। 18 ते तिन्हेरे मूंह का कदी बी झूठ नी निकळदा, से बेकसुर हिन।

### मेमना ते तिसेरे लोक

14 फिरी मैं इक होर स्वर्गदूत जो अम्बर बिच उड़दे दिखेया जिस का धरती बिच रहे वाळेयां री हर इक जाति, कुल, भाषा, अते महुआं जो सुनाणे तांई हमेसा खुसखबरी थी। 2 तिस ने बडी जोर कने बोलेया, परमेश्वर का डरो, ते तिन्हेरी महिमा करो, किजोकि न्याय करणे रा बेला आई गया है, अते तिसेरा भजन करो, जिस ने स्वर्ग अते धरती, समुन्द्र, पाणी रे स्रोते बणाये हिन। 3 फिरी इसेरे बाद इक होर दूजा स्वर्गदूत बोलदा आया, कि छुडकी पेया, से बडा बेबिलोन छुडकी पेया जिस ने अपणे व्यभिचार री कोपमय सराब सारी जाति जो पियाई। 4 फिरी इसेरे बाद इक होर तिजा स्वर्गदूत ऐ बोलदे आया, कि जे कोई उस जानवर अते तिसेरी पूजा करगा, अते अपणे मत्थे या अपणे हत्थां पर तिसेरी छाप लिंगा। 5 ओ परमेश्वर रे प्रकोप री निरी सराब जो जे तिसेरे कटोरे बिच पाई गेरी है, पिन्ना अते पवित्र स्वर्गदूतां रे सामणे, अते छैलू रे सामणे अग अते गन्धक री पीडा बिच पैन्गा।

### त्रै स्वर्गदूत

6 तिन्हेरी पीडा रा धुआं, हमेसा तांई उठदा रहेला, ते जे तिस जानवर अते तिसेरी मूर्ति री पूजा करदे हिन, अते जे तिसेरे नां ई छापी लिंदे हिन, तिन्हा जो रात दिन चैन नी मिलणा। 7 पवित्र महुआं रा सबर इस्सी बिच है, जे परमेश्वर रे हुक्मां जो मनदे, अते यीशु जी पर विसवास रखदे हिन। 8 फिरी मैं स्वर्ग का ऐ अवाज सुणी, कि लिख, जे मुर्दे प्रभु बिच मरदे हिन, से अबे का

धन्न हिन, आत्मा बोलदा है, हॉ किजोकि तिन्हा ने अपणी मेहनत री वजह कने अराम पाणा, अते तिन्हेरे कम्म तिन्हेरे कने ई होई लिंदे। 9 मैं दिखेया, इक साफ बदळ है, अते तिस बदळ बिच महु रे पुत्र सरीखा कोई बैठे रा है, जिसेरे सिर पर सुने ता मुकुट अते हत्थां बिच चोखा हंसुआ है। 10 फिरी इक होर स्वर्गदूत ने देहरे बिच का निकळी करी, तिस कने जे बदळ बिच बैठे रा है, बडे जोर कने बोलेया, कि अपणी हंसुआ लगाई करी लवनी करो, किजोकि लवने रा बेला आई गेरा है, इधरे तांई कि धरती री खेती पकी गेरी है। 11 ते तांई जे बदळ पर बैठे रा थिय्या, तिस ने धरती पर अपणा हंसुआ लगाया, अते धरती लवनी किन्ती गेई। 12 फिरी इक होर स्वर्गदूत उस देहरे बिच का निकळेया, जे स्वर्ग बिच है, अते तिसका का बी चोखा हंसुआ थिय्या। 13 फिरी इक होर स्वर्गदूत जिस अग पर हक थिय्या, वेदी बिच का निकळेया, ते जिस का चोखा हंसुआ थिय्या, तिस जो जोरे सणे बोलेया, अपणा चोखा हंसुआ लगाई करी धरती की दाख रस रे गुच्छे बड्डी ले, किजोकि तिसेरी दाख रस पकी गेरी है।

### कटाई

14 ते उस स्वर्गदूत ने धरती पर अपणा हंसुआ पाया, अते धरती री दाख लता रा फल कट्टी करी, अपणे परमेश्वर रे प्रकोप रे बडे रस रे कुंड बिच पाई दितेया। 15 ते सैहर रे बाहर उस कुंड बिच दाख रौंदे गे, अते रस कुंड बिच का इतणा खून निकळेया कि घोड़ेयां री लगामां तक पूजेया, ते सौ कोस तक रुळी गया। 16 फिरी मैं स्वर्ग बिच इक बड्डी ते अनौखि निसानि दिखिख, मतलब की सात्त स्वर्गदूत जिन्हेरे का सत्तो आखरी मुसिबतां थी, किजोकी तिन्हेरे मुकी जाणे पर परमेश्वर रे गुस्से रा अंतं है। 17 तां मैं आग कने मिळे रे सीसे सांई इक समुंदर दिखेया; ते जे लोक तिस जानवर पर ते तिस मुर्ति पर ते तिसेरे नां रे अंक पर जिती गे थिये, तिन्हा जो तिस सीसे रे समुंदर रे नेडे परमेश्वर री वीणा जो लेई करी खडिते रे दिखेया। 18 से परमेश्वर रे दास मूसा रा गीत ते छैलू रा गीत गाई-गाई करी बोलदे थिये, "हे सर्वशक्तिमान प्रभू-परमेश्वर, तुसां रे कम्म महान रे अनौखे हिन; हे जुग-जुग रे राजे, तेरी चाल ठीक ते सबी है।" 19 "ओ प्रभू, कुण तेरे का नी डरगा ते तेरे नां री महीमा नी करगा? किजोकी सिर्फ तु ई पवित्र है। सारी जातियां आई तेरे सामणे प्रणाम करगी, किजोकी तेरे ईसाफ रे कम्म सामणे आई गे रे हिन।" 20 इसका बाद ऐ दिखेया की स्वर्ग बिच साक्षी रे तम्बु रा देहरा खौलेया गया;

### आखरी मुसिबतां वाळे स्वर्गदूत

15 ;ते से सत्तो स्वर्गदूत जिन्हेरे का सत्तो मुसीबतां थी, मलमल रे साफ ते चमकदार कपडे पाए ते छाती पर सोने री पट्टियां बन्ने रे देहरे का निकळे। 2 तां तिन्हा चारों प्राणियां बिच का इक ने तिन्हा सत्तो स्वर्गदूतां जो परमेश्वर, जे जुग-जुग तांई जिन्दे हिन, रे गुस्से रे भरे रे सोने रे सात्त कटोरे दिते; 3 ते परमेश्वर री महिमा ते ताकत री वजह कने देहरा धुएं कने भरी गया, ते जां तिकर तिन्हा स्वर्गदूतां री सत्तो मुसीबतां मुकी ना गी तां तांई कोई देहरे बिच नी जाई सकेया। 4 फिरी मैं देहरे बिच कुसकी जो बडे अवाज बिच तिन्हा सत्तां स्वर्गदूतां जो ऐ बोलदे सुणेया, जाओ परमेश्वर रे सत्तो गुस्से रे कटोरेयां जो पृथ्वी पराले उधेरी देयो। 5 अते पैहले स्वर्गदूत ने जाई करी अपण कटोरा प्रथ्वी पराले उधेरी दितेया, तां तिन्हा म्हुणुआं पर जिन्हा पर तिस जानवर री छाप थी ते जे मुर्ती री पूजा करदे थिये इक किस्म रा बडा दर्दनाक फोडा निकळेया। 6 दुए स्वर्गदूत ने अपणा कटोरा समुन्दर पराले उन्धेरी दितेया ते से मरे रे लोक्का रे खून साई होई गया ते समुन्दर बिच रा हर इक जिन्दा जानवर मरी गया। 7 त्रिये स्वर्गदूत ने अपणा कटोरा दरेया ते पाणी रे सोत्तेयां पर उन्धेरी दितेया ते से खुन बणी गया, 8 तां मैं पाणी रे स्वर्गदूत जो ऐ बोलदे सुणेया, हे पवित्र, जे है जे था तु न्यायी है ते तैं ऐ न्याय कितेया।

## परमेश्वर रे गुस्से रे सात्त कटोरे

16 किजोकी तिन्हा ने पवित्र लोकां रे भविष्याद्वक्तां रा खुन बहाया थिया ते तुसां ने तिन्हा जो खुन पुआया किजोकी से इसी जोगे हिन। 2 फिरी मै वेदी का ए शब्द सुणेया, हाँ हे सर्वशक्तिमान परमेश्वर तुसां रे फैसले ठीक ते सच्चे हिन। 3 चोथे स्वर्गदूत ने अपण कटोरा सुरज पर उन्धेरी दित्तेया ते तिसजो म्हणुआं जो अग्न कने फुकी दैणे रा हक दित्तेया गया। 4 म्हणु बडी गरमी कने फुकी गे ते परमेश्वर रे ना री जिसजो इन्हा मुसीबतां पर हाक है बुराई किन्ती, अपण तिन्हा री तारिफ करणे ताई मन नी लाया। 5 पजंमे स्वर्गदूत ने अपण कटोरा तिस जानवर रे सिहांसन पर उन्धेरी दित्तेया ते तिसरे राज पर न्यहरा छाई गेय लोक अपणे दर्द री वजह कने अपणी जिभ चबाणा लगे। 6 ते अपणी दर्द रे फोड़ेयां रे वजह कने स्वर्ग रे परमेश्वर री बुराई किन्ती अपण अपणे अपणे कम्मां का मन नी फिराया। 7 छेम्मे स्वर्गदूत ने अपण कटोरा फरात पर उन्धेरी दित्तेया ते तिसेरा पाणी सुकी गेय की पूर्व दिशा रे राजेयां ताई रस्ता तयार हो जाए। 8 फिरी मै तिस अजगर रे मुँह का ते तिस जानवर रे मुँह का ते तिस झूठे भविष्यद्वक्ता रे मुँह का त्रै बुरी आत्मा जो मेढका रे रूप बिच निकलद दिख्खेया, 9 ए चमत्कार दरखाने वाळी बुरी आत्मा हिन जे सारी दुनिया रे राजेयां का निकली करी इस ताई जादी की तिन्हा जो सर्वशक्तिमान रे तिस बड्डे दिन ताई कइ करण। 10 दिख्ख मै चोर सांई आदां, धन है से जे जागदा रैहन्दा, ते अपणे कपड़ेयां री रखवाळी करदा ताकी नगां नी फिरे ते लोक तिसेरा नगांपन ना दिख्खे 11 ते तिन्हा ने तिन्हेरे जो तिस जगह कड़ेरेया जे इब्रानी बिच हरमगीदोन बोलेया जांदा। 12 सतमे स्वर्गदूत ने अपण कटोरा हवा पराल्ले उन्धेरी दित्तेया ते देहरे रे सिहांसन बिच का ए बड्डि अवाज होई, हो बैठेया। 13 फिरी बिजली चमकी ते अवाज ते गर्जन होइ ते इक् इदेया बड्डा भूकंप आया की जां रा म्हणु पैदा होया तां का इदेया बड्डा भूकंप कदी नी होया, इस कने तिस बड्डे सैहर रे त्रै टोटे होई गे ते जाति-जाति रे सैहर पैड़ गे ते बड्डे बेबिलोन जो परमेश्वर रे इत्ते याद कित्तेया गया की से अपणे गुस्से री मदिरा तिसजो पिलाए 14 इस कने तिस बड्डे सैहर रे त्रै टोटे होई गे ते जाति-जाति रे सैहर पैड़ गे ते बड्डे बेबिलोन जो परमेश्वर रे इत्ते याद कित्तेया गया की से अपणे गुस्से री मदिरा तिसजो पिलाए 15 ते हर इक् टापु अपणी जगह का हटी गया ते पहाड़ा रा पता नी चलेया। 16 आसमान का बी-बी किलो रे ओळे पैय ते इस ताई की ए मुसीबत बडी भारी थी लोकां ने ओळेयां री मुसीबत री वजह कने परमेश्वर री बुराई किन्ती। 17 जिन्हा सात्त स्वर्गदूतां का से सात्त कटोरे थिये, तिन्हा बिच का इक् ने आई करि मेरे जो बोलेया, इत्ते आ, मै तेरे जो बड्डि रडं री सजा दिखादां जे मते सारे पाणी रे पराल्ले बैठ्ठी री है, 18 जिसेरे कन्ने धरती रे सारे राजेयां ने व्यभीचार कित्तेया ते धरती रे लोक तिसेरे धरती रे तिसेरे व्यभीचार री मदीर कने मतवाले होइ गे थिये। 19 तां से आत्मा बिच जंगल जो लेइ गया ते मै लाल रंग रे जानवर पर जे बुराई रे नां कने भरितां रा थिया ते जिसेरे सात्त सिर ते दस सिगं थिये इक् जनानी जो बैठ्ठे रे दिख्खेया। 20 ए जनानी बैजंजी ते लाल रंग रे कपड़े पाई करी बैठ्ठी री थी ते सोन्ने री किमती मणीयां ते मोतियां कने सजी री थी ते तिसेरे हाथ्थ बिच इक् सोन्ने रा कटोरा थिया जे गन्दि चिजां कने ते तिसेरे वस्त्रिचार री गन्दि चिजां कने भरे रे थिया। 21 तिसेरे माथ्थे पर ए लिख्खे रा थिया, भेद, बड्डा बेबीलोन धरती री रडिया ते गन्दि चिजां री माता, मै तिस जनानी जो पवित्र लोकां रा खुन ते यीशु रे ग्वाह रा खुन पिणे कने मतवाले हुदें दिख्खेया, तिसजो दिख्खिकरी मै हरान होई गया।

## बड्डि वैश्या †

17 मै तिस जनानि जो पवित्र लोकां रा खून पिदें ते यीशु जी रे गवाई दैणे वाळेयां रा खून पिणे कने मतवालि दिख्खेया, तिसजो दिख्खिकरी मै हरान होइ गया। 2 तां तिस स्वर्गदूत ने मेरे जो बोलेया तु तिसजो दिख्खिकरी किजो हरान होया? मै इस जनानी ते तिस जानवर रा जिस पराल्ले से सवार है जिसेरे सात्त सिर ते दस सिगं हिन तेरे जो राज दसदा। 3 जे

† वैश्या गलत काम्म करणे वाळी

जानवर तें दिख्खे रा है से पैहल्ले ता थिया अपण अवे नी हे ते अथाह कुडं का निकळी करी विनाश बिच पेणा ते धरती रे रैहणेवाळे जिन्हेरा नां धरती रे बनणे रे समय का जिन्दगी री कताब बिच नी लिख्खे रे हिन इस जानवर री ए हालत दिख्खि करी की पैहल्ले थिया अपण अवे नी है ते फिरी आई जाणा, बडा हरान होणा। 4 तिस समज ताई जिस बिच ज्ञान है ए इ मोका है से सात्त सिर सात्त पहाड़ हिन जिन्हा पर से जनाणी बैठी री है, 5 वे सात्त राजे बी हिन पाँज तां होइ बैठ्ठे रे हिन ते इक् हल्ले है ते इक् हल्ले तिकर आया नी ते जां ईणा तां किछ समय तिकर तिसेरा रैहणा बि जरूरी है। 6 जे जानवर पैहल्ले थिया ते अवे नी है से अप्पु अठमा है ते तिन्हा सात्त बिच का पैदा होय ते विनाश बिच पैणा। 7 जे दस सिगं तें दिख्खे से दस राजे हिन जिन्हा ने हल्ले तिकर राज नी पाया अपण तिस तिस जानवर कने थोड़ी देर ताई राजेयां साई हाक पागं, 8 ए सब इक् मन होणे ते से अपणी-अपणी ताकत ते हाक तिस जानवर जो दिगं 9 से छैलू कने लडगे ते छैलू ने तिन्हा का जित्ति जाणा किजोकी से प्रभुआं रा प्रभु ते राजेयां रा राजा है ते जे बुलाए ते चुणे रे ते भरोसा करणे वाळे हिन जे तिन्हेरे कने हिन तिन्हा ने जय पाणी। 10 फिरी तिनि ए मेरे जो बोलेया जे पाणी तें दिख्खेया जिस पर से रडं बैठ्ठि री है से लोक ते भीड़ ते भासां हिन। 11 जे दस सिगं तें दीख्खे रे हिन से ते जानवर तिस रडं कने नफरत करणे ते तिसजो लाचार ते नगीं करणे ते तिसेरा माँस खागें ते तिसजो आग्न बिच फुक्कि दिगें। 12 किजोकी परमेश्वर ने तिन्हेरे मन बिच पाणा कि से तिसेरी इच्छा पुरी करण ते जां तिकर परमेश्वर री गलां पुरी नी होई जाए तां तिकर इक् मन होइ अपणा-अपणा राज तिस जानवर जो देइ दे। 13 से जानवर जिसजो तें दिखेया, से बड्डा सैहर है जे धरती रे राजेयां पर राज करदा। 14 इसेरे बाद मै इक् स्वर्गदूत जे स्वर्ग का उतरदे दिख्खेया जिसजो बड्डा हाक हासिल थिया ते धरती तिसेरी रोशनी कने चमकी गेइ। 15 तिसने बड्डि अवाज कने बोलेया, पेइ गया से बड्डा बेबिलोन पेइ गया, से बुरी आत्मा रा निवास ते हर इक् बुरी आत्मा रा अड्डा ते हर इक् बुरी ते गन्दे पक्षी रा अड्डा होई गया। 16 किजोकी तिसेरी व्यभीचार री भयानक मदीरा रे वजह कने सारी जतियां पेई गी री हिन ते धरती रे राजेया ने तिस कने व्यभीचार कित्ते रा है ते धरती रे व्यपारी तिसेरी सुख-विलास रे जादा होणे कने अमी र होए। 17 फिरी मै स्वर्ग का इक् होर अवाज सुणी हे मेरे लोकां तिस बिच का निकळी आओ की तुसी तिसेरे पाप्मां बिच हिस्सेदार ना हो ते तिसेरी मुसीबतां बिच का कोइ बी तुस पर आई ना पे 18 किजोकी तिसेरे पाप्मां रा ढेर स्वर्ग तिकर पुज्जि गे रा है ते तिसेरे अधर्म परमेश्वर जो याद आइ गे रे हिन

## बेबिलोन रा खातमा

18 जिय्यां तिसने तुसजो दित्ते रा है तिय्यां तुसी बी तिसजो देयो ते तिसेरे कम्मां रे हसाब कने तिसजो दो गुणा बदला देयो, जिस कटोरे बिच तिनि ए भरी दित्तेया तिसी बिच तिस ताई दो गुणा भरी देयो, 2 जिन्नि तिनि ए अपणी बडाई किन्ती ते सुख विलास किन्ता उन्नि तिसजो दर्द ते पीडा देयो किजोकी से अपणे मन बिच बोलदी की मै राणी होई बैठ्ठि री है विधवा नी ते कदी बी दुख बिच नी पैणा। 3 इसी वजह कने इक् इ दिन बिच तिस पर मुसीबतां आई पैणी मतलब मौत, दुख ते अकाल ते से आग्न बिच फुक्कि दित्ति जाणी किजोकी तिसेरा न्यायी प्रभू-परमेश्वर सर्व-शक्तिमान है। 4 धरती रे राजा जिन्हा ने तिस कने सुख विलास किन्ता जां तिसेरे फुकिणे रा धुआं दिखगे तां तिसेरे ताई रोहगं ते छात्ति पिटगे। 5 तिसेरे दर्द रे डर रे मारे से बडी दुर खडी करी तिन्हा ने बोलणा हे बड्डे सैहर बेबीलोन हे मजबूत सैहर, हाय हाय, घडी भर बिच ई तेरे जो सजा मिली गे री है। 6 धरती रे व्यापारी तिसेरे ताई रोहगं ते तडपगे किजोकी अवे कुसकी ने तिन्हेरा माल नी खरीदणा। 7 मतलब सोन्ना, चादीं, रतन ते मोती ते मलमल ते बैजंजी रेशमी ते लाल रंग रे कपड़े ते हर तरह री खुसबुदार लकडी ते हाथी रे दादं री हर तरिके री चिजां ते किमती लकडी ते पीतल ते लोहे ते सांगमरमर री हर तरिके री चिजां। 8 तज दालचीनी, मसाल्ले, धुप, इत्र, लोबान, मदिरा, तेल, मैदा, कणक, गा-बैल, भेड़-बकरी, घोड़े-रथ ते नौकर ते लोकां री जिन्दगी। 9 अवे तेरे दिल जो भाणे वाळे फळ तेरे का जान्दे रेय ते स्वाद ते भड़किली चिजां तेरे का दुर होइ री हिन ते से फिरी कदी नई मिलणी। 10 इन्हा चिजां रे व्यापारी जे तिसेरे

जरिए अमीर होई गे रे थिये तिसेरी दर्द रे डर रे मारे दुर खड़े रहन्गे ते रोन्दे ते तडपदे होए बोलगे, 11 हाय हाय ए बड्डा सैहर जे बैजनी ते लाल रंग रे कपड़े पाए रे थिया ते सोन्ने ते रतनां ते मोतियां कने सजे रा थिया। 12 घड़ी भर बिच ई तिसेरा इदेया भारी धन मुकी गया, हर इक्क माझी ते यात्री ते मल्लाह ते जिन्ने समुंदर का कमादे सारे दुर खड़े होए, 13 ते तिसेरे फुकीणे रा धुआं दिखि करी हाक्क मारी करी बोलणा, कृण जणा सैहर इस बड्डे सैहर साई है, 14 ते अपणे-अपणे सिरां पर धुड़ पाणी ते रोन्दे होए ते तडपदे होए लैरां-लैरा मारी करी बोलणा हाय हाय ए बड्डा सैहर जिसेरी दौलत रे जरिए समुंदर रे सारे जहाज वाळे अमीर होई गे थिये दिखदे ई उजड़ी गया। 15 हे स्वर्ग ते हे पवित्र लोक्कां ते प्रेरितो ते भविष्यद्वक्तां तिस पर खुस हो, किजोकी परमेश्वर ने न्याय करी के तिस का तुसां रा बदला लिक्ते रा है। 16 फिरी इक्क ताकतवर स्वर्गदूत ने बड़ी चक्कि रे बट्टे साई इक्क बड्डा चुक्केया ते ए बोल्लि करी समुंदर बिच सुट्टि दित्तेया बड्डा सैहर बेबीलोन इय्यां ई बड़ी ताकत कने सुट्टेया जाणा ते तिसेरा पता नी चलणा। 17 वीणा बजाणे वाळां ते गायकों ते बर्सीं बजाणे वालों ते तुहरी फुकणे वाळेयां री अवाज फिरी कदी तेरे बिच नी सुनिणा, कुसकी कम्म रा कोई कारिगर बी तेरे बिच फिरी कदी नी मिलणा, ते चक्कि रे चलणे री अवाज बी तेरे बिच नी सुनिणी। 18 ते दिये री रौसनी फिरी कदी तेरे बिच नी चमकणि, ते दुल्हे ते दुल्हन री अवाज तेरे बिच नी सुनिणी, किजोकी तेरे व्यापारी धरती रे प्रधान थिये तेरे जादु कने सारी जातियां भटकाई गेइ थी। 19 भविष्यद्वक्ता ते पवित्र लोक्कां ते धरती पर सारे मारे रे लोक्कां रा खुन तिसी बिच पाया गया। 20 इस्सेरे बाद मै स्वर्ग बिच मन्नां बड्डि भीड जो बड़ी अवाज कने ए बोलदे सुणेया, "हालेलुयाह: छुटकारा ते महीमा ते ताकत असां रे परमेश्वर री इ है। 21 किजोकी तिन्हेरे फैसले सच्चे ते ठीक हिन। तिन्हा ने तिस बड्डि रडं रा, जे अपणे व्यभिचार कने धरति जो भ्रष्ट करदी थी, इसांफ किक्ता ते तिसका अपणे दासां रे खुन रा बदला लिक्तेया। 22 फिरी दुसरी तिन्हा ने बोलेया, "हालेलुयाह: तिसेरे फुकीणे रा धुआं हमेसा-समेसा उठदा रहैणा।" 23 तां चोबि प्राचीन ते चारों प्राणिया ने पेइ करी परमेश्वर जो प्रणाम किक्तेया जे सिहांसन पर बैठा थिये ते बोलेया, "आमीन! हालेलुयाह! 24 तां सिहांसन बिच का इक्क अवाज आई, 'हे असां रे परमेश्वर का डरणे वाळे सारे दासां क्या छोटे, क्या बड्डे: तुसी सारे तिन्हेरीसतुति करो।'

**19** फिरी मै बड्डि भीड जदेया ते बड़े पाणी री अवाज ते गर्जन री अवाज सुणीं हालेलुयाह: किजोकी प्रभू असां रा परमेश्वर सर्वशक्तिमान राज करदे। 2 आओ, असी खुस ते मगन होन, ते तिन्हेरी स्तुति करण, किजोकी छैलू रा ब्याह पुजी गे रा है ते तिन्हेरी दुल्हन ने अप्पु जो तैयार करी लिक्ते रा है। 3 तिसजो साफ चमकदार महीन मलमल पाणे रा हाक्क दिक्ते गे रा है; किजोकी तिस महीन मलमल रा मतलब पवित्र लोक्कां रे धर्म रे कम्म हिन। 4 तां स्वर्गदूत ने मेरे जो बोलेया; ए लिख, की धन हिन से जे छैलू रे ब्याह रे भोज बिच सट्टे गे रे हिन।' फिर तिन्हा ने मेरे जो बोलेया; "ए वचन परमेश्वर रे सच्चे वचन हिन।

### मेमने रा ब्याह

5 तां मै तिन्हा जो प्रणाम करणे ताई तिन्हेरे पैरां पर पेइ गया, तिन्हा ने मेरेजो बोलेया "दिख्ख, इय्यां मत कर मै तेरे ते तेरे भ्याळां रा सर्गीं दास है जे यीशु जी री ग्वाही दैणे पर स्थिर हैं। परमेश्वर जो इ प्रणाम कर: किजोकी यीशु जी री ग्वाही भविष्यवाणी री आत्मा है। 6 फिरी मै स्वर्ग जो खुले रा दिख्खेया, ते दिख्खेया की इक्क सफेद घोड़ा है: ते तिस पर इक्क सवार है, जे भरोसे जोग्गा ते सच केहलादां; ते से धर्म कने न्याय ते लड़ाई करदा। 7 तिसेरी हाक्कि आग री ज्वाला है, ते तिसेरे सिर पर मते सारे राजमुकूट हिन। तिस पर इक्क नां लिख्खे रा है जिसजो तिसजो छड होर कोई नी जाणदा। 8 से खून छिडके रे कपड़े पाए रे है, ते तिसेरा नां परमेश्वर रा वचन है। 9 स्वर्ग री सेना सफेद घोड़ेआं पर सवार ते सफेद ते साफ मलमल पाए रे तिसेरे पिच्छे-पिच्छे है। 10 जाती-जाती जो मारणे ताई तिसेरे मुँह का इक्क चोखी तलवार निकलदी। से लोए रा राज दडं लेय रे तिन्हा पर राज करगा, ते सरव-शक्तिमान परमेश्वर रे भयानक गुस्से री जलजलाहट री मदीरा रे कुडं बिच दाख रोदंगा।

### चिट्टे घोड़े वाळा

11 तिसेरे कपड़े ते लात्त पर ए ना लिख्खे रा है: "राज्जेयां रा राजा ते प्रभुआं रा प्रभु"। 12 फिरी मै इक्क स्वर्गदूत जो सुरज पर खडिते रे दिख्खेया। तिनिए बड़े अवाज कने पुकारी करी आसमान रे बिच का उड्डणे वाळे सारे पक्षियां जो बोलेया "आओ, परमेश्वर रे बड्डे भोज ताई कट्टि जाओ, 13 जिस कने तुसी राज्जेयां रा माँस, ते सरदारों रा माँस, ते शक्तमान लोक्कां रा माँस, ते घोड़ेयां रा ते तिन्हेरे सवारां रा माँस, ते अजाद ते नौकर, क्या छोटे ते क्या बड्डे, सब लोक्कां रा माँस खाओ।" 14 फिरी मै तिस जानवर, ते धरती रे राज्जेया ते तिन्हेरी सेना जो तिस घोड़े रे सवार ते तिसेरी सेना कने लडणे ताई कट्टे दिख्खेया। 15 से जानवर, ते तिसेरे कन्ने से भविष्यद्वक्ता पकडेया गया जिनिए तिसेरे सामणे इदेय चमत्कार दखाए थिये जिन्हेरे जरिए तिसने तिन्हा जो भरमाया जिन्हा पर तिस जानवर री छाप थी ते जे तिसेरी मुर्ती री पुजा करदे थिये। ए दोन्नो जिन्दे जी तिस आग री झिल्ल बिच जे गन्धक कने जलदी पाए गे। 16 बचे रे लोक तिस घोड़े रे सवार री तलवार कने, जे तिसेरे मुँह का निकलदी थी, मारे दित्ते गे; ते सारे पक्षि तिन्हेरे माँस कने रज्जि गे। 17 फिरी मै इक्क स्वर्गदूत जो स्वर्ग का उतरदे दिख्खेया, तिसेरे हत्थ बिच अथाह कुडं री चाबी ते इक्क बड्डि संगळ थी। 18 तिनिए तिस अजगर, मतलब पुराणे साप्प जो जे इबलिस ते शैतान है, पकड़ी करी हजार सालां ताई बन्नि दित्तेया। 19 ते तिसजो अथाह-कुडं बिच पाई करी बंद करी दित्तेया ते तिस पर मोहर लाई दित्ति की से हजार सालां रे पुरे होणे तिकर जाती-जाती रे लोक्कां जो फिरी ना भरमाए इस्सेरे बाद जरूरी है की से थोड़ी देर ताई फिरी खोलेया जाए। 20 फिरी मै सिहांसन दिख्खे, ते तिन्हा पर लोक बेइ गे, ते तिन्हा जो ईसांफ करणे रा हाक्क दित्तेया गया, मै तिन्हा री आत्मा जो बी दिख्खेया, जिन्हेरे सिर यीशु जी री ग्वाही दैणे ते परमेश्वर रे वचन रे वजह कने कटि दित्ते गे, ते जिन्हा ने ना तिस जानवर री, ते तिसेरी मुर्ती री पुजा किक्ति थी, ते ना तिसेरी छाप अपणे मथ्थे ते हत्थां पर लिक्ति थी, से जिन्हे होई करी मसीह कने हजार सालां तिकर राज करदे रेय। 21 जां तिकर ए हजार साल पुरे नी होए तां तोकर बचे रे मरे रे लोक जिन्दे न होए। ए ता पैहल्ला पुनरुत्थान है।

### हजार सालां रा राज

**20** धन अते पवित्र से है, जे इस पैहल्ले पुनरुत्थान रा हिस्सेदार है, इदेयां पर दुई मौत रा कोइ हक्क नी है, पर से परमेश्वर ते मसीह रे याजक होणे ते तिसेरे कने हजार सालां तिकर राज करगे। 2 जां हजार साल पुरे होई जाणे तां शैतान कैद का छड्डी दित्तेया जाणा। 3 तिनिए तिन्हा जातियां जो जे धरती रे चारो पास्से होणी, मतलब गोग ते मागोग जो जिन्हेरी गिनती समुन्दर री रेत जिन्नि होणी, भडकाई करी लड़ाई करणे ताई कट्टा करणे जो निकलणा। 4 तिन्हा ने सारी धरती पर फैलि करी पवित्र लोक्कां री छावनी ते प्यारे सैहर जो घेरी लैणा ते आग ने स्वर्ग का उतरी करी तिन्हेरे जो फुकि दैणा। 5 तिन्हेरा भडकाणे वाळा शैतान आग ते गधक री तिस झिल्ल बिच जिसेरे बिच से जानवर ते झुट्टा भविष्यद्वक्ता बी होणा पाई दित्ते जाणा: ते से रात-दिन हमेसा-हमेसा तिकर तडपदे रहन्गे। 6 फिरी मै इक्क बड्डा सफेद सिहांसन ते तिसेजो, जे तिस पर बैठा रा है, तिसेरे सामणे का धरती ते आसमान न्हसी गे, ते तिन्हेरे ताई जगह नी मिलि।

### शैतान रा खातमा

7 फिरी मै छोटे-बड्डे सारे मरे रे लोक्कां जो सिहांसन रे सामणे खडिते रे दिख्खेया, ते कताबां खोल्लि गेइ ते फिरी इक्क हो कताब खोल्लि गेइ, मतलब जिन्दगी री कताब: ते जिय्यां तिन्हा कताबां बिच लिख्खे रा थिया, तिय्यां ई तिन्हा जो कम्मां रे हसाब कने मरे रे लोक्कां रा इसाफ किक्तेया गया। 8 समुन्दर ने तिन्हा मरे रे लोक्कां जो जे तिस बिच थोये देइ दित्तेया, ते मौत ते पताल ने तिन्हा मरे रे लोक्कां जो जे तिन्हा बिच थिये देइ दित्तेया; ते तिन्हा बिच का हर इक्क रे कम्मां रे हसाब कने तिन्हेरा ईसांफ किक्तेया गया। 9 मौत रे पताल आग री झील बिच पाए गे। ए आग री झील दुई मौत है; 10 ते जिस



कुसकी रा ना जिन्दगी कताब बिच लिख्खे रा ना मिलेया, से आग री झील बिच पाया गया।

### इक बड्डा सफेद सिहांसन ते आखरी इन्साफ

11 फिरी मै नौये आसमान ते नौइ जमीन जो दिख्खेया, किजोकी पैहला आसमान ते पैली जमीन 12 फिरी मै पवित्र नगर नौये यरुशलेम जो स्वर्ग का परमेश्वर रे नेडे का उतरदे दिख्खेया। से तिस दुल्हन साई थी जे अपणे लाडे ताई सिगांर किती री हो। 13 फिरी मै सिहांसन बिच का कुसकी जो उच्चि अवाज बिच ए बोलदे होये सुणेया, "दिख, परमेश्वर रा डेरा म्हणुआं रे मझाटे है। तिन्हा ने तिन्हेरे कने डेरा बसाणा, ते से तिन्हेरे लोक होणे, ते परमेश्वर नै अप्पु तिन्हेरे मझाटे रैहणा ते तिन्हेरा परमेश्वर होणा। 14 तिन्हा ने तिन्हेरे हाक्खि का तिन्हेरे अथरु पुर्जी दैणे; ते तिसेरे बाद मौत नी रैहणी, ते ना शौक, ना अफसोस, ना दर्द; पैहलि गल्लां जादी रेइ। 15 जे सिहांसन पर बैठे रा थिया, तिन्हा ने बोलेया, "दिख्ख, मै सारा किछ नोया करी दिदां।" फिरी तिन्हा ने बोलेया, "लिख्खी ले, किजोकी ए वचन भरोसे रे जोग्मा ते सच है।"

### नौया आसमान ते नौई जमीन

21 फिरी तिन्हा ने मेरे जो बोलेया, "ए गल्लां पुरी होइ गे री हिन, मै अल्फा ते ओमेगा, आदी ते अंत है। मै प्यासे जो जिन्दगी रे पाणी बिच का मुफ्त ई पुआणा। 2 जे जीत हासिल करे सेई इन्हा चिजां रा वारिस होणा, ते मै तिसेरा परमेश्वर होणा ते से मेरा पुत्र होणा। 3 अपण डरपोकां, ते भरोसा ना करणे वाळेयां, ते घिनौने, ते हत्यारे ते व्यभिचारी, ते टोहनां, ते मुर्ती पुजा करणे वाळे, ते सारे झुटेयां रा हिस्सा तिस झील बिच मिळणा जे आग ते गंधक कने फुकिदीं रैहन्दिः।" 4 फिरी जिन्हा सात्त स्वर्गदुतां का सात्त आखरी मुसीबतां कने भरे रे सात्त कटौरे थिये, तिन्हा बिच का इक मेरे का आया ते मेरे कने गल्लां करी के बोलेया, "इत्ते आ, मै तेरे जो दुल्हन मतलब दुल्हे री लाडी दिखादां।" 5 तां से मेरे जो आत्मा बिच इक बड्डे ते उच्चे पहाड़ पर लेइ गया ते पवित्र नगर यरुशलेम जो स्वर्ग का परमेश्वर रे नेडे का उतरदे दस्सेया। 6 परमेश्वर री महीमा तिन्हा बिच थी ते तिसेरी ज्योती बडी जादा किमती बड्डे, मतलब बिल्लोर साई यशब साई साफ थी। 7 तिसेरी शहरपनाह बडी उच्चि थी, ते तिसेरे बारा दवाजे ते दरवाजेयाम पर बारा स्वर्गदूत थिये; ते तिन्हा दरवाजेयां पर इस्राएलियां रे बारा गोत्रां रे नां लिख्खे रे थिये। 8 पूरब रे पास्से त्रै दरवाजे, उत्तर रे पास्से त्रै दरवाजे, दक्षिण रे पास्से त्रै दरवाजे, ते पश्चिम रे पास्से त्रै दरवाजे थे।

### नौया यरुशलेम

9 नगर री शहरपनाह री बारां नीआं थी ते तिन्हा पर छैलू रे बारां प्रेरितां रे बारां नां लिख्खे रे थिये। 10 जे मेरे कने गल्लां करदा थिया तिसेरे का नर ते तिसेरे दरवाजेयां ते तिसेरी शहरपनाह जो नपणे ताई इक सोत्रे रा गज थिया। 11 से नगर चौरस अकार बिच बसे रा थिया ते तिसेरी लम्बाई, चौडाई रे बराबर थी; ते तिसने तिस गज कने तिस नगर जो नापेया, तां से साड्डे सात सौ कोस रा निकळेया: तिसेरी लम्बाई ते चौडाई ते उचाई बराबर थी। 12 तिसने तिसेरी शहरपनाह जो महुआं रे मतलब स्वर्गदूत रे नाप कने नापेया, तां से इक सौ चुरताळि हत्थ निकळी। 13 तिसेरी शहरपनाह यशब री बणी री थी, ते नगर इदेय चौखे सोत्रे रा थिया जे साफ सीसे साई हो। 14 तिस नगर री नीआं हर तरिके रे किमती बड्डेया कने सजाई री गी थी; पैहलि नी यशब री, ते नीलमणी री, तिजि लालडि री, चौथी मरकत री, 15 पर्जमि गोमेदक री, छटी माणक्य री, सतमीपीत मणी री, अठमी पेरोज की, नौमी पुखराज री, दसमी लहसनी की, ग्यारमी धुमकार्त री, ते बारमी याकूत री थी। 16 बारा दरवाजे बारा मौतियां रे थे; इक-इक दरवाजे इक-इक मौती रा बणे रा थिया। नगर री सडक साफ सीसे साई साफ सोत्रे री थी। 17 मै तिस बिच कोइ देहरा नी दिख्खेया, किजोकी सर्वशक्तिमान प्रभू परमेश्वर ते छैलू तिसेरा देहरा है। 18 तिस नगर बिच सूरज ते चाँद री रौसनी री जरूरत नी, किजोकी परमेश्वर रे तेज कने तिस बिच रौसनी होया करदी है, ते छैलू तिसेरा दीया है। 19 जाती-जाती रे लोकां ने तिसेरी रौसनी बिच चलणा-फिरणा, ते धरती रे राजा अपणे-

अपणे तेज रा समान तिस बिच लागें। 20 तिसेरे दरवाजे धियाडी कदी बंद नी होणे, ते रात तिन्हे नी होणी। 21 लोकां ने जाती-जाती रे तेज ते शोहरत रा समान तिस बिच लाणा। 22 अपण तिस बिच कोई अपवित्र चीज, या गदें कम्म करणे वाळा, या झुट रा गदणे वाळा कुसकी तरिके कने तिस बिच आई नी सकणा, अपण सिर्फ से लोक जिन्हेरे नां छैलू री जिन्दगी री कताब बिच लिख्खे रे हिन 23 फिरी तिनि ए मिन्जो बिल्लोर साई झलकदी, जींदगी रे पाणी रा दरिया दस्सेया, जेडी परमेश्वर ते मेन्ने रे सिहांसन का निकळी करी 24 तिस सैहर रे बिलकुल बिच का होई करी निकळदी। दरिया रे इस पास्से ते उस पास्से जींदगी रा बूडा थिया; तिस अंदर बारा किस्मे रे फळ लगदे थिये, ते से हर महीने फळदा थिया; ते तिस बुट्टे रे पत्तेयां का जात-जात रे महु खरे हुंदे थिये। 25 फिरी सफ नी होणा, ते परमेश्वर ते मेन्ने रा सीहांसन तिस सैहर अंदर होणा ते तिसेरे नोकरां ने तिसेरी सेवा करणी। 26 तिन्हा ने तिसेरा मुंह दिखणा, ते तिसेरा नां तिन्हेरे मथ्येयां पर लिख्खेरा होणा। 27 फिरी रात नी होणी, ते तिन्हा जो दीय्येयां ते सूरज री लौ री जरूरत नी होणी, किजोकी प्रभु परमेश्वर ने तिन्हा जो लौ दैणी, ते तिन्हा ने जुगां-जुगां ताई राज करणा।

22 फिरी तिनि ए मिन्जो बोलेया, "ए गल्लां भरोसे रे लाएक ते सच्ची हिन। प्रभु जी ने, जेडे भविस्ववाणी करणे वाळेयां री आत्मां रे परमेश्वर हिन, अपणे स्वर्गदूत जो इधेरे ताई भेजेया कि अपणे दासां जो से गल्लां, जिन्हेरा पूरा होणा जरूरी है, दस्सो।" 2 "दिख, मै तोळे ईणे वाळा है! से धन्न है, जे इस कताब री भविस्वाणीयां जो मनदा।" 3 मै से ई युहना है, जेडा इन्हा गल्लां जो सुणदा ते दिखदा थिया। जां मै दिख्खे या ते सुणेया, ता जे स्वर्गदूत मिन्जो इ गल्लां दसदा थिया, मै तिसेरे पैरां जो बंदणे ताई छुडकी पेया। 4 अपण तिनि ए मिन्जो बोलेया, "दिख, इय्यां मत कर; किजोकी मै तेरा, ते तेरे भ्याळ भविस्ववक्तां, ते इस कताब री गल्लां जो मनणे वाळेयां रा सोगी दास है। परमेश्वर जो ई दण्डवत करेयां।" 5 फिरी तिनि ए मिन्जो बोलेया, "इस कताब री भविस्ववाणी री गल्लां जो बंद मत करां; किजोकी से बेला ईणे वाळा है।"

### यीशु जी रा वापस आणा

6 जेडा बेनियाई करदा, से बेनियाई ई करदा रेयो; ते जेडा मलिन है, से मलिन बणी रेयो; ते जेडा धरमी है, से धरमी बणी रेयो; ते जेडा पवित्तर है; से पवित्तर बणी रेयो। 7 "दिख, मै जल्दी ईणे वाळा है; ते हर इक जणे रे कम रे साब्बे बदला दैणे ताई प्रतिफळ मेरे का है। 8 मै अल्फा ते ओमेगा, पैला ते आखरी, आदी ते अंत है।" 9 "धन्न है से, जेडे अपणे कपडे धोई लिंदे, किजोकी तिनां जो जींदगी रे बुट्टे रे नेडे ईणे रा हक मिलणा, ते तिन्हा ने फाटकां का होई करी सैहरा अंदर जाणा। 10 अपण कुत्ते, जादू-टोळे, व्याभिचारी, खूनी ते मूरतियां री पूजा करणे वाळे, ते हर इक झूठ रा चाहे वाळा ते गदणे वाळा बाहर रैणा। 11 "मिन्जो यीशु जी ने अपणे स्वर्गदूत जो इधेरे ताई भेजेया कि तुसां रे अगे कलीसियां रे बारे अन्दर इन्हा गल्लां री गवाही देन। मै दाऊद रा मूल ते वंस, ते भोर रा लसकदा तारा है।" 12 आत्मा ते नोलाडी दोहई बोलदे, "आ!" ते सुनणे वाळा बी बोले, "आ!" जे प्यासा होए से आओ, ते जे कोई चाहो से जींदगी रा पाणी संतमेंत लेयो। 13 मै हर इक जो, जेडा इस कताब री भविस्ववाणियां जो सुणदा, गवाही दिन्दा: अगर कोई महु इन्हा गल्लां अन्दर किछ बधाओ ता ने परमेश्वर तिन्हा पर मुसीबतां जो, जेडी इस कताब अन्दर लिख्खेरियां हिन, तिस पर बधाणा। 14 अगर कोई इस भविस्ववाणी री कताब री गल्लां बिच का किछ कड्डी देयो, ता परमेश्वर ने तिस जीन्दगी रे बुट्टे ते पवित्तर सैहर बिच का, जिसेरे बारे अन्दर इस कताब अन्दर लिख्खेरा है, तिसेरा हेस्सा कड्डी दैणा। 15 जेडा कोई इन्हा गल्लां री गवाही दिंदा से ए बोलदा, "हाँ, मै तोळे ही ईणे वाळा है।" आमीन। ओ प्रभु यीशु जी आओ! 16 प्रभु यीशु जी रा अनुग्रह पवित्तर महुआं रे कन्ने रेयो। आमीन। 17 आत्मा ते नोलाडी दोहई बोलदे, "आ!" ते सुनणे वाळा बी बोले, "आ!" जे प्यासा होए से आओ, ते जे कोई चाहो से जींदगी रा पाणी संतमेंत लेयो। 18 मै हर इक जो, जेडा इस कताब री भविस्ववाणियां जो सुणदा, गवाही दिन्दा: अगर कोई महु इन्हा गल्लां अन्दर किछ बधाओ ता ने परमेश्वर तिन्हा पर मुसीबतां जो, जेडी इस कताब अन्दर लिख्खेरियां हिन,

तिस पर बधाणा। <sup>19</sup> अगर कोई इस भविष्यवाणी री कताब री गल्लां बिच का किछ कड्डी देयो, ता परमेश्वर ने तिस जीन्दगी रे बुट्टे ते पवित्तर सैहर बिच का, जिसेरे बारे अन्दर इस कताब अन्दर लिख्खेरा है, तिसेरा हेस्सा कड्डी

दैणा। <sup>20</sup> जेड़ा कोई इन्हा गल्लां री गवाही दिंदा से ए बोलदा, “हाँ, मैं तोळे ही ईणे वाळा है!” आमीन। ओ प्रभु यीशु जी आओ! <sup>21</sup> प्रभु यीशु जी रा अनुग्रह पवित्तर मल्लुआँ रे कन्ने रेयो। आमीन।